

I Fiyowe Uret

The New Testament in Tiruray of the Philippines



I Fiyowe Uret

The New Testament in Tiruray of the Philippines
[tiy]

Translation by
© 2002, Wycliffe Bible Translators, Inc.

First edition
2002, Wycliffe Bible Translators, Inc.

Web version

© 2018, Wycliffe Bible Translators, Inc., Orlando, FL 35862-8200 USA
<http://www.Wycliffe.org>

<http://www.ScriptureEarth.org>

© 2002, Wycliffe Bible Translators, Inc. All rights reserved.

This translation is made available to you under the terms of the Creative Commons license (Attribution-Noncommercial-No Derivative Works).

<http://creativecommons.org/licenses/by-nc-nd/4.0>

Your are free to share — copy, distribute, transmit, and extract portions or quotations from this work, provided that you include the above copyright information under the following conditions:

- **Attribution.** You must attribute the work to the author (but not in any way that suggests that they endorse you or your use of the work).
- **Noncommercial.** You do not sell this work for profit.
- **No Derivative Works.** You do not make any derivative works that change any of the actual words or punctuation of the Scriptures.

Notice — For any reuse or distribution, you must make clear to others the license terms of this work. Permissions beyond the scope of this license may be available if you contact us with your request.

Table of Contents

	<i>page</i>
Mateo	Mat 5
Markos	Mrk 72
Lukas	Luk 114
Juan	Juan 180
Rénigoy de Apostol	Apl 230
Roma	Rom 295
1 Korinto	1 Ko 324
2 Korinto	2 Ko 352
Galasia	Gal 370
Efeso	Efo 381
Filipos	Fls 391
Kolosas	Kol 398
1 Tesalonika	1 Te 405
2 Tesalonika	2 Te 411
1 Timoteo	1 Ti 415
2 Timoteo	2 Ti 423
Tito	Tit 429
Filemon	Flm 433
De Judio	Jdo 435
Santiago	San 457
1 Pedro	1 Pe 465
2 Pedro	2 Pe 473
1 Juan	1 Jn 478
2 Juan	2 Jn 485
3 Juan	3 Jn 487
Judas	Jds 489
Kéfégétigan	Kéf 492
Read the New Testament	522

I Fiyowe Uret Sénulat

Mateowe

Been i niy Fiyowe Uret sénulat Mateowe fantag bé Jesu Kristowe. Sénulat Mateowey de ténero Jesus, sani Nga i Tuluse, brab de mékégaif do rénigo no. Sénulat Mateowe soy Jesuse, Been i "Kristowe". I atag i "Kristowe", sani fénémili i Tuluse méguléw. Bé do gétah, ménongot-ongot i de Judio bé kégumah i fénémili i Tuluse méguléw. Ménongot-ongot ro non bé do gétah wén i de sénarigoy Tuluse muret bé kékérél ne, bénréh roy wén i gégumahe ségétaw fénémili i Tuluse méguléw bé de Judio. Fénggétiga Mateowey ni étew bé Beeney Jesuse, sani "Kristowe".

Endob i de odoroy de Judio, méndaléw ro fo bé Jesuse brab ménrarék ro de. Mélaw nongot ro bé de gémamak kukuman, sani méguléwe tidéw dob ingéde Roma, bé féléhuén i Jesuse. Endob amun ménléhuén i Jesuse dob kruse, brab amun ménlébengén, méntébule. Mélaw tintu gétiga tom bé i Jesuse Beene foy tintuwe Nga i Tuluse.

I Mateowe, sani séménulate bé ni Fiyo Uret, ségétaw so bé de kuyug Jesus amun ménbati sénay Jesuse dob duniyae ni. Mélaw gétiga tom bé i kéluhanay do sénulatén toow fo toow.

I de katufua Jesu Kristowe

1 ¹Ay niy de dawét i de katufua Jesu Kristo, sani ségétewe séfu Datu Dabide séfu Abraham. ²I Abrahamey boh Isake. Atin i Isakey boh Jakobe. Atin i Jakobey boh Judahe brab de dumo no sétiman boh. ³Atin i Judahey boh Farese brab Sarawe. (Tamar i idéng ruwe.) Atin i Faresey boh Esrome. Atin i Esromey boh Rame. ⁴Atin i Ramey boh Aminadabe. Atin i Aminadabey boh Nasone. Atin i Nasoney boh Salmone. ⁵Atin i Salmoney boh Boose. (Rahab i idéng ne.) Atin i Boosey boh Obede. (Rut i idéng ne.) Atin i Obedey boh Jesewe. ⁶Atin i Jesewey boh Datu Dabide. Atin i Dabidey boh Solomone. (I idéng ne been i bawag Uriase bé do gétah.) ⁷Atin i Solomoney boh Roboame. Atin i Roboamey boh Abiase. Atin Abias i boh Asawe. ⁸Atin i Asawey boh Josefate. Atin i Josefatey boh Jorame. Atin i Joramey boh Osiase. ⁹Atin i Osiasey boh Jotame. Atin i

Jotamey boh Akase. Atin i Akasey boh Esekayawe. ¹⁰Atin i Esekayawey boh Manasese. Atin i Manasesey boh Amone. Atin i Amoney boh Josiase. ¹¹Atin i Josiasey boh Jekoniase brab de dumo no sétiman boh. Kéluhana ro mén-uwit mangéy dob mérayue ingéd féndawét Babilonia amun ténabanan i karowe ingéd bé girawe. ¹²Amun diyo ron bati dob Babilonia, i Jekoniase wén i ngaén féndawét Salatiel. Atin i Salatieley boh Sorobabele. ¹³Atin i Sorobabeley boh Abiude. Atin i Abiudey boh Eliakime. Atin i Eliakimey boh Asore. ¹⁴Atin i Asorey boh Sadoke. Atin i Sadokey boh Akime. Atin i Akimey boh Eliude. ¹⁵Atin i Eliudey boh Eleasare. Atin i Eleasarey boh Matane. Atin i Mataney boh Jakobe. ¹⁶Atin i Jakobey boh Josehe, sani bawag Mariahe. Atin i Mariawey idéng Jesuse féndawét Kristo non Been i fénémili i Tuluse méguléw. ¹⁷Mélaw folo bra fot gékansad i de katufuan tidew dob Abrahame taman dob Dabide. Atin tidew dob Dabide taman dob gaiwe mén-uwit i de Judio mangéy Babilonia folo bra fot so gékansad i de katufuan. Atin tidew béno taman bé kéumah Kristowe folo bra fot so gékansad i de katufuan.

I kéumah Jesu Kristowe

¹⁸Ay ni urete fantag bé kéumah Jesu Kristowe. I idéng ne Maria. Atin i Mariahe ténlana nén fébawagén dob ségétéwe lagéy féndawét Jose. Endob amun énda séna sébawag ro de, ménwaléy obor i Mariahe non fénobor i Rémogor i Tuluse. Enggétiga Mariahey ni. ¹⁹Atin i Josehe, métintu étew, mélaw ménika sébawag bé Mariahe non oborén. Endob fiyo étew i Josehe, mélaw mika de ké kékmalanan i Mariahe. Mélaw ménuyot i Josehe de ké sérontos bé Mariahe sékémén saén. ²⁰Dob lala Josehe mégitung fantag bé de ni, ménfégitoy téakiwe tidew dob Kadnane dob téginéf ne. Ménbéréh i téakiwe ni mano, “O Jose, séfu Datu Dabid, kago magalang-galang mawag bé Mariahe, non i funa nuwe mén-obor sabaf bé barakat i Rémogor i Tuluse. ²¹Mégénga moso i Mariahe ségétéw nga lagéy. Atin fédawétém Jesus, non Been i mémukase bé de étewén dob de sala ro.” Been i bénréh i téakiwe.

²²I funane ménrigoy kéluhanay de ni inok métuman i fénbéréh i Kadnane bé sénarigo nuwe étew mano, ²³“I kénogone waléy obor, brab mégénga nga lagéy, atin fédawétén Emanuel.” (I atag i dawéte Emanuel “Bati i Tuluse dob betome.”)

²⁴Tidew béno, énggétékénal i Josehe, atin nunuro noy fémandu i téakiwe de, mélaw bénawagén i Mariahe. ²⁵Endob énda ménstifon ro fidong taman énda séna mumah i nga ne. Brab amun ménmahén, féndawétén Jesus.

I kégumah i de gétuwan étew

2 ¹I Jesuse ménmah dob ingéde féndawét Betlehem dob sakuf i dakéle ingéd féndawét Judea, amun Herod sénay méguléwe de. Atin

énda mérugayén tidéw bé kéumah Jesuse, wén i de gétuwan do étew tidéw dob mérayue ingéd dob sébangan ménagéw ro mangéy dob ingéde Jerusalem. I de ni do lagéy furung gésobut bé de tanda dob de gitoon.

² Atin amun énggumah ro dob Jerusalem, ménénginsa ro maro, “Hon i gonoy Ngae, sani waléye moso Datu i de Judio? Non énggito gey i gitoone dob sébangan tanda i kéumah ne. Atin mélaw angéyé key fénadafén.”

³ Atin i Herode méguléw, amun énggélingoo noy fantage bé ni ségiyo datu, toow fo ménbuku, brab beroy de kéluhanay de étew bati dob Jerusalem. ⁴ Mélaw lénimud Herodey kéluhanay de odoroy de fadi brab de téromo bé kitab i de Judio, atin ménénginsa dob berowe mano, “Hon i gonoy umaha Kristowe de, sani fénémili i Tuluse méguléw?”

⁵ Atin séménumbul ro maro, “Fatut mumah i Kristowe dob ingéde Betlehem dob sakuf i dakéle ni ingéd Judea. Non been i niy sénulat i sénarigoy Tuluse muret bé kébérén ne mano, ⁶ ‘I beeme, o Betlehem, dob dakéle ingéd Judawe, tintu békén go toow na fo gérifantad bé kéluhanay de ingéd dob Juda. Non tidéw dob beeme moso i odorone méguléw bé de étew gu do Judio.’”

⁷ Tidéw béno, féntawag Herodey de ni gétuwan do étew tidéw dob sébangan mangéy sélimud dob beene énda i ségiyo étew de gétigan. Atin fénénginsaa no bero ké atti tintuwe gai énggito roy gitoone ni. Amun énggétiga Herode, ⁸ sénuguén bero mangéy Betlehem mano, “Agéw gom, toow gom fo séléd i Ngao no. Atin buluk gito gom, fégétiga kom begén inok angéyé ku so fénadafén.” ⁹⁻¹⁰ Tidéw béno, amun énggélingoo roy bénréh Datu Herode, ménagéw ro. Atin énggito ro man i gitoone ni, sani gitoone so énggito ro dob sébangane bé gétahe. Toow ro fo ménoror amun énggito ro. Atin i gitoone ni ménagéw métah bero taman téménrén dob gatagay gonoy Ngae ni. Atin ménfuray ro bé gitoone ni taman dob no lawi. ¹¹ Amun énggumah ro diyo, ménahur ro brab énggito roy Ngae ni brab Mariahe idéngén. Atin ménlingkuwé ro dob adafay Ngae ni ménadaf de. Tidéw béno, bénungkal roy de balilaga tamuk nuwit ro do bélowan, do dukah, brab do fégéfáamut féndawéti mira. Atin niray ro dob Jesuse.

¹² Tidéw béno, i Tuluse féningatén bero dob téginéf ruwe bé békénén séfule ro mangéy dob Datu Herode. Mélaw ménule ro mangéy dob karowe ingéd dob ségiyowe aguwon.

I kénéféraréy ruwe mangéy Egipto

¹³ Amun ménagéw i de ni gétuwan do étew, méntefégítoty télakiy Kadnane dob Josehe dob téginéf ne. Atin bénréhén dob Josehe mano, “Tek go, brab uwitém i Ngae brab idéng ne méraréy mangéy dob ingéde Egipto. Atin bati gom diyo taman béréhé ku beem ké fakay gomén mule. Non i Datu Herode sélédé noy Ngae ni inok féléhué no.”

¹⁴Mélaw méntek i Josehe fiyon fo ké kérara kélungonon, atin nuwitén i Ngae ni brab idéng ne mangéy Egipto. ¹⁵Atin ménbati ro diyo taman bé kéléhu Herode. Ménrigoy ni inok métuman i fénbéréh i Kadnane bé sénarigo nuwe mano, “Ténawag guy Nga guwe inok mésut tidéw Egipto.”

¹⁶Endob i Herode, amun énggétiga noy fénggakaray de gétuwan do étew tidéw sébangan, toow fo ménkérit. Mélaw sénuguén i de sundalo mangéy Betlehem brab dob de ingéd géliwé de, inok féléhué roy kéluhanay de nga lagéy tidéw ruwo gébélantuwa i idad ne mangéy fantad. I Herode énggétiga noy idad i Ngae ni sabaf bé kékéréh i de gétuwan do étew bé gaiwe ménst i gitoo no.

¹⁷Mélaw métuman i ménrugayén kékéréh i ségétéwe sénarigoy Tuluse muret bé kékéréh ne féndawét Jeremias mano, ¹⁸“Wén i émbéréhé énggélingoon dob ingéde Rama, kémérew brab rémuung. Non kémérew i Rakele sabaf bé de ngaén. Enda i géfedoror de non i kéluhanay de ngaén ménléhu.”

I késéfule ruwe mangéy Nasaret

¹⁹Amun ménléhu i Datu Herode, i télakiy Kadnane méntefégitob Dob Josehe dob Egipto dob téginéf ne. ²⁰Atin ménbéréh i télakiwe ni mano, “Tek go brab uwitén i Ngae ni brab idéng ne mule mangéy dob ingéde Israel. Non ménléhuén i de méméléhu damén bé Ngae ni.” ²¹Mélaw méntek i Josehe atin nuwitén i Ngae brab idéng ne mule mangéy Israel.

²²Endob énda ménbati ro dob Judea non ménggilak i Josehe non énggélingoo noy Arkelaowe ménwaléy méguléw amun ménléhu i boh ne Datu Herod. Atin féninatén man i Josehe dob téginéf ne, mélaw méntaus ro mangéy dob sakuf i dakéle ingéd féndawét Galilea. ²³Atin ménbati ro diyo dob ingéde féndawét Nasaret. Mélaw métuman i ménrugayén kékéréh i de sénarigoy Tuluse muret bé kékéréh ne maro, “Fédawétén i Kristowe ‘ségétéw tidéw dob Nasaret.’”

I kúret Juan Bautistawe

3 ¹Bé no do gai, amun ménifus i firoye gébélantuwa, i Juan Bautistawe énggumah dob gonone énda i étew de batí dob sakuf i dakéle ingéd Judea. Atin nuretén mano, ²“Kailanga kom gésénule bé de sala gom brab témagak bé de tete adat gom non gédétén gumah i gaiwe méguléw i Tuluse dob de étewén.” ³I Juane ni, been i bénréh i méntelatae sénarigoy Tuluse muret bé kékéréh ne féndawét Isaias mano, “Wén i ségétéwe mékes dob gonone énda i étew de batí mano, ‘Tafay gom i aguwoy Kadnane. Fééntang gom i aguwo nuwe.’”

⁴Atin kéménagal i Juane nawél buk dakél binatang féndawét kameliyo, brab kulit binatang i légét ne. Atin i amaé nuwe kasuk brab téné. ⁵Atin ménangéy dob beeney médoowe do étew tidéw Jerusalem, brab tidéw dob

kéluhanay de ingéd sakuf Judeawe, brab de étew bati dob de ingéd gédét dob wayége Jordan. ⁶ Atin amun fénayag roy de sala ro, bénautis Juane bero dob wayége Jordan.

⁷ Atin médooy soy de Fariseo brab de Saduseo ménangéy dob Juane inok fébautis ro. Endob amun énggito no bero, ménbérélh i Juane mano, “I begome maak do ulé gom non tete i de rigoné kom. Sedek mangéy gom dini? Enda gégéraréy gom tidéw dob kékukum i Tuluse moso ké fébautis gom saén. ⁸ Buluk toow gomén gésénule bé de sala gom brab té nagak gom i de tete adat gom, féténgténg gom i kégésénule gome bé de fiyo ululané kom. ⁹ Atin kagom fégítungén de ké i Tuluse fukasé no begom dob de sala gom sabaf bé begom i de séfu Abraham. Bérélhé ku begom, fakay géféléyaléyoy Tuluse séfu Abrahamey de batéw ni. ¹⁰ Béleewe ni, gédétén i kékukum i Tuluse bé de tete étew. Ségiléw bé falakule méntafayén ménténa dob darir i kayéwe inok i de kayéw énda mégonok ro fiyo, tuwongén atin ibérén dob aféye inok métuwégi. ¹¹ I begéne, bautiso ku begom bé wayége inok fégito gom énggésénule gom bé de sala gom. Endob wén nay gé gumah gé tundug begén brab bautisé no begom bé Rémogor i Tuluse brab aféye. Toow na fo gérotor bé begéne. Fiyon foy safatos ne, énda médaitu de mibit. ¹² Féganané noy de fiyo étew bé de tete étew ségiléw bé ségétewe métóf. I fégéétof ne diyo dob kémér ne inok fégéétofén bé énrek ne brab fégétimuén bé faréye dob kiwot ne. I de ukofén tuwégé no dob aféye énda émfandaén.”

I kébautise bé Jesuse

¹³ Bé no do gai, ménagéw i Jesuse tidéw Galilea mangéy dob wayége ni Jordan. Atin ménfégédét dob Juane inok fébautis de. ¹⁴ Endob gélélé Juane damén mano, “Begéney fatute bautiso mo, sedek Beem uman i mangéy fébautis begén?”

¹⁵ Endob séménumbul i Jesuse mano, “Fédayáém saén béleewe ni. Non fatut rigoné toy kéluhanay kétayay Tuluse.” Mélaw ménagayun i Juane.

¹⁶ Atin amun ménbautisén i Jesuse, géménaun tidéw dob wayége. Sonom bénó, ménungka i lawayo, brab énggito noy Rémogor i Tuluse ménlus maak marafati brab méntérimféna dob Beene. ¹⁷ Atin wén i ménbérélhé tidéw dob lawayo mano, “Been i niy Nga guwe. Toow fo kégédawa ku brab tintu késuwata ku.”

Ténéngkad Satanasey Jesuse

4 ¹ Tidéw bénó, i Rémogor i Tuluse fénanangguwitén i Jesuse mangéy dob gonone énda i étew de bati, inok i odoroy de saitan fédawéti Satanas gé ténéngkada noy Jesuse rémigo tete. ² Atin amun diyo i Jesuse, énda ménamaén bé rugay i ménfote folo gé ténéngkada. Mélaw toow fo ménlayaf. ³ Atin énggumah i Satanasey dob Beene brab ménbérélhé mano, “Amuk Beemey Nga i Tuluse, féwaléyém amaén i de batéw ni.”

⁴ Endob séménumbul i Jesuse mano, “Wén i Ménsulate Kébérél i Tuluse mano, ‘Békén amaén saén i funay éteweý méuyag. Yamula kailangay éteweý kéléhanay kébérél i Tuluse.’ ”

⁵ Tidew béno, nuwit Satanasey Jesuse mangéy dob Jerusalem brab nuwitén mangéy dob toowe fo gérotor bérungoy lawi i Tuluse. ⁶ Atin ménsebérél man bé Jesuse mano, “Amuk Beemey Nga i Tuluse, antéfor go. Non wén i Ménsulate Kébérél i Tuluse mano, ‘Suguéy Tulusey de télaki no démiyaga Beem. Brab sakémé ro Beem inok énda émfali go bé de batéw, fiyon i de sékéyém.’ ”

⁷ Tidew béno, séménumbul i Jesuse mano, “Endob wén soy Ménsulate Kébérél i Tuluse mano, ‘Kago téngkadén i Kadnane Tulusém rémigo bé kétaya muwe rigonén.’ ”

⁸ Tidew béno, nuwit Satanasey Jesuse mangéy dob uruk i gérotore fo tuduk. Brab fénténgténgén dey kéléhanay de ingéd dob duniyae ni brab kéléhanay de ungangéy de ni. ⁹ Atin ménbérél man i Satanase mano, “Buluk lingkuwédo mo begén brab féngadafé mo begén, iray gu Beem i kéléhanay de ni.”

¹⁰ Endob séménumbul i Jesuse mano, “Féraléy gon Satanas! Enda féngadafé ku beem non wén i Ménsulate Kébérél i Tuluse mano, ‘Lingkuwédo go saén dob adafay Kadnane Tulusém. Been saén i féngadafé muwe.’ ”

¹¹ Tidew béno, i Satanase téngakén i Jesuse. Atin énggumah i de télaki brab ténalima roy Jesuse.

Féngganay Jesusey galbék ne

¹² Atin i Herode fénférésu noy Juan Bautistawe. Atin amun énggélingoo Jesuse, ménule mangéy Galilea. ¹³ Atin téménara saén dob ingéd ne Nasaret, brab ménangéy bati dob Kafernaum dob fédoror i dogote Galilea, fingé dob ingéde Sabuton brab Neftali. ¹⁴ Ménrigoy ni inok métuman i kébérél i sénarigoy Tuluse féndawé Isaias mano, ¹⁵ “I de étew bati dob de ingéd Sabuton brab Neftali, brab fingé dob dogote, brab dob difar i wayége Jordan, brab de étew békén Judio bati dob Galilea, ¹⁶ fiyon fo ké i de ni étew maak bati ro dob délémone non békén ro do méngintulus, gégito ro dakél solo. Atin fiyon fo ké maak kélungonon dob berowe non mégilak ro bé kéléhue, réméndaw i soloe ni dob berowe.”

¹⁷ Atin tidew bé no gai, féngganaya Jesusey kéuret ne mano, “Fatut gésénule gom bé de sala gom brab tagak gom i de tete adat gom, non gédétén i gaiwe féguléwoy Tulusey de étewén.”

Ténawag Jesusey de fot gétew fatatugés

¹⁸ Wén i no sébaan fuweh, ménagéw i Jesuse dob doror i dogote Galilea. Atin bé lala ne magéw, énggito noy ruwowe gétew lagéy sétiman idéng.

I dawét ruwe Andres brab Simon (féndawét so Pedro). Nibér roy biyala ruwe dob dogote non fatatugés ro. ¹⁹Ménbéréh i Jesuse dob berowe mano, “Enggomén, odor gom Begén, atin kagomén séméléd sédo. Tidew béeleewe ni, fésélédé ku begom étew, inok modor ro so Begén.” ²⁰Sonom béno, ténagak roy de biyala ro atin ménodor ro bé Jesuse. ²¹Bé lala ruwe magéw, énggito Jesusey de ségiyo lagéy do sétiman idéng. I dawét ruwe Santiago brab Juan. Diyo ro dob awang ruwe beroy boh ruwe féndawét Sebedeo. Fégimué roy biyala ruwe. Atin ténabar Jesuse bero. ²²Atin sonom béno, ténagak roy boh ruwe dob awange atin ménodor ro bé Jesuse.

Nuwa Jesusey de médooy do étew

²³Atin i Jesuse séménugud mangéy dob kéluhanay de ingéd dob Galilea. Atin téménoro dob de lawi féngadafan kay de Judio, brab nuretéen i Fiyowe Uret fantag bé kéféguléw i Tuluse, brab nuwaén i de démeruun do séségiyo-giyo do déruun. ²⁴Atin, ménslélag i bantuga Jesuse dob kéluhanay de ingéd dob Siria. Mélaw i de étew nuwit ro mangéy dob Beeney kéluhanay de démeruun bé séségiyo-giyowe do déruun, do démawét, brab do rénahuko saitan, brab do rebengén, brab do kimoyén. Atin énggféadi-adino Jesuse bero kéluhanan. ²⁵Atin toow fo médooy de étew ménfuray bé Jesuse, do tidew Galilea, brab do tidew Dekapolis (i atag i Dekapolise “Do Folo Ingéd”), brab tidew Jerusalem, brab tidew Judea, brab tidew dob difar i wayége Jordan.

I urete dob burure

5 ¹Atin i Jesuse amun énggito noy médoowe do étew ménlimud, ménénagé mangéy dob burure, atin ménstar diyo. Atin i de kuyugén ménfégédét ro dob Beene. ²Atin ténoro Jesuse bero mano, ³“Moror i de étew gétiga ro énda gérgo ro fiyo saliyu ké tabangay Tuluse bero, non féguléwoy Tuluse bero. ⁴Moror i de étew rémuung, non i Tuluse féfiyoné noy de fédew ro. ⁵Moror i de térfantad étew non gédoté roy ati fénasad i Tuluse. ⁶Moror i de étew toow fo méuyot ro rémigo bé kétayay Tuluse, non tabangay Tuluse de bero inok gérigono ro. ⁷Moror i de étew mégédaw bé de ségiyo étew, non mégédaw i Tuluse bero. ⁸Moror i de étew malinis i de fédew ro dob adafay Tuluse, non gito roy Tuluse moso. ⁹Moror i de étew do gémélé bé de sétiboh étew, non fédawétén ro do nga i Tuluse. ¹⁰Moror i de étew férasayén sabaf bé kétintuy adat ruwe dob adafay Tuluse, non féguléwoy Tuluse bero.

¹¹“Moror gom ké féngirasén gom brab férasayén gom brab béréhon gom tete bé kéluhanay tugie sabaf bé kéunur gome Begén. ¹²Féguyaya gom bé no gai gérumah, non i baras gome toow fo médooy diyo dob lawayo. Non loo so bé niy kékérasay i de étew bé do énggétah do sénarigoy Tuluse muret bé kékéréh ne.”

¹³ Atin fentaus Jesusey kétoro ne mano, “I begome ségiléw gom bé timuse lénawék dob amaéne inok fiyoy nonom ne. Non sabaf bé begome, waléy fiyoy de étew dob duniyae ni. Endob amuk mékédan i kétasik i timuse, éndaén géséfule i kétasik ne. Endaén i lagaén, brab fatut ibérén brab gédaay de étew ké témara ro.

¹⁴ “Atin i begome ségiléw gom bé soloe rémendaw dob délémone ni duniya. Loo so bé ni, i ingéde féntindég dob uruk i burure, énda mébunéyén. ¹⁵ Atin énda i ségétew tumumon solo inok ahuré no dob fénléngkébé kuréng. Yamula fédiyoé no dob fédongone de inok rémendaw dob lawie. Mélaw gégitoy kéluhanay de étew diyo. ¹⁶ Mélaw ségiléw gom bé de solo, non fatut rigo gom i fiyowe sénga téklid, inok i de étew gito ro, atin dayewé ro mélaw i Abay gome Tuluse dob lawayo.”

Fantag bé kitabé

¹⁷ Atin fentaus Jesusey kétoro ne mano, “Kagom fégitungén de ké ménangéyu dini inok kédané kuy kitabé niray Moisese taloo noy de kétoro i de sénarigoy Tuluse muret bé kérhéne. Non énda ménangéyu dini inok kédané ku, yamula ménangéyu dini inok tumané ku. ¹⁸ Bérhéhe ku begom i toowe, taman énda méalfa i duniyae ni brab lawayo, énda so mékédan i kitabe, fiyon kloh saén, taman énda métuman i kéluhanane. ¹⁹ Mélaw i étewe mémélis bé kitabé fiyon fo ké toow saén fo kloh sugu, brab toroé no so dob de étew i éndaén kailanga no odoron, toow na fo gérifantad bé de étew féguléwoy Tuluse. Endob i étewe modor bé kitabé brab toroé noy de étew bé fatut odoro ro, toow fo gérotor bé de étew féguléwoy Tuluse. ²⁰ Bérhéhe ku begom, amuk énda toow na fo métintuy de rigoné kom bé de rigonéy de Fariseo brab de témodo bé kitabe, énda géahur gom dob kéguléw i Tuluse.”

Fantag bé kékéríte

²¹ Atin fentaus Jesusey kétoro ne mano, “Enggelingoo kom i ténero i de katufua kom maro, ‘Kagom méméléhu, atin i méméléhue fatut mékukum.’ ²² Endob toroé ku begom béleewe ni: I étewe mékérít bé dumo nuwe, mékukum. Atin amuk wén i étew bérhéhe no, ‘Léngléngén go’ dob dumo nuwe, fatut mékukum dob adafay de késédewan. Atin amuk wén i étew émbérhéhe dob dumo nuwe mano, ‘Dufang go’, médait mangéy dob gonoy aféye dob uleono emferno. ²³ Mélaw amuk diyo go dob féngadafane témulak dob Tuluse, atin gétédémo mo wén i rénigo mo sala dob dumo muwe, ²⁴ tagakém nay tulaké muwe dob adafay ahayane tulakan, atin fagayas go angéy dob dumo muwe brab séfiyo gom inok éndaén tete i de fédew gom. Tidew béno, séfule go brab irayém i tulak me dob Tuluse.

²⁵ “Atin buluk wén i dumo mo sébanil beem, atin uwité no beem dob kémukume inok sétiyawan gom, buluk diyo gom séna dob de aguwon,

béréh go fiyo inok géséfagayun gom, brab éndaén mélaw kailanga kom i, mangéye dob adafay kémukume. Non amuk Enda, atéé no beem dob kémukume, brab i kémukume atéé no beem dob de sundalo, brab i de sundalo férисунé ro beem. ²⁶ Atin béréhé kuy toowe, énda moso géésut go tidéw dob férисунone taman énda gébayada moy kéluhanay késalaa muwe.”

Fantag bé kélamfae

²⁷ Atin féntaus Jesusey kétoro ne mano, “Enggélingoo kom i kétoroe mano, ‘Kago sétayan saliyu bé bawag me.’ ²⁸ Endob toroé ku begom béleewe, bé fiyon fo ké ténenégténg i lagéye saén i libune brab mingar de sétayan, énggésalaén non maak lémenamfa i fédew ne. ²⁹ Mélaw amuk i funa muwe mésala i moto muwe fingé kuwonon, lésitém atin ibérém. Non mas na fiyo ké kulang i réfa i lowoh me ké ganaf i lowoh me atin géangéy go dob uleono emferno. ³⁰ Atin amuk i funa muwe mésala i kuwonone kémérém, kéléngém, atin ibérém. Non mas na fiyo ké kulang i réfa i lowoh me ké ganaf i lowoh me atin géangéy go dob uleono emferno.”

Fantag bé késégélake

³¹ Atin féntaus Jesusey kétoro ne mano, “Wén soy kétoroe mano, ‘I lagéye gémelak bé bawag ne fatut iraya no bé sulate émbéréh ménségélak ron.’ ³² Endob toroé ku begom béleewe, amuk wén i ségetéw lagéy gélaké noy bawag ne éndob énda mon bigaén i ni libun, toow fo ménsala i nan lagéy. Non been i ménfélamfae bé libuno no ké mawag man ségiyo lagéy. Atin énggélamfa soy lagéye ménawag bé libune gélak loo bé nan.”

³³ Atin féntaus Jesusey kétoro ne mano, “Enggélingoo kom soy ténero i katufua tome mano, ‘Amuk sémafa go dob Kadnane, tintu kailanga mo tumanén i safá me ni.’ ³⁴ Endob toroé ku begom béleewe, amuk rémigo gom fasad, kagom sémafa. Kagom fégésafa i lawayo non been i niy saray Tuluse. ³⁵ Atin kagom fégésafa i duniiae ni non been i niy ténaa nuwe bé de sékéyén. Atin kagom fégésafa i ingéde Jerusalem non been i niy gonoy barakatane Datu bati moso. ³⁶ Atin kagom sémafa ké makom, ‘Méléhuu na dob ni.’ Non énda géfífuteo kom taloo no géfítama kom i fiyon suwaréw bé de buk gom. ³⁷ Béréh gom saén, ‘Hoo’, taloo no ‘Enda.’ Amuk umana kom i nan bé de safá, tidéw dob Satanasey nan kékéréh gom.”

Fantag bé késulie

³⁸ Atin féntaus Jesusey kétoro ne mano, “Enggélingoo kom i kétoroe mano, ‘Fatut séfésuliém i motowe bé motowe, brab i kiféne bé kiféne.’

³⁹ Endob toroé ku begom béleewe ni, kagom sulion i étewe réménigo tete dob begome. Ufama, amuk wén i téménamfiling bé fiféy me fingé kuwonon, fédayaém de témamfiling so bé ségébalae de. ⁴⁰ Atin amuk wén

i muwit beem dob adafay kémukume inok gédoté noy kégal me irayém soy kamisita muwe de.⁴¹ Atin amuk wén i sundalo fégésé no beem mobo bé de uwitén bé ségékilomitrowe saén, oboém taman ruwo gékilomitro.⁴² Atin iraya moy mongote dob beeme. Atin amuk wén i méuyot mélét dob beeme, fééléto mo.”

Fantag bé késébanile

⁴³ Atin fentaus Jesusey kétoro ne mano, “Atin énggelingoo kom i kétoroe mano, ‘Fégédaw go bé de dumo mo séloyuk, atin férarék go bé de sébanil beem.’⁴⁴ Endob ay niy kagéne kétoro begom: Fégédaw gom bé de sébanil begom. Atin dasala kom i de émférasay begom,⁴⁵ inok waléy gom do nga i Abay gome Tulus dob lawayo. Non i Tuluse féréndawé no soy térésange dob de fiyo étew loo so dob de tete étew. Atin féranaay Tuluse soy de étew rémigo fiyo loo soy de étew rémigo tete.⁴⁶ Amuk mégédaw gom saén bé de étew mégédaw begom, énda i baras i Tuluse de begom. I de lémiful kémubra buwis rigoné roy nan, fiyon fo ké énda fiyo ro étew.⁴⁷ Atin amuk sébéréh gom saén bé de dumo gom séloyuk, énda i funa kom médayew. Non fiyon i de békén méngintulus rigoné roy nan.⁴⁸ I Abay gome Tulus dob lawayo, rigoné no saén i fiyowe. Brab i begome fatut so rigoné kom saén i fiyowe.”

6 ¹ Atin fentaus Jesusey kétoro ne mano, “Kagom rémigo bé fiyowe émfésuwat bé Tuluse dob téngaangay de étew saén inok dayewéy de étew begom. Non amuk rigoné kom i ni, énda i ségiyo baras gédoté kom tidew dob Abay gome Tulus dob lawayo.

² “Mélaw amuk tabanga moy ségétéwe méskinan bé kéiraya muwe de limus, kago fégétawan de dob de ségiyo loo bé de étew do ubo-ubo saén méngintulus rigoné ro dob de lawi féngadafan brab dob de aguwon. Rigoné roy ni inok dayewéy de étew bero. Mélaw béréhé ku begom i toowe, énggédot roy kéluhanay de baras ro, atin énda i baras i Tuluse de bero.³⁻⁴ Endob amuk tabanga moy ségétéwe méskinan, kago fégito-gitoy kérigo muwe de inok fiyon i de dumo mo do séloyuk énda gétiga ro de. Endob fiyon fo ké énda gitoy de étew de, i Abay me Tulus gito noy rénigo muwe brab Been i marasane beem.”

Fantag bé kédasale

⁵ Atin fentaus Jesusey kétoro ne mano, “Buluk démasal gom, kagom iringén i de étew do ubo-ubo saén méngintulus. Méuyot ro témindég démasal dob de lawi féngadafan brab dob de aguwon inok gitoy de étew bero. Béréhé ku begom i toowe, i gédoté ruwe saén bé nan rigoné roy kédewéy i de dumo étew bero.⁶ Endob buluk démasal gom, angéy gom dob sibéy gome brab fintu gom, atin dasal gom dob Tuluse Abay gom dob lawayo énda gito gom de. Amuk rigoné kom i ni, gédoté kom i baras

gome tidéw dob Tuluse Abay gom. Beene saén i gégitowe bé kéluhanay rigoné kome.

⁷“Buluk démasal gom, kagom dulién i kédasale énda i atagén. I de étew énda gétila roy Tuluse rigoné roy ni non maro ké fégélingoéy Tuluse bero ké mérugay i kédasal ruwe. ⁸Kagom iringén bero. Enda kailanga kom i mérugaye kédasal non gétilay Abay gomey kailanga kome bé énda séna nongot gom de.

⁹“Ay niy ufamawe de. Dasal gom loo bé ni, ‘Abay gey dob lawayo, kéluhanay étewe damén féngadafé ro Beem. ¹⁰Féguléwo mo damén i kéluhanay de étew inok i kétaya muwe mérigo dob fantade ni loo so bé mérigowe dob lawayo. ¹¹Irayan gey bé amaé keye bé ni gai. ¹²Fésagada mo begey bé de sala gey loo so bé kéfésagad geye bé de énggésala begey. ¹³Kago fédayaén begey météngkad rémigo sala. Brab diyaga mo begey bé Satanase.’

¹⁴“Buluk fésagada kom i de étew réménigo tete dob begome, i Boh gome dob lawayo fésagada no so begom. ¹⁵Endob buluk énda fésagada kom i de ménsala dob begome, i Abay gome Tulus énda so fésagada no begom.”

¹⁶Atin féntaus Jesusey kétoro ne mano, “Atin amuk fuwasa gom inok tintu méngintulus, kagom féélumén i falas gome loo bé rigonéy de ubo-ubo saén méngintulus. Féélumé roy falas ruwe inok fégétila ro bé de étew bé mélayah ro non fuwasa ro. Béréhé ku begom i toowe, énda i ségiyo baras gédoté ro saliyu bé kédayéw i de étew. ¹⁷Endob amuk fuwasa gom, furauf gom brab suwat gom, ¹⁸inok i de ségiyo étew, énda gétila ro de ké fuwasa gom. Atin mélaw i Abay gome Tulus énda gitono, Been saén i gégitowe bé rigoné kome, atin barasa no begom.

¹⁹“Atin kagom mitong kurta brab do languntaman dob duniiae ni, non mébinasa ro. Non i de tamuk dob duniiae ni keke i de ifés taloo no tangisén taloo no fénakawén non géahur i de ménakaw dob de lawi gom. ²⁰Endob fatut itong gom i de baras gom dob lawayo non énda i ifés de méminasa taloo no tangisén taloo no fénakawén. ²¹Non i gonoy de tamuk gom, been soy gulaané kome.

²²“I motowe maak solo i lowohe. Buluk fiyyo moto muwe, maak géfékaya i kéluhanay lowoh me non gérito go. ²³Endob buluk ménsadil i de moto mo, maak délémon i lowoh me non énda gérito go. Mélaw buluk i solo me waléy délémon, toow fo délémon mon.

²⁴“Enda i sugu-suguén fakay galbéko no séréngan i ruwowe gétew amu. Non amuk mégédaw bé ségitéwe de, mérarék bé ségitéwe de. Taloo no odoro noy kétayay ségitéwe de, brab siyawé noy ségitéwe de. Mélaw énda fakay gom modor bé Tuluse amuk fégitungé kom saén i kurtae.

²⁵“Mélaw béréhé ku begom, kagom émbuku fantag bé kéuyag gome, bé ati amaé kome look inémé kome, taloo noy lowoh gome, bé ati kégalé

kome. Non wén nay labi na fo mélaga bé amaéne funa kom méuyag, brab wén nay labi na mélaga bé kégale kay de lowoh gom. ²⁶Fégitung gom i de kloh manok. Enda mohok ro taloo no kémétew ro, brab énda mitong ro amaén dob de kiwot. Endob i Abay gome Tulus féamaé no so bero. Atin mas gom na balilaga bé de kloh manok! ²⁷Enda i étew géfetaah bé umul ne bé kébuku ne, fiyon ségeuras saén.

²⁸“Enda soy funa kom émbuku fantag bé kégale. Fégitung gom i de flores. Méruk ro fiyon fo ké énda gémalbék ro taloo no rémigo ro do kégal ro. ²⁹Endob bérhéhé ku begom, fiyon i Solomone toow fo kawasa datu, énda i kégalén loo bé de fiyo do falasén do flores. ³⁰Endob buluk loo bé nan i kékégal i Tuluse bé de kéronn méuyag ro saén singkow, atin bé démoe ibérén ro brab inohén, békén ba fékégalé no so begom? Toow fo kloh i kékéginugut gome.

³¹“Mélaw kagom émbuku bé amaé kome brab inémé kome brab kégalé kome. ³²Non i de étew énda méngintulus ro, been i nan i fégitungé ruwe taman émbuku ro. Endob i Abay gome Tulus gétiga noy kéluhanay kailanga kome. ³³Mélaw kagom émbuku. Yamula fatut kétaya kom ké méguléw i Tuluse dob begome brab kétaya kom rémigo bé métintuwé, atin mélaw irayay Tuluse begom bé kéluhanay de éntingayén kailanga kom. ³⁴Atin mélaw kagom émbuku béleewe ni fantag bé ati mérigowe démo, fégitung gom fo ké gérumahén. Kagomén umanan i kékérégéna kome béleewe bé kébukue fantag bé démoe.”

Kagom kémukum

7 ¹Atin féntaus Jesusey kétoro ne mano, “Kagom kukumén i de étew, inok i Tuluse énda so kukumé no begom. ²Non i kékukum gome bé de ségiyo étew, iringéy Tuluse so ké kukumé no begom. Atin i kérigo gome bé de ségiyo étew, rigonéy Tuluse so dob begome. ³Sedek gito moy klohe sala i dumo muwe, éndob énda gito moy kaame sala toow na fo dakél? ⁴Atin bérhéhé mo dob dumo muwe mamo, ‘Adih, téréno moy nan salaém.’ Endob wén i kaame sala toow na fo dakél. ⁵Fédayéw-dayéw go, éndob békén go fiyo étew. Téréno mo na métah i kaame sala toow na fo dakél, inok gétabanga moy dumo muwe émfétérén bé kaane kloh sala.

⁶“Atin kagom iray i mélétifuwe dob de itu. Non amuk rigoné kom, kekeé ro saén begom. Atin kagom iray i balilagae fégonoén perlas dob de babuy. Non amuk rigoné kom, daa ro saén. Mélaw kagom téromo bé Fiyowe Uret dob de étew mika mégélingo.”

Ongot gom dob Tuluse

⁷Atin féntaus Jesusey kétoro ne mano, “Ongot gom dob Tuluse atin irayén begom. Séléd gom, atin gito gom. Tawag gom dob bengawane, atin i fintue ungkaén inok géahur gom. ⁸Non i kéluhanay de mongot dob

Tuluse, gédoté ro. Atin i kéluhanay de séméléd, gito ro. Atin i kéluhanay de témawag dob bengawane, géahur ro. ⁹Ufama, ségettew go boh, atin i nga me mongot fan, énda iraya mo de batéw. ¹⁰Taloo no mongot sédo, énda iraya mo de ulé. ¹¹Fiyon fo ké tete gom étew, gétiga kom soy miraye bé éntingayéne fiyo dob de nga gom. Labi nay Tuluse toow fo fiyo, gétiga noy miraye fiyo na dob begome. Beeney Boh gome dob lawayo, brab irayén i de fiyo do éntingayén dob de étew mongot dob Beene.

¹² “Buluy kétaya kome rigonéy de étew dob begome, rigo gom so dob berowe. Non been i atag i kéluhanay de sugu dob kitabé niray Moisese brab de kétoro i de sénarigoy Tuluse muret bé kékérén ne.”

I mérate bengawan

¹³ Atin fentaus Jesusey kétoro ne mano, “Ahur gom dob mérate bengawan mangéy dob lawayo. Non toow fo buka i bengawan mangéy dob uleone emferno atin médooy de étew muntul de non magad i kéagéw ruwe diyo. ¹⁴Endob i mérate bengawan mangéy dob umule magufusa, mérégén i kéuntule de. Mélaw énda médooy étewe géuntul de.

¹⁵ “Atin ingat gom inok énda géunur gom bé de ubo-ubo sénarigoy Tuluse muret bé kékérén ne. Non fiyon fo ké ubo-ubo ro mégédaw maak do ménorom ayam, tintu tete i adat ruwe brab binasané ro begom. Non i toowe, ségiléw ro bé de mérayar do binatang. ¹⁶⁻¹⁸ Endob gélolo gom bero sabaf bé de rigoné ro. Ufama, énda i fiyo kayéw mégonok bé tete onok, taloo no tete kayéw mégonok bé fiyowe onok. I sulu-suluwe énda mégonokén bé manggæ. Brab i kayéwe suwaran énda mégonokén saging. I fiyowe kayéw mégonok saén fiyo, atin i tete kayéw mégonok saén tete. ¹⁹ Atin i kayéwe énda mégonokén fiyo, tuwongén brab ibérén dob aféye inok inohén. ²⁰ Mélaw gélolo gom i de ubo-ubo sénarigoy Tuluse sabaf bé de tete rigoné ro.

²¹ “Enda kéluhanay de étew témawag Begén maro, ‘Kadnan, o Kadnan,’ géangéy ro dob lawayo. Endob i de étew rémigo bé kétayay Abay guwe Tulus, bero saén i géangéy dob lawayo. ²² Bé gaiwe géumah i kékukum i Tuluse, médooy de étew émbérén dob Begéne maro, ‘Kadnan, o Kadnan,’ nuret gey i kékérén i Tuluse nusar gey i dawét me. Atin nusar gey soy dawét me fégédédél bé de saitan tidéw dob de étew rénahuko ro, brab rénigo gey i de médooy do mékégaif dob dawét me.’ ²³ Endob bérhé ku bero maku, ‘Enda gélolo gu begom. Férayu gom dob Begéne. Begom i de étew do rémigo tete.’

²⁴ “Bérhé ku begom i fantage bé de mégélingo bé kékérén guwe brab odoro ro. Berowey ségiléwe bé ségettew métiledtéd réménigo lawi brab fentindégén i de liléyén dob émbagére batéw. ²⁵ Amun mérégés i ranae brab énggégumah i dunuke brab énggébela diyo i émbagére réfuruh, énda méntuwongén non fentindég dob rotor i batéwe.”

26 “Endob i étewe énggélingo bé de kékéréh gu éndob énda odoro no de, ségiléw bé dufange étew féntindégén i lawi ne dob faréke saén. 27 Mélaw amun ménrégés i ranae brab énggumah i dunuke brab énggébela diyo i émbagére réfuru, méntuwong brab toow fo ménbinasa.”

28 Amun énggilid i Jesuse téromo bé de ni, ménggaif i de médo do étew bé kétoro ne. 29 Non békén ségiléw i kétoro ne bé de maistéroy kitab i de Judio. Non énda saén téneroén i kékégitung i de ségiyo étew. Yamula téneroén i kaane kékégitung.

Nuwa Jesusey ségétewe fémuteén

8 ¹Tidew béno, léménudug i Jesuse tidew dob burure ni. Atin ménfuray i de médo do étew. ²Tidew béno, wén i ségétewe étew fémuteén ménangéy dob Beene brab léméningkuwéd dob adafa nuwe. Atin ménbéréh i fémuteéne ni étew mano, “Kadnan, buluk méuyot go, géfeadi-adi mo begén.”

³Atin i Jesuse béntrén i kémér ne brab kénuwahén, brab ménbéréh mano, “Méuyotu. Adi-adi go.” Sonom béno, ménkédan i fémute ne brab ménadi-adi. ⁴Atin bénréh Jesuse dob beene bé békén ureté no dob de ségiyo étew, brab sénuguén mano, “Ay go dob fadie inok féténgtengém ménadi-adi gon. Tidew béno, tulak go, loo bé ménbéréhe dob kitabé tidew dob Moisese inok gétigay kéluhanay de étew ménadi-adi gon.”

Nuwa Jesusey sugu-suguéy sundalowe

5 Amun énggumah i Jesuse dob ingéde Kafernaum, wén i ségétewe Romano kafitay de sundalo ménangéy dob Beene. Atin ménongot tabang dob Jesuse mano, ⁶“Maistéro, wén i sugu-sugué kuwe toow fo fasang démuun béri. Diyo dob lawi guwe énda gélékutohén.”

⁷Atin ménbéréh i Jesuse mano, “Na, mangéy diyaan atin uwaé ku.”

⁸Endob bang i kafitane, “Kagonén damén mangéy dob lawi guwe. Non toow go fo gérotor étew atin mélaw énda médaïtu témanggaf Beem dob lawi guwe. Endob toow go fo barakatan, mélaw bérhéhém saén i sugu me mamo, ‘Adi-adi gon,’ atin gétiga kuy waléy adi-adiy sugu-sugué kuwe.

⁹Gétiga kuy ni non wén i mas gérotor sundalo mémanduon begén. Brab wén soy do sundalo fémanduo ku. Atin buluk bérhéhém ku dob ségétewe de, ‘Angéy go diyoo,’ mangéy diyo. Brab buluk maku dob ségétewe de, ‘Enggon,’ témingé. Brab buluk bérhéhém ku dob sugu-sugué kuwe, ‘Rigo moy ni,’ rigoné no.”

¹⁰Amun énggelingoo Jesusey ni, ménggaif de. Atin ménbéréh dob de étew furay dob Beene mano, “Bérhéhém ku begom i toowe, fiyon foy de Judio, énda i ségétew énggito gu loo bé ni kékéngintoowén étew.

¹¹Bérhéhém ku begom, bé gaiwe gégumah méguléw i Tuluse, médooy de

étew gégumah tidéw dob kéluhanay sugud i duniyae, fiyon i de békén Judio. Atin i Tuluse féguléwo no bero beroy de katufua tom ro Abraham, Isak, brab Jakob. ¹² Endob wén i de Judio diyo ro so damén éndob kénda no bero mangéy dob délémoren gonon dob liyuwe. Diyo ro kémérew brab kémigét i de kifé ro.” ¹³ Atin ménbérél i Jesuse dob kafitane ni mano, “Ule gon, ménadi-adinén i sugu-sugué muwe loo bé kéunur me mérigo.” Atin i sugu-sugué nuwe, ménadi-adi bé no so uras.

Nuwa Jesusey de médo do étew

¹⁴ Tidéw béo, méntaus i Jesuse mangéy dob lawi Pedrowe. Diyo énggito noy térima Pedrowe libun démérueun gara-gara toow fo méduf.

¹⁵ Atin i Jesuse kénuwahén i kémér i libune ni. Atin sonom béo, ménkédan i kéeduf ne brab ménadi-adi. Atin méntek dénuwoto no bero.

¹⁶ Amun mélédén i térsange, i de étew nuwit roy de médo do sénaitanan ménangéy dob Jesuse. Ménbérél saén i Jesuse atin fénféraléyén i de saitan. Atin nuwa Jesusey kéluhanay de démérueun diyo.

¹⁷ Rénigo noy ni inok tumané noy kékérél i sénarigoy Tuluse muret bé kékérél ne féndawét Isaias mano, “Uwaé noy de déruu tom, atin kédané noy de tete tom.”

¹⁸ Atin amun énggito Jesusey de médo étew géliwét de, sénuguén i de kuyugén mifar dob dogote. ¹⁹ Tidéw béo, wén i témoree bé kitabé ménfégédét dob Jesuse brab ménbérél mano, “Maistéro, modoru Beem fiyon udenén ayo mo.”

²⁰ Endob ménbérél i Jesuse mano, “I de kufés, wén i tosong ahuro ro. Brab i de kloh manok, wén i salag ro. Endob i Nga i Kéilawane, sani Begéne, énda i gono ku témerén taloo no fidong. Mélaw toow go fo kérégénan amuk modor go Begén.”

²¹ Atin wén i ségétéwe kuyugén ménbérél dob Jesuse mano, “Maistéro, modoru Beem. Endob tungkasém na begén métah mangéy lémbéng bé boh guwe.”

²² Endob séménumbul i Jesuse mano, “Félébéngém bé de étew énda munur Begén i de ménléhu ro. Endob i beeme, odor go Begén.”

Féntéré Jesusey défuke

²³ Tidéw béo, i Jesuse brab de kuyugén ménda ro awang mifar dob dogote. ²⁴ Atin téménékow ménggumah i émbagére défuk. Atin séndamfa-damfaay de bagél i awange, taman gédét mééléd. Endob i Jesuse énggfidong. ²⁵ Atin ménangéy i de kuyugén dob Beene, brab nulég ro maro, “Kadnan, tabangén gey! Gédét tom méléhu!”

²⁶ Séménumbul i Jesuse mano, “Sedek mégilak gom? Toow fo kloh i kéunur gome.” Tidéw béo, téménindég i Jesuse brab ménbérél dob

rífuruhe brab dob de bagél mano, “Térén gom!” Sonom béo, téménréni défuke brab méntinanék i dogote. ²⁷Ménggaif i kéluhanay de kuyug Jesus. Atin ménsebéréh-béréh ro maro, “Ati keeyén i Jesuse ni? Fiyon i rífuruhe brab de bagél modor ro bé sugu ne.”

Dénédél Jesusey de saitan

²⁸ Amun énggumah i ro Jesuse dob difar i dogote dob ingéde Geresa, bénalak i de ruwo gétew lagéy rénahukoy de saitan. Bati ro dob de takub do lébéng atin toow ro fo émbaraw. Mélaw énda i do étew gétara diyo.

²⁹ Atin ménkes ro maro, “Nga i Tuluse, ati rigoné muwe dob begeye? Aw ménangéy go ba dini inok kukumé mo begey fiyon fo ké énda séna gégumah i fatute gai?”

³⁰ Enda méravyén dob no gonon, diyo i médoowe do babuy témaabtab.

³¹ Atin nongot i de saitan dob Jesuse maro, “Amuk feféraléyé mo begey, féahurém begey dob do babuy diyo.”

³² Atin bang Jesuse, “Agéw gom.” Mélaw ménsut i de saitan tidéw dob do étew no brab ménahur ro dob de babuy ni. Sonom béo, i kéluhanay de babuy ni, ménraréy ro mangéy dob fingase brab ménantéfor ro mangéy dob dogote atin ménléne ro.

³³ Atin i de étew témalima bé de babuy ni amun énggito roy ni ménrigo, ménsegéta ro mangéy dob ingéde brab nuret roy kéluhanay de rénigo Jesus brab ati ménrigowe dob de lagéy sénaitanan bé gétahe.

³⁴ Mélaw ménangéy diyo i kéluhanay de étew dob ingéde ni inok malak bé Jesuse. Atin amun énggito ro, nongot roy Jesuse ké tékédan dob no gono ro.

Nuwa Jesusey ségétéwe kimoyén

9 ¹Tidéw béo, ménda i Jesuse dob awange atin ménsefule mifar dob dogote brab ménule mangéy dob ingéd ne. ²Diyo, énggumah i de étew ménuit bé ségétéwe kimoyén ténanggung ro mangéy dob Jesuse. Amun énggito Jesusey kénéfíngintoow ruwe, ménbéréh dob ni étew kimoyén mano, “Adih, kago émbuku! I de salaém ménfésagadén.”

³ Tidéw béo, wén i de téromo bé kitabé ménsebéréh ro dob de fédéw ro maro, “Embéréh mémurka i ni étew, non réfengé noy Tuluse.”

⁴ Edob i Jesuse gésobuto noy de itunga ro. Mélaw ménbéréh mano, “Sedek tete i kénéfítung gome loo bé nan? ⁵Toow na fo mélému ké béréhén, ‘I de salaém ménfésagadén.’ Non énda gito no ké wén i barakat gu de rénigo. Endob toow fo mérégén ké béréhén. ‘Tindég go brab agéw go.’ Non giton ké wén i barakat gu de rénigo. ⁶Endob feférgétiga ku begom i fantage bé Nga i Kéilawane, sani Begéne. Wén i barakat gu brab kuwagib gu dob duniyae ni émfésagad bé de sala.” Tidéw béo, bénréhén dob ni kimoyén mano. “Tindég go brab ule go unwitém mule i iroo muwa nan.”

⁷Sonom béno, téménindég i kimoyéne ni brab ménagéw mule. ⁸I de médoob ménlimud do étew diyo, amun énggito roy ni, ménggilak ro, atin dénayéw roy Tuhuse non nirayén dob Jesusey kuwagibé émfésagad bé de sala.

I kétawage bé Mateowe

⁹Tidéw béno, méntékédan i Jesuse dob no gonon. Atin i lala ne magéw, énggito noy ségettéwe étew kémubra buwis féndawéti Mateo, ménasar dob de kubranan buwis. Atin ménbéréh i Jesuse mano, “Odor go Begén.” Atin téménindég i Mateowe brab ménodor de.

¹⁰Tidéw béno, i Jesuse beroy de kuyugén ménama ro dob lawi Mateowe séréngan bé de médoob do kémubra buwis brab de ségiyo so do tete étew. ¹¹Atin amun énggitoy de Fariseoy ni, ménénginsa ro dob de kuyug Jesus maro, “Sedek ménslawék i Maistéro gome mama bé de kémubra buwis brab de ségiyo tete étew?”

¹²Endob i Jesuse énggelingoo no brab ménbéréh mano, “I de fiyo kégelowoho no, énda kailanga roy muwae, éndob kailangay de wén déruu no. ¹³Enda ménangéyu dini inok tabaré kuy de métintu étew, éndob ménangéyu dini inok tabaré kuy de wén salaén inok gésénule ro. Basa gom brab tantu gom fégitung i ni Ménslat Kébéréh i Tuluse mano, ‘Mas méuyotu de ké ségédaw gom bé kétulak gome.’”

Fantag bé kéfuwasawe

¹⁴Tidéw béno, wén i de kuyug Juan Bautista ménangéy ro dob Jesuse brab ménénginsa ro maro, “I begeye, sénga téklid fuwasa gey. Loo so bé de Fariseo. Sedek énda fuwasay de kaam kuyug?”

¹⁵Atin sénumbulo Jesuse bero mano, “Ufama, i de kana dob uyote énda waléy tete i de fédéw ro taman énda téklid i témérimawé lagéy. Endob amuk gégumah i gaiwe ké édotén nén i témérimawé lagéy dob berowe, been nay no fuwasa ro. Ségiléw so bé de kagén kuyug, non amuk diniwu séna, énda fuwasa ro.”

¹⁶Tidéw béno, nuret Jesusey sébaane binuwaya fantag bé sébidanay mantuwe kétoroén brab tafaye kétoro i de Judio. Ménbéréh mano, “Enda i étew usaré noy mantuwe safut fégétabungén bé tafaye kégal. Non amuk rigoné no, kéménkén i mantuwe safut, atin méfendet i tafaye kégal, atin minut géttimal i rédet ne.

¹⁷Brab énda i étew mahur bé mantuwe arak dob tafaye ahuron arak rénígo bé kulit i ayame. Non amuk rigoné no, mélétus i mantuwe arak dob tafaye ahuron brab mébinasa brab méítis i mantuwe arak. Yamula fatut i mantuwe arak ahurén dob mantuwe kulit fédégon de, atin méítong kéluhanan.”

Nuwa Jesusey ruwowe géttew libun

¹⁸I lala Jesuse émbéréh séna, énggégumah i ségettéwe odoroy de Judio, brab ménlingkuwéd dob adafa Jesuse brab ménbéréh mano, “I nga guwe

libun mantu séna ménléhu. Endob amuk modor go begén brab angéyé mo gamakén, gétiga kuy tébule.”¹⁹ Mélaw téménindég i Jesuse brab ménodor bé ni lagéy. Ménodor soy de kuyugén.

²⁰⁻²¹ Amun ménagéw ro, ménggéta i ségétéwe libun bero. I ni libun foloén bra ruwo gébélantuwa i kéranas i adat ne. Amun ménfuray bé Jesuse, ménggitung mano, “Amuk gékuwaha ku saén i kégal ne, adiadiwu.” Mélaw ménangéy dob ségang Jesuse brab kénuwahén i kégal ne.

²² Tidew béno, séménling i Jesuse brab amun énggito noy ni libun, sénbérého no mano, “Di, kago émbuku. I kénéfingintoow mey funa muwe ménadi-adi.” Sonom beno, i ni libun ménadi-adi.

²³ Tidew béno, méntaus i Jesuse mangéy dob lawi i odoroy de Judio ni. Amun énggumah, énggito noy de médoó do étew diyo. Rémuung ro brab selekén ro brab émbaat ro fo.

²⁴ Ménbérélh i Jesuse mano, “Tékédan gom! Enda ménléhu i ngae ni. Fidong saén.” Tidew béno, sénbayat roy Jesuse bé bénréh ne.

²⁵ Amun ménasut i de étew dob lawie, ménahur i Jesuse dob sibéy i ngae ni libun, brab génamakén dob kémér ne. Bé béno so, méntek i ngae ni.

²⁶ Tidew béno, i urete fantag bé ni rénigo Jesuse ménlégéb dob kéluhanay de ingéd diyo.

Nuwa Jesusey ruwowe gétew langafén

²⁷ Tidew béno, ménékédan i Jesuse tidew diyo. Atin bé lala ne magéw, ménfuray i ruwowe gétew lagéy do langafén. Ménkes ro maro, “Séfu Datu Dabid, fégédaw go begey!”

²⁸ Atin amun ménahur i Jesuse dob lawie, ménfégédét i de langafén ni. Atin fénénginsaa Jesuse bero mano, “Aw munur gom ba ké géuwa ka begom?”

Atin séménumbul ro maro, “Hoo Maistéro, munur gey.”

²⁹ Tidew béno, i Jesuse kénuwahén i de moto ro brab ménbérélh mano, “Mérigo dob begome loo bé kéunur gome de.”³⁰ Atin sonom béno, énggégito ro. Atin ménégét i kébérélh Jesuse de bero mano, “Kagom uretén i ni dob de étew.”

³¹ Endob amun ménagéw ro, nuret roy ni rénigo Jesuse. Atin mélaw ménfélalag i bantuga nuwe dob kéluhanay de ingéd diyo.

Nuwa Jesusey ségétéwe mow

³² Lala ruwe magéw i de ni ruwo gétew do éndaén do langafén ro, énggumah i de étew nuwit ro dob Jesusey ségétéwe mow sabaf bé saitane rénahuko no.³³ Atin dénédél Jesusey saitane ni. Atin sonom béno, énggégérélh i lagéye ni non éndaén mowén. Atin i kéluhanay de étew diyo ménggaif ro, brab ménbérélh ro maro, “Enda séna énggégito gey bé mékégaife loo bé ni dob ingéd tome ni Israel.”

³⁴ Endob ménbérél i de Fariseo maro, “I funa nuwe gédédél do saitan non wén i barakatén tidéw dob Satanase sani odoroy de saitan.”

³⁵ Tidéw béno, ménagéw i Jesuse mangéy sémuugud dob kéluhanay de ingéd diyo. Atin téménoro dob de lawi féngadafan kay de Judio, brab nuretén i Fiyowe Uret fantag bé kéféguléw i Tuluse bé de étewén. Atin nuwaén soy de médoó do étew bé ségiyo-giyowe do déruun. ³⁶ Atin amun énggitó noy de médoó do étew ménlimud dob Beene, ménuray i na nuwe bero, non ménbuku ro brab kailanga roy tabange. Maak do bili-bili énda i mifat bero. ³⁷ Mélaw ménbérél dob de kuyugén mano, “I de ni do médoó do étew méuyot munur dob Begéne, ségiléw ro bé bukae safad fatutén kétéwén. Endob kloh saén i kémétéwe de, sani de témoro bero munur. ³⁸ Mélaw dasal gom dob Tuluse inok umana noy de gémalbék témabangan betom kémétéw.”

I de folo bra ruwo gétew kuyug Jesuse

10 ¹ Atin i Jesuse ténavagén i de folo bra ruwo gétew kuyugén mangéy dob Beene. Atin niraya no bero barakat inok gédédél ro do saitan brab géuwa roy de kéluhanay de ségiyo-giyo do déruun. ² Ay niy de dawét i de Apostol, sani de sénugu: Simon (féndawétén so Pedro), brab Andres dumo no sétiman idéng, Santiago brab Juan sani de nga Sebedeo, ³ brab Filipi, brab Bartolome, brab Tomas, brab Mateo sani kémubrawe buwis, brab Santiago nga Alfeo, brab Tadeo, ⁴ brab Simon ségétew toow fo gulaané noy ingéd ne, brab Judas Iskariot sani ménfékéfoe bé Jesuse.

Sénugu Jesusey de folo bra ruwo gétew kuyugén

⁵ Atin sénugu Jesusey de ni folo bra ruwo gétew kuyugén mano, “Kagom mangéy dob de ingéd i de békén Judio taloo no dob de ingéd sakuf i dakéle ingéd Samaria. ⁶ Yamula, agéw gom mangéy dob de étew dob Israel non ségiléw ro bé de méntradin do bili-bili. ⁷ Agéw gom brab uret gom makom, ‘Gédétén i gaiwe féguléwoy Tulusey de étewén.’ ⁸ Atin uwa gom i de démérueen, tébule gom i de ménléhu, féadi-adi gom i de fémuteén, féferaréy gom i de saitan. Atin kagom fébayadén i de étew, non énda fébayadé ku begom bé kéraya kuwe begom. ⁹ Atin kagom muwit kurta, fiyon bélowan look filak, taloo no do kloh kurta. ¹⁰ Atin kagom muwit réban, taloo no tugé, taloo no lékasa kom kégal look sinilas. Non i de tabanga kom fatut tabanga ro so begom bé atiy kailanga kome.

¹¹ “Atin amuk gérumah gom dob sébaane ingéd, séléd gom i ségétewé méuyot témayakuf begom. Atin batí gom diyo taman tékédan gom tidéw dob no ingéd. ¹² Atin buluk mahur gom dob lawie, bérél gom bé féfiyonéy Tulusey de étew batí dob ni lawi. ¹³ Buluk i de étew dob nan lawi tayakufé ro begom, féfiyonéy Tulusey bero. Endob buluk énda

tayakufé ro begom, énda so féfiyonéy Tuluse bero. ¹⁴ Atin buluk gérumah gom dob sébaane ingéd énda tayakufé ro begom taloo no énda fégélingoé ro begom, tékédan gom diyo. Atin tag-tag gom i de bubuk sébuwan dob de sékéy gom inok fégétiga kom bero bé kukuméy Tuluse bero. ¹⁵ Béréhé ku begom i toowe, bér gaiwe kémukum i Tuluse, toow na fo géimal i kékukum ne bero bér de tete étew ménbati dob de ingéd Sodom brab Gomorah bér gétahe.

¹⁶ “Fégélingo gom, féuwit gu begom maak do bili-bili mangéy dob kérara i de itu talun. Mélaw ingat gom brab fatut rigo gom saén i fiyowe. ¹⁷ Ingat gom non wén i de étew kémfo begom brab uwité ro begom mangéy dob adafay kémukume. Atin badasé ro begom dob de lawi fénagadafan kay de Judio. ¹⁸ Atin uwité ro begom dob adafay de méguléw begom brab de datu inok kukumé ro begom sabaf begom i do kuyug gu. Endob been i niy gaiwe uret gom i Fiyowe Uret dob berowe brab dob de békén Judio. ¹⁹ Atin amuk kéfoé ro begom brab kukumé ro begom, kagom émbuku fantag bér atiy béréhé kome bero look ati kékéréh gome. Non bér no gai, iray begom i fatute kékéréh fégésumbul gom bero. ²⁰ Non i kékéréhe békén tidéw dob itunga kome, yamula i Rémogor i Abay gome Tulus i émfébéréhé begom.

²¹ “Atin bér no gai, wén i de étew atéé roy de dumo ro sétiman idéng inok féléhuén. Loo soy rigonéy de abay dob de nga ro. Atin wén soy de nga waléy sébanil bér de lukés ro brab féléléhu ro. ²² Atin i kéluhanay de étew mérarék ro begom sabaf bér kénur gome Begén. Endob ati fédidaye munur taman dob tamfadane, méfukas ro. ²³ Atin amuk férasayé ro begom dob sébaane ingéd, féraréy gom mangéy dob ségiyowe ingéd. Béréhé ku begom i toowe, énda séna géfégilido kom i galbék gome dob kéluhanay de ingéd dob Israel, séfuleun mangéy dini, sani Nga i Kéialwane.

²⁴ “I mérana békén gérotor na bér témoroé de. Atin i sugu-suguéne békén gérotor na bér amu ne. ²⁵ Mélaw i mérana fatut moror kériré noy témoroé de. Atin i sugu-suguéne fatut moror kériré noy amu ne. Atin amuk i uléw i ségékuréngé fénadawé do étew Beelsebul sani Satanase, labi na fo tete i fénadawé ruwe bér kuréngé nuwe. Mélaw amuk fénigiras i de étew Begén, toow na fo géimal i kékéngiras ruwe begom.

²⁶ “Mélaw kagom mágilak bér étewe. I kéluhanay rigonéy de étew do méntéléb, mébukeh so moso. Brab i kéluhanay de méntéléb, mébukeh so moso. Brab i kéluhanay de ménbunéy, giton so moso. ²⁷ Atin i béréhé kuwe ni dob begome saén, fatut béréhé gom so dob de médo do étew. ²⁸ Atin kagom mágilak bér de géféléhu bér lowoh gome, éndob énda géféléhu roy rémogor gome. Yamula fatut gom mágilak bér Tuluse non wén i barakatén mémínasa bér de lowoh gom loo soy de rémogor gom dob

uleono emferno. ²⁹Ufama, i de kloh manok toow fo mélémuy kénéféléléye bero dob fadiyane. Endob énda i sébaan mélawu bero dob fantade ké énda fédayaéy Abay tome de Tulus. ³⁰⁻³¹Atin i begome mas gom na balilaga bé de kloh manok. Mélaw kagom mágilak, non i Tuluse tiganulé no begom. I Tuluse gétiga no fiyon i kédoooy de buk gom dob de uléw gom.

³²“Atin ati murete fantag bé kéunur ne Begén dob de étew, ureté ku soy fantage bé kéunur ne dob Abay guwe Tulus dob lawayo. ³³Endob ati démirunge bé kéunur ne Begén dob adafay de étew, dirungé ku so moso i kéunur ne dob adafay Abay guwe Tulus.

³⁴“Atin kagom fégitungén de ké ménangéyu dini inok kédané kuy késétibohe dob duniyae ni. Békén. Yamula ménangéyu dini inok sétiboh i de étew. Non i de étew munur Begén brab de étew énda munur Begén waléy ro sébanil. ³⁵Non ménangéyu dini inok fésébanilé kuy de boh brab de nga ro lagéy. Loo so bé de idéng brab de nga ro libun. Loo soy de libun bé de térima ro libun. ³⁶Atin mélaw i toowe na fo sébanil i de étew, beroy de dumo no ségékuréng.

³⁷“Atin i étewe mas nay kéimu ne bé de lukésén bé Begéne, énda médaitén waléy kuyug gu. Atin i étewe mas nay kéimu ne bé de ngaén bé Begéne, énda so médaitén waléy kuyug gu. ³⁸Atin fiyon atiy étewe énda furayén Begén bé kénéfedayday ne bé de mérégén fiyon fo ké féléhuén dob kruse, énda médaitén waléy kuyug gu. ³⁹Atin i étewe méuyot émféraru bé umul ne dob duniyae ni, méléhu. Endob i étewe méléhu bé káfuray ne Begén, gédoté noy umule magufusa.

⁴⁰“I étewe témayakuf begom, tayakufé no so Begén. Atin i étewe témayakuf Begén, tayakufé no soy Tuluse ménféuwit Begén. ⁴¹Atin i étewe témayakuf bé sénarigoy Tuluse sabaf sénugu i Tuluse, gédoté noy barase ségiléw bé nan sarigon. Atin i étewe témayakuf bé métintuwe étew sabaf bé kétintuy adat ne, gédoté noy barase ségiléw bé nan métintu étew. ⁴²Atin béréhé ku begom i toowe, i étewe miray fiyon ségétabu saén mélégénéy wayég dob ségétewe gérifantad kuyug gu sabaf bé been i kuyug gu, tintu gédoté noy barase.”

I kénéfinsa Juan Bautistawe

11 ¹Amun énggilid i kétoro Jesuse bé de folo bra ruwo gétew kuyugén, ménagéw mangéy dob de ingéd diyo inok téromo brab muret diyo.

²Bé beno do gai, ménférisu Juan Bautistawe. Atin amun énggelingoo noy fantage bé de rigoné Kristo, sénuguén i de dumo bé de kuyugén mangéy dob Beene inok ménfinsa. ³Atin fénénginsaa ro maro, “Beeme bay no bénréh Juane gégumah ongot-ongoté key, taloo no ongot-ongot gey na ségiyo?”

⁴ Atin séménumbul i Jesuse mano, “Séfule gom mangéy dob Juane brab uret gom i de énggito gom do rénigo gu brab de énggelingoo kom. ⁵ I de langafén énggégito ro, brab i de fikat énggéagéw ro, brab i de fémuteén ménadi-adi ro, brab i de bokongén énggégélingo ro, brab i de ménléhu méntébule ro. Atin ureté kuy Fiyowe Uret dob de méskinan. ⁶ Atin béréh gom so dob Juane bé toow fo moror i étewe énda ruwo-ruwoy kéfengintoow ne Begén.”

⁷ Amun ménséfule i de kuyug Juan, ménbéréh i Jesuse dob de médoō do étew fantag bé Juane mano, “Ati nangéy gome ténéngténg dob gonone énda i étew de batí? Ségétew maak kéroon faniréy réfurehe? Békén, non i kéunur Juane énda méfélukén loo bé kéroone. ⁸ Aw ménangéy gom diyo inok angéyé kom téngténgén i ségettéwe lagéy toow fo fiyoy kégal ne? Békén, non i de étew kémégal ro fiyo batí ro dob de toow fo fiyoy lawi kay de datu. ⁹ Ati nangéy gome ténéngténg? Ségétew étew sénarigoy Tuluse muret? Hoo, éndob bérhéhé ku begom, i Juane békén saén sénarigon muret bé kébéréh i Tuluse. ¹⁰ Non been i Juane niy fantage bé Ménsulate Kébéréh i Tuluse mano, ‘Sugué kuy sugu-sugué kuwe métah Beem. Been i témafaye bé kégumah me métah Beem.’” ¹¹ Atin féntaus Jesusey kébéréh ne mano, “Bérhéhé ku begom i toowe, énda i toow na fo gérotor bé Juane bé kéluhanay de étew ménúmah. Endob dob gaiwe féguléwoy Tulusey de étewén, i kéluhanay de térfantad étew sakuf i Tuluse, toow ro na fo gérotor bé Juane béleewe ni. ¹²⁻¹³ Bé énda séna témodo i Juane de, i Moisese brab de sénarigoy Tuluse nuret ron i fantage bé kéguléwoy i Tuluse bé de étewén. Atin tidéw dob gaiwe féngganaya Juaney kéuret ne taman so béleewe ni, médooy de étew sétiboh inok fégésé ro mahur de. ¹⁴ Wén i kébéréh i de énggétah do sénarigoy Tuluse muret bé gégumah Eliase inok ureté noy kégumah Kristowe. Atin Juan i téménúmane bé nan kébéréh. Fiyo ké géunur gom bé ni. ¹⁵ Mélaw fétuntay gom fo toow amuk méuyot gom de ké gésobuto kom i de ni.

¹⁶ “Ati féségiléwo kuwe bé de étew méuyag béní? Ségiléw gom bé de nga ménsar dob fadiyane brab mika ro mégérémét. Tabar i de dumo ro bero maro, ¹⁷ ‘I begeye ménségagung gey, éndob énda ménsayaw gom. Brab léménningéng gey linggéng ménléhuon, éndob énda kéménrew gom.’ ¹⁸ Non ménangéy diniy Juan Bautistawe ménfuwasa brab énda méninémén arak. Brab bénréh i de étew sénaitanan kun. ¹⁹ Endob i Nga i Kéilawane, sani Begéne, ménangéyu dini, brab mamau atin minému. Brab ménbéréh i de étew, ‘Ay niy ségettéwe étew arumén mama brab miném arak, brab wén i dumo no do lémiful kémubra buwis brab do tete étew.’ Endob i kégétigay Tuluse, énggiton toow fo métintu sabaf bé de rénigo no.”

²⁰ Tidéw bénó, dénowoy Jesusey de étew dob de ingéd gono no réménigo médoō do mékégaif. Non énda fo ténagak roy de sala ro

fiyon fo ké énggito roy de mékégaif rénigo Jesuse. ²¹ Ménbéréh mano, “Mékégédaw-gédaw gom do étew bati dob Korasin, brab de begom do bati dob Betsaida. Buluk i de mékégaif rénigo gu dob begome ménrigo so dob de ingéd Tiro brab Sidon, ménrugayén damén i de étew diyo kéménégal do saku brab rénigono ro awéw i de lowoh ro inok fégétiga roy énggésénule ro bé de sala ro. ²² Mélaw béréhé ku begom, dob gaiwe kémukum i Tuluse, toow na fo gétimal i kékukum ne begom bé kékukum ne bé de étew dob Tiro brab Sidon. ²³ Brab begome do étew bati dob Kafernaum, méuyot gom téfégérotor taman dob lawayo. Endob ibérén gom mangéy dob uleono emferno. Amuk i de mékégaif rénigo gu dob begome ménrigo so dob ingéde Sodom, énda damén ménbinasa no non énggésénule ro damén. ²⁴ Béréhé ku begom, dob gaiwe kémukum i Tuluse, toow na fo gétimal i kékukum ne begom bé kékukum ne bé de étew dob Sodom.”

²⁵ Bé beno, i Jesuse déménasal mano, “Abay, Kadnay lawayo brab fantade, fésalamata ku Beem non fénggétiga moy toowe dob de étew énda i féngganad ro, brab bénunéyém i toowe dob de étew do métileldtédt brab énggféganad. ²⁶ Hoo Abay, ménrigoy ni non kaam kétayan brab késuwatan.”

²⁷ Tidéw beno, ménbéréh man i Jesuse dob de étew mano, “Sénarig i Abay guwey kéluhanane dob Begéne. Enda i gétigan bé atiy Ngae saliyu bé Abaye. Brab énda i gétigan bé atiy Abaye saliyu bé Ngae, brab fiyon atiy kétayay Ngae fégétiga no de.

²⁸ “I kéluhana kome do lugotén gémalbék bé kfukas gome bé de lowoh gom dob de sala gom, angéy gom dob Begéne atin fétéréné ku begom non fukasé ku begom. ²⁹ Unur gom Begén brab iring gom Begén. Non téritantadu mágédaw begom brab fétéréné ku begom. ³⁰ Non i de sugu gu begom toow fo magad, brab énda mérégén i de férigo gu begom.”

Fantag bé gaiy kétéréné

12 ¹ Enda ménrugayén tidéw beno, wén i no sébaan fuweh gai kétérén, i Jesuse brab de kuyugén téménara ro dob de médoó do faréy. Atin mélayah i de kuyugén, mélaw méndot ro do faréy atin ménama ro. ² Endob i de Fariseo diyo, amun énggito roy ni rénigo ro, ménbéréh ro dob Jesuse maro, “Téngténgém! I de kuyugém fénlis roy kitab tome fantag bé gaiwe kétérén.”

³ Séménumbul i Jesuse mano, “Aw énda ba énggébasana kom i rénigo Datu Dabide? Wén i no gai toow fo ménlayaf beroy de sundalo no. ⁴ Atin ménahur ro dob lawi i Tuluse brab namaén i fane niray dob Tuluse beroy de sundalo no. Rénigo noy ni fiyon fo ké dob kitabe, fadi saén i fakaye mama bé ni fan. ⁵ Aw énda séna énggébasana kom i ni dob kitabé niray Moisese? Sénulatén bé fatut gémalbék i de fadi dob lawi i Tuluse sénga gai kétérén.

Endob békén sala i ni. ⁶Béréhé ku begom, wén i ségétéwe étew dini mas na balilaga bé lawi i Tuluse. ⁷Wén i Ménsulate Kébéréh i Tuluse mano, ‘Mas na méuyotu de ké ségédaw gom bé kétulak gome.’ Amuk énggésobuto kom i ni, énda damén kukumé kom i de étew énda i sala ro. ⁸Non i Nga i Kéilawane, sani Begéné, wén i kuwagib gu fantag bé ati fakaye dob gaiy kétéréne.”

Nuwa Jesusey ségétéwe étew ménasdil i kémér ne

⁹Tidéw béno, méntékédan i Jesuse diyo atin ménagéw mangéy dob sébaane lawi féngadafan kay de Judio. ¹⁰Atin diyo soy ségétéwe lagéy ménasdil i ségébalae bé kémér ne. Atin diyo soy de étew méuyot témo bá Jesuse rémigo bé éndae fakay dob kitabe. Mélaw ménénginsa ro dob Jesuse maro, “Aw fakay ba dob kitab tomey muwae ké gai kétéréne?”

¹¹Atin séménumbul i Jesuse mano, “Ufama, buluk i bili-bili gome mélawu dob ménaléme kalut bé gai kétéréne, ati rigoné kome? Békén ba abangé kom inok géésut fiyon fo ké gai kétéréne? ¹²Atin i étewe toow na fo balilaga bé bili-biliwe! Mélaw fakay dob kitab tomey témabange fiyon fo ké gai kétéréne.” ¹³Tidéw béno, ménbéréh i Jesuse dob lagéye ni ménasdil i kémér ne mano, “Bétérém i kémér me.”

Atin bénétérén i kémér ne, atin sonom béno ménadi-adi loo bé ségébalae de. ¹⁴Tidéw béno, i de Fariseo ménsut ro, atin méniséuret-uret ro bé ati kékéféléhu ruwe bé Jesuse.

¹⁵Atin énggétiga Jesusey de rigoné ro, mélaw méntékédan diyo. Atin ménfuray dob Beeney de médooy do étew. Atin nuwaén i kéluhanay de démeruun bero. ¹⁶Endob sénuguén bero bé békén ureté roy fantage bé Beene dob de ségiyo étew, ¹⁷inok métuman i fénbéréh i Tuluse bé sénarigo nuwe muret féndawét Isaias mano, ¹⁸“Beeney sugu-sugué kuwe fénémili gu. Toow fo kégédawa ku brab késuwata ku. Fédiyé kuy Rémogor guwe dob Beene, atin ureté noy fantage bé kékukum guwe dob kéluhanay de étew. ¹⁹Enda séédélén taloo no mégeng ké émbéréh, atin énda métanugén ké émbéréh dob de aguwon. ²⁰Enda ikaa noy de étew do maak fénréku férébong taloo no lémat-lémat solo. Yamula tabanga no bero. Atin fédayday taman géfétabana noy kétintuwe. ²¹Atin médooy de étew dob séngae ingéd sémarig dob Beene.” Been i bénréh Isaiase.

Dénédél Jesusey saitane

²²Tidéw béno, wén i de étew nuwit ro dob Jesusey ségétéwe langafén brab mow sabaf bé rénahukoy saitane. Atin nuwa Jesuse inok gégitó brab gébéréh. ²³Atin i kéluhanay de étew ménngaif ro brab ménisénginsa-nginsa ro maro, “Aw Been keeyén i séfu Datu Dabide, sani Kristowe ongot-ongoté tom?”

²⁴Endob i de Fariseo, amun énggélingoo roy kékéréh i de étew ni, ménbéréh ro maro, “Beelsebul, sani Satanase, odoroy de saitan, i ménirayane de barakat inok gédédél bé de saitan.”

²⁵ Endob énggétiga Jesusey de itunga ro, mélaw ménbéréh dob berowe mano, “Ufama, amuk i de étew dob sébaane ingéd énda géséfagayun ro brab sétiboh ro, mébinasay nan ingéd. Taloo no i ségékuréngé étew dob sébaane lawi énda so géséfagayun ro brab sékérít ro, éndaén séko sétifon ro. ²⁶ Mélaw buluk i Satanase démédél bé saitane, mésébaad ro brab énda so gétindég i fangangatura nuwe. ²⁷ Bénréh guy ni non béréhé kom i démédélu saitan bé barakat i Satanase. Atin i fégédédél i de kuyug gom de, énda usaré roy barakat i Satanase. Mélaw fégitoj de kuyug gom békén ka Satanas i barakat guwe. ²⁸ Endob démédélu saitan bé barakat i Rémogor i Tuluse. Atin mélaw énggiton énggégumah dob begomey gaiwe méguléw i Tuluse dob de étewén.”

²⁹ Tidéw béno, fénggétiga Jesuse bero bé toow na fo barakatan i Beene bé Satanase mano, “Ufama, i Satanase ségiléw bé ségétéwe émbagér étew mantay bé lawi ne. Enda i ségétew étew géahur dob lawi i émbagére ni étew atin tulisé noy tamuk ne taman énda na géikéto no de na métah. Tidéw béno, gétuliso noy kéluhanay tamuk ne.

³⁰ “I éndae modor Begén, sébanil Begén. Brab i éndae témbabangan Begén, alangé no Begén. ³¹ Mélaw béréhé ku begom, i kéluhanay sala i de étew brab de tete kébéréh ro, géfesagadan. Endob i émbéréhe tete fantag bé Rémogor i Tuluse, énda géfasagada no. ³² I émbéréhe tete fantag bé Nga i Kéilawane, sani Begéne, émfésagadan. Endob i émbéréhe tete fantag bé Rémogor i Tuluse, énda émfésagada no bé de ni gai taloo no dob de gai géumah moso.”

³³ Atin ménbéréh man i Jesuse mano, “Ufama, i fiyowe kayéw mégonok bé fiyowe onok, atin i tetee kayéw mégonok bé tetee onok. I de séségiyo-giyo do kayéw géolon ro dob onok ruwe. ³⁴ I de begom maak do ulé gom. Enda gébéréh gom fiyo non toow gom fo tete. Non ati diyoe dob de fédéw gom, been soy nan i béréhéy de ba gom. ³⁵ I métintuwe étew rémigo fiyo, non i diyoe dob fédéw ne fiyo. Atin i tetee étew rémigo tete non i diyoe dob fédéw ne tete.

³⁶ “Atin béréhé ku begom, dob gaiwe kémukum i Tuluse, i séngae étew mékukum sabaf bé de kébéréhén énda i lantékén. ³⁷ Non i de kébéréh gom, been i nan i fégékukume begom. Amuk i kébéréh gome fiyo, énda mékukum gom. Endob amuk tete, mékukum gom.”

³⁸ Tidéw béno, wén i de Fariseo brab do témo ro bé kitabé ménbéréh dob Jesuse maro, “Maistéro, méuyot gey de ké gito gey Beem rémigo mékégaif.”

³⁹ Atin ménbéréh i Jesuse dob berowe mano, “I begome do étew méuyag béléewe ni, toow gom fo do tete brab békén gom méngintulus. Mongot gom sébaan mékégaif. Endob énda i féteng-téng de begom saliyu bé mékégaife loo bé ménrigowé dob Jonase, sani énggétahe sénarigoy Tuluse. ⁴⁰ Non i Jonase, ménbati téléc gétérésangan dob sur i toowe fo

dakél sédo. Atin loo bé nan i Nga i Kéilawane, sani Begéne, batiu moso télew gétérésangan dob bukag i fantade.⁴¹ Atin dob gaiwe kémukum i Tuluse, i de énggétah do étew dob Ninibé témindég ro témo begom do étew méuyag béni. Non ménunur ro brab énggésénule ro bé uret Jonase. Endob béleewe ni, wén i mas na gérotor bé Jonase ay ni. Gido loo énda gésénule gom.⁴² Atin dob gaiwe kémukum i Tuluse, témindég i baiwe tidew dob ingéde Seba, brab téboé no begom. Non séménugud tidew dob mérayue inok fégélingoé noy kégtigay Datue Solomon. Endob béleewe ni wén i ségetéwe mas na gérotor bé Solomone ay ni.”

⁴³ Ménbérél man i Jesuse mano, “Buluk i saitane mésut tidew dob étewe rénahuko no, sémugud dob tikare gonon séméléd téreño no. Endob buluk énda i gito no téreño no,⁴⁴ émbérél mano, ‘Séfuleu dob étewe sungu gono ku téna gak gu.’ Tidew béno, séfule brab gito noy tafaye ténidéwo no malinis brab métintu néen, non énda i saitan bati diyo.⁴⁵ Tidew man béno, mésut brab muwit fitew gétew mas na tete saitan dumo no mahur dob no étew brab bati ro diyo. Mélaw i no étew toow na fo kéfasangan bé énggétahe goho no. Loo so bé nan i mérigowe dob de tete étew méuyag béni.”

⁴⁶ I lala Jesuse émbérél séna dob de étew, énggumah i idéng ne brab de tuwaréyén lagéy. Atin témenindég ro dob liyuwe brab nongot ro ké géségo ro de.⁴⁷ Mélaw wén i ménbérél dob Jesuse mano, “I idéng me brab do tuwaréyém diyo ro dob liyuwe. Méuyot ro géségo Beem.”

⁴⁸ Séménumbul i Jesuse mano, “Bérélhé ku begom atiy idéng guwe brab do tuwaréy gu.”⁴⁹ Tidew béno, ténéduén i de kuyugén brab ménbérél mano, “Ay niy maake idéng gu brab do tuwaréy gu.⁵⁰ Non i kéluhanay étewe rigoné roy kétayay Abay guwe Tulus, beroy maake idéng gu brab do tuwaréy gu.”

I binuwayae fantag bé sémabuge

13 ¹Dob béno so gai, ménékédan i Jesuse tidew dob lawie ni, brab ménangéy dob dogote atin ménasar dob dénsaane. ²Atin toow fo médooy étewe ménlimud géliwét de. Atin non médooy ro, ménada i Jesuse dob awange ménasar diyo bé lala i de étew diyo dob dénsaane. ³Atin ténero Jesuse bero bé médoowe kétoro fén-agéw dob de binuwaya. Ménbérél mano, “Wén i ségetéwe ménangéy sémabug bé béne ne.”⁴ Atin amun sémanabug, i dumoy de béneén ménbigodoy dob doror i aguwone. Atin énggumah i de kloh manok nama ro. ⁵Atin i dumoy de béneén ménswér dob fantade médooy de batéw de, éndob kloh saén i fantade de. Atin magad témenunoh i de béne non énda ménalém i fantade de. ⁶Endob amun sémbang i téresange, ménlaay i de nohokén brab ménléhu, non énda ménalém i darir ruwe. ⁷Atin i dumoy de béneén ménswér dob fantade brab dob de duwaléy suwar énda séna témunoh ro. Ménruk

mélaw i de suwar séréngan bé de nohok, atin ménléhu i de nohok non lénimfung i de suwar. ⁸ Endob i dumoy de béenéén ménsawér dob fiyowe fantad. Atin i de ni nohok ménggonok ro médoo taman téléw folo takéf, ném folo takéf, brab mératu takéf i séngae sébaan béne.” ⁹ Atin féntaus Jesusey kébéréh ne mano, “Fégitung gom i fantage bé ni bénréh gu begom amuk méuyot gom de ké gésobuto kom.”

¹⁰ Tidéw béo, ménangéy i de kuyugén dob Jesuse atin fénénginsaa ro maro, “Sedek minuwaya go dob de étew ké ureto mo bero?”

¹¹ Séménumbul i Jesuse mano, “Dob begome do kuyug gu, Tulus i émfégétigane begom fantag bé kéféguléw ne bé de étewén. Endob i de ni étingayén ménbunéy, énda émfayagén dob de ségiyo étew. ¹² Non i étewe munur bé kétoro guwe, umana kuy kétoro guwe de inok gésobut ro médoo. Endob i étewe énda munurén bé kétoro guwe, dotén dob beeney kétoroe. ¹³ I de ségiyo étew, bérého ku saén bero fén-agéw dob de binuwaya, inok fiyon fo ké téngténgé ro, énda gito ro de. Brab fiyon fo ké fégélingoé ro, énda gélingoo ro de brab énda gésobuto ro de. ¹⁴ Mélaw méntuman i Ménsulate Kébéréh i Tuluse nuret i sénarigo nuwe féndawéti Isaias mano, ‘Fiyon fo ké témantu ro mégélingo, énda gésobuto ro de, brab fiyon fo ké témantu ro téméngténg, énda gito ro de. ¹⁵ Non i de ni étew, ménwaléy métégas i de fédew ro, brab méntéléb i de kélingo ro, brab méntéléfédéng i de moto ro. Amuk énda, gérito ro brab gégingo ro brab gésobuto ro. Atin waléy ro damén do munur dob Begéne atin mélaw fukasé ku damén bero dob de sala ro.’”

¹⁶ Atin féntaus Jesusey kébéréh ne mano, “Endob i begome, fatut moror gom, non gégitoy de moto gom brab gégingo i de kélingo gom. Atin mélaw gésobuto kom. ¹⁷ Non béréhé ku begom i toowe, médooy de sénarigoy Tuluse muret bé kébéréh ne brab de ségiyo métintu étew toow fo ménuyot gérito bé énggito gome do rénigo gu. Brab ménuyot ro fo gégingo bé énggelingoo kome do kétoro gu. Endob énda énggito ro de brab énda énggelingoo ro de.

¹⁸ “Fégingo gom i atag i binuwayae fantag bé sémabuge. I atag i ni béne, been i kébéréh i Tuluse. Atin i de ségiyo-giyo gékélasi do fantad ségiléw bé de ségiyo-giyo gékélasi do étew. Atin i sémabuge ureté noy kébéréh i Tuluse dob de ségiyo-giyo do étew.

¹⁹ “Wén i do étew énggelingoo roy fantage bé kéféguléw i Tuluse, éndob énda gésobuto ro de. Enggumah i Satanase inok kédané noy de kébéréh énggelingoo ro. Fénggiring ro bé de béne ménbigodoy dob doror i aguwone brab nama i de kloh manok. ²⁰ Atin ay ni atag i de béne ménsawér dob fantade médooy de batéw de. Fénggiring ro bé de étew énggelingoo roy kébéréh i Tuluse brab ménoror ro de témayakuf. ²¹ Endob énda méégét i kéunur ruwe. Mélaw amuk kérégénan ro loo ké mérásay ro sabaf bé kébéréhe ni, énda taus ro modor de. Ségiléw ro bé de

nohok énda i do darir ro, non mélaay ro ké méduf i térsange. ²² Atin ay niy atag i de béne ménawér dob de duwaléy suwar. Fénggiring ro bé de étew énggelingoo roy kékéréh i Tuluse éndob téngak ro non ménangga ro saén bé de kékuku ro bé de kékaguyag ro brab kékuyot ruwe waléy kawasa dob ni duniya. Ségiléw ro bé de nohok ménléhu non ménéfuk ro bé de suwar. Enda mélaw ménnggonok ro. ²³ Endob ay niy atag i de béne ménawér dob fiyowe fantad. Fénggiring ro bé de étew énggelingoo roy kékéréh i Tuluse brab énggésobuto ro. Atin munur ro de, mélaw rénigo roy kétayay Tuluse ségiléw bé kékégonok i de nohok dob fiyowe fantad mèdooy de onok ro. I de dumo étew rénigo roy fiyowe, i de dumo bero rénigo roy mèdoowe fiyo, brab i de dumo bero rénigo roy toowe fo mèdoo fiyo.”

I binuwayae fantag bé de kéroon

²⁴ Atin ménuret man i Jesuse sébaan binuwaya mano, “I kékéulguléw i Tuluse loo bé ni. Wén i ségétewe lagéy wén i safadén. Atin sénabugén i fiyowe béneén diyo. ²⁵ Endob wén i étewe sébanil bé ni lagéy. Mélaw wén i no sébaan kélungonon, ménangéy i sébanile de étew dob safad ne bé lala i kéluhanay de étew fidong. Atin séménabug so do onok kéroon dob safade ni. Tidéw bénou, ménraréy. ²⁶ Mélaw amun téménunoh i de nohok brab ménnggonok téménunoh soy de kéroon séréngan bero. ²⁷ Atin i de sugu-suguéy ni lagéy ménangéy ro dob beene brab ménénginsa ro maro, ‘Amu, aw békén ba séménabug go fiyo béne dob safad me? Sedek ménslawék i de kéroon de?’ ²⁸ Atin séménumbul i gefee de mano, ‘Rénigoy ségétewe sébanil begén.’ Atin ménénginsa man i de sugu-suguén ni maro, ‘Aw méuyot go de ké angéyé key randutén i de kéroon de?’ ²⁹ Séménumbul i gefee de mano, ‘Kagom. Non amuk randuté kom i de kéroon de, géranduto kom soy de dumo bé de nohok faréy. ³⁰ Fédaya gomén méruk i de kéroon séréngan bé de faréy taman bé gaiy kékétewe de. Tidéw bénou, bérhéku bé de kémétew de maku, Randut gom sunguy de kéroon. Tidéw bénou, timu gom brab raga gom inok tuwégén dob aféye. Tidéw bénou, kétew gom i faréye brab fédio gom dob kiwot guwe.’”

³¹ Atin ménuret man i Jesuse sébaan binuwaya mano, “Ségiléw i kékéulguléw i Tuluse bé sébaane toow fo kloh béne, éndot i étewe brab nohokén dob safad ne. ³² Fiyon fo ké toow fo kloh béne, amun téménunoh brab ménruk, ménwaléy toow fo dakél kayéw bé kéluhanay de nohokén. Atin fiyon i de kloh manok sémalag ro dob de fongo no.”

³³ Atin ménuret man i Jesuse sébaan binuwaya mano, “Atin i kékéulguléw i Tuluse ségiléw bé fégéférue fan. Endot i libune brab sénlawékén dob télewe géasad arinah taman ménruk i kéluhana nuwe.”

³⁴ I de ni, téménoro i Jesuse dob de ménslimud do étew fén-agéw dob de binuwaya. Enda i sébaan uret bénréhén bero ké békén fén-agéw dob

binuwaya. ³⁵Rénigo noy ni inok métuman i Ménsluate Kébéréh i Tuluse nuret i sénarigo nuwe mano, “Ureto kuy de étew dob de binuwaya. Atin béréhé ku beroy de ménbuney tidew féganay bé kélimbag i duniyae.”

³⁶Tidew béno, i Jesuse ténagakén i de ménlimud ni do étew atin ménahur dob lawie. Tidew béno, i de kuyugén ménfégédét ro dob Beene brab ménbéréh ro maro, “Béréhém begey i atag i binuwayae fantag bé de kéeroon dob safade.”

³⁷Atin sémenumbul i Jesuse mano, “I lagéye sémenabug bé béne ne dob safad ne, been i Begéne, sani Nga i Kéilawane. ³⁸Atin i safade, been i duniyae ni. Atin i fiyowe do béne, beroy de munur bé Tuluse brab fédayaé roy Tuluse méguléw bero. Atin i de kéeroon, beroy de békén méngintulus. Satanas i méguléwone bero. ³⁹Atin i sébanile étew sémenabug bé de kéeroon, been i Satanase. Atin i kékétéwe, been i tamfaday duniyae ni. Atin i de kémétew de, beroy de téaki. ⁴⁰I de kéeroon timuén brab tuwégén dob aféye. Ségiléw so bé niy mérigowe dob tamfaday duniyae ni. ⁴¹I Nga i Kéilawane, sani Begéne, sugué kuy de téaki gu. Atin timué roy de tete étew brab de ménfésala bé de dumo ro. Atin féganané no bero tidew dob de étew fédayaé roy Tuluse méguléwon bero. ⁴²Atin ibéré ro bero dob uleono emferno. Diyo kémérew ro brab kémigét i de kifé ro. ⁴³Tidew béno, i de métintu do étew rémendaw ro maak térsang dob kéféguléw i Abay ruwe Tulus. Fétuntay gom i ni ké méuyot gom de ké gésobuto kom.”

⁴⁴Atin ménuret man i Jesuse do binuwaya mano, “I kéféguléw i Tuluse loo bé ni. Wén i do bélodon ménrugayén ménbuney lénébeng dob fantade. Atin wén i ségétewe étew énggégito de. Tidew béno, lénébengén man. Atin toow fo moror, ménule brab fénbéléyén i kéluhanay languntama nuwe. Tidew béno, ménsefule brab bénléyén i fantado no.

⁴⁵“Atin i kéféguléw i Tuluse loo bé ni. Wén i ségétewe étew démagang brab séméléd bé toowe fo balilaga perias. ⁴⁶Amuk gérito sébaan perlas toow fo balilaga, ménagéw brab fénbéléyén i kéluhanay languntama nuwe brab bénléyé noy perlaso no.

⁴⁷“Atin i kéféguléw i Tuluse loo bé ni. Wén i fukéte lénawu dob bukag i dogote. Atin médooy de séségiyo-giyo do sédo géahur de. ⁴⁸Atin amuk ménféno, i de fatatugés bégéngé ro mangéy dob fé doror i dogote. Tidew béno, mésar ro inok féganané roy de sédo. Ahuré roy de fiyo sédo dob baskete ahuron de. Endob ibéré roy de tete sédo. ⁴⁹Loo so bé niy mérigowe dob tamfaday duniyae. I de téaki angéyé ro fégananén i de tete étew bé de métintu étew. ⁵⁰Atin ibéré roy de tete étew dob emfernove. Diyo ro kémérew brab kémigét i de kifé ro.”

⁵¹Tidew béno, ménénginsa i Jesuse dob de kuyugén mano, “Aw gésobuto kom i de ni bénréh gu?”

Atin sémenumbul ro maro, “Hoo.”

⁵² Atin ménbéröh man i Jesuse mano, “Mélaw i séngae téromo bé Ménsulate Kébéröh i Tuluse, féganadé ro soy kétoro guwe fantag bé kékéfugléw i Tuluse, gétoro bé tafaye brab mantuwe kétoro. Ségiléw mélaw bé ségétewé étew usaré noy tafaye brab mantuwe insodén.”

⁵³ Amun énggilid i Jesuse muret bé de ni binuwaya, méntékédan diyo.

⁵⁴ Atin ménule mangéy dob ingéd ne. Atin diyo téménoro dob lawie fénugadafan kay de Judio. Atin i kéluhanay de énggégélingo bé kétoro ne toow ro fo ménggaif. Atin ménésfénginsa ro maro, “Ati tidéwoy kégétigay ni étew téromo? Ati tidéwoy barakat ne rémigo bé de mékégaif ni?

⁵⁵ Aw békén ba, Been i Nga i fandaye rémigo lawi? Aw békén ba Maria i idéng ne? Atin békén ba Santiago brab Jose brab Simon brab Judas i de tuwaréyén? ⁵⁶ Békén ba i de libu no bati so dini? Tidéwoy kégétiga nuwe de, loo soy barakat ne?” ⁵⁷ Mélaw ménika ro de.

Mélaw ménbéröh i Jesuse dob berowe mano, “I sarigoy Tuluse muret bé kékéröh ne, basanan dob kéluhanay de gonon saliyu saén dob kaane ingéd brab dob de kaan do samung brab dob de kaan do étew sétifon lawi.” ⁵⁸ Atin énda réménigo no do médoor mékégaif diyo non énda méninugut ro de.

I kéléhu Juan Bautistawe

14 ¹ Bé béno, i Herode, sani méguléwe dob Galilea, énggelingoo noy de rénigo Jesus. ² Atin ménbéröh i Herode dob de sarigo no mano, “Been keeyén i Juan Bautistawe méntébule. Been keeyén i funa nuwe wén i barakatén rémigo do mékégaif.”

³ Bénréhén i ni non fénkéfoén i Juane, brab fénikétén, brab fénahurén dob férisunone. Rénigo noy ni sabaf bé ibo ne féndawét Herodiyas lénamfaén tidéw dob dumo nuwe sétiman idéng féndawét Filipi. ⁴ I Herode fénférisu noy Juane non dénowoy Juane mano, “Fénlisém i kitabé non énda damén fatut bawagé moy bawag i dumo muwe.” ⁵ Mélaw i Herode ménuyot méméléhu bé Juane, éndob ménngilak bé de Judio non kénarang roy Juane ségétewé sénarigoy Tuluse muret.

⁶ Endob amun réménigo karagiya i Herode fégétédémo no bé kéumah ne, ménsayaw i kénogo Herodiyase dob adafay de médoor do étew diyo. Atin toow fo ménswat i Herode de. ⁷ Mélaw fénasada noy ni kénogon bé irayén dey atiy kétaya nuwe ongoté no. Atin rénigo noy safae dob beene.

⁸ Atin fénbéröh i idéng i kénogone ni mano, “Uwit gom diniy uléw Juan Bautistawe dob biléwe, atin irayém begén.”

⁹ Tidéw béno, i Datu Herode toow fo méntete i fédéw ne non mika damén rémigo bé ni. Endob non bé fasad ne rénigo no dob adafay de kana no, sénuguén bé iray dob kénogone ni. ¹⁰ Mélaw fénkélengén i uléw Juane dob férisunone. ¹¹ Atin wén i ménuit bé uléw ne dob biléwe brab nirayén dob kénogone ni. Tidéw béno, nuwitén dob idéng ne. ¹² Atin i de kuyug

Juan nangéy roy bangkay ne brab lénébéng ro. Tidéw bénō, ménangéy ro dob Jesuse brab fénggétiga ro de.

Fénwaléy Jesuse médooy klohe amaén

¹³ Atin amun énggelingoo Jesusey ni uret fantag bé kéléhu Juane, méntékédan diyo brab ménda dob awange mangéy dob gélélue gonon. Endob amun énggelingoo de étew i ayo Jesuse, méntékédan ro dob de ingéd ro atin ménémantad ro ménggéta ro bé Jesuse. ¹⁴ Amun téménéfadén i Jesuse, énggito noy de médooy ni do étew ménlimud. Atin ménuray i na nuwe bero brab nuwaén i de démérue bero.

¹⁵ Amun témégénén i de kuyugén ménangéy ro dob Beene brab ménbéréh ro maro, “Enda i lawi dini, atin témégénén bénō. Féagéw mon bero inok mangéy ro dob de ingéd gédét dini. Diyo gébélén ro amaé ro.”

¹⁶ Endob ménbéréh i Jesuse mano, “Enda kailanga roy magéwe. Iraya kom bero amaé ro.”

¹⁷ Endob séménumbul i de kuyugén maro, “Enda i amaén dini saliyu bé limowe timan fan brab ruwo timan sédo.”

¹⁸ Atin bang Jesuse, “Uwit gom dini.” ¹⁹ Atin sénuguén i de étew mésar dob de kéeroon diyo. Tidéw bénō, éndot Jesusey limowe timan fan brab ruwowe timan sédo, atin léménéngag dob lawayo brab ménfésalamat dob Tuluse. Tidéw bénō, sénbaad-baadén i de fan brab nirayén dob de kuyugén. Atin sénaar ro dob de étew. ²⁰ Atin i kéluhanay de étew téménantu ro mama taman ménbésor ro. Tidéw bénō, ténimu i de kuyug Jesus i de sama i de amaén brab ménféno i foloe bra ruwo timan dakél biton. ²¹ I kédooy de étew ménama limo ngibu ro do lagéy saliyu bé de libun brab do nga.

Ménagéw i Jesuse dob rotor i wayége

²² Tidéw bénō, fénéda Jesusey de kuyugén dob awange, atin féntahén bero mangéy fingé difar bé dogote, bé lala ne émféule bé de médooy ni do étew. ²³ Atin amun énggelféuleo noy de étew, ménénagé dob burure énda i dumo no inok démasal. Amun kélungononén, diyo i Jesuse dob burure énda i dumo no. ²⁴ Bé bénō, i awange diyoén dob kérara i dogote. Atin kérégénan i de kuyugén non énggélá i de bagél dob awang ruwe, non rumfakéy réfuruhe.

²⁵ Amun lingkuwog mangéy fuweh, ménangéy i Jesuse dob berowe ménagéw dob rotor i wayége. ²⁶ Atin i de kuyugén, amun énggito roy Jesuse magéw dob rotor i wayége, toow ro fo ménngilak. Ménkes ro sabaf bé kégilak ruwe brab maro, “Ménayam!”

²⁷ Endob sonom bénō, ménbéréh i Jesuse mano, “Kagom mégilak! Begén. Fétana gom i de fédew gom.”

²⁸ Tidéw bénō, ménbéréh i Pedrowe mano, “Kadnan, amuk tintu Beem, féagéwém so begén dob rotor i dogote mangéy dob Beeme.”

²⁹ Atin bang Jesuse, “Enggon.” Mélaw méntéfor i Pedrowe tidéw dob awange atin ménagéw dob rotor i wayége saréw dob Jesuse. ³⁰ Endob amun énggétérédama noy émbagére réfuruuh, ménwaleý mégilak, atin minut méléd dob dogote. Atin ménkes mano, “Kadnan, tabangénu.”

³¹ Sonom béno, béntér Jesusey kémér ne atin génamakén i Pedrowe. Atin ménbéréh i Jesuse mano, “Toow fo kloh i kéunur me. Sedek ruwo-ruwoy fédew me?”

³² Tidéw béno, ménda ro dob awange, atin téménréni i réfuruhe. ³³ Atin i de kuyugén dob awange fénéngadaf roy Jesuse brab ménbéréh ro maro, “Tintu fo Beem i Nga i Tuluse!”

Nuwa Jesusey de médoó do démeruun

³⁴ Atin méntaus ro mifar dob dogote brab énggumah ro dob ingéde Genesaret. ³⁵ I de étew diyo énggélolo roy Jesuse. Mélaw fénksamfay roy kékéréhe dob de démeruun dob de ingéd géliwét brab nuwit ro dob Jesuse. ³⁶ Atin nongot roy Jesuse bé tungkasé noy de démeruun fiyon gékuwaha ro saén damén i tamanay kégal ne. Atin i kéluhanay de énggékuwah de, ménadi-adi.

15 ¹Tidéw béno, wén i do Fariseo brab do téromo bé kitabé ménangéy dob Jesuse tidéw Jerusalem. Ménénginsa ro maro, ²“Sedek i de kuyugém énda odoro roy adat tome tidéw dob de katufuat? Non énda méguse ro ké mama ro loo bé adat tome.”

³ Atin séménumbul i Jesuse mano, “Sémuliú ménginsaan begom. Sedek félisé kom i de sugu i Tuluse inok odoro kom i kagome kétoro? ⁴Non ménbéréh i Tuluse mano, ‘Basana moy abay me brab idéng me.’ Atin ménbéréh so mano, ‘Buluk wén i ségetéw émbéréh tete fantag bé abay ne look idéngén, fatut féléhuén.’ ⁵ Endob i begome, téromo gom bé amuk wén i ségetéw kérégénan i abay ne look idéngén, brab wén i fégétabangén irayén damén, fakay émbéréh mano, ‘Kay Tulusey ni.’ ⁶ Mélaw dob kétoro gome, éndaén kailangay de étew i masanane bé de lukés ro. Mélaw ténagak gom i kékéréh i Tuluse inok odoro kom i kagome kétoro. ⁷ Enda toow i kéunur gome bé Tuluse, ubo-ubo saén. Toow i kékéréh Isaiase, sani ségetéwe sénarigoy Tuluse muret bé kékéréh ne, amun sénulatén i fantage bé begome mano, ⁸‘Bang i Tuluse, basanay de ni do étew Begén dob kékéréh ruwe saén. Endob énda munur ro Begén dob de fédew ro. ⁹ Enda i atag i kékéngadaf ruwe Begén, non toroé roy de sugu rénigoy kéilawane brab bérhé ro tidéw dob Begéne.’ ”

Fantag bé amaéne

¹⁰ Tidéw béno, ténawag Jesusey de étew mangéy dob Beene. Atin ménbéréh dob berowe mano, “Fégélingo gom Begén brab fégésobut gom. ¹¹ I funay de étew waléy mékérésik dob adafay Tuluse, békén sabaf bé atiy amaé ruwe.

Yamula, i de tete kébérén ro mésut tidéw dob de ba roy funa ruwe waléy mékérésik dob adafay Tuluse.”

¹² Tidéw béno, ménfégédét i de kuyugén dob Jesuse, atin ménbérén ro maro, “Gétiga mo, i de Fariseo méntete i de fédéw ro sabaf bé kébérén ma nan?”

¹³ Endob séménumbul i Jesuse mano, “Mékédan i de békén katabuwan kétoro ro békén tidéw dob Abay guwe Tulus, ségiléw bé ségétéwe rémandut bé de kéron géliwét bé de nohokén. ¹⁴ Fédaya gom bero. Maak do langafén ro marak bé de dumo ro langafén. Atin amuk wén i langafén marak bé ségétéwe so langafén, ruwo ro mélawu dob kalute.”

¹⁵ Atin ménbérén i Pedrowe mano, “Fékéntayém dob begeyey nan binuwaya.”

¹⁶ Atin bang Jesuse, “Aw énda séna wayo gésobuto kom de? ¹⁷I funay Tuluse énda mésuwat bé de étew békén sabaf bé de amaé ro. Non i amaéy étewe, mahur dob sur ne brab taus so mésut tidéw dob lowoh ne.

¹⁸ Endob i de tete kébérén mésut tidéw dob ba i étewe, tintu fo tidéw dob fédéw ne. Atin been i niy funay étewe waléy mékérésik dob adafay Tuluse. ¹⁹ Non tidéw dob tetee fédéwén mésut i de tete kéfégitungén inok méméléhu, brab sétayan bé békéne bawagén, brab sébiga, brab ménakaw, brab témuigi, brab témuifu. ²⁰ Been i niy funay de étew waléy mékérésik dob adafay Tuluse. Endob fiyon fo ké énda méguse i étewe loo bé adat tome do Judio ké mama, énda waléyén mékérésik dob adafay Tuluse.”

²¹ Tidéw béno, méntékédan i Jesuse diyo brab ménangéy dob de ingéd gédét dob Tiro brab Sidon. ²² Atin wén i ségétéwe libun békén Judio batí diyo. Been i séfu i de étew tidéw Kanan. Atin ménfégédét dob Jesuse. Atin ménbérén métanug mano, “Séfu Datu Dabid, fégédawanu! I kénogo kuwe rénahukoy saitane atin mélaw toow fo kéfasangan.”

²³ Endob ménantés i Jesuse brab énda sénumbulo noy libune ni. Tidéw béno, i de kuyugén ménangéy ro dob Jesuse brab nongot ro maro, “Féagéwém i ni libun non toow fo selekén furay betom.”

²⁴ Tidéw béno, bénréh Jesuse mano, “Sénuguu saén mangéy témabang bé de Judio non ségiléw ro bé de méntadin do bili-bili.”

²⁵ Tidéw béno, i libune ni ménfégédét brab léméningkuwéd dob adafa nuwe. Atin ménfégédaw-gédaw mano, “Maistéro, tabangénu.”

²⁶ Tidéw béno, nuret Jesusey sébaane binuwaya inok fégétiga no de bé tabangé noy de Judio sungu, atin tidéw béno tabangé noy de békén Judio. Ménbérén mano, “Enda fatutén ké dotén i amaéy de nga atin ibérén dob de itu.”

²⁷ Endob ménbérén i libune ni mano, “Toow, Maistéro, éndob fiyon foy de itu géamaa roy de momu mélawu tidéw dob amaéy gefee de.”

²⁸ Tidéw béno, ménbérén i Jesuse mano, “Di, mégét i kéunur me fo toow. Mélaw rigoné kuy nan ongoté mo.” Atin bé no so uras i kénogo nuwe ménadi-adi.

Nuwa Jesusey de médoou do étew

²⁹Tidéw béno, ménagéw i Jesuse ménémantad mangéy bé doror i dogote Galilea. Atin ménénagé dob burure brab ménasar diyo. ³⁰Atin médooy de ménlimud do étew ménangéy ro dob Beene, atin nuwit roy de fikat, brab do langafén, brab do ménasdil i de kémér ro brab de sékéy ro, brab do mow, brab do médoou so étew do démériun. Atin féndiyo ro bero dob adafa Jesuse. Atin nuwa Jesuse bero. ³¹Atin toow fo ménggaif i de étew amun énggito roy de mow énggóbéréh, brab de ménasdil do kémér ro ménadi-adi, brab de fikat énggéagéw, brab de langafén énggégito. Atin dénayéw roy Tuluse féngadaféy de Judio.

Fénwaléy Jesuse médooy klohe amaén

³²Tidéw béno, ténawag Jesusey de kuyugén mangéy dob Beene. Atin ménbéréh dob berowe mano, “Méuray i na guwe bé de étew ni, non télewén géterésangan ro dob Begéne, atin béleewe ni ménétéyén i de amaé ro. Atin mikau émféule bero ké mélayah ro non mésumba ro keeyén dob de aguwon.”

³³Atin ménenginsa i de kuyugén maro, “Ati kéfingé-fingé i kénéfama geye bé de médoou ni do étew dob ni gonon méravy tidéw dob de lawi?”

³⁴Atin i Jesuse fénenginsaa no bero mano, “Firoy timan i fa koman?”

Séménumbul ro maro, “Fitew timan brab wén soy koy kloh de kloh sédo.”

³⁵Tidéw béno, i Jesuse sénuguén i de ménlimud do étew mésar dob fantade. ³⁶Atin éndotén i fitéwo no timan fan brab do sédo, brab ménfésalamat dob Tuluse. Tidéw béno, sénbaad-baadén, brab nirayén dob de kuyugén. Atin sénaar ro dob de étew. ³⁷Atin i kéluhanay de étew téménantu ro mama taman ménbésor ro. Tidéw béno, i de kuyugén ténimu roy de sama i de amaén brab ménféno i de fitew timan biton. ³⁸I kédoo ruwe do ménama fot ro ngibu do lagéy saliyu bé de libun brab de nga.

³⁹Tidéw béno, fénule Jesusey de ménlimud do étew. Tidéw man béno, ménada dob awange atin ménagéw mangéy dob ingéde Magadan.

16 ¹Wén i no sébaan fuweh, wén i do Fariseo brab do Saduseo ménangéy dob Jesuse. Ménuyot ro téméngkad bé Jesuse. Mélaw nongot ro dob Beene rémigo mékégaif inok fégito no tidéw dob Tuluse. ²Endob séménumbul i Jesuse mano, “Amuk gito gom furoy lawaye ké méléed i térsange, émbéréh gom makom, ‘Enda rémaniaén démo.’ ³Atin buluk gito gom furo brab délémon i lawaye ké sémbang i térsange, béréhé kom makom, ‘Rémania séko.’ Mélaw gétiga kom i atag i de tanda dob de rawén. Endob énda gétiga kom i atag i de tanda dob de ni do gai. ⁴I begome do étew méuyag béni, toow gom fo tete brab békén gom méngintulus. Ongoté

kom ké rémigowu mékégaif inok gétiga kom Begéney Kristowe. Endob énda i féténgténg gu begom saliyu bé sébaane mékégaif ségiléw bé ménrigowe dob Jonase bé do gétah.” Tidéw bénō, té nagak Jesuse bero brab ménagéw.

⁵Tidéw bénō, i de kuyug Jesuse ménifar ro dob dogote. Endob énggélifoto roy muwite fan. ⁶Atin nuret Jesuse beroy sébaane binuwaya fantag bé de tete adatén do étew. Ménbéréh mano, “Ingat gom brab sénggila gom i fégfééruke fan kay de Fariseo brab kay de Saduseo.”

⁷Endob i de kuyugén, énda énggésobuto roy ni binuwaya. Marok bénréh Jesusey fantage bé tintuwe fégfééruk fan. Mélaw ménségéno-géno ro falan saén bero maro, “Bénréhén i ni non énda i fa tom.”

⁸Endob i Jesuse énggétiga noy de kébéréh ro. Mélaw ménbéréh mano, “Sedek ségéno-géno gom fantag bé kékulang i fa tome? Toow fo kloh i kéunur gome. ⁹Aw énda séna énggésobuto kom de? Aw énggélifoto kom i rénigo guwe? Amun sénbaad-baad guy de limo timan do fan dob de limo ngibu do lagéy, firoy gébiton i énggétimu kome samaén? ¹⁰Atin amun sénbaad-baad guy de fitew timan do fan dob de fot ngibu lagéy, firoy gébiton i énggétimu kome samaén? ¹¹Sedek énda séna énggésobuto kom i békén fantag bé faney bénréh guwe? Ingat gom brab sénggila gom i fégfééruk i de Fariseo brab de Saduseo.”

¹²Tidéw bénō, i de kuyugén énggésobuto ro bé féingaté Jesuse bero bé kétoro i de Fariseo brab de Saduseo. Atin énggétiga ro békén nuretén i fantage bé tintuwe fégfééruk fan.

I kéunur Pedrowe

¹³Wén i no sébaan fuweh, i Jesuse ménagéw gédét dob ingéde Sesarea Filipo. Diyo fénénginsaa noy de kuyugén mano, “Ati kébéréh i de étew ké ati Begéne ni, sani Nga i Kéilawane?”

¹⁴Séménumbul ro maro, “Wén i do ménbéréh maro, Juan Bautista go kun. I de dumo de maro, Elias go kun. Brab i de dumo de maro, Beemey Jeremiase kun, taloo no ségétew bé de gétah sénarigoy Tuluse.”

¹⁵Tidéw bénō, ménénginsa i Jesuse man mano, “Dob begome, ati kébéréh gome fantag bé Begéne?”

¹⁶I Simon Pedrowe séménumbul mano, “Beemey Kristowe, Nga i méuyaige Tulus.”

¹⁷Atin bang Jesuse, “Simon, nga Juan, fénfiyoy Tuluse beem. Non békén kéilawan i ménfégétigane beem bé ni. Yamula i Abay guwe Tulus i ménfégétigane de beem. ¹⁸Atin bérhéhe ku beem, beem i Pedrowe, atin dob batéwe ni fétindégé kuy simbaa kuwe. Enda méléhu i de étew munur Begén loo bé kéunur me. ¹⁹Atin iray gu beem i aturane bé de étew féguléwoy Tuluse. Mélaw ati sugué muwe énda fakayén rigonén dob fantade ni, énda so fakayén dob lawayo. Atin ati sugué muwe fakay rigonén dini dob fantade, fakay so dob lawayo.”

20 Tidéw béno, sénugu Jesuse dob de kuyugén bé békén ureté ro dob de ségiyo étew ké Been i Kristowe.

I kéuret Jesuse fantag bé kéléhu ne

21 Tidéw bé no gai, i Jesuse fénkéntayén i kékérél ne dob de kuyugén mano, “Kailanga kuy mangéye Jerusalem brab diyo i de odoroy de Judio brab de odoroy de fadi brab de témore békén kitabé, férasayé ro fo Begén toow. Atin wén soy do méméléhu Begén. Endob dob gétéléw ne gétérésangan, tébuleu.”

22 Sonom béno, i Pedrowe nuwitén i Jesuse mangéy dob gélyu-liyuwe inok bero saén, atin génléén mano, “Kadnan, énda damén fédayaéy Tuluse de mérigo dob Beemey ni bénréhém.”

23 Endob sénaréw Jesusey Pedrowe atin ménbérél mano, “Maak Satanas go! Férayu go Begén. Alangé mo Begén non i kégégitung me békén tidéw dob Tuluse, yamula tidéw sa dob kéilawane.”

24 Tidéw béno, bénréh Jesuse dob de kuyugén mano, “Buluk atiy méuyote furay Begén, kailanga no diguré noy kaane kétayan inok odoro noy kétayay Tuluse. Tidéw béno, kailanga no fédayday békén de kérégénon ségiléw békén Begéne, fiyon fo ké féléhuén dob kruse. **25** Non atiy méuyote émféraru békén umul ne, méléhu. Endob i méléhue békén kékfuray ne Begén, gédoté noy umule magufusa. **26** Ufama, fiyon fo ké i ségétéwe étew gédoté noy kéluhanay éntingayéne dob duniyae ni, énda i lagaén buluk méléhu atin géangéy dob uleono emferno. Enda i fégébaliway étewe de inok méuyag man. **27** Non i Begéne, sani Nga i Kéilawane, séfuleu moso begey i de télaki gu, réméndawu békén barakat i Abay guwe Tulus. Atin békén gai, barasa kuy de étew loo békén fatute sabaf békén de rénigo ro. **28** Béréhé ku begom i toowe, wén i do dumo begom énda méléhu ro taman gito roy késéfule guwe inok méguléw.”

Enggiton i kéréndaw Jesuse

17 **1** Ném gétérésangan tidéw békén, nuwit Jesusey Pedrowe brab Santiagowe brab Juane dumo Santiagowe sétiman idéng dob uruk i gérotore tuduk sébero-bero saén. **2** Atin i falas Jesuse ménfégalin dob téngaanga ruwe. Réménéndaw i rangih ne maak térésang. Atin ménwaléy fute i kégal ne maak géfekaya. **3** Atin i de ni kuyugén, métékor énggito ro soy Moisese brab Eliase sébéréh-béréh ro békén Jesuse. **4** Ménbérél i Pedrowe dob Jesuse mano, “Kadnan, toow fo fiyo non dob ni tom. Amuk kétaya mo, rémigowu télaw timan dung-dung. Sébaan i kaame de, sébaan i ka Moisese de, brab sébaan i ka Eliase de.”

5 Amun émbérél sénay Pedrowe, ménfégalung dob berowey réméndawé rawén. Atin wén i ménbéréhe tidéw dob rawéne mano, “Been i niy kénimuo kuwe Nga gu, toow fo kénswata ku. Fégélingo gom.”

6 Amun énggélingoooy de kuyugén i ni, toow ro fo ménggilak. Mélaw mémétéléngkéb ro téduñsum. **7** Endob i Jesuse fénggédéto no bero brab kénuwahén bero. Atin ménbéréh mano, “Tek gom brab kagom mégilak.”

8 Amun léménengag ro téméngtténg, énda i saliyu énggito ro bé Jesuse saén.

9 Atin bé lala ruwe léménudug tidéw dob tuduko no, sénugu Jesuse bero mano, “Kagom uretén i fantage bé ni énggégito gom taman tébuleu, sani Nga i Kéilawane.”

10 Tidéw bénou, i de ni kuyugén ménenginsa ro dob Jesuse maro, “Sedek bénréh i de témořo bérabé kailanga Eliasey séfulee, tidéw bénou méguléw i Kristowe?”

11 Atin séménumbul i Jesuse mano, “Toow i nan bé fatut séfule i Eliase sungu inok tafayé noy kéluhanane. **12** Endob bérhéku begom, énggumahén i Eliase, éndob énda énggéloloy de étew de. Yamula fénrasay ro loo bé kétaya ruwe. Atin loo so bé nan i kékérasay ruwe moso Begén.”

13 Tidéw bénou, i de ni kuyugén énggésobuto roy bénréh Jesuse fantag bé Juan Bautistawé.

Dénédél Jesusey saitane

14 Amun ménsefule ro dob de ménlimud étew, ménfégédét i ségétéwe lagéy dob Jesuse brab léméningkuwéd dob adafa nuwe. **15** Atin ménbéréh mano, “Maistéro, fégédaw go bé nga guwe lagéy. Non rebengén brab toow fo kérasayan. Ségamét métuwar dob aféye brab mélawu dob wayége. **16** Nuwit gu dob de kuyugém, éndob énda géuwaa ro de.”

17 Atin ménbéréh i Jesuse dob de ménlimud do étew mano, “Enda sémarig gom bé Tuluse, brab toow gom fo do tete étew. Lugoténun sétafik begom. Enda gétuwa ku de ké ati nay kérugay i kétinkél guwe sétafik begom. Uwit gom diniy ngao no.” **18** Atin dénédél Jesusey saitane bé kékérah ne. Mélaw ménraréy i saitane, atin sonom bénou, ménadi-adiy ngae ni.

19 Tidéw bénou, i de kuyugén ménangéy ro dob Jesuse sébero-bero saén. Atin ménenginsa ro maro, “Sedek énda géféraréyo key i no saitan?”

20 Séménumbul i Jesuse mano, “Non kulang foy kénéur gome. Bérhéku begom i toowe, amuk wén saén i kloh kénéur gom ségiléw bé kéklohi i oloy sabie, góbérhé gom dob tuduke ni makom, ‘Ay go diyoo.’ Atin magéw ba. Atin mélaw amuk wén i kénéur gom, gérígono kom i kéluhanay éntingayéne. **21** Endob i ni klasi saitan, géféraréyo kom saén bé kédasal gome brab kífuwasa gome. Endaén i saliyu de fakay.”

I kéuret Jesuse fantag bé kéléhu ne

22 Amun ménlimud i de kuyug Jesuse dob Galilea, bénréhén bero mano, “I Nga i Kéilawane, sani Begéne, fékéfo séko bé de étew sébanil Begén.

23 Atin féléhué ro Begén. Endob dob gétéléw ne gétérésangan, tébuleu.”

Atin toow fo méntete i de fédew i de kuyugén amun énggelingoo roy ni.

²⁴ Amun énggumah i Jesuse beroy de kuyugén dob Kafernaum, ménangéy dob Pedrowey de kémubra kurta kay lawi i Tuluse dob Jerusalem. Atin ménénginsa ro maro, “Aw mayad ba kurta i Maistéro gome kay lawi i Tuluse?”

²⁵ Séménumbul i Pedrowe mano, “Hoo, mayad.”

Tidéw béno, amun ménahur i Pedrowe dob lawie, bénréh Jesuse sungu mano, “Simon, ati karang me de? Ati isuwe mayad buwis dob datue, do ngaén taloo no do ségiyo étew?”

²⁶ Séménumbul i Pedrowe mano, “I de ségiyo étew.”

Atin ménbéréh man i Jesuse mano, “Amuk loo, énda kailangay de ngaén i mayade buwis dob datue. Atin mélaw énda so kailanga kuy mayade kurta kay lawi i Abay guwe Tulus. ²⁷ Endob énda méuyotu de ké mérarék Betoy de étew ni. Mélaw ay go dob dogote atin duray go. Edotém i sunguwe sédo géduraya mo. Atin fétenganga mo brab gito moy félatahe fakayén fégébayad i ruwowe gétew dob lawi i Tuluse. Dotém brab bayada moy katowe de.”

18 ¹ Bé béno do gai, ménangéy i de kuyug Jesuse dob Beene brab ménénginsa ro maro, “Ati isuwe begey toow na fo gérotor dob kéféguléw i Tuluse?”

² Tidéw béno, ténawag Jesusey ségétewe nga atin fentindégén dob téngaanga ruwe. ³ Atin bénréhén bero mano, “Béréhé ku begom i toowe, amuk énda émfégalin i de fédew gom inok iringé kom i kétérifantad i de nga, énda géahur gom dob kéféguléw i Tuluse. ⁴ Non i toowe na fo gérotor bé de étew féguléwoy Tuluse, been i gérfantade loo bé ngae. ⁵ Atin atiy étewe témayakuf bé ngae loo bé ni sabaf bé kéunur ne Begén, tayakufé no so Begén.

⁶ “Endob amuk wén i émfésala bé ségétewe mantu séna munur dob Begéne loo bé ni nga, toow fo mékégédaw-gédaw. Toow fo géttimal ké mékukum, mélaw mas na fiyo dob beene ké ibérén dob dogote nikéton dakél batéw i reer ne. ⁷ Mékégédaw-gédaw i de étew dob duniiae ni non wén i de éntingayén émfésala bero. Démoyun wén i do étew émfésala bé de dumo ro. Endob mékukum ro fo toow moso.

⁸ “Mélaw amuk been i kémér me taloo no sékéyém i funa muwe gésala, kéléngém brab ibérém. Non mas na fiyo ké gédoté moy umule magufusa ménkéléng i bala i kémér me taloo no sékéyém, bé géangéy go dob uleono emferno énda i kulang bé lowoh me. Non diyo wén i aféye énda émfandaén taman sa taman. ⁹ Atin amuk i moto muwey funa muwe gésala, lésitém brab ibérém. Non mas na fiyo ké gédoté moy umule magufusa énda i bala moto mo, bé géangéy go dob emfernoue énda i kulang bé lowoh me.

¹⁰ “Atin kagom siyawén i de étew gérifantad segiléw bé ni nga. Non béréhé ku begom, wén i karo télaki démiyaga bero, atin bati ro dob lawayo beroy Abay guwe Tulus. ¹¹ Non i Nga i Kéilawane, sani Begéné, ménangéyu dini inok fukasé kuy de étew ménsala do maak do méntadin ro.

¹² “Fégitung gom i fantage bé ni ufama. Wén i ségétéwe étew wén i mératu bili-bili no. Endob méntadin i sébaane de. Ati rigoné nuwe? Tagaké noy siyowe de folo bra siyow dob fétabtabane, atin angéyé no sélédén i sébaane de méntadin. ¹³ Tidéw bénou, buluk énggito no, toow fo moror. Béréhé ku begom, toow na fo moror sabaf bé nan sébaan méntadin bili-bili énggito no bé de siyow de folo bra siyow énda méntadin ro. ¹⁴ Ségiléw so bé ni, i Abay gome Tulus dob lawayo toow fo mika de ké wén i sébaan bé de ni gérifantad do méngintulus mékukum.

¹⁵ “Amuk wén i ségétéw dumo mo brab ménsala dob beeme, ay go dob beene inok sébegom-begom saén. Tidéw bénou, toroém dey sala ne. Amuk gésénule de, tintu fo té nabanga mo séfule dob Tuluse. ¹⁶ Endob amuk énda gésénuleén de, uwitém i ségétéwe taloo no ruwo gétew bé de dumo mo séfule mangéy dob beene. Mélaw wén i dumo mo émbéréh toow i kékérél me fantag bé sala ne. ¹⁷ Endob amuk énda fo gésénuleén de, téboém dob kéluhanay de munur dob lawie féngadafan. Atin amuk énda na fo gésénuleén de, fiyon fo ké téboéy kéluhanay munure de, kagom séloyuk de maak ségétéw békén méngintulus look ségétéw lémiful kémubra buwis.

¹⁸ “Atin béréhé ku begom i toowe, amuk wén i sugué kom bé énda fakayén rigonén dob fantade ni, énda so fakayén dob lawayo diyo. Brab amuk wén soy sugué kom fakay rigonén dob fantade ni, fakay so dob lawayo diyo.

¹⁹ “Atin béréhé ku so begom, amuk wén i ruwo gétew begom dob duniyae ni séfagayun bé kédasal gome, i Abay guwe Tulus dob lawayo rigoné no. ²⁰ Non fiyon fo ké wén saén i ruwo taloo no télew gétew sélimud méngadaf Begén, diyou so dob berowe.”

Fantag bé kéfésagade

²¹ Tidéw bénou, ménfégédét i Pedrowe brab ménénginsa mano, “Kadnan, amuk wén i dumo gu démoyunén gésala dob begéne, firoy gule fatut fésagada ku? Aw fésagada ku taman fitéw gule?”

²² Séménumbul i Jesuse mano, “Médoo na gule tidéw bé nan. Kago térenon i émfésagade. ²³ Ureté ku begom i sébaane binuwaya fantag bé kéféguléw i Tuluse. Wén i ségétéwe datu méguléw, éntukén i de utong i de sugu-sugué no dob beene. ²⁴ Atin amun féngganaya no, nuwitén dob beeney ségétéwe bé de sugu-sugué no, laksaén i utong ne. ²⁵ I ni sugu-suguén énda gébayada noy utong ne. Mélaw i datue, fébéléyén i ni sugu-suguén brab bawag ne brab de

ngaén, inok waléy ro do rifén. Brab i kéluhanay éntingayéne kaan, fébéléyén so inok gébayada noy utong ne.²⁶ Endob ménlingkuwéd i ni sugu-suguén dob adafay datue, brab ménfégédaw-gédaw mano, ‘Tingkélonu na. Enda sénay kurta gu, éndob bayada ku so beem ké wén i kurta gu.’²⁷ Ménuray i nay datue de. Mélaw fénsgada no, brab éndaén fénbayadén de. Tidéw béno, fénuleén.

²⁸ “Tidéw béno, i sunguwe ni sugu-suguén ménagéw brab énggabalaka noy ségétewe bé de dumo no sugu-suguén, énggéutong dob beene kloh kurta. I ni sungu sugu-suguén génamakén i dumo nuwe ni dob reer ne brab kénrangén. Atin ménbérél mano, ‘Bayadanu bé utong me begén!’²⁹ Tidéw béno, ménlingkuwéd i géruijwe ni sugu-suguén, brab ménfégédaw-gédaw mano, ‘Tingkélonu na. Enda sénay kurta gu, éndob bayada ku so beem ké wén i kurta gu.’³⁰ Endob i sunguwe ni sugu-suguén énda fo fénggélingoén de. Yamula fénférisu no taman énda gébayada noy utong ne.³¹ Amun i de dumo sugu-suguén énggito roy ni ménrigo, toow fo méntete i fédew ruwe de. Atin ménangéy ro dob datue ménlolok, brab nuret roy kéluhanay ménrigowe.³² Tidéw béno, féntawag i datuey sunguwe ni sugu-suguén brab ménbérél mano, ‘Toow go fo tete étew. Fénsgada ku beem bé kéluhanay utong me begén non ménfégédaw-gédaw go.’³³ Fégédaw go so damén bé dumo muwe sugu-suguén loo bé kégédaw guwe beem.’³⁴ Toow fo ménkérit i datue, mélaw fénférisu noy ni sugu-suguén taman énda gébayada noy kéluhanay utong ne.”

³⁵ Atin féntama Jesusey ni binuwaya bé ni kékérél mano, “Loo bé nan i kérigoj Boh guwe dob lawayo bé séngae ségétew begom, buluk énda toow fo fésagada kom i de étew énggésala dob begome.”

Fantag bé ségélake

19 ¹Tidéw béno, amun énggilid i Jesuse téromo bé de ni, ménagéw tidéw Galilea brab ménangéy dob sakuf i dakéle ingéd Judea dob difar i wayége Jordan. ²Atin ménfuray i de médoó do ménlimud do étew. Atin diyo fén-adi-adi noy de déméruruun bero.

³ Atin wén i de Fariseo ménangéy dob Beene inok téngkadé ro inok gésumbulo no bero bé békéne damén katabawan. Ménénginsa ro maro, “Aw fakay dob kitab tome ké gélakéy lagéyey bawag ne sabaf bé de udenén do funa no?”

⁴ Atin séménumbul i Jesuse mano, “Aw énda séna énggébasana kom i Ménsumlate Kékérél i Tuluse mano, ‘Dob féganaye, amun léménimbag i Tuluse, rénigo noy ségétewe lagéy brab ségétewe libun.’⁵ Atin bang i Tuluse, ‘Been i niy funay lagéye témagak bé boh ne brab idéng ne atin sétifon bé bawag ne. Atin mélaw i ruwowe gétew waléy ro ségétew.’”

⁶ Atin féntaus Jesusey kékérél ne mano, “Mélaw éndaén ruwo ro gétew non ménwaléy ron maak sébaan. Mélaw békén fatut ké fésésuwayéy kíwilawane bero, non Tulus i ménféwaléy bero ségétew.”

⁷Tidéw béno, ménénginsa man i de Fariseo maro, “Sede mélaw ké niray Moisesey sugue bé fakay gélakéy lagéyey bawag ne amuk iraya no sulat bé kégélak ne de, tidéw béno fakayén féagéwé no?”

⁸Séménumbul i Jesuse mano, “Niray Moisesey nan sugu non toow fo métégas i de uléw gom. Endob bé gétaho, amun lénimbag i Tulusey de étew, énda ténungkas i Tulusey de ménsébawag séglak. ⁹Mélaw béréhé ku begom, ati lagéye gémélak bé bawag ne saliyu bé kébigae funa no de, atin mawag ségiyo libun, énggélamfa.”

¹⁰Tidéw béno, ménbéréh i de kuyugén maro, “Amuk loo bé nan i késébawage, i ségétéwe étew mas fiyo ké énda mawagén.”

¹¹Atin bang Jesuse, “I kétoroe ni békén kay kéluhanay de étew. Yamula kay do étew saén fénemili i Tuluse inok énda mawag ro. ¹²Wén i de séségiyo-giyo do funay de étew énda mawag ro. Wén i de étew énda gébawag ro non ménsadil ro tidéw fanay kéumah ro. Wén soy do kafun de. Atin wén soy do étew énda mawag ro inok mégéror ro gémalbék témore fantag bé kéféguléw i Tuluse bé de étewén. Mélaw amuk fénemili i Tuluse beem inok énda mawag go, odoro mo.”

¹³Wén i no sébaan fuweh, wén i do étew ménuwit bé de nga ro dob Jesuse inok tégéné no bero bé lala ne démasalan bero. Endob amun énggitoy de kuyugén, génlé roy de étew ni. ¹⁴Endob ménbéréh i Jesuse mano, “Féangéy gom i de kloh nga dob Begéne. Brab kagom alangén bero, non i de étew sémarig loo bé késarig i de ni do nga, féguléwoy Tuluse bero.”

¹⁵Atin ténégé noy de nga ni brab fénfiyo no bero. Tidéw béno, ménagéw i Jesuse.

Fantag bé kékawasawe

¹⁶Wén i no sébaan fuweh, i ségétéwe kénogo lagéy ménangéy dob Jesuse atin ménénginsa mano, “Maistéro, ati fiyowe rigoné ku inok gédoté kuy umule magufusa?”

¹⁷Séménumbul i Jesuse mano, “Sedek fénginsaa mo Begén fantag bé ati fiyowe? Enda i ségiyo fiyo saliyu saén bé Tuluse. Amuk kétaya mo gédoté moy umule magufusa, odoro moy de sugu tidéw dob Moisese.”

¹⁸Ménénginsa man i ni lagéy mano, “Ati isuwe de bé de sugu?”

Atin séménumbul i Jesuse mano, “Kago méméléhu, kago lémamfa, kago ménakaw, kago uretén i dumo muwe bé békéne toow, ¹⁹fégadata moy boh me brab idéng me, atin fégédaw go bé de dumo mo étew loo bé kégédaw me bé kaame lowoh.”

²⁰Atin bang i lagéye ni, “I kéluhanay de ni nodoro ku. Ati nay fatute rigoné ku?”

²¹Atin séménumbul i Jesuse mano, “Amuk kétaya moy waléye fo métintu dob adafay Tuluse, ule go brab fébéléyém i kéluhanay

éntingayéne kaam atin irayém i kurtae dob de méskinan. Atin mélaw kawasa go moso dob lawayo. Tidéw béno, énggonén, odor go Begén.”

²² Amun énggélingooy étewe niy ni, toow fo méntete i fédew ne atin ménagéw non toow fo kawasa.

²³ Tidéw béno, ménbéréh i Jesuse dob de kuyugén mano, “Béréhé ku begom i toowe, toow fo mérégén i kéahur i de kawasa dob kéféguléw i Tuluse. ²⁴ Atin béréhé ku begom, mas mélémuy kéahur i dakéle ayam dob tosong i darume bé kéahur i ségétéwe étew kawasa dob kéféguléw i Tuluse.”

²⁵ Amun énggélingooy de kuyugén i ni, toow ro fo ménggaif. Atin ménenginsa ro maro, “Ati mélaw i de fakay méfukas?”

²⁶ Atin ténéngténg Jesuse bero atin séménumbul mano, “Enda fakayén rigonéy de étew, éndob i Tuluse fakay gérigono noy kéluhanane.”

²⁷ Tidéw béno, ménbéréh i Pedrowe mano, “Ténagak gey i kéluhanane atin ménfuray gey Beem. Ati mélaw i gédoté keye de?”

²⁸ Séménumbul i Jesuse mano, “Béréhé ku begom i toowe, dob mantuwe duniya amuk mésar i Nga i Kéilawane, sani Begéne, dob gérötore saray méguléwe, i de begom do kuyug gu mésar so dob de folo bra ruwo saray méguléwe inok féguléwo kom i de folo bra ruwo gétribo do Judio. ²⁹ Atin atiy étewe téménagak bé lawi ne taloo no dumo no séitiman idéng, taloo no bohén brab idéngén, taloo no ngaén, taloo no fantadén inok ureté noy fantage bé kéunur ne Begén, gégédot mératuh takéf bé de ténagakén brab gédoté no soy umule magufusa. ³⁰ Endob médooy de étew gérotor béní waléy do gérifantad moso. Atin médooy de gérifantad béní waléy do gérotor moso.”

I binuwayae fantag bé de gémalbék

20 ¹ Atin ménbéréh i Jesuse sébaan binuwaya mano, “I kéféguléw i Tuluse bé de étewén ségiléw bé ni. Wén i ségétéwe étew, wén i safadén. Wén i no sébaan fuweh ménagéw toow géfuwén séméléd do étew inok gémalbék dob safad ne. ² Atin ménagayun bayada no bero sébaan félatah loo bé fatute sahud bé ségétérésangane galbék. Tidéw béno, sénuguén bero mangéy gémalbék dob safad ne. ³ Amun géraraan lémowot i térsange, ménangéy man i gefee ni safad dob fadiyane. Diyo, énggito noy de étew téménindég énda i rigoné ro. ⁴ Mélaw ménbéréh dob berowe mano, ‘Angéy gom so galbék dob safad guwe, atin bayada ku begom bé katabuwane.’ ⁵ Mélaw ménagéw ro mangéy gémalbék. Tidéw béno, rénigo noy ni bé géutuhe de, atin rénigo no so man bé géraraan lémudug i térsange de. ⁶ Amun alas singko nén témégénén, ménangéy man dob fadiyane. Atin diyo énggito noy de lagéy téménindég énda i rigoné ro. Atin fénénginsaa no bero mano, ‘Sedek énda gémalbék gom bé ni térsang?’ ⁷ Séménumbul ro maro, ‘Enda i galbék gey non énda i fegalbék begey.’

Tidéw bénō, bénréh i gefee ni safad mano, ‘Angéy gom so galbék dob safad guwe.’ Mélaw ménangéy ro gémalbék.⁸ Amun sémingkufén, i gefee bé safade ni bénréhén dob sarigo nuwe mano, ‘Tabarém i de géménalbék atin sukaya mo bero. Bayada mo sunguy de mantu séna gémalbék taman dob de énggétah de.’⁹ Tidéw bénō, i de géménalbék bé témégéne néń, énggédot roy sébaane félatah sénga ségétew bero fiyon fo ké géménalbék ro ségeuras saén.¹⁰ Mélaw i de énggétah do géménalbék tidéw géfuwén taman sémingkuf, marok gégédot ro mas na médoor kurta. Endob amun bénayada no bero, niraya no so bero sébaan félatah.¹¹ Tidéw bénō, amun éndot roy sahud ruwe, ménbutég-butég ro dob gefee bé safade ni.¹² Ménbéréh ro maro, ‘I de étew énggéturay do géménalbék, ségeuras saén i kégalbék ruwe. Endob sénahudo mo bero ségiléw so bé begeye fiyon fo ké géménalbék gey ségétérésangan tidéw géfuwén taman sémingkuf. Fatut damén bayada mo begey mas gérotor non géménalbék gey ségétérésangan dob kéeduf i téresange.’¹³ Endob ménbéréh i gefee ni safad dob ségétewe bero mano, ‘Adih, énda léniful gu begom. Ménagayun tom bé gémalbék gom ségétérésangan atin bayada ku begom sébaan félatah sénga ségétew. Mélaw rénigo guy ati fénasad guwe.’¹⁴ Mélaw dot gomén i sahud gome atin taus gom ule. I ni ségétew énggéturay gémalbék, méuyotu mirayan de ségiléw bé kéraya kuwe begom.¹⁵ Békén ba wén i kuwagib gu rémigo ké udenén i kérigo gu bé kurta guwe loo bé kétaya kuwe de? Médaléw gom keeyén sabaf mégédawu bé de ségiyo étew.’¹⁶

¹⁶ Tidéw bénō, fénggilid Jesusey binuwaya ne mano, “Mélaw i de gérifantad bénī, waléy ro moso do gérotor. Atin i de gérotor bénī, waléy ro moso do gérifantad.”

I kéuret Jesuse fantag bé kéléhu ne

¹⁷ Tidéw bénō, i lala Jesuse ménagé mangéy Jerusalem, nuwitén i de folo bra ruwo gétew kuyugén inok sébero-bero ro saén. Atin ménbéréh dob berowe bé lala ruwe magéw mano,¹⁸ “Na, magéw tom mangéy dob Jerusalem, sani Ingéd i Nga i Kílawane, sani Begéne, irayu dob de odoroy do fadi brab dob de téromo bé kitabé. Atin kukumé ro Begén féléhuén.¹⁹ Atin atéé ro Begén dob de békén Judio. Atin i de békén Judio, diyangkaé ro Begén, brab tafésé ro Begén, brab féléhué ro Begén dob kruse. Endob amuk méifus i télewe gétérésangan, tébuleu.”

²⁰ Tidéw bénō, i bawag Sebedeowe ménangéy dob Jesuse beroy de ngaén Juan brab Santiago. Atin léméningkuwd dob adafa Jesuse atin wén i nongotén dob Beene.

²¹ Atin ménenginsa i Jesuse mano, “Ati kétaya muwe?”

Séménumbul i ni libun mano, “Suguém bé amuk Beem i máguléwe moso, i de nga gu ni géésar ro so fingé dob kuwono muwe brab i ségétewe de fingé dob biwong me.”

²² Atin bang Jesuse, “Enda gétiga kom i nan ongoté kom. Aw géfedayday gom bé de kérégénon loo bé mérigowe séko dob Begéne?”

Séménumbul ro maro, “Hoo, gagané key.”

²³ Atin ménbéréh man i Jesuse mano, “Toow mérigo dob begomey de kérégénon mérigowe dob Begéne. Gido loo, békén kagén kuwagib i mémilie bé ati mésare fingé dob kuwono kuwe brab fingé dob biwong guwe. I de ni saran kay de étew fénemili i Abay guwe Tulus mésar diyo.”

²⁴ Tidéw béno, i de folo gétew dumo ro do kuyugén amun énggelingoo roy ni nongot ro, ménkérit ro bé Juane brab Santiajowe. ²⁵ Mélaw ténavag Jesuse bero kéléuhanan mangéy dob Beene, atin ménbéréh dob berowe mano, “Gétiga kom i de méguléw dob de békén Judio, wén i kuwagib ro méguléw bero, atin démoyun sugué ro bero. ²⁶⁻²⁷ Endob békén fatut loo bé nan dob begome. Amuk wén i ségétew begom méuyot waléy odoron, fatut waléy sugu-suguéy de dumo no. Atin amuk wén i ségétew begom méuyot waléy gérotor, fatut térfantad. ²⁸ Fatut miring Begén, sani Nga i Kéilawane, non énda ménangéyu dini inok wén i do sugu-sugué ku. Yamula ménangéyu dob duniyae ni inok waléy sugu-suguén brab inok iray guy umul guwe fégéfukas bé médoowe étew dob de sala ro.”

Nuwa Jesusey ruwowe gétew langafén

²⁹ Amun téngak Jesusey ingéde Jeriko beroy de kuyugén, wén i de médoó do ménlimud do étew ménfuray de. ³⁰ Atin wén i ruwowe gétew langafén ménasar dob doror i aguwone. Amun énggelingoo roy Jesuse témara, ménkes ro maro, “Séfu Datu Dabid, fégédawan gey!”

³¹ Endob i de ménlimud do étew génlé ro maro, “Kagom selekén!” Endob taus ro so mékes toow na fo métanug maro, “Séfu Datu Dabid, fégédawan gey!”

³² Tidéw béno, témenrén i Jesuse atin ténavagén bero. Atin ménenginsa dob berowe mano, “Ati kétaya kome rigoné ku dob begome?”

³³ Séménumbul ro maro, “Kadnan, méuyot gey de ké féadi-adiné mo begey inok gégito gey damén.”

³⁴ Atin ménuray i na Jesuse bero atin kénuwahén i de moto ro. Sonom béno, énggégito ro néen. Atin ménfuray ro bé Jesuse.

I kéahur Jesuse dob Jerusalem

21 ¹ Atin méntaus i Jesuse beroy de kuyugén mangéy Jerusalem. Amun gédét ron dob Jerusalem, énggumah ro dob ingéde féndawét Betfage dob tuduke féndawét Olibo. Tidéw béno, sénugu Jesusey ruwowe gétew bé de kuyugén métah. ² Ménbéréh dob berowe mano, “Taus gom agéw mangéy dob nan ingéd gésaréwo kom. Buluk gégumah gom diyo, gito gom i kudae féndawét ‘asno’ ménikét diyo beroy

nati nuwe. Ukoh gom bero atin uwit gom bero dob Begéne. ³ Atin amuk wén i ménginsa dob begome, béréh gom de makom, ‘Kailangay Kadnane bero.’ Atin i ménginsae magad tungkasé no begom.”

⁴I ni ménrigo inok métuman i kékéréh i sénarigoy Tuluse muret bé kékéréh ne mano, ⁵“Béréh go dob de étew bati dob Jerusalem mamo, ‘Téngténg gom, gérumah i datu gome térfantad kémuda dob native asno.’”

⁶Tidéw bénou, ménagéw i de ni ruwo gétew kuyugén brab nodoro roy sugu Jesuse. ⁷Atin ménsefule ro nuwit roy kudae féndawét asno brab nati nuwe. Tidéw bénou, namféno roy native bénou de kégal ro brab kéménuda i Jesuse. ⁸Diyo wén i de médoo do étew ménlimud. Bénékah roy de dumou bénou de kégal ro dob aguwo Jesuse. Atin i de dumou bero kéménléng ro do dau bongo brab bénékah ro dob agéwone inok fégito roy kébasana ruwe de. ⁹Atin i de médoo do étew magéw ro métah bénou Jesuse brab i de médoo de furay ro bénou Jesuse, ménkes ro maro, “Dayéwé tom i séfu Datu Dabide! Féfiyonéy Tuluse damén i ni étew gérumah tidéw dob Kadnane! Dayéwé tom i Tuluse!”

¹⁰Amun énggumah i Jesuse dob Jerusalem, kélogoyan i kéluhanay de étew. Ménsebéréh ro maro, “Ati ni étew?”

¹¹Atin i de médoo do étew ménodor bénou Jesuse séménumbul ro maro, “Been i niy sarigoy Tuluse muret bé kékéréh ne féndawét Jesus tidéw Galilea.”

Dénédél Jesusey de démagang dob lawi i Tuluse

¹²Tidéw bénou, ménangéy i Jesuse dob lawi i Tuluse. Amun ménahur, déndéléni de étew démagang brab do méléy-méléy diyo. Atin bénluweén i de ahayay de lémuluk kurta brab tenuwarén i de saray de émfébéléy do fégétulak do marafati. ¹³Atin ménbéréh dob berowe mano, “Wén i Ménsumate Kékéréh i Tuluse mano, ‘I lawi guwe fédawétén lawi gonon démasal.’ Endob fénwaléy gom lawi i de ménakaw.”

¹⁴Tidéw bénou, i de langafén brab de fikat ménangéy ro dob Jesuse dob lawi i Tuluse. Atin fén-adi-adi no bero. ¹⁵Endob i de odoroy de fadi brab de téromo bénou kitabé ménwaléy ro ménkérít amun énggito roy de ni fiyo rénigo Jesuse brab amun énggelingoo roy kéékes i de nga dob lawi i Tuluse maro, “Dayéwé tom i séfu Datu Dabide.” ¹⁶Mélaw ménbéréh i de ni odoron dob Jesuse maro, “Aw énggelingoo moy de kékéréh i de ni nga? Sedek énda fétéréné mo bero?”

Séménumbul i Jesuse mano, “Hoo, énggelingoo ku. Atin fiyo ké dayéwé ro Begén. Aw énda séna énggébasana kom i Ménsumate Kékéréh i Tuluse mano, ‘Fédayéw i Kadnane bénou de nga.’”

¹⁷Tidéw bénou, téragak Jesuse bero atin ménkérít dob Jerusalem mangéy dob ingéde Betania. Diyo ménbati bénou kélungonon.

¹⁸ Bé géfuwéne de, bé lala ne séfule mangéy Jerusalem, ménlayaf i Jesuse. ¹⁹ Atin énggito noy sébaane kayéw féndawét igos dob doror i aguwone. Mélaw fengédéto no inok médot bé onok ne. Endob amun séménléd de, énda i énggito no onokén saliyu bé de dau no. Tidéw béno, ménbéréh dob kayéwe ni mano, “Endaén damén mégonok go!” Sonom béno ménlaay i kayéwe ni.

²⁰ I de kuyugén, amun énggito roy ni, ménggaif ro. Atin ménénginsa ro maro, “Sedek ménagad ménlaay i kayéwo no?”

²¹ Atin séménumbul i Jesuse mano, “Béréhé ku begom i toowe, amuk tinto gom munur brab énda ruwo-ruwoy fédew gome, gérigono kom i loowe bé rénigo guwe dob kayéwe. Atin békén saén i ni, non gébérého kom dob tudukey ni makom, ‘Angéy go dob dogote’, atin mérigo ba.

²² Non amuk munur gom, gédoté kom i ati ongoté kome ké démasal gom dob Tuluse.”

²³ Tidéw béno, ménangéy man i Jesuse dob lawi i Tuluse, atin diyo téménoro. Atin i de odoroy de fadi brab de odoroy de Judio ménangéy ro dob Jesuse atin ménénginsa ro maro, “Ati atura muwe rémigo bé de ni? Ati ménirayane Beem kuwagib bé ni?”

²⁴ Séménumbul i Jesuse mano, “Sémuliú ménnginsaan begom. Amuk sumbulo kom Begén, sumbulo ku so begom ké ati kuwagib guwe rémigo bé de ni. ²⁵ Ati séménugue bé Juane inok mautis, Tulus loo ké étew saén?”

Atin séédél ro maro, “Amuk béréh tom ‘Tidéw dob Tuluso’, fénginsaa no betom sedek énda fénéngintoowo tom i Juane. ²⁶ Endob buluk béréhé tom, ‘Tidéw dob étew,’ kéluhanay de ni étew mékérít ro betom.” Ménngilak ro bé de étew non ménunur i de ménlimud bé Juaney ségétéwe sénarigoy Tuluse. ²⁷ Mélaw séménumbul ro dob Jesuse maro, “Enda gétiga key de.”

Atin mélaw bénréh Jesus mano, “Enda so béréhé ku dob begome ké ati kuwagib guwe rémigo bé de ni rigoné ku.”

²⁸ Tidéw béno, nuret Jesusey sébaane binuwaya mano, “Fégitung gom i fantage bé ni. Wén i ségétéwe lagéy wén i ruwo gétew ngaén lagéy. Ménangéy dob ofoe de atin ménbéréh mano, ‘Adu, agéw go mangéy dob safade gémalbék béní.’ ²⁹ Endob i ni nga ménbéréh mano, ‘Mikau.’ Endob énda mérugayén tidéw béno, ménagéw non ménfégalin i fédew ne. ³⁰ Atin ménangéy soy boh ne dob tuwaréye bé de ngaén. Atin ménbéréh mano, ‘Adu, angéy go galbék dob safade béléewe ni.’ Atin bang i ni nga, ‘Hoo, magéwu.’ Endob énda fo ménagéwén. ³¹ Na, ati karang gome de, ati isuwe bé de ngaén i ménodorone bé kétayay boh ruwe?”

Séménumbul ro maro, “I ofoe de.”

Atin bang Jesuse man, “Hoo, atin béréhé ku begom i toowe, i de mén sala étew loo bé de lémiful do kémubra buwis brab de sundal géahur dob kékéulgéw i Tuluse géétah na begom. ³² Non i Juan Bautistawé

ménangéy dob begome fégétiga no begom i métintuwe aguwon, éndob énda ménunur gom de. Endob i de lémiful kémubra buwis brab de sundal énggésénule ro ménunur ro de. Atin fiyon fo ké énggitogom i kégésénule ruwe, énda fo gésénule gom taloo no munur gom de.”

I binuwayae fantag bé de tete témalima

³³ Atin ménbérél man i Jesuse mano, “Fégélingo gom nay ni ségiyo binuwaya. Wén i ségitewé étew wén i safadén nohoko no do ubas. Atin fénlangkatén i lémiwéte de, atin kénélatén i fidongo nuwe bé fégékérése bé de onokén. Atin réménigo so tambala. Tidew béno, fentalimaén bé de ségiyo étew. Tidew béno, ménagéw mangéy dob mérayue ingéd. ³⁴ Amun énggumah i gayi kékétewé de, sénuguén i de sugu-sugué no inok doté roy kaane de baad bé de onokén. ³⁵ Endob i de témalima bé safade, génamak roy de ni sugu-suguén. Atin lénubag roy ségitewé de, atin fénléhu roy ségitewé de, atin nibéro ro batew i gétéléwe de taman ménléhu. ³⁶ Tidew béno, i gefee bé safade ni, sénuguén man i de ségiyo do sugu-sugué no éndob mas na médoo. Endob i de témalima bé safade, ségiléw soy rénigo ruwe dob berowe. ³⁷ Tidew béno, i gefee bé safade ni, sénuguén i tintuwe ngaén non fénggitungén mano, ‘Fégadata roy nga guwe.’ ³⁸ Endob amun énggitoy de témalima bé safad ne, ménésbérél-bérél ro maro, ‘Been i niy nga i gefee bé ni safad. Féléhué tom inok gékatom i ni safad.’ ³⁹ Mélaw génamak ro, atin fénstut ro dob liyuy safade. Tidew béno, fénléhu ro.”

⁴⁰ Atin fentaus Jesusey kóbérél ne mano, “Amuk gérumah i gefee bé safade ni, ati rigoné nuwe dob de témalima bé safad ne?”

⁴¹ Séménumbul ro maro, “Angéyé no féléhuén i de ni tete étew. Tidew béno, irayén man dob ségiyowe témalima inok iray ro dey kaane baad bé de nohok ké gérumah i kékétewé de.”

⁴² Atin ménbérél i Jesuse dob berowe mano, “Aw énda séna énggébasana kom i Ménuslate Kóbérél i Tuluse mano, ‘I batéwe nikaay de réménigo bé lawie, been i ménwaléye toow na fo balilaga fiyo batew. I ni rénigoy Kadnane ula-ula, atin mégaif tom de.’”

⁴³ Atin fentaus Jesusey kóbérél ne mano, “Mélaw bérélhé ku begom i Tuluse éndaén sarigé noy safad ne dob begome. Yamula sarigé no dob de ségiyo étew rigoné roy kétaya nuwe. I atag i ni, éndaén féguléwoy Tuluse begom. Yamula féguléwo noy de ségiyo étew munur dob Beene. ⁴⁴ Atin atiy mélawue dob nan batew toow fo mébinasa. Brab buluk i batéwe ni mélawu dob de étew, rénahé no bero maak bubuk sébuwan.”

⁴⁵ I de odoroy de fadi brab de Fariseo, énggelingoo roy de ni binuwaya nuret Jesuse. Atin gétiga ro beroy bénrého nuwe fantag bé de ni.

⁴⁶ Mélaw ténlama ro kénéfo i Jesuse, éndob énda gagané ro de non ménggilak ro bé de médoo do ménlimud do étew diyo. Non i de ni étew kénarang roy Jesuse ségitew sénarigoy Tuluse muret bé kóbérél ne.

I binuwayae fantag bé uyote

22 ¹Atin ménuret man i Jesuse binuwaya dob de étew. ²Ménbéréh mano, “I kéféguléw i Tuluse loo bé ni. Wén i ségétéwe datu réménigo karagiya dob uyot i nga ne lagéy fábawagén. ³Amun énggumah i gaiwe, sénuguén i de sugu-sugué no mangéy téma wag bé de étew sénengkat ro brab émbéréh dob berowe bé énggumahén i gaiy uyote brab fatut magéw ro mangéy dob lawi ne. Endob ménika ro magéw. ⁴Mélaw i datue ni sénuguén man i de ségiyo sugu-sugué no mangéy méréh dob de ni do étew sénengkat ro mano, ‘Méntafayén i karagiye béleewe ni. Ménsumbalién i de bobo ayam atin méntogohén i kéluhanane. Enggomén, angéy gomén dob uyote ni.’ ⁵Endob i de étew sénengkat ro, énda fo nifat ro de brab énda fo ménangéy ro dob uyote ni. Yamula i ségétéwe de ménangéy dob safad ne, atin i ségétéwe de ménangéy dob daganga nuwe. ⁶Atin i de dumo bé de ni étew sénengkat ro génamak roy de sugu-suguéy datue ni. Atin lénubag ro brab fénléhu ro bero. ⁷Mélaw i datue ni toow fo ménkérít. Mélaw sénuguén i de sundalo no atin fénléhu roy de ni étew ménméléhu, atin ténuwéy roy ingéd ruwe. ⁸Tidéw béno, ménbéréh dob de sugu-suguén mano, ‘Méntafayén i uyote, éndob i de sungu do étew sénengkat gu énda fo médait ro mangéy dini. ⁹Agéw gom mangéy dob de dakél aguwon atin séngkat gom médooy do étew taman atiy gito gome de.’ ¹⁰Mélaw i de sugu-suguén ménagéw ro dob de aguwon atin lénimud roy de médooy do étew, sani kéluhanay de énggito ro do fiyo étew brab do tete étew. Atin mélaw i gonoy uyote ni toow fo ménféno bé étewe. ¹¹Endob amun ménahur i datue inok téngténgé noy de kana, énggito noy ségétéwe lagéy énda kéménégala loo bé fatute dob uyote. ¹²Atin ménénginsa i datue mano, ‘Adih, sedek ménahur go dob ni uyot énda kéménégala loo bé fatute?’ Endob énda séménumbul i lagéye ni. ¹³Tidéw béno, bénréh i datue dob de sugu-sugué no mano, ‘Ikét gom i de kémérén brab de sékéyén, atin ibér gom dob liyuy lawie ni mangéy dob délémone. Diyo kémérew brab kémigét i de kifé no.’ ”

¹⁴Atin fénggilid Jesusey binuwayae ni mano, “Non fiyon fo ké médooy de étew sénengkat i Tuluse, kloh saén i méfémilie de waléy do étewén.”

Fantag bé buwise

¹⁵I de Fariseo, ménangéy ro sélimud sébero-bero saén. Atin ménésbéréh-béréh ro fantag bé ati kétengkad ro bé Jesuse inok gébéréh bé békéne damén katabawan. ¹⁶Tidéw béno, sénugu roy de dumo bé de kuyug ro brab de dumo bé de kuyug Datu Herod mangéy ménginsa dob Jesuse. Atin ménbéréh i de ni étew dob Jesuse maro, “Maistéro, gétiga key toow i kétoro me. Brab métintu go, énda i isu ramigo mo bé de étew. Yamula toroé moy toowe fantag bé kétayaw Tuluse toow. ¹⁷Mélaw

béréhém begey, ati karang me de, aw fatut gey ba mayad buwis dob Sesare, sani datue dob Roma taloo no énda?”

¹⁸ Endob i Jesuse énggétiga noy tetee kétaya ro brab bénréhén bero mano, “I de begom do ubo-ubo gom saén méngintulus. Sedek télamané kom Begén fagakaran? ¹⁹ Féténgténg gom Begén i félatahe kurta fégébuwis.”

Amun niraya ro de, ²⁰ ménénénginsa i Jesuse dob berowe mano, “Ati gefee dawét brab falas gito gom dob nan?”

²¹ Séménumbul ro maro, “Ka Sesar.”

Tidéw bénó, bénréh Jesuse mano, “Iray gom dob Sesarey ka Sesare. Brab iray gom dob Tulusey kay Tuluse.”

²² Amun énggélungoo roy ni, ménggaif ro bé késumbul Jesuse. Atin ménagéw ro té nagak roy Jesuse.

Fantag bé kétébulee

²³ Bé no so térésang, wén i de Saduseo ménangéy ro dob Jesuse. (Been i berowey de énda méngintoow bé kéfétábule i Tuluse bé de étew moso.)

²⁴ Ménbéréh ro dob Jesuse maro, “Maistéro, bénréh Moisese bé buluk i ofo i ménléhue, brab énggéléodo noy bawag ne, énda i nga ro, fatut bawagéy tuwaréy ne inok wén i séfu i ni étew bé tuwaréy ne. ²⁵ Na, wén i fitew gétew sétuwaréy falan lagéy ménbatí dini Brab i ofoe de ménawag. Tidéw bénó, ménléhu énda i nga ro. Tidéw bénó, i gétunduge de bénawagén soy bavage fénled i ofo ne. ²⁶ Atin ménléhu so énda i nga ro. Atin i gétéléwe de bénawagén so taman dob géfitew ruwe. Endob ménléhu ro kéluhanan énda i nga ro. ²⁷ Tidéw bénó, ménléhu soy ni libun. ²⁸ Mélaw bé gaiy kétébulee moso, ati isuwe bawag i ni libun bé de ni fitew gétew sétiman idéng? Non énggébawaga no bero kéluhanan bé méuyag ro de séna.”

²⁹ Séménumbul i Jesuse mano, “Tintu békén katabawan i kéfégitung gome. Non énda gétiga kom i Ménsulate Kébéréh i Tuluse taloo noy barakat ne. ³⁰ Non amuk tébule i de étew, ségiléw ro bé de télaki dob lawayo atin énda sébawag ro. ³¹ Atin fantag bé kétébulee, aw énda séna énggébasana kom i Ménsulate Kébéréh i Tuluse dob begome? ³² Fiyon fo ké ménléhu i ro Abrahame, Isak, brab Jakob, bang i Tuluse, ‘Begény Tuluse féngadafé Abrahame, Isake, brab Jakobe.’ I atag i ni, i Tuluse féngadaféy de méuyag do étew, békén i de ménléhu.”

³³ Atin amun énggélungoo de étew i ni kétoro Jesuse, ménggaif ro.

I toowe na fo gérotor sugu

³⁴ I de Fariseo, amun énggélungoo roy fantage bé kéfémentés Jesuse bé de Saduseo, ménsélimud ro. ³⁵ Atin i ségétewé bero té moro bé kitabe, té néngkadén i Jesuse inok énda damén katabawan i késumbul ne.

³⁶ Ménénginsa mano, “Maistéro, ati isuwe toow fo gérотор бé de sugu dob kukumay Tuluse?”

³⁷ Séménumbul i Jesuse mano, “Féimu go бé Kadnane Tulusém бé kéluhanay fédéw me, brab kéluhanay kamatu me, brab kéluhanay itunga muwe. ³⁸ Been i niy toowe fo gérотор sugu. ³⁹ I géruwowe toow fo gérотор sugu ringon so бé sunguwe de. Féimu go бé dumо muwe ringon so бé kímu me бé kaame lowoh. ⁴⁰ I toowe atag i kéluhanay de kukuman niray Moisese betom tidéw dob ni ruwo timan sugu. Tidéw so dob niy kéluhanay ténero i de sénarigoy Tuluse muret бé kékéréh ne.”

⁴¹ Amun ménlimud sénay de Fariseo, ménénginsa i Jesuse dob berowe mano, ⁴² “Ati antaf gom бé Kristowe? Ati katufua nuwe?”

Séménubul i de Fariseo maro, “Dabid i katufua Kristowe.”

⁴³ Ménbéréh man i Jesuse mano, “Amuk loo, ati kékfanu-fanu nuwe кé fénbéréh i Rémogor i Tuluse бé Dabide бé fédawétén i Kristowe ‘Kadnan?’ Non ménbéréh i Dabide mano, ⁴⁴ ‘I Kadnane ménbéréh dob Kadna kuwe, sar go dob kuwono kuwe taman témabanu бé de sébanil Beem.’ ⁴⁵ Amuk fédawét Dabidey Kristowe ‘Kadnan’, ati kékfanu-fanu nuwe кé i Kristowe séfu Dabide saén?”

⁴⁶ Endob énda i ségétew bero énggésumbul, ménantés ro. Atin tidéw бé no gai, éndaén i étew émbaraw ménginsa dob Jesuse.

23 ¹Tidéw бéno, ménbéréh i Jesuse dob de ménsélimud étew brab dob de kuyugén mano, ²“I de témore бé kitabe brab de Fariseo, beroy de étew sénarigon témore бé kitabé niray Moisese. ³Mélaw fatut odoro kom démoyun i kéluhanay kétoro ruwe begom. Endob kagom iringén i de rigoné ro non énda modor ro бé karowe kétoro. ⁴Sugué roy de étew бé médoowe, maak féobo ro beroy de toow fo émbégat do obo, éndob énda témabang ro de. ⁵Fédayéw-dayéw ro inok gitoy de étew. Atin fentaah roy de kégal ro maak do tintu fo méngintulus. ⁶Atin méuyot ro mésar dob de fiyo saran dob kandulie brab dob de lawi féngadafan. ⁷Atin méuyot ro fégadatan ségifaén dob de fadiyan brab fédawét i de étew bero ‘Maistéro.’ ⁸Endob kagom fédayaén i de étew fédawét ro begom ‘Maistéro’, non fantay-fantay gom sédumon atin ségétew saén i Maistéro gome. ⁹Atin kagom fédawét i de étew dob duniyae ni ‘Abay’, non ségétew saén i Abay gome sani Tuluse dob lawayo. ¹⁰Atin kagom so fédayaén i de étew fédawét ro begom ‘Uléw’, non ségétew saén i Uléw gome sani Begéne, Kristo. ¹¹I toowe na fo gérotor dob begome fatut waléy sugu-suguén. ¹²Atiy étewe téfégérotor, fégérifantadén. Atin i étewe térifantad, fégérotorén.

¹³“I begome do Fariseo brab do témore бé kitabé, mékukum gom fo toow. Ubo-ubo saén i kékféngintulus gome. Alangé kom i de étew méuyot mahur dob kékéguléw i Tuluse. Mika gom mahur atin alangé kom i de

étew méuyot mahur. ¹⁴ Mékukum gom fo toow do téromo bé kitabe brab begome so do Fariseo. Ubo-ubo saén i kéféngintulus gome. Lafisé kom i de libun baléw inok afasé kom i de lawi ro. Tidéw béno, démassal gom bé de métaah kédasal dob téngaangay de étew non makom ké médirung i de ni tete rigoné kom. Sabaf bé ni toow na fo gétimal ké mémukum gom moso.

¹⁵ “Mékukum gom fo toow do téromo bé kitabe brab begome do Fariseo. Ubo-ubo saén i kéféngintulus gome. Mégéror gom magéw émféunur bé ségétéwe étew dob Tuluse. Endob amuk munur, féwaléyé kom toow na fo tete bé begome, funa no toow na fo fatut mangéy dob uleono emferno.

¹⁶ “Mékukum gom fo toow. Maak do langafén gom éndob araké kom i de ségiyo étew. Ténoro gom bé fiyon fo ké wén i étew sémafa bé lawi i Tuluse, ulanden ké énda métuma no. Endob amuk wén i rémigo safá bé de bélodon dob lawi i Tuluse, béréhé kom tintu fo fatut tumané noy fasad ne. ¹⁷ Dufang gom brab maak langafén gom. Ati isuwe toow na fo gérotor, i de bélodon dob lawi i Tuluse look i méméktéfuwe lawi i Tuluse funay de bélodon méméktéfu? Toow na fo balilaga i lawi i Tuluse. ¹⁸ Atin téromo gom so bé amuk sémafa i étewé dob ahayane tulakan dob lawi i Tuluse, ulanden ké métuman i fasad ne. Endob amuk sémafa bé atiy tulake diyo dob no tulakan béréhé kom dob beene bé tintu fo fatut tumané noy fasad ne. ¹⁹ Toow gom fo maak do langafén! Ati isuwe toow na fo gérotor, i tulake look i méméktéfuwe tulakan funay tulake méméktéfu? Mas gérotor i ahayane tulakan. ²⁰ Mélaw amuk sémafa i ségétéwe étew dob ahayane tulakan, énda saén sémafaén dob nan, yamula sémafa so dob kéluhanay de tulak féndiyo dob ahayane. ²¹ Atin amuk sémafa i ségétéwe étew dob lawi i Tuluse, énda sémafaén saén dob nan, yamula sémafa so dob Tuluse bati diyo. ²² Atin amuk sémafa i ségétéwe étew bé lawayo, sémafa so dob saray Tuluse brab dob Tuluse mésaran de.

²³ “Mékukum gom fo toow do téromo bé kitabé brab de begom do Fariseo. Ubo-ubo saén i kéféngintulus gome. Iray gom dob Tulusey géfoloe bé kéluhanay languntama kome fiyon i faninue nohok gom, éndob dénigur gom i de gérotor sugu dob kitabe loo bé kétintuwe, brab kégédawe, brab gésarigone adat. I de ni niray gom fatut rigoné kom éndob kagom digurén i de dumo de. ²⁴ Maak do langafén gom marak bé ségiyowe étew! Modor gom bé de kloh do sugu éndob félisé kom i de gérotor do sugu. Ségiléw gom bé ségétéwe étew kédané noy liféte tidéw dob wayége inémé no, éndob inémé noy dakéle ayam.

²⁵ “Mékukum gom fo toow do téromo bé kitabe brab begome do Fariseo. Ubo-ubo gom saén métintu éndob i de fédéw gom toow fo tete. Non toow gom fo arumén brab lémiful. Ségiléw gom bé ségétéwe étew urahé noy tabue look biléwe fingé fuweh saén éndob dungisan fo toow

dob bukag ne. ²⁶ Maak do langafén gom, begom do Fariseo, non énda gito gom i toowe. Féfiyo gom i de fédew gom loo bé ségétéwe murah bé bukag i tabue. Tidéw béno, tintu gom fiyo, brab métintuy adat gome so.

²⁷ “Mékukum gom fo toow do témozo bé kitabe brab de begom do Fariseo. Ubo-ubo gom saén fiyo éndob tete i de adat gom. Ségiléw gom bé de lébeng fiyoy de falas ro dob liyuwe, éndob dob bukage wén i do bukal de brab do mérénah do bangkay. ²⁸ Non ubo-ubo gom saén métintu inok i de étew karangé ro begom do fiyo étew. Endob i de fédew gom méfeno bé tugie brab sala.

²⁹ “Mékukum gom fo toow do témozo bé kitabe brab de begom do Fariseo. Ubo-ubo saén i kéfengintulus gome. Rémigo gom do fiyo lawi lébengon kay de sénarigoy Tuluse, brab rémigo gom fiyo do lébengon kay de métintu étew ménrugayén ménléhu. ³⁰ Atin bérhé kom makom, ‘Amuk méuyag gey bé gaiwe méuyag i de ni sénarigoy Tuluse muret bé kérhéne, énda mamung gey bé de katufua key méméléhu bero.’ ³¹ Endob bé nan kérhé kom, fégito gom bé begom i de séfu i de ménméléhu bé de ni sénarigoy Tuluse. ³² Mélaw fatut fétaus gom i de tete rénigoy de katufua kom. ³³ Maak do ulé gom non i de katufua kom maak do ulé ro. Mélaw kagom karangén de ké géséliya gom bé kékukume begom mangéy dob uleono emferno. ³⁴ Mélaw sugué kuy de sénarigoy Tuluse muret, brab de gétigan étew, brab de témozo mangéy dob begome. Endob féléhué kom i de dumo bero, brab féléhué kom i de dumo bero dob de krus, brab badasé kom i de dumo bero dob de lawi féngadafan, brab fégétaé kom i de dumo bero dob de ségiyo-giyo ingéd. ³⁵ Mélaw mékukum gom bé sala i de étew bé kérhéruwe bé de métintu étew, tidéw dob sunguwe métintu étew ménléhu féndawét Abel taman dob Sekariase sani nga Barakiase. Fénléhu dob lawi i Tuluse dob élét i ahayane tulakan brab mékétéfuwe sibéy. ³⁶ Bérhé ku begom i toowe, i de begom do étew méuyag béri mékukum gom sabaf bé de ni sala bé kérhéhue bé kéluhanay de ni.”

³⁷ Tidéw béno, ménbérhé i Jesuse fantag bé adat i de étew dob Jerusalem mano, “I Begome do étew dob Jerusalem, tete i fédew guwe fantag bé begome. Non fénléhu gom i de sénarigoy Tuluse muret brab nibéro kom batéw i de sénugu dob begome taman ménléhu ro. Firoy gule i kétaya kuwe térimu begom loo bé kétimu i mérítone manok télikub-kubo noy de fiyakén bé de fafakén? Endob ménika gom de. ³⁸ I lawi gome méttagak brab mébinasa moso. ³⁹ Atin bérhé ku begom, tidéw béleewe ni, éndaén gito gom Begén taman énda émbérhé gom moso, ‘Féfiyonéy Tuluse damén i gégunahe tidéw dob Kadnane.’ ”

Fantag bé tamfaday duniyae

24 ¹I lala Jesuse magéw tidéw dob lawi i Tuluse, i de kuyugén ménfégédét ro dob Beene toroé roy de fiyo falasén do lawi bé

lawi i Tuluse. ²Endob ménbéréh i Jesuse mano, “Gito gom i de ni? Béréhé
ku begom i toowe, i kéluhanay de ni mébinasa, brab fiyon i de batéw
fénggérigo de émbéragar ro.”

³Amun ménasar i Jesuse dob tuduke féndawét Olibo, ménangéy i de
kuyugén dob Beene sébero-bero saén. Atin ménbéréh ro maro, “Béréhém
begey kédiron mérigo de ni. Brab ati fégelolonone de ké gédétén
gégumah i késéfule me brab tamfaday de gai?”

⁴Séménumbul i Jesuse mano, “Ingat gom inok énda méfagakaran
gom. ⁵Non médooy mosoy de étew gégumah usaré roy dawét guwe, brab
béréhé ro maro, ‘Begéney Kristowe.’ Atin médooy de géfagakara ro. ⁶Atin
gélingoo kom i kékéréh i sétibohé brab gélingoo kom soy fantage bé de
gira. Endob kagom mágilak de. I de ni kailangan mérigo éndob békén
sénay ni tamana nuwe. ⁷I de ingéd sétiboh ro bé de ségiyo ingéd. Brab i
de sakuf fangangaturan sétiboh ro bé de ségiyo. Atin wén mosoy lénggob
brab do luba dob de séségiyo-giyo do ingéd. ⁸Endob i de ni féganaya
no saén loo bé kékédawétay ségétewe libun obor gédétén
mégénega.

⁹“Atin i kéluhanay de étew mérarék ro begom sabaf bé kékunur gome
Bégén. Atin mélaw kéfoén gom inok férasayé ro begom brab félahué
ro begom. ¹⁰Atin bé beno, wén i médooy do étew témérén munur. Atin
sékéfo ro brab mésérarék ro. ¹¹Tidéw beno, médooy de ubo-ubo sarigoy
Tuluse muret bé kékéréh ne gégumah brab fégakara roy de médooy do
étew. ¹²Atin sabaf bé kélégebé i tetee, éndaén ségédaw i de étew. ¹³Endob
ati géfedaydaye munur taman dob tamfadane, méfukas ro. ¹⁴Atin i ni
Fiyo Uret fantag bé kékéguléw i Tuluse ureténi dob kéluhanay de ingéd
dob duniyae ni inok gétigay kéluhanay de étew. Tidéw beno, gégumah i
tamanaane.

¹⁵“Atin gito gom i ‘Mékésirang-sirange Surga’ bénréh i sénarigoy Tuluse
féndawét Daniel bé do géta. Atin témindég dob mékétéfuwe gonon.”
(Fégésobutéy masawe.) ¹⁶Atin féntaus Jesusey kékéréh ne mano, “Bé beno
gai, i de étew bati dob Judea fatut mérarék ro dob de tuduk. ¹⁷Atin i étewe
dob liyuy lawi ne, békénén fatut mahur dob lawi ne inok angéyé noy insod
ne. Fatut magayasén mérarék. ¹⁸Atin i étewe diyo dob safad ne, békénén
fatut séfule dob lawi ne inok angéyé noy géruwowe lafin kégalén. ¹⁹Bé do
no do gai, toow fo mékégédaw-gédaw i de libun obor brab de mériton do
idéng. ²⁰Dasal gom dob Tuluse brab ongot gom dob Beene inok dob gaiwe
kailanga kom i méraréye bé de gai mélégénéy taloo no gai kétérén. ²¹Non
toow na fo gétimal i kérégéy ni bé kéluhanay de ségiyo do kérégénon dob
ségiyowe gai tidéw bé kéklimbag i Tuluse bé duniyae taman so béleewe ni.
Atin éndaén i kérégénon loo bé ni tidéw bé beno gai. ²²Endob i Tuluse
fénfokoén i do no gai. Amuk énda rénigo noy ni, énda i ségétew méuyag.
Féfokoé noy de gai non ménuray i na nuwe bé de fénémilién étew.

²³ “Bé beno gai, amuk wén i émbéréh dob begome mano, ‘Téngténg gom, ay niy Kristowe,’ taloo no ‘Diyoo, ay nan,’ kagom munur de. ²⁴ Non gérumah i de émbéréh, ‘Begén i Kristowe,’ brab do ubo-ubo sénarigoy Tuluse. Atin gérigono roy de dakél mékégaif inok géfagakara roy de fénemili i Tuluse, amuk fakay. ²⁵ Fétuntay gom i de ni. Bérhéhe ku dob begome lokut énda séna mérigo no.

²⁶ “Atin amuk wén i émbéréh dob begome mano, ‘Téngténg gom, diyo i Kristowe dob gonone énda i étew de bati,’ kagom mangéy diyo. Look amuk émbéréh ro maro, ‘Téngténg gom, ay diyoo ménrékunéy,’ kagom munur de. ²⁷ Non i Nga i Kéilawane, sani Begéne, giton i késéfule guwe ségiléw bé kégitone bé kilote rémendaw tidéw sébangan mangéy élédon.

²⁸ “Fiyon atiy gonoy de ménléhu, diyo soy de uwak sétimu.

²⁹ “Enda mérugayén tidéw bé de mérégén do gai, i térsange waléy délémon, brab i térsang kélungonone éndaén rémendawén, brab i de giton mélawu ro tidéw dob lawayo brab i de éntingayén dob lawayo mékuyung. ³⁰ Tidéw beno, giton dob lawayoy fégéolonone bé kégumah guwe, sani Nga i Kéilawane. Atin i kéluhanay de étew dob duniyae ni kémérew ro bé kégilak ruwe. Tidéw beno, gito ro Begén dob rawéne gérumah tidéw dob lawayo barakatan brab rémendaw. ³¹ Atin dob métanuge béréh i témburiwe, sugué kuy de télaki gu mangéy dob séngae gonon dob duniyae ni. Atin timué roy de fénemilién étew gu tidéw dob kéluhanay de ingéd.”

³² Tidéw beno, nuret Jesusey sébaane binuwaya mano, “Fétuntay gom i ni ufama fantag bé kayéwe. Dini dob betome ni, sonom lémbud i de fongo no brab émféantu daun, gétiga kom gédétén i basa médufe. ³³ Ségiléw so bé beno gai. Amuk gito gomén mérigo de ni bénréh gu, gétiga kom gédétén i késéfule guwe. ³⁴ Atin bérhéhe ku begom i towe, i de étew méuyag beni, énda méléhu ro taman mérigo de ni. ³⁵ I lawayo diyo brab duniyae ni méalfa, éndob i kékéréh guwe énda méalfaén.

³⁶ “Endob énda i ségétew gétiga bé gaiy kégumah i no gai séfuleu. I de télaki dob lawayo énda gétiga ro de, brab fiyon i Begéne, sani Nga i Tuluse, énda so gétiga ku de. I Abay guwe saén Tulus i gétigane bé nan gai. ³⁷ I késéfule guwe ségiléw bé gai Noehe. ³⁸ Non bé gai Noehe, amun gédétén gérumah i dunuke, i de étew énda ménbuku ro. Yamula ménama ro, méniném ro, ménawag ro taman bé gaiy kéahur Noehe dob barkowe. ³⁹ Non i de étew énda énggétiga roy ati mérigowé séko. Endob tékow énggumah i dunuke atin ménléné ro kéluhanan saliyu bé Noehe brab de samungén. Ségiléw so bé niy kétékow i késéfule guwe. ⁴⁰ Bé beno gai, wén i ruwo gétew lagéy diyo gémalbék dob safade, atin i ségétewe de dotén brab i ségétewe de mésfélé. ⁴¹ Atin wén i ruwo gétew do libun géming, atin i ségétewe de dotén, brab i ségétewe de émféled. ⁴² Ingat gom mélaw, non énda gétiga kom i gaiy késéfule i Kadna kome, sani

Begéné. ⁴³ Fétuntay gom i ni ufama. Amuk i gefee bé lawie gétiga noy gaiwe gégumah i ménakawe, énda fo fidongén brab énda fédayaé no mahur i ménakawe. ⁴⁴ Mélaw fatut tafay gom sénga tékélid. Non séfuleu bé gaiwe énda karangé kom de.

⁴⁵ “Ati gésarigone brab gétuwane sugu-suguén? Been i sugu-suguéne sénarigoy amu ne méguléw bé de dumo no sugu-suguén, inok irayén i de amaén bé fatute gai. ⁴⁶ Toow fo moror i ni sugu-suguén ké séfule i amu ne brab gito no rémigo bé kaane galbék loo bé fatute. ⁴⁷ Béréhé ku begom i toowe, i amue ni sarigé noy kéluhanay de kaan do étingayén dob ni sugu-suguén. ⁴⁸ Endob amuk tete i adat i ni sugu-suguén atin fégitungé no mano, ‘Mérugay sénay késéfule i amu guwe.’ ⁴⁹ Atin féganaya noy lémubage bé de dumo no sugu-suguén, atin mama brab miném séréngan bé de molon. ⁵⁰ Tidéw bénou, séfule i amu ne bé gaiwe énda gétigay ni de sugu-suguén, atin kétékowan. ⁵¹ Mélaw i amu ne, kukumé noy ni sugu-suguén atin fédiyoé no dob gonoy de ubo-ubo étew. Diyo kémérew brab kémigét i de kifé no.”

I binuwayae fantag bé de folo gétew kénogon

25 ¹ Atin nuret Jesuse man i sébaane binuwaya fantag bé késéfule ne mano, “I kéféguléw i Tuluse loo bé ni. Wén i do folo gétew kénogon. Nangéy ro bénalak i ségétéwe témérima lagéy. I séngae kénogon wén i kaan solo nuwit. ² Endob i limowe de gétew do bénou brab i de limo de gétew do métileddé. ³ Non i de limo de do bénou ménuwit ro do solo éndob énda i do wayégén. ⁴ Endob i de limo de gétew do métileddé nuwit roy de solo brab de katiya ménféno fitroliyo. ⁵ Tidéw bénou, ménlis i témérimawe ni lagéy. Atin mélaw ménwaléy manat i de ni folo gétew kénogon. Atin énggfidong ro.

⁶ “Amun kérara kélungononén, wén i mékese mano, ‘Ay ni néni témérimawe lagéy énggumahén! Enggomén, angéy gom balak.’ ⁷ Sonom bénou, méntek i de folo ni gétew kénogon, atin ténumo roy de solo ro. ⁸ Tidéw bénou, i de bénou ni do kénogon bénréh ro dob de métileddé do kénogon maro, ‘Irayan gey bé fitroliyo goma nan, non ménfadéng i de solo gey.’ ⁹ Endob séménumbul i de métileddé do kénogon maro, ‘Enda fakayén non kulang i fitroliyo geye ké tukido key de begom. Fatut angéy gom de béléy kagom.’ ¹⁰ Mélaw ménagéw i de bénou ni do kénogon inok ménléy ro do fitroliyo. Atin amun ménagéw ro, énggumahén i témérimawe lagéy. Atin i limowe de do énggétafay, ménodor ro bé témérimawe ni lagéy ménahur ro dob uyote. Tidéw bénou, ménfintuén i bengawane.

¹¹ “Enda mérugayén tidéw bénou, énggumah man i de bénou do kénogon. Atin téménawag ro maro, ‘Maistéro, féahurén gey.’ ¹² Endob séménumbul i témérimawe ni lagéy mano, ‘Tintu fo énda gélo gu begom.’ ”

¹³ Atin fénggilid Jesusey binuwayae ni mano, “Been i funa kome fatut mingat. Non énda gétiga kom i gai guwe séfule.”

¹⁴ Atin ménuret man i Jesuse sébaan binuwaya fantag bé kéféguléw i Tuluse bé de étewén mano, “Wén i ségétéwe étew ménagéw mangéy dob mérayue ingéd. Amun énda séna magéwén de, ténawagén i de sugu-sugué no atin sénarigén i de languntama no dob berowe. ¹⁵ Nirayén dob séngae sugu-suguén loo bé kétileédtéd ruwe. Dob sanguwe de niraya no limo ngibu kurta. Atin dob gérubowe de niraya no ruwo ngibu, atin dob gétéléwe de niraya no séngibú kurta. Tidéw béno, ménagéwén i ni étew ménangéy dob mérayue ingéd. ¹⁶ Sonom so bé kéagéw i amu ruwe, i sanguwe sugu-suguén méndagang-dagang. Atin énggéinség de limo ngibu kurta. ¹⁷ Atin loo so bé niy rénigoy gérubowe sugu-suguén, atin énggéinség de ruwo ngibu kurta. ¹⁸ Endob i gétéléwe sugu-suguén ménagéw brab kéménalut dob fantade, atin lénébéngén i séngibuwé kurta sénarig dob beene.

¹⁹ “Tidéw béno, amun ménrugayén, ménsefule i amu ruwe atin ténawagén i de sugu-sugué no inok étuké noy kurta ne. ²⁰ Atin i sanguwe sugu-suguén, téméningé brab ménbéréh dob amu ne mano, ‘Amu, ay niy limowe ngibu kurta sénarigém dob begéne. Ay ni soy limowe ngibu kurta inségén.’ ²¹ Atin ménbéréh i amu ne mano, ‘Fiyo, mésarigon go brab fiyo go sugu-suguén. Non mésarigon go bé klohe, mésarigon go so bé médoowe. Méuyotu ké moror go séréngan begén.’ ²² Tidéw béno, i gérubowe sugu-suguén téméningé brab ménbéréh mano, ‘Amu, ay niy ruwowe ngibu kurta sénarigém dob begéne. Atin ay ni soy ruwowe ngibu inségén.’

²³ Tidéw béno, ménbéréh i amu ne mano, ‘Fiyo, mésarigon go brab fiyo go sugu-suguén. Non mésarigon go bé klohe, mésarigon go so bé médoowe. Méuyotu ké moror go séréngan begén.’ ²⁴ Tidéw béno, téméningé i gétéléwe sugu-suguén. Atin ménbéréh mano, ‘Amu, gétiga ku beem métégas go fo étew. Edoté moy békéne kaam, brab kétewé moy békéne nohokém. ²⁵ Mélaw mégilaku fo beem. Atin mélaw, ménagéwu brab bénunéy guy kurta me dob fantade inok énda métadino. Atin téngténgém, ay niy séngibuwé kurta sénarigém dob begéne.’ ²⁶ Tidéw béno, ménkérít i amu ne, atin ménbéréh mano, ‘Tete go fo sugu-suguén brab faukén go fo toow. Aw gétiga mo médotu kun bé békéne kagén, brab kentew guy békéne nohok gu? ²⁷ Amuk kémarrang go loo bé nan, fatut damén fendiyoém i kurtae dob bangkue inok buluk séfuleu, fakay doté ku brab wén i inségén.’ ²⁸ Tidéw béno, bénréh i amue ni dob de étew dob sékulo ruwe téménindég mano, ‘Dot gom i kurta ne atin iray gom dob ségétéwe wén i folo ngibu kurtaén. ²⁹ Non i de étew mésarigon ro, umanan irayan inok waléy médooy karowe de. Endob i de étew énda mésarigon ro, fiyon i klohe dob berowe dotén so. ³⁰ Atin i ni tete sugu-suguén, ibér gom dob liyuwe dob délémonsé gonon. Diyo kémérew brab kémigét i de kifé no.’ ”

I de bili-bili brab do kambing

³¹ Atin ménuret man i Jesuse ségiyo binuwaya mano, “I Nga i Kéilawane, sani Begéne, amuk séfuleu begey i de télaki gu inok méguléw, mésaru dob sarane kay méguléwe. ³² Atin mélimud dob adafa kuwey kéluhanay de étew. Atin féganané kuy de fiyo étew bé de tete étew ségiléw bé kéfeganay témalimae bili-bili bé de bili-bili no brab de kambing. ³³ Atin fédiyoé kuy de fiyo étew dob kuwono kuwe atin fédiyoé kuy de tete étew dob biwong guwe. ³⁴ Atin i Begéne, sani méguléwe, bérhéhe ku dob de fiyo étew dob kuwono kuwe maku, ‘Fénfiyoy Abay guwe Tulus begom. Enggomén, ahur gom dob kéféguléw i Tuluse loo bé kékantak ne de tidew bé kélémbag ne bé duniyae ni. ³⁵ Non amun ménlayafu, fénama gom Begén. Atin amun ménteruménu, féniném gom Begén. Atin amun énda séna gélolo gom Begén, ténayakuf gom Begén dob de lawi gom. ³⁶ Atin amun énda i kégal gu, fénkégal gom Begén. Atin amun déménruunu, ténalima gom Begén. Atin amun ménférisuwu, ténukaw gom Begén.’ ³⁷ Tidew béno, i de ni fiyo étew émbéréh dob Begéne maro, ‘Kadnan, kédiron i kégito geye Beem mélawayaf atin fénama gey Beem, taloo no térumén go atin féniném gey Beem? ³⁸ Brab kédiron i kétayakuf geye Beem dob de lawi gey fiyon fo ké énda séna gélolo gey Beem? Brab kédiron i kégito geye Beem félawas atin fénkégal gey Beem? ³⁹ Brab kédiron i kégito geye Beem démérue taloo no ménférisu go atin ténukaw gey Beem?’ ⁴⁰ Tidew béno, bérhéhe ku bé de fiyo étew maku, ‘Bérhéhe ku begom i toowe, amun ménggédaw gom bé ségétéwe gérifantad dumo gu, maak ménggédaw gom so Begén.’ ⁴¹ Tidew béno, bérhéhe ku dob de étew dob biwong guwe maku, ‘I begome médaït gom mékukum, féravy gom tidew dob Begéne. Angéy gom dob aféye énda émfandaén taman sa taman méntafayén ka Satanase brab de kaan do kuyug do saitan. ⁴² Non amun ménlayafu, énda fénama gom Begén. Atin amun ménteruménu, énda féniném gom Begén. ⁴³ Atin amun énda gélolo gom Begén, énda ténayakuf gom Begén dob de lawi gom. Atin amun énda i kégal gu, énda fénkégal gom Begén. Atin amun déménruunu brab amun ménférisuwu, énda ténalima gom Begén.’ ⁴⁴ Tidew béno, i de ni tete étew émbéréh ro maro, ‘Kadnan, kédiron wayoy kégito geye Beem mélawayaf taloo no térumén, taloo no ségétéw go énda gélolo gey de, taloo no énda i kégalem, taloo no démérue, taloo no ménférisu, atin énda ténabang gey Beem?’ ⁴⁵ Atin i Begéne, sani méguléwe, sumbulo ku bero maku, ‘Bérhéhe ku begome i toowe, amun énda ténabang gom i ségétéwe toow fo gérifantad kuyug gu, maak énda so ténabang gom Begén.’ ⁴⁶ Tidew béno, i de ni do tete étew, féangéyé ku bero dob uleono emferno inok mékukum ro taman sa taman. Endob i de métintu do étew gédoté roy umule magufusa.”

I bantak i de odoroy de Judio

26 ¹Amun énggilid i Jesuse témo ro bé de ni, ménbérél dob de kuyugén mano, ²“Gétiga kom amuk méifus i ruwowe gétérésangan, gégumah i gaiy kanduli tome do Judio féndawét ‘Témara.’ Bé bénou, i Begéne sani Nga i Kéilawane, atéénu inok féléhué ro Begén dob kruse.”

³Bé bénou so, i de odoroy de fadi brab de odoroy de Judio, ménlimud ro dob lawi i gérotore fadi féndawét Kayafas. ⁴Diyo méniséfagayun ro kéfoé roy Jesuse inok féléhuén. Endob bénantak ro rigonén ké énda i ségiyo étew de gétigan. ⁵Ménisébérél ro maro, “Békén saén bé lala tome kémanduli, kinok wén i mérimbur bé de étew.”

⁶Atin diyo i Jesuse dob lawi i ségétewe ménadi-adinén fémuteén féndawét Simon, dob ingéde Betania. ⁷Atin bé lala Jesuse mama, énggumah i ségétewe libun wén i fiyo katiyaén ménfénou bé balilagae nor fégféamut. Atin ménfégédét dob Jesuse, atin lénukaén dob uléw ne. ⁸Endob i de kuyugén, amun énggito roy ni rénigoy libune ni, ménwaléy ro mékérit. Atin ménbérél ro maro, “Sedek séninggula saén i nan fégféamut? ⁹Non amuk fénbélén damén i nan nor, wén i médo kurta gédotén de brab iray damén dob de méskinan.”

¹⁰Endob i Jesuse énggétiga noy kékérél ruwe, atin ménbérél mano, “Kagom dowoyén i libune ni. Non toow fo fiyoy rénigo nuwe dob Begéne. ¹¹I de méskinan taus ro bati dob begome sénga tékélid, éndob i Begéne énda démoyunu bati dob begome. ¹²Bé kéluka ne bé fégféamute dob Begéne, fégétafay bé lowoh guwe ké lébengénu. ¹³Atin béréhé ku begom i toowe, dob séngae gonon dob duniyae ni uretén i Fiyowe Uret, uretén soy kérigo nuwe Begén. Mélaw i de étew gétédémo roy ni libun.”

I rénigo Judase

¹⁴Tidéw bénou, i ségétewe bé de folo bra ruwo kuyugén féndawét Judas Iskariot ménangéy dob de odoroy de fadi. ¹⁵Atin ménénginsa dob berowe mano, “Firoj i iray gome begén ké fékéfo guy Jesuse dob begome?” Atin bénayada ro télén folo félatah. ¹⁶Tidéw bé no gai, sénléd Judasey fiyowe gai fékéfo i Jesuse.

¹⁷Amun dob sunguwe fuweh bé kékanduli i de Judio féndawét “Fan énda i Fégfééruk de” look “Témara”, i de kuyugén ménangéy ro dob Jesuse atin ménénginsa ro maro, “Hon i kétaya muwe gono key témafay bé amaé muwe bé ni kanduli?”

¹⁸Atin séménumbul i Jesuse mano, “Angéy gom Jerusalem atin bérél gom dob étewe diyo makom, ‘Enggumahén kun i uras i Maistérowe. Mélaw mamung bé kékandulie “Témara” begey i de kuyugén dob lawi me.’ ”

¹⁹ Mélaw i de kuyugén nodoro roy kébérén Jesuse, atin ténañay roy amaé ruwe kay kandulie féndawét “Témara” dob no lawi.

²⁰ Amun kélungononén, i Jesuse ménasar mama séréngan bé de folo bra ruwo gétew kuyugén. ²¹ Bé lala ruwe mama, bénréh Jesuse mano, “Bérhéku begom i toowe, wén sékoy ségétewé begom émfékéfo Begén.”

²² Tidéw béno, toow fo méntete i de fédew i de kuyugén, atin ménenginsa i séngae ségétew bero dob Jesuse maro, “Kadnan, békén begén, hay?”

²³ Séménumbul i Jesuse mano, “I ségétewé séréngan Begén mérém fan, beeney émfékéfoe séko Begén. ²⁴ I Nga i Kéilawane, sani Begéne, méléhuu loo bé kébérén i Ménsulate Kébérén i Tuluse. Endob toow fo mékégedawgédaw i émfékéfoe Begén. Mas na fiyo dob beene ké énda damén ménunah i ni étew, non mukum fo toow.”

²⁵ Tidéw béno, ménbérén i Judase sani ménfékéfoe de mano, “Maistéro, békén begén, hay?”

Atin séménumbul i Jesuse mano, “Hoo, beem.”

I kéama i Kadnan

²⁶ I lala ruwe mama, éndot Jesusey fane brab ménfésalamat dob Tuluse. Tidéw béno, sénkébeng-kébengén, brab sénaarén dob de kuyugén. Atin ménbérén mano, “Ay niy lowoh guwe. Dot gom brab ama gom.”

²⁷ Tidéw béno, éndot Jesusey tabue wén i arak de atin ménfésalamat dob Tuluse. Atin nirayén dob berowe mano, “Iném gom de, kéluhanan kom. ²⁸ Non been i niy dara guwe, sani tandaé bé fasad i Tuluse, réménanas inok mífésagadan i de sala i de médo do étew. ²⁹ Bérhéku begom, éndaén minému arak taman dob gaiwe minému mantu arak séréngan begom amuk máguléw i Abay guwe Tulus dob de étewén.”

³⁰ Tidéw béno, kéménanta ro sébaan kanta démayéw bé Tuluse. Tidéw béno, ménagéw ro mangéy dob tuduke féndawét Olibo.

Nuret Jesusey fantage bé Pedrowe

³¹ Atin ménbérén i Jesuse dob de kuyugén mano, “Kino séko bé ni kélungonon méraréy gom kéluhanan tagaké kom Begén non wén i Ménsulate Kébérén i Tuluse mano, ‘Féléhué kuy témalimae bé de bili-bili, atin i de bili-bili no émbéragar ro.’” ³² Atin fíntaus Jesusey kébérén me mano, “Endob amuk tébuleu, magéwu métah begom mangéy Galilea.”

³³ Tidéw béno, ménbérén i Pedrowe dob Jesuse mano, “I begéne, énda fo tagaké ku Beem, fiyon fo ké méraréy i kéluhanan de dumo gu.”

³⁴ Endob ménbérén man i Jesuse mano, “Bérhéku beem i toowe, bé énda séna ukoro i férufete bé ni kélungonon, dirungé mo Begén télew gule bé énda gélo mo Begén.”

³⁵ Ménbérén man i Pedrowe mano, “Enda fo dirungé ku Beem, fiyon fo ké méléhuu séréngan Beem.”

Atin loo so bé niy kékéréh i de kéluhanay de dumo kuyugén.

³⁶Tidéw béno, ménagéw i Jesuse beroy de kuyugén dob gonone féndawét Getsemani. Amun énggumah ro diyo, ménbéréh i Jesuse dob berowe mano, “Sar gom dob ni bé lala guwe mangéy démasal dob diyoo.” ³⁷Atin nuvitén i Pedrowe brab de ruwo gétew lagéy nga Sebedeowe, sani Santiagowe brab Juane. Atin méntete i fédew Jesuse brab ménbuku fo toow. ³⁸Atin ménbéréh dob de ni télém gétew kuyugén mano, “I fédew guwe toow fo ménbuku taman toow fo démawét. Bati gom dini, brab tulik gom.”

³⁹Tidéw béno, ménagéw i Jesuse gumaha téabar. Atin méntéléngkéb méntéduñsum brab déménasal mano, “Abay, amuk fakay saén, kago fédayaén Begén mérasay. Endob i kaame saén kétayan i mérigowe damén, békén kagén kétayan.”

⁴⁰Tidéw béno, ménséfule dob de télém ni gétew kuyugén. Atin énggito no bero énggéfidong. Ménbéréh dob Pedrowe mano, “Aw énda wayo gétulik go fiyon séguras saén?” ⁴¹Atin ménbéréh dob berowe télém gétew mano, “Tulik gom, atin dasal gom inok énda métukawan gom. Méuyot gom rémigo bé kétaya kuwe, éndob i de lowoh gom mélubay brab magad géfélis bé de sugu gu.”

⁴²Tidéw béno, ténagak Jesuse man bero, atin déménasal mano, “Abay, amuk énda fakayén ké géséliyahu bé ni kérasay, mérigo damén i kétaya muwe.” ⁴³Tidéw béno, ménséfule man i Jesuse mangéy dob de télém ni gétew kuyugén. Atin énggito no bero énggéfidong non toow ro fo manat.

⁴⁴Tidéw béno, ténagak Jesuse man bero bé gétéléwe gule inok démasal. Atin déménasal ségiléw so bé énggéétahe de. ⁴⁵Tidéw béno, ménséfule man mangéy dob de télém ni gétew kuyugén atin ménbéréh dob berowe mano, “Aw tafay gom so fidong brab témérén? Téngténg gom! Enggumahén i urase fékéfo i Nga i Kéilawane, sani Begéne, atin aténu dob de ménsala étew. ⁴⁶Na, tek gom, magéw tomén. Téngténg gom, ay nan nén géumah i émfékéfo Begén!”

I kékéfoe bé Jesuse

⁴⁷Amun émbéréh sénay Jesuse, énggumah i Judase sani ségétéwe bé de folo bra ruwo gétew kuyugén. Atin wén i dakéle ménlimud étew dob beene énggumah. Non sénugu i de odoroy de fadi brab de odoroy de Judio bero. Atin ménuit ro do sundang brab do bastun. ⁴⁸Atin énggétiga roy ati fégélolono ruwe bé Jesuse, non amun énda séna géumah ro diyo, bénréh Judase bero mano, “I étewe aréké ku, kéfo gom non Been.”

⁴⁹Mélaw sonom so bé kégumah Judase, ménfégédét dob Jesuse brab ménbéréh mano, “Fiyo kélungonon, Maistéro.” Tidéw béno, narék Judasey Jesuse.

⁵⁰Tidéw béno, ménbérél i Jesuse dob Judase mano, “Adih, fétausém i kérigo muwe bé rigoné muwe.”

Tidéw béno, i de étew ménodor bé Judase, ménfégédét ro dob Jesuse brab kénéfo ro. ⁵¹Atin wén i ségétewe kuyug Jesuse bénindasén i sundang ne atin téni bohén i ségétewe riféy gérotore fadi brab mén silaf i sége balae bé kelingo ne. ⁵²Endob ménbérél i Jesuse mano, “Rumaém i sundang ma nan. Non i kéluhanay de té miboh, méléhu ro so bé sundange. ⁵³Aw énda ba gétiga mo de? Amuk kétaya ku, gétawagu mongot tabang dob Abay guwe Tulus, atin sugué noy laksaéne do télaki no té mabang Begén matuhon bé de ni étew. ⁵⁴Endob amuk rigoné kuy nan, énda métuman i de Ménsulat Kébérél i Tuluse fantag bé ati mérigowé dob Begéne.”

⁵⁵Tidéw béno, ménbérél i Jesuse dob de ménlimud do étew mano, “Sedek mén uwit gom do sundang brab do bastun, inok kéfoé kom Begén maak ségétewu tulisan kéfoé kom? Sénga fuweh diyou dob lawi i Tuluse té moro, éndob énda kénéfo gom Begén. ⁵⁶Endob ménrigoy kéluhanay de ni inok métuman i Ménsulate Kébérél i Tuluse sénulat i de sénarigo no.”

Tidéw béno, kéluhanay de kuyugén ménraréy té nágak roy Jesuse.

I kékukume bé Jesuse

⁵⁷Atin i de étew kéménéfo bé Jesuse nuvit ro dob lawi i gérotore fadi fén dawéti Kayafas. Diyo ménlimud i de té moro bé kitabé brab de odoroy de Judio. ⁵⁸Atin i Pedrowe ménfuray ro bero éndob énda ménfégédétén, mén taman saén dob fésaway lawi i gérotore ni fadi. Atin ménahur dob fésawayane ni brab mén sar diyo beroy de guwardiya inok gétiga noy ati mérigowé dob Jesuse. ⁵⁹Atin i odoroy de fadi brab kéluhanay de ménlimud do odoron sémén léd ro do tugi kétébo bé Jesuse inok kukumé ro méléhu. ⁶⁰Endob énda i énggelingoo ro funa ro de méméléhu, fiyon fo ké médooy de té ménindég brab ménbérél do tugién kétébo bé Jesuse. Tidéw béno, wén i ruwowe gétew lagéy té ménindég brab té nébo roy Jesuse. ⁶¹Ménbérél ro maro, “Ménbérél i ni étew mano, ‘Gébinasana kuy lawi i Tuluse atin fétindégé ku man bé té lwe gétérésangan.’”

⁶²Tidéw béno, i gérotore fadi té ménindég brab ménbérél dob Jesuse mano, “Ati késumbul me bé ni kétébo ro Beem?” ⁶³Endob ménantás i Jesuse. Tidéw béno, ménbérél man i gérotore ni fadi mano, “Sugué ku Beem sémafa dob adafay méuyage Tulus, aw Beeme bay Kristowe Nga i Tuluse?”

⁶⁴Atin séménumbul i Jesuse mano, “Toow i nan bén réhém bé Nga i Tuluse Begén. Atin béréhé ku begom i toowe, gito gom i Nga i Ké lawane, sani Begéne, mésar moso dob kuwonoy barakatane Tulus brab gito gom Begén dob de rawén séfuleu tidéw dob lawayo.”

⁶⁵Sonom béno, i gérotore ni fadi amun énggelingoo noy ni kékérél Jesuse, kénusién i kégal ne inok fégito noy kékérít ne de. Atin ménbérél

mano, “Mékémurka fo toow i kékérén ne non réfengé noy Tuluse! Endaén kailanga tom i témeboe de dob betome. Non énggelingoo tomén i mékémurkae kékérén béleewe ni. ⁶⁶Ati karang gome de fatut rigoné tom?”

Atin séménumbul i de odoron maro, “Fatut mékukum méléhu.”

⁶⁷Tidew béno, dénuraa roy rangih Jesuse atin lénubag ro. Atin wén soy do témenamfiling bé Jesuse. ⁶⁸Atin ténléb roy de moto no bé munsalawe brab ménbérén ro maro, “Amuk Beem i Kristowe, antukém ké ati témenamfilinge Beem.”

Dénirung Pedrowey Jesuse

⁶⁹I lala i de ni mérigo, i Pedrowe diyo ménasar dob fésayawane. Atin ménfégédét i ségetéwe kénogon sugu-suguéy gérotore fadi. Atin ménbérén dob Pedrowe mano, “Beem soy dumo Jesuse tidew Galilea.”

⁷⁰Endob dénirung Pedrowe dob téngaangay de étew diyo mano, “Enda gétiga kuy nan bérhé mo.” ⁷¹Tidew béno, ménangéy i Pedrowe dob bengaway fésayawane. Diyo wén i ségiyowe kénogon sugu-suguén énggito noy Pedrowe. Atin ménbérén dob de lagéy diyo mano, “Ay niy ségetéwe dumo Jesuse tidew Nasaret.”

⁷²Atin dénirung Pedrowe man mano, “Méléhuu so dob ni, énda gélolo guy nan lagéy.”

⁷³Enda ménrugayén tidew béno, i de lagéy témenindég diyo ménfégédét ro dob Pedrowe. Atin ménbérén ro maro, “Tintu fo beem i ségetéwe bero. Non dob kékérén me énggélolo gey beem ségetéw go so tidew Galilea.”

⁷⁴Tidew béno, séménafa foy Pedrowe dob berowe mano, “Amuk tugio ku begom, kukuméy Tuluse begén. Enda gélolo guy nan étew!”

Sonom béno, ménukoro i férufete. ⁷⁵Atin énggétédémo Pedrowey kékérén Jesuse mano, “Bé énda séna ukoro i férufete, dirungé mo Begén télew gule bé énda gélolo mo Begén.” Mélaw i Pedrowe, ménsut tidew diyo atin kéménrew fo toow.

27 ¹Amun toow géfuwén, i kéluhanay de odoroy de fadi brab de odoroy de Judio, ménlimud ro inok bantaké roy kékérén ruwe bé Jesuse. ²Atin nikét roy Jesuse brab nangéy ro naté dob Pilatowe sani méguléwe tidew Roma.

I kékérén Judase

³I Judase, sani ménfékéfoe de, amun énggito noy kékukume bé Jesuse, énggésénule. Mélaw nuvitén séfule i télewé folo félatah mangéy dob de odoroy de fadi brab dob de odoroy de Judio. ⁴Atin ménbérén mano, “Ménsalau non fénkéfo gu inok félérén i ni ségetéw étew énda i rénigo no tete.”

Endob séménumbul i de odoron maro, “Ulanden dob begeye. Kaam saén sala i nan.”

⁵ Tidéw béno, i Judase nibérén i de kurta ni dob lawi i Tuluse, atin ménagéw tidéw diyo. Atin ménfétoyo méntébitin.

⁶ I de odoroy de fadi ténimu roy de félatah ni brab ménbérén ro maro, “I ni kurta fénggékélén bé étewe, mélaw énda fakayén dob kitab tome itongén dob tulakane dob lawi i Tuluse.” ⁷ Atin amun ménagayun ro, nusar roy kurtae ni fégébéléy bé fantad i ségétéwe rémigo binangga, inok wén i fantad lébéngon bé de étew énda bati ro dob Jerusalem. ⁸ Been i funay fantade ni féndawét “Démara Fantad” taman béléewe ni.

⁹ Mélaw mémentuman i kóbérén i sénarigoy Tuluse muret bé kóbérén ne bé do gétah féndawét Jeremias mano, “Endot roy téléwe folo félatah, sani kurtae ménagayun i de Judio fénggékélén de.” ¹⁰ Atin nusar roy ni kurta fénggékélén bé fantad i ségétéwe rémigo do binangga, loo bé sugu i Kadnane Begén.” Been i niy kóbérén Jeremiase bé gétahe.

I kékukume bé Jesuse

¹¹ Atin i Jesuse téménindég dob adafay méguléwe tidéw Roma féndawét Pilato. Atin fénénginsaa noy Jesuse mano, “Aw Beem i Datu i de Judio?”

Atin séménumbul i Jesuse mano, “Beem i ménbérén de.” ¹² Endob amun ténébo i de odoroy de fadi brab de odoroy de Judio, ménantés saén i Jesuse.

¹³ Mélaw ménbérén i Pilatowe dob Jesuse mano, “Sedek énda sumbulo moy kéluhanay de kétobo ro ni Beem?”

¹⁴ Endob énda séménumbul i Jesuse, ménantés saén. Mélaw ménggaif fo toow i méguléwe.

¹⁵ I ni ménrigowe bé gaiy kékandulie Témara. Atin i adat i méguléwe, sénga kanduli ro Témara témangéy ségétéw férisu fémiéy de ménlimud do Judio. ¹⁶ Bé no gai, wén soy ségétéwe bantugén férisu féndawét Barabas. ¹⁷ Mélaw amun ménlimud i de étew, ménénginsa i Pilatowe dob berowe mano, “Ati isuwe kétaya kom tangéyé ku inok géésut dob begome? Barabas loo ké Jesuse féndawét so Kristo?” ¹⁸ Rénigo noy ni non énggétiga no i de odoroy de Judio, naté roy Jesuse non méndaléw ro de.

¹⁹ Amun diyo ménasar i Pilatowe dob saray kémukume, fénksamfay i bawag ney sébaane kóbérén mano, “Kago rigonén i éntingayéne dob ni étew énda i salaén. Non wén i énggétiginéfo kuwe na kélungonono atin toowu fo ménbuku fantag bé Beene.”

²⁰ Endob i de odoroy de fadi brab de odoroy de Judio, fénfagayu roy de ménlimud do étew bé ongoté ro dob Pilatowey tangéyé noy Barabase, atin féléhuén i Jesuse. ²¹ Endob i Pilatowe ménénginsa mano, “Aw ati isuwe wayo kétaya kom tangéyén inok géésut dob begome?”

Atin séménumbul i de étew maro, “Barabas.”

22 Atin ménénginsa i Pilatowe mano, “Ati mélaw i rigoné kuwe dob Jesuse féndawét so Kristo?”

Séménumbul ro kéléhanan maro, “Féléhuén dob kruse!”

23 Endob ménénginsa man i Pilatowe mano, “Endob ati tetee rénigo no?”

Tidew béno, ménkes i de étew minut métanug maro, “Féléhuén dob kruse!”

24 Amun énggétiga Pilatowe énda fo magayun i de étew atin sérimbur ro séko, éndotén i wayége atin méngguse dob téngaangay de étew. Atin ménbéréh dob berowe mano, “Békén kagén sala i kéléhu i ni étew énda i salaén. Kagom saén aturan.”

25 Atin ménbéréh i kéléhanay de étew maro, “Kagey aturan i kéléhu ne brab aturay de séfu gey so.”

26 Tidew béno, ténangéy Pilatowey Barabase mésut mangéy dob de étew. Atin féntafésén i Jesuse. Tidew béno, natéén dob de sundalo inok kélabo ro dob kruse.

27 Tidew béno, i de sundalo Pilato nuwit roy Jesuse mahur dob lawi Pilatowe. Atin i kéléhanay de dumo ro sundalo ségbataliyon ménlimud ro géliwét bé Jesuse. **28** Atin lénékas roy de kégalén brab fénkégal ro bé furowe kégal maak datu. **29** Tidew béno, lénuku roy suwarane kélég atin fénsayaf ro bé Jesuse, atin féndiyo roy kayéwe dob kuwonone kémérén ubo-ubo maak datu. Tidew béno, ménlingkuwéd ro dob adafa nuwe brab déniyangka ro. Atin ménbéréh ro maro, “Méraru damén i datu i de Judio.” **30** Atin dénuraa ro, brab éndot roy ni kayéw tidew dob kémér ne brab bénadas roy uléw ne. **31** Amun énggilid ro déniyangka, lénékas roy furowe ni kégalén brab fénkégal ro man bé kaane kégal. Tidew béno, nuwit ro mésut inok kélaboné ro dob kruse.

Kénlabo roy Jesuse dob kruse

32 I lala ruwe magéw tidew Jerusalem, énggébalaka roy étewe féndawét Simon tidew dob ingéde Siren. Atin i de sundalo fénégés ro démuwal bé krus Jesuse. **33** Atin énggumah ro dob sébaane gonon féndawét Golgota (i atag ne “gonoy kulobong uléwe.”) **34** Diyo niray roy arake sénlawék bé uuae fégékédan démawét féniném ro bé Jesuse. Endob amun éngétemtemo no, ménika de miném.

35 Tidew béno, kénlabo ro dob kruse. Atin sénbaad roy de kégalén bé késékungkungo ruwe de. **36** Tidew béno, ménstar ro diyo ténéngténg roy Jesuse. **37** Atin féndiyo roy sénulat ruwe fingé rotor bé uléw Jesuse bé kétébo ruwe de mano, “Ay niy Jesuse, sani datu i de Judio.” **38** Tidew béno, kénlabo ro dob de krus i ruwowe gétew tulisan, i ségétewe de fingé dob kuwono nuwe brab i ségétewe de fingé dob biwong ne.

39 Atin i de étew, téménara ro dob adafa Jesuse atin déniyangka ro brab dénangu-danguo ro inok dowoyé ro. **40** Atin ménbéréh ro dob Jesuse maro,

“Bénréhém bé binasané moy lawi i Tuluse atin fétindégé mo man bé télewe gétérésangan. Amuk tintu Nga i Tuluse Beem, tabangém i lowoh me atin lus go tidew dob krusa nan inok énda méléhu go.”

⁴¹ Atin ségiléw so bé ni, i de odoroy de fadi brab de téromo bé kitabe brab de odoroy de Judio déniyangka ro. ⁴² Ménbéréh ro maro, “Ténabangén i de ségiyo étew inok énda méléhu ro, éndob énda gétabanga noy lowoh ne inok énda méléhuén. Amuk Beeney datu tome do Judio, fatut mélus tidew dob krusa nan inok géunur tom de. ⁴³ Sémarig bé Tuluse brab bénréhén bé Been kun i Nga i Tuluse. Na, éntengé tom ké féimuéy Tuluse brab tabangé no béléewe ni inok énda méléhuén.”

⁴⁴ Atin fiyon i de tulisan séréngan bé Jesuse kénlabo dob de krus, déniyangka ro so.

I kéléhu Jesuse

⁴⁵ Amun géutuhén, ménwaléy délémon i kéluhanay fantade taman ménifus i télewe géuras. ⁴⁶ Amun géraraan lémudug i térsange de, ménkes i Jesuse mano, “Eli, Eli, lama sabaktani?” I atag ne, “Tulus gu, Tulus gu, sedek té nagakém Begén?”

⁴⁷ Atin i de dumo bé de étew témindég diyo, énggelingoo roy ni kékéréhén, atin ménbéréh ro maro, “Tawagé noy Eliase.” ⁴⁸ Atin wén i ségetéwe bero ménagayas éndotén i maake gafas, nérémén dob mélémuwe arak, féndiyoén dob kayéwe, brab ténungkulén dob ba Jesuse inok fééséfén de damén.

⁴⁹ Endob i de dumo bé de étew témeingténg, ménbéréh ro maro, “Fédayaém mon, non méuyot gey de témeingténg ké gé gumah i Eliase té mabangan de inok énda méléhuén.”

⁵⁰ Tidew béo, ménkes man i Jesuse atin ménléhuén.

⁵¹ Tidew béo, i rindunge dob lawi i Tuluse ruwoy mén sédaya nuwe tidew rotor mangéy fantad. Atin wén i émbagére luba brab wén i de dakél batéw mén séufak. ⁵² Atin wén i de takub do lébéng ménungka brab médooy de ménléhu do étew i Tuluse méntébule ro. ⁵³ Ménagéw ro tidew dob de lébéng ro. Atin amun méntébule i Jesuse, ménangéy ro mahur dob ménkétéfuwe ingéd Jerusalem brab mén téfegito dob médoowe do étew.

⁵⁴ I odoroy de sundalo brab de sundalo no té nulik roy Jesuse, amun énggito roy ni luba brab kéluhanay de ni ménrigo, toow fo mén ggilak ro. Atin ménbéréh ro maro, “Tintu fo Been i Nga i Tuluse.”

⁵⁵ Diyo soy de mén do libun, kémulay ro tidew dob gé tangkae. Beroy de libun mén furay bé Jesuse tidew Galilea brab té nabang ro. ⁵⁶ Bero ro Maria tidew Magdala, brab Maria idéng Santiagowe brab Jose, brab idéng Juane brab Santiagowe sani de nga Sebedeo.

I kélébénge bé Jesuse

⁵⁷ Amun té megénén, énggumah i ségetéwe lagéy kawasa tidew Arimatea. I dawéti ne Jose atin been soy ségetéwe kuyug Jesuse.

58 Ménangéy dob Pilatowe, atin nongotén i bangkay Jesuse. Atin sénuguén i Pilatowe ké fakay ro iray i bangkay Jesuse dob Josehe ni.
 59 Mélaw éndot Josehe, atin bénausén bé mantuwe fute safut. 60 Tidéw béno, féndiyoén dob kaane lébéng, mantu séna ténosong dob rangih i fingase. Tidéw béno, kénriringén i dakéle batéw fénggétélébén bé bengaway lébénge ni. Atin tidéw béno, ménagéw i Josehe tidéw diyo.
 61 Atin diyo i Mariahe tidéw Magdala brab dumo nuwe féndawét so Maria. Ménasar ro dob saréwoy lébénge.

62 Bé gétunduge de fuweh, Sabado. Atin i de odoroy de fadi brab de Fariseo ménlimud ro bero ro Pilato. 63 Atin ménbérén ro maro, “Datu, gétédémo key bé méuyag sénay nan étew ubo-ubo datu gey, bénréhén bé tébule kun ké méifus i télewe gétérésangan. 64 Mélaw fiyo ké sugu go bé de guwardiya inok tintu bantayan i lébéng ne taman bé gétéléwe gétérésangan, inok i de kuyugén énda géahur ro témulis bé bangkay ne atin béréhé ro dob de étew bé méntébule. Non toow na fo gétimal i nan tugi bé sunguwe de.”

65 Séménumbul i Pilatowe mano, “Dot gom bé de sundalo gu mantay bé lébéng ne inok énda i géahur diyo.”

66 Mélaw ménagéw ro atin rénigo roy tandae dob bengaway lébénge inok gito ro ké wén i mahur de. Tidéw béno, féndiyo roy de guwardiya mantayan de.

I kétébule Jesuse

28 ¹ Amun ménifus i Sabadowe de, toow géfuwén bé Duminggue de,
 i Mariahe tidéw Magdala ménagéw mangéy dob lébéng Jesuse beroy dumo nuwe libun féndawét so Maria inok angéyé ro téngténgén i lébénge ni. ² Atin méntékow wén i émbagér luba, atin i télakiy Kadnane ménlus tidéw dob lawayo. Kénriringén i dakéle batéw tidéw dob bengaway lébénge, atin ménasar diyo dob batéwo no. ³ I falas ne maak kilot atin toow fo fute i kégal ne. ⁴ Sonom béno, i de guwardiya diyo ménwaléy ro toow fo ménngilak, brab léménukub ro. Atin méntélengkéb ro maak do ménléhu ro.

⁵ Atin i télakiwe ni ménbérén dob de libun ni mano, “Kagom ménngilak, Gétiga ku sélédé kom i Jesuse, sani fénléhu ruwe dob kruse. ⁶ Endob éndaén dini no, non méntébuleén loo bé bénréh ne mérigo. Enggomén ahur gom, téngténg gom i gono nuwe méniro. ⁷ Na, fagayas gom agéw mangéy dob de kuyugén atin uret gom dob berowe makom, ‘Méntébuleén i Jesuse. Atin mangéy béní Galilea métah begom. Gito gom diyo.’ Na, taus gom brab fégétédém gom i ni bénréh gu begom.”

⁸ Mélaw ménagayas ro ménagéw tidéw dob lébénge ni. Atin fiyon fo ké ménngilak ro, ménoror ro so. Atin léménéntu ro mangéy dob de kuyugén inok ureté ro dob berowe.

⁹ Atin tékow bénalak Jesusey de libun ni atin ménbéréh dob berowe mano, “Fiyo térésang.” Tidéw béno, ménfégédét ro dob Beene brab génamak roy sékéy ne atin fénengadaf ro. ¹⁰ Atin ménbéréh i Jesuse dob berowe mano, “Kagom mégilak. Agéw gom atin béréh gom dob de kuyug gu bé fatut magéw ro mangéy Galilea, atin gito ro Begén diyo.”

¹¹ Amun ménagéw i de ni libun, i de dumo bé de sundalo mantay bé lébénge ni ménsefule ro mangéy Jerusalem atin nuret ro dob de odoroy de fadi i kéluhanay ménrigowe. ¹² Mélaw i de odoroy de fadi brab de odoroy de Judio, ménslimud ro. Atin ménagayun ro ké ati rigoné ruwe. Niraya ro médoo kurta i de sundalo. ¹³ Atin bénréh ro bero maro, “Béréh gom bé nangéy i de kuyugén i bangkay ne bé kélunganone atin fénénakaw ro bé lala gome fidong. ¹⁴ Atin amuk énggelingoo y meguléwey fantage bé ni, béréhé key dob beene inok énda mékéritén begom atin mélaw énda i funa kom mégilak.”

¹⁵ Tidéw béno, i de guwardiya, éndot roy kurtae ni atin nodoro roy sugu i de odoroy de Judio ni. Atin mélaw, taman so béléewe ni, wén i do Judio muret bé ni uret.

Méntefégit man i Jesuse

¹⁶ Tidéw béno, i de folo bra sébaan kuyugén ménagéw ro mangéy Galilea dob sébaane tuduk bénréh Jesuse fatut ayo ro. ¹⁷ Atin amun énggito roy Jesuse, fénengadaf ro, fiyon fo ké wén i de dumo bero ruwo-ruwoy de fédew ro munur de. ¹⁸ Atin ménfégédét i Jesuse dob berowe atin ménbéréh mano, “I kéluhanay kuwagibé meguléw dob lawayo brab dob fantade niray dob Begéne. ¹⁹ Mélaw angéy gom dob kéluhanay de ingéd dob duniiae ni atin féunur gom i kéluhanay de étew bé Begéne. Bautis gom bero dob dawét i Abaye Tulus, brab Nga i Tuluse, brab Rémogor i Tuluse. ²⁰ Atin toro gom bero bé fatut odoro roy kéluhanay de sugu gu begom. Atin fégétédém gom i ni, diniwu dob begome sénga tékélid taman dob tamfaday duniiae ni.”

I Fiyowe Uret Sénulat

Markose

Been i niy Fiyowe Uret sénulat Markose fantag bé Jesu Kristowe. Sénulat Markosey médoowe do mékégaif rénigo Jesuse amun ménbati séna dob duniyae ni. Sénulat Markose soy dumoy de ténero Jesus.

I Markose ni, sani séménulate bé ni Fiyo Uret, beeney dumo Pedrowe ménangéy muret fantag bé Jesuse. Ségetéw so bé de kuyug Jesus i Pedrowe ni, amun ménbati sénay Jesuse dob duniyae ni. Mélaw gétiga tom i kéluhanay de sénulat Markos toow fo toow.

I kéuret Juan Bautistawe

1 ¹Ay niy Fiyowe Uret fantag bé Jesu Kristowe, sani Nga i Tuluse. ²Bé gétaho, wén i ségetéwe sénarigoy Tuluse muret bé kékérénne féndawét Isaias. Sénulatén mano, “Bang i Tuluse, ‘Sugué kuy sarigo kuwe métah Beem inok tafayé noy aguwo muwe.’ ³Diyo dob gonone énda i étew de bati, brab mékes mano, ‘Gégumah i Kadnane! Tafay gom i aguwo nuwe, brab fééntang gom i de aguwo no.’” Been i bénréh Isaiase.

⁴Mélaw énggumah i Juane dob gonone énda i étew de bati. Mautis bé de étew brab ménuret mano, “Fatut gom gésénule bé de sala gom brab féka gom i de tête adat gom. Tidéw bénou, fébautis gom inok fégito gom i kégésénule gome. Atin, i Tuluse fésagadé noy de sala gom.” ⁵Atin médooy de étew dob Judea brab dob ingéde Jerusalem ménangéy ro dob Juane. Fénayag roy de sala ro brab bénautisén bero dob lowoh i wayége Jordan.

⁶I Juane ni kéménégal nawél buk dakél ayam féndawét kamelyo, brab kulit binatang i légét ne. Atin i amaé nuwe kasuk brab téne. ⁷Atin ménuret i Juane mano, “Wén i ségetéwe témundug begén. Toow na fo gérotor begén. Fiyon foy ikét i safatos ne, énda métororu de mukoh.

⁸Wayég i fégébautis guwe begom, éndob i Beene, bautisé no moso begom bé Rémogor i Tuluse.”

I kébautise bé Jesuse

⁹Bé no do gai, énggégumah i Jesuse tidew dob Nasaret dob sakuf i dakéle ingéd Galilea. Atin bénautis Juane so dob wayégo no Jordan.

¹⁰Amun géménaunén i Jesuse tidew dob wayége, sonom béno énggito noy lawaye ménungka brab i Rémogor i Tuluse ménlus maak marafati brab méntérimfena dob Beene. ¹¹Brab wén i ménbéréhe tidew dob lawayo mano, “Beem i Nga guwe. Toow fo mégédawu de brab mésuwatu de.”

¹²Tidew béno, fénagéw i Rémogor i Tulusey Jesuse mangéy dob gonone énda i do étew de bati. ¹³Atin ménbati diyo fot folo gétérésangan. Bé béno, sénga tékélid ténengkad Satanasey Jesuse rémigo tete damén. Diyo soy de mérayar do binatang, éndob énggumah i de téaki brab ténabanga ro.

I kéféganay i galbék Jesuse dob Galilea

¹⁴Amun ménférисунén i Juane, ménſéfule i Jesuse mangéy Galilea, brab nuretén i Fiyowe Uret tidew dob Tuluse. ¹⁵Ménbéréh mano, “Enggumahén i fatute gai. Endaén mérugayén taman gégumah i kéféguléw i Tuluse bé de étewén. Fatut gésénule gom bé de sala gom brab féka gom i de tete adat gom, brab unur gom dob Fiyowe Uret.”

¹⁶Wén i no sébaan fuweh ménagéw i Jesuse dob doror i dogote fénadawét Galilea. Atin énggito noy ruwowe gétew fatatugés fénadawét Simon brab Andrese tuwaréyén. Ibéré roy de biyala ro dob dogote.

¹⁷Atin béréh Jesuse bero mano, “Odor gom Begén. Kagomén séméléd sédo. Tidew béleewe, fésélédé ku begom étew inok modor ro so Begén.”

¹⁸Sonom béno, ténagak roy de biyala ro brab ménodor ro bé Jesuse.

¹⁹Atin amun méntaus magéw i Jesuse kloh, énggito noy Santiagowe brab Juane sani de nga Sebedeo. Diyo ro dob awang ruwe sékafété roy de biyala ro. ²⁰Sonom béno, ténawagén bero. Atin ténagak roy boh ruwe Sebedeo dob awange beroy de tétabang do sukayan do fatatugés, atin ménodor ro bé Jesuse.

Dénédél Jesusey saitane

²¹Atin i Jesuse beroy de kuyugén ménangéy ro dob ingéde Kafernaum. Amun gai kétérén, ménahur i Jesuse dob lawie féngadafay de Judio, brab téménoro. ²²Atin i de étew do mégélingo de, toow ro fo ménggaif bé kétoro ne. Non békén ségiléw i kétoro ne bé de Judio témoro bé kitab ruwe. Non i berowe, ténero ro say de kéfégitung i de ségiyo étew. Endob ténero Jesusey kaane kéfégitung.

²³Amun téménoro i Jesuse, tékow ménahur dob lawie féngadafan i ségétewe étew rénahukoy saitane. ²⁴Amun énggito noy Jesuse, ménkes mano, “Ati

amungé muwe begey, Jesus tidéw Nasaret? Ménangéy go ba dini inok binasané mo begey? Enggétiga ku ké ati Beeme. Beem i Mékétéfuwe tidéw dob Tuluse.”

²⁵ Endob génlé Jesusey saitane ni mano, “Kago selekén, brab tékedan go tidéw dob beena nan!”

²⁶ Tidéw béno, i saitane, toow fo fénkilén i étewo no brab ménkes métanug, atin méntékédan. ²⁷ Atin toow fo ménggaif i de étew bé ni. Ménsbéréh ro maro, “Ati ni? Mantu keey kétoro. I ni étew wén i kuwagibén sémugu bé de saitan, brab odoro roy késugu ne!”

²⁸ Mélaw i kéurete fantag bé Jesuse magad ménlégéb dob kéluhanay de gonon dob dakélé ingéd Galilea.

Nuwa Jesusey de médoor étew

²⁹ Tidéw béno, ténagak roy lawie ni féngadafan, brab ménagéw ro mangéy dob lawi Simone brab Andrese. Atin ménodor soy Santiagowe brab Juane. ³⁰ Atin diyo gara-gara i térima Simone libun non démeruun toow fo méduf. Amun énggumah i Jesuse dob ni lawi, bénréh ro dey fantage bé ni démeruun. ³¹ Atin i Jesuse ménangéy dob tébing ne atin génamakén i kémér ne brab fénétekén. Sonom béno, ménkédan i kédéuf ne brab ménadi-adiy libune ni. Tidéw béno, dénuwoto no bero.

³² Bé no kélunganon, amun ménléd i térsange, i de étew nuwit ro mangéy dob Jesusey kéluhanay de démeruun brab de étew rénahukoy de saitan. ³³ Atin médooy de étew dob no ingéd ménlimud ro dob fésawayaw lawie ni. ³⁴ Atin i Jesuse énggféadi-adino noy médoowe déruunan bé médoowe gékélasi déruun, brab fénféraréyén i médoowe saitan. Atin i de ni saitan, énda fénbéréhén bero non géтиga roy ati Beene.

³⁵ Amun lingkuwog mangéy fuweh bé sébaane de géfuwén, méntek i Jesuse brab ménusut dob lawie ménangéy dob géfélébue gonon dob liuy ingéde. Atin diyo déménasal. ³⁶ Mélaw i Simone brab de dumo no, nangéy ro sénléd i Jesuse. ³⁷ Amun énggitro, ménbéréh ro maro, “Sélédéy kéluhanay de étew Beem.”

³⁸ Endob séménumbul i Jesuse mano, “Fatut taus tom magéw mangéy dob de dumo ingéd gédét dini inok géuretu so diyo, non been i niy funa kuwe ménangéy dini.”

³⁹ Mélaw lénégébén sénugudon i séngae gonon dob Galilea. Atin ménuret dob de lawi féngadafay de Judío, brab fénféraréyén i de saitan.

Nuwa Jesusey ségétéwe fémuteén

⁴⁰ Wén i no sébaan fuweh, i ségétéwe fémuteén ménangéy dob Jesuse, brab léméniningkuwéd dob adafa nuwe mongot tabang. Ménbéréh mano, “Amuk kétaya mo, géfzádi-adino mo begén.”

⁴¹ Atin toow fo ménuray i na Jesuse de. Mélaw bén té Jesusey kémér ne brab kénuwahén. Atin ménbéréh mano, “Kétaya ku. Adi-adi go.” ⁴² Sonom

béno, ménkédan i fémute ne, brab ménfiyoy lowoh ne. ⁴³Tidéw béno, i Jesuse fénagéwén brab ménbagér i kékéréh ne de mano, ⁴⁴“Fégélingoém, kago béréréhén i fantage bé ni rénigo gu dob fiyon udenén étew. Endob taus go agéw mangéy dob fadie brab fétengtengém i lowoh me inok gétiga no adi-adi gon. Tidéw béno, irayém i tulake loo bé sénugu i kitabe tidéw dob Moisese inok fégito moy kéadi-adi muwe dob kéluhanay de étew.”

⁴⁵Ménagéw bangnoor i ni étew, éndob nureténi dob séngae étew énggabalaka no, tidéw béno ménséfélalag foy ni uret. Mélaw éndaén géréngkay-réngkay i Jesuse rémahur dob kéluhanay de ingéd. Yamula ménbati saén dob de liyu. Atin i de étew tidéw dob de kéluhanay de gonon ménangéy ro dob Beene.

Nuwa Jesusey ségétéwe kimoyén

2 ¹Amun ménifus i firoye gétérésangan tidéw béno, ménséfule i Jesuse mangéy Kafernaum. Atin ménlégéb i urete bé ménule mangéy diyo. ²Mélaw toow fo médooy de étew ménangéy sélimud dob lawie batio Jesuse. Atin non toow ro fo médooy, éndaén i gonon de fiyon fo dob fésayawane. Atin nuret Jesuse beroy kékéréh i Tuluse. ³Bé lala ne téromo, énggumah i fote gétew lagéy ténanggung roy ségétéwe kimoyén, uwité ro damén mangéy dob Beene. ⁴Endob énda i fiyo kélawang ro dob Jesuse, non bé médoowe do étew. Mélaw ménénik ro dob atéf i lawie. Tidéw béno, ténosong roy atéfe dob gataga Jesuse. Amun méntosongén, ténuntu roy ténangunge ni kimoyén. ⁵Amun énggito Jesusey kéféngintoow ruwe, ménbéréhén dob ni étew kimoyén mano, “Adih, i de salaém ménfésagadén.”

⁶Tidéw béno, i de téromo bé kitab i de Judio ménsar diyo, séfénginsaingisa i de fédéw ro maro, ⁷“Sedek émbéréh mémurka i ni étew? Enda i géfésagad bé de sala ké békén i Tuluse saén!”

⁸Endob bé béno so, énggétiga Jesusey de itunga ro. Mélaw ménbéréh dob berowe mano, “Sedek sébéréh gom loo bé nan dob de fédéw gom? ⁹Toow na fo mélému béréréhén, ‘I de salaém ménfésagadén.’ Non énda gito no ké wén i barakat gu de rémigo. Endob toow fo mérégén béréréhén, ‘Tindég go, furutém i iroo muwa nan, brab agéw go.’ Non giton ké wén i barakat gu de rémigo. ¹⁰Endob feféngtiga ku begom i fantage bé Nga i Kéilawane, sani Begéne. Wén i barakat gu brab kuwagib gu dob duniyae ni émfésagad bé de sala.” Tidéw béno, bénréhén dob kimoyéne ni mano, ¹¹“Bérhéku beem, tindég go, furutém i iroo muwa nan, brab ule go.”

¹²Sonom béno, téménindég i kimoyéne ni dob téngaanga ruwe, brab fénurutén i iroo nuwe, brab ménagéw. Atin i kéluhanay de étew diyo, toow ro fo ménggaif brab dénayéw roy Tuluse maro, “Enda nay énggito tom tidéw féganay loo bé ni.”

¹³Tidéw béno, i Jesuse ménangéy man dob fédoror i dogote Galilea. Atin énggumah i de médo do étew brab ménlimud ro dob Beene. Atin féngganaya noy témoro bero. ¹⁴Tidéw béno, mémataus i Jesuse magéw. Atin énggito noy ségétéwe étew kémubra buwis féndawét Lebi, nga Alfeo ménasar dob de kubranan buwis. Brab ménbérélh i Jesuse dob beene mano, “Odor go Begén.” Tidéw béno, téménindég brab ménodor bé Jesuse.

¹⁵Enda mérugayén tidéw béno, diyo i Jesuse mama dob lawi Lebiwe. Atin diyo soy médoowe do étew kémubra buwis brab médo do ménalsa étew ménasar mama séréngan bé Jesuse brab de kuyugén, non médo ro ménfuray bé Jesuse. ¹⁶Atin i de témoro bé kitab i de Judio do Fariseo, amun énggito roy Jesuse mama séréngan bé de ménalsa étew brab de kémubra buwis, ménénginsa ro dob de kuyug Jesus maro, “Sedek ménéslawék i Jesuse mama bé de kémubra buwis brab de ségiyo tete étew?”

¹⁷Endob i Jesuse énggelingoo noy ni brab séménumbul mano, “I de fiyo kégelowoho no, énda kailanga roy muwae, éndob kailangay de wén déruu no. Enda ménangéyu dini inok tabaré kuy de métintu étew, éndob ménangéyu dini inok tabaré kuy de wén salaén inok gésénule ro.”

¹⁸Wén i no sébaan fuweh, ménfuwasay de kuyug Juan Bautista brab de Fariseo. Atin wén i de étew ménangéy dob Jesuse brab ménénginsa ro maro, “I de kuyug Juan brab de kuyug i de Fariseo, fuwasa ro. Sedek i de kaam do kuyug énda fuwasa ro?”

¹⁹Séménumbul i Jesuse mano, “Ufama, i de kana dob uyote, énda fuwasa ro ké diyo soy témérimawe lagéy. Taman diyo sénay témérimawe lagéy, énda fuwasa ro. ²⁰Endob gégumah i gaiwe, ké méédot dob berowey témérimawe lagéy. Atin been nay noy gaiwe fuwasa ro. Ségiléw so bé de kagén kuyug, non amuk diniwu séna, énda fuwasa ro.”

²¹Tidéw béno, nuret Jesusey sébaane binuwaya fantag bé sébidanay mantuwe kétoroén brab tafaye kétoro i de Judio. Ménbérélh mano, “Enda i ségétéw étew fégétabungén i mantuwe safut dob tafaye kégal. Non amuk rigoné no, kéménkén i mantuwe safut, atin mífendet i tafaye kégal, atin minut géttimal i rédet ne. ²²Brab énda i étew mérowo bé mantuwe arak dob tafaye ahuron arak rénigo bé kulit i ayame. Non amuk rigoné no, bétus i mantuwe arak i tafaye ahuron brab mébinasa méítis i mantuwe arak. Endob fatut i mantuwe arak ahurén dob mantuwe kulit ayam fédéngon de.”

Fantag bé gaiy kétéréne

²³Wén i no sébaan fuweh gai kétérén, i Jesuse brab de kuyugén téménara ro dob de médo do faréy. Atin amun ménagéw ro, i de kuyugén méédot ro bé de onok faréy. ²⁴Tidéw béno, i de Fariseo ménbérélh ro dob Jesuse maro, “Sedek rigoné roy ni, non dob kitab tome énda fatut i gémalbéké ké gai kétérén?”

²⁵ Séménumbul i Jesuse mano, “Aw énda ba énggébasana kom i rénigo Datu Dabide? Wén i no gai toow fo mélayah beroy de sundalo no. ²⁶ Mélaw ménahur ro dob lawi i Tuluse brab méndot bé ténulake fan brab namaén, atin niraya no soy de dumo no de. Rénigo noy ni fiyon fo ké dob kitabe fadi saén i fakaye mama bé ni fan. Rénigo noy ni dob gaiwe Abitar sénay gérotore fadi.”

²⁷ Atin féntaus Jesusey kóbérén ne mano, “Rénigoy gai kétéréne kay de étew, békén i étewey rénígowe kay gai kétéréne. ²⁸ Mélaw i Nga i Kéilawane, sani Begéne, wén i kuwagib gu fantag bé atiy fakaye rigonén bé gaiwe kétérén.”

Nuwa Jesusey étewe ménasadil i kémér ne

3 ¹ Tidéw béno, ménangéy i Jesuse man dob lawie féngadafay de Judio. Diyo soy ségétéwe lagéy ménasadil i kémér ne. ² Endob diyo soy de Fariseo méuyot téumbo bé Jesuse. Mélaw ténulik ro, inok gito ro ké muwa bé no gai kétérén. ³ Atin ménbérén i Jesuse dob lagéye ni ménasadil i kémér ne mano, “Ay go dini dob téngaangay de étew ni.” ⁴ Tidéw béno, fénénginsaa noy de étew mano, “Ati karang gome de, ati isuwe fakay dob kitabe bé gaiwe kétérén? Rémiyo fiyo, loo ké tete? Témabang bé étewe inok énda méléhuén, loo ké féléhuén?”

Endob ménantés ro. ⁵ Atin ménkérít i Jesuse bé lala ne témeóngténg bé de étew géliwét de. Endob tete soy fédew ne non bé de kétégas i de atura ro énda fo méuray i na ruwe bé ni lagéy. Tidéw béno, ménbérén dob lagéye ni mano, “Bétérém i kémér ma nan.” Atin béntrén i kémér ne atin sonom béno, ménadi-adi. ⁶ Tidéw béno, i de Fariseo toow ro fo ménkérít atin ménasut ro tidéw dob lawie féngadafan. Atin ménaslimud ro bé de étew do modor bé Datu Herode brab ménasfagayun ro bé féléhué roy Jesuse brab rénigo roy bantak fédew ruwe.

⁷ Atin i Jesuse brab de kuyugén ménagéw ro man mangéy dob dogote Galilea, brab médooy de étew ménfuray de. Tidéw ro Galilea brab Judea, ⁸ brab tidéw Jerusalem, brab Idumea, brab tidéw fingé sébangay wayége Jordan, brab tidéw dob géliwéte bé Tirowe brab Sidone. I de ni do médoor étew ménangéy ro dob Jesuse non énggelingoo roy kéluhanay de rénigo no do mémégaif. ⁹ Atin non toow fo dakél i de ménlimud do étew, i Jesuse bénréhén bé de kuyugén bé témafay ro sébaan awang édaa no inok énda mérásékén. ¹⁰ Non énggféadi-adino noy de médoor do étew. Mélaw i kéluhanay de wén do déruuno sédéri ro fégédét dob Jesuse inok gékuwaha ro. ¹¹ Atin i kéluhanay de étew rénahukoy de saitan, amun énggitoy roy Jesuse, méméngkéb ro dob adafa nuwe brab méeses ro maro, “Beemey Nga i Tuluse.”

¹² Endob i Jesuse génléén bero bé énda fégétiga ro de dob de ségiyo.

Fénémili Jesusey de folo bra ruwo gétew apostol

¹³ Tidéw béno, i Jesuse ménénagé mangéy dob burure brab ténawagén mangéy dob Beeney de fénémilién do waléy do sarigo no. Atin

ménangéy ro dob Beene. ¹⁴ Atin fénémilién i de folo bra ruwo gétew, atin féndawétén bero do apostol (i atag ne “do sénugu”). Non fénodorén bero dob Beene, brab sugué no bero muret. ¹⁵ Atin niraya no bero barakat inok gédédél ro do saitan rémahuk dob de étew.

¹⁶ Ay niy de dawét i de apostol do fénémilién: Simon (féndawét Jesuse Pedro so), ¹⁷ Santiago brab Juan, sani de nga Sebedeo. I Jesuse féndawétén so bero Boanerges (i atag ne “do nga dégu”), ¹⁸ brab Andres, Filipi, Bartolome, Mateo, Tomas, Santiago nga Alfeo, Tadeo, Simon sani ségetéwe toow fo gulaané noy ingéd ne, ¹⁹ brab Judas Iskariot, sani ménfkéfoe bé Jesuse.

²⁰ Tidew béno, i Jesuse ménule. Atin ménlimud man i médoowe étew dob Beene. Mélaw i Jesuse brab de kuyugén, énda i uras ro mama. ²¹ Atin i de samungén, amun énggelingoo roy ni, nangéy ro kénéfo, non bénréh i de étew bunég kun.

²² Atin wén i de téromo bé kitab i de Judio énggumah ro tidew Jerusalem. Ménbéréh ro maro, “I Jesuse ni rénahuko Beelsebule, sani Satanase, i odoroy de saitan. Been i funa nuwe wén i barakatén démédél bé de saitan.”

²³ Mélaw i Jesuse ténawagén i de ni étew mangéy dob Beene, brab nureténi beroy de binuwaya mano, “Enda fakayén ké féféraréyé Satanasey de dumo no saitan. ²⁴ Ufama, amuk wén i ingéd énda géséfagayun ro brab sétiboh ro, mébinasa. ²⁵ Taloo no i ségékuréngé étew dob sébaane lawi amuk énda so géséfagayun ro brab sékérit ro, waléy mébinasa. ²⁶ Ségiléw so bé Satanase. Buluk i de sugu-sugué no mésébaad énda géséfagayun ro, énda so gétiindég i fangangatura nuwe, brab mébinasa.

²⁷ “I Begéne, ténabana kun i Satanase. Been i niy funa kuwe géféléraréyo kuy de kuyugén sani de saitan. Ufama, énda i ségetéw étew géahur dob lawi i émbagére étew atin tulisé noy tamuk ne taman énda na géikéto no de métah.

²⁸ “Béréhé ku begom i toowe, i kéluhanay de sala brab de tete kébéréh i de étew fakay émfésagad. ²⁹ Endob i émbéréhe tete fantag bé Rémogor i Tuluse énggérigo sala énda émfésagada no non énda mékédan i nan sala taman sa taman.” ³⁰ Bénréh Jesusey ni non wén i de ménbéréh maro, “Rénahuko saitan i Jesuse, funa no géféléraréy bé de saitan.” Endob i toowe, Rémogor i Tulusey manangguwite bé Jesuse.

³¹ Tidew béno, énggumah i idéng Jesuse brab de tuwaréyén lagéy. Téménindég ro dob liyuy lawie, brab fén-uwito ro kébéréh bé tawagé roy Jesuse. ³² Wén i de médo do étew ménlimud ménasar géliwét bé Jesuse, atin ménbéréh ro maro, “I idéng me brab de tuwaréyém diyo ro dob liyuwe. Méuyot ro géségiro Beem.”

³³ Atin séménumbul i Jesuse mano, “Wén i ségiyo idéng gu brab do tuwaréy gu.” ³⁴ Atin iling-iling dob de étew ménasar géliwét de brab

ménbérél manó, “Téngténg gom, ay niy de maak idéng gu brab do tuwaréy gu. ³⁵ Non i de étew rémigo bé kétayay Tuluse, beroy do maak idéng gu brab do tuwaréy gu.”

I binuwayaé fantag bé sémabuge

4 ¹Wén i no sébaan fuweh, téménoro man i Jesuse diyo dob dogote Galilea. Atin toow fo dakél i ménlimude do étew géliwét de. Mélaw ménda dob awange brab ménsar diyo gédét dob dénsaane, bé lala i de étew téménindég dob dénsaane. ²Atin médooy de téneroén bero fénagéwén dob de binuwaya.

³Ménbérél manó, “Féglingo gom. Wén i ségétéwe étew ménangéy sémabug bé béne ne. ⁴Amun sénabugén i béne ne, i de dumoy de batéw de, éndob kloh saén i fantade médooy de batéw de, éndob kloh saén i fantade de. Tidéw bénou, ménagad téménunoh non énda ménalém i fantade de. ⁶Endob amun sémbang i térsange, atin démawét foy médufe, ménlaay i nohoke brab ménléhu, non énda toow ménalém i de kédarir ro. ⁷I de dumoy de béneén ménsawér dob fantade wén i do suwar de énda séna téménunoh ro. Atin ménséréngan téménunoh i de suwar brab de nohok. Mélaw ménéfuk i de nohok brab énda énggégfogonok ro. ⁸Endob i de dumoy de béne ménsawér dob fiyowe fantad, brab témunoh ro brab ménruk ro brab ménggonok ro médoo taman télew folo takéf, ném folo takéf brab mératu takéf i séngae sébaan béne.”

⁹Atin féntaus Jesusey kébérél ne manó, “Fégitung gom i fantage bé ni bénréh gu begom amuk méuyot gom de ké gésobuto kom.”

¹⁰Tidéw bénou, amun sébaa Jesuse séden, i de dumoy de étew énggégélingo bé ni binuwaya, beroy de folo bra ruwo gétew do kuyugén ménangéy fégédét dob Beene. Atin ménénginsa ro fantag bé atag i de ni binuwaya. ¹¹Atin séménumbul i Jesuse manó, “Dob begome do kuyug gu, fégésobutéy Tuluse begom i de ménbunéy fantag bé kékéulgéw i Tuluse bé de étewén. Endob dob de ségiyo étew, énggéglingoo ro saén i de ni fénagéw dob de binuwaya, ¹²inok fiyon fo ké téngténgé ro fo toow, énda gito ro de. Brab fiyon fo ké gélingoo ro fo toow, énda gésobuto ro de. Non amuk gésobuto ro, gésénule ro bé de tete adat ro brab munur ro bé Tuluse, atin fésagada no bero.”

¹³Atin féntaus Jesusey kébérél ne manó, “Aw énda gésobuto kom i ni binuwaya? Ati mélaw i kégésobut gome bé de ségiyo kétoro gu fénagéw dob de binuwaya? ¹⁴Ay niy atag i ni binuwaya énggéglingoo kom. I atag i ni béne, been i kébérél i Tuluse. Atin i de séségiyo-giyo gékélasí do fantad ségiléw bé de séségiyo-giyo gékélasí do étew. Atin i sémabuge ureté noy kébérél i Tuluse dob de séségiyo-giyo do étew. ¹⁵I de dumoy de étew

de béne ménlawu dob doror i aguwone. Diyo nama i de kloh manok. I atag i ni, wén i do étew énggelingoo roy uret i Tuluse, éndob énggégumah i Satanase, atin kénda noy ni uret énggelingoo ro. ¹⁶I dumoy de béne ménlawer dob fantade médooy de batéw de. I atag i ni, wén i do étew énggelingoo roy uret i Tuluse brab ténayakuf ro brab ménoror ro de. ¹⁷Endob loo bé de nohok énda ménalém i darir ruwe, énda so méégét i kéunur ruwe. Sémarig ro bé Tuluse singkow saén. Endob amuk kérégénan ron taloo no ferasayén ro sabaf bé uret i Tuluse, magad mékédan i késarig ruwe. ¹⁸I de dumoy de béne ménlawer ro dob de duwaléy suwar. I atag i ni, wén i do étew énggelingoo roy uret i Tuluse, ¹⁹éndob non bé de bukué ro fantag bé de kéuyag ro, brab kéuyot ruwe waléy kawasa, brab kéuyot ruwe bé de ségiyo do languntaman, been i niy funa ruwe gélifoto roy uret i Tuluse brab énda gérigono roy fatute kétayay Tuluse rigoné ro. ²⁰Atin i de dumoy de béne ménlawer ro dob fiyowe fantad. I atag i ni, wén i de étew énggelingoo roy uret i Tuluse brab toow fo nunuro ro. Mélaw rigoné roy kétayay Tuluse rigoné ro. I de dumo bero gérigono roy de fiyo, brab i de dumo bero gérigono ro na foy médoowe do fiyo, brab i de dumo bero toow na fo gérigo ro do médoou do fiyo.”

²¹Atin ménbéréh man i Jesuse mano, “Enda i témumon solo inok bunéyé no dob bukag i kurénge fénléngkéb, taloo no fédiyoé no dob fantad i katriwe. Yamula fédiyoé no dob fégonone de. ²²Ségiléw so bé ni, i de kétoro gu ménbunéy béleeve, giton moso. Atin i kéluhanay éndae gésobuton béri, gésobuton moso. ²³Komon fégitung gom fantag bé ni bénréh gu begom amuk méuyot gom de ké gésobuto kom.”

²⁴Atin ménbéréh man i Jesuse mano, “Fétuntay gom i gélingoo kome. Non i kékukum gome bé de dumo gom do étew, iringéy Tuluse so ké kukumé no begom, éndob toow na fo gétimal. ²⁵Atin i étewe mégélingo brab munur, méumanan nay kégésobut ne. Endob i étewe énda munurén, fiyon foy klohe fégitungé no gésobuto no, dotén dob beene.”

²⁶Atin ménbéréh man i Jesuse mano, “I kéidakél i kéféguléw i Tuluse bé de étewén ségiléw bé kééruk i de béne sénabug i ségétewe étew dob fantade. ²⁷Tidéw bérén, témunoh i de béne fiyon fo ké énda gésobutoy sémabugey funay de nohok témunoh. Méruk i de nohok fiyon fo ké fuweh ké gémalbék taloo no kélungonon ké fidong. ²⁸Non i fantade fétunohé noy de nohok brab fefégonoké no. Dob sunguwe de, démaun. Tidéw bérén, musu. Tidéw man bérén, kémifénén. ²⁹Atin amuk lagasén, fakayén kétéwe no non énggumahén i gaiy kékétewe de.”

³⁰Atin ménbéréh man i Jesuse mano, “Ati fégiringo tom bé kéféguléw i Tuluse bé de étewén? Ati binuwayae ureté tom? ³¹Ségiléw na bé toowe fo kloh béne, éndot i étewe brab nohokén dob fantade. ³²Tidéw bérén, téménunoh brab ménruk taman ménwaléy toow fo dakél nohok. Atin ménongo dakél fongo, inok i de kloh manok salaga ro.”

³³I uret i Tuluse nuret Jesuse dob de étew fén-agéw dob de médoob do binuwaya loo bé ni. Nuretéen bero taman énggésobuto ro. ³⁴Enda i no kétoroén bero kékén binuwaya. Endob amuk beroy de kuyugén saén brab énda i do ségiyo étew diyo, fégétiga no beroy de atag i de binuwaya.

Féntéré Jesusey défuke

³⁵Bé beno gai, amun sémingkufén, bénréh Jesuse dob de kuyugén mano, “Mifar tom mangéy dob difar i dogote ni.” ³⁶Mélaw ténaagak roy de ménlimud do étew, brab i de kuyugén ménda ro dob awange énsara Jesuse. Tidéw beno, ménifar ro. Wén soy do ségiyo awang ménodor bero. ³⁷Tidéw beno, amun diyo ron dob kérara i dogote, tékow énggumah i émbagére défuk. Atin nahuroy de bagél i awang ruwe taman gédét ménféno bé wayége. ³⁸Endob i Jesuse diyo dob ulinay awange, ménfidong déménanan. Atin téningé i de kuyugén atin nulég ro maro, “Maistéro, aw énda i ula mé de ké mégra tom?”

³⁹Tidéw beno, méntek i Jesuse brab génléen i réfuruhe brab de bagél mano, “Fétinanék gom!” Sonom beno, téménréni réfuruhe, atin ménlingén-ngén i dogote. ⁴⁰Atin ménbérén i Jesuse dob de kuyugén mano, “Sedek mágilak gom? Aw énda séna sémarig gom?”

⁴¹Endob toow ro fo ménngilak atin ménshérén-bérén ro maro, “Ati néni mon i ni étew? Fiyon i défuke brab de bagél géfétéreno no!”

Dénédél Jesusey de saitan

5 ¹Atin méntaus ro taman énggégumah ro dob difar i dogote, ²dob ingéde Gerasa. ³Amun téménéfad i Jesuse, bénalak i étewe rénahukoy saitane. Tidéw dob de takub do lébeng, ³non bati diyo. Brab éndaén fo méikétén, fiyon fo ké sangkali. ⁴Non médoonén gule nikét bé sangkaliey de sékéyén brab de kémérén. Endob i de sangkali sékétusé no, brab de futow fénggafatung bé de sékéyén séfindasé no. Atin énda nay ségétew étew émbagér ménngéfifit de. ⁵Fuweh na kélungonon i kéagéw ne dob de duwaléy lébeng brab dob de tuduk. Diyo mékes brab falié noy lowoh ne bé de batéw.

⁶Atin amun énggito noy Jesuse dob mérayue, léménéntu mangéy fégédét brab ménlingkuwéd dob adafa nuwe. ⁷⁻⁸Atin i Jesuse sénuguén i saitane mano, “Saitan, sut go tidéw dob beena nan!”

Tidéw beno, ménkes métanug i étewe rénahukoy saitane ni. Ménbérén i saitane mano, “Jesus, Nga i toowe fo gérotor Tulus, ati kérigo muwe begén? Ongoté ku Beem, fasad go dob Tuluse bé kago fédawéton begén.”

⁹Atin fénénginsaa Jesuse mano, “Ati dawét me?”

Atin séménumbul mano, “Laksaén i dawét guwe non bé médoob gey do saitan dob ni étew.” ¹⁰Atin fénautsén i kékéfédaw-gédaw ne dob Jesuse bé békén damén dédélé Jesuse bero mangéy dob mérayue.

¹¹ Enda mérayuén dob no gonon, diyo i médoowe do babuy témabtab dob méngulandige. ¹² Atin nongot i de saitan dob Jesuse maro, “féangéyén gey dob do babuy diyo, brab fédayaém begey mahur dob berowe.” ¹³ Atin ténungkas Jesuse bero. Mélaw i de saitan ménsut ro dob étewe ni brab ménahur ro dob de babuy ni. Wén i ruwo ngibu kédooy de ni babuy, brab kéluhana ro ménraréy ro ménangéy dob fingase brab ménantéfor ro mangéy dob dogote, atin ménléné ro.

¹⁴ I de étew témalima bé de babuy ni, amun énggito roy ni ménrigo, ménsegéta ro brab nuret roy ni dob ingéde brab dob de ségiyo gonon géliwét. Atin ménangéy diyo i de étew inok susiné roy ni ménrigo. ¹⁵ Ménfégédét ro dob Jesuse brab énggito roy étewe ni bé gétaho rénahukoy de médo do saitan. Ménasar diyo, kéménégala brab métintunén i kéfégitung ne. Atin kéluhana ro mégilak ro de. ¹⁶ Nuret i kéluhanay de énggégito de ké ati ménrigowé dob étewe ni bé gétaho sénaitanan brab ati ménrigowé dob de babuy.

¹⁷ Mélaw i de étew nongot roy Jesuse tékédan dob ingéd ruwe ni.

¹⁸ I lala Jesuse ménnda dob awange, i lagéyo no ténkédanay de saitan nongotén dob Jesuse mano, “Modoru Beem.”

¹⁹ Endob énda ténungkas Jesuse de. Yamula ménbéréh mano, “Ule go brab uretém dob de samungém i kéluhanay fiyowe rénígoy Kadnane Tulus dob beeme brab kégédaw ne beem.”

²⁰ Mélaw ménagéw brab ménsgud-sugud dob gonone diyo féndawé “Do Folo Ingéd”, brab nuretén i kéluhanay rénígo Jesuse dob beene. Atin i kéluhanay de étew énggégélingo de, ménngaif ro de.

Nuwa Jesusey ruwowe gétew libun

²¹ Tidéw béo, ménsegule i Jesuse mifar dob dogote. Amun énggumah dob difare, diyo dob fé doror i dogote ménlimud i médoowe étew géliwét de. ²² Atin énggumah i ségétewé étew féndawét Jairo, ségétew odoron dob lawie féngadafan kay de Judio. Amun énggito noy Jesuse, ménfégédét dob Beene brab mén télénkéb dob adafa nuwe. ²³ Atin toow fo nongotén dob Jesuse mano, “I klohe kénogo ku toow fo kétimalan démérueun. Enggonén angéyém gamak inok adi-adi brab inok énda méléhuén.”

²⁴ Mélaw ménodor i Jesuse de. Atin ménodor i médoowe étew brab méserasék ro lémiwét bé Jesuse.

²⁵ Diyo soy ségétewé libun késasangan non foloén bra ruwo gébélantuwa i kéranas i adat ne. ²⁶ Brab ménétéyén i kurta ne féngébayadén bé de doktor, éndob énda foy ségétew géuwa de. Yamula minut gétimal i déruu nuwe. ²⁷ Enggélingoo noy de uret fantag bé Jesuse, mélaw ménfuray so bé de médo ni do étew ménlimud inok gékuwaha noy kégal Jesuse. ²⁸ Non fénggitungén mano, “Amuk gékuwaha ku saén i kégal ne, adi-adiwu.”

²⁹ Mélaw kénuwahén i kégal Jesuse. Sonom béno, téménrén i kéranas i adat ne, atin énggétérédama no ménadi-adi bé déruu nuwe. ³⁰ Endob bé béno so, énggétiga Jesuse bé ménusut i barakat ne tidéw dob Beene. Mélaw méntékélid brab ménénginsa dob de ménlimud do étew mano, “Ati kéménuahe bé kégal guwe?”

³¹ Atin séménumbul i de kuyugén maro, “Gito moy médoowe ni étew géliwét Beem brab séndantélo ro Beem. Sedek fénginsaé moy ati kéménuahe Beem?”

³² Endob i Jesuse fentausén i kéiling-iling ne téméngténg ké atiy kéménuahe de. ³³ Tidéw béno, i libune ni énggétiga no atiy ménrigowé dob beene. Mélaw ménfégédét lémukub bé kégilak ne, atin méntélengkéb dob adafa Jesuse. Brab bénréhén i kéluhanay toowe. ³⁴ Tidéw béno, bénréh Jesuse de mano, “Di, i kéfengintoow moy funa muwe ménadi-adi. Taus go ule brab kagonén émbuku. Endaén démériun go bé ni déruun.”

³⁵ Amun béréhé Jesusey ni, énggumah i de étew tidéw dob lawi Jairowe. Ménbéréh ro dob Jairowe maro, “Déménigurén i nga me. Endaén kailanga mo féangéyé mo diyo i Maistérowa nan.”

³⁶ Endob i Jesuse, énda ténuila noy kékéréh ruwe ni, yamula bénréhén dob Jairowe mano, “Kago mágilak. Féginugut go saén.” ³⁷ Atin i Jesuse, énda i ségétew fénodorén saliyu bé ro Pedrowe, Santiagowe, brab Juane dumo Santiagowe sétiman idéng. ³⁸ Amun énggumah ro dob lawi i odorono no, énggito Jesusey ménribuke, atin énggélingoo noy de ni médoó étew toow fo selekén non kémérew ro brab rémuung ro. ³⁹ Tidéw béno, ménahur i Jesuse brab bénréhén mano, “Sedek ménribuk gom brab selekén gom kémérew? Non i ngae ni énda ménléhuén, éndob ménfidong saén.”

⁴⁰ Mélaw sénbayat roy Jesuse. Tidéw béno fénsutén bero kéluhanan, atin nuwitén i abay i ngae ni brab idéng ne brab de télém gétew kuyugén ménodor de, atin ménahur ro mangéy dob sibéye gonoy ngae ni méniro. ⁴¹ Tidéw béno, génamak Jesusey kémér ne brab ménbéréh mano, “Talita kumi.” (I atag ne “Di, tek go!”)

⁴² Sonom béno, méntek i ngae ni atin ménagéw. Folo bra ruwo gébélintuwa i idad ne. Toow ro fo ménngaif bé ni rénigo Jesuse. ⁴³ Endob i Jesuse fénégétén i kékérého nuwe bero bé békén ureté ro dob ségiowey ni ménrigo. Atin sénuguén bero émféama bé ni nga.

6 ¹ Tidéw béno, ménagéw man i Jesuse tidéw diyo atin ménule mangéy dob kaane ingéd. Atin ménodor i de kuyugén so. ² Atin bé gaiy kétéréne, ménangéy téromo dob lawie féngadafan kay de Judio. Médooy de étew diyo, atin amun énggélingoo roy kétoro Jesuse, ménngaif ro. Mélaw méngefenginsa ro maro, “Ati ni dakél kégétuwan, brab tidéwo nuwe de? Sedek gérígono noy mékégaife galbék? ³ Aw békén ba Beeney fandaye rémigo lawi nga Maria brab ofo Santiago, Jose, Judas

brab Simon? Brab aw békén ba dini dob betomey de libu no?" Mélaw ménika ro de.

⁴ Atin ménbéréh i Jesuse dob berowe mano, "I ségétéwe sarigoy Tuluse muret bé kébéréh ne, basanan dob kéluhanay de gonon saliyu saén dob kaane ingéd brab dob de kaan do samung brab dob de kaan do étew sétifon lawi."

⁵ Atin énda i gérígono no mékégaif galbék saliyu saén bé gémamake bé firoye démérueen atin géféadi-adino no bero. ⁶ Atin ménggaif i Jesuse non énda ménunur ro dob Beene.

Sénugu Jesusey de folo bra ruwo gétew kuyugén

Tidéw béo, ménagéw i Jesuse sémugud téromo dob de ingéd gédét diyo. ⁷ Atin ténawag Jesuse mangéy sélimud dob Beeney de folo bra ruwo gétew do kuyugén. Tidéw béo, sénuguén bero sémugud séruwo-ruwo gétew. Atin niraya no bero barakat inok géféraréyo roy de saitan. ⁸ Atin bénréhén bero mano, "Kagom muwit étingayén saliyu saén bé tugée. Kagom muwit amaén, taloo no réban, taloo no kurta. ⁹ Fatut séminilas gom, éndob kagom muwit lékasa kom kégal." ¹⁰ Atin bénréhén so bero mano, "Fiyon atiy lawie témayakuf begom, bati gom diyo taman tagaké kom i nan ingéd. ¹¹ Buluk wén i no ingéd énda tayakuféy de étew begom, tékédan gom diyo, brab tag-tag gom i de bubuk sébuwan dob de sékéy gom émfégétigan bé kukuméy Tuluse bero."

¹² Tidéw béo, ménagéw i de kuyugén ni brab nuret roy fatut gésénule i de étew bé de sala ro brab tagaké roy de tete adat ro. ¹³ Atin énggéféraréy ro do médoor saitan, brab lénulawa ro nor i de médoor do déruunan atin ménadi-adi ro.

I kéléhu Juan Bautistawe

¹⁴ Bé béo, i Herode, sani méguléwe dob Galilea, énggelingoo noy de rénigo Jesus non ménbantug dob kéluhanay de gonon. Wén i do étew ménbéréh ro bé i Juan Bautistawe méntébule non maro ké Juan i Jesuse. Been kun i niy funa nuwe wén i barakatén gérigo do mékégaif.

¹⁵ Brab i de dumo de bérhéroy Elias kun i Jesuse, sani méntélatee sarigoy Tuluse bé do gétah. Brab i de dumo de bérhéroy Jesus kun i toowe fo énggétah sénarigoy Tuluse muret.

¹⁶ I Herode, amun énggelingoo noy de ni, ménbéréh mano, "Beeney Juan Bautistawe fénkéleng guy uléw ne, éndob méntébule." ¹⁷⁻¹⁸ Ay niy funa Herode ménfékéleng bé uléw Juane. I Herode lénamfaén i bawag i tuwaréy ne Filipi. I dawét i ni libun Herodiyas. Tidéw béo, bénréh Juane dob Herodey ménalsa non énda fakayén dob kitab i de Judio ké bawagén i iboe. Tidéw béo, i Herode fénkéfoén i Juane brab fénférisu no.

¹⁹ Mélaw i Herodiyase ménkérít bé Juane brab ménuyot de méméléhu, éndob énda féndaya Herode de. ²⁰ Non i Herode ménggilak bé Juane non

gétiga noy métintu étew i Juane brab fiyoy adat ne. Mélaw déniyaga no. Atin méuyot de mégélingo, fiyon fo ké ménriyarah de ké fégélingoé noy Juane.

²¹ Endob énggumah i gaiwe rigoné Herodiyasey tetee dob Juane. Non réménigo karagiya i Herode fégétédémo no bé kéumah ne. Atin sénéngkatén i médoowe do odoron brab de sarigo datu Herode brab de odoroy de sundalo, brab de gérotor do étew dob ingéde Galilea. ²² Atin i kénogo Herodiyase ménahur dob karagiye ni, atin ménsyaw. Mélaw ménfiyoy fédew Herode beroy de kana no. Atin bénréh Herode dob kénogone ni mano, “Ongotém dob begéney atiy kétaya muwe, brab iray gu.” ²³ Atin séménafa mano, “Fasada ku beem, iray gu dob beemey atiy ongoté muwe dob begéne, fiyon fo ké ségebala bé ni ingéd féguléwo ku.”

²⁴ Mélaw ménsut brab ménénginsa dob idéng ne mano, “Ati ongoté kuwe?”

Atin séménumbul i Herodiyase mano, “Ongotém i uléw Juan Bautistawe.”

²⁵ Tidéw béno, ménagayas séfule mangéy dob datu Herode brab ménongot mano, “Kétaya ku ké béleewe ni irayém begén i uléw Juan Bautistawe dob biléwe.”

²⁶ Atin toow fo méntete i fédew datu Herode, non miká rémigo bé ni. Endob sabaf bé méégéte fasadén rénigo no dob téngaangay de kana no, ménika ké énda magayun no bé ni ongotén. ²⁷ Mélaw fénagayasén sénugu i ségetéwe guwardiya mangéy dob férisonone inok kélengé noy uléw Juane brab uwité no séfule. Tidéw béno, i guwardiyawe ni, ménagéw dob férisonone brab kénlengén i uléw Juane. ²⁸ Atin nuwitén i uléw ne dob biléwe, brab nirayén dob ni kénogon. Atin niray i kénogone ni dob idéng ne. ²⁹ I de kuyug Juan, amun énggelingoo roy ni, nangéy roy bangkay ne, atin lénébéng ro.

Fénwaléy Jesuse médooy klohe amaén

³⁰ Amun méniséfuleén i de apostol mangéy dob Jesuse, bénréh roy kéluhanay de rénigo ro brab de ténero ro. ³¹ Atin toow fo médooy de étew ménangéy ségitó bé Jesuse, mélaw énda i uras Jesuse brab de kuyugén mama. Mélaw bénréh Jesuse dob de kuyugén mano, “Enggomén, magéw tom dob géfélébue gonon inok gétérén tom singkow.” ³² Mélaw ménnda ro dob awange inok mangéy ro dob géfélébue gonon.

³³ Endob médooy de étew énggégito bero magéw, brab énggétiga ro bero. Mélaw ménagayas i de étew tidéw dob kéluhanay de ingéd léméntu mangéy dob ayo Jesuse beroy de kuyugén. Atin énggétah ro na énggégumah bé Jesuse. ³⁴ Amun déménunggu i awange ni brab ménlus i Jesuse dob dénsaane, énggito noy de médooy do étew ménlimud. Atin ménuray i na nuwe bero, non géségiléw ro bé de bili-bili énda i témalima

bero. Mélaw féngganayén i kétoro ne bero bé médoowe kétoroén.

³⁵ Amun témégénén, i de kuyug Jesus ménangéy ro dob Beene brab ménbérélh ro maro, “Témégénén, atin i ni gonon mérayu dob dakéle ingéd. ³⁶ Mélaw féagéwém i de étew ni inok mangéy ro dob de ingéd gédét dini. Diyo gébéléy ro amaé ro.”

³⁷ Endob i Jesuse ménbérélh dob de kuyugén mano, “Iraya kom bero amaé ro.”

Atin ménbérélh ro maro, “Ay aba-aba, aw méuyot go de ké méléy gey amaén kay de médoowe ni étew? Labi ruwo ngibu filak i nan!”

³⁸ Atin fénénginsaa Jesuse bero mano, “Firoy timan i fa tome? Ay gom ta langu.”

Amun gétiga ro, séménumbul ro maro, “Limo timan fan brab ruwo timan sédo.”

³⁹ Tidéw béno, ménbérélh i Jesuse dob de kuyugén mano, “Féésar gom i de étew sésélumfuk-lumfuk dob de mélunéw kéeroon.” ⁴⁰ Mélaw i de étew, ménasar ro ménslumfuk-lumfuk, sémératuh-ratuh brab sélimo-limo folo.

⁴¹ Tidéw béno, éndot Jesusey limowe timan fan brab ruwowe timan sédo, atin léménéngag saréw dob lawayo brab ménfésalamat dob Tuluse. Tidéw béno, sénbaad-baadén i de fan, brab nirayén dob de kuyugén inok saaré ro dob de étew. Atin loo so bé niy rénigo nuwe bé ruwowe timan sédo.

⁴² Atin i kéluhanay de étew, téménantu ro mama taman ménbésor ro.

⁴³ Tidéw béno, ténimu i de kuyug Jesus i de sama i de fan brab sédo brab ménféno i foloe bra ruwo timan biton. ⁴⁴ I kédooy de ménama, limo ro ngibu do lagéy saliyu na bé de libun brab de nga.

Ménagéw i Jesuse dob rotor i dogote

⁴⁵ Tidéw béno, fénnda Jesusey de kuyugén dob awange atin fénétahén bero mangéy fingé difar bé dogote dob ingéde Betsaida, bé lala ne émféule bé de étew ménlimud. ⁴⁶ Atin amun méngettawén dob berowe, ménangéy i Jesuse dob sébaane burur inok démasal. ⁴⁷ Atin amun sémingkufén, i awange diyoén dob kérara i dogote. Atin i Jesuse ségtéwén saén dob fantade. ⁴⁸ Atin énggito no kérégénan i de kuyugén mémurah bé awang ruwe, non gérumfaka roy réfuruhe. Mélaw amun lingkuwogén mangéy fuweh, ménangéy i Jesuse dob berowe magéw dob rotor i dogote. Géfédéw damén gélamfasa no bero, ⁴⁹ éndob énggito ro magéw dob rotor i wayége. Atin maro ké ménayam. Mélaw ménkes ro. ⁵⁰ Non kéluhana ro ménngilak amun énggito ro.

Endob sonom béno, i Jesuse ménbérélh dob berowe mano, “Kagom mégilak! Begén. Fétana gom i de fédéw gom.” ⁵¹ Tidéw béno, ménnda dob awang ruwe. Atin téménréni i réfuruhe. Atin toow fo ménngaif i de kuyugén, ⁵² non fiyon fo ké énggito roy mékégaife rénigo Jesuse dob de amaén, énda gésobuto ro de non métégas i de atur ro.

⁵³ Atin amun énggifar ro, déménunggu ro dob ingéde Genesaret, atin ménamfil ro fédoror. ⁵⁴ Atin amun téménéfad ron dob awange, sonom béno énggiloy de étew bati diyo i Jesuse. ⁵⁵ Mélaw ménagayas ro léméntu dob séngae ingéd diyo inok fégétiga ro dob de étew. Tidéw béno, nuwit roy de démérueun ténganggung ro mangéy dob énggelingoo ruwe gono Jesuse. ⁵⁶ Atin dob séngae nayo no, fiyon fo ké kloh ingéd taloo no dakél, nuwit roy de démérueun dob de fadiyan, atin nongot ro dob Beeney kuwahé ro saén i férung-fung i kégal ne. Atin i séngae gékuwah de adi-adi.

I kétoroe fantag bé adat i de Judio

7 ¹ Wén i no sébaan fuweh, i de Fariseo brab de téromo bé kitab i de Judio, do tidéw Jerusalem, téningé roy Jesuse. ² Atin énggitoy roy dumoy de kuyugén mama énda méngguse ro loo bé adat i de Judio.

³ Non i de Fariseo, brab kéluhanay de Judio, énda mama ro taman énda géféguse ro non odoro roy adate tidéw dob de katufua ro bé do géyah.

⁴ Brab buluk méléy ro amaén dob fadiyane, énda amaé ro de taman énda méurahén. Atin médooy nay de dumoy adat ro loo bé kérauhé bé de tabu brab de kuréng brab de galang ahur-ahuron brab de katri.

⁵ Mélaw i de Fariseo brab de téromo bé kitabe, ménénginsa ro dob Jesuse maro, “Sedek i de kuyugém énda odoro roy adat tome tidéw dob de katufua tom, non énda méguse ro ké mama ro?”

⁶ Atin séménumbul i Jesuse mano, “Enda toow i kéunur gome bé Tuluse, ubo-ubo saén. Toow i kébérél Isaiase, sani ségétéwe méntélata sénarigoy Tuluse muret bé kébérél ne, amun sénulatén i fantage bé begome mano, ‘Bang i Tuluse, basanay de ni étew Begén dob kébérél ruwe saén. Endob énda munur ro Begén dob de fédew ro. ⁷ Enda i atag i kékengadaf ruwe Begén, non toroé roy de sugu rénígoy kéilawane brab béréhé ro tidéw dob Begéné.’”

⁸ Atin féntaus Jesusey kébérél ne mano, “Mélaw téngak gom i de sugu i Tuluse inok odoro kom i adat i kéilawane saén. ⁹ Furung gom miká bé de sugu i Tuluse inok modor gom bé kagome kétoro. ¹⁰ Non wén i sugu i Tuluse niray Moisese bé do géyah mano, ‘Basana moy abay me brab idéng me.’ Atin bénréhén so mano, ‘Buluk wén i ségétéw émbérél tete fantag bé abay ne look idéng ne, fatut féléhuén.’ ¹¹ Endob i begome, téromo gom bé amuk wén i ségétéw étew émfasang i abay ne look idéng ne, brab wén i tabang irayén damén, tungkasé kom de émbérél ‘Korban’. (I atag i Korbane ‘Kay Tuluse’.) ¹² Mélaw éndaén tungkasé kom de témbang bé de lukésén. ¹³ Mélaw téngak gom i kébérél i Tuluse inok modor gom bé adate toroé kom. Brab do médooy nay de rigoné kom ula-ula loo bé ni.”

I kétoroe fantag bé amaén

¹⁴ Tidéw béno, ténavag Jesuse man i de étew mangéy dob Beene. Atin ménbérél dob berowe mano, “Fégélingo gom Begén, kéluhana kom, brab

fégésobut gom. ¹⁵I funay de étew waléy mékérésik dob adafay Tuluse, békén non bé atiy amaé ruwe. Yamula, i de tete kóbéréh mésut tidéw dob de ba ro, been i funay de étew waléy mékérésik dob adafay Tuluse. ¹⁶Fétuntay gom i ni bénréh gu.”

¹⁷Tidéw béno, amun téngak Jesusey de médoos do étew ménlimud brab énggérahur dob lawie, ménenginsa i de kuyugén dob Beene fantag bé atag i ni kóbéréhén. ¹⁸Atin sénumbulo Jesuse bero mano, “Ségiléw gom bé kéluhanay de ségiyo étew, non énda gésobuto kom i ni kétoro gu. I funay Tuluse énda mésuwatén bé de étew békén sabaf bé de amaé ro. ¹⁹Non i amaéy étewe, mahur dob sur ne brab mésut so dob lowoh ne. Enda mahurén dob fédew ne.” Bé ni kóbéréh Jesuse, ténoréon bé i kéluhanay amaéne fiyo, fakay amaéy de étew.

²⁰Atin féntaus Jesusey kóbéréh ne mano, “I géésute tidéw dob étewe, been i funa nuwe mékérésik. ²¹Non tidéw dob fédew, gégumah i tetee kénégitung, brab sébiga, brab ménakaw, brab méméléhu, ²²brab sétayan bé bawag i ségiyowe, brab arumén, brab lémidul, brab tete i rigonéy de lowoh ro, brab mingar, brab témbo bé éndae toow, brab félangka-langka, brab dufang, brab kéluhanay de tete rigonén. ²³I kéluhanay de ni tete tidéw dob fédew i étewe brab funa no mékérésik.”

²⁴Tidéw béno, ménagéw i Jesuse tidéw diyo mangéy dob de ingéd gédét dob ingéde Tiro. Diyo réménahur dob lawie, atin ménuyot ké énda gétigay de étew i gono nuwe. Gido loo, ménslalag i Jesuse diyo bat. ²⁵Atin diyo i libune wén i klohe kénogo no rénahukoy saitane. Atin énggelingoo noy fantage bé Jesuse. Mélaw ménagayas ménangéy dob Beene brab ménélengkéb dob adafa nuwe. ²⁶Atin nongotén dob Jesuse bé feféraréyé noy saitane tidéw dob kénogo nuwe ni. Endob i ni libun, békén Judio. Yamula, tidéw dob ségiyowe ingéd fénadawét Fenisia dob Siro. ²⁷Mélaw nuret Jesusey sébaane binuwaya inok fégétiga no de bé tabangé noy de Judio sungu, atin tidéw béno tabangé noy de békén Judio. Ménbéréh mano, “Féamaén na métah i de nga. Non énda fatutén ké dotén i amaéy de nga atin ibérén dob de itu.”

²⁸Endob ménbéréh i libune ni mano, “Toow, Maistéro, éndob fiyon foy de itu géamaa roy de mumu mélawu tidéw dob amaéy de nga.”

²⁹Mélaw séménumbul i Jesuse mano, “Fiyoy nan kóbéréhém. Mélaw ule go non ménutén i saitane tidéw dob nga me.”

³⁰Tidéw béno, ménule i ni libun, brab énggito noy nga ne méniro, brab i saitane éndaén rénahuko no de.

Nuwa Jesusey ségétéwe bokongén brab mow

³¹Tidéw béno, ménagéw i Jesuse tidéw dob de ingéd gédét dob Tiro brab ménémanték mangéy bé ingéde Sidon atin ménauts dob dogote Galilea. Atin téménara dob gonone fénadawét “Do Folo Ingéd”. ³²Atin

wén i de étew nuwit ro mangéy dob Jesusey lagéye bokongén brab énda toowén gébéréh fiyo. Atin nongot ro dob Beeney gamaké no inok adi-adi. ³³Mélaw i Jesuse, nuwitén féravy tidéw dob de ménlimud do étew. Tidéw béno, féndiyoén i de dau kémérén dob de kélingo i bokongéne ni, brab fénréen i dau kémér ne brab kénuwahén i dila ne. ³⁴Tidéw béno, léménéngag i Jesuse saréw dob lawayo, brab fénsénarén i kéférénawa nuwe, atin ménbéréh dob beene mano, “Ifata”. (I atag ne “Méungka go.”)

³⁵Sonom béno, i de kélingoén ménadi-adi brab énggégélingo, atin i kébéréh ne ménadi-adi so. Mélaw méngganay ménbéréh fiyo. ³⁶Tidéw béno, i Jesuse sénuguén i de étew diyo bé békén bérélhé roy ni rénigo no dob de ségiyo. Endob amun sénuguén bero bé békén ureté ro, ménlabi na foy kéuret ruwe de. ³⁷Atin i kéluhanay de énggégélingo de toow ro fo ménggaif. Ménbéréh ro maro, “Fiyo wayoy kéluhanay de rigoné no ula-ula. Géfégélingoo noy de bokongén brab gégébérého noy de mow.”

Fénwaléy Jesuse médooy klohe amaén

8 ¹Enda mérugayén tidéw béno, ménlimud man i de médooy étew. Amun méntéy i de amaé ro, ténawag Jesusey de kuyugén mangéy dob Beene, brab ménbéréh dob berowe mano, ²“Méuray i na guwe bé de ménlimud ni do étew, non méntéléwén gétérésangan i kédini ruwe ni dob Begéne, atin béléewe méntéy i amaé ruwe. ³Atin amuk féuleé ku bero mélayahaf ro, mésumba ro dob de lowoh aguwon, non i de dumo bero mérayu i de kétidéw ro.”

⁴Atin ménbéréh i de kuyugén mano, “Ati kéfingé-fingé i kéféamae bé de médooy ni étew dob ni gonon mérayu tidéw dob de lawi?”

⁵Atin i Jesuse fénénginsaa no bero mano, “Firoj timan i fa koman?”
Séménumbul ro maro, “Fitéw timan.”

⁶Tidéw béno, sénuguén i de ménlimud ni do étew bé mésar ro dob fantade. Atin éndotén i fitéwe timan fan brab ménfésalamat dob Tuluse. Tidéw béno, sénbaad-baadén, brab nirayén dob de kuyugén inok saaré ro dob de étew. Atin rénigo roy ni. ⁷Brab wén soy do kloh sédo ro, éndob énda médooy no. Atin ménfésalamatén man dob Tuluse brab bénréhén bé de kuyugén bé saaré ro so. ⁸Atin i kéluhanay de étew, téménantu ro mama taman ménbésor ro. Fot ngibuy kédooy ruwe. ⁹Tidéw béno, i de kuyugén ténimu roy de sama ro brab ménféo i fitéwe timan biton. Tidéw béno, fénule Jesusey de ménlimud ni do étew. ¹⁰Sonom béno, menda dob awange beroy de kuyugén, atin ménangéy ro dob ingéde Dalmanuta.

¹¹Wén i no sébaan fuweh, i de Fariseo ménangéy ro dob Jesuse brab méniséédél ro de. Ménuyot ro téméngkad bé Jesuse, mélaw nongot ro bé rigono no bero sébaan mélégai galbék inok fégito no bero tidéw dob Tuluse. ¹²Endob i Jesuse fénsénarén i kéférénawa nuwe sabaf bé kétete i fidéw ne. Brab ménbéréh mano, “I de begom do étew méuyag béléewe ni,

sedek ongoté kom i mékégaife? Bérhéhé ku begom i toowe, énda rigoné kuy mékégaife inok méngintoow gom.”

¹³Tidéw béno, i Jesuse beroy de kuyugén té nagak roy de étew ni, atin ménda ro man dob awange mifar dob dogote.

¹⁴Atin i de kuyugén énggélifoto roy muwite fan saliyu bé sébaane saén fan dob awange. ¹⁵Atin nuret Jesuse beroy sébaane binuwaya fantag bé de tete adatén do étew. Ménbérhé mano, “Ingata kom brab sénggila gom i fégfééruke fan kay de Fariseo brab datu Herode brab de kuyugén.”

¹⁶Endob i de kuyug Jesus, énda énggésobuto roy ni binuwaya. Marok bénréh Jesusey fantage bé tintuwe fégfééruk fan. Mélaw ménségéno-géno ro maro, “Bénréhén i ni non énda i fa tom.”

¹⁷Endob i Jesuse énggétiga noy kéfégitung ruwe. Mélaw ménbérhé mano, “Sedek ségeno-géno gom fantag bé kékulang i fa tome? Aw énda séna gésobuto kom de? Maak do léngléngén gom. ¹⁸Wén i do moto gom éndob maak do langafén gom. Wén soy do kélingo gom éndob maak do bokongén gom. Aw énggélifoto kom i rénigo guwe? ¹⁹Amun sénbaad-baad guy de limo timan fan dob de limo ngibu étew, firoy gébiton i énggétimuo kome samaén?”

Atin séménumbul ro maro, “Folo bra ruwo.”

²⁰Atin ménénginsa i Jesuse man mano, “Atin amun sénbaad-baad guy de fitew timan fan dob de fot ngibu étew, firoy gébiton i énggétimuo kome samaén?”

Atin séménumbul ro maro, “Fitew.”

²¹Atin ménbérhé man i Jesuse mano, “Aw énda séna fo gésobuto kom de?”

Nuwa Jesusey ségétéwe langafén

²²Wén i no sébaan fuweh, énggumah i Jesuse beroy de kuyugén dob ingéde Betsaida. Atin wén i de étew nuwit ro mangéy dob Beeney ségétéwe langafén lagéy, brab nongot roy gamaké no inok adi-adi. ²³Atin i Jesuse, narakén i ni langafén brab ménusut ro kloh dob no ingéd. Tidéw béno, dénuraa noy de moto no brab té négé noy langaféne ni. Tidéw béno, ménénginsa i Jesuse mano, “Aw wén i gito mo?”

²⁴Atin iling-ililing i lagéye ni brab séménumbul mano, “Hoo, gégitowu do étew éndob maak do kayéw magéw.”

²⁵Tidéw béno, i Jesuse té négé no man férumán i de moto no. Sonom béno, téménéngténg i ni lagéye brab énggégítónén fiyo non ménadi-adinén i de moto no. ²⁶Atin i Jesuse sénuguén mule brab bénréhén mano, “Kago mawét dob nan ingéd.”

I kéunur Pedrowe

²⁷Tidéw béno, méntaus i Jesuse brab de kuyugén mangéy dob de ingéd gédét dob ingéde Sisarea Filipo. Brab amun diyo ro séna dob de lowoh

aguwon, fénénginsaa Jesuse bero mano, “Ati kékéréh i de étew ké ati Begéne?”

²⁸Séménumbul ro maro, “Wén i de émbéréh maro, Juan Bautista go kun. I de dumo maro, Elias go kun. Brab i de dumo maro, Beem kun i énggétahe sénarigoy Tuluse muret.”

²⁹Tidéw bénō, ménénginsa i Jesuse man mano, “Dob begome, ati kékéréh gome fantag bé Begéne?”

I Pedrowe séménumbul mano, “Beemey Kristowe sénugu i Tuluse inok méguléw go dob de étew.”

³⁰Tidéw bénō, bénréh Jesuse bero mano, “Kagom béréhén i ni fantag bé Begéne dob de ségiyo.”

I kéuret Jesuse fantag bé kéléhu ne

³¹Tidéw bénō, i Jesuse féngganayén i kétoro ne bero fantag bé mérigowe dob Beene. Ménbéréh mano, “I Nga i Kéilawane, sani Begéne, médooy rasayé kuwe. Brab i de odoro tom do Judio brab de odoroy de fadi brab de téromo bé kitabe ikaa ro Begén. Atin féléhué ro Begén. Endob dob gétéléwo nuwe gétérésangan tébuleu.” ³²Ménkéntay i kékéréh ne bé ni dob berowe. Mélaw i Pedrowe nuwitén i Jesuse inok ruwo ro saén, atin génléen. ³³Endob séménling i Jesuse brab ténéngténgén i de kuyugén. Atin génléen i Pedrowe mano, “Férayu go dob Begéne, non maak Satanás go. Non énda mégitung go loo bé Tuluse, éndob mégitung go loo bé kéilawane.”

³⁴Tidéw bénō, ténawag Jesusey de ménlimud do étew brab de kuyugén inok mangéy ro dob Beene. Atin ménbéréh dob berowe mano, “I étewe méuyot furay Begén, kailangan diguré noy kaane kétayan inok odoro noy kétayay Tuluse. Tidéw bénō, kailanga no gédayday bé de kérégénon ségiléw bé Begéne, fiyon fo ké féléhuén dob kruse.

³⁵Non i étewe méuyot émféraru bé umul ne, méléhu. Endob i méléhue bé kéfuray ne Begén brab sabaf bé Fiyowe Uret, gédoté noy umule magufusa. ³⁶Ufama, fiyon fo ké i ségétéwe étew gédoté noy kéluhanay éntingayéne dob duniyae ni, énda i atagén buluk méléhu atin mangéy dob emfernowe. ³⁷Enda i tamuk fakay fégéluluk i étewe inok gédoté no saén i umule magufusa. ³⁸Mélaw buluk wén i mémala muret fantag bé kéunur ne Begén brab de kétoro gu dob duniyae ni méféno bé de énda méngintulus béleewe ni, i Begéne, sani Nga i Kéilawane, malané ku so buluk séfuleu moso begey i de télakiy Tuluse. Bé bénō, réméndawu loo bé Abay guwe Tulus.”

9 ¹Atin féntaus Jesusey kékéréh ne mano, “Béréhé ku begom i toowe, wén i do dumo begom énda méléhu ro taman énda gito roy kékéguléw i Tuluse bé de étewén, gégumah darabayay barakat ne.”

Enggiton i kéréndaw Jesuse

² Amun ménifus i néme gétérésangan, nuwit Jesusey Pedrowe brab Santagowe brab Juane, atin ménangéy ro dob uruk i gérotore tuduk, énda i ségiyo étew diyo. Atin i lala ruwe téméngténg bé Jesuse, i falas ne ménfégalin. ³ Brab i kégal ne ménwaléy fute réméndaw. Enda nay étew dob duniyae ni gétumaka noy kégale inok fute loo bé ni. ⁴ Sonom béno, méntefégitoy Eliase brab Moisese brab ménsebéréh ro bé Jesuse. ⁵ Atin i Pedrowe ménbérélh dob Jesuse mano, “Maistéro, toow fo fiyo non dob ni tom. Rémigo gey téléw timan dung-dung. Sébaan i kaame de, sébaan i ka Moisese de, brab sébaan i ka Eliase de.” ⁶ Enda gétiga Pedrowey fiyowe béréhé no non toow ro fo ménggilak.

⁷ Tidéw béno, wén i rawéne ténggalungo no bero. Atin wén i ménbérélh tidéw dob rawéne ni mano, “Been i niy toowe fo kénimuo ku Nga gu. Fégélingo gom.” ⁸ Sonom béno, méniling-ilong i de kuyugén éndob énda i énggito ro saliyu saén bé Jesuse.

⁹ Amun léménudug ro tidéw dob tuduko no, i Jesuse fénégétén i kékérélh ne dob berowe mano, “Kagom génoén dob ségiyowey ni énggito gom taman i Nga i Kéilawane, sani Begéne tébule.”

¹⁰ Atin nodoro roy sugu Jesuse ni éndob séfénginsa ro sébero-bero saén maro, “Ati keey i atag i kékérélh ne mano, ‘Tébuleu?’ ” ¹¹ Atin fénénginsa ro dob Jesuse maro, “Sedek i de téromo bé kitabe émbérélh ro bé kailangan géétah na gégumah i Eliase, atin tidéw béno gégumah i Kristowe kun?”

¹² Atin séménumbul i Jesuse mano, “Toow, géétah gégumah i Eliase inok tafayé noy kéluhanane. Endob sedek ménusat i kékérélh i Tuluse bé i Nga i Kéilawane mérásay médoob brab ikaay de étew? ¹³ Endob béréhé ku begom, i Eliase énggégumahén, éndob i de étew fénrasay ro loo bé kétaya ruwe. Been soy ménbérélhe dob Ménusaté Kékérélh i Tuluse mérigo dob beene.”

Dénédél Jesusey saitane

¹⁴ Atin amun énggumaha ro Jesusey de ségiyo kuyugén, énggito roy dakéle ménlimud do étew diyo so. Atin wén i de téromo bé kitab i de Judio séédél bé de kuyugén. ¹⁵ I kéluhanay de étew do ménlimud, amun énggito roy Jesuse, toow fo ménggaif ro, atin ménsegéta ro mangéy dob Beene atin séngifa ro. ¹⁶ Atin fénénginsaa Jesusey de kuyugén mano, “Ati no funa kom séédél bé do étew diyo?”

¹⁷ Atin wén i ségetéwe lagéy dob de étew ni ménlimud séménumbul mano, “Maistéro, nuwit guy nga guwe lagéy mangéy dob Beeme, non rénahukoy saitane funa no mow. ¹⁸ Atin wén i no ferasayéy saitane, atin tuwaré no dob fantade. Atin rémbew i ba ne, brab kémigét i de kifé no,

brab waléy de témingkog. Nongot gu bé de kuyugém bé feféralréyé roy saitane, éndob énda gagané ro de.”

¹⁹ Atin ménbérél i Jesuse dob berowe mano, “Enda sémarig gom bé Tuluse. Lugoténun sétafik begom. Enda gétiga ku ké ati nay kérugay i kétinkél guwe sétafik begom. Uwit gom diniy ngaa nan.” ²⁰ Mélaw nuwit roy ngae dob Beene.

Atin i saitane ni amun énggito noy Jesuse, ténuwarén i ngae ni dob fantade brab ménkériring, rémbew i ba ne so. ²¹ Atin fénénginsaa Jesusey abay ne mano, “Ménfiroyén i kégédam ne bé ni?”

Atin séménumbul mano, “Tidéw na fo kékélohéen. ²² Brab médoonén gule féléhuéy saitane damén méibér dob aféye brab dob wayége. Mélaw amuk wén i fiyo gérigono mo, fégédawan gey brab tabangén gey.”

²³ Atin séménumbul i Jesuse mano, “Sedek fénginsaa mo Begén ké wén i fiyo gérigono ku? Fakay i kéluhanane dob étewe munur dob Tuluse.”

²⁴ Sonom béno, ménbérél métanug i boh i ngae ni mano, “Munuru, éndob kulang i kéunur guwe. Féégétém i kéunur guwe.”

²⁵ Tidéw béno, énggito Jesusey médoowe do étew ségéta fégédét dob berowe. Mélaw sénuguén i saitane mano, “I beeme saitan émfémow brab émfébokong bé étewe. Sugué ku beem, sut go tidéw dob ni nga, brab kagonén séfuleon del!”

²⁶ Sonom béno, i saitane ni ménkes, brab gétimal i kékékil ne de. Tidéw béno, ménusut i saitane atin i ngae ni maak ménléhuén non éndaén lékutohéen. Mélaw médooy de étew ménbérél ro maro, “Ménléhuén.”

²⁷ Endob i Jesuse génamakén i kémér ne brab fentekén, atin téménindégi ngae ni.

²⁸ Tidéw béno, i Jesuse brab de kuyugén ménule ro. Atin amun ménahur ro dob lawie, brab énda i ségiyo étew diyo, ménénginsa i de kuyugén dob Jesuse maro, “Sedek énda gagané key i émféféraréye bé no saitan?”

²⁹ Séménumbul i Jesuse mano, “I ni klase saitan, énda médédélen bé fiyon udenén fégédédél de, saliyu saén bé kédasale.”

I kéuret Jesuse fantag bé kéléhu ne

³⁰ Tidéw béno, ménagéw ro man tidéw diyo atin téménara ro dob ingéde Galilea. Atin ménika i Jesuse ké gétigay de étew i gono nuwe.

³¹ Non téneroén i de kuyugén mano, “I Nga i Kéilawane, sani Begéne, fékéfo dob de étew moso sani de sébanil Begén. Atin féléhué ro Begén. Endob amuk mífus i télique gétérésangan, tébuleu.”

³² Endob bé béno gai, i de kuyugén énda énggésobuto roy béréhé Jesuse. Atin mágilak ro de ménénginsa ké ati atag ne.

³³ Atin ménauts ro taman énggumah ro dob ingéde Kafernaum. Atin amun énggérahur ro dob lawie diyo, i Jesuse ménénginsa dob de kuyugén mano, “Ati funa kome séédél dob de lowoh aguwon?”

³⁴ Endob mémala ro sémumbul non amun diyo ro séna lowoh aguwon, ménséédél ro ké ati isuwe bero toow fo gérotor. ³⁵ Tidéw béno, i Jesuse ménvars brab ténavagén i de folo bra ruwo gétew do kuyugén mangéy dob Beene. Atin ménbérél dob berowe mano, “Amuk wén i ségétew témayan toow fo gérotor, ay niy fatute rigoné no. Fatut térifantad brab waléy ségétew sugu-suguéy kéluhanay de dumo no.” ³⁶ Tidéw béno, éndot Jesusey ségétewe nga brab féndiyoén dob adafa ruwe. Atin sénfifi Jesuse brab ménbérél dob berowe mano, ³⁷“Fiyon atiy étew témayakuf bé ngae loo bé ni sabaf bé kéunur ne Begén, tayakufé no so Begén. Brab atiy témayakufe Begén, tayakufé no soy Tuluse ménféuwit Begén.”

³⁸ Atin ménbérél i Juane mano, “Maistéro, énggito gey i ségétewe étew démédél do saitan nusarén i dawét me. Endob génlé gey non békén dumo tom.”

³⁹ Bang Jesuse, “Kagom géléléen de. Non amuk wén i rémigo mékégaif usaré noy dawét guwe, énda magadén émbérél tete fantag bé Begéné. ⁴⁰ Non i békéne sébanil betom, dumo tom. ⁴¹ Béréhé ku begom i toowe, buluk wén i témabang begom, fiyon iraya no saén begom ségétabu wayég inémén sabaf begomey de kuyug gu, tintu gédoté noy barase moso.

⁴² “Endob amuk wén i émfésala bé ségétewe loo bé ni nga munur dob Begéné, toow fo géttimal i kékukume de. Mélaw mas na fiyo dob beene ké ibérén dob dogote ikéton dakél batéw i reer ne. ⁴³⁻⁴⁴ Mélaw amuk sébaan bé kémér mey émfésalae beem, kéléngém. Non mas na fiyo ké gédoté moy umule magufusa ségélala saén i kémér me, bé géangéy go dob uleono emferno ké ruwoy kémér me. Non diyo dob emfernowoy de sofot énda méléhu ro, brab i aféye énda méfandaén. ⁴⁵ Atin amuk i funa muwe mésala i sébaane bé sékéy me, kéléngém. ⁴⁶ Non mas na fiyo ké gédoté moy umule magufusa ségélala saén i sékéy me, bé géangéy go dob emfernowo, ruwoy de sékéyém. ⁴⁷ Atin amuk ségélala bé moto muwe funa muwe mésala, lésitém. Non mas fiyo ké géahur go dob kékéulgéw i Tuluse ségélala saén i moto muwe, bé géangéy go dob emfernowo ruwoy de moto mo. ⁴⁸ Non diyo dob emfernowoy de sofot énda méléhu ro, brab i aféye énda méfandaén.

⁴⁹ “Atin i aféye fédiyoén moso dob kéluhanane ségiléw bé timuse fédiyoén dob amaéne.

⁵⁰ “I timuse fiyo, non émféfiyo bé amaéne. Endob buluk mékédan i kétasik ne, éndaén i nonomén brab éndaén géséfule i kétasik ne. Atin ségiléw so bé ni, i de rigoné kom fatut géiring bé timuse inok émféfiyo gom bé de étew. Atin békén fatut sékérit gom.”

Fantag bé késégélake

10 ¹ Tidéw béno, ménagéw i Jesuse tidéw Kafernaum mangéy dob sakuf i dakéle ingéd Judea brab dob difar i wayége Jordan. Atin

diyo médooy de ménangéy sélimud man dob Beene. Atin téneroén bero loo bé adat ne.

² Atin wén i de Fariseo ménangéy dob Jesuse inok téngkadé ro inok gébérého noy békéne katabawan. Mélaw fénénginsaa ro maro, “Aw fakay dob kitab tome ké i lagéye gélaké noy bawag ne?”

³ Atin séménumbul i Jesuse mano, “Ati sugu Moisese dob kitabe fantag bé késégélake?”

⁴ Atin séménumbul i de Fariseo maro, “Ténungkas Moisesey lagéye gémélak bé bawag ne amuk irayén i sulate bé késégélake.”

⁵ Endob ménbéréh i Jesuse dob berowe mano, “I funa Moisese ténungkasén begom séglak non métégas i de atur gom. ⁶ Endob dob féganayo bé kélimbage bé kéilawane, rénigoy Tulusey ségétewe lagéy brab ségétewe libun. ⁷ Atin been i niy funay lagéye tagaké noy abay ne brab idéng ne atin sétafik bé bawag ne. ⁸ Atin i ruwowe ni gétew waléy sébaan. Mélaw éndaén ruwo ro gétew, éndob ségétew saén. ⁹ Mélaw buluy fénwaléy i Tuluse sébaan, énda fakayén séfériyaséy étewe.”

¹⁰ Atin i de kuyug Jesus, amun ménule ro ménahur ro dob lawie bero Jesuse, ménénginsa ro dob Beene fantag bé késégélake. ¹¹ Atin séménumbul mano, “Fiyon atiy lagéye gémélak bé bawag ne atin mawag man ségiyo libun, léménamfa, brab ménsala dob sunguwe bawagén. ¹² Atin amuk wén i libun génlakén i bawag ne atin mawag ségiyo lagéy, léménamfa.”

¹³ Wén i no sébaan fuweh, wén i do étew nuwit roy de nga ro dob Jesuse inok féfiyoné no bero. Endob i de kuyugén génlé roy de étew ni, non marok énda fiyo no ké félugotén i Maistérowe. ¹⁴ Endob amun énggitó noy rénigoy de kuyugén, ménkérit i Jesuse. Atin ménbéréh dob de kuyugén mano, “Fédaya gom i de nga mangéy dob Begéne. Brab kagom alangén bero non i de étew sémarig loo bé késarig i de ni nga, féguléwoy Tuluse bero. ¹⁵ Bérhéhé ku begom i toowe, buluk i késarig i ségétewe békén loo bé késarig i ngae, énda féguléwoy Tuluse de.” ¹⁶ Tidéw béo, sénfifi noy de nga brab ténégé noy de uléw ro féfiyoné no bero.

I kawasawe étew

¹⁷ Atin amun i ro Jesuse méntaus ro magéw, wén i ségétewe lagéy ménfégéta mangéy dob Jesuse brab ménlingkuwéd dob adafa nuwe. Atin ménénginsa mano, “Fiyon Maistéro, ati rigoné kuwe inok gédoté kuy umule magufusa?”

¹⁸ Séménumbul i Jesuse mano, “Sedek fédawété mo Begén fiyo? Enda i ségiyo fiyo saliyu saén bé Tuluse. ¹⁹ Gétiga moy de sugu. Kago méméléhu, kago lémamfa, kago ménakaw, kago uretén i dumo muwe bé békéne toow, kago lémiful, brab fégadata moy boh me brab idéng me.”

²⁰ Séménumbul i lagéye ni mano, “Maistéro, i kéluhanay de ni nodoro ku tidéw féganay klohu de séna.”

²¹ Atin ténéngténg Jesuse brab ménimu de. Atin ménbéréd mano, “Sébaan i kulange beem. Ule go brab fébéléyém i kéluhanay étingayéne kaam atin irayém i kurtae dob de méskinan. Atin mélaw kawasa go moso dob lawayo. Tidéw béno, énggonén, odor go Begén.” ²² Amun énggélingooy étewe niy ni, énggiton ménwaléy tete i fédew ne. Atin ménagéw loo bé nan, non toow fo kawasa.

²³ Tidéw béno, i Jesuse méniling-iling dob de kuyugén brab ménbéréd dob berowe mano, “Toow fo mérégén i kéahur i de kawasa dob kéféguléw i Tuluse.”

²⁴ Atin i de kuyugén ménggaif ro bé ni bénréh Jesuse. Gido loo, féntaus Jesusey kékéréd ne mano, “Do kuyug gu, toow fo mérégén i kéahure dob kéféguléw i Tuluse. ²⁵ Mas na mélémuy kéahur i dakéle ayam dob tosong i darume bé ségétewe étew kawasa dob kéféguléw i Tuluse.”

²⁶ Tidéw béno, ménumanan i kégai i de kuyugén brab ménsébéréd ro maro, “Ati mélaw i de fakay méfukas?”

²⁷ Atin ténéngténg Jesuse bero brab séménumbul mano, “Amuk dob rigonéy kéilawane saén, énda fo fakayén. Endob i Tuluse gérigono no, non fakay gérigonoy Tulusey kéluhanane.”

²⁸ Tidéw béno, ménbéréd i Pedrowe mano, “Ténagak gey i kéluhanane atin ménfuray gey Beem.”

²⁹ Atin bang Jesuse, “Béréhé ku begom i toowe, i ségétewe témagak bé lawi ne, taloo no de dumo no sétiman idéng, taloo no do lukésén, taloo no do ngaén, taloo no fantadén inok ureté noy Fiyowe Uret fantag bé Begéne, ³⁰ gégedot toow na fo médoob bé de ni do gai. Gégedot mératuh takéf bé de lawi, brab dumo no sétiman idéng, brab do lukésén, brab do ngaén, brab do fantadén. Atin saliyu na bé nan, gédoté noy umule magufusa dob de gai moso. Endob amuk dini séna, ferasayén sabaf bé Fiyowe Uret. ³¹ Endob i de médoob do énggétah béléewe ni, do géfuray moso. Atin i de médoob do énggétah béléewe, waléy do géétah moso.”

Nuret Jesusey fantage bé kéléhu ne

³² Atin i Jesuse beroy de kuyugén, amun diyo ro dob aguwone mangéy dob Jerusalem, ménagéw i Jesuse dob métah ruwe. Atin ménggaif i de kuyugén brab ménggilak i de ménfuray bero, non magéw ro mangéy dob Jerusalem. Atin i Jesuse nuwitén man i de folo bra ruwo gétew do kuyugén, inok sébero-bero saén, brab bénréhén beroy ati mérigowe moso dob Beene. ³³ Ménbéréd mano, “Fégélingo gom, mangéy tom Jerusalem. Diyo, i Begéne, sani Nga i Kéilawane, irayu dob de odoroy de fadi brab dob de téromo bé kitabe. Atin kukumé ro Begén méléhu. Tidéw béno, atéé ro Begén dob de békén Judío, diyangkaé

ro Begén, brab duraa ro Begén, brab badasé ro Begén, brab féléhué ro Begén. Endob amuk méifus i télewe gétérésangan, tébuleu.”

I ongoté ro Santiagowe brab Juane

³⁵Tidéw béno, i Santiagowe brab Juane, sani de nga Sebedeo, téningé roy Jesuse. Atin ménbéréh ro maro, “Maistéro, wén i ongoté keye dob Beeme rigoné mo.”

³⁶Atin bang Jesuse, “Ati kétaya kome rigoné ku begom?”

³⁷Atin séménumbul ro maro, “Amuk Beem i méguléwe moso brab mésar go dob saray méguléwe, tungkasém so begey mésar dob sékulo muwe ségétew i fingée dob kuwono muwe brab ségétew i fingée dob biwong me.”

³⁸Endob ménbéréh i Jesuse dob berowe mano, “Enda gétiga kom i ongoté kome. Aw gagané kom i de émfasang mérigo dob Begéne séko? Aw gagané kom i kéléhue loo bé mérigowe dob Begéne?”

³⁹Atin séménumbul ro maro, “Hoo, gagané key.”

Atin bang Jesuse bero, “Toow, mérasayu fo séko toow, atin mérasay gom so. Atin féléhuénu, atin féléhuén gom so. ⁴⁰Endob békén Begén i mémilie bé ati mésare fingé dob kuwono kuwe taloo no fingé dob biwong guwe. I de ni saran kay de étew fénémili i Abay guwe Tulus mésar diyo.”

⁴¹Atin i de folo gétew dumo do kuyugén, amun énggelingoo roy ni ongoté ro Santiagowe brab Juane, ménkérít ro bero. ⁴²Mélaw ténawag Jesusey kéluhana ruwe inok sélimud ro, brab ménbéréh dob berowe mano, “Gétiga kom i de étew kun odoron, wén i atura ro bé de étew brab méguléwon bero. ⁴³Endob békén loo bé niy begome. Amuk wén i ségétew begom méuyot waléy odoron, fatut waléy sugu-suguéy kéluhanay de dumo no. ⁴⁴Atin amuk wén i ségétew begom méuyot waléy gérotor, fatut térifantad. ⁴⁵Non fiyon i Begéne sani Nga i Kéilawane, énda ménangéyu dini inok wén i do sugu-sugué ku. Yamula ménangéyu dob duniyae ni inok waléy sugu-suguén brab inok iray guy umul guwe fégéfukas bé médoowe étew dob de sala ro.”

Nuwa Jesusey langaféne

⁴⁶Atin énggumah i ro Jesuse dob ingéde Jeriko. Atin amun méntaus ro ménagéw tidéw diyo beroy dakéle do ménlimud étew, ténaraa roy ségétewe étew langafén ménasar dob doror i aguwone mongot limus. I dawét ne Bartimeo, nga Timeo. ⁴⁷Atin amun énggelingoo noy Been i Jesuse tidéw Nasaret témara, téménawag métanug mano, “Jesus, séfu Datu Dabid, fégédaw go begén!”

⁴⁸Médooy de étew génlé ro maro, “Kago selekén!” Endob taus so mékes toow na fo métanug mano, “Séfu Datu Dabid, fégédaw go begén!”

⁴⁹Atin téménrén i Jesuse brab ménbéréh mano, “Tawag gom i étéwa nan.”

Mélaw ménbéréh ro dob langaféne ni maro, “Oror go! Tindég go non tawagé Jesuse beem.”

⁵⁰ Mélaw kénda noy géruwowe lafin bé kégal ne brab ménagayas téménindég brab ménagéw mangéy dob Jesuse.

⁵¹ Atin fénénginsaa Jesuse mano, “Ati kétaya muwe rigoné ku dob beeme?”

Séménumbul i langaféne ni mano, “Maistéro, méuyotu ké gégitowu damén.”

⁵² Atin ménbéréh i Jesus mano, “I kéfeginugut mey funa muwe ménadi-adi. Na, ule gon.” Sonom béo, énggérito néni lagéye ni, atin ménfuray bé Jesuse dob aguwone.

I kéahur Jesuse dob Jerusalem

11 ¹ Amun i Jesuse brab de kuyugén gédét ron dob ingéde Jerusalem, énggégumah ro dob sébaane tuduk féndawét Olibo, gédét dob de ingéd féndawét Betfage brab Betania. Atin sénugu Jesuse ruwowe gétew bé de kuyugén inok métah ro magéw. ² Atin ménbéréh dob berowe mano, “Taus gom agéw mangéy dob nan ingéd gésaréwo kom. Buluk gérumah gom diyo, gito gom i native kuda nikét, énda sénay énggékuda de. Ukoh gom brab uwit gom dini. ³ Buluk wén i ménginsa dob begome, ‘Sedek rigoné kom i ni?’ béréh gom de, ‘Kailangay Kadna tome, atin féséfuleén so magad.’”

⁴ Mélaw ménagéw ro brab énggito roy native ni kuda dob no ingéd, diyo dob aguwone nikét dob bengaway sébaane lawi. Amun nukoh ron, ⁵ i de étew diyo ménenginsa ro maro, “Sedek ukohé kom i kudaa nan?”

⁶ Atin séménumbul ro loo bé kékéréh Jesuse de bero. Mélaw fénagéw i de étew bero muwit bé native ni kuda. ⁷ Atin nuwit ro mangéy dob Jesuse. Brab namféno ro bé de kégal ro. Atin kénudaa Jesuse. ⁸ Atin médooy de étew bénékah roy de dumo bé de kégal ro dob aguwo Jesuse fégito roy kékásana ruwe de. Atin wén soy de étew bénékah roy de daun kénléng ro dob de kayéw dob de safad. ⁹ Atin i de ménkah do étew brab de ménfuray, ménkes ro maro, “Dayéwé tom i Tuluse! Féfiyonéy Tuluse damén i ni étew gérumah tidéw dob Kadnane. ¹⁰ Féfiyonéy Tuluse damén i kékéguléw ne émfétaus bé kékéguléw i séfu tome Datu Dabid. Dayéwé tom i Tuluse!”

¹¹ Atin ménataus i ro Jesuse mangéy Jerusalem. Amun énggumah ro diyo, ménangéy i Jesuse dob lawi i Tuluse. Atin amun énggilidén ténéngténgén i kéluhanay de languntaman diyo, ménuts atin ménsefule mangéy Betania beroy de folo bra ruwo gétew kuyugén, non témégénén.

¹² Atin dob sébaane de fuweh, bé lala ruwe magéw tidéw Betania mangéy Jerusalem, méláyaf i Jesuse. ¹³ Atin énggékulaya no tidéw méravy i kayéwe féndawét igos mérampung i dau nuwe. Mélaw nangéyén

lénangu kinok wén i onokén. Endob amun énggumah, énda i ségiyo énggito no saliyu bé de dau no, non békén séna gaiy no do kayéw igos mégonok. ¹⁴ Atin ménbérél dob ni kayéw mano, “Tidéw béeleewe ni, éndaén i géama bé onok me féruman.” Atin énggelingoo de kuyugén.

Dénédél Jesusey de démagang dob lawi i Tuluse

¹⁵ Amun énggumah i ro Jesuse dob Jerusalem, méntaus so dob lawi i Tuluse. Amun ménahur, dénédlén i de étew démagang brab do méléy-méléy diyo. Atin bénluweén i de ahayay de lémuluk kurta brab ténuwarén i de saray de émfébélén do fégétulak do marafati. ¹⁶ Atin énda fédayaé no de ké wén i étew muwit do éntingayén témara dob fésawayaw lawi i Tuluse ni. ¹⁷ Atin téneroén i de étew mano, “Ménsulat dob Ménsulate Kébérél i Tuluse mano, ‘I lawi guwe, fédawétén lawi gonon démasal kay kéluhanay de étew.’ Endob fénwaléy gom lawi i de ménakaw.”

¹⁸ Atin i de odoroy de fadi brab de téromo bé kitabe énggelingoo roy ni. Mélaw sénalikél roy fiyowe kéféléhu ro de. Non ménggilak ro bé Jesuse non ménggaif i de ni médoor do étew bé kétoro ne.

¹⁹ Atin amun sémingkufén, méntékédan i Jesuse brab de kuyugén tidéw dob Jerusalem.

²⁰ Atin bé géfuwéne de, bé lala ruwe magéw dob aguwone, énggito roy kayéwo no féndawét igos ménggangu taman dob de darirén. ²¹ Atin i Pedrowe, énggétédémo noy ati ménrigowe. Mélaw ménbérél dob Jesuse mano, “Maistéro, téngténgém. I kayéwo diyo fénémulaém, ménggangu.”

²² Atin bang Jesuse, “Sarig gom dob Tuluse. ²³ Béréhé ku begom i toowe, fiyon udenén méréhon bé tuduke ni mano, ‘Angéy go dob dogote’, atin énda ruwo-ruwoy fédéw ne, éndob méginugut bé kékérél ne méagéwon, méagéwon ba. ²⁴ Mélaw béréhé ku begom, fiyon udenén ongoté kom ké démasal gom, féginugut gom bé gédoté kom, atin gédoté kom ba. ²⁵ Atin amuk démasal gom, fésagada kom i étewe ménsala dob begome, inok i Abay gome Tulus fésagada no soy de sala gom. ²⁶ Non amuk énda fésagada kom i de dumo gom, i Abay gome dob lawayo, énda so mon fésagada no begom bé de sala gom.”

²⁷ Atin ménséfule man i ro Jesuse dob Jerusalem. Atin amun diyo séménugud i Jesuse dob lawi i Tuluse, i de odoroy de fadi brab de téromo bé kitabe brab de odoroy de Judio, ménfégédét ro dob Jesuse. ²⁸ Atin fénénginsaa ro maro, “Béréhém begey ké ati atura muwe rémigo bé de ni? Ati méniraye Beem kuwagib?”

²⁹ Sénumbulo Jesuse bero mano, “Sémuliú ménginsa dob begome. Amuk sénumbul gom, sénumbul so ké ati tidéwoy kuwagib guwe rémigo bé de ni. ³⁰ Béréh gom Begén, ati séménugue bé Juane inok mautis, Tulus loo ké étew saén?”

³¹ Atin i de odoroy de Judio séédél ro maro, “Amuk bérhé tom ‘Tidéw dob Tuluse’, fénginsaa no betom ké sedek énda fénéngintoowo tom i Juane. ³² Endob buluk bérhé tom, ‘Tidéw dob étew’, mékérit i de étew betom.” Non mégilak ro bé de étew non féngintoowy de étew i Juane sénarigoy Tuluse muret bé kékérén ne. ³³ Mélaw séménumbul ro dob Jesuse maro, “Enda gétiga key de.”

Mélaw bénréh Jesuse mano, “Enda so bérhé ku de begom ké ati ménirayane Begén kuwagib rémigo bé de ni rigoné ku.”

I binuwayae fantag bé de tete témalima

12

¹ Tidéw béno, téménoro man i Jesuse binuwaya. Ménbérhé mano, “Wén i ségétéwe étew wén i safadén nohoko no do ubas. Atin bénunsudo no kayéw fénggélangkatén de lémiwét, brab kéménalut fédéngon bé fégékérése bé wayég i de onokén. Brab réménigo tambala. Tidéw béno, féntalimaén bé de ségiyo étew, brab ménagéw mangéy dob mérayue ingéd. ² Amun énggégumah i gayi kékétéwe de, séménugu ségétew sugu-sugué no inok gédoté noy kaane de baad bé de onokén. ³ Endob i de témalima bé ni safad génamak ro brab lénubag roy ni sugu-suguén. Brab fénule ro énda i suwaréw nuwitén. ⁴ Tidéw béno, i gefee bé safade sénugu non man i géruwowe sugu-sugué no. Endob i de témalima bé safad ne, fénali roy uléw ne brab fénémala ro. ⁵ Tidéw béno, i gefee sénugu non man i gétéléwe sugué no. Endob i de témalima bé safad ne, fénléhu ro. Loo so bé noy kérigo ruwe bé de médo do sugu-suguéy gefee bé safade ni. Wén i do lénubag ro de, wén soy dob fénléhu ro de. ⁶ Tidéw béno, i gefee bé ni safad, wén nay ségétéwe sénuguén, sani kénimuo nuwe ngaén lagéy. Mélaw sénuguén mangéy dob berowe non fénggitungén mano, ‘Fégadata roy nga guwe.’ ⁷ Endob amun énggitoy de témalima bé safad ne, ménsembérhé-bérhé ro maro, ‘Been i niy nga i gefee bé ni safad. Féléhu tom inok gékatom i ni safad.’ ⁸ Mélaw génamak ro atin fénléhu ro, brab nibér ro dob liyuy safade ni.”

⁹ Atin féntaus Jesusey kékérén ne mano, “Ati rigonéy gefee bé safade ni dob de ni téménalima bé safad ne? Angéyé no féléhuén bero. Brab irayén man dob ségiyowe témalima. ¹⁰ Aw énggébasana kom i ni Ménsumlat Kékérén i Tuluse mano, ‘I batéwe nikaay de réménigo bé lawie, been i ménwaléye toow na fo balilaga fiyo batéw. ¹¹ I ni rénígoy Kadnane ula-ula, atin mégaif tom de.’”

¹² Atin i de odoroy de Judio, ténulama ro kénéfo i Jesuse non énggébela dob berowey ni binuwaya. Endob énda fakayén non mégilak ro bé de médo do étew. Mélaw ténagak roy Jesuse brab ménagéw ro.

Fantag bé buwise

¹³ Tidéw béno, i de odoroy de Judio sénugu roy de Fariseo brab de kuyug Herod mangéy dob Jesuse inok téngkadé ro émbérhé bé bekéne katabuwan.

¹⁴ Mélaw ménangéy ro dob Jesuse ménginsa maro, “Maistéro, gétiga key toow i kétoro me. Brab métintu go, énda i isu ramigo mo bé de étew. Endob toroé moy toowe fantag bé kétayay Tuluse toow. Mélaw bérélém begey, aw fatut ba mayad gey buwis dob Sesare sani datue dob Roma taloo no énda?”

¹⁵ Endob énggétiga Jesusey akar ruwe, mélaw bénréhén bero mano, “Sedek férudio kom Begén? Uwitonus sélafin félatah, brab féténgténg gom Begén.”

¹⁶ Amun niraya ro de, ménenginsa i Jesuse mano, “Ati gefee dawét brab falas gito gom dob nan?”

Séménumbul ro maro, “Ka Sesar.”

¹⁷ Tidéw béno, bénréh Jesuse mano, “Iray gom dob Sesarey ka Sesare. Atin iray gom dob Tulusey kay Tuluse.” Atin toow ro fo ménggaif bé kékérélém Jesuse ni.

Fantag bé kétébulee

¹⁸ Atin wén i de Saduseo ménangéy ro dob Jesuse. I de Saduseo do étew énda méngintoow ro bé kétébule i Tuluse bé de étew moso. ¹⁹ Atin ménenginsa ro dob Jesuse maro, “Maistéro, sénulat Moisese betom i kukumane bé buluk i ofo i étewe ménléhu, brab énggénélelo noy bawag ne, énda i nga ro, fatut bawagéy tuwaréy ne inok wén i séfu i ni étew bé tuwaréy ne. ²⁰ Ufama, wén i fitéw gétew sétuwaréy falan lagéy. Brab i ofoe de ménawag. Tidéw béno, ménléhu énda i nga ro. ²¹ Tidéw béno, i géruwowe de bénawagén soy bawage fénled i ofo ne. Atin ménléhu so énda soy nga ro. Ségiléw soy ménrigowe dob gétéléwo ruwe. ²² Atin ségiléw so dob kéluhana ruwe. I fitéwo no gétew énggébawaga roy ni libun éndob ménléhu ro kéluhanan énda i nga ro. Tidéw béno, ménléhu soy ni libun. ²³ Mélaw bé gaiy kétébule i kéluhanay de étew moso, ati isuwe bawag i ni libun bé ni fitéw gétew sétiman idéng? Non énggébawaga no bero kéluhanan bé méuyag ro de séna?”

²⁴ Séménumbul i Jesuse mano, “Toow fo békén katabawan i kétéfítung goma nan, non énda gétiga kom i de Ménsulat Kébérélém i Tuluse taloo noy barakat ne. ²⁵ Non amuk tébule i de étew, éndaén sébawag ro. Non ségiléw ro bé de télaki diyo dob lawayo. ²⁶ Atin i fantage bé kétébulee, aw énda énggébasana kom de dob librowe sénulat Moisese fantag bé mérinoré kayéw? Non diyo ménsulat i bénréh i Tuluse dob Moisese mano, ‘Begén i Tuluse féngadafé Abrahame, Isake, brab Jakobe.’ ²⁷ I atag i ni, i Tuluse féngadafé de méuyag étew, békén do ménléhu. Mélaw tintu békén katabawan i kétéfítung gome.”

I toowe na fo gérotor sugu

²⁸ Diyo soy ségétéwe téromo bé kitabe brab énggélingoo noy de ni do étew séédél bé Jesuse. Atin amun énggétiga noy toow fo fiyoy késumbulo Jesuse

bé de Saduseo, ménfégédét dob Jesuse brab ménénginsa mano, “Ati isuwe bé de sugu dob kitabe toow na fo mélaga?”

²⁹ Atin séménumbul i Jesuse mano, “Ay niy toowe na fo mélaga sugu: ‘Fégélingo gom do Judio, i Kadna kome Tulus sébaan saén. ³⁰ Féimu go bé Kadnane Tulusém bé kéluhanay fédew me, brab bé kéluhanay kamatu me, brab bé kéluhanay itunga muwe, brab bé kéluhanay bagér me.’

³¹ Atin ay niy géruwowe sugu: ‘Féimu go bé de dumo mo ringon so bé kéimu me bé kaame lowoh.’ Enda i ségiyo sugu gérotor na bé de ni.”

³² Atin ménbérén i témoree bé kitabe dob Jesuse mano, “Fiyoy kékérén ma nan, Maistéro. Toow i no bénréhém sébaan saén i Tuluse brab énda i ségiyo saliyu bé Beene. ³³ Atin fatut féimu tom bé Tuluse bé kéluhanay fédew tome, brab bé kéluhanay itunga tome, brab bé kéluhanay bagér tome, brab fatut féimu tom bé de dumo tom ringon so bé kéimu tome bé de katome lowoh. Toow na mélaga i de ni ruwo sugu bé kéluhanay ténuwége ténuvak do ayam brab do nirayén dob Tuluse.”

³⁴ Atin énggétiga Jesusey fiyoy késumbul i ni lagéy. Mélaw ménbérén dob ni lagéy mano, “Magad saén i kéféguléwoy Tuluse beem.” Atin tidew béno, énda nay ségétew ménbaraw ménénginsa dob Beene.

³⁵ Amun témenoro i Jesuse dob lawi i Tuluse, ménénginsa mano, “Ati kéfanu-fanu nuwe ké bérén i de témoi bé kitabey Kristowe séfu Dabid saén? ³⁶ Non fénbérén i Rémodor i Tuluse bé Dabide mano, ‘I Kadnane ménbérén dob Kadna kuwe, sar go dob kuwono kuwe, taman témanbanu bé de sébanil Beem.’” ³⁷ Atin fentaus Jesusey kékérén ne mano, “Amuk fénadawét Dabidey Kristowe ‘Kadnan’, ati kéfanu-fanu Kristowe séfu Dabide saén?”

Atin i dakéle ménlimud do étew ménoror ro mégélingo bé kétoro Jesuse. ³⁸ Atin téneroén bero mano, “Ingat gom bé de témoi bé kitabe non méuyot ro sugud-sugud bé de toow fo fiyo kégal ro, brab méuyot ro fégadatan ségifaén dob de fadiyan. ³⁹ Brab méuyot ro mésar dob de fiyo saran dob de lawi fénadafan brab dob de kanduli. ⁴⁰ Endob lafisé roy de libun baléw inok afasé roy de lawi ro. Tidew béno, démasal ro bé de métah kédasal dob téngaangay de étew non marok médirung i de ni tete rigoné ro. Endob i ni do étew toow na fo gétimal ké mékukum ro moso.”

⁴¹ Wén i no sébaan fuweh, amun diyo i Jesuse dob lawi i Tuluse, ménasar gédét dob ahurone kurta. Atin téneqténgén i de étew lémawu bé kurta ruwe. Médooy de kawasa do étew léménawu ro médooy kurta. ⁴² Tidew béno, énggito no soy ségétewe libun baléw méskinan. Enggumah i ni baléw brab méniray saén ruwo lafin furo kurta tintu énda balilagaén. ⁴³ Atin i Jesuse ténavagén i de kuyugén mangéy dob Beene, brab mano bero, “Béréhé ku begom i toowe, i ni méskinan libun baléw maak mas na médooy niray ne bé kéluhanay de dumo étew kawasa. ⁴⁴ Non i de ni étew do kawasa, méniray ro saén kloh tidew dob de médooy kurta ro. Endob i ni baléw énteyén i kéluhanay kurta ne fégáfaguyagén.”

Fantag bé tamfadaye duniyae

13 ¹I lala Jesuse mésut tidéw dob lawi i Tuluse, i ségétéwe bé de kuyugén ménbérél dob Beene mano, “Téngtégém, Maistéro. Toow fo dakél i de ni batéw fénggérigo bé de lawi i Tuluse ni, mélaw toow fo fiyoy de ni lawi.”

²Endob ménbérél i Jesuse mano, “I de dakél ni do lawi, gégumah mosoy gaiwe i kéluhanane gito gom mébinasa. Brab fiyon i de batéw fénggérigo de, émbéragar ro.”

³Atin amun diyo i ro Jesuse ménsar dob Tuduke Olibo, dob gatagay lawi i Tuluse, fénénginsaa ro Pedrowe brab Santiagowe brab Juane brab Andrese sébero-bero saén. ⁴Ménénginsa ro dob Jesuse maro, “Kédiron mérigoy de ni, sani kébinasay lawi i Tuluse? Brab ati fégélonone de bé ni gai ké gédétén gégumah?”

⁵Atin séménumbul i Jesuse mano, “Ingat gom inok énda i méfagakaran begom. ⁶Non médooy mosoy de étew gégumah usaré roy dawét guwe, brab émbérél ro maro, ‘Begéney Kristowe’. Atin médooy de géfagakara ro. ⁷Atin kagom mégilak ké gélingoo kom i de sétiboh brab fantag bé de gira. I kéluhanay de ni mérigo, éndob békén sénay niy tamana nuwe.

⁸I de ségiyo ingéd sétiboh ro bé de ségiyo ingéd. Brab i de ségiyo sakuf fangangaturan sétiboh ro bé de ségiyo. Atin wén mosoy do luba dob de médooy do gonon, brab lénggob. I de ni mérigo ségiléw bé ségétéwe obor libun kéararan non been sénay niy féganayay rasay ne.

⁹“Endob ingat gom, non kéfoén gom moso brab uwitén gom dob adafay de kémukum. Atin mébadas gom moso dob de lawi féngadafan kay de Judio. Brab uwitén gom dob adafay de datu brab do méguléw inok kukumén gom sabaf begom i do kuyug gu. Endob been i niy gaiy kéuret gome bé Fiyowe Uret dob berowe. ¹⁰Atin bé énda séna gégumah i tamanane, i Fiyowe Uret kailangan ureténa métah dob kéluhanay ingéde. ¹¹Atin amuk kéfoé ro begom brab uwitén gom dob adafay kémukume, kagom émbuku fantag bé atiy késumbul gome. Non amuk diyo gomén, bérél gom saén i atiy iraye dob begome fatut késumbul gom. Non i kékérél gome bé béno, békén tidéw dob de itunga kom. Yamula fébérél i Rémogor i Tuluse begom. ¹²Atin bé béno, wén i do étew iray roy de dumo ro sétiman idéng inok féléhuén. Loo so bé niy rigonéy de lukés, féléhuéroy de nga ro. Loo soy de nga féléhuéroy de lukés ro. ¹³Atin i kéluhanay de étew mérarék begom sabaf bé kéunur gome Begén, éndob ati fédidaye munur taman dob tamfadane, beeny méfukase.

¹⁴“Atin gito gom i ‘Mékésirang-sirange Surga’ diyo dob mékétéfuwe gonon békén fatut gonon. (Fégésobut i masawe.) Amuk mérigoy ni, i de étew bati dob Judea, fatut ro méraréy dob de tuduk. ¹⁵Atin bé béno, i étewe diyoén dob liyuy lawi ne, éndaén fatutén séminggula bé urase

mahur dob lawie inok uwité noy de tamukén. ¹⁶ Atin bé béno, i étewe diyo dob safad ne, éndaén fatutén mule inok angéyé noy géruiwowe lafin kégalén. ¹⁷ Bé do no do gai, toow fo mékégédaw-gédaw i de libun obor brab de libun mériton. ¹⁸ Dasala kom inok énda mérigo de ni dob gaiwe mélégénéy. ¹⁹ Non bé no do gai, toow na fo gétimal i kérasay i de étew, sani kérasaye énda sénay énggagéw de tidéw féganay bé kélémbag i Tuluse bé duniiae taman so béleewe ni. Atin énda na moso i gériféng de. ²⁰ Atin amuk énda fefokoé Kadnaney do no gai, énda nay kéilawan méuyag. Endob sabaf bé de fénémilién do étewén, fefokoé noy do no gai.

²¹ “Atin amuk wén i émbéréh dob begome mano, ‘Téngténg gom, ay niy Kristowe!’ look ‘Téngténg gom, ay diyoo!’ kagom unuron de. ²² Non wén i do tugién do étew gégumah brab béréhé ro bero kun i Kristowe taloo no sarigoy Tuluse. Atin gérigo ro do mékégaif brab do tanda, inok fégakara roy de fénémili i Tuluse do étew ké fakay. ²³ Mélaw ingat gom. Bénréh gun begom i kéluhanay de ni bé énda séna mérigo no.

²⁴ “Bé do no gai moso, amuk gilid i dakéle ni késélibug, waléy délémon i térsange brab éndaén réméndaw i térsang kélungonone. ²⁵ Atin i de gitoon médagdag ro tidéw dob lawayo, brab i de étingayén dob lawayo mékuyung. ²⁶ Tidéw béno, i Nga i Kéilawane, sani Begéne, tefégitouw tidéw dob lawayo dob de rawén toow fo barakatan brab réméndaw. ²⁷ Atin sugué kuy de télaki gu mangéy dob séngae gonon dob duniiae ni. Atin séfélímudé kuy de fénémili i Tuluse do étew tidéw dob tamanay fantade brab dob lawayo.”

²⁸ Tidéw béno, nuret Jesuse beroy ni binuwaya mano, “Fégitung gom i de kayéw. Dini dob betome ni, sonom lémbud i de fongoy kayéwe brab émféantu daun, gétiga kom gédétén i basa médufe. ²⁹ Loo so bé ni amuk gito gom i de ni bénréh gu bé gétahe mérigo, gétiga kom gédétén i késéfule guwe. ³⁰ Béréhé ku begom i toowe, i de étew méuyag béri, énda méléhu ro taman mérigo de ni. ³¹ I lawaye brab fantade méalfa, éndob i kékéréh guwe énda méalfaén.

³² “Endob i gaiwe mérigo de ni, énda i gétigan de, fiyon foy de télaki dob lawayo, fiyon i Begéne, sani Nga i Tuluse. I Abaye Tulus saén i gétigane de. ³³ Ingat gom, brab tulik gom, non énda gétiga kom de ké kédiron i kégumah i ni gai. ³⁴ Ségiléw bé ségétéwe ménagéw tidéw dob lawi ne mangéy dob ségiyowe ingéd. Atin sénarigén i lawi ne dob de sugu-sugué no. Mélaw wén i galbék fatut rigonéy de sugu-sugué no. Atin bénréhén dob sugu-sugué nuwe dob bengawane mantay brab békén fidong. ³⁵ Mélaw ingat gom, non énda gétiga kom i gaiwe séfuleu, ségiléw bé de sugu-suguén énda gétiga roy gaiwe séfule i gefee bé lawie, ké témégén, look kérara kélungonon, look ukoro i de manok, look géfuwén. ³⁶ Kinok métékow i kégumah ne atin gito no bero fidong. Enda fatut mérigo no dob begome. ³⁷ Mélaw béréhé ku begom brab dob de kéluhanay de étew so: Tulik gom.”

14 ¹Bé beno gai, ruwo séden gétérésangan i méifuse tidew beno gégumah i kékanduli i de Judio féndawét “Témara”. Bé no kanduli, amaé roy fane énda i fénggfééruk de. Atin i de odoroy de fadi brab de téromo bé kitabe sélédé roy ati kékéfo ruwe bé Jesuse brab féléhué ro. Endob méuyot ro de rémigo ké énda gétigay de ségiyo de étew. ²Ménsébéréh ro maro, “Enda fakayén ké rigoné tom ké kanduli tom, kinok mésélibug i de étew.”

³Wén i no sébaan fuweh, diyo i Jesuse dob Betania dob lawi i ségétéwe lagéy féndawét Simon. I ni lagéy ménadi-adi bé déruune fémute. Amun mama ro, énggumah i ségétéwe libun nuvitén i fiyowe katiya ménfeno bé mamute nor toow fo balilaga féndawét nardo. Atin ménfégédét dob Jesuse brab rénébeén i reer i katiyae ni atin lénukaén i nore ni dob uléw Jesuse. ⁴Atin i de dumo bé de étew diyo, amun énggitó roy ni, ménkérít ro brab ménsébéréh ro maro, “Sedek séninggula saén i nan fégfééamut? ⁵Non amuk fénbéléy damén i nan nor, wén i médoor kurta gédotén de brab iray damén dob de méskinan.” Atin nugar roy ni libun.

⁶Endob ménbéréh i Jesuse mano, “Fédaya gom i ni libun. Sedek dowoyé kom? Toow fo fiyoy ni rénigo no dob Begéne. ⁷Démoyun gom gésébegom i de méskinan, atin fakay gom téocabang bero dob gaiwe kétaya kom. Endob i Begéne, éndaén mérugayu bati dini dob begome. ⁸I ni libun, rénigo noy gagané nuwe. Lénulawa no fégfééamut i lowoh guwe inok métafayan i kélébénge Begén. ⁹Bérhéhé ku begom i toowe, fiyon udenén gonon dob duniyae uretén i Fiyowe Uret, i rénigo nuwe dob Begéne méuret so funa no métédém.”

I rénigo Judase

¹⁰Tidew beno, i Judas Iskariote, sani ségétéwe bé de folo bra ruwo kuyug Jesuse, ménangéy dob de odoroy de fadi inok sébéréh bero bé ati kékéfoe bé Jesuse dob berowe. ¹¹Atin toow ro de fo ménoror, brab fénasada ro iraya ro kurta i Judase. Mélaw sénlédén i fiyowe gai kékéfo de.

¹²Dob sunguwe gai bé kandulie féndawét “Témara” taloo no “Kéama bé Fane Enda i Fénggfééruk de”, bé beno gai fatut ro sémumbali nati bili-bili fégékanduli ro. Mélaw i de kuyugén ménénginsa ro dob Jesuse maro, “Hon i gonone kétaya mo tafayé key i amaé muwe bé ni kanduli ‘Témara?’”

¹³Tidew beno, sénugu Jesusey ruwowe bé de kuyugén mano, “Agéw gom mangéy Jerusalem. Diyo wén i ségétéwe lagéy ménouwit ségébinangga wayég gébalaka no begom. Furay gom de. ¹⁴Atin amuk mahur dob lawie, ahur gom so. Brab bérhéhé gom dob gefee bé lawie makom, ‘Méuyot i Maistérowe de ké gétiga no hon i sibéye de gono no mama beroy de kuyugén bé ni kékanduli.’ ¹⁵Atin i gefee bé lawie toroé

no begom i dakéle sibéy wén i do ténafad do kasangkafan dob rotor i lawie. Diyo tafay gom i kéluhanay amaé tome.”

¹⁶ Tidéw béno, ménagéw i de ruwo ni gétew do kuyugén brab ménahur ro dob Jerusalem. Atin énggito roy kéluhanane loo bé kékéréh Jesuse de bero. Tidéw béno, ténafad roy de amaé ro kay kandulie “Témara”.

¹⁷ Atin amun sémingkufén, énggumah diyo i Jesuse beroy de folo bra ruwo gétew kuyugén. ¹⁸ Amun ménasar ro mama dob doror i ahayane, ménbéréh i Jesuse mano, “Béréhé ku begom i toowe, wén sékoy ségétew begom émfékéfo Begén, sani ségétewé sérénagan Begén mama.”

¹⁹ Tidéw béno, ménwaléy tete i fédew i de kuyugén. Atin ménstundug-tundug i séngae ségétew bero ménenginsa dob Jesuse mano, “Békén begén, hay?”

²⁰ Atin sénumbulo Jesuse bero mano, “I beene ségétew begom do folo bra ruwo gétew kuyug gu, sani ségétewé begom sérénagan Begén mérém bé fa nuwe dob biléwe. ²¹ I Begéne, sani Nga i Kéilawane, méléhuu loo bé Ménsulate Kékéréh i Tuluse fantag bé Begéne. Endob toow fo mékégédaw-gédaw i étewé ni émfékéfo Begén. I nan étew, mas na fiyo dob beene ké énda damén ménmahén, non mékukum fo toow.”

I kéama i Kadnane

²² Atin bé lala ruwe mama, éndot Jesusey fane, brab ménfésalamat dob Tuluse, brab sénkébeng-kékengén, brab sénaarén dob de kuyugén. Atin ménbéréh mano, “Ay niy fane. Been i lowoh guwe. Ama gom.”

²³ Tidéw béno, éndotén i tabue, brab ménfésalamat dob Tuluse, brab nirayén bero. Atin kéluhana ro méniném de. ²⁴ Atin ménbéréh i Jesuse mano, “I ni arak, been i dara guwe réménanas sabaf bé médoowe étew. Been i niy tanda i fasad i Tuluse bé de étewén. ²⁵ Béréhé ku begom i toowe, éndaén minému arak taman géinému mantu arak dob gaiwe féguléwoy Tulusey de étewén.”

²⁶ Tidéw béno, kéménanta ro sébaan kanta démayéw bé Tuluse. Tidéw béno, ménagéw ro mangéy dob tuduke Olibo.

Nuret Jesusey fantage bé Pedrowe

²⁷ Atin bang Jesuse dob de kuyugén, “I kéluhana kome méraréy séko tagaké kom Begén. Non wén i Ménsulate Kékéréh i Tuluse mano, ‘Féléhué kuy témalimae bé de bili-bili, atin mélaw mésébéragar i de bili-bili.’ ”

²⁸ Atin féntaus Jesusey kékéréh ne mano, “Endob amuk tébuleu, métahu magéw begom mangéy dob Galilea.”

²⁹ Atin bang Pedrowe, “Enda fo tagaké ku Beem, fiyon fo ké i kéluhanay de ségiyo kuyugém méraréy ro tagaké ro Beem.”

³⁰ Endob ménbéréh i Jesuse dob Pedrowe mano, “Béréhé ku beem i toowe, bé ni kélungonon, bé énda séna ukoro i férufete ruwo gule, dirungé mo Begén télén gule bé énda gélolo mo Begén.”

³¹ Atin ménbérél man i Pedrowe toow na fo méégét mano, “Fiyon fo ké géodoru Beem méléhu, énda dirungé ku Beem.” Atin i kéluhanay de dumo no do kuyug ménbérél loo bé nan dob Jesuse.

³² Tidéw béo, ménagéw i ro Jesuse dob gonone féndawét Getsemani. Amun énggumah ro, ménbérél i Jesuse dob de kuyugén mano, “Sar gom dob ni bé lala guwe démasal.” ³³ Tidéw béo, nuwit Jesusey ro Pedrowe, Santiagowe, brab Juane, atin méntaus ro magéw kloh. Atin ménwaléy toow fo tete i fédew Jesuse brab ménbuku. ³⁴ Atin ménbérél dob de ni télew kuyugén mano, “I fédew guwe toow fo ménbuku taman toow fo démawét. Bati gom dini, brab tulik gom.”

³⁵ Tidéw béo, ménférayu dob berowe gumaha témabar. Atin méntéléngkéb dob fantade brab déménasal mongot bé amuk fakay saén, énda damén mérigoj ni kérasay dob Beene. ³⁶ Déménasal mano, “Abay, fakay gérigono moy kéluhanane. Mélaw kago fédayaén Begén mérasy séko. Endob i kaame kétayan i mérigowe damén, békén i kagéne kétayan.”

³⁷ Tidéw béo, méniséfule mangéy dob de télew ni gétew kuyugén, atin énggito no bero énggfidong. Atin ménbérél dob Simon Pedrowe mano, “Simon, géfidong go? Aw énda wayo gétulik go fiyon ségéuras saén?”

³⁸ Atin ménbérél dob berowe télew gétew mano, “Tulik gom, brab dasal gom inok énda métukawan gom. Méuyot gom rémigo bér kétaya kuwe, éndob mélubay i de lowoh gom, brab magad géfélis bér de sugu gu.”

³⁹ Tidéw béo, ménagéw man i Jesuse, brab déménasal so loo bér énggétahe de. ⁴⁰ Tidéw béo, méniséfule man, brab énggito no bero énggfidong man, non toow ro fo manat. Atin énda gétiga roy ati fiyowe kóbérél ro dob Jesuse.

⁴¹ Atin ménagéw man i Jesuse atin énda mérugayén tidéw béo, méniséfule dob gétéléw ne gule, brab ménbérél dob berowe mano, “Aw tafay gom séna fidong brab témérén? Na, énggumahén i urase. Téngténg gom, i Nga i Kéilawane, sani Begéne fékéfo dob de ménsla étew. ⁴² Na tek gom, magéw tomén. Téngténg gom, ay nan nén gégumah i émfékéfoe Begén.”

I kékéfoe bér Jesuse

⁴³ Amun émbérél sénay Jesuse, énggégumah i Judase, sani ségétéwe bér de folo bra ruwo gétew kuyugén. Atin ménodor i de médoó do étew sénugu i de odoroy de fadi brab de témoor bér kitabe brab de odoroy de Judio. Ménuwit ro do sundang brab do bastun. ⁴⁴ Atin i ménfékéfoe de, sani Judase, bér gétahé niraya noy de étew fégétigana ro de non bénréhén bero mano, “I étewe aréké ku, been i no. Kéfo gom brab toow gom fo bantayan bér lala gome de muwit.”

⁴⁵ Mélaw amun énggégumah i Judase, ménfégédét dob Jesuse brab ménbérél mano, “Maistéro.” Atin narékén. ⁴⁶ Mélaw i de étew kénéfo roy

Jesuse. ⁴⁷Endob i ségétéwe bé de kuyug Jesus diyo, rénau noy sundang ne brab ténibohén i riféy gérotore fadi brab ménsilaf i ségébalae bé kelingo ne. ⁴⁸Tidéw béno, ménbéréh i Jesuse dob de kéméfo de mano, “Sedek ménuwit gom do sundang brab do bastun, maak ségétewu tulisan kéfoé kom? ⁴⁹Sénga fuweh diyou dob lawi i Tuluse téromo. Diyo gom so, éndob énda kénéfo gom Begén. Endob mérigoj ni inok métuman i Ménsulate Kébéréh i Tuluse.”

⁵⁰Tidéw béno, i kéluhanay de kuyugén ténagak roy Jesuse brab ménraréy ro.

⁵¹Wén i ségétéwe kénogo lagéy ménfuray bé Jesuse. I ni kénogo lagéy énda i kégalén, ménggélidot saén mut. Atin ténlama ro so kénéfo. ⁵²Endob ménraréy ménfélawas non énggétagaka noy mut ne bé kéfagayas ne.

I kékukume bé Jesuse

⁵³Tidéw béno, nuwit roy Jesuse dob lawi i gérotore fadi. Diyo ménlimud i kéluhanay de odoroy de fadi brab de odoroy de Judio brab de téromo bé kitabe. ⁵⁴Atin ménfuray i Pedrowe éndob ménférayu kloh. Brab ménahur dob fésawayaw lawi i gérotore ni fadi. Diyo ménsar beroy de guwardiya géliwét dob aféye télagang ro.

⁵⁵Atin i de odoroy de fadi brab kéluhanay de kédéwan, salkélé roy gétimale kétébo ro bé Jesuse inok wén i funa ro de méméléhu, éndob énda gérigono ro de. ⁵⁶Médooy de tugién do étew téménébo bé Jesuse bé békéne toow, éndob i de kébéréh ro énda géséodorón.

⁵⁷Tidéw béno, wén i do téménindég émbéréh bé ni tugién kétébo maro, ⁵⁸“Enggélingoo key i kébéréh ne mano, ‘Binasané kuy lawi i Tuluse ni rénígoy de kéilawan, brab amuk méifus i télewe géterésangan, rémigowu man ségiyo lawi i Tuluse békén rénígoy kéilawane.’ ” ⁵⁹Gido loo, énda géséfagayun i kébéréh i de ni étew tugién.

⁶⁰Tidéw béno, i gérotore fadi téménindég dob téngaangay de ménlimud do odoron brab ménénginsa dob Jesuse mano, “Ati késumbul me bé ni kétébo ro Beem?”

⁶¹Endob énda séménumbul i Jesuse, ménantés saén. Atin ménénginsa man i gérotore fadi mano, “Aw Beemey Kristowe, Nga i ménbantuge Tulus?”

⁶²Atin séménumbul i Jesuse mano, “Hoo, Begén. Atin gito gom moso Begén, sani Nga i Kéilawane, mésar fingé dob kuwonoy barakatane Tulus. Atin gito gom Begén dob de rawén séfuleu tidéw dob lawayo.”

⁶³Tidéw béno, i gérotore ni fadi kénusién i kégal ne émfétengténg bé kékérit ne bé kébéréh Jesuse ni. Atin ménbéréh mano, “Endaén kailanga tom i témeboe de dob betome. ⁶⁴Non énggélingoo tomén i mékémurkae kébéréhén. Ati karang gome de fatut rigoné tom?”

Atin kéluhana ro kénukum ro bé fatut féléhuén.

⁶⁵ Tidéw béno, i de dumo bero dénuraa roy Jesuse. Atin ténléb roy de moto no bé munsalawe brab ténafés ro brab fén-antuk ro de ké ati témenafése de. Atin i de guwardiya, génamak ro brab lénubag ro.

Dénirung Pedrowey Jesuse

⁶⁶ Atin amun diyo sénay Pedrowe dob fésawayaw lawie ni, témenara i ségettéwe kénogon sugu-suguéy gérotore fadi. ⁶⁷ Amun énggito noy Pedrowe télagang, fénandangén brab ménbérél mano, “Beem soy dumo Jesuse tidéw Nasaret.”

⁶⁸ Endob dénirung Pedrowe mano, “Enda gétiga ku de brab énda gésobuto kuy nan béréhé mo.” Amun bénréhén i ni, ménagéw mangéy dob bengawane. Atin sonom béno, ménukoro i férufete.

⁶⁹ Atin i kénogone ni sugu-suguén, amun énggito no man i Pedrowe diyo dob bengawane, bénréhén man dob de étew diyo mano, “Beeney lagéye dumo Jesuse.” ⁷⁰ Endob dénirung Pedrowe man.

Enda mérugayén tidéw béno, i de étew diyo ténebo roy Pedrowe man maro, “Tintu go dumo no, non ségettéw go so tidéw Galilea.”

⁷¹ Tidéw béno, toow fo sémenafa i Pedrowe mano, “Kukuméy Tuluse damén begén ké tugiénu. Toow fo énda gétiga kuy nan étew béréhé kom.”

⁷² Sonom béno, ménukoro i férufete bé géruwo nuwe gule. Bé béno so, énggétédémo Pedrowey bénréh Jesuse dob beene mano, “Enda séna ukoro i manoke bé géruwo nuwe gule, dirungé mo Begén télew gule bé énda gélolo mo Begén.” Mélaw toow fo kéménrew i Pedrowe.

I kékukume bé Jesuse

15 ¹ Atin modor géfuwén, i de odoroy de fadi ménslimud ro beroy de odoroy de Judio brab de témore bá kitabe brab kéluhanay de kéfédéway de Judio. Atin ménagayun ro. Mélaw nikét roy Jesuse bá de sangkali brab narak ro nuwit ro mangéy dob Pilatowe, sani méguléwe tidéw Roma, atin naté ro dob beene. ² Atin fénénginsaa Pilatowey Jesuse mano, “Aw Beem i Datu i de Judio?”

Atin sémenumbul i Jesuse mano, “Beem i ménbérél de.”

³ Atin i de odoroy de fadi ténebo roy Jesuse bá médoowe kétébo ro de.

⁴ Mélaw ménénginsa man i Pilatowe mano, “Sedek énda sénumbul go? Non énggelingoo moy de médooy de kétébo ro Beem.”

⁵ Endob énda fo sémenumbul i Jesuse. Atin mélaw ménggaif i Pilatowe.

⁶ Ménrigoy ni dob gaiwe kanduli ro féndawét Témara. Atin i adat Pilatowe, sénga kanduli Témara, témancéy ségettéw férisu, been i niy ongotéy de étew de. ⁷ Atin bá béno gai, wén i ségettéwe férisu féndawét Barabas. Ménférisu beroy de dumo no ménstiboh bá de gémamak kukuman. Ménméléhu étew bá no késétiboh ro. ⁸ Mélaw amun ménlimud

i de étew ménfégédét ro dob Pilatowe ongoté ro ké témangéy ségétew férisu, ⁹ménénginsa i Pilatowe mano, “Kétaya kom ké fésuté kuy datu gome do Judio?” ¹⁰Rénigo noy ni non énggétiga noy funay de odoroy de fadi ménaté bé Jesuse non méndaléw ro de.

¹¹ Endob i de odoroy de fadi fénkérít roy de ménlimud do étew atin mélaw nongot ro dob Pilatowe ké tangéyé noy Barabase mangéy dob berowe. ¹² Atin ménbérél man i Pilatowe dob de étew mano, “Ati mélaw i kérigo gu bé ni lagéy féndawét gom ‘Datu i de Judio?’”

¹³ Endob i de étew ménkes ro maro, “Kélabo gom dob kruse!”

¹⁴ Atin ménénginsa i Pilatowe mano, “Sede? Ati tetee rénigo no ula-ula?” Endob i de étew ménkes ro man minut fo métanug bé i Jesuse kélabonén dob kruse.

¹⁵ Tidéw béno, ménuyot i Pilatowe ké fiyoy de fédéw i de ménlimud do étew. Mélaw féntangéyén i Barabase, atin fénbadasén i Jesuse brab fénatéén dob berowe inok kélaboné ro dob kruse.

¹⁶ Tidéw béno, i de sundalo nuwit roy Jesuse mangéy mahur dob fésawayay lawi i odorone tidéw Roma. Atin lénimud roy kéluhanay de dumo ro sundalo ségébataliyon. ¹⁷ Atin fénkégal roy Jesuse bé furowe métaah kégal maak datu, brab lénuku roy suwarane kélég atin fénsayaf ro bé Jesuse. ¹⁸ Tidéw béno, ubo-ubo basana ro maro, “Méraru damén i Datu i de Judio!” ¹⁹ Atin bénadas roy uléw ne bé kayéwe brab dénuraa ro, brab léningkuwédo ro ubo-ubo basana ro. ²⁰ Atin amun énggilid ro déniyangka, kénda roy furowe kégal brab fénkégal ro dey kaane insod. Tidéw béno, nuwit ro mésut dob Jerusalem atin nangéy ro kénlabo dob kruse.

Kénlabo roy Jesuse dob kruse

²¹ Atin amun diyo ro séna dob de aguwon, énggébalaka roy étewe féndawét Simon tidéw dob ingéde Siren, abay Alejandrowe brab Rufo. Béno sénay kégumah ne dob no ingéd tidéw dob de safadén. Atin fénégés ro démuwal bé krus Jesuse. ²² Atin nuwit roy Jesuse mangéy dob gonone féndawét Golgota (i atag ne “gonoy kulobong uléwe”). ²³ Atin niraya roy Jesuse arak lénawékon uwa, éndob énda éndotén de. ²⁴ Tidéw béno, i de sundalo kénlabo roy Jesuse dob kruse brab sénsaar-saar roy de kégalén, sénkungkungo roy ati gégedote bé séngae de sélafin. ²⁵ Géraraan lémowot i térsange bé kékélabo ruwe bé Jesuse dob kruse. ²⁶ Atin diyo dob kruse wén i ménténae sulat bé kétébo ruwe de mano, “Datu i de Judio”. ²⁷ Kénlabo ro soy ruwowe gétew ménakaw dob de krus. I sébaane de fingé dob kuwono Jesuse, brab i sébaane de fingé dob biwong Jesuse. ²⁸ Mélaw méntuman i Ménsulate Kébérél i Tuluse mano, “Kénarang roy Beene ségétew bé de ménsala étew.”

²⁹ Atin i de témara dob no, déniyangka roy Jesuse brab dangu-danguo ro inok duwoyé ro, brab maro, “Hoy! Aw békén ba Beem i ménbérél bé

binasané moy lawi i Tuluse brab rigoné mo man bé télewe gétérésangan?

³⁰Lus go mélaw dob krusa nan brab tabanga moy kaame lowoh."

³¹Atin ségiléw so bé niy kédiyangka i de odoroy de fadi de brab de témoreo bé kitabe. Ménsébéréh-béréh ro maro, "Ténabangén i de ségiyo étew inok énda méléhu ro, éndob énda gétabanga noy kaane lowoh inok énda méléhuén. ³²Amuk Beeney Kristowe, sani datu tome do Judio, fatut mélus béeleewe ni tidew dob kruse ni inok gito tom brab gégéginugut tom de."

Atin i de ruwo gétew énggéséréngan de ménklabo dob de krus, déniyangka ro soy Jesuse.

I kéléhu Jesuse

³³Amun géutuhén, ménwaléy délémon i kéluhanay de gonon dob duniya taman géraraan lémudug i térsange de. ³⁴Atin amun géraraan lémudug i térsange de, téménawag i Jesuse métanug mano, "Eloi, Eloi, lama sabaktani?" I atag ne "Tulus gu, Tulus gu, sedek té nagakém Begén?"

³⁵Atin i de dumoy de étew diyo énggégélingo de, ménbéréh ro maro, "Fégélingo gom, tawagé noy Eliase." ³⁶Atin i ségitéwe bero diyo, ménagayas éndotén i maake gafas brab nérémén dob mélémuwe arak. Tidew béno, féndiyoén dob kayéwe brab féndiyoén dob ba Jesuse inok éséfén no. Atin ménbéréh i ni étew mano, "Fédaya gomén. Tuliké tom ké gégumah i Eliase émfélus de."

³⁷Tidew béno, ségule man ménkes i Jesuse, atin ménléhuén.

³⁸Sonom béno, i rindunge dob lawi i Tuluse ruwoy ménsésdaya nuwe, ménkusi tidew rotor mangéy fantad. ³⁹Atin i odoroy de sundalo téménindég dob adafay krus Jesuse, énggelingoo noy kéékes Jesuse brab énggito noy kéléhu ne. Ménbéréh i ni sundalo mano, "Tintu fo Nga i Tulusey ni lagéy."

⁴⁰Atin diyo soy de libun kémulay gétangka tidew dob no, ro Maria Magdalena, brab Maria idéng Jose brab ménguwéde séna Santiago, brab diyo soy libune Salome. ⁴¹I de ni do libun, ménfuray ro bé Jesuse brab tétabang ro amun diyo de séna dob Galilea. Atin diyo soy de médo na do libun ménodor de mangéy Jerusalem.

I kélébéngé bé Jesuse

⁴²Bé béno gai, témégénén i térsange bé kétafay ruwe bé gétunduge de fuweh, sani gai kétéréne. ⁴³Mélaw énggumah i ségitéwe lagéy féndawéti Jose, tidew Arimatea. Beeney ségitéwe bé de kéfédéway de Judio, brab toow fo fégadatan. Brab ongot-ongoté noy kégumah i kégéulgéw i Tuluse. Atin i Josehe ménbaraw ménangéy dob Pilatowe nongotén i bangkay Jesuse. ⁴⁴Atin i Pilatowe, ménngaif non magad i kéléhu Jesuse. Mélaw fentawagén i odoroy de sundalo brab ménenginsa ké ménrugayén i kéléhu

Jesuse. ⁴⁵ Amun énggélingoo noy kékérén i odoroy de sundalo bé tintu fo ménléhuén i Jesuse, ténungkasén i Josehe médot de. ⁴⁶ Mélaw i Josehe, bénléyén i futee safut brab amun ménkédanén i bangkay Jesuse dob kruse, bénausén bé safuto no. Atin féndiyoén dob lébénge ténosong dob rangih i fingase. Tidew béno, kénriringén i dakéle batéw mangéy dob bengaway lébénge ni fénggétélébén de. ⁴⁷ I Maria Magdalenawe brab Mariahe idéng Josehe ténéngténg ro brab énggito roy lébénge fénggonon bé bangkay Jesuse.

I kétébule Jesuse

16 ¹ Amun ménifus i gaiy kétéréné, i Maria Magdalenawe, brab Mariahe idéng Santiago, brab Salomewe, ménléy ro do fégféamut inok fédiyoé ro dob bangkay Jesuse. ² Atin toow séna fo géfuwén bé no Duminggu, amun sémbang i térsange, ménangéy ro dob lébénge. ³⁻⁴ Atin amun diyo ro dob de aguwon, méniséuret-uret ro maro, “Ati sékoy kémériringe bé batéwe tidew dob bengaway lébengo no inok géahur tom?” Non toow fo dakél i batéwo no. Endob amun énggumah ro, brab ténéngténg ro, énggito roy batéwe fénggétéléb bé bengawane ménkériring. ⁵ Amun ménahur ro dob lébénge ni, énggito roy ségétéwe kénogo lagéy ménasar fingé kuwonon, brab kéménégai fute. Atin toow ro fo ménggaif.

⁶ Atin ménbéréh i ni lagéy mano, “Kagom mégaif. Gétiga ku sélédé kom i Jesuse tidew Nasaret, sani fénléhue dob kruse. Endob éndaén dini no, non méntébuleén. Téngténg gom, ay ni féniroo ruwe de. ⁷ Na, agéw gom, brab uret gom i ni kékérén dob de kuyugén labi na fo dob Pedrowe, bé métah begom i Jesuse mangéy Galilea. Diyo gito gom, loo bé kékérén ne de dob begome bé do gétah.”

⁸ Tidew béno, i de ni libun, ménsut ro tidew dob lébénge ni brab léménéntu ro magéw. Non toow ro fo ménggilak brab ménggaif. Atin énda énggureto roy ni dob de ségiyo non ménggilak ro.

I de kétéfégito Jesus

⁹ Amun méntébule i Jesuse bé toowe géfuwén bé no Duminggu, méntéfégito sungu dob Maria Magdalenawe, sani libune fénféraréy Jesusey de fitew gétew saitan tidew dob beene. ¹⁰ Atin i Mariahe ni, ménangéy dob de kuyug Jesus, bé lala ruwe rémuung brab kémérew fantag bé kéléhu Jesuse. Atin nuretén dob berowey fantage bé kétébule Jesuse. ¹¹ Endob amun énggélingoo roy kékérén ne bé méntébule i Jesuse brab énggito no, énda ménunur ro de.

¹² Amun énggilid i ni, méntéfégito man i Jesuse bé ségiyowe falasén dob ruwowe gétew bé de kuyugén bé lala ruwe magéw dob de aguwon mangéy dob de safad. ¹³ Atin méniséule ro mangéy Jerusalem brab nuret roy ni dob de dumo ro do kuyug. Endob énda ménunur ro bero.

¹⁴ Atin tidéw béno, méntefégito man i Jesuse dob de folo bra sébaan gétew do kuyugén bé lala ruwe mama. Atin nugarén bero sabaf bé kulang i kéunur ruwe, brab sabaf métégas i de uléw ro funa ro énda munur bé kéuret i de énggégito de tidéw bé kétébule ne. ¹⁵ Atin ménbéréh i Jesuse dob berowe mano, “Angéy gom dob kéluhanay de gonon dob duniyae ni, brab uret gom i Fiyowe Uret dob kéluhanay de étew. ¹⁶ Atin i kéluhanay de munur brab mébautis, méfukas ro. Atin i kéluhanay de énda munur, mékukum ro. ¹⁷ Atin i de munur géfétengténg ro bé de ni do tanda bé barakat guwe: Géféraréy ro do saitan, usaré roy dawét guwe. Atin gésébéréh ro bé de ségiyo késébéréh énda gétiga ro de. ¹⁸ Atin amuk géfurut ro do ulé, taloo no géiném ro udenén bisa, énda gésug-sug ro. Atin tégené roy de uléw i de démériun brab géféadi-adino ro bero.”

I kédiyat Jesuse

¹⁹ Atin amun énggilid i Kadnane Jesus bé kékéréh ne dob berowe, féndiyat i Tuluse mangéy dob lawayo brab ménsar fingé dob kuwonoy Tuluse. ²⁰ Atin i de kuyugén ménagéw ro mangéy muret dob kéluhanay de ingéd. Atin i Kadnane ténabanga no bero brab fénggito noy toow i kéuret ruwe bé kékérigo nuwe bero bé de mékégaif galbék.

I Fiyowe Uret Sénulat Lukase

Been i niy Fiyowe Uret sénulat Lukase fantag bé Jesu Kristowe. Sénulat Lukasey médoowe bé de mékégaif rénigo Jesuse brab de téneroén. Fénggito Lukasey Jesuse, sani Nga i Tuluse, ménwaléy kéilawan brab féndawét “Nga i Kéilawane”. I funa Jesuse ménwaléy kéilawan inok fukasé noy de étew tidéw dob de sala ro. Fukasé noy de étew bé kéléhu ne dob kruse.

I Lukase, sani séménulate bé ni Fiyo Uret, ségétew doktor, mélaw toow fo métileédéd. Fénénginsaa noy médoowe bé de kuyug Jesus inok gésulata noy de toow fo rénigo Jesuse brab de bénréhén brab ati toowe fo ménrigo dob Beene. Mélaw gétiga tom bé i kéluhanay de sénulat Lukas toow fo toow. Sénulat Lukasey ni Fiyo Uret dob gérotore étew féndawét Teofilo.

1 ¹Teofilo,
Wénén i médoou séménulat fantag bé kéluhanay ménrigowe fantag bé Jesuse dob kérara geye. ²Sénulat roy tintuwe ségiléw bé kéuret i de ménuret de betom fantag bé Jesuse, sani de énggégito de tidéw féganay. ³Atin fiyon i begéne, toow gu féngganad i kéluhanay de ni ménrigo tidéw féganay. Mélaw fatutu so sémulat bé mékéntaye mangéy dob beeme bé urete fantag bé Jesuse. ⁴Rigoné kuy ni inok gétiga moy toowe bé ténoroe néen beem.

I kékéréd i télakiwe fantag bé Juan Bautistawe

⁵Brab i ni sultáte ku beem tafayén tidéw féganay bé Herod i méguléwe séna dob Judea. Bé bénó, wén i ségétewe lagéy féndawét Sakarias, ménamung dob ségéklasiwe fadi féndawét Abias. I Sakariase ni, wén i bawagén féndawét Elisabet. Tidéw so dob katufua Aarone ségétew fadi. ⁶Atin i Sakariase brab Elisabete bawagén, métintu ro dob adafay Tuluse. Odoro ro brab tumané roy kéluhanay sugu i Tuluse. ⁷Endob énda i nga ro, non i Elisabete atir, brab do lukés ro néen.

⁸Amun énggégumah i gaiwe gémalbék i ni ségéklasi fadi féndawét Abias, ménamung soy Sakariase diyo dob lawi i Tuluse beroy de dumo no.

⁹ Atin sénbunuto ro loo bé adat ruwe do fadi ké mémili ro ségettew dumo ro mangéy témuwég dukah dob lawi i Tuluse. Atin Sakarias i ménfamilie.

¹⁰ Amun tuwégé Sakariase nén i dukahe dob lawi i Tuluse, i kéluhanay de ménlimud do méngadaf déménasal ro dob liyuwe. ¹¹ Tidew béno, i télakiwe tidew dob Kadnane méntefégitó téménindég fingé dob kuwonoy ahayane féngadafan tuwégon bé dukahe. ¹² Amun énggito Sakariasey ni, toow fo ménggaif brab ménggilak. ¹³ Endob i télakiwe ménbérél mano, “Kago mágilak Sakarias. Enggélingooy Tulusey kédasal me. Mélaw i bawag me Elisabet géfégénga ségettew nga lagéy. Atin fédawétém Juan. ¹⁴ Atin waléy go méoror brab méoror soy de médooy étew ké mumah. ¹⁵ Non waléy moso gérator dob adafay Tuluse brab énda minémén étingayén arak mékéolon. Atin énda séna ménfégéngaén, i Rémogor i Tulusey mémamuone de.

¹⁶ Atin sabaf bé kétoro i nga me, médooy de Judio gésénule brab munur bé Kadnane Tulus ro. ¹⁷ Beeney géétahe bé Kadnane brab fémanduoy Rémogor i Tuluse brab iraya no barakat rémigo do mékégaif loo bé rénigo Eliase bé do gétah. Brab beeney émféséulite bé de ménsebanil do lukés bé de nga ro. Brab i de étew énggésala, gésénule ro sabaf bé kétoro ne, brab máginugut ro dob Tuluse, brab waléy ro man métintu. Atin mélaw waléy médooy étewe géingat ongot-ongot bé kégégumah i Kadnane,” bang i télakiwe ni.

¹⁸ Tidew béno, ménbérél i Sakariase mano, “Endob ati kégétiga kuwe de ké toow i ni bénréhém? Non i begéne brab bawag guwe toow geyén fo lukés.”

¹⁹ Séménumbul i télakiwe mano, “Begéney Gabriele, sugu-suguéy Tuluse démoyun dob adafa nuwe. Sénugu i Tuluse begén inok bérélhé ku dob beemey ni fiyo uret. ²⁰ Atin béleewe waléy go émow. Enda gébérél go taman énda métuman i ni bénréh gu, non énda munur go bé de bénréh gu beem, sani kékérhé métuman dob gaiwe kétayay Tuluse métuman.”

²¹ Bé béno, i de étew dob liyuy lawi i Tuluse, ongot-ongoté roy Sakariase ké mésut, brab ménggaif ro de non ménrugay dob bukag i lawi i Tuluse. ²² Amun ménsut, énda gésébérélén bero. Atin énggétiga roy wén i méntefégitó de dob bukag i lawi i Tuluse, non séniniyasa no sa bero bé de kémérén, non émwén.

²³ Amun énggilidén i galbék Sakariase ni dob lawi i Tuluse, ménule.

²⁴ Enda mérugayén tidew béno, i bawag ne Elisabet ménwaléy obor. Atin ménbati i Elisabete dob bukag i lawie, énda ménsut-sutén bé ménlimowe géterésang kélungonon. ²⁵ Bang Elisabete, “Toow fo mégédaw i Tuluse begén, non géfégéngau. Réningoy Tulusey ni inok éndaén kékémalananu dob de étew.”

I kékérhé i télakiwe fantag bé Jesuse

²⁶ Dob géeném ne géterésang kélungonon bé kékobor Elisabete, sénugu i Tulusey télakiwe féndawét Gabriel mangéy dob sébaane ingéd dob

Galilea féndawét Nasaret. ²⁷Wén i nuvitén kékéréh fénsamfayén dob ségétewe kénogon féndawét Maria. I Mariahe ténlanaa nén fíbawagén dob ségétewe lagéy féndawét Jose. Beeney séfu i ségétewe méntélata datu i de Judio féndawét Dabid. ²⁸Ménggégumah i télakiwe dob Mariahe brab ménbéréh mano, “Oror go! I Kadnaney dumo muwe, brab niraya no beem dakél bantugan.”

²⁹Toow fo ménbuku i Mariahe bé bénréh i télakiwe ni, brab fénggitungén ké ati atag i ni bénréhén. ³⁰Atin ménbéréh man i télakiwe mano, “Kago mégilak, Maria. Been i niy dakéle bantugan niray i Tuluse beem. ³¹Waléy go obor, brab mégénga go ségétew nga lagéy, atin fédawétém Jesus. ³²Waléy móbantug lagéy brab i fédawét i de étew de Nga i Toowe Gérotor Tulus. Féwaléyéy Kadnane Tulus datu ségiléw bé katufua nuwe Dabid. ³³Waléy datu dob de étew Israel taman sa taman. I kékéfugléw ne énda métamano.”

³⁴Atin ménbéréh i Mariahe dob télakiwe mano, “Endob kénogonu séna, énda i bawag gu, non énda séna ménsétifonu bé mawage begén. Ati kékéfingé-fingé i ni mérigo?”

³⁵Séménumbul i télakiwe mano, “I Rémogor i Tuluse mangéy dob beeme brab i barakat i Tuluse dob beeme. Been i niy funay mékétéfuwe nga fédawétén Nga i Tuluse. ³⁶Fégitungém i Elisabete samungém. Bénréh i de étew éndaén kun fakayén géfégénga, non toowén fo lukés. Endob fiyon fo ké loo bé nan, mén-énémén gétérésang kélungonon obor. ³⁷Non gérigonoy Tulusey kéluhanay éntingayéne.”

³⁸Atin bang Mariahe, “Bégéney sugu-suguéy Tuluse. Mérigo dam i ni kéluhanan loo bé bénréh manan.” Tidéw béno, méntékédan i télakiwe.

Ténukaw Mariahey Elisabete

³⁹Tidéw béno, i Mariahe ménagayas ménagéy dob sébaane ingéd dob de tuduk dob de sakuf Juda. ⁴⁰Ménangéy dob lawi Sakariase brab ténukawén i Elisabete. ⁴¹Amun i Elisabete énggelingoo noy béréh Mariahe sémégifa, i ngae dob ésur ne énggékédu, atin i Rémogor i Tuluse fénemanduo noy Elisabete. ⁴²Amun toow fo méoror i Elisabete, méntanug i kékéréh ne mano, “Bé kéluhanay de libun, toow fo fénfiyoy Tuluse beem, brab toow so fo féfiyoné noy ngae oboré mo. ⁴³Endob mégaifu non begéne soy fénfiyoy Tuluse, non i idéng i Kadna kuwe nangéyén ténukaw begén ségétew gérifantad. ⁴⁴Gétiga kuy de ni non amun énggelingoo kuy béréh me sémégifa, i ngae dob ésur guwe ni énggékédu bé kéoror ne. ⁴⁵Féfiyonéy Kadnane damén beem non nunuro mo métuman i kékéréh ne.”

⁴⁶Tidéw béno, ménbéréh i Mariahe mano, “Dayéwéy rémogor guwey Kadnane, ⁴⁷brab toow fo méororu fantag bé Tuluse sani Mémukase begén. ⁴⁸Non fénggétédémén begén ségétew térfantad sugu-sugué no.

Tidéw béleewe tabaréy de étew begén fénggédawan. ⁴⁹Non i barakatane Tulus rénigo noy mékégaife dob begéne. Mékétéfuy dawét ne. ⁵⁰Tidéw féganay taman béleewe, toow fo mégédaw bé de étew mégadatan de. ⁵¹Rénigo noy de mékégaif galbék bé barakat ne. I de étew téfégérotor, bigodoyéy Tuluse bero inok énda mégulit i de tete bantak ro. ⁵²Kédané noy de datu dob de gono ro, brab fégérоторé noy de étew térifantad. ⁵³I de méskinan fégédét dob Tuluse, félésoré no bero bé de fiyo. Endob i de kawasa énda fégédétén dob Beene, énda i iray i Tuluse bero. ⁵⁴⁻⁵⁵Ténabanga no betom do étewén do Judio, non gétédémo noy fasad ne dob katufua tome Abraham bé mégédaw de brab kéléhanay de séfén taman sa taman,” bang Mariahe.

⁵⁶Tidéw béo, ménbati i Mariahe dob ro Elisabete télew gétérésang kélungonon, atin béo na ménule.

I kéumah Juan Bautistawe

⁵⁷Atin amun énggumahén i gaiwe kéumahan i Elisabete, ménggenga ségettew nga lagéy. ⁵⁸I de dumo no ségédét brab do samungén, énggelingoo ro toow fo mégédaw i Tuluse de, atin mélaw kéléhana ro ménoror.

⁵⁹Atin amun waléwén gétérésangan i ngae ni, ténuma roy adat i de Judio, mélaw ténu li ro. Atin sébéréh-béréh i de étew bé fédawétén Sakarias, ségiléw bé dawét i boh ne. ⁶⁰Endob ménbéréh i idéng ne mano, “Békén Sakarias i dawét ne. Fédawété tom Juan.”

⁶¹Tidéw béo, séménumbul ro maro, “Endob énda i dumo no bé nan dawét.” ⁶²Tidéw béo, séniniyasa roy boh ne non énda gégélingoén. Fénénginsaa ro ké ati dawét i ngae kétaya no fédawét de.

⁶³Atin ménongot i Sakariase sulatan brab sénulatén, “I dawét ne Juan.” Tidéw béo ménggaif i de étew. ⁶⁴Sonom béo, énggéréh i Sakariase, atin méngganay démayéw bé Tuluse. ⁶⁵I de dumo ro ségédét toow ro fo ménggaif. Brab i urete fantag bé ni ménrigo, ménlégéb dob kéléhanay de ingéd dob de tuduk sakuf i Judeawe. ⁶⁶Atin i kéléhanay énggégélingoe bé ni uret fégitungé ro brab ménénginsa ro maro, “Ati keeyén i kéwaléyoy ni nga?” Non gétiga ro Kadnan i mémantuone de.

⁶⁷Atin i boh ne Sakarias fénémanduoy Rémogor i Tuluse, mélaw ménuret bé kékéréh i Tuluse mano, ⁶⁸“Dayéwé tom i Tuluse Kadna tom do Judio, non énggégumahén inok maun émfésagad bé de étewén. ⁶⁹Niraya no betom barakatan Mémukase tidéw dob de séfu i sugu-sugué nuwe Datu Dabid. ⁷⁰Been i Mémukase bénréh i de sénarigo no muret bé de kékéréhén bé do gétah. ⁷¹Réménigo fasadén dob betome bé sugué no dob betomey Mémukase inok témanab tom bé de sébanil betom brab de mérarék betom. ⁷²Bé késugu ne de, ténuma noy fasad ne mégédaw bé de katufua tom. Mélaw gétédémo noy fasad ne, ⁷³ténlaa no bé katufua tome

Abraham, ⁷⁴bé fukasé no betom dob de sébanil betom inok rigoné tom i kétaya nuwe, énda i gilak tom. ⁷⁵Atin fakay tom méngintulus bé toowe brab fiyowe dob adafa nuwe sénga fuweh taman méuyag tom.” ⁷⁶Tidéw béno, bénréh Sakariase dob nga ne mano, “I beeme nga gu fédawétén go sarigon muret bé kékéréléh i Toowe Fo Gérotor Tulus. Métah go bé Kadnane inok tafayé moy aguwo nuwe. ⁷⁷Embéréh go dob de étew bé mífukas ro bé kékésagad i Tuluse bero. ⁷⁸Non toow fo mégédaw i Tuluse betom. I kékufas ne betom ségiléw bé réndaw i térsange dob sébangane. ⁷⁹Non i kégédaw i Kadnane betom do étew mágilak méléhu, ségiléw bé kéréndaw i térsange dob délémone, inok fémanduo no betom dob aguwone énda i bukuén de.” Been i bénréh Sakariase.

⁸⁰Atin i ngae ni ménruk émbagér brab ménwaléy métintu. Atin amun dakélén, ménbati dob sébaane gonon énda i étew de bati, taman bé gaiwe ménuret dob de étew Judio.

I kéumah Jesuse

2 ¹Dob de gai bé béno, wén i ségétéwe méngguléw dob Roma féndawét Augusto. Méniray sugu dob kéluhanay de étew félista ro inok iraya ro buwis. ²Been i niy sunguwe kékélista bé de étew, atin ménrigoy ni amun Kireniowey máguléwe dob Siria. ³Atin mélaw i kéluhanay étewe ménule ménangéy dob de karo ingéd, sani de gonoy de katufua ro, inok émfélista ro.

⁴Mélaw i Josehe ménagéw tidéw Nasaret sakuf i dakéle ingéd Galilea, mangéy dob ingéd ne féndawét Betlehem sakuf i dakéle ingéd Judea. I Betleheme ni, been i niy ingéde numahay méntelatae Datu Dabid. Ménangéy diyo i Josehe non beeney séfu Dabide. ⁵Ménangéy diyo bero Mariahe télnaana no bawagé no moso. Bé béno gai, gédétén kéumahan i Mariahe. ⁶Amun diyo ron dob Betlehem, ménggégumah i gaiy kékéumaha nuwe. ⁷Endob éndaén i gono ro dob de lawi kay de kana diyo. Mélaw ménangéy ro dob kayab i de ayam. Atin diyo ménkéumahan i Mariahe bé ngae lagéy sungu ngaén. Atin bénausén bé de safut brab fendiyoén dob amaay de ayam.

⁸Bé no so kélungonon, énda mérayuén tidéw diyo wén i do témalima bé de bili-bili dob de fétabtaban. ⁹I télakiwe tidéw dob Kadnane méntefégitob berowe. Brab i géfekayae réndaw tidéw dob Kadnane réménéndaw dob berowe. Toow ro fo ménggilak. ¹⁰Endob ménbéréléh i télakiwe mano, “Kagom mágilak. Wén i fiyowe uret gu funay kéluhanay étewe méoror. ¹¹Béleewe ni, i Mémukase begom ménúmah dob Betlehem. Been i Kristowe Kadnan. ¹²Gito gom bénaus bé de safut, fén-iro dob amaay de ayam. Been i nan i funa kome gétigan bé uret guwe ni toow.”

¹³Atin bé béno so, méntékow méntefégitob de médoo dumo no télaki brab kémanta ro dayewé roy Tuluse maro, ¹⁴“I kéluhanay de étew damén

démayéw bé Tuluse diyo dob toowe fo gérotor laway. Irayén damén i fiyowe kébati énda i bukuén de, loo bé fasad ne dob de étew dob duniyae ni mésuwat i Tuluse bero.”

¹⁵ Amun ménsefule i de télaki mangéy dob lawayo, ménsebéréh-béréh i de témalima bé de bili-bili maro, “Fénggétigay Kadnane betom i fantage bé ménrigowe dob ingéde Betlehem. Magéw tom angéyé tom téngténgén.”

¹⁶ Mélaw ménagayas ro magéw brab énggito roy Mariahe brab Josehe brab énggito roy klohe nga fén-iro dob amaay de ayam. ¹⁷ Amun énggito ro, bénréh ro dob Mariahe brab Josehey kékérén i télakiwe fantag bé ni kloh nga. ¹⁸ Atin nuret i de témalima bé de bili-bili dob de ségiyo étew gébalaka ro, atin ménngaif i kéluhanay énggégélingoe de. ¹⁹ Enggétédémo Mariahey kéluhanay ni ménrigo brab sénga tékélid fégitungé no. ²⁰ I de témalima bé de bili-bili ménsefule ro kémanta dayéwé roy Tuluse, non bé de énggito ro brab de énggélingoo ro. Ménrigoy kéluhanane loo bé kékérén i télakiwe de bero.

²¹ Amun énggégumah i géwaléwe gétérésangan, i ngae ni ténuli, brab niraya ro dawét Jesus, sani dawéte niray i télakiwe de bé énda séna obor i Mariahe de.

²² Amun énggégumah i gaiwe bé kétuma ruwe bé sugu Moisese fantag bé kékélinise dob adafay Tuluse amun mégénga, i Josehe brab Mariahe nuwit roy ngae ni dob lawi i Tuluse dob ingéde Jerusalem. ²³⁻²⁴ Atin i Mariahe brab Josehe téménulak ro loo bé ménslate dob Kukumay Tuluse ruwo timan lémugén inok félinis i Mariahe dob adafay Tuluse. I funa ruwe ménuit bé ngae ni inok odoro roy ménslate dob Kukumay Tuluse mano, “Fatut iray dob Kadnaney sunguwe nga lagéy.”

²⁵ Bé béo so, wén i ségetéwe lukés lagéy dob Jerusalem féndawét Simeon. Ségetéw métintu étew brab toow fo modor bé kukumay Tuluse. Atin sénga tékélid ongot-ongoté noy kékukase bé de Judio. Brab i Simeone ni sénga tékélid fémanduoy Rémogor i Tuluse. ²⁶ Fénggétigay Rémogor i Tuluse de bé énda méléhuén taman énda gito noy Kristowe, sani fénasad i Kadnane sugué no Mémukas. ²⁷ Fénémanduoy Rémogor i Tulusey Simeone mangéy dob lawi i Tuluse bé kékuit i de lukés Jesus de inok rigoné roy adate dob Ménslate Kékérén i Tuluse. ²⁸ Tidéw béo, édot Simeoney Jesuse brab sénfifi no brab ménfésalamat bé Tuluse mano, ²⁹ “Barakatan Kadnan, ténuma moy fasad me begén, brab fakayén méléhuu. ³⁰ Non énggito gun i Mémukase sénuguém, ³¹ sani ténafoy me inok i kéluhanay de étew gito ro. ³² Ségetéw maak solo réméndaw dob de étew békén Judio inok fégétiga no beroy fantag bé Beeme. Brab Been i funay de étew démayéw so begey do Judio.”

³³ Tidéw béo, ménngaif i de lukés Jesus bé ni kékérén Simeone fantag bé Jesuse. ³⁴⁻³⁵ Atin déménasal i Simeone dob Tuluse inok féfiyoné no

bero, brab bénréhén dob Mariahe idéng Jesuse mano, “I ni nga fénémili i Tuluse émféingat bé de étew dini dob Israel inok i itungay médoowe émfayag. Médooy de étew mika bé nga me ni moso, brab funa mo tete i fédew me. Endob mékukum i de énda de munur, brab méfukas i de munur de.” Been i niy bénréh Simeone.

³⁶ Atin wén soy ségétéwe libun muret bé kébérhé i Tuluse, féndawét Anah, nga Fanuel tidéw dob katufua ro Asere. Toowén fo lukés brab ménsétifon bé bawag ne fitew gébélantuwa tidéw fanay ménsébawag ro. ³⁷ Endob ménbaléw taman waléw folo bra éfot gébélantuwa i kélukés ne. Brab énda fo méntékéda no dob lawi i Tuluse non fuweh na kélungonon i kéfengadaf ne démasal brab fuwasa. ³⁸ Atin amun diyo sénay lukés Jesuse dob lawi i Tuluse, énggégumah i ni lukés libun. Sonom béno, ménfésalamat dob Tuluso, atin nureténi fantage bé Jesuse bé Beeney ongot-ongoté ruwe tidéw dob Tuluse. Nureténi dob de étew diyo dob Jerusalem ongot-ongoté ro soy kéfukase bero.

³⁹ Atin i Josehe brab Mariahe, amun énggéodoro ron i kéluhanay sénugue dob Kukumay Tuluse, ménule ro mangéy dob Nasaret dob sakuf i Galileawe. ⁴⁰ Atin ménruk i ngae ni, brab ménwaléy émbagér brab toow fo météldté. Atin toow fo mégédaw i Tuluse de.

I Jesuse beroy de maistéro

⁴¹ Sénga bélantuwa i idéng Jesuse brab boh ne mangéy Jerusalem inok mamung ro kanduli féndawét “Témara”. ⁴² Amun folo bra ruwo gébélantuwa i idad Jesuse, ménodor bero, loo bé adat i de Judio. ⁴³ Amun gilid i kékanduli ruwe, i de lukés Jesus ménule ro tidéw Jerusalem. Enda gétiga ro de ké méntefélé i Jesuse. ⁴⁴ Maro ké ménodor so bé kédoono ruwe ménule. Amun ménségétérésangan ron magéw, sénléd roy Jesuse dob de samung ro brab dob de dumo ro. ⁴⁵ Endob énda énggito ré de. Mélaw dob géruwowe de gai, ménséfule ro mangéy Jerusalem sélédé ro. ⁴⁶ Dob gétéléw ne gétérésangan, énggito ro dob lawi i Tuluse. Ménstar beroy de maistéroy de Judio, fégélingoé no bero brab fénginsaa no bero. ⁴⁷ I kéluhanay de mégélingo de, ménggaif ro bé de fiyo fénginsaé no brab de katabuwán késumbulén. ⁴⁸ Atin i de lukés Jesus ménggaif ro bé kégito ruwe de diyo. I idéng ne ménsébérhé de mano, “Jesus, i boh me brab begéne ménbuku gey fantag bé Beeme. Méntaluwan gey séméléd Beem. Sédék rénigo moy ni?”

⁴⁹ Endob séménumbul i Jesuse mano, “Enda kailanga no sélédé kom Begén. Gétiga kom damén ay niwu dob lawi i Boh guwe.” ⁵⁰ Endob i de lukés Jesus énda énggésobuto roy atag i bénréh Jesuse.

⁵¹ Tidéw béno, ménodor i Jesuse mule bé de lukésén mangéy Nasaret, brab nunuro no bero bé kéluhanay rigoné nuwe ula-ula. Enggétédémoy idéng ney kéluhanay de ni, atin sénga tékéliid fégitungé no. ⁵² Amun

ménruk i Jesuse, ménwaléy émbagér brab métileédéd. Atin kéluhanay de étew méuyot ré de, brab i Tuluse toow fo ménoror de.

I kéuret Juan Bautistawe

3 ¹Dob géfolo ne bra limo gébélintuwa bé kéféguléw Tiberiowe, atin Ponsio Pilato sénay méguléwe bé Judeawe, brab Herod i méguléwe bé Galileawe, brab i Filipiwe dumo no sétiman idéng i méguléwe bé Itureawe brab Trakanite, brab Lisaniaséy méguléwe bé Abiliniawe, ² atin i de toow do gérotor fadi ro Anas brab Kaifas dob Jerusalem, ménésbéréh i Tuluse bé Juane nga Sakarias. Bé bénō gai, ménbati i Juane dob gonone énda i étew de bat. ³I kéluhanay de ingéd gédét dob wayége Jordan sénugudo no muret mano, “Kailanga kom gésénule bé de sala gom brab fébautis gom. Atin fésagaday Tuluse begom.” ⁴I rénigo Juane diyo loo bé sénulat i méntelatae sénarigoy Tuluse muret féndawét Isaias mano, “Wén i ségétewe mékes dob gonone énda i étew de bat mano, ‘Tafay gom i aguwoy Kadnane. Fééntang gom i aguwo nuwe. ⁵Tamfurén i kéluhanay de géléna, brab fédataréni i kéluhanay de tuduk brab do buntud fédataréni, brab féntangén i de aguwon bingkug, brab i de kémérih fédoiséen. ⁶Brab i kéluhanay de étew gérito bé Mémukase tidéw dob Tulusó.’”

⁷Atin médooy étewe ménangéy dob Juane inok fébautis ro. Endob i Juane ménbéréh mano, “I begome maak do ulé gom non tete i de rigoné kom. Sedek mangéy gom dini? Enda géferaréy gom tidéw dob kékukum i Tuluse ké fébautis gom saén. ⁸Buluk toow gomén gésénule bé de sala gom, féténgténg gom i de fiyo ula-uláné kom. Atin kagom fégitungén i Tuluse fukasé no begom dob de sala gom sabaf bé begom i de séfu Abraham. Béréhé ku begom, fakay géféwaléy i Tuluse séfu Abrahame tidéw dob de batéw. ⁹Béleewe ni, gédétén i kékukum i Tuluse bé de tete étew. Ségiléw bé falakule méntafayén ménténa dob darir i kayéwe inok i de kayéw énda mégonok ro fiyo, tuwongén atin ibérén dob aféye inok métuwég.”

¹⁰Atin i de médooy étew fénénginsa ro dob beene maro, “Ati fatute rigoné key?”

¹¹Atin séménumbul i Juane mano, “Ati wéne ruwo lafin kégalén, fatut iraya noy éndae de. Brab ati wéne amaé no, fatut témukid de so.”

¹²Enggégumah soy de kémubra buwis inok fébautis ro. Atin ménbéréh ro maro, “Maistéro, ati fatute rigoné key?”

¹³Séménumbul i Juane mano, “Amuk kémubra gom, kagom lifulén i de étew. Yamula édot gom saén i katabuwane.”

¹⁴Atin i de sundalo ménénginsa ro so dob beene maro, “I begeye, ati fatute rigoné key?”

Atin séménumbul i Juane mano, “Kagomén médot kurta fénagéw dob kékégése. Taloo no témébo gom bé békéne toow. Kasukudan gomén bé sukay gome.”

15 Atin i de médoou étew amun énggélingoo roy kétoro Juane, kémarang ro brab mégitung ro ké beeney Kristowe ménggumah dob duniyae.

16 Mélaw i Juane ménbéréh dob bero mano, “I begéne, bautiso ku begom bé wayége, éndob wén nay gégunahe mas na gérotor begén. Fiyon foy ikét i safatos ne, énda métotoru de mukoh. Brab bautiso no begom bé Rémogor i Tuluse brab aféy. 17 Féganané noy de fijo étew bé de tete étew ségiléw bé ségtéwe métot. I fégéetof ne diyo dob kémér ne inok fégéetofén bé énrek ne brab fégétimuén bé faréye dob kiwot ne. Brab i de ukofén tuwégé no dob aféye énda émfandaén.”

18 Brab wén soy médoowe gékélasi kéuret Juane bé de étew fantag bé Fiyowe Uret.

19-22 Amun médooy de étew ménbautisén, i Jesuse bénautis Juane so. Amun ménbautis i Jesuse, déménasal, brab i lala ne démasal, ménungka i lawaye. Atin i Rémogor i Tuluse ménlus maak marafati brab méntérimféna dob Jesuse. Atin wén i ménbéréhe tidew dob lawayo mano, “Beem i Nga guwe. Toow fo kégédawa ku brab késuwata ku.”

Atin i Herode datu, dénowoy Juane fantag bé Herodiyase lénamfaén bawag i dumo nuwe sétiman idéng brab fantag bé de médoou na do tete rénigo Herode. Tidew béno, numana no nay sala ne bé kékéférisu nuwe bé Juane.

I de katufua Jesus

23 Bé kékéganay Jesuse bé galbék ne, télew folo gébélintuwa i kélukés ne. Brab i de étew maro ké Jesusey nga Josehe. Been i nga Elihe. 24 Been i nga Batate. Been i nga Lebihe. Been i nga Melkihe. Been i nga Janahe. Been i nga Josehe. 25 Been i nga Matatiase. Been i nga Amose. Been i nga Nahume. Been i nga Eslie. Been i nga Nagehe. 26 Been i nga Maate. Been i nga Matatiase. Been i nga Semeihe. Been i nga Josehe. Been i nga Judahe. 27 Been i nga Joanahe. Been i nga Resahe. Been i nga Sorababele. Been i nga Salatiele. Been i nga Nerihe. 28 Been i nga Melkihe. Been i nga Adie. Been i nga Kosame. Been i nga Elmodame. Been i nga Ere. 29 Been i nga Josuehe. Been i nga Eliesere. Been i nga Jorime. Been i nga Matate. Been i nga Lebihe. 30 Been i nga Simeone. Been i nga Judahe. Been i nga Josehe. Been i nga Jonane. Been i nga Eliakime. 31 Been i nga Meleawe. Been i nga Mainane. Been i nga Matatawe. Been i nga Natane. Been i nga Dabide. 32 Been i nga Jessehe. Been i nga Obede. Been i nga Boose. Been i nga Salmone. Been i nga Naasone. 33 Been i nga Aminadabe. Been i nga Admine. Been i nga Arniwe. Been i nga Esrome. Been i nga Farese. Been i nga Judahe. 34 Been i nga Jakobe. Been i nga Isake. Been i nga Abrahame. Been i nga Tarehe. Been i nga Nakore. 35 Been i nga Seruge. Been i nga Ragauwe. Been i nga Pelege. Been i nga Hebere. Been i nga Salae. 36 Been i nga Kainane. Been i nga Arfakade. Been i nga Seme. Been i nga Noehe. Been i nga Lameke. 37 Been i nga Matuseleme. Been i nga Enoke.

Been i nga Jaredé. Been i nga Mahalaleele. Been i nga Kainane.³⁸ Been i nga Enoke. Been i nga Sete. Been i nga Adame. Been i nga i Tuluse.

Ténéngkad Satanasey Jesuse

4 ¹Atin i Jesuse fénémanduoy Rémogor i Tuluse, ménule tidéw dob wayége Jordan, brab fénanangguwit i Rémogor i Tuluse mangéy dob de gonon énda i étew de batí. ²Amun diyoén i Jesuse, ménggégumah i odoroy de saitan féndawét Satanás inok téngkade noy Jesuse rémigo tete. I kérugay i ni éfot folo gétérésangan. Bé do no gai, énda ménama i Jesuse, atin toow fo ménlayaf.

³Ménggégumah i Satanase dob Beene brab ménbéréh mano, “Amuk Beemey Nga i Tuluse, féwaléyém amaén i de batéw ni.”

⁴Endob séménumbul i Jesuse mano, “Wén i Ménsulate Kébéréh i Tuluse mano, ‘Békén amaén saén i funay étewe méuyag.’ ”

⁵Tidéw béno, méntékor nuwit Satanasey Jesuse mangéy dob gératore gonon. Brab fénténgtengén dey kéluhanay de ingéd dob duniyae.

⁶Atin ménbéréh i Satanase mano, “Buluk lingkuwédo mo begén brab féngadafé mo begén, iray gu beem i kéluhanay ature méguléw bé de ni inok médayéw go. Géiraya ku kuwagib i étewe fémilié ku magatur bé kéluhanay de ni, non begéney wéne atura no bé de ni béeleewe.

⁷Lingkuwédonu brab féngadafénu, atin kéluhanay de ni gédoté mo.”

⁸Endob séménumbul i Jesuse mano, “Wén i Ménsulate Kébéréh i Tuluse mano, ‘Lingkuwédo saén dob adafay Kadnane Tulusém. Been saén i féngadafé muwe.’ ”

⁹Tidéw béno, nuwit Satanase mangéy dob ingéde Jerusalem, brab nuvitén mangéy dob toowe gérotor bérungoy lawi i Tuluse. Atin ménsébéréh man bé Jesuse mano, “Amuk Beemey Nga i Tuluse, antéfor go. ¹⁰Non wén i Ménsulate Kébéréh i Tuluse mano, ‘Suguéy Tuluséy de télaki no démiyaga Beem, ¹¹brab sakémé ro Beem inok énda émfali go bé de batéw dob fantade, fiyon i de sékéyém.’ ”

¹²I Jesuse séménumbul mano, “Endob wén soy Ménsulate Kébéréh i Tulus mano, ‘Kago téngkadén i Kadnane Tulusém rémigo bé kétaya muwe rigonén.’ ”

¹³Atin i Satanás ténéngkadén i Jesuse rémigo tete bé médoowe ségiyo-giyo kéténgkadén de. Endob énda génaga né de. Tidéw béno, téngakén i Jesuse singkow.

I káfeganay i galbék Jesuse dob Galilea

¹⁴Tidéw béno, ménséfule i Jesuse mangéy Galilea, brab i barakat i Rémogor i Tuluse dob Beene. Atin i urete fantag bé Jesuse méraan ménlégb dob de ingéd diyo. ¹⁵Atin téménoro i Jesuse dob de lawi féngadafan kay de Judío brab kéluhanay de étew dénayéw ro.

¹⁶Tidéw béno, énggégumah i Jesuse dob Nasaret, sani gono nuwe ménruk. Atin bé gaiwe kétérén, ménahur dob lawie féngadafan loo bé adat ne, atin téménindég inok basané noy Ménsulate Kébéréh i Tuluse. ¹⁷Brab wén i niraye de basanén sénulat i Méntélatae sarigoy Tuluse muret féndawét Isaias, brab amun nukabén, énggébasa na noy ménsulate diyo mano, ¹⁸“I Rémogor i Tuluse ay ni dob Begéne, non fénémilién Begén inok muret bé Fiyowe Uret dob de méskinan. Sénuguén Begén inok muretu fantag bé kétangéye bé de ménkalabusu, brab émféséfule bé de fiyo kéténgténg i de langafén, brab témabang bé de kéfasangan. ¹⁹Atin sénuguén Begén muret fantag bé bélintuwae fégétigay Tulusey kégédaw ne bé de kéilawan.”

²⁰Tidéw béno, amun énggilid i kébasa nuwe de, dénili noy ni basanén, atin fénséfuleén dob sugu-suguéne gémalbék dob féngadafane. Atin ménsofar i Jesuse inok téromo. Atin ténéngténg i kéluhanay de étew diyo. ²¹Atin ménbéréh mano, “Bé ni gai, i ni ménsulat méntuman dob adafa kome.”

²²Tidéw béno, i kéluhanay de étew diyo énggédayéwo roy Jesuse, brab ménggaif ro bé kéfiyoy de kébéréhén. Mélaw ménséfenginsa ro maro, “Aw békén bay ni nga Josehe saén?”

²³Atin ménbéréh i Jesuse mano, “Béréhé kom sékoy sébaane binuwaya mano, ‘Amuk beemey muwae, uwaém i lowoh me. Non amuk beemey ségétewe tintu sarigoy Tuluse, rigo moy de mékégaif galbék dini dob kaame ingéd ségiléw bé de rénigo mo kun dob Kafernaum.’” ²⁴Féntaus Jesusey kébéréh ne mano, “I toowe béréhé ku begom, énda i ségétew sarigoy Tuluse tayakufén dob kaane gonon. ²⁵Endob béréhé ku begom i toowe fantag bé gai Eliase. Enda fénrana i Tuluse de bé téléwe gébélintuwa brab éném gétérésang kélungonon. Atin énggégumah i lénggobé dob de ni gonon. Bé béno gai, médooy de baléw do libun Judio. ²⁶Endob fiyon ségétew bé no do baléw dumo tom Judio dob Israel, énda fénfégédét i Tulusey Eliase dob berowe. Yamula sénugu i Tuluse mangéy dob ségétewe libun baléw békén Judio dob sébaane ingéd féndawét Sarepta dob Sidon. ²⁷Loo so bé gai Eliseawe ségétew so sarigoy Tuluse. Wén i do médooy étew déméruruun fémute bé de dumo tom Judio. Endob énda i ségétew bero fén-adi-adi saliyu bé ségétewe étew békén Judio féndawét Naaman tidéw Siria.” ²⁸Atin i de kéluhanay de étew diyo dob lawie féngadafan toow ro fo ménkérít bé kégélingo ruwe bé ni bénréh Jesuse. ²⁹Mélaw dénédél ro taman dob uruk i tuduke diyo, sani féntindégo ro bé karowe ingéd, inok dérié ro damén dob fingase inok mélawu. ³⁰Endob ménagéw i Jesuse témara dob kérara ruwe atin méntaus magéw ténagakén bero.

Dénédél Jesusey de saitan

³¹Atin méntaus i Jesuse léménudug mangéy Kafernaum sani sébaane ingéd sakuf i Galileawe. Diyo bé gaiwe kétéréné, téménoro dob de étew dob

lawie féngadafan. ³² Atin éngkéségyonan i de étew bé de kétoroén non énda saén téneroén i kéfégitung i de ségiyo étew. Yamula téneroén i kaane kéfégitung. ³³ Atin diyo dob lawie féngadafan, wén i étewe rénahukoy saitane. Brab ménkes toow fo métanug mano, ³⁴ “Adéhoyoy! Ati amungé muwe begey, Jesus tidéw Nasaret? Ménangéy go ba dini inok binasané mo begey? Enggétiga key ké ati Beeme. Beem i Mékétéfuwe tidéw dob Tuluse.”

³⁵ Endob génlé Jesusey saitane ni mano, “Kago selekén, brab tékédan go.” Sonom béo, tenuwar i saitaney étewe ni rénahuko no. Atin méntékédan brab énda ménkaid i étewe ni.

³⁶ Atin éngkéségyonan ro kéluhanan. Brab ménsebéréh-béréh ro maro, “Ati ni kébéréh? Dob kébéréh ne saén wén i barakatén. Sugué noy saitane tékédan atin modor tékédan.” ³⁷ Atin i urete fantag bé Jesuse ménlégéb dob de kéluhanay de ingéd diyo.

Nuwa Jesusey de médoō étew

³⁸ Tidéw béo, méntékédan i Jesuse tidéw dob lawie féngadafan brab ménangéy dob lawi Simone, atin diyo i térima Simone libun démérueen toow fo méduf. Atin nongot roy Jesuse bé uwaé no. ³⁹ Atin téménindég i Jesuse dob tébing i libune ni, atin féntékéda noy kéeduf ne. Sonom béo, ménadi-adiy libune ni. Atin méntek dénuwoto no bero.

⁴⁰ Amun mélédén i térsange, i de médoō do étew wén i démérue ro, nuwit ro dob Jesuse inok uwaé no bero. Atin kénuwah Jesuse bero brab ménadi-adi ro kéluhanan. ⁴¹ Fénféralaréyén soy médoowe saitan. Brab ménkes ro maro, “Beemey Nga i Tuluse.” Endob génléén bero inok métanék ro, non énggétiga roy Beeney Kristowe.

⁴² Amun géfuwénén, méntékédan i Jesuse ménangéy dob sébaane gonon énda i étew de bat. Endob i de étew sélédé ro brab ménangéy ro dob Beene brab nongot ro ké énda damén tagaké no bero. ⁴³ Endob bénréhén bero mano, “I funa kuwe sénugu mangéy dini inok ureté ku dob de dumo ingéd i Fiyowe Uret fantag bé kéféguléw i Tuluse dob de étewén. Mélaw fatut ureté ku dob de dumo ingéd.”

⁴⁴ Atin i Jesuse ménagéw ménuret dob de féngadafan dob Judea.

Ténawag Jesusey de sungu kuyugén

5 ¹ Wén i no sébaan fuweh, diyo i Jesuse dob doror i dogote féndawéti Genesaret. Ménfégédét i de médoō do étew sédantélo ro inok mégélingo ro bé kébéréh i Tuluse ureté Jesuse. ² Atin i Jesuse énggitoy no ruwowe do awang diyo dob doror i dogote. Brab i de gefe de méntéfor ro non urahé roy de fukét ro. ³ Amun i Jesuse ménada dob sébaane bé de awang ni ka Simon, nongotén bé féangéyé no kloh dob ménaléme de. Brab diyo ménasar ménuret bé kébéréh i Tuluse dob de étew diyo ménribuk dob doror i dogote.

⁴ Amun énggilid téromo i Jesuse, bénréhén bé Simone mano, “Fékérara tom dob ménaléme de brab lawu gom i da fukét goma nan inok gégédot gom do sédo.”

⁵ Endob i Simone séménumbul mano, “Maistéro, ménterasay gey ségékélungonon brab énda foy énggédot gey de. Endob amun bénréhém, lawué key de fukét gey.” ⁶ Amun ménunur ro bé lénawu roy de fukét ro, énggégédot ro toow fo médoo sédo, brab i de fukét ro gédét mékusi. ⁷ Tidéw béno, nabit roy de dumo ro dob ségiyowe awang, inok témabang ro médot bé de sédo. Brab amun énggégumah ro, fénéno roy ruwowe timan awang taman gédét ro mélélé. ⁸ Amun énggito Simon Pedrowey ni fénrigo Jesuse ula-ula, ménlingkuwéd dob adafa nuwe brab ménbéréh mano, “Kadnan, kago fégédét begén, non ségétéwu étew ménusal.”

⁹ I funa nuwe énggóbéréh loo bé ni non toow fo ménggaif i Simone brab de dumo no bé kédooy de sédo énggédot ro. ¹⁰ Fiyon foy de nga Sebedeo, ro Santiago brab Juan dumo Simone gémalbék, ménggaif ro so. Atin ménbéréh i Jesuse dob Simone mano, “Kago mégilak. Brab éndaén séméléd gom sédo. Tidéw béleewe, fésélédé ku begom étew inok furay ro so Begén.”

¹¹ Amun féndunggu roy de awang ro, fénled roy kéluhanane, atin ménodor ro bé Jesuse.

Nuwa Jesusey ségétéwe fémuteén

¹² Wén i no sébaan fuweh dob sébaane ingéd, énggébalaka Jesusey ségétéwe étew fémuteén. Atin bé kérito nuwe bé Jesuse, méntédunsum dob fantade brab ménfégédaw-gédaw bé Jesuse mano, “Kadnan, buluk méuyot go, géfzádi-adino mo begén.”

¹³ Atin i Jesuse béntrén i kémér ne brab kénuwahén, brab ménbéréh mano, “Méuyotu. Adi-adi go!” Sonom béno, ménkédan i fémute ne brab ménadi-adi. ¹⁴ Atin bénréh Jesuse bé békén ureté no dob ségiyowe étew brab sénuguén mano, “Ay go dob fadie inok, féténgténgém i ménadi-adi gon. Tidéw béno, tulak go loo bé ménbéréhe dob Kitabé tidéw dob Moisese inok gétigay kéluhanay de étew ménadi-adi gon.”

¹⁵ Endob i urete fantag bé Jesuse ménlégéb mangéy méravy. Mélaw wén i toow fo médoo étew ménangéy dob Beene inok mégélingo ro bé uret ne brab féuwa ro bé de déruu ro. ¹⁶ Wén i no do gai, i Jesuse ménangéy dob sébaane gonon énda i étew de batí inok félébu brab démasal diyo.

Nuwa Jesusey ségétéwe kimoyén

¹⁷ Wén i no sébaan fuweh, témenoro i Jesuse. Atin diyo i de odoroy de Judio féndawét Fariseo ménasar beroy de téromo bé kitabe. Tidéw ro dob de sakuf Galilea brab Judea brab tidéw dob ingéde Jerusalem. Atin i

barakat i Tuluse méndiyo dob Jesuse inok uwaé noy de déméruruun bé de étew. ¹⁸ Atin énggumah i de étew ménuwit bé kimoyéne ténganggung ro. Kétaya ro uwitén mahur inok fédioé ro dob téngaanga Jesuse. ¹⁹ Endob énda i fiyo kéfélawang ro de, non bé médoowe do étew. Mélaw ménénik ro dob atéf i lawie. Tidéw bénou, ténosongo ro féagéwo ro de témutun mangéy fantad dob kérara i de étew dob adafa Jesuse. ²⁰ Amun énggito Jesusey kéfengintoow ruwe, ménbéréh dob ni étew kimoyén mano, "Adih, i de salaém ménfésagadén."

²¹ Tidéw bénou, i de Fariseo brab de téromo bé kitabé fénggitung ro maro, "Sedek émbéréh mélémurka i ni étew? Enda i géfésagad bé de sala ké békén i Tuluse saén!"

²² Endob i Jesuse gésobuto noy de itunga ro. Mélaw séménumbul mano, "Sedek séfénginsa gom dob de fédew gom fantag bé kébéréh guwe?"

²³ Toow na fo mélému bérhéhén, 'I de salaém ménfésagadén.' Non énda gito no ké wén i barakat gu de rémigo. Endob toow fo mérégén bérhéhén, 'Tindég go brab agéw go.' Non giton ké wén i barakat gu de rémigo.

²⁴ Endob félégétiga ku begom i fantage bé Nga i Kéilawane, sani Begéne. Wén i barakat gu brab kuwagib gu dob duniiae ni émfésagad bé de sala." Tidéw bénou, bérhéhén dob kimoyéne mano, "Bérhéh ku beem, tindég go brab agéw go uwitém i iroo muwe mule mangéy dob lawi me."

²⁵ Sonom bénou, téminindég i kimoyéne ni dob téngaanga ruwe brab ménagéw nuwitén i iroo nuwe brab ménule mangéy dob lawi ne démayéw bé Tuluse. ²⁶ Atin i kéluhanay de étew diyo, toow ro fo ménkéségyonan brab ménnggilak ro. Atin dénayéw roy Tuluse maro, "Enggítito tom do mékégaif bé ni gai."

²⁷ Amun énggilidén ni de rénigo Jesus, ménagéw brab énggito noy ségétewe étew kémubra buwis féndawét Lebi, ménstar dob de kubranan buwis. Brab ménsebéréh i Jesuse de mano, "Odor go Begén." ²⁸ Tidéw bénou, i Lebiwe fénledén i kéluhanane brab téminindég ménodor bé Jesuse.

²⁹ Atin rénigo Lebiwey sébaane dakél karagiya dob lawi ne. Brab diyo i médoowe do étew kémubra buwis brab médoó na étew ménstar mama brab miném bero Jesuse. ³⁰ Atin i de téromo bé kitabé brab de Fariseo, ménbutég-butég ro brab ménbéréh ro dob de kuyug Jesus maro, "Sedek ménslawék gom mama bé de kémubra buwis brab de ségiyo tete étew?"

³¹ Endob séménumbul i Jesuse mano, "I de fiyo kégélowoho no, énda kailanga roy muwae, éndob kailangay de wén déruu no. ³² Enda ménangéyu dini inok tabaré kuy de métintu étew. Yamula ménangéyu dini inok tabaré kuy de wén salaén inok gésénule ro."

³³ Atin wén i de ménénginsa dob Jesuse maro, "I de kuyug Juan sénga tékélid démasal ro brab fuwasa. Loo so bé de kuyug i de Fariseo. Endob i de kaam do kuyug mama brab miném ro."

³⁴ Endob i Jesuse sénumbulo no bero mano, “Ufama, i de kana dob uyote énda waléy tete i de fédéw ro taman énda tékédan i témerimawe lagéy. ³⁵ Endob gégumah i gaiwe ké édotén nén i témerimawe lagéy dob berowe, brab been nay no fuwasa ro bé do no gai. Ségiléw so bé de kagén kuyug, non amuk diniwu séna, énda fuwasa ro.”

³⁶ Tidéw béno, nuret Jesusey sébaane binuwaya fantag bé sébidanay mantuwe kétoroén brab tafaye kétoro i de Judio. Ménbérélh mano, “Enda i étew rémiyas bé mantuwe kégal inok fégétabung bé tafaye kégal. Non amuk rigoné no, mésinggula i mantuwe kégal, brab énda fo médaït féséréfaén i mantuwe bé tafaye de. ³⁷ Brab énda i étew mahur bé mantuwe arak dob tafaye ahuron arak rénigo bé kulit ayame, non móbétus i mantuwe arak dob tafaye ahuron brab mébinasa brab méitis i mantuwe arak. ³⁸ Endob fatut i mantuwe arak ahurén dob mantuwe kulit fédégon de. ³⁹ Brab énda i étew buluk géiném bé tafaye arak méuyot bé mantuwe de non mano, ‘I tafaye arak mas na fiyo.’ ”

Fantag bé gaiy kétéréné

6 ¹ Wén i no sébaan fuweh gai kétérén, i Jesuse brab de kuyugén téménara ro dob de médo do faréy. Atin i de kuyugén méndot ro de brab kénugut ro. Tidéw béno, ménama ro. ² Endob i de Fariseo diyo ménbérélh ro maro, “Sedek rigoné roy ni, non békén fatut rigonén galbék bé gaiwe kétérén?”

³ Séménumbul i Jesuse mano, “Aw énda ba énggébasana kom i rénigo Datu Dabide? Wén i no gai toowén fo mélayah beroy de sundalo no. ⁴ Atin ménahur ro dob lawi i Tuluse brab méndot bé ténu lake fan brab namaén, atin niraya no soy de dumo no de. Réxico noy ni fiyon fo ké dob kitabe, do fadi saén i fakaye mama bé ni fan.”

⁵ Atin féntaus Jesusey kóbérélh ne mano, “I Nga i Kéilawane, sani Begéne, wén i kuwagib gu fantag bé ati fakaye bé gaiwe kétérén.”

Nuwa Jesusey mén sadile kémérén

⁶ Bé sébaane man gai kétérén, ménahur i Jesuse dob lawi i de Judio fénagadafan inok témore. Atin diyo soy ségétéwe lagéy mén sadil i kuwonone bé kémér ne. ⁷ Atin i de Fariseo, sani de odoroy de Judio, diyo so beroy de témore bé de kitab. Atin ténu lik roy Jesuse inok gito roy funa ruwe de témo rémigo énda fakayén dob kitabe. Mélaw téneqténg ro inok gito ro ké muwa i Jesuse bé gaiwe kétérén. ⁸ Endob i Jesuse, gétuwa noy de itunga ro. Atin ménbérélh dob lagéye ni mén sadil i kémér ne mano, “Ay go dini, tindég go dob adafay kéluhanay de étew ni.” Mélaw témenindég brab ménagéw mangéy diyo. ⁹ Tidéw béno, ménbérélh i Jesuse dob de Fariseo brab dob de maistéro mano, “Ati karang gome de, ati isuwe fakay dob kitabé bé gaiwe kétérén? Réxico fiyo loo ké tete?”

Témabang bé étewe loo ké féléhuén?”¹⁰ Atin iling-ilng i Jesuse brab ménbéréh dob lagéye ni mano, “Bétérém i kémér me.” Atin bénétérén i kémér ne atin sonom béno ménadi-adi.

¹¹ Tidéw béno, toow fo ménkérit i de Fariseo brab de téromo. Atin ménséuret-uret ro bé ati rigoné ruwe bé Jesuse.

Fénémili Jesusey de folo bra ruwo Apostol

¹² Atin ménagéw i Jesuse bé béno gai ménangéy dob burure inok démasal, atin déménasal diyo dob Tuluse ségékelungonon. ¹³ Amun géfuwénén, ténabarén i de kuyugén, atin ménémili folo bra ruwo féndawét do Apostol, sani de sénugu. ¹⁴ Fénémilién i Simone (féndawétén so Pedro), brab Andrese dumo no sétiman idéng, brab Santiago, brab Juan, brab Filipi, brab Bartolome, ¹⁵ brab Mateo, brab Tomas, brab Santiagowe nga Alfeo, brab Simone ségétew toow fo gulaané noy ingéd ne, ¹⁶ brab Judase naga Santiago, brab Judas Iskariote beeney ménfékéfoe bé Jesuse.

Nuwa Jesusey de médoow étew

¹⁷ Atin léménudug i Jesuse beroy de Apostolén, brab téménindég dob sébaane gonon datar. Diyo soy médoowe do étew do kuyugén brab do étew tidéw Judea brab Jerusalem brab tidéw dob Tiro brab Sidon gédét dob dogote. ¹⁸ Ménangéy ro diyo inok mégélingo bé kékérén Jesuse brab féuwa bé de déruu ro. Atin nuwa Jesusey de démeruun brab de rénahukoy saitane, atin ménadi-adi ro. ¹⁹ Atin i kédoonoy de étew magafas ro inok gékuwaha ro, non i barakat ne ménsut tidéw dob Beene funay kéluhanane ménfiyo.

²⁰ Tidéw béno, ténéngténg Jesusey de kuyugén, atin ménbéréh mano, “Méoror gom do méskinan, non féguléwoy Tuluse begom. ²¹ Méoror gom do mélayaf béni, non fébésorén gom moso. Méoror gom do kémérew béni, non gébayat gom moso.

²² “Méoror gom amuk wén i mérarék begom sabaf bé kékunur gome Begén. Brab méoror gom amuk wén i sémiyaw begom brab bérého ro begom tete fémalanén gom sabaf bé kékunur gome Begén, sani Nga i Kéilawane. ²³ Féguaya gom bé béno gai non i baras gome toow fo médoow diyo dob lawayo. Non loo so bé niy rénígoy de katufua tom bé de gétah sénarigoy Tuluse muret bé kékérén ne.

²⁴ “Endob mékégédaw-gédaw gom do kawasa, non énggétéy gomén i de funa kom méguyaya. ²⁵ Mékégédaw-gédaw gom do bésor béléewe ni, non félayafén gom moso. Brab mékégédaw-gédaw gom do gébayat béléewe, non fébukuén brab fékérewén gom moso.

²⁶ “Mékégédaw-gédaw gom amuk kéluhanay de étew émbéréh do fiyo fantag bé begome, non loo bé niy kérigoy de katufua tom bé de gétah tugién do ubo-ubo sénarigoy Tuluse muret.”

Fantag bé kégédawe

²⁷Atin fentaus Jesusey kétoro ne mano, “Endob béréhé ku begom, fégédaw gom bé de sébanil begom brab rigo gom i fiyowe dob de mékérít begom. ²⁸Béréh gom i fiyowe dob de mingon begom brab dasala kom i de démufang begom. ²⁹Amuk wén i témamfiling bé fiféy me, fédayaém de témamfiling so bé ségébalae de. Brab buluk wén i mafas bé de kégal gom, iray gom soy kamisita gome. ³⁰I kéluhanay mongote dob begome, iraya kom. Brab i de médot bé de éntingayén kagom, kagom étukén de. ³¹Brab buluy kétaya kome rigonéy de étew dob begome, rigo gom so dob berowe.

³²“Amuk mégédaw gom bé de mégédaw begom saén, énda médait gom médot baras. Non fiyon foy de énda do métintu étew mégédaw ro so bé de mégédaw bero. ³³Brab amuk rémigo gom fiyo dob de rémigo fiyo dob begome saén énda médait gom médot baras. Non fiyon foy de énda métintu do étew rigoné roy loowe bé nan. ³⁴Atin amuk émféélét gom dob de wén fégébayadén de, énda médait gom médot baras. Non fiyon foy de tete étew émféutong ro so dob de dumo ro tete étew inok géséfule so kéluhanan. ³⁵Endob fégédaw gom bé de sébanil begom, brab rigo gom i fiyowe dob berowe. Atin féélét gom brab kagom ongot-ongotén i baliwa nuwe. Atin i baras gome dakél brab waléy gom do nga i Toowe Gérotor Tulus, non ségiléw gom bé Tuluse mégédaw bé de énda gétigan émfésalamat brab de tete étew. ³⁶Komon fégédaw gom loo bé kégédaw i Boh gome dob lawayo.

³⁷“Kagom kémukum bé de dumo gom, inok i Tuluse énda so kukumé no begom. Atin i de dumo gom ménsala, kagom dusanén bero, inok énda so dusanéy Tuluse begom. Fésagada kom i de dumo gom atin mélaw fésagaday Tuluse begom. ³⁸Iray gom dob de dumo gom étew, atin irayay Tuluse begom. I kédooy iray gome ségiléw bé kédooy iray i Tuluse begom. Atin toow fo médooy iray i Tuluse taman gaba-gaba.”

³⁹Brab ménbéréh man i Jesuse sébaan binuwaya mano, “Fakay bay langaféne marak bé dumo nuwe so langafén? Békén ba mélawu ro dob kalute? ⁴⁰I méganade békén gérotor na bé témoroe de. Endob i ségétéwe étew amun énggégéfaganadén fo toow, ségiléwén bé téménoroe de.

⁴¹“Sedek gito moy klohe sala i dumo muwe, éndob énda gito moy kaame sala toow na fo dakél! ⁴²Atin béréhé mo dob dumo muwe mamo, ‘Adih, téréno moy nan salaém.’ Endob wén i kaame sala toow na fo dakél. Fédayéw-dayéw go, éndob békén go fiyo étew. Téréno mo na métah i kaame sala toow na fo dakél, inok gétabanga moy dumo muwe témérén bé kaane kloh sala.”

Fantag bé fiyowe brab tetee étew

⁴³Féntaus Jesusey kékéréh ne mano, “Enda i fiyo kayéw mégonok bé tetee onok, taloo no tete kayéw mégonok bé fiyowe onok. ⁴⁴I ségiyo-giyowe kayéw

gélolon bé onok ne. Ufama, i sulu-suluwe énda mégonokén bé mangae. Brab i kayéwe suwaran énda mégonokén saging. ⁴⁵Ségiléw so bé étewe. I métintuwe étew rémigo fiyo, non tidéw dob fédéw ne fiyo. Atin i teteet rémigo tete, non tidéw dob fédéw ne tete. Non i bae émbéréh bé atiy diyoe dob fédéwe.

⁴⁶“Sedek fédawété kom Begén ‘Kadnan’, éndob énda rigoné kom i de béréréh ku begom? ⁴⁷Atiy méuyote fégédét Begén brab mégélingo bé béréréh kuwe brab odoro noy de kétoro gu, fégétiga ku begom ké ati kélasi nuwe étew. ⁴⁸Beeney ségiléwe bé étewe réménigo lawi brab féntindégén i liley ne dob émbagére batéw. Atin énggégumah i dunuke brab énggébela. Endob énda méntuwongén non féntindég dob rotor i batéw. ⁴⁹Endob i étewe énggégélingo bé de kékéréné gu éndob énda odoro no de, ségiléw bé étewe émfétindég lawi dob fantade énda i batéw féntindégo no bé de lileyén. Atin énggégumah i dunuke brab énggébela dob nan lawi. Atin méntuwong brab toow fo ménbinasa.”

Nuwa Jesusey sugu-suguéy sundalowe

7 ¹Amun énggilidén i Jesuse téromo bé de étew, ménagéw mangéy Kafernaum. ²Atin diyo i ségetéwe Romano kafitay de sundalo. Wén i sugu-sugué nuwe démeruu gédétén méléhu. Toow fo mégédaw i kafitane de. ³Mélaw amun énggelingoo noy fantage bé Jesuse, séménugu bé de dumo bé de odoroy de Judio mongot bé Jesuse témukaw damén dob lawi ne inok méuwa i sugu-sugué nuwe. ⁴Amun ménangéy ro dob Jesuse, ménfégédaw-gédaw ro de maro, “I ni étew médait ké tabanga mo damén. ⁵Non mégédaw betom do Judio, brab beeney ménfrigowé bé lawi geye fengadafan dini.”

⁶Mélaw ménodor i Jesuse bero. Amun éndaén mérayuén dob lawie ni ayo ro, i kafitane ni séménugu bé de dumo no malak bé Jesuse inok méréh de bé éndaén tausén, non énda médait kun i kafitane témanggaf bé Jesuse. ⁷Fénbéréh i kafitane mano, “Toow go fo gérotor étew, atin mélaw énda métotororu malak Beem. Toow go fo barakatan, mélaw fiyon fo ké béréréh mo saén, ‘Adi-adi’, gétuwa kuy waléy adi-adiy sugu-sugué kuwe. ⁸Gétuwa kuy ni non wén i mas gérotor sundalo sémuu begén. Brab wén soy do sundalo sugué ku. Atin buluk béréréh ku, ‘Angéy go diyoo’, mangéy diyo. Brab buluk maku, ‘Enggomén’, témingé ro. Brab buluk béréréh ku dob de sugu-sugué ku, ‘Rigo gom i ni’, rigoné ro.”

⁹Amun énggelingoo Jesusey ni, ménngaif de. Brab séménling dob de étew furay dob Beene brab ménbéréh mano, “Béréréh ku begom, fiyon fo ké dob de Judio, énda i énggitoo gu kéfengintoow loo bé ni étew.”

¹⁰Tidéw bénou, amun ménsefule i de sénugu dob lawi i kafitane, énggitoo sugu-suguéni ni adi-adi nén.

Ténébule Jesusey kénogo lagéye

¹¹Enda mérugayén tidéw bénou, ménagéw i Jesuse dob ingéde féndawét Nain. Ménodor i de kuyugén brab médoowe do étew. ¹²Atin amun

ménggumah ro dob bengaway no ingéd, ménggébalaka roy de étew méntidéw dob no ingéd. Ténanggung roy bangkaye, mangéy ro lémbéng. I bangkaye ni buntung nga lagéy i libune baléw. Wén i médoowe étew tidéw dob no ingéd ménodor ro may lémbéng bé no kénogo lagéy.¹³ Atin amun énggitoy Kadnane Jesus i baléwo no, ménuray i éna nuwe de. Atin ménbéréh mano, “Ina, kago kémérew.”¹⁴ Atin ménangéy i Jesuse dob niroo nuwe. Tidéw béno, kénuwahén atin méntétudoy i de ménuit de. Atin ménbéréh i Jesuse mano, “Adih, tek go!”¹⁵ Sonom béno, méntek i kénogo lagéye brab ménbéréh. Atin niray Jesuse dob idéng ne.

¹⁶ Toow fo ménggaif i de étew de diyo atin dénayéw roy Tuluse maro, “Ay niy toowe fo gérotor sarigoy Tuluse muret bé kékéréh ne, ménggumah dob betome. Ménlus i Tuluse mangéy dob begeye inok tabanga no begey do fénemilién.”

¹⁷ Atin mélaw i urete fantag bé Jesuse ménlégéb dob Judea, brab dob de ségiyo-giyo ingéd géliwét de.

I kéfénginsa Juan Bautistawe

¹⁸ Brab i de kuyug Juan nuret ro dob beeney kéléuhanay ni rénigo Jesuse. ¹⁹ Atin sénugu Juaney ruwowe bé de kuyugén mangéy ménginsa dob Jesuse maro, “Beeme bay no bénréh Juane gégumah ongot-ongoté key, taloo no fatut ongot-ongot gey na ségiyo?”

²⁰ Amun énggumahay de étew niy Jesuse, fénénginsaa ro maro, “Sénugu Juan Bautistawe begey mangéy ménginsa ké Beeme bay Kristowe bénréh Juane gégumah ongot-ongoté key, taloo no fatut ongot-ongot gey na ségiyo?”

²¹ Bé béno so, fén-adi-adi Jesusey de médoob déruunan brab do rénahuko saitan, brab nuwaén soy médoowe do langafén inok gérito ro. ²² Atin sénumbulo Jesusey de sénugu Juan mano, “Séfule gom brab uret gom dob Juaney de énggito gom rénigo gu brab de énggelingoo kom. I de langafén énggégito, brab de fikat énggéagéw, brab de bokongén énggégélingo, brab de fémuteén ménadi-adi, brab de ménléhu méntébule. Brab ureté key i Fiyowe Uret dob de méskinan. ²³ Atin toow fo méoror i étewe énda ruwo-ruwoy kéféngintoow ne Begén.”

²⁴ Amun ménuleén i de kuyug Juan, ménbéréh i Jesuse dob de médoob étew fantag bé Juane mano, “Ati nangéy gome ténéngténg dob gonone énda i étew de batí? Ségétew maak kéroon faniréy réfuruhé? Békén, non i kéunur Juane énda mífélukén loo bé kéroone. ²⁵ Aw ménangéy gom diyo inok téméngténg gom ségétew étew toow fo fiyoy kégal ne? Békén, non i de étew kémégal ro fiyo brab do kawasa, énda batí ro dob de gonon énda i étew de batí. Yamula batí ro dob de toow fo fiyo lawi kay de datu. ²⁶ Ati nangéy gome ténéngténg? Ségétew étew sénarigoy Tuluse muret? Hoo, éndob bérhéku begom, i Juane békén saén sénarigon muret bé kékéréh

i Tuluse. ²⁷I Juane niy fantage bé ni Ménsulat Kébérén i Tuluse amun bénréh i Tuluse Begén mano, ‘Sugué kuy sugu-sugué kuwe métah Beem. Been i témafaye bé kégumah me métah Beem.’ ” ²⁸Atin féntaus Jesusey kébérén ne mano, “Béréhé ku begom, énda i toow na fo gérотор bé Juane bé kéluhanay de étew ménumlah. Endob bé gayi kéguléw i Tuluse bé de étewén, i kéluhanay de térifantad étew sakuf i Tuluse, toow ro na fo gérотор bé Juane béléewe ni.”

²⁹Amun énggelingoo roy kébérén Jesuse, i kéluhanay de étew fiyon foy de lémiful kémubra do buwis, énggélolo roy aguwoy Tuluse katabuwan. Beroy de bénautiso Juan. ³⁰Endob i de Fariseo brab de témoro bé kitabe, ménika ro rémigo bé kétayay Tuluse. Atin berowey de énda bénautis Juan.

³¹Atin ménbérén i Jesuse man mano, “Ati féségiléwo kuwe bé de étew méuyag béléewe ni? Ati ségiléwo ruwe? ³²Ségiléw ro bé de nga ménasar dob fadiyane brab mika ro mémérémét. Tabar i de dumo ro bero maro, ‘I begeye ménsegagung gey, éndob énda ménsayaw gom. Brab léméninggéng gey linggéng ménléhuon, éndob énda kéménrew gom.’ ³³Non ménangéy diniy Juan Bautistawe ménfuwasa brab énda méninémén arak. Brab bénréh gom, ‘Sénaitanan.’ ³⁴Endob i Nga i Kéilawane, sani Begéne, ménangéyu dini, brab mamau atin minému. Brab ménbérén gom, ‘Ay niy ségétéwe étew arumén mama brab miném arak, brab wén i dumo no do lémiful kémubra buwis brab do tete étew.’ ³⁵Endob fégétigay Tulusey métintuwe dob kéluhanay de ngaén.”

I kégédaw i tetee libun

³⁶Atin wén i ségétéwe Fariseo, féndawét Simon, séménéngkat bé Jesuse mangéy dob lawi ne mama. Mélaw ménodor i Jesuse ménangéy diyo brab ménasar ro mama. ³⁷Brab wén i ségétéwe tete libun dob no ingéd. Amun énggétiga noy Jesuse ménangéy mama dob no lawi, ménangéy so diyo ménuwit katiya toow fo fiyo, ménféno mamut nor balilaga. ³⁸Amun ménfégédét dob Jesuse, téménindég gédét dob de sékéyén kémérew. Atin i de énloén léménuyut dob de sékéyén Jesus. Brab ténafo no bé buk ne brab narékén i de sékéyén. Brab lénulawa no bé mamute nor. ³⁹Amun énggito Simoney ni, ménbérén dob fédew ne mano, “Buluk Jesusey ségétéwe sarigoy Tuluse muret bé kébérén ne, gélolo no damén ké atiy ni libun mémiraw de, ségétew libun tete.”

⁴⁰Endob ménbérén i Jesuse mano, “Simon, wén i bérénéh kuwe Beem.” Séménumbul i Simone mano, “Maistéro, bérénéh begén.”

⁴¹Atin bénréh Jesusey ni binuwaya mano, “Wén i ruwowe étew énggétong dob ségétéwe émféélét kurta. I ségétéwe de énggétong limo ratuh, brab i ségétéwe de limo folo saén. ⁴²Amun énda i fégébayad ro de, fén sagada no bero, inok éndaén kailanga roy mayade. Na fénginsaa ku beem, ati isuwe toow na fo méimu bé étewe ni ménfétong bero?”

⁴³ Séménumbul i Simone mano, “Karangé ku, i toowe de méimu, been i enggéutonge médo.”

Atin bang Jesuse, “Katabuwan i nan sumbulém.” ⁴⁴ Tidéw béno, séménling i Jesuse dob libune ni, brab ménbérél man dob Simone mano, “Enggitoy rénigoy ni libun? Ménahuru dob lawi me, éndob énda méniray go wayég fégéurah gu bé de sékéy gu, loo bé adat tome do Judio fatut rigoné mo damén. Endob i ni libun fénreén i de sékéy gu bé de énloén, brab térrafo no bé buk ne. ⁴⁵ I beeme, énda narékém Begén loo bé adat tome témayakuf bé de kana. Endob i ni libun, tidéw fanay kégumah gu, énda téménréno marék bé de sékéy gu. ⁴⁶ Enda so lénulawa moy uléw guwe nor. Endob i ni libun, lénulaw noy sékéy guwe bé mamute nor. ⁴⁷ Mélaw bérhéku beem, giton i dakéle kéimuén non i de médo do salaén ménfésagadén. Endob i étewe kloh saén fénsagadan, kloh soy kéimu ne.”

⁴⁸ Atin bénréhén bé libune ni mano, “Di, i kéluhanay de salaém fénsagadanén.”

⁴⁹ Atin i de étew bero ménama diyo ménsébérél-bérél i de fédéw ro maro, “Ati keeyén i ni étew géfésagad do sala?”

⁵⁰ Atin bénréhén Jesuse man dob libune ni mano, “I kéféngintoow mey funay Tuluse ménukas beem. Taus go mule, atin kago émbuku.”

8 ¹ Brab énda ménrugayén tidéw béno, ménangéy i Jesuse dob de ségiyo-giyo ingéd ménuret bé Fiyowe Uret fantag bé kéféguléw i Tuluse bé de étewén. Brab ménodor i de folo bra ruwo kuyugén. ² Ménodor soy de libun fén-adi-adi no rénahukoy de saitan brab do démuun. Ségétew beroy Mariahe tidéw Magdala, dob beeney ménékédan i fitéwe timan saitan. ³ Ménodor soy Juanawe bawag Kusawe sénarigo Datu Herode, brab Susanawe, brab médo na do dumo libun. I ni do libun, témabang ro miray bé de kailanga ro Jesus.

I binuwayae fantag bé sémabuge

⁴ Wén i no sébaan fuweh, wén i médoowe étew tidéw dob ségiyo-giyo ingéd ménangéy ro dob Jesuse mégélingo. Amun médo ro ménslimud, nuret Jesusey ni binuwaya mano, ⁵ “Wén i ségétew étew ménangéy sémabug bé béne ne. Amun sabugé noy béne ne, i de dumo bé béne ne ménbégodoy dob doror i aguwone. Diyo gédaay de étew taloo no nama i de kloh manok. ⁶ I de dumoy de béneén ménsawér dob fantade wén i do batéw de. Tidéw béno, amun ménanayén témunoh, ménlaay ro non tikar i fantade de. ⁷ I de dumoy de béneén ménsawér dob fantade wén i do suwar de énda séna témunoh ro. Ménruk mélaw i de suwar séréngan bé de nohok, atin ménléhu i de nohok non lénimfung i de suwar. ⁸ Endob i de dumo bé de béne ménsawér dob fiyowe fantad, brab téménunoh ro brab méngegonok ro médo taman mératu takéf sénga sébaan béne.” Atin

féntaus Jesusey kékérén ne mano, “Fégitung gom fantag bé ni bénréh gu begom amuk méuyot gom de ké gésobuto kom.”

⁹Tidéw bénó, fénénginsaay de kuyugén ké ati atag i nan binuwaya.
¹⁰Sénumbulo no bero mano, “Dob begome do kuyug gu, Tuluse i émfégétigane de begom fantag bé kékéléguléw ne bé de étewén. Endob i de ni étingayén ménbunéy, brab énda émfayagén dob ségiyowe. Enggéléingoo ro say de ni fén-agéw dob de binuwaya, inok fiyon fo ké téngténgé ro, énda gito ro de. Brab fiyon fo ké gélingoo ro, énda gésobuto ro de.

¹¹“Ay niy atag i ni binuwaya énggéléingoo kom. I atag i ni béné, been i kékérén i Tuluse. Atin i ségiyo-giyowe klasi fantad ségiléw bé de ségiyo-giyo klasi étew. ¹²I de dumoy de béné ménlawu dob doror i aguwone. I atag i ni, wén i de étew énggéléingoo roy kékérén i Tuluse, éndob énggégumah i odoroy de saitan brab kénda noy ni kékérén dob de fédew ro. Been i nan i funa ruwe énda sémarig ro bé Tuluse. Brab énda mélaw gédoté roy mantuwe umul. ¹³I dumoy de béné ménawér dob fantade, wén i do batéw de. I atag i ni, wén i de étew énggéléingoo roy kékérén i Tuluse brab ténayakuf ro brab ménoror ro de. Endob énda ménbatién dob fédew ruwe. Sémarig ro bé Tuluse singkow saén. Endob buluk kérégénan ron, éndaén sémarig ro bé Tuluse. ¹⁴I dumoy de béné ménawér ro dob de duwaléy suwar. I atag i ni, wén i de étew énggéléingoo roy kékérén i Tuluse, éndob sabaf bé de kékuku ro fantag bé de kékuyag ro, brab kékuyot ruwe waléy kawasa, brab de kékuyot ro méguyaya, been i noy funa ruwe énda gérigo ro bé fatute kétayay Tuluse rigoné ro. ¹⁵Atin i de dumoy de béné ménawér ro dob fiyowe fantad. I atag i ni, wén i de étew énggéléingoo roy kékérén i Tuluse, brab toow fo nunuro ro. Féntaus roy késarig ruwe bé Tuluse atin rigoné roy kétayay Tuluse rigoné ro.”

¹⁶Atin ménbérén man i Jesuse mano, “Enda i ténumon solo inok bunéyé no dob bukag i kuréngé fénléngkéb, taloo no fédiyoé no dob fantad i katriwe. Yamula fédiyoé no dob fégonone de inok atiy mahure gito noy réndaw ne. ¹⁷I kéluhanay bénunéye, giton moso. Brab i kéluhanay dirungéné, gétigan moso. Mélaw atiy éndae gésobuto kom béní, gésobuto kom moso.

¹⁸“Komon féfiyo gom i kékégélingo gome. Non i étewe mégélingo brab munur, mémumanan nay kégésobut ne de. Endob i étewe énda munur, fiyon foy klohe fégitungé no gésobuto no, dotén dob beene.”

¹⁹Tidéw bénó, ménangéy dob Jesusey idéng ne brab de tuwaréyén, éndob énda gégégedét ro non bé médoowe étew géliwét de. ²⁰Brab wén i ménbérénhe dob Jesuse mano, “I idéng me brab de tuwaréyém diyo ro dob liyuwe. Méuyot ro géségito Beem.”

²¹Endob séménumbul i Jesuse mano, “Wén i ségiyo idéng gu brab do tuwaréy gu, non bé kéluhanay étewe mégélingo bé de uret i Tuluse brab munur de, beroy de maak idéng gu brab do tuwaréy gu.”

Féntéré Jesusey défuke

²² Sébaane de fuweh, ménda i Jesuse awang beroy de kuyugén atin bénréhén bero mano, “Mifar tom.” Mélaw ménangéy ro dob dogote ni. ²³ Amun diyo ro dob kérarae, énggfidong i Jesuse. Atin amun énggfidong, énggumah i émbagére défuk. Atin ménahuron wayég i awange, brab toow fo ménkakaidan ro. ²⁴ Tidéw béno, téningé i de kuyugén i Jesuse atin nulég ro maro, “Kadnan, gédét tomén mééléd.” Méntek i Jesuse brab nélénoy défuke atin féntanékén i de bagél. Tidéw béno, ménlingén-ngén. ²⁵ Atin ménbérén i Jesuse dob de kuyugén mano, “Hon i kéfengintoow gome de?”

Atin éngkéségiyan ro brab mégilak ro. Brab ménsébérén-bérén ro maro, “Ati ni étew Jesus? Fiyon i défuke brab de bagél géfétérén no.”

Dénédél Jesusey de saitan

²⁶ Mélaw méntaus ro mifar démunggu mangéy dob fantade Geraseno, dob difar i Galileawe. ²⁷ Amun téménéfad i Jesuse, bénalak i étewe rénahukoy de saitan tidéw dob sébaane ingéd diyo. I ni étew énda batien dob lawie, éndob ménrugayén félawas diyo bati dob de takub do lébeng. ²⁸⁻²⁹ Médoo gule i ni étew géméndam fiyon fo ké férисunén brab ikétén bé sangkaliey de sékéyén brab de kémérén. Been so ménséfantud brab uwitéy de saitan mangéy dob gonone énda i étew de. Amun énggito noy Jesuse, ménkes toow fo métanug, brab méntéléngkéb dob téngaanga Jesuse brab ménbérén toow fo métanug mano, “Jesus, Nga i toowe fo gérotor Tulus, fégédaw-gédawu Beem. Kago fédawéton begén.” Bénréhén i no non féngganaya Jesusey démédéle bé de saitan réménahukon de.

³⁰ Fénénginsaa Jesuse mano, “Ati dawét me?”

Atin séménumbul mano, “Laksaén i dawét guwe.” Non toow fo médooy de saitan ménahur dob beene. ³¹ Tidéw béno, ménfégédaw-gédaw i de saitan bé Jesuse bé békén damén dédélé no bero mangéy dob emfernoue.

³² Enda méravyén dob no gonon, diyo i médoowe do babuy témabtab dob méngulandige. Nongot i de saitan bé Jesuse ké fakay mahur ro dob de babuy. Atin ténungkas Jesuse bero. ³³ Sonom béno, i de saitan ménsut ro dob étewe brab ménahur ro dob de babuy ni. Atin i kéluhanay de babuy ni, ménraréy ro ménangéy dob fingase brab ménantéfor ro ménangéy dob dogote, atin ménléné ro.

³⁴ I de étew témalima bé de babuy ni, amun énggito roy ni ménrigo, ménsegéta ro brab nuret roy ni dob de dakél ingéd brab dob de ségiyo ingéd géliwét. ³⁵ Mélaw ménangéy diyo i de étew inok susiné roy ni ménrigo. Ménfégédét ro dob Jesuse brab énggito roy étewe bé gétaho félawas sénaitanan, ménsar gédét dob sékéy Jesuse wénén i kégalén, brab métintunén. Atin kéluhanay ro mégilak ro de. ³⁶ Nuret i kéluhanay de

énggégito de ké ati kéuwa Jesuse bé étewe ni gétaho sénaitanan. ³⁷Tidéw béno, i kéluhanay de étew tidéw dob ingéde Geraseno, nongot roy Jesuse tékédan, non toow ro fo mégilak. Mélaw, ménda i Jesuse dob awange, atin méntékédan. ³⁸I ségétéwe ni étew ténkédanay de saitan, nongotén bé Jesuse mano, “Modoru Beem.”

Endob bénréh Jesuse de mano, ³⁹“Ule go brab uretém i fiyowe rénígoy Tuluse dob beeme.” Mélaw ménule brab ménsugud-sugud dob kéluhanay gonone dob ni ingéd brab nuretén i kéluhanay rénígo Jesuse dob beene.

Nuwa Jesusey ruwowe gétew libun

⁴⁰Amun ménséfule i Jesuse mifar, toow fo méoror i de étew de, non ongot-ongoté ro diyo. ⁴¹Brab diyo wén i ségétéwe étew fédawétén Jairo, ségétew sarigon dob lawie féngadafan kay de Judio. Méntéléngkéb dob adafa Jesuse bé ongoté noy mangéy i Jesuse dob lawi ne. ⁴²Non i buntunge ngaén libun folo bra ruwo gébelintuwa, gédétén méléhu. Mélaw ménagéw i Jesuse modor de.

Amun magéw i Jesuse sénribukoy de médooy étew. ⁴³Diyo soy ségétew libun kéfasangan non foloén bra ruwo gébelintuwa i kéranas i adat ne. Brab méntéy i kurta ne féngébayadén bé de doktor, éndob énda foy ségétew géuwa de. ⁴⁴Tidéw béno, ménfégédét dob ségang Jesuse, atin kénuwahén i kégal ne. Sonom béno, téménrén i kéranas i adat ne. ⁴⁵Tidéw béno, ménénginsa i Jesuse mano, “Ati kéménuwahe Begén?”

Endob ménggidih i kéluhanane. Atin ménbéréh i Pedrowe mano, “Maistéro, toow fo médooy étewe géliwét Beem, brab sédantélo ro Beem.”

⁴⁶Endob ménbéréh man i Jesuse mano, “Wén i kéménuwah Begén, non énggétérédama kuy barakat guwe ménutsut tidéw dob Begéne.”

⁴⁷Amun énggétigay libune ni énggétiga Jesuse, ménfégédét lémukub atin méntéléngkéb dob adafa Jesuse brab dob téngaangay médoowe étew, brab bénréhén dob Jesuse sedek kénuwahén, brab bé béno so méntékow adi-adi. ⁴⁸Tidéw béno, bénréh Jesuse de mano, “Di, i káfengintoow mey funa muwe ménadi-adi. Taus go ule, brab kagonén émbuku.”

⁴⁹Amun bérhéh Jesusey ni, énggégumah i sugu-sugué Jairowe. Ménbéréh mano, “Amu, déménigurén i nga me. Endaén kailanga no anggaén i Maistérowa nan.”

⁵⁰Endob amun énggelingoo Jesusey ni, bénréhén dob Jairowe ni mano, “Kago émbuku. Sarig go saén atin adi-adiy nga me.”

⁵¹Amun énggégumah i ro Jesuse dob lawi Jairowe, énda i nuwitén mahur taus saliyu bé Pedrowe, brab Juane, brab Santiacowe, brab de lukés i ngae ni. ⁵²Atin i kéluhanay de étew ni dob lawie ni kémérew so brab ruungé roy ngae ni. Ménbéréh i Jesuse mano, “Kagom kémérew. Non i ngae ni énda ménléhuén, éndob ménfidong saén.”

⁵³Tidéw béno, sénbayat ro saén i Jesuse non gétiga roy ngae ni ménléhuén. ⁵⁴Endob génamak Jesusey kémér i ngae ni brab ténabarén

mano, “Di, tek go!” ⁵⁵Sonom béno, i ngae ni méntébule brab tékow méntek. Atin sénugu Jesuse bero bé iraya ro amaé no. ⁵⁶Toow fo ménggaif i de lukés i ngae ni. Endob bénréh Jesuse bero bé békén ureté ro dob de étew i ni ménrigo.

Sénugu Jesusey de folo bra ruwo kuyugén

9 ¹Fénsélimud Jesusey de folo bra ruwo kuyugén. Atin niraya no bero barakat inok géuwaa roy de démérueen brab géféraréyo roy de saitan. ²Brab sénugu Jesuse bero muret fantag bé kéféguléw i Tuluse bé de étewén, brab muwa bé de démérueen. ³Atin bénréhén bero mano, “Kagom muwit éntingayén, fiyon fo ké tugé, taloo no réban, fiyon amaén, brab kurta, taloo no lékasa kom kégal. ⁴Fiyon atiy lawie témayakuf begom, bati gom diyo taman tagaké kom i nan ingéd. ⁵Buluk wén no ingéd énda tayakuféy de étew begom, tékédan gom diyo, brab tag-tag gom i de bubuk sébuwan dob de sékéy gom émfégétigan bé kukuméy Tuluse bero.”

⁶Tidéw béo, ménagéw i de kuyugén ni ménangéy dob de ségiyo-giyo ingéd muret bé Fiyowe Uret, brab muwa ro do démérueen diyo.

⁷Bé béo, i Herode, sani méguléwe dob Galilea, énggelingoo moy de rigoné Jesuse. Toow fo ménggaif brab énda gésobuto no de, non wén i do étew ménbéréh ro bé Juan Bautistawe méntébule non maro ké Juan i Jesuse. ⁸Brab i de dumo bérhéroy Jesuse Elias méntéfegito. Brab i de dumo bérhéroy Jesusey toowe fo énggétah sénarigoy Tuluse muret méntébule. ⁹Endob ménbéréh i Herode mano, “Fénkéléng guy uléw Juane. Endob ati ni gélingoo ku fantag bé de ni?” Méuyot de ké gito moy Jesuse.

Fénwaléy Jesuse médooy klohe amaén.

¹⁰Amun énggéséfule i de apostol Jesus, bénréh roy de rénigo ro. Tidéw béo, nuvitén bero saén mangéy dob sébaane ingéd fénawé Betsaida.

¹¹Médooy de étew énggégélingo fantag bé ni brab ménfuray ro bero.

Méoror i Jesuse bé kégito nuwe bero, brab nuretén beroy fantage bé kéféguléw i Tuluse bé de étewén. Fén-adi-adi né soy de démérueen bero.

¹²Amun sémingkufén, i de folo bra ruwo gétew kuyug Jesuse ménangéy ro dob Beene brab ménbéréh ro maro, “Enda i batoy de étew ni dini. Féagéwém bero inok mangéy ro dob de ingéd gédét dini. Diyo gébéléy ro amaé ro brab diyo ro so fidong.”

¹³Endob ménbéréh i Jesuse dob de kuyugén mano, “Iraya kom bero amaé ro.”

Endob séménumbul ro maro, “Enda i amaén dini saliyu bé limowe timan fan brab ruwo timan sédo. Hon i ayo tome de mélényamaén bé ni kédoor étew?” ¹⁴(Wén i limo ngibu do lagéy diyo.)

Atin bénréh Jesuse bé de kuyugén mano, “Féésar gom i de étew sélimo folo sénga sélumfuk.”

¹⁵ Atin nodoroy de kuyugén i bénréh Jesuse bero. ¹⁶ Tidéw béo, éndot Jesusey limowe timan fan brab ruwowe timan sédo, atin léménéngag dob lawayo brab ménfésalamat dob Tuluse. Tidéw béo, sénbaad-baadén i de fan brab de sédo, brab nirayén dob de kuyugén inok saaré ro dob de étew. ¹⁷ I kéluhanay de étew ménama ro médoor taman ménbésor ro. Tidéw béo, ténimu i de kuyug Jesusey de sama i de amaén brab ménféno i foloe bra ruwo timan dakél biton.

I kéunur Pedrowe

¹⁸ Wén i no, i Jesuse ségétewén saén démasal ménfélébu. Brab i de kuyugén ménangéy ro dob Beene. Atin fénénginsaa Jesuse bero mano, “Ati kékéréd i de médoor étew ké ati Begéne ni?”

¹⁹ Séménumbul ro maro, “Wén i de émbéréh maro, Juan Bautista go kun. I de dumo maro, Elias go kun. Brab i de dumo maro, Beemey énggétahe sénarigoy Tuluse kun méntébule.”

²⁰ Tidéw béo, ménénginsa i Jesuse man mano, “Dob begome, ati kékéréd gome ‘fantag bé Begéne?’”

I Pedrowe séménumbul mano, “Beemey Kristowe sénugu i Tuluse inok méguléw go bé de étew.”

²¹ Atin bénréh Jesuse bero mano, “Kagom bérédén i ni dob ségiyowe.”

I kéuret Jesuse fantag bé kéléhu ne

²² Atin fentaus Jesusey kékéréd ne mano, “I Nga i Kéilawane, sani Begéne, médooy rasayé kuwe. Brab ikaay de odoroy de Judio brab de odoroy de fadi brab de témore bérédén, brab féléhué ro Begén. Endob dob gétéléwo nuwe gétérésangan, tébuleu.”

²³ Atin ménbéréd man i Jesuse mano, “Buluk atiy méuyote furay Begén, kailangan diguré noy kaane kétayan inok odoro noy kétayay Tuluse. Tidéw béo, kailanga no fédidayday bérédén ségiléw bérédén, fiyon fo ké féléhué dob kruse. ²⁴ Non atiy méuyote émféraru bérédén, méléhu. Endob i méléhu bérédén, gédoté noy umule magufusa. ²⁵ Ufama, fiyon fo ké i ségétéwe étew gédoté noy kéluhanay éntingayéne dob duniyae ni, énda i atagén buluk méléhu atin mangéy dob emfernawe. ²⁶ Buluk atiy mémalawé muret fantag bérédén, brab mémala so fantag bérédén, kékéréd gu, malané ku so buluk séfuleu moso réméndawu brab réméndaw i Boh guwe brab de téwak no. ²⁷ Bérédén ku begom i toowe, wén i do dumo begom énda méléhu ro taman gérito bérédén, gétérésangan bérédén.”

Enggiton i réndaw Jesuse.

²⁸ Waléw gétérésangan tidéw bérédén Jesuse bérédén, nuwitén i Pedrowe, brab Juane, brab Santiagowe, atin ménangéy ro dob rotor

i tuduke démasal. ²⁹I lala Jesuse démasal, i falas ne ménfégalin, brab i kégal ne ménwaléy fute réméndaw. ³⁰Sonom béno, méntékok méntefégitoy ruwowe gétew lagéy ménsebéréh bé Jesuse. I ni do étew, been i Moisese brab Eliase, sani do méntélataén sénarigoy Tuluse muret bé kékéréh ne. ³¹Réméndaw soy de falas ro. Atin sébéréh-béréh ro bé Jesuse fantag bé kéléhu ne dob Jerusalem moso sabaf been i funay Tuluse séménugu de dob duniyae. ³²I Pedrowe brab dumo nuwe énggfidong. Endob amun énggétékénéral ro, énggito roy kéréndaw Jesuse brab de ruwo gétew dumo no téménindég. ³³Amun féganayén tagak i de ruwo gétew étew i Jesuse, sénbérého Pedrowe mano, “Maistéro, toow fo fiyo non dob ni tom. Rémigo gey télén timan dung-dung. Sébaan i kaame de, sébaan i ka Moisese de, brab sébaan i ka Eliase de.” (Enda gétiga noy bérhé nuwe ni.)

³⁴Amun émbéréh sénay Pedrowe, méntékok i rawéne méntégalung dob berowe. Brab ménggilak i de kuyugén ké météléb ro bé rawéne. ³⁵Atin wén i bérhéhe tidéw dob rawéne ni mano, “Been i niy Nga guwe fénémili gu. Fégélingo gom.”

³⁶Amun téménrén i bérhéhe ni, énggito roy sébaa Jesuse saén. I de kuyugén méntanék ro fantag bé ni, brab bé béno énda i ségétew nureto ro bé de énggito ro.

³⁷Bé sébaane de fuweh, léménudug ro tidéw dob tuduke, atin bénalak i médoowe étew i Jesuse. ³⁸Wén i ségétewe lagéy dob kérara ruwe téménabar mano, “Maistéro, téngténgém i nga guwe. Been i buntunge nga gu lagéy. Ongoté ku dob Beeme uwaé mo damén. ³⁹Wén i no rahukoy saitane, atin tékok gékes. Atin i lowoh ne témingkog brab rémbew i ba ne. Sénga tékélid gémadam, fédawéto no, brab mérugay na fo tékédanay saitane. ⁴⁰Nongot gu bé de kuyugém ké féféraréyé roy saitane, éndob énda gagané ro de.”

⁴¹Ménbéréh i Jesuse dob de ménlimud mano, “Enda sémarig gom bé Tuluse, brab toow gom do tete étew. Lugoténun sétafik begom. Enda gétiga ku ké ati nay kérugay i ketingkél guwe sétafik begom.” Atin bénréh Jesuse dob ni lagéy mano, “Uwitém diniy nga ma nan.”

⁴²Amun fégédét i ngae ni dob Jesuse, rénahukoy saitane man brab ménuwar fulad-fulad. Tidéw béno téméningkog man. Atin fénférapéy Jesusey saitane, brab i ngae ni ménadi-adi. Tidéw béno, fénfélule Jesuse man mangéy dob boh ne. ⁴³Ménggaif i kéluhanay de étew bé barakat i Tuluse. Atin amun kéluhanay de étew ménggaif ro bé no rénigo Jesuse, ménbéréh dob de kuyugén mano, ⁴⁴“Kagom lifotén i bérhéhe kuwe ni begom. I Nga i Kéilawane, sani Begéne, fékéfo séko bé de étew sébanil Begén.” ⁴⁵Endob bé béno gai, i de kuyugén énda énggésobuto roy bérhé nuwe. Bénunéyén bero inok énda gétiga roy atag ne. Atin mémala ro de ménginsa ké ati atag ne.

⁴⁶ Wén i no sébaan fuweh, ménséédél i de kuyugén ké ati isuwe bero toow gérotor. ⁴⁷ Enggésobuto Jesuse ké atiy diyoe dob tuinga ruwe. Mélaw éndotén i ségétewe nga atin féntindégén dob tébing ne. ⁴⁸ Atin bénréhén bero mano, “Fiyon atiy étewe témayakuf bé ngae loo bé ni sabaf bé kéunur ne Begén, tayakufé no so Begén. Brab atiy témayakufe Begén, tayakufé no soy Tuluse ménféuwit Begén. Non atiy toowe térifantad bé begome, beeney toowe gérotor.”

⁴⁹ Tidéw béo, ménbérh i Juane mano, “Maistéro, énggito gey i ségétewe étew démédél do saitan nusarén i dawét me fégéféraréyén. Endob génlé gey non békén dumo tom.”

⁵⁰ Bang Jesuse, “Kagom gélén de. Non i békéné sébanil betom, dumo tom.”

I kéagéw Jesus mangéy Jerusalem

⁵¹ Amun gédétén i Jesuse démiyat dob lawayo, bénabaén fo ménsaréw mangéy Jerusalem. ⁵² Mémentah i Jesuse séménugu bé de kuyugén mangéy dob sébaane ingéd dob sakuf i Samariawe inok tafaya ro gono no diyo.

⁵³ Endob i de étew diyo dob Samaria, énda tényakuf ro de non gétiga ro ségétew Judio mangéy Jerusalem. ⁵⁴ I Santiagowe brab Juane, amun énggito roy ni, ménbérh ro maro, “Kadnan, méuyot go de ké mongot gey aféy tidéw dob lawayo inok métuwégo ro?”

⁵⁵ Endob séménling i Jesuse atin génléen bero. ⁵⁶ Tidéw béo, méntaus ro mangéy dob ségiyowe gonon.

⁵⁷ Amun taus ro nén, i ségétewe étew ménsébérh bé Jesuse mano, “Modoru Beem, fiyon fo ké ati ayo muwe de.”

⁵⁸ Séménumbul i Jesuse mano, “I de kufés, wén i tosong ahuro ro. Brab i de kloh manok, wén i salag ro. Endob i Nga i Kéilawane, sani Begéne, énda i gono ku témérén. Mélaw toow go fo kérégénan amuk modor go Begén.”

⁵⁹ Atin bénréhén dob ségiyowe étew mano, “Furay go Begén.”

Endob séménumbul i ni étew mano, “Kadnan, tungkasém na begén métah mangéy lémbéng bé boh guwe.”

⁶⁰ Séménumbul i Jesuse mano, “Félébéngém bé de étew énda munur ro Begén i de ménléhu ro. Endob i beeme, agéw go mangéy muret fantag bé kféguléwoy i Tuluse bé de étewén.”

⁶¹ Wén man i ségiyowe étew ménbérh mano, “Kadnan, modoru Beem. Endob tungkasénu na mangéy mégétaw dob de lukés gu.”

⁶² Séménumbul i Jesuse mano, “Enda i ségétew étew démadu atin séméling. Loo so bé de kuyug gu. Buluk séméling ro, énda métotor ro ké féguléwoy Tuluse bero.”

Sénugu Jesusey de étew

10 ¹ Tidéw béo, ménémili i Jesuse fitéw folo bra ruwo gétew do lagéy. Atin sénuguén bero séruwo-ruwo métah dob de ingéd

ayo no so. ²Atin bénréhén bero mano, “Wén i médo do étew méuyot munur bé Fiyowe Uret. Ségiléw ro bé de buka kétewén. Endob kloh saén i begome do kémétew. Dasal gom dob Kadnane inok émféuwit médo na do kémétew dob kaane ni kétewén. ³Amuk magéw gom, ingat gom. Non féuwit gu begom maak do bili-bili mangéy dob kérara i de itu talun. ⁴Kagom muwit réban, taloo no talufi, taloo no ségiyo sinilas. Brab kagom mérugay séuret-uret bé atiy étewe gébalaka kom dob de aguwon. ⁵Buluk mahur gom dob de lawi, béréh gom féfiyonéy Tulusey de étew bati dob ni lawi. ⁶Buluk i de étew dob no bati fiyo, brab tayakufé ro begom do sénugu gu, féfiyonéy Tuluse bero. Endob buluk énda fiyo ro étew, brab énda tayakufé ro begom do sénugu gu, énda so féfiyonéy Tuluse bero. ⁷Bati gom dob no lawi témayakuf begom. Atiy amaéne brab inéméne iray ro begom, tanggaf gom. Non i begome do gémalbék kailanga kom i sukay gome. Brab kagom téfégalin tidew dob sébaane lawi mangéy dob sébaane de. ⁸Buluk mahur gom dob sébaane ingéd, brab ténayakuf ro begom, ama gom i éntingayéne iray ro begom. ⁹Uwa gom i de démérueun dob no ingéd brab béréh gom dob de étew diyo makom, ‘Endaén mérugayén taman bé gaiwe féguléwoy Tuluse begom.’ ¹⁰Endob buluk mangéy gom dob sébaane ingéd brab énda tayakufé ro begom, angéy gom dob de aguwon dob no ingéd brab béréh gom makom, ¹¹‘Fiyon foy de bubuk sébuwan dob de sékéy gey, tag-tagé key so inok gétuwa kom i kukuméy Tuluse begom non nuret gey dob begomey fantage bé kékéulgéw i Tuluse éndob mika gom de.’ ¹²Atin béréhé ku begom, bé no gai, toow na fo gétimal i kékukum i Tuluse bé de étew dob no ingéd bé kékukum ne bé de tete étew dob ingéde Sodom.

¹³“Mékégédaw-gédaw gom do étew bati dob Korasin, brab begome dob Betsaida. Buluk i de mékégaif rénigo gu dob begome ménrigo so dob de ingéd Tiro brab Sidon, ménrugayén i de étew diyo mésar ro brab kéménégal ro do saku brab rénígono ro do awéw i de lowoh ro inok fégétuwa ro énggésénule ro bé de sala ro. ¹⁴Endob toow na fo gétimal i kékukum i Tuluse begom moso bé kékukum ne bé de étew dob Tiro brab Sidon. ¹⁵Brab i begome do étew dob Kafernaum, méuyot gom téfégérotor taman dob lawayo. Endob ibérén gom mangéy dob uleone emferno.”

¹⁶Tidew bénréh Jesuse dob de kuyugén mano, “Atiy mégelingoe begom, fégélingoé no so Begén. Brab atiy mikae begom, mika so Begén. Brab atiy mikae Begén, mika so bé Ménféuwite Begén.”

¹⁷Tidew bénréh, i fitéwe folo bra ruwo gétew ménagéw ro mangéy muret dob de ségiyo-giyo ingéd. Atin ménsefule ro toow fo moror brab ménbéréh ro maro, “Kadnan, fiyon foy de saitan odoro roy de béréhé key buluk labité key i dawét me.”

¹⁸Atin bénréh Jesuse bero mano, “Enggitoy guy Satanase ménlawu tidew dob lawayo maak kilot. ¹⁹Niraya ku begom barakat inok fiyon fo ké

gédaa kom i de ulé brab do sifitan, énda i kaid gom de. Brab i kéluhanay barakat Satanase sébanil betom énda i kaid tom de. ²⁰Endob kagom méoror sabaf sa bé i de saitan unuro ro begom. Yamula oror gom sabaf ménusatén i de dawét gom dob lawayo.”

²¹Bé bénso, fénoror i Rémogor i Tulusey Jesuse. Déménasal mano, “Abay Kadnay lawayo brab fantade, fésalamata ku Beem non fénggétiga moy ni dob de étew énda i féngganad ro, éndob bénunéyém dob de météldtébrab énggégéganad. Hoo Abay, ménrigoy ni non kaam kétayan brab késuwatan.”

²²Tidéw bénso, ménbéréh man i Jesuse dob de étew mano, “Sénarig i Abaye Begén i kéluhanane. Enda i gétigan bé atiy Ngae saliyu bé Abaye. Brab énda i gétigan bé atiy Abaye saliyu bé Ngae, brab fiyon atiy kétayay Ngae fégétigan no de.”

²³Tidéw bénso, séménling i Jesuse dob de kuyugén ménsbéréh bero énda i ségiyo dumo ro mano, “Toow fo fénfiyoy Tuluse begom bé énggégito gom. ²⁴Bérhéku begom, dob gétaho médo do datu brab do sénarigon muret bé kébéréh i Tuluse ménuyot ké gito roy énggito gome, éndob énda énggito ro de. Brab ménuyot ro mégélingo bé énggelingoo kome, éndob énda énggelingoo ro de.”

I binuwayaefantag bé mégédawe étew

²⁵Wén i no sébaan fuweh, i ségétéwe téromo bé kitabé ménangéy dob Jesuse. Atin ténukawa no fénénginsaan i Jesus mano, “Maistéro, ati fatute rigoné ku inok gédoté kuy toowe umul magufusa?”

²⁶Séménumbul i Jesuse mano, “Ati énggito muwe dob Ménuslate Kébéréh i Tuluse? Ati kégésobut me de?”

²⁷Séménumbul i ni lagéy mano, “Féimu go bé Kadnane Tulusém bé kéluhanay fédew me, brab bé kéluhanay kamatu me, brab bé kéluhanay itunga muwe, brab bé kéluhanay bagér me. Brab féimu go bé kéluhanay de dumo mo ringon so bé kéimu me bé kaame lowoh.”

²⁸I Jesuse ménbéréh mano, “Katabawan i nan késumbulém. Rigo moy ni inok gédoté moy tintuwe umul.”

²⁹Endob i ni lagéy mika kékmalanan. Mélaw ségiyo néen man i fénénginsa ne mano, “Endob ati dumo guwe fatut féimué ku?”

³⁰Atin séménumbul i Jesuse bé ni binuwaya mano, “Wén i no sébaan fuweh, i ségétéwe lagéy bé de Judio ménagéw tidéw Jerusalem léménudug mangéy dob ingéde féndawét Jeriko. Amun diyoén dob de agéwon, ténulis i de tulisan. Lénubag ro, brab éndot roy étingayéne kaan loo soy kégal ne. Brab tétagak ro gédétén méléhu. ³¹Tidéw bénso, ménngumah i ségétéwe fadi bé de Judio. Amun énggito noy ni lagéy, ténaraa no saén, atin méntaus magéw. ³²Tidéw bénso, ménngumah i ségétéwe tétabang dob de féngadafan, brab i beene Judio so. Amun

énggito noy ni lagéy, fénggédéto no brab ténéngténgén singkow, atin méntaus so magéw.³³ Tidéw béno, i gétéléwe étew ménggumah. Endob békén Judioy ni étew. Beeney étewe tidéw dob ségiyowe ingéd féndawé Samaria. Amun énggito noy ni lagéy ménfali, ménuray i éna nuwe de.³⁴ Fénggédéto no brab nuwaén i de falién brab bénausén. Atin fénkudaén i ni lagéy dob kuda ne brab nuvitén dob sébaane lawi kay de kana inok diyo fétausé noy kéfagifat ne de.³⁵ Dob gétunduge de fuweh, niraya no kurta i gefee bé ni lawi, brab bénréhén de mano, ‘Fagifatém i ni lagéy. Buluk kulang i ni kurta, bayada ku beem ké séfuleu.’ ”

Amun énggilid Jesuse nuret i ni binuwaya, fénénginsaa noy ségétéwe ni téromo bé kitabé mano,

³⁶ “Ati karang me de, ati isuwe bé de télew ni gétew étew i tintuve dumoy ni lagéy ténulis?”³⁷ Séménumbul i ni maistéro mano, “I ségétéwe ménggédaw de.”

Atin i Jesuse bénréhén dob ni lagéy mano, “Rigo mo loo bé rénigoy ni étew ménggédaw.”

³⁸ Amun diyo i Jesuse brab de kuyugén dob de aguwo ro, énggégumah ro dob sébaane ingéd. Diyo i ségétéwe libun fédawétén Martah. Atin ténayakufén bero dob lawi ne.³⁹ Wén i tuwaréy ne so libun fédawétén Maria. Ménasar gédét dob sékéy Jesuse brab mélangoing bé de toroé no.⁴⁰ Ménbuku i Martahe bé kéluhanay de galbékén témogoh, mélaw ménfégédét dob Jesuse ménbéréh mano, “Kadnan, émbuku go damén non i tuwaréy guwa nan fédayaé no begén gémalbék. Suguém inok tabanga no begén.”

⁴¹ Séménumbul i Jesuse mano, “Martah, toow fo ménbuku go bé médoowe galbékém.⁴² Endob sébaan saén i fiyowe kailangan rigonén. Fénemili Mariawey fiyowe de. Brab énda médotén dob beene.”

I dasal i Kadnane

11 ¹ Wén i no sébaan fuweh, amun énggilid i Jesuse démasal, i ségétéwe bé de kuyugén ménbéréh mano, “Kadnan, i Juan Bautistawe téneroén i de kuyugén démasal. Toroén gey so démasal.”

² Séménumbul i Jesuse mano, “Amuk démasal gom, dasal gom loo bé ni: ‘Abay, kéluhanay étewe damén fénagadafé ro Beem. Féguléwo mo damén i kéluhanay de étew.³ Irayan gey amaé key sénga fuweh.⁴ Fésagada mo begey bé de sala gey loo so bé kéfésagada keye bé de énggésala begey. Atin kago fédayaén begey météngkad rémigo sala.’ ”⁵ Féntaus Jesusey kékéréh ne mano, “Ufama, i ségétéwe begom wén i dumo no brab ménangéy go diyo bé kérara kélunganone brab ménbéréh go mamo, ‘Adih, fégédawanu. Irayanu télew timan fan.⁶ Non wén i kana gu mantu séna ménggumah brab énda i féama gu de.’ ”⁷ Atin sémumbul i ni dumo mo mano, ‘Kago anggaén begén. Ménfintuén i de béngawa key, brab fidongén i de nga gey.

Enda gééteku brab iray gu beem i nan ongoté mo.' ”⁸ Féntaus Jesusey kékérén ne mano, “Gétiga ku amuk démayday go mongot, iraya no beem bé ongoté muwe. Békén miray sabaf bé dumo muwe, yamula sabaf bé énda mémala go mongot. ⁹Mélaw béréréh ku begom, ongot gom dob Tuluse, atin irayén begom. Ay gom dob Tuluse amuk wén i kailanga kom, atin tabanga no begom. Dasal gom dob Tuluse atin sumbulo no begom, non buluk wén i mongot dob Tuluse bé éntingayéne, iray i Tuluse. ¹⁰Buluk wén i fégédét dob Tuluse bé de kailanga no, tabangay Tuluse de. Buluk wén i démasal dob Tuluse, sumbulo no. ¹¹Ufama, ségétew go boh, atin i nga me mongot sédo, énda iraya mo de ulé. ¹²Taloo no mongot onok manok, énda iraya mo de sifitan. ¹³Fiyon fo ké tete gom étew, gétiga kom soy miraye bé éntingayéne fiyo dob de nga gom. Labi nay Tuluse toow fo fiyo, gétiga noy miraye fiyo na begom. Beeney Boh gome dob lawayo, brab irayén i Rémogor ne dob de étew mongot de.”

¹⁴Wén i no sébaan fuweh, dénédél Jesusey saitane mow ménahur dob ségétewe étew. Amun i saitane ni méntékédan, énggérénéh i étewe ni rénahuko no. Atin i de ménlimud do étew ménggaif ro de. ¹⁵Endob i de dumo bé de ménlimud ménbérénéh ro maro, “Beelsebul, sani Satanase, i odoroy de saitan, i ménirayane de barakat inok tékédan.”

¹⁶Brab i de dumo bé de étew ténukawa roy Jesuse bé kéongot ruwe de bé féténgtengén i fégélonone de tidew dob lawayo, inok gétiga ro tidew dob Tuluse. ¹⁷Endob énggétiga Jesusey de itunga ro, mélaw ménbérénéh mano, “Ufama, i ingéde énda séfagayun ro brab sétiboh ro, mébinasa. Taloo no i ségékurénge étew dob sébaane lawi énda so séfagayun ro brab sékrit ro, waléy mébinasa. ¹⁸Buluk i de sugu-sugué Satanas mésébaad énda géséfagayun ro, énda so gétindég i fangangatura nuwe. Bénréh guy ni non béréréh kom i démédélu saitan bé barakat Satanase. ¹⁹Atin i fégédédl i de kuyug gom de, énda usaré roy barakat Satanase. Mélaw fégítøy de kuyug gom békén ka Satanas i barakat guwe. ²⁰Endob démédélu saitan bé barakat i Tuluse. Atin mélaw énggiton énggumah dob begomey gaiwe méguléw i Tuluse bé de étewén.”

²¹Tidew beno, fénggétiga Jesuse bero bé toow na fo barakatan bé Satanase mano, “Ufama, i Satanase ségiléw bé ségétewe mantay bé lawi ne. Buluk i émbagére étew bantaya noy lawi ne, brab wén i kulangé no, i de insodén énda i géfénakaw de. ²²Endob buluk gégumah i ségiyowe étew toow na fo émbagér bé gefee lawi, gédoté noy kulangé nuwe sarigoy gefee de. Atin gédoté no soy kéluhanay languntamane dob lawi ne brab baade noy kéluhanay de éndotén.

²³“I éndae modor Begén, sébanil Begén. Brab i mikae sétabang Begén, alangé no Begén.

²⁴“Buluk i saitane mésut tidew dob étewe rénahuko no, sémugud dob tikare gonon séméléd téréno no. Endob buluk énda i gito no téréno no,

émbéréh mano, ‘Séfuleu dob étewé sungu gono ku téngak gu.’ ²⁵Tidéw béno, séfule brab gito noy tafaye ténidéwo no mélinis brab métintu né. ²⁶Tidéw man béno, mésut brab muwit fitéw gétew mas na tete saitan dumo no mahur dob no étew. Mélaw i no étew toow na fo méfasang bé féganaye goho no.”

²⁷Amun bénréh Jesusey ni, i ségétewe libun tidéw dob de ménsélimud ménbéréh mano, “Toow fo méoror i libune ménggenga Beem brab réméniton Beem.”

²⁸Endob ménbéréh i Jesuse mano, “Toow na fo méoror i de mégélingo bé kékéréh i Tuluse brab odoro ro.”

I fégéolonone niray Jonase

²⁹Amun i de étew minut ro médoó ménlimud géliwét bé Jesuse, ménbéréh mano, “Toow fo tete i de étew bé ni gai. Mongot ro do mékégaif inok fégéoloné ro ké Begén i Kristowe, sani fénemili i Tulus méguléw. Endob énda i méiray de bero saliyu bé mékégaife loo bé ménrigowe bé Jonase. ³⁰Loo bé fégéolonone nirayén dob de étew dob Ninibé amun ménsut i Jonase méuyag tidéw dob sur i dakéle sédo, iraya ku séko fégéolonon i de étew bé ni gai. ³¹Bé gaiwe kémukum i Tuluse, témbo i baiwe tidéw dob ingéde Séba bé de étew méuyag béni. Non sénugudén tidéw dob tamanay duniyae mégélingo bé kégétiga Solomone. Endob béléewe ni wén i ségétewe mas na gétigan bé Solomone ay ni, been i Begéne, éndob énda munur gom Begén. ³²Atin bé gaiy kékukum i Tuluse, i de énggétah étew dob Ninibé témindég ro so témbo bé de étew méuyag béléewe. Non ménunur ro brab énggésénule ro bé uret Jonase. Endob béléewe wén i mas na gérotor bé Jonase ay ni.

³³“Enda i ségétew téumon solo atin fédiyoé no dob énggébunéye taloo no dob fantad i kuréngé fénléngkéb. Yamula fédiyoé no dob fégonone de inok atiy gégumahe étew gito noy réndaw ne. ³⁴I moto muwe maak solo i lowoh me. Buluk fiyoy moto muwe, maak géfékaya non gérito go. Endob buluk i moto muwe ménadil, maak délémon non énda gérito go. ³⁵Ingat gom mélaw inok i réndawe dob beeme békén waléy délémon. ³⁶Mélaw buluk tintu munur go, i lowoh me méséno bé géfékaya, brab énda i délémon de, non maak rémendaw i soloe dob beeme.”

Fantag bé de Fariseo

³⁷Amun énggilid i Jesuse émbéréh, i ségétewe Fariseo sénengkatén mangéy mama. Mélaw ménodor i Jesuse mangéy dob lawi ne brab ménasar diyo mama. ³⁸Amun énggitó noy Jesuse énda méngguseén loo bé adat i de Judio, ménggaif i Fariseowe ni. ³⁹Bé béno so, ménbéréh i Jesuse mano, “I de begom do Fariseo, urahé kom i lowoh gome fingé fuweh

saén. Endob dob de fédéw gom ménfено bé tetee itungan brab do sala. Ségiléw gom bé de tabu mélinis fingé fuweh saén, éndob dungisan dob bukag ne. ⁴⁰Dufang gom do étew. Békén ba rénigoy Tulusey de fédéw gom loo soy de lowoh gom? ⁴¹Mélaw iray gom do limus bé étingayéne kagom atin waléy gom mélinis dob bukage so.

⁴²“Endob mékégédaw-gédaw gom do Fariseo non niraya kom i Tuluse fiyon bé géfoloe bé de faninu nohok gom, éndob dénigur gom i métintuwe brab kéimue bé Tuluse. I ni niray gom fatut rigoné kom éndob kagom digurén i sébaane de.

⁴³“Mékégédaw-gédaw gom do Fariseo non méuyot gom bé fiyowe do saran dob lawie féngadafan. Brab méuyot gom ségifaén fégadatan dob de fadiyan. ⁴⁴Mékégédaw-gédaw gom non i de étew marok waléy ro fiyo bé kéfuray ruwe begom, éndob been i funa ruwe waléy tete. I begome maak do lébéng énda i tandaén, gédaay de étew énda gétiga ro de, funa ro gélyén.”

⁴⁵Atin i ségetéwe bero téromo bé de kukuman ménbéréh mano, “Maistéro, bé kóbéréh me bé nan, fénémala mo so begey.”

⁴⁶Séménumbul i Jesuse mano, “I begome téromo bé kitabe, mékégédaw-gédaw gom, non sugué kom i de étew bé médoowe. Maak féoboé kom bero do toow fo émbécat, éndob énda tétabang gom de.

⁴⁷Mékégédaw-gédaw gom non ségiléw gom bé de katufua kom énda munur ro bé de sénarigoy Tuluse muret. Rémigo gom fiyo do lébéngon kay de fénléhu i de katufua kom. ⁴⁸Mélaw féngétiga kom i ménagayun gom bé rénigoy de katufua kom non beroy do ménméléhu brab begom i do rémigo do lébéngon. ⁴⁹Been i funane ménbéréh i Tuluse bé kégétiga nuwe mano, ‘Fén-uwito ku bero do muret fantag Begén, brab i de dumo de fénléhu ro brab i de dumo de fénrasay ro bero.’

⁵⁰“Been i funa kome mékukum, non ménamung gom bé kíféléhue bé de kéluhanay sénarigoy Tuluse muret tidéw bé kélémbag i duniyae.

⁵¹Tidéw bé kéléhu Abele taman bé kéléhu Sakariase, fénléhu dob élét i ahayane féngadafan tulakan brab mékétéfuwe sibéy. Hoo, béréhé ku begom i de étew méuyag béni, mékukum ro sabaf bé de ni.

⁵²“Mékégédaw-gédaw gom do téromo bé kitabe, non bénunéy gom i toowe dob de méuyot gétigan de. Brab mika gom munur bé toowe, atin anggaé kom i de méuyot munur.”

⁵³Amun énggilid i Jesuse bé kóbéréh ne, ménkédan dob no gonon, éndob i de Fariseo brab de téromo bé kitabé nangga ro bé de mékérit kériklamo ro brab médoó étingayén fénginsaé ro ⁵⁴tukawa ro téngkadén inok sumbulo no bero bé békéne damén katabawan.

12 ¹Amun i ngibunéne do étew ménslimud géséeda ro do sékéy, féngganay Jesusey béréhé nuwe bé de kuyugén sungu mano, “Ingat gom inok énda miring gom bé kénur i de Fariseo ubo-ubo saén. ²I

kéluhanane rénigoy de étew maak ténléb, mébukeh séko. Brab i kéluhanane dirungén, émfayag séko. ³ Atiy bérhémuwe dob kélungonone, gélingoon so dob fuwehe. Brab atiy ségurawé muwe dob gonone fénintu, been so gélingoon dob médoowe do étew.

⁴ “Bérhéku begom do dumogu, kagom mégilak bé géféléhue bé lowoh gome, éndob saliyu bé ni éndaén i gérígono no. ⁵ Bérhéku begom i ati fatute kégilaka kom. Fégilak gom bé Tuluse non géféléhuo noy lowoh gome brab wén soy barakatén émféangéy begom dob emfernowe. Hoo, bérhéku begom fégilak gom de.”

⁶ Atin ménbéréh man i Jesuse mano, “Ufama, i de kloh manok toow fo mélémuy kéféléléye bero dob fadiyane. Endob énda i sébaan de lénifot i Tuluse. ⁷ Atin i begome mas gom na balilaga bé de kloh manok. I Tuluse énggétuwa no fiyon firoy i de buk gom dob de uléw gom. Mélaw kagom mégilak.

⁸ “Bérhéku begom, ati murete fantag bé kéunur ne Begén dob de étew, ureté ku soy fantage bé kéunur ne dob adafay de télakiy Tuluse.

⁹ Endob atiy démirunge Begén dob adafay de étew, dirungé ku so moso dob adafay de télakiy Tuluse.

¹⁰ “Atiy émbéréhe tete fantag bé Nga i Kéilawane, sani Begéne, émfésagadan. Endob i émbéréhe tete fantag bé Rémogor i Tuluse énda émfésagada no.

¹¹ “I de sébanil Begén, buluk uwité ro begom dob de féngadafan taloo no dob de gémamak kukuman, inok métébo gom sabaf bé kéunur gome Begén, kagom mégilak taloo no émbuku ké ati késumbul gome. ¹² Non i Rémogor i Tuluse toroé no begom ké atiy fatute bérhékom.”

I binuwayae fantag bé kawasawe étew

¹³ Wén i médoowe ménsélimud géliwét bé Jesuse. Ménbéréh i ségétéwe de dob Jesuse mano, “Maistéro, bérhéhém bé ofo guwe, irayén begén i baad guwe bé de languntaman fénled i boh geye begey bé kéléhu ne.”

¹⁴ Séménubul i Jesuse mano, “Enda i atura ku de maad ké ati séfiroy begom.” ¹⁵ Atin ménbéréh i Jesuse dob de étew mano, “Kagom arumén! Békén bé kékawasawey funay étewe fiyoy kéuyag ne.”

¹⁶ Atin nureto Jesuse bero sébaan binuwaya fantag bé ségétéwe étew kawasa mano, “Wén i safadén, fiyoy kéeruk i de nohok-nohokén. ¹⁷ I kawasawe étew ménggitung, ‘Enda i fégono ku bé kéluhanay kéntew guwe. Ati rigoné kuwe?’

¹⁸ Gétuwa ku, ay ni rigoné kuwe. Gébaé kuy kiwot guwe, brab rémigowu bé dakéle de, inok gétimuo kuy de kéntew gu brab de étingayén kagén. ¹⁹ Tidéw béno, mégitungu, Ségétewu bagian. Wén i kagéné bé étingayéne fiyo kailanga ku bé firoye gébélantuwa. Témérénu. Mamau, minému, brab méguyayau.’

²⁰ Endob i Tuluse bénrého noy ni étew mano, ‘Dufang go! Bé ni kélungonon, méléhu go. Mélaw békénén kaam i étingayéne nitongém.’”

²¹ Atin féntama Jesusey ni binuwaya mano, “Ségiléw bé niy aruméne kawasa étew énda modorén bé kétayay Tuluse.”

²² Atin bénréh Jesuse dob de kuyugén mano, “Kagom émbuku fantag bé kéuyag gome, bé ati amaé kome, taloo no bé lowoh gome, bé ati kégalé kome. ²³ Wén nay labi mélaga bé amaéne funa kom méuyag, brab wén nay labi mélaga bé kégale kay lowoh gome. ²⁴ Fégitung gom i de kloh manok. Enda mohok ro taloo no kémétew ro, brab énda i kiwot ro. Endob féamaéy Tuluse so bero. Atin mas gom na balilaga bé klohe manok.

Mélaw toow na fo féamaé no begom. ²⁵ Enda i étew géfétaah bé kéuyag ne bé kékuku ne, fiyon fo ké ségéuras saén. ²⁶ Amun énda gérigono kom i ni kloh éntingayén, sedek émbuku gom bé de ségiyo? ²⁷ Fégitung gom i de flores. Méruk ro fiyon fo ké énda gémalbék ro, taloo no rémigo ro do kégal ro. Endob bérhéku begom, fiyon i Solomone toow fo kawasa datu, énda i kégalén loo bé de fiyo do falasén do flores. ²⁸ Endob buluk loo bé nan i kéfékégal i Tuluse bé de kéroon bé singkowe ay nan méuyag, atin bé démoe ibérén inohén, békén ba fékégalé no so begom? Toow fo kloh i kéfégirugut gome. ²⁹ Kagomén démoyun émbuku bé amaé kome brab inémé kome. ³⁰ Non i de étew énda méngintulus ro, been i niy fégitungé ruwe taman émbuku ro. Endob i Abay gome dob lawayo gétiga noy kailanga kome. ³¹ Mélaw fidaya gom i Tuluse méguléw begom, atin iraya no begom éntingayén kailanga kom.

³² “Do kuyug gu, kagom mégilak fiyon fo ké énda médoogom, non kétayay Abay gome Tulus ké begom soy méguléw beroy Tuluse. ³³ Fébéléy gom i languntama kome, brab iray gom dob de méskinan inok kawasa gom dob lawayo. Non dob lawayo, i de éntingayé kom énda i réménég de, taloo no ménakaw de, brab énda i ifés minasa de. ³⁴ Non hon i gonoy tamuk me de, diyo soy itunga muwe brab fédew me.”

Fantag bé késéfule Jesuse

³⁵⁻³⁶ Atin ménuret man i Jesuse sébaan binuwaya fantag bé késéfule ne mano, “Ingat gom bé késéfule guwe loo bé de sugu-suguén ongot-ongot bé amu ruwe. Iring gom bé de ni sugu-suguén, mingat ro ongot-ongot bé amu ruwe séfule tidéw dob sébaane uyot. Maginsod ro, brab féréndawé roy solo ruwe inok géingat ro. Buluk gérumah, magad saén géungkaa roy bengawane. ³⁷ Toow fo moror i de ni sugu-suguén bé kégumah i amu ruwe, non énggéingat ro ongot-ongot bé késéfule ne. Bérhéku begom, i ni amu kémégal inok kémána brab fésaré noy de sugu-sugué no brab duwoto no bero. ³⁸ Toow ro fo moror buluk énggito no bero énggéingat ongot-ongot fiyon fo ké gérumah kérara kélungonon, taloo no ménalém kélungonon. ³⁹ Atin fégétédém gom i ni, buluk i gefee bé lawie gétiga noy ati urase gérumah i ménakawe dob lawi ne, ingata no brab énda fidayaé no de ké ahuroy ménakawey lawi ne. ⁴⁰ Brab i begome so, fatut mingat

gom non i Nga i Kéilawane gégumah dob gaiwe énda karangé kom de gégumah.”

⁴¹ Ménénginsa i Pedrowe mano, “Kadnan, bérhé moy ni binuwaya dob begeye saén do kuyugém, taloo no kay kéluhanane?”

⁴² Atin i Kadnane séménumbul mano, “Atiy mégérore brab métilléde sugu-suguén, been i sénarigoy amu ne máguléw bé kéluhanay galbéké brab iraya noy de dumo no sugu-suguén bé de karo baad bé de amaén bé katabuwane gai. ⁴³ Toow fo méoror i nan sugu-suguén ké gitoy amu ne gémalbék bé késéfule ne. ⁴⁴ Bérhé ku begom, i amu i nan sugu-suguén sarigé no dob beeney kéluhanay languntama nuwe. ⁴⁵ Endob mékégédaw-gédaw i ni sugu-suguén buluk mégitung mano, ‘Mérugay nay késéfule i amu guwe.’ Tidéw béno, féganayé no tafésén i de dumo no sugu-suguén do lagéy brab libun, atin mama brab miném taman molon. ⁴⁶ Ati keeyén i mérigowe amuk i amu i nan tete sugu-suguén gégumah bé gaiwe békén karangé no, brab énda gétiga no de? I ni amu, amuk gito noy tetee rigoné no, tor-toré noy ni sugu-suguén atin fédiyoé no dob gonone emferno beroy de kéluhanay de énda munur.

⁴⁷ “I ni sugu-suguén gétiga no fo toow i kétayay amu ne rigonén, éndob énda rigoné no de. Mélaw i ni sugu-suguén mékukum moso toow fo gétimal. ⁴⁸ Endob i sugu-suguéne énda gétiga noy kétayay amu ne rigonén, atin réménigo énda fiyo no, mékukum éndob énda toowén gétimal. I sénarigone bé médoowe, médooy soy ongoténe de. Atin i nirayane médooy soy ongoténe de.

⁴⁹ “Ménangéyu dini inok muwit maak aféy dob duniyae ni, brab méuyotu de damén ké mérinoén. ⁵⁰ Kéfasanganu séko, brab tete i fédew guwe ni taman gilid mérigoy ni. ⁵¹ Ati karangé kome funa ku ménangéy dini? Inok éndaén i sékérít dob ni duniya? Békén. Ménangéyu dini inok mésébaad i de étew. ⁵² Tidéw béleewe, i de limo gétew dob ségékuréngé, mésébaad ro sabaf bé ati Begéne ni. I télewe de énda magayun ro bé ruwowe de, taloo no i ruwowe de énda magayun ro bé télewe de.

⁵³ Mésébaad ro sabaf bé kéunur ruwe. I bohe brab de ngaén lagéy énda séfagayun ro. Loo so bé idéngé brab de ngaén libun, énda séfagayun ro.”

⁵⁴ Ménbéréh soy Jesuse dob de médooy étew mano, “Dob ni gonon, buluk gégitoy gom bé rawéne dob élédon, magad i kékéréh gome, ‘Rémana séko.’ Atin rémania ba. ⁵⁵ Atin buluk wén i réfuruh tidéw déligdigan, bérhé kom, ‘Méduf sékoy gaiwe ni.’ Atin méduf ba. ⁵⁶ Gétiga kom i mérhéé bé atag i éntingayéne dob fantade ni brab dob lawayo. Sedek énda gétiga kom i atag i de rigonéy Tuluse bé béleewe? Non mikay gom munur.

⁵⁷ “Atin sedek énda mégitung gom bé atiy fiyowe rigoné kom inok énda mékukum gom moso? ⁵⁸ Buluk wén i dumo mo sébanil, atin uwité no beem dob de kémukum inok sétiyawan, buluk diyo gom séna dob de

agéwon, béréh go fiyo inok séfégayun gom bé énda séna gégumahén dob adafay de kémukum. Non i de kémukum séko irayén beem dob de sundalo, brab i de sundalo férисунé ro séko beem.⁵⁹ Béréhé ku begom, énda séko gésut go tidéw dob férисунone taman énda gébayada moy kéluhanay késalaa muwe.”

13 ¹Bé beno so, i médoowe do étew bénréh ro dob Jesusey fantage bé de étew tidéw Galilea. Fénféléhu i Datue Pilato bero bé lala ruwe témulak dob Tuluse. ²Séménumbul i Jesuse mano, “Amun i do no étew tidéw Galilea fénléhu loo bé no, makom ké toow ro na fo wén i sala ro bé de dumo ro bati dob Galilea, brab been i funa ruwe ménléhu. ³Béréhé ku begom, békén. Endob saliyu ké gésénule gom témagak bé tetee adat gom, méléhu gom so ségiléw bé berowe. ⁴Atin fantag bé de folo bra waléw ménléhu dob Siloe bé kétuwongoy tambalae bero, makom ké mas na wén i sala ro bé de dumo ro bati dob Jerusalem? ⁵Béréhé ku begom, békén. Endob saliyu ké gésénule gom témagak bé tetee adat gom, méléhu gom so ségiléw bero.”

⁶ Atin bénréh Jesuse beroy ni binuwaya mano, “Wén i ségétéwe étew, wén i safadén. Nohokén i sébaane kayéw méama i onok ne. Nangéyén ténéngténg ké wén i onokén, éndob énda i énggito no de. ⁷Tidéw beno, bénréhén dob étewe témalima bé safad ne ni mano, ‘Bé rugay i télewe gébélintuwa démoyunu séfule séméléd ké wén i onok i ni kayéw, éndob énda foy énggito gu de. Mélaw tuwongém, non ransiné no saén usarén i ni fantad.’ ⁸Endob séménumbul i étewe ni témalima de mano, ‘Fédayaén na bé rugay i ségébélintuwa atin kaluto ku géliwét de. Brab rigono ku abuno funa no bobo. ⁹Buluk bé sébaano bélintuwa gégumah mégonok, fiyo. Buluk énda, been nay no tuwongén.’ ”

Nuwa Jesusey libune

¹⁰ Wén i no gai kéféngadaf i de Judio, sani gaiwe kétérén. Dob no gai, téménoro i Jesuse dob sébaane lawi féngadafa ro. ¹¹ Wén i ségétéwe libun diyo békutén non féndéruuy saitane. Been i funa nuwe ménfoloén bra waléw gébélintuwa énda géfééntangén témindég fiyon kloh. ¹² Amun énggito Jesuse, sénbérého no métanug mano, “Adi-adi gon!” ¹³ Brab nahay Jesusey de kémérén dob libune ni, brab bé beno so énggétindég mééntang. Atin dénayéw i libune niy Tuluse.

¹⁴ Endob i uléwe bé no lawi féngadafan toow fo ménkérít non fén-adi-adi Jesusey ni libun bé gaiwe kétérén. Mélaw ménbéréh i ni lagéy dob de étew mano, “Wén i ném gétérésangan bé ségfadiyane gémalbék tom, mélaw ay gom dini féuwa bé ni ném gétérésangan. Endob kagom mangéy dini féuwa bé gaiwe kétérén.”

¹⁵ Endob ménbéréh i Jesuse mano, “Enda toow gom munur dob Tuluse, ubo-ubo say kéféngintoow gome. Buluk i safi gome taloo noy kuda gome

térumén, ukohé kom so dob nikéto kome de brab angéyé kom féinémén fiyon fo ké gai kétérén.¹⁶ I libune ni ségettew dumo tom Judio non séfu Abraham so, brab féndéruuy saitane foloén bra waléw gébelintuwa. Fatut uwaén fiyon fo ké gai kétérén.”¹⁷ I de étew diyo énda ménuyot ro bé Jesuse, ménmala ro bé kékérén ne. Endob i de dumo de, toow ro fo méroror non bé kéluhanay de mékégaif rénigo Jesuse.

¹⁸ Atin ménbérén i Jesuse mano, “Ati ségiléwoy kéguléw i Tuluse bé de étewén? Ati fégiringo kuwe de?¹⁹ Ségiléw na bé toowe fo kloh béne, éndot i étewe brab nohokén. Atin téménunoh brab mérruk taman ménwaléy dakél kayéw. Brab salagay de kloh manok i de fongo no.”

²⁰ Tidew béno, ménbérén man i Jesuse mano, “Ati fégiringo kuwe bé kéguléw i Tuluse bé de étewén?²¹ Ségiléw bé fégfééruke fan éndot i libune brab sénlawékén bé téléléwe géasad bé arinahe taman mérruk i kéluhanane brab ménwaléy médo.”

I mératé bengawan

²² Atin amun ménagéw i Jesuse mangéy Jerusalem, ménawét dob de ségiyo-giyo do ingéd brab téménoro diyo. ²³ Atin wén i ségettew étew ménenginsaan de mano, “Kadnan, kloh saén i de étew fukaséy Tuluse?”

Séménumbul i Jesuse manó,²⁴ “Rigo moy tamay gagané muwe mahur bé mératé bengawan mangéy dob lawayo, non bérhéku beem, médo do étew i témélamawe mahur, éndob énda gagané ro de. ²⁵ Non i gefee de témindég brab fintué noy bengawane. Atin amuk diyo gom dob liyuwe, témuktuk gom, fégédaw-gédaw émbérén makom, ‘Kadnan, ungkaém i fintue ni inok géahur gey.’ Endob sémumbul mano, ‘Enda gélolo gu begom. Brab énda gétiga kuy tidéwo kome de.’ ²⁶ Tidew béno, émbérén gom makom, ‘Ménama gey brab méniném gey sétifon Beem. Brab téménoro go dob de ingéd gey.’ ²⁷ Atin sémumbul mano, ‘Enda gélolo gu begom. Brab énda gétiga kuy tidéwo kome de. Begom i de démoyun rémigo tete. Férayu gom Begén.’ ²⁸ Atin i begome moso kémérew gom brab kémigét i de kifé kom buluk gito gom i katufua kome Abraham brab Isake, brab Jakobe, brab i kéluhanay sénarigoy Tuluse muret diyo ron dob lawayo. Endob i begome énda géahur gom diyo. ²⁹ Wén soy de médo étew békén Judio tidew déligdigan, sébangan, tégenon, brab élédon, diyo ro géésar mama beroy Tuluse ké féguléwo no bero. ³⁰ Atin béno, i de énggétah béní waléy ro moso do géfuray. Brab i de énggétah béní waléy ro moso géétah.”

³¹ Béno so, i de dumo Fariseo bénréh ro dob Jesuse maro, “Tagakém i ni gonon brab angéy go dob ségiyowe gonon non méuyot i Datue Herod méméléhu Beem.”

³² Endob séménumbul i Jesuse mano, “Agéw gom brab bérén gom bé Herode mégakar étew, fétausé kuy kégéféraréy guwe bé de saitan brab

kéuwa guwe bé de étew béleewe ni brab démo. Atin dob gétéléwo nuwe gai, géfégilido kuy galbék guwe dini. ³³ Endob i Begéne kailangan tausu béleewe brab démo brab dob téléwe. Non i toowe, énda i sénarigoy Tuluse muret bé de kébéréhén féléhuén saliyu dob Jerusalem.”

³⁴ Tidéw béno, ménbéréd i Jesuse fantag bé adat i de étew dob Jerusalem mano, “Do étew dob Jerusalem, tete i fédéw guwe fantag bé begome non fénléhu gom i de sénarigoy Tuluse muret brab nibéro kom batéw i de sénugu dob begome taman ménléhu ro. Firoy gule i kétaya kuwe térimu begom loo bé kétimu i méritone manok télikub-kubo noy de fiyakén bé defafakén? Endob ménika gom de. ³⁵ I lawi gome méttagak moso. Endaén gito mo Begén taman bé gaiwe gégumah ké béréhé mo moso, ‘Féfiyonéy Tuluse damén i gégumahe tidéw dob Kadnane.’”

Nuwa Jesusey lagéye

14 ¹ Wén i no sébaan fuweh gai kétérén, ménangéy i Jesuse mama dob lawi i ségétéwe odoroy de Fariseo. Atin i de sébanil bé Jesuse ténuilik ro inok gito roy funa ruwe de témebo. ² Diyo soy ségétéwe rémambuk. Atin ménfégédét dob Jesuse. ³ Atin fénénginsaa Jesusey de Fariseo brab de téromo bé kitabé mano, “Fakay ba dob kitab tomey muwae bé gaiwe kétérén?”

⁴ Endob ménantés ro. Mélaw génamak Jesusey étewe démériun atin nuwaén brab ménadi-adi. Tidéw béno, fénagéwén. ⁵ Atin fénénginsaa Jesusey de étew témulik mano, “Buluk wén i nga gom taloo no safi gom ménlawu dob kalute ménalém wén i wayég de bé gaiwe kétérén, békén ba fagayasé kom bégéngén mésut dob kalute fiyon fo ké gai kétérén?”

⁶ Endob ménantés ro non énda i éntingayén késumbul ro de.

⁷ Atin wén i de étew sénéngkat ro mama diyo ménuyot ro mésar dob de fiyo saran kay de gérotor étew. Amun énggito Jesusey ni, nureté beroy ni binuwaya mano, ⁸ “Amuk wén i séméngkat begom déménigan bé sébaane uyot, kagom mésar dob de fiyo saran, non amuk wén i do étew toow na fo gérotor sénéngkat, karoy de fiyo saran. ⁹ Tidéw béno, i séménéngkate begom fégédét inok kédané no begom dob de sara kom brab fégaliné no begom mangéy dob mase na gérfantad gonon. Atin been i funa kome mémala. ¹⁰ Yamula, buluk sénéngkat gom, angéy gom sar dob de gérfantad saran inok i séménéngkate mangéy fégédét dob begome brab émbéréh mano, ‘Do adih, énggomén, diyo gom dob de fiyo ni saran.’ I ni géiray begom fiyo késéngadat dob téngaangay de médoo étew. ¹¹ Non i kéluhanay de étew félangka-langka waléy ro gérfantad. Brab i kéluhanay de étew térfantad waléy ro gérotor.”

¹² Tidéw béno, ménbéréd i Jesuse dob gefee ni karagiya mano, “Buluk rémigo go karagiya, kago séngkatén say de gélolo mo, do dumo mo, brab do samungém, brab do étew kawasa dumo mo ségédét. Buluk rigoné moy

ni, sémuli ro so séméngkat beem inok gésulio ro beem. ¹³ Yamula, amuk rémigo go karagiya, séngkatém i de méskinan, de fikat, de kimoyén, brab do langafén. ¹⁴ Mélaw féfionéy Tuluse beem fiyon fo ké énda gésulio ro beem. Sulioy Tuluse beem bé gaiwe kétébule i de métintu étew.”

I binuwayae fantag bé karagiya

¹⁵ I ségétewe bé de ménasar mama, ménbéréh mano, “Toow fo méoror i de étew mama beroy Tuluse dob kénéfugléw ne.”

¹⁶ Amun énggelingoo Jesusey ni, nureténi sébaane binuwaya mano, “Wén i ségétewe étew lagéy réménigo dakél karagiya brab séménéngkat médoó étew. ¹⁷ Amun énggégumah i gaiy ni karagiya, i ni étew sénuguén i sugu-sugué nuwe mangéy méréh dob de étew sénéngkat ro, ‘Méntafayén i kéluhanane. Enggomén, angéy gomén dob karagiye ni.’ ¹⁸ Endob énda ménangéy ro diyo. Yamula bénréh roy de funa ro énda géangéy diyo. I sébaane de mano, ‘Bukué ku, énda géangéyu diyoan, non mantuwu séna ménléy fantad, angéyé ku téngténgén.’ ¹⁹ I gérrouwé de ménbéréh mano, ‘Bukué ku, énda géangéyu diyoan, non mantuwu séna ménléy folo timan safi brab magéwu angéyé ku bero langunén.’ ²⁰ I gétéléwe de ménbéréh mano, ‘Bukué ku, énda géangéyu diyoan, non mantuwu séna ménawag.’ ²¹ I sugu-suguéni ménule brab bénréhén dob lagéye gefe karagiya i kéluhanay de ni. Mélaw toow fo ménkérít i ni gefe karagiya. Tidew bénó, bénréhén dob sugu-sugué nuwe mano, ‘Fagayas go, angéy go dob de agéwon brab dob de kalsada, brab uwitém diniy de méskinan do étew, do kimoyén, do langafén, brab do fikat.’ ²² Atin ménagéw i ni sugu-suguéni. Tidew bénó, ménsefule mangéy dob gefee ni karagiya, brab bénréhén de mano, ‘Rénigo guy sénugu me begén, éndob énda séna féno i lawie bé étewe.’ ²³ Atin i gefee ni karagiya bénréhén dob sugu-sugué nuwe mano, ‘Agéw go mangéy dob de agéwon mangéy dob de kloh ingéd brab fiyon dob de tuduk, brab uwitém i de étew diyo mangéy dini, méuyotu de ké maféno étew i lawi guwe ni.’ ²⁴ Endob i de étew sénéngkat gu sungu, énda gétem-tem ro bé de amaén téafay gu.’”

²⁵ Wén i no sébaan fuweh, amun ménagéw i Jesuse, ménodor i de médoó do étew gélwét de. Atin sénlingén bero mano, ²⁶ “Fiyon atiy méuyote modor Begén, éndob mas nay kéimu ne bé de lukésén, brab bawag ne, brab de ngaén, brab de dumo no sétiman idéng, brab i kaane lowoh, énda médaitén waléy kuyug gu. ²⁷ Atin fiyon atiy étewe énda fédaydayén bé de kérégénon fiyon fo ké féléhuén dob kruse, énda médaitén waléy kuyug gu. ²⁸ Ufama, buluk wén i méuyot rémigo lawi, békén ba mésar na métah inok fégitungé no ké firoy i laga i kérigowe de, inok gétiga no ké wén i katabawan kurtaén fégéfélidén de? ²⁹ Buluk féngganayén saén i kérigo nuwe de, atin énda géfélidén de, waléy sébayat i de étew gérito de. ³⁰ Maro, ‘Dufang i ni étew. Féngganayén saén i kérigo nuwe de, éndob énda géfélidén de.’ ³¹ Taloo no, i ségétewe datu

mangéy sétiboh bé sébanile de datu. Békén ba mésar na métah brab fégitungé no ké gagané no bé foloé ngibu sundalo no kuntra bé ruwowe folo ngibu sundaloy sébanile de? ³²Buluk gékarangay datue ni bé énda gégagay kaane sundalo, émféuwit sarigo no mangéy malak bé sébanile de datu amuk mérayu séna inok méréh bé éndaén sétiboh ro.” ³³Féntaus Jesusey kékéréh ne mano, “Ségiléw so bé begome. Amuk méuyot gom waléy kuyug gu, kailangan tagak gom i kéluhanay gulaané kome.”

³⁴Tidéw bénou, nuret Jesusey sébaane binuwaya fantag bé késégiléw i timuse bé de kuyugén mano, “I timuse fiyo. Endob buluk mémékan i kétasik ne, éndaén i nonomén brab éndaén géséfule i kétasik ne. ³⁵Enda fiyo no bé fantade taloo no bé abunowe. Fatut ibérén saén. Tuntay gom i ni énggelingoo kom.”

I métadine bili-bili

15 ¹Wén i no sébaan fuweh, amun ténero Jesusey de étew, ménggégumah i de médoor lémiful kubrador brab de tete étew mangéy mégélingo. ²Wén soy do Fariseo brab do témoor bé kitabé diyo. Atin sabaf bé kékika ruwe bé de tete étew, ménriklamo ro maro, “I ni lagéy méuyot témayakuf bé de tete étew brab séréngan na bero mama.” ³Mélaw nureto Jesusey bero do binuwaya mano,

⁴“Amuk i ségétewé begom wén i mératú bili-bili no brab méméadin i sébaane de, ati rigoné muwe? Békén ba tagaké moy siyowe de folo bra siyow dob fétatabane, atin angéyé mo sélédén i sébaane de méméadin taman gito mo? ⁵Tidéw bénou, buluk gito mo, duwalé mo mule toow fo méoror. ⁶Brab tabaré moy de dumo mo brab béréhé mo dob berowe, ‘Toowu fo méoror non énggito guy méméadine bili-bili gu. Enggomén, rémigo tom karagiya.’” ⁷Atin féntaus Jesusey kékéréh ne mano, “Loo so bé niy Tuluse. Toow fo méoror amuk wén i ségétew tete étew gésénule brab tagaké noy tetee adatén, atin rigoné noy kétayay Tuluse. Mas méoror i Tuluse bé ni ségétew étew ménggésenule bé kéror ne bé de siyow folo bra siyow fiyo étew kailanga roy gésénulee.”

⁸Ménuret man i Jesuse ségiyo binuwaya mano, “Wén i ségétewé libun wén i folo timan balilaga félatahén. Atin méméadin i sébaane de. Ati rigoné nuwe? Témumon solo brab kodosé noy lawi ne sélédé no taman gito noy ni sébaan félata méméadin. ⁹Tidéw bénou, tabaré noy de dumo no brab béréhé no bero mano, ‘Toow fo méoror non énggito guy félata guwe méméadin. Enggomén, rémigo tom karagiya.’” ¹⁰Féntaus Jesusey kékéréh ne mano, “Béréhé ku begom man, i de télakiy Tuluse toow ro fo méoror amuk wén i ségétew tete étew gésénule brab tagaké noy tetee adatén atin rigoné noy kétayay Tuluse.”

I dufange nga

¹¹Atin nuret Jesusey gétéléwe binuwaya mano, “Wén i ségétewé étew lagéy wén i ngaén ruwo gétew lagéy. ¹²Wén i no sébaan fuweh i

tuwaréye bé de ngaén ménangéy dob boh ne mano, ‘Boh, irayém begén i baad guwe bé de languntaman katom.’ Mélaw i boh ne bénaadén i kéluhanay languntama ruwe dob ruwowe gétew ngaén. ¹³Enda mérugayén tidéw béno, i tuwaréye bé de ngaén fénbélényén i kéluhanay kaane baad. Atin ménagéw ménangéy dob mérayue ingéd, brab nuwitén i kurta ne. Diyo séninggulaén i kéluhanay kurta ne bé kédufang ne.

¹⁴Tidéw béno, ménggumah i dakéle lénggob dob kéluhanay sugud i no dakél ingéd. Atin toow fo mélayah i dufange ni étew, non éndaén i kurtaén. ¹⁵Mélaw ménahur dob sébaane galbék kay ségétewe bati diyo. Sénuguén dob fantad ne émféama babuy. Non bé toowén fo mélayah, ¹⁶méningar bé amaéy de babuy. Endob énda i mirayan de kéama.

¹⁷Tidéw béno, énggétiga noy kédufang ne atin ménggitung mano, ‘I kéluhanay de sugu-suguéy boh guwe, gaba-gabay de amaé ro. Endob ay niwu méléhu mélayah. ¹⁸Séfuleu mangéy dob boh guwe brab béréhé ku diyo, Boh, ménsalau dob Tuluse brab dob beeme. ¹⁹Endaén médaitu fédawété mo ngaém. Endob fégédaw go begén. Rigo mo begén sébaan bé de sugu-sugué mo.’ ²⁰“Mélaw ménule. Amun mérayu séna dob lawi ruwe, énggitoy boh ne brab mén-uray i éna nuwe de. Léménentu bénalakén i nga ne nékéfén brab narékén. ²¹Atin ménbéréh i nga ne mano, ‘Boh, ménsalau dob Tuluse brab dob beeme. Endaén médaitu fédawéto mo ngaém.’ ²²Endob i boh ne ténavagén i de sugu-sugué no brab bénréhén bero mano, ‘Féraan gom. Uwit gom i toowe fo fiyo kégal brab fékégal gom de. Fétisingo kom brab fésafatoso kom. ²³Atin sumbalí gom i kagéne toow fo bobo nati safi. Rémigom tom dakél karagiya. ²⁴Non i nga guwe maak ménléhu, éndob béleewe ni méuyag. Maak méntadin, éndob béleewe ni énggiton.’ Tidéw béno, rénigo roy dakéle karagiya.

²⁵“Endob béno so, ménggégumah i ofoe ngaén lagéy tidéw dob de galbéko no. Amun gédétén dob lawie, ménggaif bé énggelingoo noy kantawe brab énggito noy de étew mésayaw. ²⁶Mélaw ténabarén i ségétewe bé de sugu-sugué ro brab ménénginsa ké ati rigoné ruwe. ²⁷Séménumbul i ni sugu-suguén mano, ‘Ménséfule i tuwaréy me. Sénugu i boh me begey séménumbali bobo nati safi, non i tuwaréy me ménséfule énda i sugsugén.’ ²⁸Tidéw béno, toow fo ménkérít i ofo ne lagéy, brab énda méntausén dob lawie. Mélaw i boh ne ménuts brab ménfégédaw-gédaw inok mahur dob lawie. ²⁹Endob bénréhén dob boh ne mano, ‘Géménalbéku bé firoye gébélantuwa brab énda fénlis guy fénrigo muwe begén. Endob énda foy nirayém begén fiyon sébaan kamping inok rémigowu karagiya begey i de dumo gu. ³⁰Endob i ni ngaém ménraréy, brab séninggulaén i éntingayéne nirayém de bé de kédufanga no. Endob amun ménule, sénumbalio mo bé boboe nati safi.’ ³¹Séménumbul i boh ne mano, ‘Adu, bati go dini sénga tékélid brab i éntingayéne kagén, kaam so. ³²Endob fatut rémigo tom karagiya inok féténgténg tom i kéoror tome

non i tuwaréy me maak ménléhu, éndob béleewe méuyag. Brab maak mémentadin, éndob béleewe énggiton.’”

16 ¹Atin nuret Jesuse bé de kuyugén i ni binuwaya mano, “Wén i ségétewe kawasa étew, wén i sénarigo nuwe lémiful. ²Amun énggelingoooy amu nuwey ni, ténabarén i sénarigo nuwe ni brab ménenginsa mano, ‘Ati ni énggelingoo ku fantag beem? Fénakawa mo begén? Bérhéhém begén i kéluhanay kérigo muwe bé kagéné kurta. Non éndaén fakayén sarigo ku beem. Mélaw kédané ku beem dob ni galbék.’ ³Tidéw béno, i sénarigone ni ménggitung mano, ‘Ati rigoné kuwe, ké kédané no begén dob ni galbék? Enda émbagérú gémalbék mérégen loo bé kémalute. Atin mémalawu mongot limus. ⁴Gétiga kuy ati rigoné kuwe inok buluk mékédanun dob galbék guwe ni, tayakuféy de étew so begén dob de lawi ro.’ ⁵Tidéw béno, ténabarén i kéluhanay de étew énggéutong dob amu nuwe ni. Atin bénréhén dob sunguwe de mano, ‘Firoy i utong me bé amu guwe?’ ⁶Séménumbul i ni étew mano, ‘Mératu dakél latah nor.’ Atin ménbéréh i sénarigone ni mano, ‘Ay ni sulate bé utong me. Sar go brab sulatem bé limo folo saén dakél latah nor.’ ⁷Tidéw béno, fénenginsaa noy gérupowe ni étew énggéutong mano, ‘Firoy i utong me bé amu guwe?’ Séménumbul mano, ‘Séngibu gésaku faréy.’ Atin bang i sénarigone ni, ‘Ay ni sulate bé utong me. Sar go brab sulatem bé waléw ratu gésaku saén.’ ⁸Tidéw béno, amun i amu nuwe ni énggelingoo noy kéluhanay rénigoy sénarigo nuwe ni, dénayéwén mano, ‘Toow fo métileddé i ni étew lémiful.’” Atin féntaus Jesusey kékéréh ne mano, “I de étew dob duniiae ni mas na furung ro maguyag bé de méngintulus. Non tafayé roy kéfaguyag ruwe dob de géfuray gai moso. Atin i de étew méngintulus fatut so tafayé roy kéfaguyag ruwe dob de géfuray gai moso dob lawayo.

⁹“Mélaw bérhéh ku begom, usar gom i kurta gome fégétabang bé de étew méskinan. Atin i Boh gome dob lawayo tayakufé no begom diyo.

¹⁰Buluk mésarigon go bé klohe, mésarigon go so bé médoowe. Endob buluk énda mésarigon go bé klohe, énda so mésarigon go bé médoowe.

¹¹Atin amuk énda mésarigon gom bé de funan méungangén dob duniiae, énda so mésarigon gom bé toowe fo funan méungangén dob lawayo.

¹²Buluk énda mésarigon gom bé tamuk i dumo gome étew béní, énda so sémarig i Tuluse begom bé tamuke dob lawayo.”

¹³Atin ménbéréh man i Jesuse mano, “Enda i sugu-suguén fakay galbéko no sérégan i ruwowe gétew amu. Non amuk mégédaw bé ségétewe de, mérarék bé ségétewe de. Taloo no odoro noy kétayay ségétewe de, siyawé noy ségétewe de. Mélaw énda fakay go modor bé Tuluse amuk fégitungé mo saén i kurtae.”

¹⁴Dijo soy de Fariseo do toow fo méuyot bé kurtae. Amun énggelingoo roy ni kétoro, déniyangka roy Jesuse. ¹⁵Mélaw bénrého Jesuse bero

mano, “I begome maak métintu do étew, éndob ubo-ubo saén i de ulalané kom dob adafay de étew. Endob i Tuluse gétiga noy fédew gome. Ati médayewe dob de étew, toow fo mikä i Tuluse de.

¹⁶ “Wén i do tafay ménusat kukuman niray Moisese bé gétahe tidew dob Tuluse, brab wén soy do sénulat i de sénarigoy Tuluse muret bé kékéréh ne bé gétahe. I de sulat ni fatut nodoron taman sa bé kégumah Juan Bautistawe. Tidew béo, fatut ureté i Fiyowe Uret fantag bé kékéguléw i Tuluse. Brab kéluhanay de étew fégésé roy mahure. ¹⁷ Endob énda fakayén ké wén i mékédan bé kukumane, fiyon kloh saén. Mas na magad mékédan i duniyae brab lawaye, éndob i kukumane énda mékéda no.”

¹⁸ Atin bang Jesuse man, “Fiyon atiy gémélake bé bawag ne atin mawag man ségiyo libun, énggélamfa. Brab i lagéye bawagé noy libune génlak, énggélamfa so.”

I kawasawe brab Lasarowe

¹⁹ Ménbéréh man i Jesuse mano, “Wén i ségtéwe kawasa étew kéménagal toow fo fiyo kégal, brab maguyag bé toowe fo fiyo kékaguyag sénga fuweh. ²⁰ Wén soy ségtéwe étew toow fo méskinan féndawét Lasaro. Ménfeno békukang i lowoh ne. Sénga fuweh uwitén dob bengaway lawi i étewe ni kawasa, ²¹ non ménuyot damén ké géama fiyon do kloh sama saén ménlawu tidew dob amaéy ségtéwe ni kawasa. Atin fégédét i de itu dob beene inok dilaé roy de békukangén. ²² Tidew béo, i Lasarowe ni méskinan ménléhu. Atin nuwit i de télakiy Tuluse mangéy dob tébing i katufuay de Judio féndawét Abraham dob lawayo. Brab i étewe ni kawasa ménléhu so brab lénébéng. ²³ I ni étew kawasa, énggéangéy dob uleone emferno mérasay. Brab amun léménéngag, énggito no dob mérayuey miskinane Lasaro dob tébing Abrahame. ²⁴ Tidew béo, téménabar mano, ‘Bebe Abraham, fégédaw go begén. Suguém i Lasarowa nan angéyé no élédén i tuko ténero ne dob wayége brab féluyuté no dob dila guwe ni inok fégéfélégénéy gu. Non ay niwu dob rinoe ni mérasay.’ ²⁵ Endob séménumbul i Abrahame mano, ‘Adu, fégétédémém i kéuyag mo séna, gédoté moy éntingayéne fiyo atin i Lasarowe kérégénan mérasay. Béleewe ay niy Lasarowe mésésaya brab ay nan go mérasay kérégénan. ²⁶ Brab saliyu na bé de ni, wén i sébaane léfak toow fo ménalém dob élét tome inok i méuyote mifar mangéy diyoan tidew dini taloo no tidew diyoan mangéy dini énda géifarén.’ ²⁷ I kawasawe ni ménbéréh man mano, ‘Bebe, suguém i Lasarowe mangéy dob lawi i boh guwe. ²⁸ Non wén i limowe gétew do dumo gu sétiman idéng diyo. Brab ureté no émféingat bero inok énda mangéy ro dob ni gonon mérasay.’ ²⁹ Atin séménumbul i Abrahame mano, ‘Diyo soy de sénulat Moises brab de sénarigoy Tuluse muret bé gétahe. Gébasana roy

de ménusat diyo inok géingat ro.’³⁰ Endob ménbéréh i kawasawe ni mano, ‘Enda fo munur ro bé de ménusat. Endob buluk wén i ségettew tidew dob de ménléhu tébule mangéy diyo, fakay munur ro, brab gésénule ro bé de sala ro.’³¹ Endob séménumbul i Abrahame mano, ‘Buluk énda munur ro bé de sénusat Moises brab de sénarigoy Tuluse muret, énda so munur ro fiyon fo ké wén i ségettew tébule tidew dob de ménléhu.’ ”

17 ¹Atin ménbéréh i Jesuse dob de kuyugén mano, “I de étingayén funay de étew gésala gégumah, éndob mékégédaw-gédaw i étewe muwit de. ²Toow fo géttimal ké mékukum, mélaw mas na fiyo ké ibérén dob dogote nikéton bé dakéle batew i reer ne ké beeney funay ségettewé mantu séna méngintulus gésala. ³Mélaw ingat gom. Atin buluk énggésala i dumo gome, gélé gom. Brab buluk gésénule, fésagada kom. ⁴Fiyon fo ké énggésala dob beeme fitew gule bé ségettérésange, atin séfule so fitew gule mongot fasinsiya, fésagada mo.”

⁵Tidew béno, i de kuyug Jesus ménbéréh ro maro, “Kadnan, umana moy kéféngintoow geye.”

⁶Atin séménumbul i Jesuse mano, “Buluk wén i kéféngintoow gom loo bé kédakél i oloy sabie, gérérého kom dob kayéwe ni makom, ‘Térandut go, brab angéy go téohok dob dogoto’, atin unuro no begom.”

⁷Atin ménbéréh i Jesuse man mano, “Ufama, buluk i ségettewé begom wén i sugu-sugué no démadu taloo no témalima bé de ayamém, buluk gégumah i ni sugu-suguén tidew dob de galbéko no, énda bérhé mo de, ‘Enggon, ama go nén.’ ⁸Yamula bérhé mo de, ‘Lékas go, tafayém i amaé kuwe, atin duwoto mo begén, brab ongot-ongotém ké gilidu mama. Tidew béno, mama go so kaam.’ ” ⁹Atin féntaus Jesusey kékérhé ne mano, “I nan ségettew sugu-suguén, énda fatutén ongot-ongot bé kéfésalamate bé kérigo nuwe bé fatute. ¹⁰Ségiléw so bé begomey ni sugu-suguén. Buluk énggilid gomén bé galbéke sénugu i Tuluse rigoné kom, fégétédém gom i ni, begom saén i de sugu-suguén, mélaw kagom ongot-ongotén i kéfésalamate. Rénigo gom saén i fatute rigoné kom.”

Nuwa Jesusey foloe gétew fémuteén

¹¹Amun i Jesuse ménangéy Jerusalem, ménagéw mangéy bé élét i de sakuf Samaria brab Galilea. ¹²Amun mahur dob sébaane ingéd, énggébalakay de folo gétew lagéy. Wén i déruu ro fémute. Atin non fémuteén ro, téménindég ro dob mérayue. ¹³Brab mékes ro maro, “Jesus! Maistéro! Fégédaw go Begey!”

¹⁴Amun énggitio Jesuse bero, ménbéréh mano, “Agéw gom mangéy féténgténg dob de fadi inok gétinga ro ménadi-adi gom.” ¹⁵Amun ménagéw ro mangéy dob de fadi, ménadi-adi ro dob aguwone. Atin amun i ségettewé bero énggitio noy ménadi-adi, ménséfule ménangéy

dob Jesuse, mékes dayéwé noy Tuluse. ¹⁶ Atin méntélengkéb dob adafa Jesuse fésalamat. I ni lagéy békén Judio, éndob tidéw dob sakuf i ingéde féndawét Samaria. ¹⁷ Ménbéréh i Jesuse dob de étew mano, “Folo gétew i ménadi-adiwe. Hon i de siyow de? ¹⁸ Endob ségétew saén i ménsefulee mangéy fésalamat bé Tuluse, sani ségétewe tidéw dob ségiyowe ingéd.” ¹⁹ Atin sénbérého Jesusey ni lagéy mano, “Tindég go brab taus go dob ayo muwe. Ménadi-adi gon non méngginugut go Begén.”

Fantag bé kéféguléw i Tuluse

²⁰ I de dumo do Fariseo fénénginsa ro dob Jesuse ké kédiron i kégumah i gaiy kéféguléw i Tuluse bé de étewén. Séménumbul i Jesuse mano, “I kégumah i kéféguléw i Tuluse énda gitono. ²¹ Enda i ségétew de gébéréh begom, ‘Ay ninén, téngténgém!’ Taloo no, ‘Diyoonén.’ Non i kéféguléw i Tuluse diyo dob de fédéw gom.”

²² Tidéw bénou, bénréh Jesuse dob de kuyugén mano, “Gégumah i gaiwe féngonoyé kom i gito gom i gaiy késéfule i Nga i Kéilawane, sani Begéné. Endob énda gito gom de. ²³ Atin bérhéh de étew begom maro, ‘Ay diyoonén.’ Taloo no, ‘Ay ninén.’ Endob kagom munur de taloo no mangéy gom diyo inok téngténgé kom. ²⁴ Non i késéfule guwe maak kilot métékom rémendaw brab géfékaya i kéluhanay lawayo. ²⁵ Endob bé sunguwe, kamarasayanu, brab i de étew méuyag bénou, ikaa ro Begén. ²⁶ Loo so bé gai Noehe, i gaiy késéfule guwe. ²⁷ Bé gai Noehe, méguyaya i de étew, mama ro, miném ro, mawag ro taman bé kéahur Noehe dob barkowe. Tidéw bénou, i dunuke énggégumah atin ménléne ro kéluhanan saliyu bé Noehe beroy de samungén. ²⁸ Ségiléw so bé gai Lote bé gétaho. Bé bénou, i de étew mama ro, miném ro, sébéléy ro, mohok ro, brab rémigo ro do lawi. ²⁹ Endob bé gai kéféléd Lote bé ingéd ne Sodom, i rinoe brab do bara ménlawu maak rana tidéw dob lawayo méninasa bero kéluhanan do ménféled. ³⁰ Loo so moso bé niy gai guwe séfule.

³¹ “Bé bénou gai, i de étew diyo ro dob liyuy lawi ruwe, éndaén fatut ro mahur angéyé roy de insod ro. Loo so bé niy étewe diyo dob de galbékono, énda so fatutén séfule mangéy dob lawi ne. ³² Fégétédém gom i bawag Lote non séménling inok téngténgé noy de insod ro ménféled, mélaw i lowoh ne ménwaléy égas timus. ³³ Atiy méuyote émféralu bé kéuyag ne, méléhu. Endob i méléhue bé kéfuray ne Begén, gédoté noy umule magufusa. ³⁴ Bérhéh ku begom, bé bénou kélunganon bé késéfule guwe, wén i ruwo gétew séurir fidong, atin i ségétewe de dotén, brab i ségétewe de émféled. ³⁵ Atin wén i ruwowe gétew do libun géming, atin i ségétewe de dotén, brab i ségétewe de émféled. ³⁶ Atin ruwo gétew diyo dob galbékó ruwe, atin i ségétewe de dotén, brab i ségétewe de émféled.” ³⁷ Tidéw bénou, fénénginsaay de kuyugén maro, “Kadnan, hon i gonoy de ni de mérigo?”

Séménumbul i Jesuse mano, “Hon i gonoy wéne de ménléhu, diyo soy de uwak sétimu. Loo so bé toowe tete étew, gégumah dob berowey kékukum i Tuluse.”

18 ¹Tidéw béno, nuret Jesuse bé de kuyugén i ni binuwaya inok démoyun ro démasal brab énda mékédan i inam ruwe.

²Ménbéréh mano, “Wén i ségétéwe kémukum dob sébaane ingéd, énda fo mégilakén bé Tuluse taloo no énda fo fégadata noy étew. ³Brab wén soy ségétéwe libun baléw dob no ingéd. Démoyun mangéy dob ni étew kémukum fégédaw-gédaw bé tabanga no bé tiyawa nuwe bé fétabana no damén i sébanile de. ⁴Bé sunguwe de, miká i kémukume tétabang. Endob tidéw béno, fénggitungén mano, ‘Fiyon fo ké énda mégilaku bé Tuluse brab énda fégadata kuy de étew, ⁵éndob taluwanu bé késéfule-fule ne mongot tabang. Mélaw tabanga kuy baléwe ni, inok éndaén séfuleén taman kérégénanu.’”

⁶Atin féntaus Jesusey kékéréh ne mano, “Tuntay gom i bérhéhéy kémukume ni fiyon fo ké békén métintu étew. ⁷Toow na fo tabangay Tuluse begom do fénémilién amuk démasal gom fuweh na kélungonon. Brab énda métana i kétabang ne begom. ⁸Bérhéhé ku begom, magad tabangay Tuluse begom. Endob buluk gégumah i gaiwe séfuleu, kloh saén i de munur Begén.”

⁹Atin nuret Jesuse man i sébaane binuwaya dob de étew fégitungé roy métintu ro éndob siyawé roy de dumo étew. ¹⁰Bang Jesuse, “Wén i ruwowe gétew étew ménangéy dob lawi i Tuluse inok démasal ro. I ségétéwe de Fariseo brab i ségétéwe de kémubra buwis. ¹¹I Fariseowe ni témenindég atin déménasal mano, ‘Fésalamata ku Beem Tulus non békén ségiléwu bé de dumo gu étew, do ménakaw, do arumén ro, do lémamfa ro. Fésalamata ku Beem non békén ségiléwu bé diyoo étew lémiful kémubra buwis. ¹²Fuwasawu ruwo gule bé ségefadiyane, brab iray gu dob Beemey géfoloe bé kéluhanay sahudé kuwe.’ ¹³Endob i ségétéwe ni kémubra buwis témenindég dob mérayue, brab mémala énda gétegangén dob lawayo, brab éntungén i kuméng ne bé kétete i fédew ne. Atin déménasal mano, ‘Tulus, fégédaw go begén ségétéwu ménasa.’” ¹⁴Atin féntaus Jesusey kékéréh ne mano, “Bérhéhé ku begom, i ni étew kémubra buwis, amun ménule, fén sagaday Tuluse bé de salaén. Endob i Fariseowe ni, énda fén sagaday Tuluse de. Non i de étew téfégérotor, fégérifantadén ro. Brab i de étew térifantad, fégérotorén ro.”

¹⁵Wén i no sébaan fuweh, wén i médoowe do étew ménuit bé de nga ro dob Jesuse inok féfiyoné no bero. Endob amun énggitoy de kuyugén, génlé roy de étew ni. ¹⁶Endob téabar Jesusey de nga mangéy dob Beene, brab bénréhén dob de kuyugén mano, “Féangéy gom i de nga dob Begéne. Brab kagom alangén bero non i de étew sémarig loo bé késarig

i de ni nga, féguléwoy Tuluse bero. ¹⁷Béréhé ku begom i toowe, buluk i késarig i ségétewe békén loo bé késarig i ngae, énda so féguléwoy Tuluse de.”

I kawasawe étew

¹⁸Atin i ségétewe uléw i de Judio ménénginsa dob Jesuse mano, “Fiyo maistéro, ati rigoné kuwe inok gédoté kuy umule magufusa?”

¹⁹Séménumbul i Jesuse mano, “Sedek fédawété mo Begén fiyo? Enda i ségiyo fiyo saliyu saén bé Tuluse. ²⁰Gétiga moy de sugu. Kago lémamfa, kago méméléhu, kago ménakaw, kago uretén i dumo muwe bé békéne toow, fégadata moy boh me brab idéng me.”

²¹Séménumbul i uléwe ni mano, “I kéluhanay de ni, nodoro ku tidéw féganay klohu de séna.”

²²Amun énggelingoo Jesusey ni, bénréhén de mano, “Sébaan i kulange beem. Fébéléyém i kéluhanay étingayéne kaam atin irayém i kurtae dob de méskinan. Atin mélaw kawasa go moso dob lawayo. Tidéw béo, énggonén, odor go Begén.” ²³Amun énggelingoo étewe niy ni, toow fo tete i fédéw ne, non toow fo kawasa. ²⁴Amun énggito Jesuse ni tete i fédéw ne, bénréhén mano, “Toow fo mérégén i kéahur i de kawasa dob kéféguléw i Tuluse. ²⁵Mas na mélémuy kéahur i dakéle ayam dob tosong i darume bé kéahur i ségétewe étew kawasa dob kéféguléw i Tuluse.”

²⁶I de énggégélingo bé de ni, fénénginsa ro maro, “Ati mélaw i de fakay méfukas?”

²⁷Séménumbul i Jesuse mano, “I de békén fakay rigonéy étewe, fakay gérigonoy Tuluse.”

²⁸I Pedrowe ménbéréh mano, “Ténagak gey i de lawi gey inok furay gey Beem.”

²⁹Atin bang Jesuse, “Béréhé ku begom i toowe, i ségétewe téménagak bé lawi ne, bawag ne, taloo no dumo no sétiman idéng, do lukésén, taloo no do ngaén inok ureté noy fantag bé kéféguléw i Tuluse, ³⁰gégédot toow na fo médoob de ni do gai. Brab dob de gai gégumah, gédoté noy umule magufusa.”

Nuret Jesusey fantag bé kéléhu ne

³¹Wén i no sébaan fuweh, téabar Jesusey de folo bra ruwo gétew kuyugén sébero-bero saén, atin bénréhén dob berowe mano, “Fégélingo gom, mangéy tom Jerusalem. I Jerusalemey ingéde mérigoj kéluhanay mén sulfate bé gétaho sénulat i de étew sénarigoj Tuluse muret bé kékéréh ne fantag bé Begéne. ³²I Begéne sani Nga i Kéilawane, irayu dob de békén Judio. Atin diyangkaé ro Begén brab fémalané ro Begén, brab duraa ro Begén, ³³brab badasé ro Begén, brab féléhué ro Begén. Endob amuk méifus i téhéwe gétérésangan, tébuleu.”

³⁴Endob i de kuyug Jesus, énda énggésobuto roy de ni bénréh Jesuse. I atag i de ni kékérél ménbunéy dob berowe, brab énda gésobuto ro de.

Nuwa Jesusey langaféne

³⁵Amun gégumah i Jesuse dob ingéde Jeriko, diyo i ségétéwe étew langafén ménsar dob doror i aguwone mongot limus. ³⁶Amun énggelingoo noy médoowe do étew téménara, ménénginsa ké ati ni gérigonon.

³⁷Wén i séménumbule mano, “I Jesuse tidew Nasaret témara.”

³⁸Tidew béno, téménabar métanug mano, “Jesus, séfu Datu Dabid, fégédaw go begén!”

³⁹I de étew métah bé Jesuse géléé ro maro, “Kago selekén!” Endob taus so mékes toow na fo métanug mano, “Jesus, séfu Datu Dabid, fégédaw go begén!”

⁴⁰Atin téménrén i Jesuse brab nongotén i étewe ni uwitén mangéy dob Beene. Amun énggégédétén, fénénginsaa Jesuse mano, ⁴¹“Ati kétaya muwe rígoné ku dob beeme.”

Séménumbul i langaféne ni mano, “Kadnan, méuyotu gérito damén.”

⁴²Atin bénréh Jesuse de mano, “Gérito gon. Adi-adi gon, non méngingtoow go.”

⁴³Sonom béno, énggégito néni langaféne ni, atin ménfuray bé Jesuse démayéw bé Tuluse. Amun énggitoy de étew i ni ménrigo, dénayéw ro soy Tuluse.

Jesus brab Sakeo

19 ¹Atin méntaus i Jesuse bé kéagéw ne, atin ménahur dob ingéde féndawét Jeriko. ²Wén i ségétéwe kawasa féndawét Sakeo diyo bat. Beeney lémifule kémubra buwis dob de dumo no Judio kay de Romano. ³Amun énggelingoo noy Jesuse témara, méuyot i Sakeowe téméngténg inok gétiga no ké ati Jesuse ni étew. Endob énda gito no de, non bé médoowe étew géliwét bé Jesuse brab i Sakeowe foko lagéy. ⁴Mélaw léménéntu mangéy dob métaho, brab ménénik dob kayéwe inok gito noy Jesuse témara. ⁵Amun gédétén i Jesuse dob kayéwe ni, léménéngag brab ménshérél bé Sakeowe mano, “Sakeo, fagayas go élus. Fatut mangéyu dob lawi me béléewe ni.”

⁶Atin ménagayas i Sakeowe mélus tidew dob kayéwe ni brab méoror tényakufén i Jesuse dob lawi ne. ⁷Amun i de étew énggégito bé ni, ménseguraw ro maro, “I Jesuse ni sugud-sugud mangéy dob teteetéew.”

⁸Endob i Sakeowe téménindég brab ménshérél bé Jesuse mano, “Kadnan, iray gu dob de méskinan i ténga i éntingayéne kagén. Brab buluk wén i léniful gu, bayada ku fot takéf bé éndot guwe dob berowe.”

⁹Atin ménshérél i Jesuse dob beene mano, “Béléewe ni, i Tuluse fénukasén beem brab kéluhana kom dob ni lawi, non munur go ségiléw

bé kéunur Abrahame. ¹⁰ Non i Nga i Kéilawane, sani Begéne, ménangéyu dob ni duniya inok fukasé kuy de étew ménsala non maak méntadin ro.”

¹¹ Amun mégélingo ro séna, féntaus Jesusey kékérél ne bé sébaane binuwaya non gédét ron dob Jerusalem, atin non i de étew maro ké bénou so gégumah i kékéfugléw i Tuluse. ¹² Ménbérél mano, “Wén i ségétewé gérotor étew ménangéy dob mérayue ingéd inok rigonén datu diyo. Tidew bénou, bantaké noy séfule. ¹³ Amun énda séna magéwén, ténabarén i foloe gétew bé de sugu-sugué no brab niraya no dob séngae ségétew sébaan bélowan félatah. Brab bénréhén bero mano, ‘Féinség gom i ni taman késéfule gu.’ ¹⁴ Endob i do étew dob no gonon mika ro de. Mélaw séménugu ro de étew émbérél maro, ‘Mika gey bé ni étew waléy datu gey.’

¹⁵ “Endob fiyon fo ké loo bé nan, ménwaléy datu. Mélaw ménfule brab fénsguo noy de sénarigo no bé de bélowan félatah inok susiné no ké wén i inségén. ¹⁶ I sunguwe de ménbérél mano, ‘Maistéro, i de nirayém begén félatah, énggéinség gu de na folo timan.’ ¹⁷ Tidew bénou, bang i datue, ‘Fiyo, mágéror go sugu-suguén. Non gésarigon go bé klohe, sarigo ku beem méguléw bé foloe do ingéd do sakuf gu.’ ¹⁸ Atin i géruwowe bé de sugu-suguén ménbérél mano, ‘Maistéro, i de nirayém begén félatah, énggéinség gu de na limo timan.’ ¹⁹ Tidew bénou, séménumbul i datue ni mano, ‘Féguléw go bé limowe do ingéd do sakuf gu.’ ²⁰ Tidew bénou, i gételewe bé de sugu-sugué no ménbérél mano, ‘Maistéro, ay niy kurtae nirayém begén. Bénunéy gu brab nitong gu ténaléy dob munsalawe. ²¹ Non mégilaku beem non métégas go étew. Médot go bé békéne kaam. Brab kémétew go dob békéne nohokém.’ ²² Séménumbul i datue ni mano, ‘Tete go fo sugu-suguén. Kukumé ku beem bé de bénréhém. Gétiga mo kun médotu bé békéne kagén, brab kémétewu bé békéne nohok gu. ²³ Amuk kékémarang go loo bé nan, sedek énda féndiyoém dob bangkuey kurta guwe inok buluk séfuleu, fakay doté ku brab wén i inségén?’ ²⁴ Tidew bénou, bénréh i datue ni dob de étew dob sékulo ruwe téménindég mano, ‘Dot gom i kurta ne ni atin iray gom dob ségétewé énggéinség folo timan.’ ²⁵ Endob séménumbul ro maro, ‘Maistéro, wénén i kaan folo kurta.’ ²⁶ Ménbérél man i datue mano, ‘Béréhé ku begom, buluy wéne den médoo, méirayén de na uman. Brab i étewe de wén i kulang de, fiyon foy klohe dob beene dotén so.’ ²⁷ Atin féntaus i datuey ni kékérél mano, ‘Atin fantag bé de sébanil begén, mika ro de ké waléy datu ro, uwit gom bero dini brab féléhu gom bero dob téngaanga kuwe ni.’ ”

I kéahur Jesuse dob Jerusalem

²⁸ Amun i Jesuse brab de kuyugén gédét ron dob dakéle ingéd Jerusalem, ²⁹ énggégumah ro dob sébaane tuduk féndawét Olibo, gédét

dob de ingéd féndawét Betfage brab Betania. Ténabar Jesusey ruwowe bé de kuyugén,³⁰ brab ménsebéréh bero mano, “Etah gom mangéy dob nan ingéd. Buluk gérumah gom diyo, gito gom i native kuda diyo, énda sénay énggékuda de. Ukoh gom brab uwit gom dini.³¹ Buluk wén i ménginsa dob begome, ‘Sedek ukohé kom?’ béréh gom de, ‘Kailangay Kadna tome.’”

³² Nodoroy de ruwo ni gétew kuyugén i bénréh ne. Atin énggito roy native ni kuda loo bé bénréh Jesuse. ³³ Amun nukoh ron, énggitoy de gefe de bero brab ménenginsa ro maro, “Sedek ukohé kom i kuda geya nan?”

³⁴ Séménumbul ro maro, “Kailangay Kadna tome.” ³⁵ Atin nuwit roy kudae mangéy dob Jesuse. Brab namféno ro bé de kégal ro brab fénkuda roy Jesuse diyo. ³⁶ Amun méntaus i Jesuse dob Jerusalem, i de étew bénékah roy de dumo bé de kégal ro dob aguwo Jesuse fégito roy kébasana ruwe de.

³⁷ Amun énggégumah i Jesuse dob gonone lémudug dob tuduke Olibo, i kéluhanay de médooy kuyugén ménfésalamat ro dob Tuluse brab ménoror ro démayéw métanug, non bé kéluhanay de mékégaif énggito ro. ³⁸ Ménkes ro maro, “Dayewé tom i Tuluse. Féfionéy Tuluse damén i ni datu méngumah tidéw dob Kadnane. Endaén damén i bukuén dob lawayo.”

³⁹ I de dumo bé de Fariseo diyo do ménribuk, ménbéréh ro dob Jesuse maro, “Maistéro, féantésém i de kuyugém nan.”

⁴⁰ Endob bang Jesuse ni, “Béréhé ku begom, buluk fén-antés ro, i de batéw ni mékes dayewé ro Begén.”

⁴¹ Amun taus ron gédét dob Jerusalem, gékulaya Jesusey ni ingéd. Amun énggito no, kénrewo no bé kéuray i na nuwe de. ⁴² Brab ménbéréh mano, “Méuyotu damén gétiga kom béleewe ni ké atiy kékédane bé bukuéne brab késétibohe, éndob béleewe ni énda gétiga kom de.

⁴³ Gégumah i gaiwe dob begome, géséliwétoy de sébanil begom brab langkaté ro begom inok énda géléfas gom géliwét. ⁴⁴ Féléhué ro begom kéluhanan fiyon foy de kéluhanay de dumo gom, brab do nga gom. Atin binasané roy de lawi taman énda i sébaan batéw mésama dob rotor i sébaane de. Non énda féngglolo gom i gaiwe bé kéangéy i Tuluse begom mémukas.”

Dénédél Jesusey de démagang dob lawi i Tuluse

⁴⁵ Amun énggégumah i Jesuse dob Jerusalem, méntaus dob lawi i Tuluse. Amun ménahur, dénédélén i de étew démagang diyo. ⁴⁶ Atin bénréhén beroy ni mano, “Wén i Ménsulate Kébéréh i Tuluse mano, ‘I lawi guwe, lawi gonon démasal.’ Endob fénwaléy gom lawi i de ménakaw.”

⁴⁷Atin sénga fuweh diyo i Jesuse téromo dob Lawi i Tuluse. Endob i de uléw i de fadi, brab de téromo bé kitabe, brab i de méguléw bé de étew, ténulama ro féléhuén. ⁴⁸Endob énda gérígono ro de non i de médoor étew énda fo séféka ro de, non ménuyot ro mégélingo bé kéluhanay de béréhé no.

20 ¹Wén i no sébaan fuweh, amun diyo i Jesuse téromo dob lawi i Tuluse, brab ureté noy Fiyowe Uret, i de uléw i de fadi brab de téromo bé kitabé brab de odoroy de Judio, ménfégédét ro dob Jesuse. ²Atin fénénginsaa ro maro, “Béréhém begey ké ati atura muwe rémigo bé de ni? Ati ménirayane Beem kuwagib?”

³Sénumbulo Jesuse bero mano, “Sémuliú ménginsaan begom. Béréh gom Begén, ⁴ati séménugue bé Juane inok mautis, Tulus loo ké étew saén?”

⁵Atin séédél ro maro, “Amuk béréhé tom ‘Tidéw dob Tuluso’, fénginsaa no betom ké sedek énda fénéngintoowo tom i Juane. ⁶Endob buluk béréh tom ‘Tidéw dob étewe’, kéluhanay de ni étew ménlimud, ibéro ro betom batéw taman méléhu tom, non féngintoowo roy Juane sénarigoy Tuluse muret bé kékéréh ne.” ⁷Mélaw séménumbul ro maro, “Enda gétiga key ati kétidéw ne de.”

⁸Mélaw bénréh Jesuse mano, “Enda so béréhé ku de begom ati ménirayane Begén kuwagib rémigo bé de ni rigoné ku.”

I binuwayaé fantag bé de tete témalima

⁹Atin nuret Jesusey ni binuwaya mano, “Wén i ségétéwe étew wén i safadén nohoko no. Brab féntalimaén bé de ségiyo étew. Tidéw béno, ténagakén ménangéy dob mérayue ingéd bé ménrugaye gai. ¹⁰Amun énggégumah i gayi kékétéwe de, séménugu ségétew bé de sugu-sugué no inok mongot bé kaane de baad bé de onokén. Endob i ni étew lénubag i de témalima bé ni safad. Brab fénule ro énda i suwaréw nuwitén. ¹¹Tidéw béno, séménugu man bé géruwowe bé de sugu-sugué no. Endob lénubag ro so brab fénémala ro brab fénule ro énda i suwaréw nuwitén. ¹²Tidéw béno, fénuwitén soy gétéléwe bé de sugu-sugué no. Endob féndawéto ro so taman ménfali. Brab dénidél ro. ¹³Tidéw béno, i gefee bé ni safad ménbéréh mano, ‘Ati rigoné kuwe? Gétuwa ku. Féuwit guy tintuwe nga gu kégédawa ku. Fégadata roy nga guwe.’ ¹⁴Endob amun énggitoy de témalima, ménsébéréh-béréh ro maro, ‘Been i niy nga i gefee bé ni safad. Féléhué tom inok gékatom i ni safad.’ ¹⁵Tidéw béno, dénidél ro mésut tidéw dob safade brab fénléhu ro.” Atin féntaus Jesusey kékéréh ne mano, “Ati rigonéy gefee safad dob de ni témalima bé safad ne? ¹⁶Angéyé no féléhuén bero. Brab irayén man dob de ségiyo témalima de.” Amun énggélingooy de étew i ni kékéréh Jesuse, ménbéréh ro maro, “Békén damén mérigooy nan.”

¹⁷Tidéw béno, ténéngténg Jesuse bero atin ménénginsa mano, “Amuk békén, ati atag i ni Ménusat Kébéréh i Tuluse mano ‘I batéwe nikaay de réménigo bé lawie, been i ménwaléye toow na fo balilaga fiyo batéw’?

¹⁸Fiyon atiy mélawue dob nan batéw mébinasa. Brab buluk i batéwe ni mélawu dob de étew, rénahé no bero maak bubuk sébuwan.”

¹⁹Atin i de téromo bé kitabé brab do uléw i de fadi, ténulama ro kénéfo i Jesuse bé béno gai, non gébela dob berowey ni binuwaya. Endob énda fakayén non mágilak ro bé de médo do étew. ²⁰Mélaw ténulik ro. Atin sénarigo roy de étew ménginsaan de inok buluk békén katabuwan i késumbul ne, wén i funa ro de témebo brab uwité ro dob de étew gémamak bé de kukuman. ²¹Tidéw béno, i de étew ni fénginsaa ro maro, “Maistéro, gétiga key toow i kétoro me. Brab métintu go, énda i isu ramigo mo bé de étew. Yamula toroé moy toowe fantag bé kétayay Tuluse toow. ²²Mélaw bérhéhém begey, aw fatut ba mayad gey buwis dob Sesare saní datue dob Roma taloo no énda?”

²³Endob énggétiga Jesusey akar ruwe brab bénréhén bero mano,

²⁴“Irayanu félatah.” Amun niraya ro de, ménénginsa i Jesuse mano, “Ati gefee dawét brab falas gito gom dob nan?”

Séménumbul ro maro, “Ka Sesar.”

²⁵Tidéw béno, bénréh Jesuse mano, “Iray gom dob Sesarey ka Sesare. Brab iray gom dob Tulusey kay Tuluse.”

²⁶I de étew ténulama ro fégakaran i Jesuse, toow ro fo ménggaif, non toow fo fiyoy késumbul ne de. Mélaw énda i funa ro témebo bé Jesuse. Komon ménantés ro.

Fantag bé kétébulee

²⁷Atin wén i do Saduseo diyo, sani de énda méngintoow bé kétébulee i Tuluse bé de étew moso. Mélaw ménfégédét ro dob Jesuse ménginsa maro, ²⁸“Maistéro, sénulat Moisese betom i kukumane bé buluk i ofo i étewe ménléhu, brab énggfélelo noy bawag ne, énda i nga ro, fatut bawagéy tuwaréy ne inok wén i séfu i ni étew bé tuwaréy ne. ²⁹Ufama, wén i fitew gétew sétuwaréy falan lagéy. Brab i ofoe de ménawag. Tidéw béno, ménléhu énda i nga ro. ³⁰Tidéw béno, i gétunduge de bénawagén soy bawage fénled i ofo ne. Atin ménléhu so énda i nga ro. ³¹Atin i gétéléwe de bénawagén so taman dob géfitéw ruwe. Endob ménléhu ro kéluhanan énda i nga ro. ³²Tidéw béno, ménléhu soy ni libun. ³³Mélaw bé gaiy kétébulee moso, ati isuwe bawag i ni libun bé ni fitew gétew sétiman idéng? Non énggébawaga ro kéluhanan bé méuyag ro de séna.”

³⁴Séménumbul i Jesuse mano, “I de étew béleewe, sébawag ro.

³⁵Endob i de étew métotor tébuleén géangéy dob lawayo, éndaen sébawag ro. ³⁶Non ségiléw ro bé de télaki brab énda ménléhu ro. Beroy de nga i Tuluse non méntébule ro. ³⁷Atin fantag bé kétébulee, fiyon

i Moisese fénggétuwa noy wén i kétébule. Non dob mérinoe kayéw, féndawétén i Kadnane ‘Tuluse féngadafé Abrahame, Isake, brab Jakobe.’
 38 I atag i ni, i Tuluse féngadaféy de méuyag étew, békén do ménléhu. Non i kéluhanay ménléhue, méuyag séna dob karang i Tuluse.”

39 Atin i de dumo bé de téromo bé kitabé ménbéréh ro maro, “Fiyoy késumbul me Maistéro.” 40 Tidéw béno, énda ménbaraw ro de ménginsaan man.

41 Atin bénréh Jesuse dob berowe mano, “Ati kéfakay ne ké béréh i de étew i Kristowe séfu Dabid? 42 Non fiyon i Dabide bénréhén dob kaane libro féndawét ‘De Kanta’ mano, ‘I Kadnane ménbéréh dob Kadna kuwe, sar go dob kuwono kuwe, 43 taman témabanu bé de sébanil Beem.’”

44 Atin fentaus Jesusey kóbéréh ne mano, “Amuk féndawét Dabidey Kristowe ‘Kadnan’, ati kéfakay Kristowe séfu Dabid?”

45 Amun dob téngaangay de kéluhanay de étew mégélingo, bénréh Jesuse dob de kuyugén mano, 46 “Ingat gom bé de maistéroy de kukuman non méuyot ro sugud-sugud bé de toow fo fiyo kégal ro, brab méuyot ro fégadatan ségifaén dob de fadiyan, brab méuyot ro mésar dob de fiyo saran dob de lawi féngadafan brab dob de karagiya. 47 Endob lafisé roy de libun baléw inok afasé roy de lawi ro. Tidéw béno, démasal ro bé de métahá kédasal dob téngaangay de étew non marok médirung i de ni tete rígoné ro. Endob i ni do étew toow na fo géttimal ké mékukum ro moso.”

21 ¹Amun diyo i Jesuse dob lawi i Tuluse, énggito noy de kawasa étew lémawu ro kurta dob ahurone kurta. ²Atin énggito no soy ségétéwe libun baléw méskinan, méniray saén ruwo lafin furo kurta tintu énda balilagaén. ³Atin bénréh Jesuse mano, “Béréhé ku begom i toowe, i ni méskinan libun baléw maak mas na médooy niray ne bé de dumo étew kawasa. ⁴Non i de ni étew kawasa, méniray ro saén kloh tidéw dob de médooy kurta ro. Endob i ni baléw énteyén i kéluhanay kurta ne fégéfaguyagén.”

Fantag bé tamfaday duniyae

5 Atin i de dumo bé de étew diyo séuret-uret ro fantag bé lawi i Tuluse rénígo bé de batéw toow fo fiyo brab de toow fo fiyo falasén balilaga éntingayén niray i de étew dob Tuluse. Endob ménbéréh i Jesuse mano,
 6 “Gégumah mosoy gaiwe, i kéluhanane gito gom mébinasa. Brab fiyon i de batéw fénggérigo de émbéragar ro.”

7 Atin ménénginsa ro maro, “Maistéro, kédiron mérigoy de ni? Brab ati fégélonone de bé ni gai ké gédétén gumah?”

8 Atin séménumbul i Jesuse mano, “Ingat gom inok énda géfagakaran gom. Non médooy mosoy de étew gégumah usaré roy dawét guwe, brab émbéréh ro maro, ‘Begéney Kristowe, brab i gai guwe ay ni nén.’ Endob kagom unuron bero loo ké furay gom bero. 9 Atin kagom mégilak ké

gélingoo kom i kékéréd i sétibohe brab gélingoo kom soy fantage bé de gira. I kéluhanay de ni mérigo éndob békén sénay niy tamanane.”

¹⁰ Bénréh Jesuse man mano, “I de ingéd sétiboh ro bé de ségiyo ingéd. Brab i de sakuf fangangaturan sétiboh ro bé de ségiyo. ¹¹ Atin wén mosoy do émbagér luba, brab lénggob, brab do médoor mékéglak kérégénon dob de ségiyo-giyo ingéd. Brab wén mosoy téfégito fégélolonon de tidéw dob lawayo. ¹² Endob bé énda séna mérigo de ni, kéfoén gom brab kérégénan gom sabaf bé kénéunur gome. Brab uwitén gom dob de lawi féngadafan inok kukumén gom brab férissunén gom. Brab uwitén gom dob adafay de datu inok kukumén gom sabaf begom i do kuyug gu.

¹³ Endob amuk mérigo de ni dob begome, been i niy gaiy kénéret gome bé Fiyowe Uret dob berowe. ¹⁴ Fégétédém gom i ni, amuk mérigo de ni dob begome, kagom émbuku fantag bé ati késumbul gome. ¹⁵ Non iraya ku begom kégétigan brab do kékéréd inok i de sébanil begom énda i fiyo késumbulo ro begom. ¹⁶ Fiyon i de lukés gom brab do dumo gom sétiman idéng brab de samung gom brab do dumo gom, iray ro begom dob de gémaak kukuman inok féléhué roy de dumo begom. ¹⁷ Atin i kéluhanay de étew mérarék ro begom sabaf bé Begéne. ¹⁸ Endob fiyon fo ké méléhu gom, maak énda gébinasana roy fiyon sébaan buk dob de uléw gom.

¹⁹ Fédayday gom munur Begén bé nan gai fésasangén gom non been i funa kome méfukas.

²⁰ “Atin buluk gito gom i Jerusaleme séliwétoy de sundalo nén, émfégétigan begom bé gédétén i kébinasa nuwe. ²¹ Atin i de étew batí dob sakuf Judeawe fatut ro méraréy dob de tuduk. Brab de étew dob Jerusalem fatut ro so méraréy. Brab i de étew gélyu de, békén fatut ro mahur. ²² Non been i niy gaiwe kémukum i Tuluse inok métuman i Ménsumate Kékéréd i Tuluse. ²³ Toow fo mékégédaw-gédaw i de libun obor brab de libun mériton non gérumah i gaiwe toow fo mékéglak atin i Tuluse kukumé noy de ni do étew Judío. ²⁴ Atin i de dumo étew féléhuén tibohén bé sundange, brab i de dumo de férissunén dob de ségiyo-giyo ingéd. Brab i de étew békén Judío daa roy Jerusaleme inok mébinasa taman gilid i karowe gai.

²⁵ “Wén so mosoy fégélolonon de dob térsange brab térsang kélungonone brab de giton, brab dob duniye niy kéluhanay de ingéd kégilakan non bé késelekéy émbagére bagél dob dogote. ²⁶ I de étew mésumba ro funowén bé kégilak ruwe ongot-ongot bé ati mérigowe dob duniye ni, atin non i de éntingayén dob lawayo mékuyung. ²⁷ Tidéw bénó, i Nga i Kéilawane, sani Begéne, téfégítowu tidéw dob lawayo gérumah dob rawéne toow fo barakatan brab réméndaw. ²⁸ Buluk mérigo de ni, tindég gom brab léngag gom non gédétén gumah i gaiwe méfukas gom.”

²⁹ Tidéw bénó, nuret Jesuse beroy ni binuwaya mano, “Fégítung gom i de kayéw. ³⁰ Dini dob betome ni, buluk gito gom i de dau ro mégalin, gétiga kom

gédétén i gaiwe méduf. ³¹Loo so bé ni amuk gito gom i de ni mérigo, gétiga kom gédétén i kégumah i kéféguléw i Tuluse.

³²“Béréhé ku begom i toowe, i de étew méuyag béni, énda méléhu ro taman mérigoy de ni. ³³I lawaye brab duniyae méalfa ro, éndob i kékéréh guwe énda méalfaén.

³⁴“Ingat gom. Kagom démoyun fégitungén i kéfaguyaya brab téolonolone, brab kagom toowén fégitungén i kéuyaga kome, non i nan gai séfuleu gégumah bé gaiwe békén karangé kom. ³⁵Non tékow gégumah i ni gai dob kéluhanay de étew dob duniyae ni. ³⁶Ingat gom brab sénga téklid gom dasal inok émbagér gom énda mémakid gom bé kéluhanay de ni mérigo. Atin gétindég gom dob adafa kuwe énda mémala gom.”

³⁷Bé béno do gai, sénga fuweh mangéy i Jesuse téromo dob lawi i Tuluse, brab sénga kélunganon ménangéy dob tuduke Olibo. ³⁸Brab i kéluhanay de étew dob no gonon, sénga toow géfuwén mangéy ro dob lawi i Tuluse inok fégélingoé roy Jesuse muret.

I rénigo Judase

22 ¹Bé béno gai, i kékanduli i de Judio féndawét “Témara” gédétén. ²Bé no kanduli, amaé roy fane énda fénrukén. ³Atin i de odoroy de fadi brab de téromo bé kitabé séméléd ro bé ati kéféléhu ruwe bé Jesuse. Endob sékémén saén, non mémilak ro bé de étew.

⁴Tidéw béno, i Satanase rénahuko noy Judas Iskariote ségétew bé de folo bra ruwo kuyug Jesuse. ⁵Atin ménangéy i Judase dob de uléw i de fadi brab de méguléw bé lawi i Tuluse brab sénbéréh roy ati kékefo ro bé Jesuse. ⁶Toow ro de fo ménoror brab ménuyot ro de ké iraya ro kurta i Judase. ⁷Tidéw béno, ménagayun i Judase, brab sénlédén i gaiwe ké énda i dumo Jesuse médoó étew inok fékéfoén.

⁸Amun ménifus i firoye gétérésangan, méngumah i gaiwe fatut i de Judio sémumbali nati bili-bili kay kékandulie féndawét “Témara”. ⁹Mélaw sénugu Jesusey ruwowe bé de kuyugén ro Pedro brab Juan. Brab ménésbéréh bero mano, “Agéw gom brab tafay gom i amaé tome kay kandulie ni ‘Témara’.”

¹⁰Ménenginsa ro dob Jesuse maro, “Hon i kétaya muwe de gono key té mogoh?” ¹¹Séménumbul i Jesuse mano, “Dob Jerusalem. Amuk gumah gomén diyo gébalaka kom i ségétewe étew lagéy ménuwit binangga ménféno wayég. Furay gom de mangéy dob lawie ayo no. ¹²Tidéw béno, béréh gom dob gefee bé lawie makom, ‘Méuyot i Maistérowe ké gétiga no hon i sibéye de gono no mama beroy de kuyugén bé ni kékanduli.’ ¹³Atin i gefee bé lawie toroé no begom i dakéle sibéy wén i de kagamitan de dob rotor i lawie. Diyo i kéluhanay gamité kome. Diyo tafay gom i kéluhanay amaé tome.”

¹⁴I Pedrowe brab Juane ménangéy ro dob no ingéd. Atin énggito roy kéluhanane loo bé kékéréh Jesuse de bero. Tidéw béno, téna fay roy de amaé ro kay kandulie “Témara”.

I kéama i Kadnane

¹⁴ Amun ménahur i Jesuse dob lawie, atin amun gumahén i urase, ménasar dob doror i ahayane beroy de kuyugén. ¹⁵ Atin ménbéréh i Jesuse mano, “Toow fo méuyotu mama séréngan begom bé ni kéama kanduli ‘Témara’ non éndaén mérugayén taman mékukumu. ¹⁶ Béréhé ku begom i toowe, éndaén mamau bé ni kéama bé kékandulie ‘Témara’ taman gégumah i gaiy kéféguléw i Tuluse bé de étewén. Bé no gai, wén i mantu atag i ni kanduli.”

¹⁷ Tidéw béo, éndot Jesusey tabu i arake brab ménfésalamat dob Tuluse. Atin nirayén i tabue dob de kuyugén. Atin bénréhén dob berowe mano, “Edot gom i ni brab sétukido kom i arake ni. ¹⁸ Béréhé ku begom, éndaén minému arak loo bé ni taman gégumah i gaiy kéféguléw i Tuluse bé de étewén.”

¹⁹ Tidéw béo, éndotén i fane, brab ménfésalamat dob Tuluse brab sénkébeng-kébengén, brab sénaarén dob de kuyugén. Atin ménbéréh mano, “Ay ni fane. Been i lowoh guwe, niray fégéfukas begom. Ama gom i ni inok gétédémo kom Begén.” ²⁰ Amun énggilid i kéama ruwe, éndotén i tabue brab ménbéréh mano, “I tabue ni been i niy dara guwe rémanas, fégéfukas begom, sani tandaé bé mantuwe fasad i Tuluse bé de étewén.”

²¹ Endob téngténg gom. I émfékéfo séko Begén dini dob Begéne ni mama. ²² I Nga i Kéilawane, sani Begéne, féléhuén loo bé kétayay Tuluse mérigo. Endob mékégédaw-gédaw i étewe ni émfékéfo, non mékukum fo toow.”

²³ Tidéw béo, i de kuyugén séfénginsa ro ké ati isuwe bero rémigo bé ni.

²⁴ Tidéw béo, méniséédél de kuyugén ké ati isuwe bero toow na fo gérotor. ²⁵ Atin bang Jesuse dob berowe, “I de étew datu dob ni duniya wén i atura ro dob de étew ro, brab i de uléw tabarén ‘Dumoy de étew.’

²⁶ Endob békén fatut loo bé ni dob begome. I toowe gérotor bé begomey fatute fénggiring bé toowe tuwaréy begom. Brab i méguléwe géiring bé sugu-suguéné. ²⁷ Ufama, ati isuwe mas na gérotor, i étewe duwoton ménasar mama, taloo no i étewe démuwoton de? Békén ba i étewe ménasar mama? Endob i Begéne, ay niwu dob kérara gome loo bé ségétéwe sugu-suguén.

²⁸ Atin i begome do méntaus ménodor Begén fiyon fo ké béo de gai kérégénanu. ²⁹ Atin loo bé kéiray i Boh guwe Begén bé kuwagibé méguléw, iraya ku so begom kuwagib loo bé ni. ³⁰ Bé gaiwe méguléwu, mama gom brab miném gom séréngan Begén. Brab géésar gom dob de saran kay de datu inok kémukum gom bé foloe brab ruwo do sakuf i de Judio.”

Nuret Jesusey fantag bé Pedrowe

³¹ Atin ménbéréh i Jesuse dob Simon Pedrowe mano, “Simon, fégélingoém. I Satanase méntungkas bé tukawa no begom kéluhanan, loo bé kéfanire bé

faréye inok féganané noy fiyowe bégas bé ukofe. ³² Endob i Begéne, dénasala ku beem inok i kéfengintoow me méégét. Brab amuk séfule go mangéy dob Begéne, féégétém i kéfengintoow i dumo muwe.”

³³ Endob bang Pedrowe, “Kadnan, modoru Beem fiyon fo ké dob kalabusuono taloo no fiyon fo ké dob léhuone.”

³⁴ Séménumbul i Jesuse mano, “Pedro, énda séna ukoro i férufete béléewe, dirungé mo Begén téléc gule bé énda gélolo mo Begén.”

³⁵ Tidéw béno, fénénginsaa Jesuse bero mano, “Bé késugu guwe begom bé kagom muwit kurta taloo no amaén, brab safatos, wén bay kulang dob begome?”

Séménumbul ro maro, “Enda.”

³⁶ “Endob béléewe,” bang Jesuse, “buluy wéne kurtaén brab amaén, uwité no, brab buluy éndae sundangén, féléléyén i géruwowe lafin kégalén inok fégébéléyén sundang. ³⁷ Non béréhé ku begom i ni, métuman i Ménsulate Kébérél i Tuluse fantag bé Begéne mano, ‘I ni étew mékukum maak ségétew énda ménodorén bé kitab i gémamake kukuman.’ Hoo, i ménsulate fantag bé Begéne féganayén métuman béni.”

³⁸ Tidéw béno, i de kuyugén maro, “Kadnan, wén i ruwo timan sundang dob ni.”

Atin séménumbul i Jesuse mano, “Békén tintu sundang i bénréh guwe begom! Témérén tomén séuret-uret!”

³⁹ Tidéw béno, ménagéw i Jesuse loo bé adat ne rigoné no mangéy dob tuduke Olibo. Atin ménodor i de kuyugén de. ⁴⁰ Amun gérumah ro dob no gonon, bang Jesuse, “Dasal gom inok énda métukawan gom.”

⁴¹ Tidéw béno, ménfrayu bero gumaha témarbar. Atin ménlingkuwéd brab déménasal, ⁴² mano, “abay, buluk méuyot go de, kago fidayaén Begén mérassay. Endob i kaame kétayan i mérigowe damén, békén kagén kétayan.” ⁴³ Tidéw béno, i télakiwe tidéw dob lawayo méntefégiro dob Beene brab fénbagérén. ⁴⁴ Bé béno uras, toow fo ménbuku i Jesuse. Brab toow fo émbagér i kédasal ne. Atin ménénét fo toow, brab léménuyut i énéti ne dob fantade maak dara.

⁴⁵ Amun énggilid démasal, téménindég ménagéw ménangéy dob de kuyugén. Endob énggitoy no bero énggfidong ro non lugotén ro non émbuku ro. ⁴⁶ Mélaw nulégén bero mano, “Sedek fidong gom? Tek gom brab dasal gom inok énda métukawan gom.”

I kékéfoe bé Jesuse

⁴⁷ Amun émbéréh sénay Jesuse, énggégumah i médoowe étew, brab Judasey ségétewe bé de folo bra ruwo gétew kuyugén i méngkuléwe bero. Féngédéto noy Jesuse inok aréki no. ⁴⁸ Fénénginsaa Jesuse mano, “Judas, fékéfoém i Nga i Kéilawane bé arék me?”

⁴⁹ Amun énggitoy de kuyug Jesus i ni ménrigo, ménbéréh ro maro, “Kadnan, sétiboh gey bé de sundang gey?” ⁵⁰ Atin i ségétewe bé de

kuyugén téníbohén i riféy gérotore fadi brab ménsilaf i kuwonone kéklingoén.

⁵¹ Endob bang Jesuse, “Ngaén i nan!” Brab génamakén i kéklingoéne ménfali, atin ménkuwa.

⁵² Atin ménbéréh i Jesuse dob de odoroy de fadi, brab de odoroy de mantay bé lawi i Tuluse, brab de odoroy de Judio mangéy de kéméfo mano, “Sedek ménkuwit gom do sundang brab do tafés, maak ségétewu tulisan kéfoé kom? ⁵³ Sénga fuweh Betom dob lawi i Tuluse, éndob énda kénéfo gom Begén. Endob méuyot gom rigoné kom i ni béní, non délémon, brab énda i gérito begom.”

Dénirung Pedrowe

⁵⁴ Tidéw bénó, kénéfo roy Jesuse, brab nuwit ro dob lawi i gérotore fadi. Brab i Pedrowe ménfuray bero, éndob ménférayu kloh. ⁵⁵ Atin wén i aféye nuyag diyo dob kérara i fésayawane brab wén i de ménasar géliwét. Ménasar so diyo i Pedrowe. ⁵⁶ Enggitoy ségétewé kénogon sugu-suguén i Pedrowe brab bénréhén mano, “I étewe ni dumo no.”

⁵⁷ Endob dénirung Pedrowe mano, “Di, énda gélolo guy nan étew ménkéfo.”

⁵⁸ Enda ménrugayén, ségétew man i énggégélo lowe bé Pedrowe mano, “Beem soy ségétewé bero.”

Endob séménumbul i Pedrowe mano, “Békén! Békén dumo no begén!”

⁵⁹ Amun ségéuras man tidéw bénó, ségétew man i ménbéréhe mano, “I ni étew tintu dumo no, non ségétew étew so tidéw Galilea.”

⁶⁰ Séménumbul man i Pedrowe mano, “Adih, énda gétiga kuy béréhé muwa nan.” Atin sonom bénó, i férufete ménukoro bé émbéréh sénay Pedrowe.

⁶¹ Atin i Kadnane Jesus séménling brab téneqténgén i Pedrowe. Bé bénó so énggétédémo Pedrowey bénréh Jesuse mano, “Enda séna ukoro i férufete béléewe, dirungé mo Begén télew guile béréh mo Begén.” ⁶² Tidéw bénó, ménsut i Pedrowe ménangéy dob fuwehe brab toow fo kéménrew.

I kékukume béréh Jesuse

⁶³ Atin i de étew mantayan béréh Jesuse féganayé ron tafésen brab diyangkaén.

⁶⁴ Tidéw bénó, ténléb roy de moto no béréh munsalawe brab féantuk ro de kéklingoén. ⁶⁵ Brab toow ro fo fénémalay Jesuse béréh ro.

⁶⁶ Amun géfuwénén, i de odoroy de Judio, brab de odoroy de fadi, brab do témore béréh kitabe, ménslimud ro, brab fén-uwit roy Jesuse dob téngaanga ruwe. ⁶⁷ Atin fénénginsaa roy Jesuse maro, “Buluk Beem i Kristowe, sani fénemili i Tuluse méguléw, béréhém begey.”

Atin séménumbul i Jesuse mano, “Fiyon fo kéklingoén ku begom, énda méninugut gom de. ⁶⁸ Atin buluk wén i fénginsaa ku begom, énda sumbulo kom de. ⁶⁹ Endob tidéw béléewe, i Nga i Kéilawane fésarén dob kuwonoy barakatane Tulus.”

⁷⁰ Mélaw fénénginsaa roy Jesuse maro, “Aw Nga i Tuluse Beem?”

Atin séménumbul i Jesuse mano, “Toow i nan bénréh gom bé Nga i Tuluse Begén.”

⁷¹ Tidew béno, ménbéréd ro maro, “Endaén kailanga tom i témboe de dob betome. Non énggelingoo tomén tidew dob Beene.”

23 ¹Tidew béno, i kéluhana ruwe ménlimud, nuwit roy Jesuse mangéy dob Pilatowe sani méguléwe tidew Roma. ²Nuret ro dob Pilatowey kéluhanay de tete rénigo Jesuse kun. Bénréh ro maro, “Enggito gey i ni étew fanangguvité noy de étew inok sébanil ro begom do gémamak kukuman. Enda fébayade no bero buwis dob toowe fo gérotor datu féndawét Sesar dob Roma. Bénréhén so bé Beene kun i Kristowe sani ségétéwe datu.”

³ Tidew béno, fénénginsaa Pilatowey Jesus mano, “Aw Beem i Datu i de Judio?”

Séménumbul i Jesuse mano, “Beemey ménbéréhe de.”

⁴ Atin bang Pilatowe dob de odoroy de Judio brab dob kéluhanay de étew diyo, “Karangé ku, énda i funa no fatut mékukum.”

⁵ Endob fétausé ro soy kétébo ruwe de maro, “I ni étew téménoro dob kéluhanay sugud i de ingéd dob Judea fanangguvité noy de étew sétiboh begom do gémamak kukuman. Féngganayén rénigoy ni dob Galilea, atin ménangéy dini inok rigoné no so.”

⁶ Amun énggelingoo Pilatowey ni, ménénginsa mano, “Aw tidew Galilea i ni étew?” ⁷ Amun énggétiga no tidew diyo, sénugu Pilatowey Jesuse mangéy dob Herode, sani datue dob Galilea, non diyo dob Jerusalem bé no gai. ⁸ Ménoror i Herode bé kégito nuwe bé Jesuse. Non médooy énggelingoo nuwe fantag bé Jesuse, brab ménrugayén i kéuyot ne de géségito. Témayan de damén ké gito noy Jesuse rémigo mékégaif. ⁹ Mélaw médooy fénénginsa ne bé Jesuse. Endob énda séménumbul i Jesuse. ¹⁰ Diyo soy de odoroy de fadi brab de témore bér kitabe. Atin toow ro fo ténebo i Jesuse. Endob énda soy sumbul Jesuse de. ¹¹ Mélaw i Herode brab de sundalo no, déniyangka ro brab fénémala ro. Tidew béno, fénkégala roy Jesuse bér toowe fo fiyo métahé kégal maak datu brab fénsefule ro mangéy dob Pilatowe. ¹² Tidew béno, i Herode brab Pilatowe ménwaléy ro sékélayaman, fiyon fo ké sébanil ro méntaén.

¹³ Ténawag Pilatowey de odoroy de Judio, brab de odoroy de fadi, brab de ségiyo-giyo étew. ¹⁴ Atin bénréhén bero mano, “Nuwit gom i ni étew Jesus dob begéne, brab bénréh gom fanangguvité noy de étew gom sétiboh begey do gémamak kukuman. Endob béléewe fénénginsaa ku dob adafa kome, atin énggétiga ku énda i toow bér kéluhanay bénréh gome. ¹⁵ I datu Herode énggétiga no so énda i salaén loo bér de bénréh gom, mélaw fénsefuleén so mangéy dini. I ni étew énda i rénigo no tete. Békén fatut féléhuén. ¹⁶ Mélaw fébadas gu saén, tidew béno fétangéy gu.”

¹⁷I ni ménrigo bé gaiy kékandulie “Témara”. Atin i adat i méguléwe tidew Roma sénga kanduli “Témara” témangéy ségétew ménkalabusu inok fiyoy fédew i de Judio de. ¹⁸Mélaw non énda kukumé Pilatowey Jesuse féléhuén, i de étew ménsélimud ménkes maro, “Féléhu gom, brab tangéy gom i Barabase.” ¹⁹(I Barabase ni étew ménférisu non ménamung sétiboh dob Jerusalem bé de gémamak kukuman. Ménméléhu so do étew.)

²⁰I Pilatowe ménbérén man ségule dob de étew ménsélimud bé i kétaya nuwey Jesusey tangéyéne. ²¹Endob ménkes i de étew maro, “Féléhu gom! Kélabo gom dob kruse!”

²²Endob ménbérén i Pilatowe bé gétéléw ne gule mano, “Ati rénigoy ni étew? Enda i gétiga ku funa tom de méméléhu. Fétafés gu sa atin tangéyén.”

²³Endob i de étew ménkes ro man minut métanug i Jesuse kélabonén dob kruse. ²⁴Tidew béno, sabaf bé kéekes ruwe, ménagayun i Pilatowe bé kéongot ruwe kémukum bé Jesuse. ²⁵Atin loo bé kétaya ruwe, ténangéyén i Barabase, sani étewe férisu sabaf bé beeney ségétewe méméléhu brab fénsétiyahen i de étew sébanil bé de gémamak kukuman. Atin i Pilatowe nirayén i Jesuse dob de étew ménsélimud inok rigoné roy ati kétaya ruwe rigonén dob Jesuse.

Kénlabo roy Jesuse dob kruse

²⁶Nuwit i de étew i Jesuse mésut dob Jerusalem inok kélaboné ro dob kruse. Atin dob de aguwon, énggébalaka roy étewe féndawét Simon tidew dob ingéde Siren. Béno sénay kégumah ne dob no ingéd. Fénodor ro inok fégésé ro démuwal bé kruse furay bé Jesuse.

²⁷I médoowe étew furay bé Jesuse. I de dumo bero do libun kémérew ro brab rémuung non bé kérigo ruwe bé Jesuse. ²⁸Sénling Jesuse bero mano, “Do libun tidew Jerusalem, kagom kérewon Begén. Kérewo kom i de lowoh gom brab de nga gom. ²⁹Non gégumah i gaiwe mérégén brab émbérén i de étew maro, ‘Méoror i de libun énda mén-obor ro, énda i do nga ro, brab énda i féntutu ro do nga.’ ³⁰Bé no gai, émbérén i de étew dob de tuduk maro, ‘Tamfurén gey!’ brab dob de burur, ‘Bunéyén gey!’ ³¹Non buluk rigonéy de étew i ni dob ségétewe étew énda i rénigo no tete, toow na fo mas géttimal dob de étew réménigo tete.”

³²Atin ménuwit ro so ruwo gétew férisu inok séréngan ro féléhuén bé Jesuse. ³³Amun ménggégumah ro dob no gonon féndawét “kulobong uléw”, kénlabo ro diyo i Jesuse dob kruse ni. Kénlabo ro soy ruwowe gétew férisu dob de krus. I sébaane de fingé dob kuwono Jesuse, brab i sébaane de dob fingé biwong Jesuse. ³⁴Tidew béno, déménasal i Jesuse mano, “Abay, fésagada mo bero non énda gétiga roy rigoné ruwe.” Atin i de sundalo sénkungkungo roy ati gégedote bé kégal Jesuse. ³⁵I lala i

de étew téménindég diyo témanud, i de odoroy de Judio déniyangka roy Jesuse maro, “Ténabangén i de ségiyo étew inok énda méléhu ro. Mélaw, buluk Beeney Kristowe tintu Mémukas fénémili i Tuluse, sedek énda gétabanga noy lowoh ne inok énda méléhuén?”

³⁶Déniyangka i de sundalo so. Atin téningé ro brab niraya ro bé mélémuwe arak brab ménbéréh ro maro, ³⁷“Buluk Beemey datu i de Judio, tabangém i lowoh me.”

³⁸Brab wén i ménsluate dob rotor i uléw Jesuse mano, “Ay niy datu i de Judio.”

³⁹Atin i ségétewe bé de férisu ménbitin diyo bero Jesuse, diyangkaé no soy Jesuse mano, “Aw békén ba Beemey Kristowe Mémukas? Mélaw tabangém begey brab i kaame lowoh.”

⁴⁰Endob i dumo nuwe férisu ménbéréh dob sunguwe de mano, “Kago émbéréh loo bé nan! Aw énda mégilak go bé Tuluse? I betome téléléw gétew ménkukum féléhuén. ⁴¹Atin i betowe fatut féléhuén non bé de tete rénigo to. Endob i ni étew énda foy tete rénigo no.” ⁴²Tidéw bénou, ménbéréh dob Jesuse mano, “O Jesus, fégétédéménu amuk Beemén i méguléwe.”

⁴³Séménumbul i Jesuse mano, “Béréhé ku beem i toowe, béléewe séko diyo go dob Begéne dob bélówono fantad.”

I kéléhu Jesuse

⁴⁴Amun géutuhén, éndaén rémendaw i téresange. Déménlémon i fantade taman ménifus i téléléwe géuras. ⁴⁵Tidéw bénou, i rindunge bénitin dob mékétéfuwe sibéy dob lawi i Tuluse, ruwoy ménsésdaya nuwe. ⁴⁶Atin i Jesuse ménkes métanug mano, “Abay, sarigé kuy kamatu guwe dob Beeme.” Amun énggóbérého noy ni, ménléhu i Jesuse.

⁴⁷Wén i ségétewe gérотор odoroy de sundalo énggito noy ni ménrigo, atin dénayéwén i Tuluse mano, “Toow fo métintuy ni étew!”

⁴⁸I de étew ménslimud diyo, amun énggito roy ni ménrigo, ménule ro ménmala brab tete i de fédéw ro. ⁴⁹Atin i kéluhanay de étew énggobalaka roy Jesuse, fiyon i médoowe bé de libun tidéw Galilea ménodor de, téménindég ro dob mérayue téméngténg brab énggito ro soy kéluhanay ni ménrigo.

I kélébénge bé Jesuse

⁵⁰Wén i ségétewe lagéy féndawét Jose tidéw Arimatea sébaan ingéd dob Judea. Ségétew fiyo étew brab ménunur bé de kukumay de Judio.

⁵¹Fiyon fo ké beeney ségétewe bé de kéfédéway de Judio, énda ménagayu no bé rénigo ruwe bé Jesuse. Ongot-ongoté no soy gaiy kéféguléw i Tuluse bé de étewén. ⁵²Ménangéy dob Pilatowe brab nongotén i bangkay Jesuse. ⁵³Atin éndotén i bangkay Jesuse tidéw dob kruse brab bénausén

bé fiyowe safut, brab nahurén dob lébénge téñosong dob rangih i fingase. I ni lébéng énda séna ménlébéngo no. ⁵⁴I gaiwe béno témégén Biyarnes brab gédétén i gaiwe Sabado sani gaiwe kétéréy de Judio.

⁵⁵I de libun ménodor bé Jesuse tidéw Galilea, ménfuray ro bé Josehe brab énggito roy lébénge brab ati kéahure bé bangkay Jesuse diyo.

⁵⁶Tidéw béno, ménule ro brab téménafay ro fégéféamut brab do mamut daun kay bangkay Jesuse. Endob bé gaiwe kétérén, téménréni ro loo bé kékérén i de kukuman nodoro ro.

I kétébule Jesuse

24 ¹Amun toow fo géfuwén bé no Duminggu, i de libun ménodor bé Jesuse tidéw Galilea, ménangéy ro dob lébéng Jesuse. Nuwit roy mamute daun ténafad ro. ²Amun énggégumah ro dob lébéng ne, énggito roy batéwe fénggétéléb bé bengaway lébénge ni ménkériring. ³Tidéw béno, ménahur ro, éndob i bangkay Jesuse éndaén diyoén. ⁴I lala ruwe témindég mégaif, méntékow méntéfégitoi ruwowe gétew lagéy, sémélinañ i de kégal ro. ⁵Toow fo ménggilak i de ni libun, mélaw déménungul ro. Tidéw béno, ménbérén i de lagéy ni maro, “Sedek mangéy gom dob lébénge séméléd bé ségétewé étew méuyag? ⁶Endaén dini no, non ténebule i Tuluse nén. Fégétédém gom i de kékérén begom diyo de séna dob Galilea mano, ⁷I Nga i Kéilawane iray dob de tete étew atin kélaboné ro dob kruse. Endob dob gétéléw ne gétérésang, tébule.”

⁸Tidéw béno, i de libun ni, énggétédémo roy bénréh Jesuse. ⁹Mélaw ménagéw ro tidéw dob lébénge brab nuret ro dob de folo bra sébaan kuyug Jesuse brab dob kéluhanay de dumo étew i kéluhanay énggito ruwe brab énggelingoo ruwe. ¹⁰(I ni do libun ro Maria Magdalena, Juana, brab Mariawe idéng Santiago, brab de dumo libun, nuret roy de ni dob de apostol.) ¹¹Endob i de kuyug Jesus, énda ménunur ro bé bénréh i de libun ni, non maro ké dufang saén i kékérén ruwe de. ¹²Endob i Pedrowe ni ségétewé bé de kuyug Jesus téménindég brab léménéntu mangéy dob lébénge. Amun énggégumah diyo, sénarirén ténengténg, atin énggito no say de safut fénggébaus bé bangkay Jesuse, ménféled. Mélaw ménule ménggaif bé no ménrigo.

I de kétéfégito Jesus

¹³Atin bé béno gai, wén i ruwo gétew bé de kuyugén ménangéy dob sébaane ingéd fédawétén Emaus, folo bra ruwo gékilometroy kérayu ne tidéw Jerusalem. ¹⁴Amun diyo ron dob de aguwon, méniséuret-uret ro fantag bé kéluhanay de ménrigo bé Jesuse. ¹⁵I lala ruwe séuret-uret magéw so, bé béno soy Jesuse ménggégumah séodor bero magéw. ¹⁶Endob nalang ro fégéloloné ro ké Been i Jesuse. ¹⁷Atin fénénginsaa Jesuse bero mano, “Ati nan ureté kom bé lala goma nan magéw?”

Tidéw béno, téménréni ro magéw brab ménbuku i falas ruwe.

¹⁸ Ségétew bero féndawét Kleopas ménbéréh dob Jesuse mano, “Beem saén keeyén i étewe bati dob Jerusalem, énda gétiga moy atiy ménrigowe diyo bé de ni gai.”

¹⁹ Ménenginsa i Jesus mano, “Ati no ménrigo?”

Séménumbul i de kuyugén maro, “Fantag bé Jesuse tidéw Nasaret, ségétew sénarigoy Tuluse muret. Barakatan i de kébérhéhén brab de rénigo no dob téngaangay de étew brab dob Tuluso. ²⁰I uléwoy de fadi gey brab de odoro key fénkéfo roy Jesuse inok kukumén brab féléhuén kélabonén dob kruse. ²¹Wénén i inam gey bé Beene damén i mémukase betom do Judio. Atin béleewe niy gétéléwo nuwe gétérésangan tidéw bé no ménrigo. ²²Brab wén i de dumo gey do libun, fénggaif ro begey non ménangéy ro dob lébénge toow fo gino géfuwén. ²³Endob amun sénléed roy bangkay ne, énda énggito ro de. Atin ménséfule ro, brab bénréh ro bé wén i de télaki méntéfégito émbéréh bé Jesuse méntébule. ²⁴Tidéw béno, i de dumo begey do kuyug Jesus ménangéy ro so dob lébénge Jesuse ni, brab énggito roy kéluhanane toow ménrigo loo bé kébéréh i de libun ni, éndob énda gito roy bangkay Jesuse.”

²⁵ Tidéw béno, bénréh Jesuse bero mano, “Toow gom fo dufang, brab énda munur gom bé bénréh i sénarigoy Tuluse muret bé kébéréh ne.

²⁶ Békén ba kailangan mérasay i Kristowe atin tidéw béno médayéw fo toow?” ²⁷Tidéw béno, fénggétiga Jesuse dob berowe ké atiy ménslate dob libro Moisese brab i sénulat i kéluhanay sénarigoy Tuluse fantag bé Beene.

²⁸ Amun gédét ro nén dob ayo ruwe ni, i Jesuse ni fénténgténgén bé maak taus magéw mangéy féravy. ²⁹ Endob nongot ro bé Jesuse maro, “Odor go begey témérén non gédétén sémingkuf.” Mélaw ménodor i Jesuse bero mahur dob lawie. ³⁰ Amun diyo ron ménsar dob doror i ahayane, méndot i Jesuse fan brab fénsalamata no. Tidéw béno, sénkébeng-kébengén, atin sénaarén dob berowe. ³¹ Tidéw béno, énggélolo roy Jesuse, éndob tékow ménalfa dob téngaanga ruwe. ³² Tidéw béno, ménsébéréh-béréh ro maro, “Been i funa tuwe toow fo fiyoy de fédéw to brab toow fo méror to bé késébéréh-béréh ne beto amun diyo to dob de aguwon atin bé lala ne mureton beto fantag bé Ménslate Kébéréh i Tuluse.”

³³ Bé béno so, téménindég ro brab ménséfule ro mangéy Jerusalem. Diyo énggito roy de folo bra sébaan ménsélimud beroy de dumo kuyugén. ³⁴ Atin séuret-uret ro maro, “I Kadna tome toow méntébule, non méntéfégito dob Simone.” ³⁵ Tidéw béno, nuret i ruwowe gétew dumo roy ménrigowe dob de aguwon, brab ati kégélolo ruwe de bé de sékébeng-kébengén fan.

³⁶ I lala ruwe séuret-uret, méntéfégitoj Jesuse téménindég dob kérara ruwe ménsébéréh bero.

³⁷Endob toow fo mégilak ro non maro ké ménayam i Jesuse. ³⁸Mélaw ménbéréh man i Jesuse mano, “Sedek mégilak gom? Aw mérégén i kéunur gome ké méuyagu? ³⁹Téngténg gom i de kémér gu ni brab de sékéy gu ni. Gito gom? Toow, Begén. Gamakénu inok gétuwa kom békénu ménayam. I ménayame énda i ungéen brab énda i bukalén. Endob gito gom, wén i kagén de.”

⁴⁰Tidéw béno, fénténgténg Jesusey de kémérén brab de sékéyén. ⁴¹Toow ro fo ménggaif brab énda géféngintoow ro de, non toow fo fiyo damén ké toow. Mélaw i Jesuse fénénginsaa no bero mano, “Wén i féama gom Begén?” ⁴²Atin niraya ro sébaan sédo, ⁴³atin éndotén brab namaén dob adafa ruwe.

⁴⁴Atin bénréhén bero mano, “Been soy ni mérigowe bénréh gu begom amun diyou dob begome séna bé énda séna méléhuu. Nuret guy métuman i kéluhanane fantag bé Begéne dob de sénulat Moises brab de sénulat i de sénarigoy Tuluse muret, brab dob de sénulatén kanta dob Ménsulate Kébérén i Tuluse.”

⁴⁵Tidéw béno, fénggétiga Jesuse dob berowe inok gésobuto roy Ménsulate Kébérén i Tulus. ⁴⁶Bénréhén man bero mano, “Wén i Ménsulate Kébérén i Tuluse bé i Kristowe mékukum, éndob dob gételew ne géterésang tébule. ⁴⁷Atin sabaf bé atura kuwe fatut ureté kom dob kéluhanay de étew bé kailanga ro gésénule bé de sala ro brab rigoné roy kétayay Tuluse inok fésagaday Tuluse bero. Uret gom étah dob de étew dob Jerusalem, tidéw béno dob kéluhanay de étew dob duniyae ni. ⁴⁸Fatut ureté kom non begomey de énggégito bé de ni ménrigo. ⁴⁹Sugué ku mangéy dob begomey ati fénasad i Abay guwe. Endob ongot-ongot gom dob Jerusalem taman gérumah i barakate dob begome.”

I kédiyat Jesuse

⁵⁰Tidéw béno, nuwit Jesusey de kuyugén ménsut dob no ingéd taman Betania. Amun ménggumah ro diyo, ténunggulén i de kémérén brab déménasal dob Tuluse inok féfiyoné no bero. ⁵¹I lala ne rémigo bé ni, déméniyat mangéy dob lawayo. ⁵²Atin fénéngadaf roy Jesuse, brab ménoror ro séfule mangéy Jerusalem. ⁵³Atin diyo ménangéy ro sénga tékélid dob lawi i Tuluse fésalamat bé Tuluse.

I Fiyowe Uret Sénulat Juane

Been i niy Fiyowe Uret sénulat Juane fantag bé Jesu Kristowe. Sénulat Juaney dumoy de mékégaif do rénigo Jesuse sani de galbék ménfégélolo bé i Beene, Nga i Tuluse. Sénulat Juaney Jesuse ménléhu génantino noy de kéilawan. Jesusey tulake fénléhu inok i sala i de étew mékédan. Sénulat Juane so dob ni sulat bé amuk munur i de étew dob Jesuse, iray i Tuluse beroy umule magufusa.

I Juane, sani séménulate bé ni Fiyo Uret, ségettew bé de kuyug Jesus amun dini sénay Jesuse dob duniyae ni. Endob békén saén kuyug Jesus i Juane, non been soy toowe fo kégédawa Jesuse dumo no séloyuk dob duniyae ni. Mélaw énggito noy de rénigo Jesuse brab énggelingoo noy kékérén ne. Mélaw gétiga tom toow fo toow i kéluhanay de ni sénulat Juane.

I Kristowe ménwaléy kéilawan

1 ¹Dob féganaye wénén i féndawéte “Kékérén i Tuluse”, sani Kristowe. ²Atin i Beene beroy Tuluse. Brab Beeney Tuluse. ³Beroy Tuluse bé féganaye. ³Atin fénlimbag i Tuluse bé Kristowey kéluhanay éntingayéne. Enda i éntingayén ménlimbag ké békén Kristowey léménimbage de. ⁴Dob Beeney umule brab i nan umul maak Solo réméndaw dob de kéilawan. ⁵I ni Solo réméndaw dob délémons brab énda géfandaay délémons de.

⁶Wén i ségettewé étew sénugu i Tuluse, i dawét ne Juan Bautista. ⁷Ménangéy dini muret fantag bé nan Solo inok i kéluhanane mégélingo de brab munur bé nan Solo sani Kristowe. ⁸Békén Juaney Soloe, éndob ménangéy saén dini muret fantag bé nan Solo. ⁹Tidew bénó, i toowe Solo énggégumah dob duniyae inok réméndaw dob kéluhanay kéilawane.

¹⁰Mélaw i Kristowe dininén dob duniyae. Endob fiyon fo ké Beeney léménimbage de, énda géloloy de kéilawan de. ¹¹Ménangéy dob kaane ingéd, éndob i de kaan étew énda ténayakuf ro de. ¹²Endob i kéluhanay téménayakufe de brab ménunure dob Beene, niraya no bero kuwagib waléy nga i Tuluse. ¹³Ménwaléy ro nga i Tuluse békén sabaf bé rénigoy de étew taloo no aturay kéilawane mumah ro, yamula sabaf bé aturay Tuluse saén.

¹⁴I Kristowe ménwaléy kéilawan, ménbati sétifon betom. Enggito gey i barakat ne tidéw dob Abayo Tulus, non been i buntunge Ngaén, toow fo mégédaw brab toow fo toow i kékérén ne.

¹⁵Ménuret i Juan Bautistawe fantag bé Kristowe. Ménbérén métanug mano, “Been i niy bénréh guwo begom gégumah témundug begén, éndob gérotor na begén, non bé énda séna ménunahu de, ménwénén.” Been i bénréh Juane.

¹⁶Tidéw dob toowe kégédawén betom, énda téméré no miray do kéfiyonon dob betome kéluhanan. ¹⁷Non i Tuluse nirayén i kukumane fén-uwitén bé Moisese, éndob i gédawe brab toowe kétoro fén-uwitén bé Jesu Kristowe. ¹⁸Enda i ségétew énggégito bé Tuluse. Endob i Buntunge Ngaén, fénggétiga noy fantage bé Abay ne non sédumon ro. Brab i Ngae, Tulus so.

I uret Juan Bautistawe

¹⁹I de odoroy de Judio dob Jerusalem, séménugu ro do fadi brab do témabang bé de fadi féndawét do Lebita mangéy ménginsa dob Juane, kété ati beene.

²⁰I Juane, bénréhén i mécéntaye brab toowe mano, “Békén begéney Kristowe, sani fénémili i Tuluse méguléw.”

²¹Atin fénenginsaa ro man maro, “Ati mélaw i beeme ni? Aw méntélata Elias go?”

Séménumbul man i Juane mano, “Békén.”

Atin ménenginsa ro man maro, “Aw beemey nan sarigon muret bé kékérén i Tuluse?”

Atin séménumbul man i Juane mano, “Békén.”

²²Atin ménbérén ro man maro, “Bérém begey kété ati beeme ni, inok gébérého key dob de séménugu begey. Ati gébérého muwe fantag bé beeme?”

²³I Juane séménumbul niringén i kékérén Isaiase sani méntélatae sénarigoy Tuluse muret bé kékérén ne mano, “Begéney ségétewe dob gonone énda i étew de batí, mékes maku, ‘Fééntang gom i aguwoy Kadnane.’”

²⁴Atin i de sénugu tidéw dob de Fariseo, ménenginsa ro man maro,

²⁵“Amuk békén go Kristo, taloo no Elias, taloo no sarigon muret, sedek mautis go?”

²⁶Séménumbul i Juane mano, “Wayég i fégébautis guwe, éndob wén i ségétewe étew ménggławék begom énda gélolo gom de. ²⁷Been i gégumahé témundug begén, éndob toow na fo gérotor begén. Mélaw énda médaitu fiyon mukoh bé ikét i safatos ne.”

²⁸Ménrigoy ni dob Betania, diyo dob sébangay wayége féndawét Jordan, gono Juane mautis.

I natife bili-biliy Tuluse

²⁹Dob sébaane de fuweh, énggito Juaney Jesuse mangéy dob beene, brab ménbéréh dob de étew mano, “Téngténg gom, ay ni nén i maake fégétulak nati bili-bili niray i Tuluse non féléhuén inok mékédan i de sala i de étew dob duniye. ³⁰ Been i niy bénréh guwo maku, ‘Wén i ségétéwe étew gégumah témundug begén, éndob gérotor na begén, non bé énda séna ménumlahu de, ménwénén.’ ³¹ Bé gétahe de, énda géloло gu de, éndob i funa kuwe ménangéy dini mautis bé wayége inok émfayag i Beene dob begome do dumo gu Judio.”

³² Atin ménbéréh man i Juane mano, “Enggito guy Rémogor i Tuluse ménlus tidew dob lawayo maak marafati méntriféna mangéy dob Beene. ³³ Enda damén gétiga ku de saliyu bé Tuluse, sani séménugue begén mautis bé wayége, ménbéréh dob begéne mano, ‘I étewe gito mo térimfénaay Rémogor guwe, Beeney mautise bé Rémogor guwe.’ ” ³⁴ Atin féntaus Juaney kóbéréh ne mano, “Enggito gu, brab gébérého kuy Beeney Nga i Tuluse.”

I de sungu kuyug Jesuse

³⁵ Dob sébaane de fuweh, diyo man i Juane beroy de ruwo gétew kuyugén. ³⁶ Amun énggito noy Jesuse témara, ménbéréh mano, “Téngténg gom, ay nan i natife bili-biliy Tuluse.”

³⁷ Amun énggelingoo de ruwo gétew kuyugén i ni bénréhén, ménfuray ro bé Jesuse. ³⁸ Atin séménling i Jesuse brab énggito no bero furay dob Beene. Atin fénenginsaa no bero mano, “Ati kétaya kome?”

Tidew béno ménbéréh ro maro, “Hon i batio muwe de, Rabi?” (I atag i Rabiwe Maistéro.)

³⁹ “Enggomén, inok gito gom,” bang Jesuse. Atin ménodor ro, brab énggito roy batio nuwe. I urase béno, témégénén. Mélaw énda ménule ro taman kélungonon.

⁴⁰ I ségétewé bé de ruwo ni gétew lagéy énggégélingo bé bénréh Juane brab ménodor bé Jesuse, sani fédawéténé Andres dumo Simon Pedrowe sétiman idéng. ⁴¹ I sungu-sunguwe rénigo Andrese, sénlédén i Pedrowe brab nureto no mano, “Enggito gey i Kristowe.” (I atag i Kristowe fénemili i Tuluse méguléw.) ⁴² Tidew béno, nuwitén i Simone mangéy dob Jesuse.

Atin ténéngténg Jesuse brab bénréhén mano, “Beemey Simone, nga Jonas. Fédawété ku beem Sefas.” (I Sefase ségiléw bé dawéte Pedro, atin i atag ne batéw.)

⁴³ Dob sébaane de fuweh, bénaba Jesusey mangéye Galilea. Brab énggito noy Filipiwe, atin ménbéréh dob beene mano, “Odor go Begén.” ⁴⁴ I Filipiwe, ségiléw bé Andrese brab Pedro, tidew ro dob ingéde

féndawét Betsaida. ⁴⁵ Atin i Filipiwe, ménangéy dob Natanaele atin bénréhén dob beene mano, “Enggito gey i étewe, sani étewe sénulat Moisessey fantage bé Beene dob kukumane bé do gétah, brab sénulat i de sénarigoy Tuluse so muret bé kékérén ne. Beeney Jesuse, nga Jose, tidéw Nasaret.”

⁴⁶ Atin ménenginsa i Natanaele dob Filipiwe mano, “Aw wén wayoy éntingayén fiyo tidéw Nasaret?”

Bang Filipiwe, “Enggonén, angéyém téngténg.”

⁴⁷ Amun énggito Jesusey Natanaele mangéy dob Beene, ménbéréh mano, “Ay nily métintuwe étew Judio. Enda i tugi dob adat ne.”

⁴⁸ “Ati kégétiga muwe begén?” bang Natanael.

Séménumbul i Jesuse mano, “Enggito gu beem dob fantad i kayéwe féndawét igos bé énda séna ténavag Filipiwe beem.”

⁴⁹ Tidéw bénou, fénayag Natanaele mano, “Maistéro, Beemey Nga i Tuluse brab Datu gey do Judio.”

⁵⁰ Ménbéréh i Jesuse mano, “Aw ménunur go saén sabaf bé bénréh guwe beem énggito gu beem dob fantad i kayéwe igos? Gégitgo go na médoó éntingayén rigoné ku toow fo mékégaif na tidéw bé ni. ⁵¹ Béréhé ku begom i toowe, gito gom moso i lawaye émbukeh brab i de télakiy Tuluse ménik brab mélus dob Begéne, sani Nga i Kéilawane.”

I Jesuse dob uyote

2 ¹Ménruwo gétérésangan tidéw bénou, wén i uyot dob Kana, sébaan ingéd dob Galilea. Atin i idéng Jesuse diyo dob uyote ni. ²Diyo soy Jesuse brab de kuyugén non sénéngkat ro so bero dob ni uyot. ³Amun ménétényen i arake, ménbéréh i idéng Jesuse dob Beene mano, “Endaén i arak ro.”

⁴ Endob séménumbul i Jesuse mano, “Iday, kago suguén Begéne. Enda séna énggumah i gai guwe émfégito bé barakat guwe.”

⁵ Tidéw bénou, i idéng Jesuse ménbéréh dob de sugu-suguén mano, “Rigo gom i kéluhanay béréhé nuwe begom.”

⁶ Wén i ném timan do dakél binangga diyo, usaréy de Judio ahuron wayég fégéféguse ro loo bé adat ruwe. (Labi téléléw folo gélaya i kédaclé i séngae binangga.) ⁷Bénréh Jesuse dob de sugu-suguén mano, “Féno gom wayég i de binangga.” Mélaw fénéno ro wayég i de binangga démengér ké toow fo féno. ⁸Tidéw bénou, bénréhén bero mano, “Sakug gom de kloh, brab uwit gom dob méguléwe bé ni uyot.” Atin rénigo ro.

⁹ Amun i méguléwe bé uyote ménggététem de, békénén wayég, non ménwaléyén arak. Atin énda énggétiga noy ténidéwoy ni de arak. Endob gétigay de sugu-suguén séménakug de. Tidéw bénou, i méguléwe ni ténañbarén i témérímañ lagéy. ¹⁰Brab ménbéréh mano, “Dob de dumo do karagiya, i de étew duwoté ro métah i fiyowe arak, brab buluk

énggénémén témantuy kéluhanay kanawe, tidéw béno duwoté roy mélémuwe de. Endob i beeme dénuwotém wayoy toowe balilaga arak géfuray béní!” Been i bénréh i uléwe.

¹¹ Rénigo Jesusey ni sungu mékégaif dob Kana, ingéd dob Galilea. Fénggito noy barakat ne diyo, atin i de kuyugén ménunur dob Beene.

¹² Amun énggilidén i uyote, i Jesuse brab idéng ne, brab de tuwaréyén, brab de kuyugén, ménagéw ro mangéy Kapernaum. Atin ménbati ro diyo bé ménfiroye gétérésangan.

I Jesuse dob lawi i Tuluse

¹³ Gédétén i kandulie féndawét “Témara” kay de Judio, mélaw ménénagé i Jesuse mangéy Jerusalem. ¹⁴ Dob fésawayaw lawi i Tuluse, énggito noy de étew émfébéléy do fégétulak safi, bili-bili, marafati. Brab énggito no soy de lémuluk kurta ménasar dob sékuloy de ahaya ro. ¹⁵ Mélaw réménigo fégétafésén taléy brab dénédélén bero tidéw dob lawi i Tuluse. Déne-délén soy de safi brab do bili-bili. Atin bénluweén i de ahayay de lémuluk kurta brab sénawarén i de félatah ro. ¹⁶ Atin ménbéréh dob de émfébéléy marafati mano, “Uwit gom tékédan i de ni. Kagom rigonén fadiyan i lawi i Boh guwe!” ¹⁷ Atin énggétédémoy de kuyugén i Ménsulate Kébéréh i Tuluse mano, “O Tulus, i kéimu guwe bé lawi me, maak aféy dob fédéw guwe.”

¹⁸ Atin i de odoroy de Judio ménénginsa ro dob Jesuse maro, “Amuk wén i kuwagibém tidéw dob Tuluse bé ni rénigo mo, fégitonon gey mékégaif émféfengintoow de.”

¹⁹ Sénumbulo Jesuse bero mano, “Rundas gom i lawi i Tuluse ni, atin fétindégé ku man bé téléwe gétérésangan.”

²⁰ Séménumbul i de Judio maro, “I ni lawi Tulus, mén-fot folo bra ném gébelintuwa i kéfétindége de, atin fétindégé mo man bé téléwe gétérésangan saén?”

²¹ Endob i lawi i Tuluse bérhé Jesuse, been i lowoh ne. ²² Amun gilid ménébule i Jesuse, énggétédémoy de kuyugén i bénréh ne. Atin ménunur ro bé Ménsulate Kébéréh i Tuluse brab de bénréh Jesus.

²³ Bé kédiyo Jesuse dob Jerusalem, bé gayi kékanduli i de Judio féndawét “Témara”, médooy ménnginugute bé Jesuse non énggito roy médoowe mékégaif rénigo no. ²⁴ Endob énda séménarig i Jesuse bero non gétiga noy kéluhanay étewe. ²⁵ Enda kailanga no ureton fantag bé étewe non gétiga noy fédéw i kéilawane.

I Jesuse brab Nikodemowe

3 ¹ Wén i ségétewe étew féndawét Nikodemo, ségétew bé de Fariseo sani de tintu modor bé adat i de Judio. Brab i Nikodemowe odoroy

de Judio. ² Wén i no sébaan kélungonon, ménangéy dob Jesuse atin ménbéréh mano, “Maistéro, gétiga key ségétew go témořo tidéw dob Tuluse. Non énda i ségétew gérigo bé de rigoné mo mékégaif ké békén tidéw dob Tulusey barakat ne.”

³ Séménumbul i Jesuse mano, “Béréhé ku beem i toowe, énda i ségétew géahur dob féguléwoy Tuluse, saliyu ké mumah na féruman.”

⁴ Endob ménénginsa i Nikodemowe mano, “Ati kéfingé-fingé i kéumah i étewe féruman ké lukésén? Endaén géahurén sérumán dob sur i idéng ne atin mumah man!”

⁵ Séménumbul i Jesuse mano, “Béréhé ku beem i toowe, saliyu ké i étewe mumah bé wayége brab bé Rémogor i Tuluse, énda géahurén dob féguléwoy Tuluse. ⁶ I kéluhanay étewe mumah dob kélawane brab gédoté roy lowohe. Endob i de étew mumah bé Rémogor i Tuluse, batí i Rémogor i Tuluse dob de fédéw ro. ⁷ Mélaw kago mégaif bé kékéréh guwe, ‘Fatut go mumah féruman.’ ⁸ Non ségiléw so bé réfuruhe. I réfuruhe mangéy dob kétaya nuwe ayo no. Gélingoo mo éndob énda gétiga moy hon i tidéwo nuwe de taloo no hon i ayo nuwe de. Loo so bé nan, énda gésobuto kom i kéumahe dob Rémogor i Tuluse.”

⁹ I Nikodemowe ménénginsa mano, “Ati kérigowe bé ni?”

¹⁰ Séménumbul i Jesuse mano, “I beeme ménbantug go témořo dob Israel, éndob énda gésobuto moy ni? ¹¹ Béréhé ku beem i toowe, béréhé key i gétiga keye, brab ureté key i énggito geye, éndob énda i munur de begom. ¹² Amuk énda munur go Begén bé ureté kuwe ni beem fantag bé de éntingayén dob duniyae ni, toow na fo énda munur go ké ureté kuy fantage bé de éntingayén dob lawayo. ¹³ Atin énda i ségétew énggéangéy dob lawayo, saliyu bé Begéne, sani Nga i Kéilawane méntidéw diyo.”

¹⁴ Bé gétahe de, amun diyo i de Judio dob gonone énda i étew de batí, kénéke i de ulé bero. Mélaw réménigoy Moisese kéninontow maak falas ulé brab féndiyoén dob kayéwe brab ténunggulén inok i kéluhanay de témenéngténg de, énda méléhu ro. Ségiléw so bé niy Nga i Kéilawane fatut tunggulén dob kayéwe, ¹⁵ inok i kéluhanay munure dob Beene énda méléhu ro, yamula gédoté roy umule magufusa. ¹⁶ I Tuluse toow fo mégédaw bé kéluhanay de étew dob duniyae, mélaw nirayén i buntunge Ngaén inok i kéluhanay munure dob Beene, énda méléhu ro, yamula gédoté roy umule magufusa. ¹⁷ Non békén sénugu i Tulusey Nga ne dob duniyae ni inok kukumé noy kéilawane. Yamula inok fukasé noy kéilawane dob de sala ro.

¹⁸ I munure dob Jesuse énda mékukumén. Endob i éndae munur dob Beene mékukum non énda munurén bé buntunge Nga i Tuluse. ¹⁹ Been i funay Tuluse kémukum: I Soloe, sani Kristowe, ménangéy dob duniyae, éndob i de étew méuyot ro bé délémore, brab mika ro bé Soloe non bé de tete rigoné ro. ²⁰ I kéluhanay rémigowe tete mika ro bé Soloe brab énda

fégédét ro de non mágilak ro ké giton i de tete rigoné ro dob gégékayae.
21 Endob i de métintu do étew fégédét ro dob Soloe inok giton rénigo roy kétayay Tuluse.

I kéuret Juan Bautistawe

22 Tidéw béno, i Jesuse brab de kuyugén ménangéy ro dob ingéde Judea brab ménbati ro diyo bé ménfiroye gétérésangan, brab ménautis ro diyo. **23** Atin i Juane ménautis so, éndob dob ingéde Enon, gédét dob ingéde Salim non médooy wayége diyo. Atin i de étew ménangéy dob beene inok bautiso no bero. **24** I ni ménrigo bé énda séna ménbilanggu i Juane de.

25 Bé béno, wén i ségétéwe Judio méniséédél bé de dumo kuyug Juan fantag bé kélémiyowe dob adafay Tuluse. **26** Mélaw i de kuyug Juan, ménangéy ro dob Juane, brab ménbéréh ro maro, “Maistéro, énggétédémo moy dumo muwo ménta dob sébangay wayége Jordan, sani étewe nureté? Mautis béni atin kéluhanay étewe mangéy dob Beene.”

27 Endob séménumbul i Juane mano, “I étewe gédoté no saén i iray i Tuluse dob beene. **28** Enggélingoo kom i bénréh guwe bé békén begén i Kristowe, éndob énggétahu sénugu bé Beene. **29** I Kristowe ségiléw bé témérimalwe lagéy brab begéney maake sémégunung bé témérimalwe lagéy. Atin i de kuyugén ségiléw ro bé térimawé libun. I témérimalwe libun kay témérimalwe lagéy, békén kay sémégununge. Mélaw i sémégununge ongot-ongot brab fégélingoé no atin méoror de ké gélingoo noy béréh i témérimalwe lagéy. Loo bé nan i kagéne kéoror énggumah béeleewe, non médooy de étew furay bé Jesuse. **30** Beeney fatute waléy gérotor, atin i begéne fatut waléy gérifantad.”

31 Non i Jesuse tidéw dob lawayo, mélaw gérotor na bé kéluhanane. Endob i de kéilawan, tidéw ro dob fantade ni saén. Mélaw gébéréh ro saén fantag bé duniyae. Endob i tidéwe dob lawayo, toow na fo gérotor bé kéluhanane. **32** Ureté noy énggito nuwe brab énggélingoo nuwe dob lawayo. Endob kloh saén i munure de. **33** Endob i étewe munur bé uret ne, émfayag bé toow i Tuluse. **34** Non i sénugu i Tuluse, ureté noy kékéréh i Tuluse, non iray i Tulusey Rémogor ne énda i tamana no. **35** Atin i Abaye Tulus mágédaw bé Nga ne brab i kéluhanay ature sénarigén dob Beene. **36** I munure dob Nga i Tuluse, gédoté noy umule magufusa. Endob i éndae munur dob Beene, énda gédoté noy umule magufusa, non énda mágédan i kérít i Tuluse dob beene.

I libune dob Samaria

4 **1** Enggélingooy de Fariseoy urete bé labi na médooy gédoté Jesuse kuyugén brab toow na médooy bautisé Jesuse étew bé Juane de.
2 Endob i toowe, do kuyug Jesus i mautise, békén Jesus. **3** Amun énggélingoo

Jesusey ni uret, méntékédan dob Judea, atin ménséfule mangéy Galilea.
⁴Mélaw dob kéagéw ro Jesuse, kailanga roy témarae dob sakuf i ingéde fénadowét Samaria.

⁵Atin, énggégumah ro dob sébaane ingéd dob Samaria fénadowét Sikar, gédét dob fantade niray Jakobé bé nga ne Jose bé gétaho. ⁶Diyo, wén i kalute wén i wayég de, rénigo Jakobe. Atin i Jesuse ménsar diyo dob sékuloy kalute. Non ménlugotén bé kéagéw ne brab géutuh térsang i kégumah ne diyo.

⁷⁻⁸Bé bénou, énda diyo i de kuyug Jesus non ménangéy ro dob fadiyane méléy amaén. Atin i ségétewé libun tidéw Samaria énggégumah mangéy wayég. Atin ménbérélh i Jesuse dob libune ni mano, “Aw fakay géiraya mo Begén wayég inémén?”

⁹I libune ni sémenumbul mano, “I Beeme ségétew go Judio atin i begéne tidéwu Samaria. Sedek mongot go miném dob begéne?” (Bénréhén i ni non i de Judio karangé ro mékérésik i de étew tidéw Samaria, atin mélaw énda sélawék ro bero.)

¹⁰Sénumbulo Jesuse mano, “Amuk gétila mo damén ké ati iray i Tuluse brab gélolo mo Begén sani mongote wayég, i beeme mongot so dob Begéne brab iraya ku beem bé wayége miray umul.”

¹¹“Maistéro,” bang i libune ni, “énda i fégésakugém brab i kalute ni ménalém. Hon i gédo muwe de bé wayége miray umul? ¹²I katufua tome Jakob i kéménalute bé ni kalut. I beene brab de ngaén dob ni so méniném loo soy de ayamén. Aw toow na gérotor go bé beene?”

¹³Séménumbul i Jesuse mano, “I minéme bé wayége dob ni kalut waléy so man térumén. ¹⁴Endob i minéme bé wayége iray gu, éndaén térumé no. Non i wayége iray gu dob beene waléy séfut wayég dob fédew ne miray umul magufusa.”

¹⁵Atin ménbérélh man i libune ni dob Jesuse mano, “Maistéro, irayanu bé nan wayég, inok éndaén téruménu, brab éndaén kailanga kuy mangéye dini médot wayég.”

¹⁶Tidéw bénou, bénréh Jesuse man dob ni libun mano, “Angéyém i bawag me brab séfule go mangéy dini.”

¹⁷I ni libun sémenumbul mano, “Enda i bawag gu.”

Atin ménbérélh i Jesuse man mano, “Toow i kékérélh me, énda i bawagém. ¹⁸Non wénén i limo gétew ménawag beem brab i ségétewé dumo mo sétifon bénou békén tintu bawagém. Bénréhém Begén i toowe.”

¹⁹“Maistéro,” bang i ni libun, “Enggélolo gu bénou bé Beemey sarigone muret bé kékérélh i Tuluse.” ²⁰Mélaw ménenginsa dob Jesuse mano, “I de katufua key do tidéw Samaria ménengadaf ro dob ni tuduk, éndob i begome do Judio, bérélhé kom, Jerusalem i fatute ayoy de étew ménengadaf bé Tuluse. Mélaw ati isuwe toow fatut rigonéy de étew?”

²¹Séménumbul i Jesuse mano, “Di, féngintoowonu. Gégumah mosoy gaiwe, i kéfengadafe bé Abaye Tulus, békén saén dob ni tuduk taloo no

dob Jerusalem saén. ²²I begome tidéw Samaria, fénjadafé kom i éndae gétiga kom, éndob i begeye do Judio fénjadafé key i gétiga keye, sani Tuluse. Non usuréy Tulusey de Judio mémukas bé de kéilawan. ²³Atin gégumah i nan gai brab énggumahén béléewe, i de tintu méngadaf, fénjadafé roy Abaye bé de rémogor ro brab fatut munur ro bé toowe fantag bé Tuluse. Non i Abaye, been i niy kétaya nuwe kéfénjadaf de. ²⁴I Tuluse, Rémogor, békén lowoh. Komon i méngadafe de, fatut fénjadafé no dob rémogore brab dob toowe.”

²⁵Bang i libune ni, “Gétiga ku gégumah i fénemili i Tuluse méguléw féndawét Kristo. Buluk gégumah, feféguwa no betom i kéluhanay étingayéne.”

²⁶Atin ménbéréh i Jesuse mano, “Begéney Kristowe, sani émbéréhe dob beeme.”

²⁷Bé beno so, énggumah i de kuyug Jesus, brab ménggaif ro bé kégito ruwe de séuret-uret roy libune ni. Endob énda i ségétew bero ménenginsa bé ati kétaya nuwe taloo no sedek séuret-uret bé libune ni.

²⁸Tidéw beno, i libune ni fénledén i binangga ne, brab ménséfule mangéy dob ingéde. Atin diyo bénréhén dob de étew mano,

²⁹“Enggomén, angéy gom téngténg i étewé bénréhén begén i kéluhanay rénigo guwe. Békén ba keeyén Been i Kristowe?” ³⁰Mélaw i de étew ménsut ro dob no ingéd ménangéy dob Jesuse.

³¹Amun énda séna gumah ro, ménongot i de kuyugén mano, “Maistéro, ama go na.”

³²Endob sénumbulo no bero mano, “Wén i amaé ku énda gétiga kom de.”

³³Tidéw beno ménésbéréh-béréh i de kuyugén maro, “Wén bay ménuwiton de amaén?”

³⁴Tidéw beno, bénréh Jesuse dob berowe mano, “I kérigo guwe bé kétayay Tuluse ménféuwit Begén, brab bé kégéfilide bé galbéke férigo no Begén, been i maake amaé ku. ³⁵Wén i bénréh gom, ‘Fot na gétérésang kélungonon, atin kémétewén.’ Endob bérhéku begom, téngténg gom i de ni étew mangéy dini, non maak do nohok togohén, fakayén kétewén béléewe. Non ay ninén i gaiwe munur ro Begén. ³⁶I de étew kémétew sémahud brab timué roy de kíntew ro. Ségiléw ro bé de émféunur bé de dumo étew inok gédoté roy umule magufusa. Atin i de étew muret fantag bé Tuluse, maak beroy de mohok. Mélaw i de mohok brab de kémétew séoror ro. ³⁷Toow i kóbéréhe mano, ‘Ségétew i mohoke, ségiyoy kémétewé de.’ ³⁸Fénuwit gu begom mangéy kémétew bé békéne génalbéko kom, ségiyoy géménalbéke de atin ménangéy gom saén kémétew bé génalbéko ruwe.”

³⁹Médooy de étew tidéw Samaria dob no ingéd ménunur bé Jesuse non bé kóbéréh i libune mano, “Bénréhén begén i kéluhanay rénigo

guwe.” ⁴⁰Mélaw amun ménangéy i de étew tidéw Samaria dob Jesuse, nongot ro fébatié roy Jesuse dob berowe. Atin ménbati i Jesuse diyo ruwo gétérésangan.

⁴¹Atin sabaf bé kéureto nuwe bero, ménuman i kédooy ménunure dob Beene. ⁴²Atin bénréh ro dob libune ni maro, “Munur geyén békén sabaf saén bé bénréh me begey. Béleewe énggelingoo key i kóbérén ne, mélaw gétiga key tintu Beeney mémukase bé kéilawane dob de sala ro.”

Nuwa Jesusey nga i ségétéwe odoron

⁴³Amun énggilid i ruwowe gétérésangan, i Jesuse ménule ménangéy Galilea. ⁴⁴Wén soy kóbérén Jesuse mano, “I sarigoy Tuluse muret bé kóbérén ne, énda fégadata no dob kaane ingéd.” ⁴⁵Endob amun énggumah dob Galilea, tényakuf i de étew diyo, non énggito roy kéluhanay rénigo nuwe mékégaif dob kékandulie féndawét “Témara” dob Jerusalem, non diyo ro so.

⁴⁶Tidéw bénó, ménséfule i Jesuse mangéy Kana, sébaan ingéd dob Galilea, sani ingéde fénwaléyén arak i wayége. Atin wén i ségétéwe gémamak kukuman wén i ngaén lagéy démérueun dob ingéde Kafernaum. ⁴⁷Amun énggelingoo noy Jesuse énggumah dob Galilea tidéw Judea, ménangéy dob Jesuse brab nongotén dob Jesuse angéyé no uwaén i nga ne gédétén méléhu. ⁴⁸Atin bénréh Jesuse dob beene mano, “I begome, taman énda gérito gom do mékégaif, énda fo munur gom Begén.”

⁴⁹Bang i ni odoron, “Maistéro, énggonén, lokut énda séna méléhuén.”

⁵⁰Atin bénréh Jesuse dob ni odoron mano, “Ule gon, adi-adinén i nga me.” I ni étew ménunur bé kóbérén Jesuse brab ménule.

⁵¹Amun diyo séna lowoh agéwon, bénalak i de sugu-sugué no brab bénréh ro maro, “Ménadi-adinén i nga me.”

⁵²Atin fénenginsaa no bero mano, “Ati urase bé kéadi-adi nuwe?”

Atin séménumbul ro maro, “Ménkédan i kééduf ne fuli natémégéno.”

⁵³Brab énggétédémoy boh ne been i noy urase bé kóbérén Jesuse dob beene mano, “I nga me adi-adinén.” Mélaw tidéw bénó, kéluhana ro ségékuréng ménunur.

⁵⁴Been i niy géruiwowe mékégaif rénigo Jesuse dob Galilea bé kétidéw ne Judea.

I kieuwa Jesuse dob Betesda

5 ¹Wén i no sébaan fuweh, ménangéy i Jesuse dob Jerusalem non wén i kanduli diyo kay de Judio. ²Atin diyo dob Jerusalem gédét dob bengawane kay de bili-bili, wén i kérigéwe de féndawét Betesda dob Hebreowe, sani késébérén i de Judio. Wén i limo timan fésayawa no wén i do atéfén. ³Diyo méniro i médoowe do étew démérueun, do langafén, do fikat, brab do kimoyén. Atin ongot-ongoté roy késékuyo i wayége ni.

⁴Non wén i gai gégumah i télakiy Kadnane, angéyé no sékuyoén i wayége ni. Atin i géétahe mangéy tééléd dob ni wayég ké mésékuyo, waléy adi-adi fiyon fo ké atiy déruu nuwe. ⁵Wén i ségétéwe lagéy diyo, méntéléwén folo bra waléw gébélintuwa i kédéruu nuwe. ⁶Amun énggitó Jesusey ni lagéy méniro diyo brab énggétiga noy kérugay i kédéruu nuwe, fénénginsaa no mano, “Aw méuyot go adi-adi?”

⁷Séménumbul i ni lagéy démériuun mano, “Maistéro, énda i témabangan begén mangéy tééléd dob wayége ké mésékuyo. Buluk féganayu séna fégédét, wénén i gégumah gétah begén.”

⁸Tidéw béno, ménbéréh i Jesuse dob beene mano, “Tindég go, furutém i ikam muwa nan, brab agéw go.” ⁹Sonom béno, ménadi-adiy ni lagéy. Atin fénurutén i ikam ne brab ménagéw.

I no gai kéféadi-adi Jesuse bé ni lagéy Sabado, gai kétérén kay de Judio. ¹⁰Mélaw i de odoroy de Judio ménbéréh ro dob ni lagéy ménadi-adi maro, “Béleewe Sabado, gai kétérén. Enda fakayén dob kitab tome ké uwité moy ikam muwa nan.”

¹¹Endob séménumbul i lagéyé ni ménadi-adi mano, “Endob bénréh i lagéye ni ménféadi-adi begén, furuté kuy ikam guwe brab magéwu.”

¹²Atin ménénginsa i de odoron maro, “Ati no lagéy ménbéréh de dob beeme, ké furuté moy ikam muwe brab magéw go?”

¹³Endob énda énggétigay ni lagéy ké ati no étew ménféadi-adi de, non ménangéy i Jesuse dob de ménribuk do étew.

¹⁴Enda ménrugayén tidéw béno, énggitó Jesusey ni lagéy dob lawi i Tuluse. Atin ménbéréh i Jesuse dob beene mano, “Téngtengém, ménadi-adi gon. Kagon rémigo sala inok énda toow gétimal i kékéfasanga muwe.”

¹⁵Tidéw béno, ménagéw i ni lagéy brab bénréhén dob de odoroy de Judio bé Jesus i ménféadi-adiwe de. ¹⁶Mélaw i de odoroy de Judio, féngganay roy kéférasay ruwe bé Jesuse, non ménua bé gai kétéréne.

¹⁷Endob bénréh Jesuse dob berowe mano, “I Abay guwe Tulus énda témérénó gémalbék fiyon fo ké gai kétérén, atin i Begéne fatut gémalbék so sénga tékélid.”

¹⁸Been i niy funay de odoroy de Judio ménuman i kékérit ruwe bé Jesuse, atin toow na fo sarintaé ro féléhuén. Békén saén sabaf bé kégalbék ne ké gai kétérén, éndob sabaf so bé fédawété noy Tuluse Abayén, ula-ula réfengé noy Tuluse béno.

¹⁹Atin sénumbulo Jesuse bero mano, “Béréhé ku begom i toowe, i Begéne Ngaén, brab énda i gérígono ku ké tidéw dob Begéne saén. Rigoné kuy gito guwe rigonéy Abay guwe Tulus. Udenén rigonéy Abay guwe, rigoné ku so. ²⁰Non i Abay guwe méimu Begén brab fégétiga no Begén i kéluhanay galbék ne. Atin ménuman i férigo nuwe Begén toow na fo mélkégaif galbék funa kom mélgaif. ²¹Non loo bé Abay guwe tébuleé noy de ménléhu brab iraya no bero umul, Begéne ni so, iraya ku umul i de

étew kétaya ku iraya ku de. ²² Atin békén i Abay guwey kémukume bé de étew. Yamula niraya no Begén kuwagib kémukum bé kéluhanay étewe, ²³ inok basanay kéluhanay étewe Begén loo so bé kébasana ruwe bé Abay guwe. I éndae masanan Begén, énda so basana noy Abay guwe séménugu Begén.

²⁴ “Béréhé ku begom i toowe, i mégélingoe bé kékéréd guwe brab munur bé Tuluse séménugu Begén, wén i umulén magufusa. Atin énda mékukumén moso bé de salaén. Non éndaén méléhuén non fiyon fo ké méléhu i lowoh ne, gédoté noy umule magufusa. ²⁵ Béréhé ku begom i toowe, gégumah i gaiwe brab ménggumahén béleewe ni, bé gélingooy de ménléhu i béréhé guwe, atin i de mégélingo de, gédoté roy umule. ²⁶ Non i umule tidéw dob Abaye, brab loo bé ni niraya no Begén, sani Nga ne, barakat inok wén i umul tidéw dob Begéne. ²⁷ Atin i Abay guwe Tulus, niraya no so Begén kuwagib kémukum bé de kéilawan kagulan Begén i Nga i Kéilawane. ²⁸ Kagom mégaif bé de ni, non gégumah i gaiwe i kéluhanay de étew ménléhu dob de lébéng ro, gélingoo roy béréhé guwe. ²⁹ Atin mésut ro tidéw dob de lébéng ro, atin i de réménigo fiyo métébule inok gédoté roy umule magufusa. Endob i de réménigo tete métébule inok mékukum ro.

³⁰ “I Begéne, énda i kagén gérigonon saliyu bé Abay guwe saén. Kémukumu loo bé kékémandu i Tuluse de Begén. Mélaw i kékukum guwe métintu non békén kagén kétayan éndob kétayay Abay guwe séménugu Begén.

³¹ “Amuk ureté ku saén i fantage bé lowoh guwe, énda i géunur de. ³² Endob wén i ségiyowe muret fantag bé Begéne brab gétiga kuy uret ne fantag bé Begéne toow fo toow. ³³ Séménugu gom mangéy dob Juane Mautis atin nureté i toowe fantag bé Begéne. ³⁴ Endob énda kailanga kuy kékuret i kéilawane fantag bé Begéne, éndob énggélabito ku émfégétédém begom i uret Juane fantag bé Begéne, inok munur gom Begén funa kom méfukas dob de sala gom. ³⁵ I Juane maak solo, mérino brab réméndaw kagulan ténoréo begom, brab ménoror gom témayakuf bé kétoro ne begom éndob singkow saén. ³⁶ Endob wén i labi na fo fiyo funa kom munur Begén bé de nuret Juan. Fégitung gom i galbéké rigoné ku, non been i galbéké niray i Abay guwe Begén. Mélaw i de galbék gu, been i émfégétigane bé sénugu i Abaye Tulus Begén. ³⁷ Atin i Abaye séménugu Begén, fégétiga no soy fantage bé Begéne. Enda énggélingo kom i béréhé ne taloo no énggito gom i falas ne. ³⁸ Atin énda fénbati gom dob de fédew gom i kékéréd ne. Gétiga kuy ni non énda munur gom Begén, sani sénugu i Abaye Tulus. ³⁹ Tantu gom féganad i Ménsumate Kébéréd i Tuluse, non gékaranga kom dob de ni gédoté kom i umule magufusa. Endob been i niy de ménsumat uret fantag bé Begéne. ⁴⁰ Mélaw amuk munur gom dob Begéne, gédoté kom i umule magufusa, éndob mika gom munur Begén.

41 “Enda sélédé kuy kédayéw i kéilawane. 42 Endob gétiga kuy de fédew gom, énda méimu gom bé Tuluse. 43 Sénugu i Tuluse Begén, atin Begén i sarigo nuwe. Gido loo énda ténayakuf gom Begén. Endob buluk wén i ségétew gégumah énda sénugu i Tuluse de, tayakufé kom. 44 Enda munur gom non sélédé kom i kédayéw i de dumo gom étew éndob énda sélédé kom i kédayéwe tidew dob sébaane tintu Tulus. 45 Endob kagom fégitungén de ké Begén i témbœe begom dob Abay guwe Tulus. Békén Begén. Sénarigo kom i kitabé niray Moisese, éndob been i témbœe begom. 46 Endob amuk tintu gom munur bé kétoro Moisese, munur gom so Begén, non sénulatén i fantage bé Begéne. 47 Endob amun énda munur gom bé sénulat Moisese, énda so géunur gom dob Begéne.”

Fénwaléy Jesuse médooy klohe amaén

6 ¹Tidew béo, ménifar i Jesuse dob dogote féndawét Galilea taloo no Tiberias. ²Atin toow fo médooy de étew ménfuray de non énggitoy de mékégaif galbék rénigo no bé kêuwa ne bé de démérueun. ³Atin ménénagé i Jesuse beroy de kuyugén mangéy dob burure atin diyo ro ménasar. ⁴Bé béo gai, éndaén mérugay i kékanduli i de Judio féndawét ro “Témara”. ⁵Amun iling-iling i Jesuse, énggitoy noy médoowe étew démangkub mangéy dob Beene. Mélaw ménénginsa dob Filipihe mano, “Ayo tome de méléy amaén féama bé de étew ni?” ⁶(I funa Jesuse ménénginsa, téngkadé no saén i Filipihe. Endob gétiga Jesuse nén i rigoné nuwe.)

⁷Atin séménumbul i Filipihe mano, “Fiyon fo ké wén i labi séngibu filak tom, kulang na fégébéléy amaéy médoowe ni étew, fiyon fo ké sékéloh-kélohen dob séngae ségétew.”

⁸Endob ménbéréh i ségiyowe kuyugén féndawét Andres (sani dumo Simon Pedrowe sétiman idéng) mano, ⁹“Wén i ségétew kénogo lagéy dob ni, wén i nuwitén limo timan mélému fan brab ruwo timan sédo. Endob toow fo kulang i ni féama bé médoowe ni étew.”

¹⁰Tidew béo, ménbéréh i Jesuse dob de kuyugén mano, “Féésar gom i de étew.” Mélaw ménasar i de étew diyo dob bukae gonon wén i do kéroon de. Wén i limo ngibu do lagéy saliyu na bé de libun brab do nga. ¹¹Atin éndot Jesusey fane brab ménfésalamat dob Tuluse. Tidew béo, sénaarén dob de médoow étew ménasar diyo. Loo so bé niy rénigo Jesuse bé de sédo de. Atin téménantu ro mama taman kétaya ro. ¹²Amun énggéama ro nén taman ménbésor ro kéluhanan, ménbéréh i Jesuse dob de kuyugén mano, “Timu gom i kéluhanay de sama amaén inok énda mésinggulaén.” ¹³Mélaw ténimu roy de sama amaén. Atin ménféno i foloe bra ruwo timan dakél biton bé de sama i de limo timan fan.

¹⁴Amun énggitoy de étew i ni mékégaif galbék rénigo Jesuse, ménbéréh ro maro, “Tintu Been i niy toowe sarigoy Tuluse muret bé

kébéréh ne, sani suguéy Tuluse dob duniiae ni.” ¹⁵Atin gétiga Jesusey fégésé ro féwaléyé ro datu ro, mélaw téngakén bero man brab ménangéy félébu dob de burur.

Ménagéw i Jesuse dob rotor i wayége

¹⁶Amun témégénén, ménangéy i de kuyugén dob dogote. ¹⁷Atin ménda ro awang mifar bé dogote mangéy Kafernaum, non kélungononén, atin énda séna énggumah i Jesuse dob berowe. ¹⁸Bé béno uras, émbagér i réfuruhe brab dakél i bagéle dob dogote. ¹⁹Amun ménggékura ro néma gékilomitro tidéw dob dénsaane, énggito roy Jesuse magéw dob rotor i dogote mangéy dob berowe. Mélaw toow ro fo ménggilak. ²⁰Endob ménbéréh i Jesuse mano, “Begén, kagom mégilak!” ²¹Atin ménoror ro brab féneda ro dob awange, brab sonom béno énggégumah ro dob dénsaane ayo ro.

²²Amun géfuwénén, i de étew ménbati séna dob difar i dogote, énggétiga ro sébaan saén i awange diyo béno kélungonon. Atin énggétiga ro énda ménodor i Jesuse bé de kuyugén méda dob awange mifar dob dogote. Brab gétiga ro énda i ségiyo awang diyo. ²³Tidéw béno, énggumah i de awang tidéw dob ingéde Tiberias, déménunggu gédét dob gonoy de étew ménama fan amun énggilid fénsalamatay Kadnane Jesus. ²⁴Atin amun gétuway de étew énda diyo i Jesuse loo soy de kuyugén, ménba ro bé de awang mangéy Kafernaum inok sélédé roy Jesuse.

²⁵Atin amun énggito roy Jesuse dob difar i dogote, fénénginsaa ro maro, “Maistéro, ménfiroyén i kégumah me dini?”

²⁶Sénumbulo Jesuse bero mano, “Béréhé ku begom i towe, békén i kégésobut gome bé de mékégaif galbék rénigo guy funa kome séméléd Begén, éndob non bé de fénama gu begom atin ménbésor gom. ²⁷Kagom séméléd bé amaéne kay de sur gom saén non waléy waréy i nan amaén. Endob séléd gom bé amaéne kay de fédéw gom funa kom méraru taman sa taman. I Nga i Kéilawane, sani Begéne, iray guy nan amaén non i Abaye Tulus fénggétiga no Been i séménugue Begén.”

²⁸Atin ménénginsa ro dob Jesuse maro, “Ati fiyowe rigoné key inok rigoné key i kétayay Tuluse?”

²⁹Séménumbul i Jesuse mano, “Ay niy kétayay Tuluse rigoné kom: Unur gom Begén non Begén i sénugu i Tuluse.”

³⁰Atin ménénginsa ro maro, “Ati mékégaife galbék féténgténgém begey inok munur gey dob Beeme? ³¹I de katufua key bé do gétah, ménama ro fan féndawét ‘mana’ dob gonone énda i nohok do témunoh diyo, loo bé Ménsulate Kébéréh i Tuluse mano, ‘Niraya no bero amaén tidéw dob lawayo inok géama ro.’”

³²Séménumbul i Jesuse mano, “Béréhé ku begom i towe, békén Moises i ménféamae bero fan tidéw dob lawayo, éndob i ménféama bero

been i Abay guwe Tulus. Atin i Abay guwe, irayén so begom i tintuwe amaén tidéw dob lawayo kay de fédew gom. ³³Non i amaéne iray i Tuluse, been i énggégumahe tidéw dob lawayo inok miray umul dob de kéilawan.”

³⁴Ménbérélh ro dob Jesuse maro, “Maistéro, irayan gey démoyun bé nan amaén.”

³⁵Séménumbul i Jesuse mano, “Begéney amaéne miray umul. I kéluhanay étewe mangéy dob Begéne éndaén mélayah ro, brab i kéluhanay munure Begén éndaén térumén ro. ³⁶Endob fiyon fo ké énggito gomén Begén, éndob énda séna munur gom Begén. Bénréh gun i nan dob begome bé gétaho. ³⁷Mangéy dob Begéney kéluhanay de étew niray i Abaye Begén. Brab énda dudulé kuy étewe mangéy dob Begéne. ³⁸Non ménlusu tidéw dob lawayo inok rigoné kuy kétayay Tuluse séménugu Begén, békén inok rigoné kuy kagéne kétayan. ³⁹Atin ay niy kétayay Tuluse: énda fédayaé ku métadin i de nirayén Begén étew, fiyon ségetéw. Yamula tébuleé ku bero kéluhanan dob tamfaday gaiwe. ⁴⁰Non been i niy kétayay Abay guwe: i kéluhanay gétigane Begén brab munure Begén, gédoté roy umule magufusa. Atin tébuleé ku bero dob tamfaday gaiwe.”

⁴¹Atin i de Judío amun énggélingo roy bénréh Jesuse, mundég-mundég ro non bénréhén bé Beeney amaéne tidéw dob lawayo. ⁴²Brab ménbérélh ro maro, “Ati Jesuse ni, aw békén ba Beeney nga Josehe saén? Sedek bénréhén ménlus kun tidéw dob lawayo, non gétiga tom i boh ne brab idéng ne?”

⁴³Endob bénréh Jesuse mano, “Kagom mundég-mundég. ⁴⁴Enda i ségetéw géangéy dob Begéne, saliyu ké féfégédétéy Abaye séménugu Begén. Atin dob tamfaday gaiwe, tébuleé kuy kéluhanay mangéye dob Begéne. ⁴⁵Sénulat i de sénarigoy Tuluse muret bé kékéréh ne maro, ‘I de kéilawan toroéy Tuluse moso.’ Mélaw i séngae mégélingo bé Abaye brab modor bé kétoro ne, mangéy dob Begéne. ⁴⁶Endob énda i ségetéw énggégito bé Abaye, saliyu bé Begéne non tidéwu dob Tuluse. Mélaw Begéne say énggégítowe bé Abaye Tulus. ⁴⁷Béréhé ku begom i toowe, i de méginugut dob Begéne méuyag ro taman sa taman. ⁴⁸Begéney maake amaén miray umul. ⁴⁹I de katufua kom amun diyo ro dob gonone énda i nohok do témunoh diyo, ménama ro amaén féndawét ‘mana’, gido ménléhu ro so. ⁵⁰Endob Begéney amaéne tidéw dob lawayo. Atin i kéluhanay géamae bé ni amaén, énda méléhu ro. ⁵¹Begéney amaéne miray umul ménlus tidéw dob lawayo. Atin amuk i ségetéwe géama de, méuyag taman sa taman. I amaéne iray gu funay de kéilawan méuyag, sani lowoh guwe.”

⁵²Atin amun énggélingooy de Judío ni bénréh Jesuse, ménséédél ro maro, “Ati kékifingé-fingé i kékiray i ni étew bé lowoh ne inok amaé tom?”

⁵³ Mélaw ménbéréh i Jesuse mano, “Béréhé ku begom i toowe, amuk énda amaé kom i lowoh i Nga i Kéilawane sani lowoh guwe, brab énda inémé kom i dara guwe, énda gédoté kom i umule magufusa. ⁵⁴ Endob i de mama bé lowoh guwe brab miném bé dara guwe, wén i umul ro magufusa, atin tébuleé ku bero dob tamfaday de gai. ⁵⁵ Non i lowoh guwe been i nan i tintuwe amaén, atin i dara guwe been i nan i tintuwe inémén. ⁵⁶ I kéluhanay mamae bé lowoh guwe brab minéme bé dara guwe diyou bati dob berowe atin dini ro bati dob Begéne. ⁵⁷ Méuyag i Abaye séménugu Begén, atin i Begéne méuyagu sabaf bé Beene. Mélaw i kéluhanay mamae Begén méuyag so sabaf bé Begéne. ⁵⁸ Begéney amaéne tidéw dob lawayo. I de katufua kom ménama ro amaén féndawét ‘mana’, gido ménléhu ro so. Endob i de mama bé ni amaén sani lowoh guwe méuyag ro taman sa taman.”

⁵⁹ Bénréh Jesusey ni bé kétoro ne dob lawie féngadafay de Judio dob ingéde Kafernaum. ⁶⁰ Amun énggélingooy de kuyugén i ni kétoro, ménbéréh i de kédoono ro maro, “Toow fo ménalém i ni kétoro, ati mélaw i géfégélingoe de?”

⁶¹ Endob énggétiga Jesuse dob fédéw ney funay de kuyugén mundég-mundég. Mélaw bénréhén bero mano, “Aw toow fo mika gom bé bénréh guwe? ⁶² Ati béréhé kome ké gito gom Begén, sani Nga i Kéilawane, démiyat mule dob gonone tidéwo ku? ⁶³ I miraye bé umule been i Rémogor i Tuluse. Endob i kéilawane, énda i barakatén miray umul. I nuret guwe begom tidéw dob Rémogor i Tuluse brab miray bé umule magufusa. ⁶⁴ Endob gétiga kuy wén i de dumo begom énda munur ro Begén.” (Bénréh Jesusey nan non gétiga non i de énda de munur tidéw féganay brab i étewe émfékéfo de.) ⁶⁵ Atin sénumfata noy kébéréh ne mano, “Been i nan i funa kuwe ménbéréh bé énda i géangéy dob Begéne saliyu ké fefégédétey Abaye.”

⁶⁶ Tidéw béno, médoó bé de kuyugén i témenagake de brab éndaén ménodor ro de. ⁶⁷ Mélaw fénénginsaa Jesusey de folo bra ruwo gétew kuyugén mano, “Aw méuyot gom so témagak Begén?”

⁶⁸ Séménumbul i Simon Pedrowe mano, “Kadnan ati nay odoro keye? I de kaam saén kébéréh i géiraye bé umule magufusa. ⁶⁹ Munur gey brab gétiga key Beemey Mékétéfuwe Etéw tidéw dob Tuluse.”

⁷⁰ Atin ménbéréh i Jesuse mano, “Aw békén ba begom i foloe bra ruwo gétew fénémili gu? Endob saitan i ségetéwe begom!” ⁷¹ I téndéu i de kébéréh Jesus, been i Judase nga Simon Iskariot. Been i émfékéfoe de fiyon fo ké been i ségetéwe bé de folo bra ruwo gétew kuyugén.

7 ¹ Tidéw béno, i Jesuse diyo ménsgud-sugud dob Galilea. Ménika mangéy sugud-sugud dob Judea non méuyot i de odoroy de Judio de méméléhu. ² Bé béno, gédetén i kékanduli i de Judio féndawét ro “Dung-dung.” ³ Mélaw ménbéréh i de tuwaréy Jesus do lagéy dob Beene maro,

“Ay go Judea inok gitoy de kuyugém i de mékégaif galbékém. ⁴ Amuk i étewe méuyot mébangtug, énda bunéyé noy de rigoné no. Amuk gérigono moy de mékégaif, rigoné mo dob adafay médoowe étew.” ⁵ (Loo bé niy kékéréh i de tuwaréyén non fiyon foy berowe énda séna munur ro dob Beene.)

⁶ Séménumbul i Jesuse mano, “Enda séna gumah i fatute gai rigoné kuy galbék guwe. Endob i begome fakay rigoné kom i kagome galbék bé de udenén gai. ⁷ I de tete étew énda mérarék ro begom, éndob mérarék ro Begén non dowoyé kuy kéluhanay tetee rigoné ro. ⁸ Ay gom dob kandulie, éndob i Begéne énda séna mangéyu diyo non békén sénay niy gaiwe fatut mangéyu diyo.” ⁹ Amun énggiliid bénréhén i ni, ménbati saén dob Galilea.

¹⁰ Endob amun ménagéwén i de tuwaréyén mangéy dob kandulie dob Jerusalem, ménfuray soy Jesuse, éndob énda i énggétigan de non ménagéw nékémén saén. ¹¹ Sélédéy de odoroy de Judioy Jesuse dob kandulie atin fénénginsa ro maro, “Hon i gono Jesuse de?”

¹² Atin médooy de étew ménlimud diyo séméguraw séuret-ureté roy fantage bé Jesuse. Embéréh i de dumo de maro, “Fiyo étew i Jesuse.” Endob bang i de dumo de, “Enda fiyo étew i Jesuse, fégakara noy de étew.” ¹³ Endob énda i ségétew ménfóbénsag muret fantag bé Jesuse non mégilak ro bé de odoroy de Judio.

¹⁴ Amun gékrara ron bé kékanduli ruwe, ménangéy i Jesuse dob lawi i Tuluse brab téménoro. ¹⁵ Ménggaif foy de odoroy de Judio brab ménbéréh ro maro, “Sedek toow fo mon gétigan i ni étew, énda taén ménrugay i késékuwelah ne?”

¹⁶ Séménumbul i Jesuse mano, “I kagéne kétoro békén tidew dob Begéne saén, éndob tidew dob Tuluse séménugu Begén. ¹⁷ I de étew méuyot ro rémigo bé kétayay Tuluse, gétiga ro ké i kagéne kétoro tidew dob Tuluse taloo no tidew saén dob Begéne. ¹⁸ I étewe muret saén bé kaane kétoro, méuyot saén mélantug. Endob i étewe méuyot rémigo bé funay séménugue de émbantug, been i nan i métintuwe étew brab énda témugién. ¹⁹ Békén ba niray Moisesey kitabe? Endob énda i ségétew begom modor de, non amuk odoro kom, énda damén télamané kom félahuén Begén.”

²⁰ Séménumbul i de étew maro, “Sénaitanan go! Ati étewe méuyot méméléhu Beem?”

²¹ Ménbéréh man i Jesuse mano, “Amun rénigo guy sébaane saén mékégaif galbék, ménkéségiyonan gom de non gai kétérén béno. ²² Endob wén i sébaane kitab fantag bé kétulie niray Moisese bé gétaho. (Endob i toowe, tidew i ni kitab dob de katufua tom.) No mélawén fiyon fo ké gai kétérén, tulié kom soy de nga gom. ²³ Amuk tulié kom i ségétewe nga lagéy fiyon fo ké gai kétérén inok odoro kom i kitabé tidew dob Moisese, sedek mékérit gom Begén sabaf bé kétéadi-adi guwe bé ségétewe étew ké

gai kétérén? ²⁴Kagom kukumén i de énggito gom saén. Yamula fégitung gom fiyo brab kukum gom métintu.”

²⁵Tidéw béno, i de dumo bé de étew tidéw Jerusalem ménbéréh ro maro, “Aw békén bay niy lagéye sélédéy de odoro tom inok féléhuén?

²⁶Téngténg gom, ay ni émbéréh dob adafa tome brab énda mon i gébérého ro sébanil de. I de odoro key, gélolo ron keey Beeney Kristowe sani ongot-ongoté tome. ²⁷Endob amuk gégumah kun i Kristowe, énda i gétigan de ké hon i tidéwo nuwe de. Endob gétiga tom i tidéwoy ni étew.”

²⁸Tidéw béno, amun diyo téménoro dob lawi i Tuluse ménfóbénsag i Jesuse émbéréh mano, “Aw tintu gélolo gom ba Begén brab gétiga kom i tidéwo kuwe? Enda ménangéyu dini ké dob kagéne saén aturan. I toowe Tulus i séménugue Begén, éndob énda gélolo gom de. ²⁹Endob gélolo guy Beene, non tidéwu dob Beene brab Beeney séménugue Begén.”

³⁰Tidéw béno, ténlama ro kénéfo i Jesuse éndob énda i ségétew énggékéfo de non énda séna énggumah i gaiwe fénemili Tuluse. ³¹Endob médooy de étew dob de ménlimud ménunur de, brab ménbéréh ro maro, “Beeney Kristowe, sani fénemili i Tuluse méguléw, non énda i ségétew gérigo bé de mékégaif galbék rénigo no ké békén i Kristowe.”

³²Enggélingooy de Fariseoy ni késébéréh-béréh i de étew séguraw fantag bé Jesuse. Mélaw i berowe brab de odoroy de fadi, séménugu ro do mantay bé lawi i Tuluse inok kémfo bé Jesuse. ³³Atin ménbéréh i Jesuse dob de étew mano, “Endaén mérugay i kébatí guwe dob begome non séfuleu mangéy dob Tuluse séménugu Begén. ³⁴Sélédé kom Begén éndob éndaén gito gom Begén, non énda géangéy gom dob batio kuwe.”

³⁵Ménsébéréh-béréh i de Judio maro, “Hon keey i ayo nuwe de, ké énda gito tom de? Aw mangéy keey dob mérayue ingéd i de Griego batioy de Judio so, atin toroé noy de Griego? ³⁶Ati keey i atag i bénréh ne mano, ‘Sélédé kom Begén, éndob énda gito gom Begén, brab énda géangéy gom dob batio kuwe?’ ”

³⁷Amun dob tamfaday gaiwe bé kékanduli ruwe sani toowe na fo balilaga gai, téménindég i Jesuse brab ménbéréh métanug mano, “Do étew térumén, ay gom dob Begéne, brab miném. ³⁸Non wén i Ménsulate Kébéréh i Tuluse mano, ‘I étewe munur dob Begéne, tidéw dob fédew ne rémégés i wayége miray bé umule magufusa.’ ” ³⁹I atag i bénréh Jesuse, ay ni: i Rémogor i Tuluse mangéy dob de munur bé Jesuse atin bati dob de fédew ro. Endob énda séna nirayén i Rémogor i Tuluse non énda séna ménléhu i Jesuse brab tébule atin mule mangéy dob lawayo.

⁴⁰Médooy de étew énggégélingo de, ménbéréh ro maro, “Tintu Beeney sarigoy Tuluse muret bé kékéréh ne, sani sarigone ongot-ongoté tom.”

⁴¹Bang i de dumo étew, “Beeney Kristowe ongot-ongoté tom.”

Endob séménumbul i de dumo de maro, “Ati kéfingé-fingé ne ké i Kristowe tidéw Galilea? ⁴²Non bang i Ménsulate Kébéréh i Tuluse, i

Kristowe séfu Dabid. Mélaw fatut i Kristowe mumah dob ingéde Betlehem non i Dabide bati dob Betlehem.”⁴³ Mélaw énda géséfagayun i de antaf fédew ro fantag bé Jesuse.⁴⁴ Atin ménuyot i de dumo de kémfo, éndob énda i ségétew réménigo de.

⁴⁵ Tidew béno, i de guwardiya ménséfule ro mangéy dob de odoroy de fadi brab do Fariseo. Atin fénénginsaa roy de guwardiya maro, “Sedek énda kénéfo gom i Jesuse inok géuwito kom mangéy dini?”

⁴⁶ Séménumbul ro maro, “Enda kénéfo gey de non ménggaif gey bé kétoro ne. Non ségiyo bé kéluhanay kétoroe énggéléingoo key.”

⁴⁷ Atin ménbéréh i de Fariseo maro, “Aw fiyon i begome, énggégékara no begom so? ⁴⁸ Enda sénay ségétew begey do odoro kom taloo no do Fariseo ménunur de. ⁴⁹ I de munur dob Beene, beroy de gérifantad étew saén, sani énda gétiga roy kitab tome. Mélaw kukuméy Tuluse bero.”

⁵⁰ Atin diyo soy Nikodemowe sani ségétewe so Fariseo. Been i ménangéye dob Jesuse bé gétahe de. Brab ménbéréh mano,⁵¹ “Enda fakay dob kitab tomey kémukume ké énda séna énggésusinon i rénigo nuwe, brab énggéléingoon i kékéréh ne.”

⁵² Séménumbul ro maro, “Aw tidew go so Galilea? Basa moy Ménsulate Kékéréh i Tuluse, inok gétiga mo énda i sarigoy Tuluse tidew Galilea.”

I libune ménalsala

8 ¹Tidew béno, i kéluhana ruwe ménule. Endob i Jesuse ménangéy dob tuduke féndawét Olibo. ²Dob gétunduge de fuweh, amun toow géfuwén, ménangéy man i Jesuse dob lawi i Tuluse. Amun ménangéy i kéluhanay de étew dob Beene, ménasar i Jesuse brab téneroén bero. ³Bé no gai, i de Fariseo brab do téromo kitab, nuwit roy libune énggétékanan ménbuwah. Atin féntindég ro dob adafa Jesuse brab de médoo ni étew. ⁴Atin bénréh ro dob Jesuse maro, “Maistéro, énggétékanan i ni libun ménbuwah. ⁵Dob kitab tome niray Moisese, fatut ibéron batéw taman méléhu i étewe ménalsala loo bé ni. Ati kékéréh me fantag bé ni?” ⁶Fénénginsa ro dob Jesusey ni inok tukawa ro saén i Beene inok amuk békén damén katabuwan i késumbul ne, wén i funa ro témo de.

Endob ménkudung-kudung i Jesuse brab séménulat dob fantade bé tuko ténero ne. ⁷Amun énda fo témerén ro ménginsa, téménindég i Jesuse brab bénréhén bero mano, “Ati éndae salaén begom, been i sunguwe de mibéron batéw.” ⁸Tidew béno, ménkudung-kudung man i Jesuse brab féntausén i késulat ne dob fantade. ⁹Tidew béno, amun énggéléingoo roy bénréh Jesuse, ménule ro séségétew-gétew, i sunguwe ménule do lukés. Atin énda i ségétew ménféled ké békén i Jesuse saén brab ni libun. ¹⁰Atin téménindég i Jesuse brab ménénginsa mano, “Di, nayo ruwe de? Aw énda i ségétew témo beem?”

¹¹Séménumbul i ni libun mano, “Enda, Maistéro.”

Atin bénréh Jesuse mano, “Enda so téboé ku beem. Ule go brab kagonén mésala féruman.”

¹² Atin téménoroén man i Jesuse dob de étew mano, “Begéney maake solo réméndaw dob kéilawane. I furaye Begén éndaén magéwén dob délémons, yamula magéw dob gégékayae brab gédoté noy umule magufusa.”

¹³ Ménbéréh i de Fariseo maro, “Beeme soy murete fantag bé lowoh me, mélaw énda i lantékén.”

¹⁴ Séménumbul i Jesuse mano, “Fiyon fo ké Begén i murete fantag bé Begéne, toow i bérhéhé kuwe non gétiga kuy tidéwo kuwe brab ayo kuwe. Endob i begome, énda gétiga kom i tidéwo kuwe taloo no ayo kuwe.

¹⁵ Kukumé kom i énggito gome saén non do kéilawan gom saén. Endob i Begéne, énda kémukumu. ¹⁶ Endob amuk kémukumu, métintuy kagéne kékukum non békén saén Begén i kémukume, éndob Begey i Abaye Tulus séménugu Begén. ¹⁷ Ménsumat dob kitab gome, amuk ségiléw i uret i ruwowe gétew, giton toow i urete. ¹⁸ Ruwo gey gétew muret fantag bé Begéne. Begén brab Abaye séménugu Begén.”

¹⁹ Tidéw bénó, fénénginsaa roy Jesuse maro, “Hon i gonoy Abay me de?”

Séménumbul i Jesuse mano, “Enda gétiga kom Begén taloo no Abay guwe. Amuk gétiga kom Begén, gétiga kom soy Abay guwe.” ²⁰ Bénréh Jesusey ni bé kétoro ne dob lawi i Tuluse gédét dob fégono ruwe limus. Endob énda i ségétew kéménéfo de non énda séna gumah i gaiwe fénémili i Tuluse.

²¹ Ménbéréh man i Jesuse dob berowe mano, “Tagaké kun begom, atin sélédé kom Begén. Endob méléhu gom énda émfésagad i de sala gom, brab énda géangéy gom dob ayo kuwe.”

²² Been i niy funay de odoroy de Judío ménsefenginsa maro, “Aw fétoyo moso? Aw been i nan i funa nuwe ménbéréh mano, ‘Enda géangéy gom dob ayo kuwe?’”

²³ Atin ménbéréh man i Jesuse mano, “I begome, tidéw gom fantad, éndob i Begéne tidéwu rotor. I begome, tidéw gom dob duniyae, éndob i Begéne tidéwu dob lawayo. ²⁴ Komon bénréh gu begom buluk méléhu gom moso, énda émfésagadan i de sala gom. Toow, amuk énda munur gom de ké Begéney Beene bénréh gu, énda émfésagadan i de sala gom.”

²⁵ Atin ménénginsa ro maro, “Ati mélaw i Beeme ni?”

Séménumbul i Jesuse mano, “Tidéw bé féganaye de séna bé kétoro guwe, nuret gun begom ké ati Begéne. ²⁶ Atin médoó sénay de bérhéhé ku fantag bé de rénigo gom do tete funa kom mékukum. Toow i bénréh i séménugue Begén, komon ureté ku dob de étew i énggelingoo kuwe saén tidéw dob Beene.”

²⁷Endob i de étew diyo, énda énggésobuto ro de ké ureté noy fantage bé Abaye Tulus. ²⁸Mélaw ménbéréh i Jesuse mano, “Buluk tunggulé komén Begén, sani Nga i Kéilawane, bénou na gétiga kom Begéney Beene bénréh gu. Atin gétiga kom so bé énda i rigoné ku ké tidéw saén dob Begéne, éndob bérhéhé ku saén i ténero i Abaye Begén. ²⁹Brab dumo guy séménugue Begén. Enda té nagakén Begén non démoyun rigoné kuy késuwata nuwe.”

³⁰Atin médooy de étew énggégélingo bé de ni, ménunur ro dob Beene. ³¹Mélaw bénréh Jesuse dob de Judio ménunur de mano, “Amuk modor gom bé ténero guwe, begom i de tintu kuyug gu, ³²atin gétiga kom i toowe kétoro, atin i toowe kétoro i témangéye begom.”

³³Sénumbulo ro maro, “I begeye ni do séfu Abraham gey brab énda ménrifén gey, atin sede mélaw ké bérhéhé mo fétangéye gey?”

³⁴Séménumbul i Jesuse mano, “Bérhéhé ku begom i toowe, i kéluhanay étewe rémigo tete maak riféy salae. ³⁵I riféne, fakay dédélén tidéw dob lawie. Endob i nga i gefee lawi, gébati dob nan lawi taman sa taman. ³⁶Mélaw amuk Nga i Tulusey témangéye begom, tintu gom békénén rifén. ³⁷Gétiga ku do onok Abraham gom. Endob méuyot gom méméléhu Begén, non énda tayakufé kom i kétoro guwe. ³⁸Bérhéhé kuy ati fénggitoy Abay guwe Begén, éndob rigoné kom mon i énggélingoo kome dob kagome abay.”

³⁹Séménumbul ro maro, “Abraham i kageye katufuan.”

Atin bénréh Jesuse bero mano, “Amuk do tintu onok Abraham gom damén, rigoné kom soy loo bé rénigo Abrahame. ⁴⁰Bénréh gu begom i toowe énggélingoo ku tidéw dob Tuluse, éndob méuyot gom Begén méméléhu. Endob békén loo bé nan i rénigo Abrahame. ⁴¹Rigoné kom i ségiléwe bé rénigoy abay gome.”

Endob ménkérít i de Judio maro, “Békén gey nga dob liyuwe, Tulus saén i Abay geye.”

⁴²Atin bénréh Jesuse bero mano, “Amuk toow fo Abay gom i Tuluse, méimu gom damén Begén, non tidéwu dob Tuluse. Enda ménangéyu dini dob kagéne aturan, éndob Tulusey séménugue Begén. ⁴³Sedek énda gésobuto kom i bérhéhé kuwe ni? Non mika gom keeyén munur bé toroé kuwe. ⁴⁴Satanas i abay gome atin rigoné kom i kétayay Satanase. Méméléhu étew tidéw féganay brab tugién non énda i toow dob beene. Atin amuk témugi, rigoné no say adat ne non beeney bebe i kéluhanay tugiéne. ⁴⁵Endob toow i kagéne kékéréh, mélaw énda unuro kom Begén. ⁴⁶Ati géféténgténgé de begom ké wén i sala gu? Enda. Atin amuk toow i bérhéhé kuwe, sedek énda munur gom Begén? ⁴⁷I tidéwe dob Tuluse fégélingoé noy kékéréh i Tuluse. Endob békén gom tidéw dob Tuluse, mélaw énda fégélingoé kom i kékéréh i Tuluse.”

⁴⁸Tidéw bénou, fénénginsaay de Judio maro, “Aw békén ba toow i bénréh geye ségétew go tidéw Samaria brab sénaitanan go?”

⁴⁹ Séménumbul i Jesuse mano, “Békénu sénaitanan. I toowe, basana kuy Abay guwe éndob énda basana kom Begén. ⁵⁰ Enda fébantug-bantugu, éndob i Tuluse kétaya no ké basananu, atin Been i gétigane bé ati fatute. ⁵¹ Béréhé ku begom i toowe, i de modor bé kétoro guwe, énda méléhu ro.”

⁵² Atin ménbérélh i de Judio maro, “Béleewe ni gétiga keyén sénaitanan go. I Abrahame ménléhu, brab do sénarigoy Tuluse muret bé kékérélh ne, ménléhu ro so. Endob bénréhém i modore bé kétoro me énda méléhuén.

⁵³ Aw toow go na fo gérotor bé Abrahame katufua key? Ménléhu i Abrahame brab de sénarigoy Tuluse so. Ati kégéfitung me bé Beeme?”

⁵⁴ Séménumbul i Jesuse mano, “Amuk bantugé kuy lowoh guwe so, énda i lanték i bantuga kuwe. Endob i Abay guwe Tulus, Been i mirayane Begén bantugan. Béréhé kom féngadafé kom i Tuluse. ⁵⁵ Endob énda gélolo gom de. Endob i Begéne, gélolo gu. Amuk bérélhé ku énda gélolo gu de, waléyu témugi ségiléw bé begome. Endob i toowe, gélolo guy Beene, brab modoru bé kékérélh ne. ⁵⁶ I katufua kome Abraham moror de bé kégito nuwe bé kégumah guwe. Enggito no, komon moror béni.”

⁵⁷ Sabaf bé ni, ménbérélh i de Judio maro, “Enda séna ménlimo go folo gébélintuwa, éndob bénréhém bé énggito mon i Abrahame?”

⁵⁸ Séménumbul i Jesuse mano, “Béréhé ku begom i toowe, énda séna ménúmah i Abrahame de, i Begéne ménwénén.”

⁵⁹ Sonom béno, ménémurut ro batéw inok ibéré ro dob Jesuse damén taman méléhu, éndob ménrékunéy i Jesuse brab méntékédan dob lawi i Tuluse.

Nuwa Jesusey langaféne

9 ¹ Atin amun ménagéw i Jesuse, énggito noy ségétéwe lagéy langafén tidéw fanay kéumahén. ² Atin i de kuyug Jesus ménénginsa ro maro, “Maistéro, ati funa nuwe ménúmah langafén? Non bé sala ne loo ké sala i de lukésén?”

³ Atin séménumbul i Jesuse mano, “Békén sabaf bé sala ne taloo no sala i de lukésén. Endob i funa nuwe langafén inok giton i barakat i Tuluse mérigo dob beene. ⁴ Fatut rigoné tom i fégalbék i Tuluse séménugu Begén, lokut fuweh séna. Gégumah i kélunganone, bé béno éndaén i ségétew gégalbék. ⁵ Amun diniwu dob duniyae, maak géfékaya non Begén i Soloe réméndaw dob kéilawane.”

⁶ Amun énggilid i Jesuse émbérélh, déménura dob fantade brab fénlémbuwekén i sébuwane bé dura ne. Tidéw béno, dénuletén dob de motoy ni lagéy langafén. ⁷ Atin ménbérélh i Jesuse mano, “Ay go dob kérigéwe féndawét Siloam, brab furauf go diyo.” (I atag i Siloame “sénugu”.) Mélaw ménagéw i langaféne ni brab rénigo noy férigowe de. Atin amun ménséfule, énggégítónén.

⁸ Tidéw béno, i de dumo ro ségédét lawi brab de étew énggégito de mongot limus, ménséfénginsa ro maro, “Aw békén ba beeney étewe déménoyun mésar mongot limus?”

⁹ Atin séménumbul i de dumo de maro, “Been bay nan.” Endob bang i de dumo de, “Békén been i nan, ségiléw ro sa keey falas.”

Tidéw béno, i ni lagéy ménbérén mano, “Begén bay no étew langafén bé gétaho.”

¹⁰ Atin ménénginsa ro maro, “Sedek énggégito gon béleewe?”

¹¹ Atin séménumbul i ni lagéy mano, “I lagéye féndawét Jesus, fénlémbuwekén i sébuwane atin dénuletén dob de moto gu. Atin sénuguén begén mangéy mérauf dob Siloam. Tidéw béno, ménagéwu brab ménuraufu, atin sonom béno énggégítowun.”

¹² Atin ménénginsa ro maro, “Hon i gonoy nan de lagéy béleewe ni?”

Endob séménumbul mano, “Enda gétila ku de.”

¹³ Tidéw béno, nuwit roy ni lagéy éndaén langaféno mangéy dob de Fariseo. ¹⁴ Gai kétérén i kéfélémbruwek Jesuse bé sébuwane brab kêuwa ne bé moy ni lagéy. ¹⁵ Fénénginsaay de Fariseo ké ati kéfingé-fingé i kégégito nuwe. Atin séménumbul i ni lagéy mano, “I Jesuse, fénlémbuwekén i sébuwane brab dénuletén dob de moto gu. Tidéw béno ménuraufu, atin sonom béno énggégítowu.”

¹⁶ Tidéw béno, i de dumo do Fariseo ménbérén ro maro, “I Jesuse békén tidéw dob Tuluse non énda modorén bé ménbéréhe dob kitabé bé énda fakay i gémalbéke ké gai kétérén.” Endob i de dumo de ménbérén ro maro, “Amuk i Jesuse ségettew ménalsa, énda fo gérigo no bé mékégaife.” Mélaw énda géséodor i de antaf fédéw ro.

¹⁷ Mélaw ménénginsa man i de Fariseo dob lagéye ni maro, “Ati karang me bé Jesuse ni étew, non énggféadi-adino no kun i de moto mo?”

Atin séménumbul i ni lagéy mano, “Beeney sarigoy Tuluse muret bé kébérén ne.”

¹⁸ Endob i de odoroy de Judío énda fo munur ro de ké langafén i ni lagéy tidéw bé do géta, mélaw féntawag roy de lukésén. ¹⁹ Atin fénénginsaa ro bero maro, “Aw nga gom i ni? Aw langafén ba tidéw fanay kéumahén? Sedek énggégitonén béleewe ni?”

²⁰ Séménumbul i de lukésén maro, “Gétila key beeney nga geye brab langafén tidéw fanay kéumahén. ²¹ Endob énda énggétiga key de ké ati kéfingé-fingé i kégégito nuwe béleewe, taloo no ati métawané de. Endob fénénginsaa kom i beene, non métawané san brab been i sémumbulone begom.” ²² Ménbérén i boh ne brab idéng ne loo bé ni non mágilak ro bé de odoroy de Judío. Non sénfagayunoy de odoron éndaén féahurén dob de lawi féngadafan i étewe ké bérhéhe noy Jesusey Kristowe tidéw dob Tuluse. ²³ Been i niy funay boh i ni lagéy brab idéng ne séménumbul maro, “Métawané i nga geye, been i fénénginsaa kome.”

²⁴ Mélaw i de Fariseo féntawag ron man i lagéye ni éndaén langaféno brab ménbérél ro maro, “Bérém i toowe dob adafay Tuluse. Gétiga key i Jesuse ni ségétew ménsala.”

²⁵ Mélaw séménumbul mano, “Enda gétiga ku de ké i Jesuse wén i salaén loo ké énda. Ni saén i kagéne gétigan, bé gétaho langafénu éndob béleewe énggégítowun.”

²⁶ Fénénginsaa ron man maro, “Ati rénigo nuwe dob beeme? Ati kéfingé-fingé i kéféadi-adi nuwe bé de moto mo?”

²⁷ Séménumbul mano, “Bénréh gun begom, éndob énda fo fégélingoé kom de. Sede méuyot gom de man mágélingo ségule? Aw méuyot gom de ké waléy gom do kuyugén so?”

²⁸ Tidéw bénó, fénéngiras ro, brab bénrého ro maro, “Beem say kuyugén. Endob i begeye kuyug Moises gey. ²⁹ Gétiga key ménsébérél i Tuluse bé Moisese bé do gétah. Endob i ni étew, énda gétiga key de ké hon i kétidéw ne de.”

³⁰ Séménumbul i ni lagéy mano, “Toow fo mágégaif i nan. Enda gétiga kom wayoy tidéwo nuwe de, éndob fén-adi-adi noy de moto gu. ³¹ Gétiga tom i Tuluse, énda fégélingoé noy de ménsala. Endob fégélingoé noy de étew méngintulus, rémigo bé kétaya nuwe. ³² Tidéw féganay kélimbag bé duniyae ni énda sénay ségétew gáféadi-adi ségétew langafén tidéw fanay kéumahén inok waléy gérito. ³³ Mélaw i Jesuse, amuk békén tidéw dob Tuluse, énda gérigono no de.”

³⁴ Tidéw bénó, ménkérít ro brab séménumbul ro maro, “I beeme fénngéngégo go toow fo ménsala, sedek beeme nay témoroe begey?” Tidéw bénó éndaén, fénrahur ro de dob lawie fénngadafan.

³⁵ Amun énggélingo Jesusey kénrico ruwe bé ni lagéy, ménangéy dob beene. Amun énggito no, ménsébérél i Jesuse de mano, “Aw munur go bé Nga i Kéilawane?”

³⁶ Séménumbul i ni lagéy mano, “Maistéro, bérém begén ké ati no étew inok géunuru de.”

³⁷ Séménumbul i Jesuse mano, “Enggito mon, non Been i Begéne sébérél beem.”

³⁸ Tidéw bénó, ménbérél i ni lagéy mano, “Kadnan, munuru Beem.” Atin fénéngadafén i Jesuse.

³⁹ Atin ménbérél i Jesuse mano, “Kékukum i funa kuwe ménangéy dob duniyae ni. I Begéne maak solo i de maak langafén inok waléy ro gérito amuk munur ro Begén. Atin i de gérito, sani de gétigan étew, waléy ro maak langafén amuk énda munur ro Begén.”

⁴⁰ Wén i de Fariseo énggélingo bé kékérél Jesuse, atin ménénginsa ro maro, “Sede? Aw do langafén gey so?”

⁴¹ Séménumbul i Jesuse mano, “Amuk maak do langafén gom, énda damén i sala gom, éndob béleewe ni makom ké do gérito gomén, non

makom ké toow gomén gétigan. Been i nan i funa nuwe i de sala gom énda mékedano.”

I binuwayaé fantag bé témalimae bé de bili-bili

10 ¹I Jesuse, ménuret sébaan binuwaya mano, “Béréhé ku begom i toowe, i étewe mahur dob rugéy de bili-bili mangéyén bé bengawane atin mangéy man bé de ségiyo agéwon, i nan étew ménakaw brab tulisan. ²Endob i étewe mahur mangéy bé bengaway rugéy de bili-bili, beeney témalimae bé de bili-bili. ³I mantaye dob fintue ungkaé noy bengaway rugéne inok géahur i témalimae bé de bili-bili. Brab i de bili-bili gélolo roy béréh ne. Brab tawagé noy de kaan do bili-bili bé de dawéto. Tidéw béno, fanangguvité no bero mésut tidéw dob rugéne mangéy dob de fétabtaban. ⁴Atin amuk mésut ro, métah bero brab i de bili-bili furay ro de non gélolo roy béréh ne. ⁵Enda furay ro bé ségiyowe étew, yamula féraréyo ro non énda gélolo roy béréh ne.” ⁶Bénréh Jesuse beroy ni binuwaya éndob énda fo énggésobuto ro de.

⁷Mélaw i Jesuse ménbéréh man mano, “Béréhé ku begom i toowe, Begéney maake bengawan ahuroy de bili-bili. ⁸I de énggétah Begén do tugién téromo, beroy maake do ménakaw brab do tulisan. Endob i de kagén do étew, beroy maake bili-bili, énda fo féngélingo ro bero. ⁹Begéney bengawane. I kéluhanay mahure dob Begéne, méfukas ro dob de sala ro. Ségiléw ro bé de bili-bili, mahur ro brab mésut ro atin géagéw ro dob fiyowe tabtabén non talimaé ku bero. ¹⁰I tulisane, sani tugiéne téromo mangéy sa dini inok ménakaw brab méméléhu brab méminasa. Endob i funa kuwe ménangéy dini inok iray gu dob de kélawan i umule énda i kulang de taman sa taman.

¹¹“Begéney fiyowe témalima bé de bili-bili, non iray guy férénawa guwe inok méfukas i de kuyug gu. ¹²I ségétéwe étew témalima bé de bili-bili sukayan saén, békén been i gefee de, méraréy ké gérito itu-talun. Tidéw béno, i itu-talune rambaé noy de bili-bili brab béragaré no bero. ¹³I ni étew sukayan saén tagaké noy de bili-bili non békén kaan brab énda fo méimuén bero. ¹⁴Endob Begéney maake fiyo témalima bé de bili-bili. Gélolo guy de kuyug gu, brab i de kuyug gu gélolo ro Begén, ¹⁵ségiléw bé kégélolo guwe bé Abay guwe Tulus brab kégélolo nuwe Begén. Atin i Begéne iray guy férénawa guwe inok méfukas i de kuyug gu dob de sala ro. ¹⁶Wén i de ségiyo do bili-bili gu békén tidéw dob ni rugén. Fatut fanangguvité ku so bero brab fégélingoé roy béréh guwe. Mélaw i de kéluhanay de étew gu, waléy sébaan i rugé ruwe brab ségétéw i témalimae de.

¹⁷“I funay Abay guwe méimu Begén, non énda gulaané kuy férénawa guwe. Endob amuk méléhuu, méuyagu man. ¹⁸Atin énda i géafas bé férénawa guwe tidéw dob Begéne, éndob kétaya ku fo iray gu. Wén i

kuwagib gu de miray brab wén soy kuwagib gu de médot man ségule. Been i niy sénugu i Abay guwe Begén rigoné ku.”

¹⁹ Amun énggélingooy de Judio man i kébérél Jesuse, énda man énggéséodor i de antaf fédew ro. ²⁰ Médooy de étew, ménbérél ro maro, “Bunég i ni étew brab rénahuko saitan. Kagom fégélingoén de.”

²¹ Endob i de dumo de ménbérél ro maro, “Enda gébérél loo bé nan i étewe rénahuko saitan. Atin énda gaganéy ségétewe sénaitanan i émféadi-adiwe bé de motoy langaféne inok waléy gérito.”

²² Tidew béno, énggumah i gaiwe kandulioy de Judioy kékéfétédém ruwe bé kékélinise bé lawi i Tuluse. Bé béno, gai mélégenéy. ²³ Atin i Jesuse diyo dob lawi i Tuluse séagéw-agéw dob agéwone wén i atéfén, fénadawét bé dawét i méntelatae datu Solomon. ²⁴ Atin i de Judio ménslimud ro dob Jesuse brab ménenginsa ro maro, “Taman kédiron nay kékéongot-ongot me begey? Amuk Beemey Kristowe, san i fénemili i Tuluse méguléw, bérélém begey i mékéntaye.”

²⁵ Séménumbul i Jesuse mano, “Bénréh gun begom éndob énda munur gom de. I de mékégaif galbék fénrigoy Abay guwe Tulus Begén, been i da nan i émfégtigane begom fantag bé Begéne. ²⁶ Endob énda munur gom de non békén gom do bili-bili gu. ²⁷ I kagéne do bili-bili fégélingoé roy kébérél guwe brab gélolo gu bero, atin furay ro Begén. ²⁸ Iraya ku bero umul magufusa, brab énda méléhu ro. Atin énda i géafas bero tidew dob Begéne. ²⁹ I Abay guwe Tulus toow na fo gérrotor bé kéluhanane. Been i méniraye bero dob Begéne. Atin énda i géafas bé de bili-bili gu tidew dob Tuluse. ³⁰ I Begéne brab Abay guwe Tulus, sébaan gey saén.”

³¹ Tidew béno, i de Judio ménurut ro batéw man inok ibéro ro batéw i Jesuse féléléhu ro damén. ³² Endob ménbérél i Jesuse mano, “Médoonén i fiyowe galbék fénrigoy Abay guwe Tulus Begén dob téngaanga kome. Ati isuwe bé de ni funa kom Begén méméléhu?”

³³ Séménumbul i de Judio maro, “Békén bé de fiyo galbék i funa keye Beem méméléhu, éndob sabaf mékémurka dob Tulusoy nan bérélém mo. I Beeme ségétew go saén kéilawan, sedek bérélém mo Tulus go?”

³⁴ Tidew béno, séménumbul i Jesuse mano, “Endob wén i Ménslate Kébérél i Tuluse dob Kitab gome mano, ‘Do tulus gom.’ ” ³⁵ Féntaus Jesusey kébérél ne mano, “Enggétiga tom, i Ménslate Kébérél i Tuluse toow fo toow taman sa taman. Mélaw ténavag i Tuluse do tulus i de katufua tom niraya no bé kébérél ne. ³⁶ Atin Begéney fénemili i Abaye brab sénuguén mangéy dini dob duniyae. Mélaw sedek bérélém kom mékémurka i bénréh guwe bé Begéney Nga i Tuluse. ³⁷ Amuk énda rigoné kuy fégalbék i Abay guwe Begén, kagom munur Begén. ³⁸ Endob amuk rigoné ku, fatut unur gom bé de génalbék gu, fiyon fo ké énda munur gom bé kébérél guwe, inok gétiya kom brab gésobuto kom i Abaye dini dob Begéne, atin i Begéne diyou dob Abaye.”

³⁹ Amun énggélingoo roy ni kékérén Jesuse, ténulama ro man i kéméfoe de, éndob énggésélyah brab ménusut.

⁴⁰ Atin ménéséfule i Jesuse mifar dob wayége Jordan dob gono Juane mautis bé géatahe de. Atin diyo ménbat. ⁴¹ Atin médooy étewé ménangéy dob Beene. Atin ménésbérén-bérén ro maro, “Fiyon fo ké i Juane énda i do rénigo no mékégaif, éndob toow i kéluhanay bénréh ne fantag bé Jesuse ni.” ⁴² Atin diyo médooy ménunure bé Jesuse.

Ténébule Jesusey Lasarowe

11 ¹ Wén i ségetéwe lagéy déméruruun, i dawét ne Lasaro, diyo bati dob Betania. I Mariahe brab Martahe do tuwaréyén libun bati ro so dob no ingéd. ² Been i niy Mariahe léménuka bé fégéféamute dob de sekéy i Kadnane Jesus brab kénayasén bé buk ne. Atin i Lasarowe lagéyén déméruruun. ³ Mélaw i de libuno ménféuwit ro kékérén mangéy dob Jesuse maro, “Kadnan, i towe fo kégédawa mo dumo mo séloyuk, déméruruun.”

⁴ Amun énggélingoo Jesusey ni, ménbérén mano, “Enda méléhu i Lasarowe bé nan déruun. Ménrigoy ni inok médayéw i Tuluse, atin tidéw so dob ni médayéw soy Begéne sani Nga i Tuluse.”

⁵ Toow fo méimu i Jesuse bé de ni sétuwaréy ro Martah, Maria, brab Lasaro. ⁶ Endob fiyon fo ké énggélingoo Jesuse déméruruun i Lasarowe, énda na ménagéwén tidéw dob gono nuwe bati taman énda féntibusén nay ruwowe géterésangan. ⁷ Tidéw béno, ménbérén dob de kuyugén mano, “Séfule tom mangéy Judea.”

⁸ Endob bang i de kuyugén, “Maistéro, békén ba énda séna ménrugay i kétulamay de Judio diyo Beem méméléhu? Mélaw énda fatutén séfule gon man mangéy diyo.”

⁹ Séménumbul i Jesuse mano, “Aw békén ba folo bra ruwo géuras i ségefwehe? Atin énda gébangkud i étewé magéw ké fuweh non gito noy géfekayae dob duniyae. ¹⁰ Endob i étewé magéw ké kélungonon gébangkud non délémon.” ¹¹ Nuret Jesusey binuwaya ni inok fégétiga no bé de kuyugén bé énda gésug-sugén diyo dob Judea non énda séna fénggilidén i galbék ne. Amun énggilid Jesuse bénréh i ni, rénéfaa no mano, “I Lasarowe dumo tom séloyuk, fidong. Mangéy diyo inok ulégé ku.”

¹² Atin i de kuyugén ménbérén ro maro, “Amuk fidong, waléy adi-adi.”

¹³ Endob i atag i bénréh Jesuse, ménléhu i Lasarowe, éndob énda énggésobutoy de kuyugén de. Marok tintu fidong. ¹⁴ Mélaw bénréh Jesuse fénkéntayén dob berowe mano, “Ménléhuén i Lasarowe. ¹⁵ Endob sabaf bé begome, mororu non énda diyou. Non wén i rigoné kuwe funa kom munur Begén. Enggomén, magéw tomén.”

¹⁶ Atin ménbérén i Tomase (féndawé so “Séfing”) dob de dumo no kuyugén mano, “Modor tom de inok méléhu tom so séréngan bé Jesuse.”

¹⁷Amun énggégumah ro diyo, énggélingoo Jesuse bé ménfotén gétérésangan i kélébéng ruwe bé Lasarowe. ¹⁸I ingéde Betania, gédét saén dob Jerusalem, téléc gékilomitroy kérayu ne. ¹⁹Atin médooy de Judio ménangéy diyo inok féfiyoné roy de fédéw ro Martah brab Maria bé kéléhu i lagéy ruwe.

²⁰Amun énggélingoo Martahe gédét gumah i Jesuse, ménagéw bénalakén, éndob i Mariahe ménféled dob lawie. ²¹Atin ménbéréh i Martahe dob Jesuse mano, “Kadnan, amuk dini go, énda damén ménléhu i lagéy guwe. ²²Endob gétiga ku fiyon fo ké béleewe ni, iray i Tuluse Beem i ati ongoté muwe de.”

²³Atin ménbéréh i Jesuse mano, “Tébule i lagéy me.”

²⁴Atin bang Martahe, “Gétiga ku tébule moso beroy kéluhanay de étew dob tamfaday de gai.”

²⁵Séménumbul i Jesuse mano, “Begéney témbulee brab miraye umul. I étewe munur Begén, fiyon fo ké méléhu, méuyag so. ²⁶Atin i méuyage étew munur Begén, éndaén méléhuén. Munur go bé ni?”

²⁷Atin séménumbul i Martahe mano, “Hoo Kadnan, munuru Beemey Kristowe, sani nongot-nongot geye Nga i Tuluse ménangéy dob duniyae ni.”

²⁸Amun énggilid Martahe bénréh i ni, ménsefule mangéy dob Mariahe dumo no brab ménseguraw mano, “Enggumah i Maistérowe brab fentawagén beem.” ²⁹Amun énggélingoo Mariahey ni, ménagayas témindég brab ménagéw bénalakén i Jesuse. ³⁰(I Jesuse énda séna énggumahén dob ingéde, diyo séna dob gonoy bénalaka Martahe de.) ³¹Atin i de Judio diyo ro dob lawie émféfiyo bé fédéw Mariahe, amun énggito roy Mariahe ménagayas témindég brab ménagéw, ménfuray ro de. Marok mangéy kémérew dob lébéngé.

³²Amun énggumah i Mariahe dob gono Jesuse, méntélgékéb dob adafa nuwe brab ménbéréh mano, “Kadnan, amuk dini go, énda damén ménléhu i lagéy guwe.”

³³Amun énggito Jesusey Mariahe kémérew brab de Judio ménodor de kémérew ro so, ménuray i na Jesuse brab toow fo ménntete i fédéw ne.

³⁴Atin ménénginsa i Jesuse mano, “Hon i gonoy lénébéngó kome de?”

Séménumbul ro maro, “Kadnan, mangéy tom diyo.”

³⁵Tidéw bénó, kéménrew i Jesuse. ³⁶Mélaw ménsembéréh-béréh i de étew maro, “Téngténg gom, toow fo mégédaw i Jesuse bé Lasarowe.”

³⁷Endob bang i de dumo de, “Enggféadi-adino noy de motoy langaféne. Sedek énda énggféadi-adino noy Lasarowe inok énda damén ménléhuén?”

³⁸Atin amun énggégumah i Jesuse dob lébéngé, toow fo ménntete i fédéw ne. I ni lébéng takub, atin ténléb roy bengawa nuwe bé dakéle batéw. ³⁹Tidéw bénó, ménbéréh i Jesuse mano, “Kéda kom i batéwa nan.”

Endob i Martahe, libuy ni ménléhu ménbéréh mano, “Endob mahuén i bangkay ne béleewe ni, non ménfotén gétérésangan i kélébéngé de.”

⁴⁰ Atin ménbéréh man i Jesuse mano, “Bénréh gun dob beeme, amuk munur go, gito moy barakat i Tuluse.” ⁴¹ Mélaw kénda roy batéwe dob bengaway lóbénge. Atin i Jesuse léménéngag brab ménbéréh mano, “Abay, toow fo fésalamatu dob Beeme non fénggélingoém Begén.

⁴² Atin gétiga ku fégélingoé mo Begén sénga téklid. Endob dasala kuy ni béleewe non bé de étew géliwét Begén inok munur ro Beem i séménugue Begén.” ⁴³ Amun énggilid bénréhén i ni, ménbéréh toow fo métanug mano, “Lasaro, sut go!” ⁴⁴ Tidéw bénó, méntébule i Lasarowe brab ménstut. Atin méntabéd i de kémérén brab de sékéyén bé de safut fénggébaus bé lowoh ne, brab méntéléb i rangih ne bé munsalawe. Atin ménbéréh i Jesuse mano, “Kéda kom i de fénggébaus de nan inok éndaén méfukétén.”

⁴⁵ Médooy de Judio ménangéy témukaw bé ro Mariahe, amun énggito roy rénigo Jesuse, ménunur ro dob Beene. ⁴⁶ Endob i de dumero bero, ménangéy ro dob de Fariseo brab nuret roy rénigo Jesuse. ⁴⁷ Mélaw i de odoroy de fadi brab de Fariseo, ménslimud ro beroy de kéfédéway de Judio. Atin ménbéréh ro maro, “Ati rigoné tome? Non i Jesuse ni rémigo médooy do mékégaif. ⁴⁸ Amuk fidayaé tom i ni rigoné no, kéluhanay étewé munur dob Beene. Tidéw bénó, waléy datu i de Judio atin mékérít i datu tome tidéw Roma. Tidéw bénó, mangéy diniy de sundaloy de Romano inok binasané roy lawi i Tuluse gono tom méngadaf, loo soy ingéd tome.”

⁴⁹ Endob ménbéréh i Kayafase, sani gérötore fadi bé no bélintuwa mano, “Enda i lanték gom. ⁵⁰ Aw énda ba gétiga kom de, labi na fiyo ké ségetéw saén i méléhue gémantinon bé kéluhanay Judiowe, inok énda ménbinasay ingéd tome?” ⁵¹ Bénréhén i ni békén tidéw dob kaane saén kéfégitung. Non beeney toowe gérotor fadi bé no bélintuwa, mélaw sénarigoy Tuluse émbéréh bé i Jesuse méléhu inok méuyag i de étew Judio. ⁵² Atin békén say de Judio, non i funa Jesuse méléhu inok i kéluhanay de nga i Tuluse, sani de munur dob Beene, fiyon atiy gonone tidéwo ro, waléy ro sébaan.

⁵³ Mélaw tidéw bé no gai, i de odoroy de Judio fégitungé roy ati kéfélhéruwe bé Jesuse. ⁵⁴ Mélaw éndaén féira-iray Jesuse dob Judea ké magéw. Yamula ménangéy Efraim gédét dob gonone énda i étew de bati. Atin diyo ménbatí beroy de kuyugén.

⁵⁵ Amun gédétén i kékanduli i de Judio féndawét “Témara”, médooy de étew tidéw dob de ségiyo-giyo gonon ménangéy Jerusalem. Diyo ro rénigoy adate féndawét “Félinis” inok géamung ro bé kandulie ni. ⁵⁶ Atin sélédé roy Jesuse non énda énggito ro de diyo. Atin ménfénginsa ro dob lawi i Tuluse maro, “Ati karang gome de, mangéy keey diniy Jesuse bé ni kékanduli, loo ké énda?” ⁵⁷ Non i de odoroy de fadi brab de Fariseo, bénréh

ro dob de étew buluk wén i ségétew gégito bé gono Jesuse, bérhé no dob berowe inok gékéfoo ro.

12 ¹Ném séden kélungonon taman bé gaiy kékanduli ruwe féndawét “Témara”, i Jesuse ménangéy Betania, sani ingéd Lasarowe, i lagéye ténébuleén. ²Diyo ténafoy roy kandulie fégébasa bé Jesuse. Bé no témégén, i lala Martahe démuwot, ménsar i ro Jesuse bero Lasaro. ³Atin i Mariahe éndotén i dakéle katiya ménfénó fégéféamut féndawét nardo, toow fo balilaga, atin lénukaén dob de sékéy Jesus. Tidéw béno, kénayasén bé buk ney de sékéy Jesus. Atin ménlégéb i duwaléy lawie bé téréhung i ni fégéféamut. ⁴Endob i ségétewe bé de kuyugén féndawét Judas Iskariot, sani ménfékéfoe de, ménbéréh mano, ⁵“Sedek séninggula saén i nan fégéféamut? Non amuk fénbéléy damén i nan nor, wén i médoou kurta gédotén de brab iray damén dob de méskinan.” ⁶Endob békén toow i kéuray i na nuwe bé de méskinan. Enggóbérého noy no non i beene ségétew ménakaw. Beeney témidue bé kurta ruwe, brab sénga tékélid médot de.

⁷Endob séménumbul i Jesuse mano, “Kago élénén i Mariahe. Atin fatut itongé noy sama ne inok wén i fégéféamut bé gaiwe kélébéng bé bangkay guwe. ⁸I de méskinan bati dob begome sénga tékélid. Endob i Begéne, éndaén mérugayu bati dini dob begome.”

⁹Médooy de étew énggelingoo ro diyo i Jesuse dob Betania. Mélaw ménangéy ro diyo. Békén say Jesusey funa ruwe mangéy diyo, non ménangéy ro diyo inok gito ro soy Lasarowe, sani lagéye ténébuleén. ¹⁰Mélaw i de odoroy de fadi bénantak fédew roy féléhué ro soy Lasarowe. ¹¹Non Lasarowey funay médoowe Judio téménrén modor bé kétoro i de odoro ro atin méniganay ro munur bé Jesuse.

¹²Bé gétunduge de fuweh, médooy de étew do ménangéy dob Jerusalem inok mamung bé ni kanduli féndawét Témara, énggelingoo roy Jesuse mangéy Jerusalem. ¹³Mélaw méndot ro do dau bongo brab ménsut ro dob ingéde inok balaké roy Jesuse. Ménbéréh ro métanug maro, “Dayéwé tom i Tuluse! Féfiyonéy Tuluse damén i ni gégumah tidéw dob Kadnane! Beeney datu tome do Judio!”

¹⁴Atin éndot Jesusey natiy kudae brab kénudaa no. Mélaw méntuman i Mén sulfate Kébéréh i Tuluse mano, ¹⁵“I begome do étew dob Jerusalem, kagom mégilak. Non gégumah i datu gome kémuda dob natife.” ¹⁶Enda fo énggésobutoy de kuyug Jesus i de ni bé no gai. Endob amun déméniyat i Jesuse, énggétédémo ro brab énggésobuto roy Mén sulfate Kébéréh i Tuluse, brab been i niy rénigo ruwe dob Jesuse funan méntuman i Mén sulfate Kébéréh i Tuluse.

¹⁷Bé béní, i de médooy do étew énggégito bé kétawag ne brab kétébule ne bé Lasarowe, nuret ro dob de dumo roy fantage bé rénigo Jesuse.

¹⁸ Been i niy funay médoowe étew ménalak bé Jesuse dob de agéwon non enggélingoo roy rénigo nuwe ni mékégaif. ¹⁹ Mélaw ménsembéréh-béréh i de Fariseo maro, “Endaén i fiyo rigoné tom, énteng gom kéléuhanay étewe modor ro de.”

²⁰ Atin diyo soy do étew tidéw dob ingéde Gris. Ménangéy ro so Jerusalem inok géfengadafa ro bé no kékanduli. ²¹ Ménangéy ro dob Filipihe (sani tidéwe Betsaida, sébaan ingéd dob sakuf i Galileawe), brab ménbéréh ro maro, “Maistéro, méuyot gey géségito bé Jesuse.”

²² Tidéw béno, bénréh Filipihe bé Andrese, brab ruwo ro ménangéy dob Jesuse brab bénréh ro dob Beeney kéuyotoy de étew. ²³ Atin ménbéréh i Jesuse mano, “Enggumahén i gaiwe toow fo médayéw i Nga i Kéilawane, sani Begéne. ²⁴ Béréhé ku begom i toowe, amuk i bénee énda mélébéngén dob fantade, énda mégonokén. Endob amuk ménlébéng, mégonok médo. Ségiléw bé Begéne, non amuk méléhuu, médooy gégedote bé mantuwe umul. ²⁵ I aruméne étew sani toowe fo gémulaan bé férénawa nuwe, méléhu. Endob i étewe énda gulaané noy férénawa nuwe dob ni duniya, gédoté noy mantuwe umul magufusa. ²⁶ Atiy méuyote gémalbékón Begén fatut modor Begén, inok fiyon fo ké ati ayo kuwe, diyo soy sugu-sugué kuwe. Atin fébantug i Abay guwey étewe gémalbékón Begén.

²⁷ “Toow fo tete i fédéw guwe béleewe ni. Ati fatute béréhé ku? Enda mon gébérého ku de ké maku, ‘Abay, kago fédayaén mérigo séko dob Begéne.’ Non been i niy funa kuwe ménangéy dini inok géagéwo kuy ni kérasay.” ²⁸ Tidéw béno, déménasal i Jesuse mano, “Abay, fégito moy barakat me.”

Tidéw béno, wén i émbéréhe tidéw dob lawayo mano, “Féngito gun i barakat guwe atin fégito gu man ságule.”

²⁹ Atin amun énggélingooy de ménslimud do étew diyo i ni, i de dumo de marok léte, atin i de dumo de marok télikiy no ménsembéréh bé Jesuse.

³⁰ Endob bénréh Jesuse mano, “I funay Tuluse ménbéréh békén inok gélingoo ku, yamula inok gélingoo kom so. ³¹ Béleewey gaiwe féganayéy Tulusey kékukum ne bé de tete étew. Atin fétékédanén i datu i ni duniya, sani Satanase. ³² Atin i Begéne, amuk métunggulu, fáfégédété kuy kéléuhanay étewe dob Begéne.” ³³ (Bénréh Jesusey ni inok fégétiga no beroy fégéléhu ne, tunggulén dob kruse.)

³⁴ Atin ménbéréh i de étew ménlimud maro, “Ménbéréh dob Ménslate Kébéréh i Tuluse i Kristowe kun méuyag taman sa taman. Mélaw sedek bénréhém i Nga i Kéilawane fatut tunggulén? Ati ni Nga Kéilawan?”

³⁵ Mélaw bénréh Jesuse bero mano, “I Begéne maak solo. Atin éndaén mérugay i kébati guwe dob begome. Fétuntay gom béleewe non diniwu séna inok gétiga kom i fiyowe agéwon. Endob amuk délémonén, éndaén gito gom i agéwone. ³⁶ Mélaw amun diniwu séna, unur gom Begén inok waléy gom so do solo miring Begén.”

Amun énggilid i Jesuse ménbéréh, méntékédan brab éndaén méntéfégito no bé de étew. ³⁷Fiyon fo ké énggito roy de médoor rénigo Jesuse do mékégaif, énda so munur ro de. ³⁸Dob ni méntuman i Ménssulate Kébéréh i Tuluse, sénulat Isaiase sani méntélatae sénarigoy Tuluse muret mano, “Kadnan, énda i munur bé uret geye, atin énda i énggétigan bé fénggitonu muwe bé barakat me.”

³⁹⁻⁴⁰ Atin sénulat Isaiase so mano, “I Tuluse, fénwaléyén bero langafén brab féntegasén i de fédew ro, inok énda gégitro brab inok énda gésobut ro brab énda gésénule ro brab munur dob Tuluse inok tabanga no bero.” Atin been i funa ruwe énda géunur ro.

⁴¹ Bénréh Isaiasey ni non bé gétahe de énggito noy kébarakata Jesuse brab bénréhén i fantage bé Beene.

⁴² Fiyon fo ké loo bé ni, médooy de odoroy de Judio ménunur bé Jesuse. Endob énda fénayag ro de non mágilak ro bé de Fariseo fétékédané ro dob lawie féngadafan inok éndaén géfengadaf ro diyo.

⁴³ Enda fénayag roy kéunur ruwe bé Jesuse non toow na fo méuyot ro bé kédayew i kílawane bé kédayew i Tuluse.

⁴⁴ Tidew bénou, méntanug i kíbéréh Jesuse mano, “I étéwe munur dob Begéne, énda saén munurén dob Begéne, éndob munur so bé Tuluse séménugu Begén. ⁴⁵ Atin i étéwe énggégito Begén, énggito no soy séménugue Begén. ⁴⁶ Begéney maake solo. Ménangéyu dini dob duniyae inok rémendawu dob de étew. Mélaw i de munur dob Begéne, éndaén bati ro dob délémone. ⁴⁷ Atin i étéwe énggégélingo bé kétoro guwe éndob énda munurén de, békén Begén i kémukume de, non énda ménangéyu dini inok kukumé kuy de kílawan, yamula fukasé ku bero dob de sala ro. ⁴⁸ I étéwe mika Begén brab énda munurén bé kagéne kétoro, mékukum dob tamfaday de gai. Atin i kémukume de, been i kétoro guwe. ⁴⁹ Non i kagéne kétoro békén tidew dob Begéne, éndob tidew dob Abay guwe Tulus séménugu Begén. Been i ménfóbéréhe Begén. ⁵⁰ Atin gétinga ku, i sugu ne miray bé umule magufusa. Mélaw béréhé ku begom i sénugu i Abay guwe.”

Nurah Jesusey de sékéy i de kuyugén

13 ¹Bé bénou, ségékélungonon séden atin kímanduli i de Judio fénadowet “Témara”. Atin énggétiga Jesuse, gédétén i gaiwe tagaké noy duniyae ni atin séfule mangéy dob Abay ne. Toow fo ménimú bé de kuyugén dob duniyae ni, atin fénténgténgén i kédakél i kégédaw ne bero.

²Ménama i Jesuse beroy de kuyugén. Atin i Satanase, bé gétahe de fénemanduo noy Judas Iskariote sani nga Simon Iskariote inok fékéfoén i Jesuse. ³ Atin i Jesuse énggétiga noy Abay ne sénarigén dob Beene kíluhanane. Atin énggétiga noy Beene tidew dob Tuluse atin séfule mangéy

dob Tuluse. ⁴Mélaw amun ménasar ro séna dob sékuloy ahayane, téménindég i Jesuse brab kénda noy kégal ne brab nikétén i tuwaliyawe dob owok ne.

⁵Tidéw béno, rénigono no wayég i félangganahe atin nurahén i de sékéy i de kuyugén, brab térrafo no bé tuwaliyawe nikétén dob owok ne. ⁶Amun fégédét i Jesuse dob Simon Pedrowe, ménbéréh i Pedrowe mano, “Kadnan, aw Beem i murahe bé de sékéy gu?”

⁷Séménumbul i Jesuse mano, “Enda gésobuto kom i atag i ni rigoné ku béléewe ni, éndob gésobuto kom so moso.”

⁸“Kago”, bang Pedro. “Enda fo méuyotu de ké Beem i murahe bé de sékéy gu.”

Endob séménumbul i Jesuse mano, “Amuk énda géuraha ku begom, békén gom do toow kuyug gu.”

⁹Mélaw bang Pedrowe, “Kadnan, békén say de sékéy gu, éndob urahém soy de kémér gu brab uléw guwe de so.”

¹⁰Endob ménbéréh i Jesuse mano, “I étewe énggilidén méndiyoh, kailangan urahé no say de sékéyén, non limfiyonén i lowoh ne. Atin limfiyo gomén saliyu bé ségétawé énda limfiyo no.” ¹¹Bénréh Jesusey ni non gétiga no wén i ségétawé bero émfékéfo de. Been i niy funa nuwe ménbéréh mano, “Enda kéluhana kom limfiyo.”

¹²Atin amun énggilidén nurah Jesusey de sékéy i de kuyugén, kéménagal brab ménasar man dob amaane. Tidéw béno, ménénginsa mano, “Aw énggésobuto kom i rénigo guwe dob begome? ¹³Fédawéte kom Begén ‘Maistéro’ brab ‘Kadnan’, atin toow fo fatut i nan non Begéney Kadnane. ¹⁴Mélaw i Begéne, sani Kadna kome brab Maistéro gom, amun nurah guy de sékéy gom, fatut gom so séurah sékéy. ¹⁵Ténoro gu begom i fatute adat. Rénigo guy ni inok iringé kom so. ¹⁶Bérhéku begom i toowe, énda nay rifén ké toow na fo gérotor bé gefee de, brab énda nay sugu-suguén ké toow na fo gérotor bé amu ne. ¹⁷Amuk énggésobuto kom i de ni, toow gom na fo moror ké rigoné kom.

¹⁸“Enda bérhéku kuy ni dob begome kéluhanan, non gétiga kuy de fédew gom do fénémili gu. Mélaw gétiga ku wén i ségétawé begom émfékéfo Begén. Mérigoy ni inok métuman i Ménuslate Kébéréh i Tuluse mano, ‘I étewe dumo gu mama waléy sébanil Begén.’ ¹⁹Féntaus Jesusey kébéréh ne mano, “Bérhéku begom béléewe ni, bé énda séna ménrigo no inok amuk gérumah i gaiwe métuman i ni, géunur gom Begéney Kristowe tidéw dob Tuluse. ²⁰Bérhéku begom i toowe, i étewe témayakuf bé sugué kuwe, témayakuf so Begén. Atin i témayakufe Begén, témayakufén soy Tuluse séménugu Begén.”

²¹Amun énggilid Jesuse bénréh i ni, toow fo ménlidu i na nuwe atin ménbéréh man mano, “Bérhéku begom i toowe, wén sékoy ségétawé begom émfékéfo Begén.”

²² Tidéw béno, i de kuyugén ménggésétengteng ro, non énda gétiga roy ati isuwe bé berowey bénréh Jesuse. ²³ Atin ménasar dob sékulo Jesusey kuyug ne toow fo kégédawa no. ²⁴ Atin kénébit Simon Pedrowey ni kuyug brab ménbérél mano, “Fénginsaém ké ati isuwe de.”

²⁵ Mélaw ménfégédét i ni kuyug dob Jesuse brab ménénginsa mano, “Kadnan, ati isuwe begey i émfékéfoe Beem?”

²⁶ Séménumbul i Jesuse mano, “I étewe iraya ku bé fane nérém gu, been i nan.” Tidéw béno, amun énggérémo noy fane, nirayén dob Judase nga Simon Iskariote. ²⁷ Amun énggédot Judasey fane, ménahur i Satanase dob Beene. Atin ménbérél i Jesuse mano, “Fagayas gon, rigo mo néni rigoné muwe.”

²⁸ Endob énda i ségétew bé de kuyugén ménasar dob amaane, énggésobut bé funa Jesuse ménbérél bé nan. ²⁹ Non i Judase beeney témidumé bé de kurta ro, brab marok sénugu Jesuse mangéy méléy bé de kailanga ro bé no kékanduli. Atin i de dumo bero marok sénuguén mangéy miray kurta dob de méskinan.

³⁰ Amun énggédot Judasey fane ni, ménsut atin ménagéw. Bé béno, kélungonon.

I mantuwe sugu

³¹ Amun ménagéw i Judase, ménbérél i Jesuse mano, “Béleewe gitonén i barakat guwe sani Nga i Kéilawane. Atin bé Begéne, giton soy barakat i Tuluse. ³² Brab amuk bé Begéne, énggitonén i barakat i Tuluse, tidéw béno fégítøy Tulusey barakat guwe. Atin rigoné noy ni magad. ³³ Do nga gu, éndaén mérugay i kébati guwe dob begome, brab sélédé kom séko Begén. Endob béréhé ku begom béléewe niy bénréh guwe dob de odoroy de Judio, ‘Enda géodor gom mangéy dob ayo kuwe.’ ³⁴ Atin ay niy mantuwe sugu iray gu begom: Ségédaw gom. Ségiléw bé kégédaw guwe begom, ségédaw gom. ³⁵ Amuk ségédaw gom, gétigay kéluhanay de étew mélaw begom i de kuyug gu.”

³⁶ Tidéw béno, ménénginsa i Simon Pedrowe mano, “Kadnan, ayo muwe de?”

Séménumbul i Jesuse mano, “Béleewe ni, énda géodor gom Begén mangéy dob ayo kuwe. Endob gétundug gom so moso may diyo.”

³⁷ Atin bang Pedrowe, “Kadnan, sedek énda géodoru Beem béléewe ni? Ulan den ké méléhuu sabaf bé Beeme.”

³⁸ Endob ménbérél man i Jesuse mano, “Aw toow ulan den ké méléhu go sabaf bé Begéne? Béréhé ku beem i toowe, énda séna ukoro i férufete, dirungé mo Begén téléléw gule bé énda gélolo mo Begén.”

Jesusey agéwone mangéy dob lawayo

14 ¹ Bang Jesuse, “Kagom émbuku taloo no tete i de fédéw gom. Unur gom bé Tuluse, brab unur gom so Begén. ² Wén i médoo do gonon

dob lawi i Abay guwe. Atin magéwu angéyé ku tafayén i de gono kom. Enda bérhéhé ku begom i ni amuk békén toow.³ Tidéw béno, amuk énggilidén méntafay i de gono kom, séfuleu mangéy dini brab uwité ku begom mangéy dob batio kuwe inok sétifon tom.⁴ Atin gétiga kom i agéwone mangéy dob ayo kuwe.”

⁵ Endob ménbérhéh i Tomase mano, “Kadnan, énda gétiga key i ayo muwe de. Ati mélaw i kégétiga keye bé agéwone mangéy diyo?”

⁶ Séménumbul i Jesuse mano, “Begéney agéwone, Begéney toowe, brab Begéney umule. Enda i géangéy dob Abaye saliyu bé Begéne.⁷ Amuk toow fo gétiga kom Begén, gétiga kom soy Abay guwe Tulus. Atin tidéw béléewe ni, énggétiga komén brab énggito gomén.”

⁸ Atin bang Filipihe. “Kadnan, fégito mo begey i Abaye Tulus. Been saén i nan i kailanga keye.”

⁹ Séménumbul i Jesuse mano, “Ménrugayén i kébati guwe dob begome. Endob taman so béléewe énda so wayo gélolo mo Begén Filipi? I énggigitowe Begén, énggito no soy Abaye. Sede mélaw ké émbérhéh go, ‘Fégito mo begey i Abaye’?¹⁰ Aw énda fo munur go Begén diyou dob Abaye, atin i Abaye dini dob Begéne? I de bérhéhé ku begom békén tidéw dob Begéne. Tidéw dob Abaye dini dob Begéne gémalbék.¹¹ Unur gom bé kébérhéh guwe, i Begéne diyou dob Abaye, atin i Abaye dini dob Begéne. Taloo no unur gom sabaf bé de mékégaif énggito gom rénigo gu.¹² Bérhéhé ku begom i toowe, i munure Begén gérigono noy de galbék rigoné ku. Atin gérido na toow fo dakél mékégaif bé de kagén galbék, non mangéyu dob Abay guwe.¹³ Atin rigoné kuy kéluhanay ongoté kome dob dawét guwe, inok fégito guy kéfiyoy Abay guwe Tulus.¹⁴ Udenén éntingayén ongoté kom dob dawét guwe, rigoné ku.”

Fantag bé Rémogor i Tuluse

¹⁵ Féntaus Jesusey kébérhéh ne mano, “Amuk méimu gom Begén, odoro kom i de sugué ku.¹⁶⁻¹⁷ Atin ongoté ku dob Abaye, brab sémugu ségiyo témabang sani Rémogor i Tuluse témoreo bé toowe. Atin bati dob begome taman sa taman. I de étew dob duniyae sébanil bé Tuluse énda tayakufé ro de non énda gito ro de brab énda gétiga ro de. Endob i begome, gétiga kom non bati dob begome brab énda tékeda no dob begome.

¹⁸ “Atin i Begéne, énda tagaké ku begom félébu, non séfuleo ku begom.¹⁹ Endaén mérugayén, i de sébanil bé Tuluse éndaén gito ro Begén. Endob i begome, gito gom man Begén. Atin non méuyagu man taman sa taman, méuyag gom so taman sa taman.²⁰ Amuk gérumah i nan gai tébuleu, gétiga kom i Begéne diyo dob Abay guwe, atin i begome dini dob Begéne, loo bé kédiyo guwe dob begome.

²¹ “I témayakufe bé de sugu gu brab rigoné no, beeney méimue Begén. Atin i Abay guwe féimué noy étewe méimu Begén. Atin i Begéne féimué ku so brab fefégétiga ku dob beeney fantage bé Begéne.”

²² Tidéw bénō, ménbéréh i Judase (békén Judas Iskariot) mano, “Kadnan, sedek fefégétiga mo begey i fantage bé Beeme, éndob énda fayagé mo de dob de étew sébanil bé Tuluse?”

²³ Séménumbul i Jesuse mano, “I méimue Begén, odoro noy kétoro guwe. Atin i Abay guwe méimu de so brab i Abay guwe brab Begéne mangéy gey batí dob beene. ²⁴ I étewe énda méimuén Begén, énda so odoro noy kétoro guwe. I de ni kékéréh gélingoo kom békén kagén, éndob tidéw dob Abaye séménugu Begén.

²⁵ “Bénréh gu dob begomey de ni lokut diniwu séna dob begome. ²⁶ I tétabange sani Rémogor i Tuluse, féuwit i Abaye inok fetausé noy galbék guwe. Atin toroé no begom i kéluhanane brab fefégétédémén begom i kéluhanay bénréh guwe begom.

²⁷ “Féledé kuy kagéne kétanék dob begome, inok fiyyo de fédéw gom. I kétanéke iray gu begom békén loo bé kétanéke dob duniiae ni. Mélaw kagom émbuku taloo no mégilak gom. ²⁸ Enggelingoo kom i bénréh guwe bé tagaké ku begom éndob séfuleo ku so begom. Amu damén ké toow gom méimu Begén, moror gom bé kéangéy guwe dob Abaye non i Abaye toow na fo gérotor Begén. ²⁹ Bénréh gu begom i ni lokut énda séna ménrigo no, inok amuk métuman, munur gom de. ³⁰ Enda férugayé kuy kékéréh guwe dob begome non gérumah sékoy odoroy duniiae ni sani féndawéte Satanás. Endob énda i barakatén gélawan Begén. ³¹ Endob rigoné kuy kéluhanay sénugu i Abaye inok gétigay de étew i kímu guwe bé Abaye. Enggomén, magéw tomén tékédan tom dini.”

I binuwayae fantag bé kayéwe

15 ¹ Ménbéréh man i Jesuse mano, “I Begéne maak sébaan idéng kayéw atin i Abay guwe Tulus Beeney gefee bé kayéwe. ² Amuk wén i do fongoy kayéwe énda mégonokén, kéléngé no. Atin limfiyoné noy de fongo mégonok inok méuman i kégégonok ruwe. ³ I begome maak do fongo gu brab ménlimfiyo gomén, non ménunur gomén bé de kétoro gu. ⁴ Kagom tékédan dob Begéne atin énda tékédanu dob begome. Enda i fongo géfégégonok amuk énda ménsumfatén dob idéng i kayéwe. Ségiléw bé begome non amuk sésuway gom Begén, énda gérgo gom bé fiyowe.

⁵ “Non i Begéne maak idéng kayéw atin i begome maak do fongo. I étewe énda tékédan no dob Begéne, brab énda so tékédanu dob beene, géfégégonok médo do fiyo rigonén. Endob énda i fiyo gérigono kom ké tékédan gom dob Begéne. ⁶ Atin i endae ménsumfat dob Begéne ibérén loo bé fongowe. Tidéw bénō, waléy mégangu. Atin i kéluhanay de fongo do mégangu, timuén inok ibérén dob aféye brab métuwégi. ⁷ Endob i begome, amuk énda tékédan gom dob Begéne atin amuk modor gom bé kétoro guwe, udenén kétaya kom ongoté kom, atin gédoté kom. ⁸ Atin amuk énggégégonok gom médo do fiyo rigonén, dayéwéy de étew i Abay

guwe. Atin gétiga ro mélaw do kuyug gu begom. ⁹Féimué ku begom ségiléw bé kéimu i Abay guwe Begén. Fétaus gom i kétayakuf gome bé gédaw guwe begom. ¹⁰Amuk odoro kom i de sugu gu, gétaus gom bé kétayakuf gome bé gédaw guwe begom, ségiléw bé kéodoro ku bé de sugu i Abay guwe atin taus i kétayakuf guwe bé gédaw ne Begén.

¹¹“Bénréh gu begom i ni inok méoror gom ségiléw bé Begéne inok toow tom fo séoror. ¹²Ay niy sugu guwe begom: ségédaw gom loo bé kégédaw guwe begom. ¹³Amuk toow fo mégédaw i ségétewe étew bé dumo nuwe, irayén i férénawa nuwe inok tabanga no. Been i niy toowe fo dakél kégédaw. ¹⁴Begom i do dumo gu, amuk rigoné kom i sugué kuwe begom. ¹⁵Endaén fédawété ku begom do sugu-suguén, non i ségétewe sugu-suguén, énda gétiga noy rigonéy amu ne. Yamula fédawété ku begom do dumo gu, non bénréh gu begom i kéluhanay énggelingoo kuwe tidéw dob Abay guwe Tulus. ¹⁶Békén begom i ménémilie Begén, yamula fénémili gu begom. Ténabar gu begom inok géfégégonok gom do fiyo galbék énda mékédano. Atin mélaw i Abaye Tulus, irayén begom i kéluhanay ongoté kome dob dawét guwe. ¹⁷Ay ni mélaw i sugu guwe begom: ségédaw gom.

¹⁸“I de étew sébanil bé Tuluse dob duniyae ni, amuk mérarék ro begom, fégétédém gom i ni, géétahu na kénraréko ro. ¹⁹Amuk mamung gom sébanil bé Tuluse, méimu i de tete étew begom. Endob fénémili gu begom inok sésuway gom bé de tete étew dob duniyae ni. Mélaw mérarék ro begom. ²⁰Fégétédém gom i bénréh guwe begom, ‘Enda i sugu-suguén ké gérotor na bé amu ne.’ Mélaw amuk férasayé ro Begén, férasayé ro so begom. Endob amuk wén i do étew odoro roy kagéne kétoro, odoro ro soy kagome de. ²¹Endob i funa ruwe begom émférasay non do kuyug gu begom. Non énda gétiga roy Tuluse, sani séménugue Begén. ²²Amuk énda ménangéyu dini mureton bero, énda i sala ro. Endob béleewe ni énda géséliyah ro non énggelingoo roy toowe, éndob mika ro de. ²³Atin i de étew mérarék Begén, békén mérarék ro saén Begén non mérarék ro so bé Abay guwe. ²⁴Enggitoy mérégaife galbék rénigo gu, énda géronoy ségiyowe de. Amuk énda énggitoy ro de, énda i sala ro. Endob énggitoy roy de ni, gido loo mérarék ro Begén brab Abay guwe Tulus. ²⁵Endob fatut mérigoy ni inok métuman i Ménsulate Kébérén i Tuluse mano, ‘Fiyon fo ké énda i funa ro, mérarék ro so Begén.’”

²⁶Féntaus Jesusey kékérén ne mano, “Gégumah sékoy témbabang tidéw dob Abaye Tulus. Sugué ku mangéy dob begome. I dawét ne Rémogor i Tuluse, atin toroé noy toowe. Amuk gumahén dini, fégétiga no bé de étew i fantage bé Begéne. ²⁷Atin begome soy fatute muret fantag bé Begéne, non énggéséodor gom Begén tidéw féganay bé kétoro guwe.”

16 ¹Féntaus Jesusey kékérén ne mano, “Bénréh gu begom i kéluhanay de ni inok énda mékédan i késarig gome dob Begéne.

²Non éndaén moso tungkasé ro begom mahur dob de lawi féngadafan. Atin gégumah moso i gaiwe, i de étew méméléhu begom, marok rigoné roy kétayay Tuluse. ³Rigoné roy de ni non énda séna gélolo ro Begén taloo no Abay guwe. ⁴Endob bénréh gu begom i de ni, inok amuk gégumah moso i nan gai kéférasay ro begom, gétédémo kom i bénréh gun begom.

“Enda bénréh gu de begom bé de gétah, non diniwu séna séodor begom. ⁵Endob béeewe ni, muleu mangéy dob Tuluse séménugu Begén. Gido loo, énda i ségétew begom ménginsa ké hon i ayo kuwe de. ⁶Atin béeewe, toow fo tete i de fédéw gom non bénréh guy de ni. ⁷Gido loo, bérhéhé ku begom i toowe, toow na fo fiyo dob begome ké magéwu, non buluk énda magéwu énda mangéy i témabange dob begome. Endob amuk magéwu, sugué ku mangéy dob begome. ⁸Atin buluk gégumah, fáfégétiga no bé de étew i de sala ro. Fáfégétiga no soy fantage bé fiyowe brab fantag bé kékukum i Tuluse. ⁹Fáfégétiga no bero ménsala ro sabaf énda méginugut ro Begén. ¹⁰Fáfégétiga no beroy fantage bé fiyowe non muleu mangéy dob Abaye Tulus, atin éndaén gito gom Begén. ¹¹Atin fáfégétiga no soy fantage bé kékukum i Tuluse, non i Satanase, sani odoroy kéluhanay tetee dob duniyae ni, ménkukumén.

¹²“Médoo nay kéuyoto kuwe ureté ku begom, éndob énda séna gésobuto kom de béeewe ni, brab waléy gom émbuku ké bérhéhé ku.

¹³Endob i Rémogor i Tuluse, sani témoree bé toowe, amuk gégumah, fáfégétiga no begom i kéluhanay toowe. Enda bérhéhé noy de kaan saén kéfégitung, yamula toroé noy kéluhanay énggelingoo nuwe tidéw dob Abaye, atin bérhéhé no begom i fantage bé kéluhanay mérigowe moso. ¹⁴Dayéwé no Begén, non fáfégésobutén begom i kéluhanay de kagén kétoro brab de rénigo gu. ¹⁵I kéluhanay kay Abaye, kagén so. Been i niy funa kuwe ménbérhéh bé i Rémogor i Tuluse, fáfégésobutén begom i kéluhanay kétoro guwe.

¹⁶“Endaén mérugayén tidéw béeewe ni, éndaén gito gom Begén. Enda man mérugayén tidéw bénó, gito gom man Begén.”

¹⁷Atin i de dumo bé de kuyugén ménsbérhéh-bérhéh ro maro, “Ati atag i bénréh ne mano, ‘Endaén mérugayén tidéw béeewe, éndaén gito gom Begén, brab énda man mérugayén tidéw bénó, gito gom man Begén?’ Brab bénréhén so mano, ‘Non muleun mangéy dob Abaye.’ ¹⁸Atin ati keey i atag i ni, ‘Endaén mérugayén?’ Enda gésobuto tom i no bénréhén.”

¹⁹Atin énggétiga Jesuse méuyot ro ménginsa, mélaw bénréhén bero mano, “Aw séfenginsa gom bé ati atag i bénréh guwe begom maku, ‘Endaén mérugayén éndaén gito gom Begén, brab énda man mérugayén tidéw bénó gito gom man Begén?’ ²⁰Bérhéhé ku begom i toowe, i de tete étew dob duniyae ni, toow ro fo moror bé mérigowe dob Begéne, éndob i begome, kémérew gom non toow fo tete i de fédéw gom. Endob énda man mérugayén

waléy gom toow na fo moror. ²¹Ufama, i libune kéararan, démawét non énggumahén i gaiy kékérasaya nuwe. Endob buluk ménkéumahanén, ménlifotén bé kékédawéta nuwe, sabaf bé kéror ne bé ngae ménunah dob duniyae ni. ²²Ségiléw bé nan soy begome. Béleewe ni, tete i de fédew gom. Endob amuk gégumahén sékoy gaiwe géségito tom man, waléy gom toow fo moror. Atin énda i gékedan bé kéror gome.

²³“Amuk gégumahén sékoy nan gai, éndaén ongote kom Begén. Bérhéku begom i toowe, i Abaye Tulus, irayén begom i kéluhanay ongoté kome dob dawét guwe. ²⁴Taman so béni, énda séna ménongot gom dob dawét guwe. Ongot gom atin gédoté kom, inok toow gom fo moror.

²⁵“Bénréh gu begom i de ni fénagéw dob binuwayae. Endob gégumah sékoy gaiwe éndaén binuwayaa ku begom, yamula fékéntayé kuy kéuret guwe fantag bé Abaye. ²⁶Buluk gégumah i nan gai, begom i de mongot dob dawét guwe dob Beene inok iraya no begom. Békén Begén i mongote. ²⁷Non i Abaye toow fo mégédaw begom. Féimué no begom non ménimu gom Begén brab ménunur gom Begén tidéwu dob Beene. ²⁸Tidéwu dob Abaye Tulus, brab ménangéyu dob duniyae. Brab béléewe tékédanu dob duniyae ni, atin muleu mangéy dob Abaye.”

²⁹Tidéw béno, ménbéréh i de kuyugén maro, “Béléewe mékéntay i kékéréh me, éndaén émbéréh go binuwaya. ³⁰Béléewe ni gétiga key gétiga moy kéluhanane, non fiyon fo ké énda séna ménginsa gey, gétiga mon i de fénginsaé key. Mélaw munur gey Beem, tidéw go dob Tuluse.”

³¹Atin bang Jesuse, “Aw ménigugut gomén Begén? ³²Endob gégumah i gaiwe brab énggumahén, ké émbéragar gom, mule gom mangéy dob de lawi gom. Atin tagaké kom Begén ségétew gu saén. Endob fiyon fo ké loo bé nan, wén i dumo gu, non i Abay guwe Tulus i dumo guwe. ³³Bérhéh kuy de ni begom, inok fiyoy de fédew gom sabaf bé késarig gome dob Begéne. Férégénoy de tete étew begom, éndob fébaraw gom non téabananén Begén i Satanase, sani odoroy duniyae ni.”

17 ¹Amun énggilid Jesuse bénréh i de ni, léménéngag saréw dob lawayo brab ménbéréh mano, “Abay, énggumahén i gaiwe. Férito moy kéfiyo guwe funa ku fatut médayéw inok fégito gu soy kéfiyo muwe funa mo fatut médayéw. ²Non sénarigém Begén i kuwagibé méguléw bé kéluhanay de kéilawan, inok iray guy umule magufusa dob kéluhanay de étew nirayém Begén. ³Atin ay niy kégédote bé umule magufusa: kailangan gétiga roy Beeme brab Begéne, non Beem saén i tintuve Tulus brab Begén i sénugu me Jesu Kristo. ⁴Féngito guy kéfiyo muwe dob duniyae, funa mo fatut médayéw atin énggilid gun i galbéké sénuguém Begén rigoné ku. ⁵Abay, béléewe ni ay niwu dob adafa muwe, féséfuleém dob Begéney bantuge loo bé bantug tuwe tidéw féganay bé énda séna ménlimbag i duniyae de.

⁶“Féfégétiga kuy fantage bé Beeme dob de étew dob ni duniya nirayém Begén. Beem i gefee bero, atin nirayém bero dob Begéne, atin ménunur

ro bé kékéréh me. ⁷Béleewe énggétiga ro tidéw dob Beemey kéluhanane bérhéh ku brab rigoné ku. ⁸Non fénksamfay gu dob berowey de kékéréhém nirayém Begén, atin méngginugut ro de. Enggétiga ro toowu tidéw dob Beeme, brab ménunur ro sénuguém Begén.

⁹“Dasala ku bero dob Beeme. Enda dasala kuy de tete étew dob duniyae ni, éndob ongoté ku dob Beeme féfiyoné moy de étew nirayém Begén non kaam so do étew. ¹⁰I kéluhanay kagéne kaam so, brab i kéluhanay kaame kagén so. Atin dob berowe énggiton i kéfiyo guwe funa ku fatut médayéw. ¹¹Atin muleu séko mangéy dob Beeme, brab éndaén batiu dob duniyae ni. Endob taus i karowe kékati dob duniyae ni. Fiyo Abay, diyaga mo bero bé barakat i dawét me, sani dawét me nirayém Begén, inok waléy ro sébaan, ségiléw bé betowe sébaan.

¹²Amun diniwu dob berowe, déniyaga gu bero bé barakat i dawét me nirayém Begén. Déniyaga gu bero inok énda i ségétew métadin bero saliyu bé ségétewe kailangan mékukum inok métuman i Ménsulate Kékéréhém. ¹³Atin béleewe séfuleu mangéy dob Beeme. Bérhéh kuy de ni lokut diniwu séna inok i de gégléingo de toow ro fo moror séréngan bé Begéne. ¹⁴Fénksamfay gu dob berowey de kaam kétoro. Atin i de tete étew dob duniyae, mérarék ro bero non éndaén mamung ro dob de tete étew ségiléw bé Begéne énda mamungu de. ¹⁵Enda ongoté ku de dob Beeme ké kédané mo bero dob duniyae, éndob ongoté ku dob Beeme diyagané mo bero tidéw dob Satanase. ¹⁶Enda mamung ro sébanil Beem ségiléw bé Begéne énda mamungu de. ¹⁷I de ni kato étew, usarém i toowe féwaléyém bero do malinis dob adafa muwe. Atin i kaame kékéréh, been i toowe. ¹⁸Sénugu gu bero muret dob de étew ségiléw bé késugu me Begén mangéy dob duniyae. ¹⁹Atin sabaf bé berowe, iray gu Beem i fédew guwe, inok i berowe so iray roy de fédew ro dob Beeme.

²⁰“Békén saén i berowey dasala kuwe dob Beeme, éndob dasala ku soy de étew munur ro dob Begéne non bé kéuret i de ni kuyug gu.

²¹Démasalu dob Beeme Abay inok waléy ro sébaan ségiléw bé Betowe. Atin ségiléw bé kédini muwe dob Begéne brab kédiyo guwe dob Beeme, dini ro so damén dob Betowe. Waléy ro damén sébaan inok i de étew dob duniyae munur ro bé sénuguém Begén. ²²Niray gu beroy barakate nirayém Begén inok i de fédew ro waléy sébaan loo bé Betowe. ²³Non i Begéne diyou dob berowe, atin i Beeme dini go dob Begéne. Mélaw waléy ro damén tintu sébaan inok i de étew dob duniyae gétiga ro Beem i séménugu Begén brab féimuém bero loo bé kékéimu me Begén.

²⁴“Abay, i de étew nirayém Begén, méuyotu de ké i ayo kuwe begey so inok gito roy bantug guwe, sani bantuge nirayém Begén non fénimuém Begén fiyon fo ké énda séna ménlimbag i duniyae de. ²⁵Métintu Abay gu, i de étew sébanil Beem, énda gétiga ro Beem. Endob i Begéne énggétiga ku Beem. Atin i de ni kuyug, gétiga ro sénuguém Begén. ²⁶Fénggétiga

ku beroy fantage bé Beeme, brab fétausé ku so inok i kégédaw me bero waléy ségiléw bé kégédaw me Begén, atin gédiyou dob berowe.” Been i niy dasal Jesuse.

Kénéfo i Jesuse

18 ¹Amun énggilid i Jesuse démasal, ménagéw beroy de kuyugén ménifar ro bé wayége féndawét Kidron. Wén i do nohok kayéw diyo atin diyo ro téménrén. ²Atin i Judase sani émfékéfoe de énggétiga noy ni gonon non diyo démoyun sélimud i Jesuse bé de kuyugén. ³Mélaw i Judase ménangéy diyo, fénanangguwitén i médoowe sundalo brab de mantay bé lawi i Tuluse sénugu i de odoroy de fadi brab do Fariseo. Ménuwit ro do solo brab do téla-ta brab do kulangén. ⁴I Jesuse énggétiga non i kéluhanane mérigo séko dob Beene. Mélaw fénggédéto no bero brab ménbéréd mano, “Ati sélédé kome?”

⁵Séménumbul ro maro, “Sélédé key i Jesuse tidéw Nasaret.”

Atin bang Jesuse, “Begén i no.”

Diyo soy Judase brab been i émfékéfoe bé Jesuse. ⁶Amun bénréh Jesuse Been i no séléde ro, énggétésunud i de sundalo brab kéluhana ro métluwar. ⁷Tidéw béno, ménénginsa man i Jesuse mano, “Ati sélédé kome?”

Atin séménumbul ro maro, “Jesus tidéw Nasaret.”

⁸Atin bang Jesuse, “Bénréh gun begom, Begén i Jesuse. Mélaw amuk Begén i sélédé kome féagéw gom i de dumo gu ni.” ⁹Bénréhén i ni inok métuman i kékéréd ne mano, “Abay, énda i énggétadino ku fiyon ségétew bé de étew nirayém Begén.”

¹⁰Tidéw béno, i Simon Pedrowe rénau noy sundange tidéw dob ruma ne. Atin téníbohén i ségétewe rifén kay gérotore fadi brab sénilafén i kelingo ne fingé kuwonon. I dawét i ni rifén Malkus. ¹¹Tidéw béno, bénréh Jesuse dob Pedrowe mano, “Rumaém i sundang ma nan. Non i kékérasaya kuwe niray i Tuluse Begén, békén ba kailangan téférasyun mon?”

Ménkukum i Jesuse

¹²Tidéw béno, i de sundalo beroy odoro ruwe, brab de mantay bé lawi i Tuluse, kénéfo roy Jesuse brab nikét ro. ¹³Atin nuwit ro sungu dob Anase, térimay gérotore fadi bé no bélintuwa féndawét Kayafas. ¹⁴Atin i Kayafase féngginai noy de odoroy de Judio bé gétahe de mano, “Toow na fo fiyo ké ségétew saén i mélhéhue inok énda méléhu i kéluhanay de Judio.”

¹⁵Atin i Pedrowe brab ségétewe dumo no kuyug ménfuray ro bé Jesuse. I ni ségétew kuyug, énggéloloy gérotore fadi, mélaw énggéodor so bé Jesuse mahur mangéy dob fésawayaw lawi i gérotore fadi. ¹⁶Endob

i Pedrowe méntéféléd dob liyuy béngeaway fésayawane. Tidéw béno, i dumo nuwe kuyug sani énggéloloy gérotore fadi ménsut brab ménsebéréh bé kénogone mantay dob béngeawayne, brab fénahurén i Pedrowe dob fésayawane.¹⁷ I kénogone ni ménenginsa dob Pedrowe mano, “Aw békén ba beem i ségetéwe bé de kuyug i lagéye kénéfo?”

Séménumbul i Pedrowe mano, “Békén begén.”

¹⁸ Mélégénéy fo bé béno gai. Mélaw i de sugu-suguén brab de guwardiya ménuyag ro aféy atin téménindég diyo ménélagang ro. Atin diyo soy Pedrowe téménindég télagang.

¹⁹ Atin i gérotore fadi fénenginsaa noy Jesuse fantag bé de kuyugén brab bé de kétoréen. ²⁰ Séménumbul i Jesuse mano, “Enda ménbunéy i de kétoro gu. Yamula toroé kuy kéléuhanay de étew non démoyunu témoiro dob de lawi féngadafan brab dob lawi i Tuluse dob téngaangay de étew, non diyo ménlimud i de Judio. Enda foy bénréh gu ké sénkém saén. ²¹ Mélaw sedek fénginsaa mo Begén? Fénginsaa moy de étew énggégélingo Begén non gétiga roy de kétoro gu.”

²² Amun bénréh Jesusey ni, i ségetéwe bé de guwardiya ténamfilingén i Jesuse brab ménbéréh mano, “Aw been i nan i késumbulo muwe bé gérotore fadi?”

²³ Séménumbul i Jesuse mano, “Amuk tete i bénréh guwe, bérhéhmi ati tete de. Endob amuk toow i bénréh guwe, sedek tamfilingé mo Begén?”

²⁴ Tidéw béno, i Jesuse tafay so nikét fénuwit Anase mangéy dob toowe gérotor fadi féndawét Kayafas.

²⁵ Amun i Pedrowe diyo séna dob aféye télagang, fénenginsaay de étew diyo maro, “Aw békén ba beem soy ségetéwe bé de kuyugén?”

Endob dénirung Pedrowe mano, “Békén begén.”

²⁶ Diyo i ségetéwe rifén kay toowe gérotor fadi sani samung i étewe sénilaf Pedrowey kélingo ne. Ménenginsa mano, “Aw békén ba beem i énggito guwe dumo no bé kékéfo ruwe de dob safade?”

²⁷ Atin dénirung Pedrowe man mano, “Békén begén.” Sonom so béno, ménukoro i férufete.

²⁸ Tidéw béno, nuwit roy Jesuse tidéw dob lawi Kayafase mangéy dob lawi i méguléwe bero tidéw Roma. Toow fo géfuwén bé no uras. Atin i de odoroy de Judio énda ménahur ro dob lawi i méguléwe inok odoro roy adat ruwe fantag bé kékanduli ruwe. Non amuk mahur ro dob lawi i de étew békén Judio, énda géamung ro bé kandulie féndawét ro “Témara” non marok mékrésik dob adafay Tulusey de lawi i de étew békén Judio. ²⁹ Mélaw i méguléwe féndawét Pilato ménsut tidéw dob lawi ne mangéy dob berowe brab ménenginsa mano, “Ati funa kome témébo bé ni étew?”

³⁰ Séménumbul ro maro, “Amuk énda i rénigo no tete, énda uwité key de mangéy dob beeme.”

³¹ Atin bang Pilatowe, “Uwit gom mangéy dob kagome kukuman, brab begom i kémukum de ké ati ménbéréhe dob kitab gome.”

Endob séménumbul i de Judio maro, “Endob dob kitab gome do Romano, énda i kuwagib gey kémukum méléhu bé ségétewe étew.”

³² Ménrigoy ni inok métuman i kékérén Jesuse fantag bé kaane fégéléhu, sani dob kruse. Non i adat i de Romano, féléhué roy de étew dob de krus.

³³ Atin i Pilatowe ménahur dob lawi ne brab ténavagén i Jesuse, atin ménenginsa mano, “Aw Beem i datu i de Judio?”

³⁴ Sémenumbul i Jesuse mano, “Aw kaam sa kéfegitung i nan loo ké énggelingoo mo tidew dob de ségiyo bénréh roy nan fantag bé Begéné?”

³⁵ Atin bang Pilatowe, “Békérén ségétew Judio! Endob do falan do dumo mo Judio brab de odoroy de fadi gom i ménuwite Beem dini. Ati teteerénigo mo?”

³⁶ Sémenumbul i Jesuse mano, “I sakuf i féguléwo kuwe békén dob duniyae ni. Amuk duniyae niy sakuf i féguléwo kuwe, i de kuyug gu métah ro sétiboh inok énda gékéfooy de Judio Begén. I sakuf i kagéne féguléwon békén dini.”

³⁷ Mélaw i Pilatowe ménenginsa mano, “Amuk loo bé nan, aw ségétew go datu?”

Sémenumbul i Jesuse mano, “Toow i kékérén me, Begén i datue. Atin i funa kuwe ménunah brab ménangéy dob duniyae ni inok fefégesobut guy toowe. Atin i de étew modor bé toowe, fégélingoé ro Begén.”

³⁸ Atin bang Pilatowe, “Ati keeyén i toowe?”

Amun énggérého Pilatowy ni, ménusut man ménangéy dob de Judio brab bénréhén mano, “Enda i gétiga ku sala i ni étew.” ³⁹ Endob i adat gome, sénga kanduli gom féndawét ‘Témara,’ témangéyu ségétew férisu, sani ati fémilié kome. Aw méuyot gom de ké tangéyé kuy ni étew datu gom do Judio?”

⁴⁰ Sémenumbul ro ménkes maro, “Békén Been i tangéyéne. Méuyot gey de ké tangéyé moy Barabase saén.” (I Barabase ni, beeney ségétewe ménakaw.)

19 ¹ Tidew béno, i Pilatowe fénbadasén i Jesuse. ² Atin i de sundalo ménidot ro do suwaran kélég brab lénuku ro, atin fénsayaf ro bé Jesuse. Tidew béno, fénkégal roy Jesuse furo kégal toow fo métah, maak datu. ³ Atin déniyangka ro maro, “Méraru damén i datu i de Judio.” Atin ténamfiling ro médoo gule.

⁴ Tidew béno, ménangéy man i Pilatowe dob de étew ménribuk brab bénréhén mano, “Uwité ku mangéy dob téngaanga kome inok fégétiga ku begom énda i salaén.” ⁵ Atin ménusut i Jesuse séménayaf do lénuku suwar brab kéménégal furo. Tidew béno, ménbéréh i Pilatowe mano, “Téngténg gom, ay niy étewe.”

⁶ Amun énggitoy de odoroy de fadi brab de guwardiya, ménkes ro maro, “Féléhuén, kélabonén dob kruse!”

Tidéw bénō, ménbéréh i Pilatowe mano, “Uwit gom brab begom i kémelabo de. Endob i begéne, karangé ku énda i salaén.”

⁷Atin bang i de ménlimud, “Dob kitab geye fatut féléhuén non béréhé no Beene kun i Nga i Tuluse.”

⁸Amun énggelingoo Pilatowey de ni, ménuman i kégilak ne. ⁹Mélaw ménésfule man mahur dob lawie brab fénénginsaa noy Jesuse mano, “Hon i tidéwo muwe de?” Endob énda séménumbul i Jesuse. ¹⁰Mélaw bang Pilatowe, “Sedek énda sémumbul go? Aw énda gétiga mo de ké wén i kuwagib gu témanagéy Beem, loo so méméléhu Beem dob kruse?”

¹¹Atin séménumbul i Jesuse mano, “Gagané mo rigonén i nan dob Begéne sabaf saén nirayay Tuluse beem kuwagib. Been i funa nuwe i étewe ménuwit Begén dini toow na fo dakél i sala ne.”

¹²Amun énggelingoo Pilatowey ni, ménuyot damén témanagéy bé Jesuse. Endob ménékes i de Judio maro, “Amuk fétangéyém i nan étew, sébanil go wayo bé gérotore datu Sesar dob Roma. Non i ségétewe étew émbéréh been kun i datue, beeney sébanile bé Sesare.”

¹³Amun énggelingoo Pilatowey kékéréh ruwe, fénsutén man i Jesuse. Tidéw bénō, ménasar dob saray de kémukum dob gonone féndawét Gabata dob késébéréhe Hebreo (i atag ne i suduwe batéw.) ¹⁴Gédétén géutuh bé no térésang atin i gétunduge fuweh, kémanduli i de Judio féndawét “Témara”. Tidéw bénō, ménbéréh i Pilatowe dob de Judio mano, “Ay ni datu gome.”

¹⁵Atin ménékes man i de étew maro, “Féléhuén, kélébonén dob kruse!”

Atin ménénginsa i Pilatowe mano, “Aw méuyot gom de ké kéléboné kuy datu gome dob kruse?”

Tidéw bénō, séménumbul i de odoroy de fadi maro, “Enda i ségiyo datu gey saliyu bé Sesare dob Roma.”

¹⁶Tidéw bénō, naté Pilatowe dob berowey Jesuse inok kéléboné ro dob kruse. Atin nangéy roy Jesuse.

Kénlaboy Jesuse dob kruse

¹⁷Mélaw nuvit roy Jesuse mésut dob no ingéd brab ménangéy ro dob gonone féndawét Golgota dob gonone féndawét Golgota dob késébéréh i Hebreowe (i atag ne “gonoy kulobong uléwe”). Atin bé kéagéw ruwe fénduwal ro bé Jesusey krus ne. ¹⁸Amun énggégumah ron diyo, i de sundalo, kénlabo roy Jesuse dob kruse. Atin kénlabo ro soy de ruwo gétew lagéy dob de krus. I ségétewe de fingé dob kuwono Jesuse, brab i ségétewe de fingé dob biwong Jesuse. Atin diyo i Jesuse ténungkul dob kérara ruwe. ¹⁹Atin wén i sénulat Pilatowe, féndiyo ro dob krus Jesuse mano, “I Jesuse tidéw Nasaret, datu i de Judio.” ²⁰Médooy de Judio énggébasa bé no non i ni gonon kénlaboy Jesuse dob kruse énda mérayuén dob Jerusalem. Atin sénulatén dob téléwe timan késébéréh,

Hebreo, Latin, brab Griego. ²¹ Endob i de odoroy de fadi i de Judio ménbéréh ro dob Pilatowe maro, “Kago sulateén de ‘Datu i de Judio’. Yamula sulateém loo bé ni, ‘I ni étew ménbéréh mano, Begén i datu i de Judio.’”

²² Endob séménumbul i Pilatowe mano, “I sénulat guwe, énda fakayén fégalinén.”

²³ I de sundalo, amun énggilid ron kénlaboy Jesuse dob kruse, éndot roy de kégalén, sénbaad ro fot gétew. Atin éndot ro soy lambung ne. Atin non nawél énda i kumbanga no, ²⁴ i de sundalo ménsébéréh ro maro, “Katom riyasén de. Yamula sékung-kungo tom, atin i tétabane gékaan.” Ménrigoy ni inok métuman i Ménsulate Kébéréh i Tuluse mano, “Sénbaad roy de kégal gu brab sénkung-kungo roy lambung guwe.” Atin been i nan i rénigoy de sundalo.

²⁵ Gédét dob krus Jesuse, diyo téménindég i idéng ne, brab tuwaréy idéng ne libun, brab bawag Kleopase féndawét Maria, brab ségétewe so Maria tidéw Magdala. ²⁶ Amun énggito Jesusey idéng ne brab ségétewe na kuyugén toow fo kégédawa no, ménbéréh dob idéng ne mano, “Iday, béeleewe ni beeney nga me.”

²⁷ Atin ménbéréh so dob kuyug ne mano, “Béleeewe ni beeney idéng me.” Mélaw méntidéw bé no, i kuyug Jesuse ni nuwitén i idéng Jesuse mule brab fénbatiéne dob lawi ne.

Ménléhu i Jesuse

²⁸ Tidéw béno, amun énggética Jesuse ménggilidén i kéluhanane, ménbéréh mano, “Téruménu,” inok métuman i Ménsulate Kébéréh i Tuluse fantag bé Jesuse.

²⁹ Wén i katiyae diyo ménfeno bé mélémuwe arak. Mélaw nérém roy maake gafas atin ténunggul ro dob métaahe kayéw brab féndiyo ro dob ba Jesuse. ³⁰ Atin amun énggéséfo no, ménbéréh mano, “Enggilidén.” Tidéw béno, méntédungul atin ménléhuén.

³¹ Tidéw béno, i de odoroy de Judio nongot ro dob Pilatowe ké fétéfoén i sékéy i de étew dob de krus inok magad méléhu. Non i de Judio méuyot ro ké mékédan i lowoh i de étew dob de krus bé no so gai, non bé gétunduge de térsang Sabado sani gaiwe témérén ro. Brab been i térsange bé kékanduli ruwe. Mélaw toow fo mékétéfu.

³² Mélaw i de sundalo ténefo roy sékéy i de ruwo gétew lagéy dumo Jesuse énggésérégan kénlabo dob de krus. ³³ Endob amun ménfégédét ro dob Jesuse, énggito ro ménléhuén. Mélaw éndaén ténefo roy de sékéyén. ³⁴ Endob i ségétewe bé de sundalo dénilékén i tébing Jesuse atin réménanas i darae brab wayég. ³⁵ Begéney étewe énggégito bé ni ménrigo. Gétiga ku toow, brab ureté ku toow fo toow inok munur gom de. ³⁶ Ménrigoy de ni inok métuman i Ménsulate Kébéréh i Tuluse

mano, “Fiyon sébaan bé de bukalén, énda i météfo de.” ³⁷Brab wén soy Ménsumate Kébérélh i Tuluse mano, “Téngténgéy de étew i dénilék ruwe.”

I kélébéngé bé Jesuse

³⁸Tidéw béno, wén i ségétewe lagéy féndawét Jose tidéw Arimatea, ménangéy dob Pilatowe brab nongotén i bangkay Jesuse. I Josehe ni ségétew so kuyug Jesuse éndob énda ménfayagén non mégilak bé de odoroy de Judio. Tidéw béno, ténungkas Pilatowey bangkay Jesuse, mélaw nangéy Josehe. ³⁹Atin i Nikodemowe sani lagéye témenukaw bé Jesuse bé kélunganone, ménodor bé Josehe brab ménouwit fot folo gékilo fégéféamut. (I ni fégéféamut mira ménslawék bé aloewe.) ⁴⁰Atin i de ni lagéy bénauis roy bangkay Jesuse bé futee safut atin sénlawék roy fégéféamute ni. Non been i niy adat i de Judio ké lémbéng ro.

⁴¹Gédét dob gono Jesuse ménléhu, wén i do nohok kayéw diyo. Atin dob ni gonon wén i mantuve rénigo lébéng takub énda séna ménlébengó no. ⁴²Non bé gétunduge de téresang Sabado sani gaiwe témerén ro, fénagayas ro lénébéng i Jesuse dob lébéngé ni, non gédét.

Méntébule i Jesuse

20 ¹Amun toow fo géfuwén bé Duminggue de, kémélungon séna, ménagéw i libune féndawét Maria Magdalena mangéy dob lébéngé. Atin énggito no ménkédan i batewe dob béngaway lébéngé. ²Mélaw léménéntu mangéy dob Pedrowe brab ségétewe ni bé de kuyug Jesus toow fo kégédawa no. Brab bénréhén mano, “Kénda roy bangkay i Kadnane dob lébéngé brab énda gétiga key i fénggono ruwe de.”

³Tidéw béno, i Pedrowe beroy ségétewe ni kuyug Jesuse, ménagéw ro mangéy dob lébéngé. ⁴Léménéntu ro atin énggétah énggumah dob lébéngey dumo Pedrowe kuyugén non toow na fo méraan. ⁵Atin ménkudung-kudung sémarir, éndob énda ménahurén. Enggito no saén i de safut. ⁶Tidéw béno, énggégumah i Pedrowe, atin ménahur i beene dob lébéngé brab énggito noy de safut ménumbuk. ⁷Enggito no soy safute fénggébaus bé uléw Jesuse. Enda ménlawékén dob de dumo safut, éndob ménđilin dob ségiyowe gonon. ⁸Tidéw béno, ménahur soy ségétewe ni kuyug dumo Pedrowe, sani énggétahe énggumah dob lébéngé. Atin amun énggito no, ménunur. ⁹Bé ni gai énda séna gésobuto roy Ménsumate Kébérélh i Tuluse fantag bé Jesuse tébule. ¹⁰Tidéw béno, ménule i de ruwo ni gétew kuyug.

¹¹Endob i Mariahe kémérew dob liyuy lébéngé. Bé lala ne kémérew, ménkudung-kudung sémarir dob bukag i lébéngé. ¹²Atin énggito noy ruwowe gétew télaki kéménégal fute, ménasar ro dob féniroone bé bangkay Jesuse. I ségétewe de ménasar fingé dob uléw ne atin i ségétewe de fingé dob sékéy ne. ¹³Atin ménbérélh ro maro, “Di, ati funa muwe kémérew?”

Atin séménumbul mano, “Nuwit roy Kadna kuwe atin énda gétiga kuy fénggono ruwe de.”

¹⁴Tidéw béno, séménling brab énggito noy Jesuse téménindég diyo, éndob énda énggélolo no de ké Beeney Jesuse. ¹⁵Atin bang Jesuse, “Di, ati funa muwe kémérew? Ati sélédé muwe?”

Dob fédéw Mariahe manok beeney magifate bé de nohok diyo. Mélaw ménbérélh mano, “Amuk Beemey ménuwite bé bangkay i Kadna kuwe, bérhéhém begén i fénggono muwe de inok angéyé ku.”

¹⁶Tidéw béno, bang Jesuse, “Maria.”

Atin méntékélid ténengténgén i Jesuse brab ménbérélh dob késébérélh i de Judio mano, “Raboni!” (I atag ne Maistéro.)

¹⁷Amun énggélolo Mariahe Beeney Jesuse, ménbérélh i Jesuse mano, “Kago gamakén Begén, non énda séna énggéuleu mangéy dob Abay guwe Tulus. Endob ay go dob de tuwaréy gu brab bérhéhém bero, mangéyu dob Abay guwe sani Tulus guwe. Been soy Abay gome brab Tulus gom.”

¹⁸Mélaw ménagéw i Maria Magdalenahe nangéyén bénréh dob de kuyug bé énggito noy Kadnane brab ati de bénréhén de.

¹⁹Amun kélungononén bé no Duminggu, i de kuyug Jesus ménsélimud ro dob lawie atin kénandado roy de fintu non mégilak ro bé odoroy de Judio. Atin tékow énggito roy Jesuse téménindég dob kérara ruwe. Atin ménbérélh mano, “Fiyoy de fédéw gom damén.” ²⁰Tidéw béno, fénténgténgén beroy de fali dob de kémérén brab tébing ne. Atin i de kuyugén toow ro fo ménoror non énggito ro. ²¹Tidéw béno, ménbérélh man i Jesuse mano, “Fiyoy de fédéw gom damén. Sugué ku begom loo bé késugu i Abay guwe Begén.” ²²Tidéw béno, niyufén bero brab ménbérélh mano, “Tanggaf gom i Rémogor i Tuluse. ²³Amuk fésagada kom i ségétéwe bé de salaén, émfésagadan. Buluk énda fésagada kom de, énda émfésagadan no.”

Enggito Tomase

²⁴I ségétéwe bé de folo bra ruwo kuyug Jesuse féndawét Tomas (féndawét so “Séfing”) énda diyoén bé no gai méntéfégíttoy Jesuse.

²⁵Mélaw i de dumo no kuyug nuret ro dob beene maro, “Enggito gey i Kadnane”.

Endob ménbérélh i Tomase mano, “Enda fo munuru de taman énda gito guy fali i de kélabo dob de kémérén brab taman énda géahuro kuy de dau kémér gu dob de fali dob de kémérén brab dob tébing ne.”

²⁶Ménifus i ségéfadiyane tidéw béno, ménsélimud man i de kuyug Jesus brab diyo soy Tomase. Fiyon fo ké i de fintu ménkandado, tékow méntéfégíttoy Jesuse téménindég dob kérara ruwe. Atin i Jesuse ménbérélh mano, “Fiyoy de fédéw gom damén.” ²⁷Tidéw béno, ménbérélh

i Jesuse dob Tomase mano, “Téngtengém i de ni. Fédiyoém i de dau kémérém dob de kémér gu, brab féahurém i kémér me dob tébing guwe ni. Kagonén magalang-galang. Unur go Begén.”

²⁸Tidéw béno, ménbéréh i Tomase mano, “Beemey Kadna kuwe brab Tulus gu.”

²⁹Atin bang Jesuse, “Aw munur go Begén non énggito mo Begén? Toow fo méoror i de munur Begén fiyon fo ké énda séna énggito ro Begén.”

³⁰Médoo na do mékégaif rénigo Jesuse énggitoy de kuyugén éndob énda ménusatén dob ni libro. ³¹Ménusat i de ni inok munur gom bé Jesusey Kristowe, sani Nga i Tuluse. Atin sabaf bé kéunur gome bé Jesuse gédoté kom i umule magufusa.

21 ¹Tidéw béno, ménféségit man i Jesuse dob de kuyugén dob dogote féndawét Tiberias. Loo bé niy énggagéwo nuwe. ²Diyo i Simon Pedrowe bero ro Tomas (féndawét so Séfing) brab Natanael tidéw Kana dob sakuf i Galileawe, brab ruwowe gétew nga Sebedeo féndawét Juan brab Santiago, brab ruwowe gétew kuyug Jesuse dumo ro. ³Atin i Pedrowe ménbéréh dob berowe mano, “Mangéyu tugés.”

Atin séménumbul ro maro, “Modor gey beem.” Mélaw ménagéw ro ménangéy ro méda dob awange. Endob énda i sébaan énggédot ro sédo bé no ménsegékélungonon. ⁴Amun sémbang i téresange, diyo i Jesuse téménindég dob dénsaane. Endob i de kuyugén énda gétiga ro de ké Beeney Jesuse. ⁵Tidéw béno, ménbéréh i Jesuse mano, “Do adih, wén i énggédot gom sédo loo ké énda?”

Séménumbul ro maro, “Enda.”

⁶Atin ménbéréh man i Jesuse mano, “Lawu gom i fukét gome fingé dob kuwonoy awange atin gégédot gom de sédo.” Mélaw lénawu roy fukét ruwe loo bé kékérén Jesuse de. Tidéw béno, énggédot ro toow fo médoo sédo. Atin énda génaga roy mégénge bé fukéte dob awange non toow fo émbécat i de médoo sédo.

⁷Atin i ségetéwe ni bé de kuyug toow fo ménggédaw i Jesuse de, ménbéréh dob Pedrowe mano, “Beeney Kadnane!” Amun énggelingoo Pedrowe, “Beeney Kadnane”, kéménégala (non kénda noy kégala ne) brab ménagayas ménantéfor dob wayége atin léménangoy mangéy dob dénsaane. ⁸I de dumo do kuyugén ménfuray ro dob dénsaane ménada awang, génuyud roy fukéte ménfeno sédo. Enda mérayuén tidéw dob dénsaane, wén keey i siyow folo gémitroy kérayu ne. ⁹Amun déménunggu ron, énggito roy mégébarawé aféy wén i féntanang de sédo. Wén soy fan de. ¹⁰Atin bang Jesuse, “Uwit gom diniy dumoy de sédo énggédot gom.”

¹¹Mélaw i Pedrowe ménénik dob awange inok gédoté noy fukéte. Tidéw béno, génuyudén mangéy dob dénsaaney fukéte ménfeno do dakél

sédo. Fiyon fo ké ménféno bé dakéle sédo, mératuh bra limo folo bra télew, énda ménkusi i fukét ruwe. ¹² Atin bang Jesuse bero, “Enggomén, mama tom.” Enda i ségetéw bé de kuyugén émbaraw ménénginsa ké ati Beene ni, non énggétiga ron Beeney Jesuse Kadnan. ¹³ Mélaw i Jesuse ménfégédét dob fane brab ménidot de brab béraadén dob berowe, loo soy de sédo.

¹⁴ Been i niy gétéléwe gule méntéfégítoty Jesuse dob de kuyugén tidéw bé kétébule ne.

I Jesuse brab Pedrowe

¹⁵ Amun énggilid ron mama, ménénginsa i Jesuse dob Simon Pedrowe mano, “Simon, nga Jonas, aw toow na fo méimu go Begén bé kéimu i kéluhanay de ni Begén?”

Séménumbul i Pedrowe mano, “Hoo Kadnan, gétiga moy kéimu guwe Beem.”

Atin bang Jesuse, “Fagifatém i de bili-bili gu.” ¹⁶ Tidéw béo, ménénginsa man i Jesuse mano, “Simon, nga Jonas, aw toow fo méi mu go Begén?”

Séménumbul man i Pedrowe mano, “Hoo Kadnan, gétiga moy kéimu guwe Beem.”

Atin bang Jesuse, “Fagifatém i de bili-bili gu.” ¹⁷ Atin ménénginsa i Jesuse bé gétéléw ne gule mano, “Simon, nga Jonas, aw méimu go Begén?” Méntete i fédew Pedrowe non fénénginsaa Jesuse gétéléw gule mano, “Aw méimu go Begén?”

Mélaw séménumbul i Pedrowe mano, “Kadnan, gétiga moy kéluhanane, gétiga moy kéimu guwe Beem.”

Atin bang Jesuse, “Fagifatém i de bili-bili gu.” ¹⁸ Bérhéku beem i toowe, amun ménguwéd go séna, géikéto moy sintoro muwe, atin mangéy go dob kétaya muwe ayo mo. Endob buluk lukés gon, ségerun go kémawa, atin ségiyoy marake beem atin uwité no beem mangéy dob kéikaa muwe ayo mo.” ¹⁹ (Bénréh Jesusey ni dob Pedrowe nureténi atiy fégéléhu ne funay Tuluse émbantug.) Tidéw béo, bang Jesuse bé Pedrowe, “Furay go Begén.”

²⁰ Atin séménling i Pedrowe, atin énggito noy toowe ni fo kégédawa Jesuse kuyugén, sani kuyuge ménfégédét dob Jesuse bé kéama ruwe dob kékandulie brab ménénginsa mano, “Kadnan, ati émfékéfoe Beem?” ²¹ I Pedrowe, amun énggito noy ni ségetéw kuyug, ménénginsa dob Jesuse mano, “Ati mosoy géagéwoy ni étew?”

²² Séménumbul i Jesuse mano, “Amuk méuyotu de ké méuyag taman bé késéfule guwe dob duniyae ni, ati mélaw i kaame de? Furay go Begén.”

²³ Sabaf mélaw bé ni, ménlégéb dob de kuyug Jesuse i urete bé i ni kuyug énda kun méléhuén. Endob békén bénréh Jesuse ké énda

méléhuén. I bénréh Jesuse saén mano, “Amuk méuyotu de ké méuyag taman bé késéfule guwe, ati mélaw i kaame de?”

²⁴Begéney nan kuyug Jesuse bénrého no! Enggito guy kéluhanay de ni ménrigo brab sénulat gu dob ni. Atin gétiga key i kéluhanay de ni ménsulat toow fo toow.

²⁵Médoo nay de étingayén rénigo Jesuse tidéw bé de ni. Endob amuk sulatén kéluhanan, kloh sa keeyén i duniyae fégonon bé kéluhanay librowe ménsulat.

I de Rénigoy de Apostol

I ni sulat, been i niy fétausoy Fiyowe Uret sénulat Lukase. I Lukase, been i ségétéwe doktor. Atin sénulatén i ni dob ségétéwe gérotor étew féndawét Teofilo.

Been i niy sulate fantag bé de rénigoy de kuyug Jesus amun déméniatén i Jesuse. Féndawét Jesuse bero “do apostol” non sénuguén bero inok muret ro. (I atag i “apostole” sénugu.) Sénulat Lukasey fantage bé de rénigoy de apostol brab de kébéréh ro. I galbék i de apostol, been i kéurete bé Fiyowe Uret fantag bé Jesuse inok géunur i de étew dob Beene.

I Rémogor i Tuluse, Been i téménabangane bé de apostol inok gérigo roy de mékégaif brab inok émbaraw ro muret fantag bé Jesuse.

1 ¹Teofilo,

Dob sunguwe libro gu, sénulat gu dob beemey fantage bé kéluhanay de rénigo Jesus brab de téneroén tidew dob gaiwe féngganayén i kégalbék ne, ²taman dob gaiwe féndiyat i Tulusey Jesuse mangéy dob lawayo. Amun énda séna déméniatén de, fénémanduo no bé barakat i Rémogor i Tulusey de fénémilién do kuyugén féndawét do Apostol (i atag i ni do sénugu). ³Méntefégitoy Jesuse dob berowe médoogule tidew bé kéléhu ne taman fot folo gétérésangan inok toow fo gétiga ro méntébule. Dob de ni do gai méntefégitoy dob berowe, téneroén i fantage bé kéféguléw i Tuluse. ⁴Atin amun ménsélimud i Jesuse beroy de kuyugén bénréhén bero mano, “Kagom séna tékédan dob Jerusalem. Endob ongot-ongot gom i fenasad i Abay guwe begom, sani bénréh guwe néen begom. ⁵I Juane ménautis bé wayége éndob éndaén mérugayén bautison gom bé Rémogor i Tuluse.”

⁶Wén i no ségiyo gai ménsélimud i Jesuse beroy de apostol. Atin fénénginsaa ro maro, “Kadnan, aw béleewe ni bay gaiwe féséfuleé moy kuwaшибé émfétindég bé ingéd tome Israel?”

⁷Séménumbul i Jesuse mano, “Békénén fatut gétiga kom i de gai non i Abay guwe saén i wéne aturano bé de gai. ⁸Endob amuk gégumah i Rémogor i Tuluse dob begome, waléy gom barakatan. Atin mélaw begomey murete fantag bé Begéne dob de étew dob Jerusalem, brab dob kéluhanay de ingéd dob Judea brab Samaria, brab dob kéluhanay de ingéd dob duniaye ni.”

I kédiyat Jesuse

⁹ Amun énggilid Jesuse bénréh i ni, féndiyat i Tulusey Jesuse mangéy dob lawayo atin ténéngténg ro taman méntéléb bé de rawén. ¹⁰ Amun déméniyatén i Jesuse, i lala ruwe séna léméngag dob lawayo, tékow méntéfegitoy ruwowe gétew lagéy kéménégal ro fute téménindég diyo dob sékulo ruwe. ¹¹ Brab ménbéréh ro maro, “Do étew tidéw Galilea, sedek léméngag gom saréw dob lawayo? I Tuluse féndiyatén i Jesuse mangéy dob lawayo, atin séfule so moso loo bé kégito gome de déméniyat.”

¹² Tidéw bénó, i de apostol ménsefule ro mangéy Jerusalem tidéw dob tuduke féndawét Olibo, ségékilometroy kérayu ne. ¹³ Amun énggégumah ron dob ayo ruwe ni ingéd, méntaus ro dob sibéye dob rotor i lawie gono ro bati. I de ni ro Pedro, Juan, Santiago, Andres, Filipi, Tomas, Bartolome, Mateo, Santiago nga Alfeo, Simon sani ségétewe toow fo gulaané noy ingéd ne, brab Judas nga Santiago. ¹⁴ Sénga tékélid sélimud ro inok démasal ro beroy de libun brab Mariahe idéng Jesuse, loo soy de tuwaréy Jesus do lagéy.

¹⁵ Amun ménifus i firoye gétérésangan, ménslimud i de munur bé Jesuse, wén i mératuh bra ruwo folo gétew. Atin téménindég dob téngaanga ruwey Pedrowe brab ménbéréh mano, ¹⁶ “Do dumo gu, énda fakayén ké énda métuman i Ménslate Kébéréh i Tuluse, fénbéréh i Rémogor i Tuluse bé Datu Dabidey fantage bé Judase, sani ménuwite bé de kéménéfo bé Jesuse. ¹⁷ I Judase, ségétew betom, brab fénemili ménamung bé galbék tome.” Been i bénréh Pedrowe.

¹⁸ Atin i kurtae énggedotén bé ni tete rénigo no bé Jesuse fénggébélényen fantad, atin diyo ménlawu brab ménléhu non ménbétus i sur ne atin méntandég i de téneekén. ¹⁹ Atin énggelingoo y kéluhanay de étew dob Jerusalem i ni ménrigo, mélaw féndawét roy ni fantad “Akeldama”, dob karowe késbéréh. (I atag ne “Démara fantad”).

²⁰ Féntaus Pedrowey kébéréh ne mano, “Sénulat dob de Kanta tidéw dob Ménslate Kébéréh i Tuluse mano, ‘I lawi ne taus i kétagake de damén atin énda i bati diyo fiyon ségétew.’ Brab ménslat so mano, ‘Wén damén i émfétaus bé galbék ne.’

²¹⁻²² “Mélaw,” bang Pedrowe, “fatut mémili tom ségétew mantu dumo tom muret fantag bé kétébule Jesuse. Fatut beeney étewe dumo tom ménseodor-odor bé kédiniy Kadna tome séna, tidéw bé kéuret Juane bé kóbautis ne taman bé kédiyat Jesuse mangéy dob lawayo.”

²³ Mélaw ménemili ro ruwo gétew lagéy, ro Matias bero Jose Barsabas (féndawét so Justo). ²⁴ Tidéw bénó déménasal ro maro, “Kadnan, gétiga moy fédew i kéluhanay étewe. Mélaw fefégétiga mo begey ké ati isuwe

fénémiliém bé de ruwo ni gétew, ²⁵ inok waléy apostol brab mamung émfétaus bé galbéke té nagak Judase amun ménuleén mangéy dob gonone fatut ayono.” ²⁶ Tidéw béno, sénbunuto ro atin ménfémili i Matiase. Mélaw i Matiase ménwaléy apostol beroy de folo bra sébaan, brab ménamung bero.

I kégumah i Rémogor i Tuluse

2 ¹ Amun énggumahén i gayi kékanduli ruwe féndawét Pentekostes, i kéluhanay de méginugut bé Jesuse, ménslimud ro dob sébaane gonon. ² Atin tékow wén i énggélingo ro tidéw dob lawayo toow fo métanug maak émbagér réfuruh. Atin ménlégéb dob lawie gono ro ménvars. ³ Tidéw béno, énggito roy de maak dila rino aféy ménlégéb brab ménégatag dob bumbunay séngae ségétew bero. ⁴ Atin fénémanduo Rémogor i Tuluse bero. Atin ménshérén-bérén ro do séségiyo-giyo do késbérén non fénbérén i Rémogor i Tuluse bero.

⁵ Dob Jerusalem, wén i do Judio do ménintulus ménbati diyo. Tidéw ro dob de séségiyo-giyo ingéd dob duniya. ⁶ Amun énggélingo roy ni démugués, médooy de étew ménangéy diyo brab ménslimud ro. Brab ménkéségiyonan ro non amun ménshérén i de étew méginugut bé Jesuse, i séngae étew énggélingo noy kaane késbérén. ⁷ Non toow fo ménkéségiyonan ro, ménshéréninsa ro maro, “Aw ati ni? Aw békén ba kéluhanay de ni do étew tidéw ro Galilea? ⁸ Sedek gélingoo tom bero sébérén bé kéluhanay de késbérén dob de ingéd ténidéwo tom? ⁹ Tidéw tom dob Partia, dob Media, dob Elam, dob Mesopotamia, dob Judea, dob Kapadosia, dob Ponto, dob Asia. ¹⁰ Dob Frigia, dob Pamilia, dob Egípto, dob de ingéd sakuf i ingéde Libia gédét dob Siren, brab dob Roma, ¹¹ do Judio brab do békén do Judio éndob ménwaléy do munur bé kétoro i de Judio. Tidéw tom dob Kreta, brab dob Arabia. Atin i séngae ségétew betom énggélingo no bero sébérén-bérén dob kaane késbérén fantag bé toowe fo ménkégaif rénigoy Tuluse.” ¹² Atin toow fo ménkégaif ro brab énda énggésobuto roy ni ménrigo. Mélaw ménshéréninsa ro maro, “Ati atag i ni ménrigo?”

¹³ Endob i de dumo do étew déniyangka roy de kuyug Jesus brab ménshérén ro maro, “Molon i de ni do étew.”

I kéuret Pedrowe

¹⁴ Tidéw béno, téménindég i Pedrowe beroy de folo bra sébaan do dumo no apostol brab ménshérén métanug dob de ménslimud étew mano, “Do dumo gu do Judio brab kéluhanay de étew bati dob Jerusalem, toow gom fégélingo i bérhékuwe ni inok gésobuto kom. ¹⁵ I de ni do étew énda molon ro loo bé kéfégítung gome de, non géraraan lémowot sénay téresange ni. ¹⁶ Endob ménuman béleewe niy bénréh i ménélatae

sénarigoy Tuluse muret bé kékéréh ne féndawét Joel mano, ¹⁷‘Ay niy rigoné kuwe dob de tamfaday de gai, bang i Tuluse. Iray gu témantuy Rémogor guwe dob kéluhanay étewe. Brab i de nga gom do lagéy brab libun, bérhéh roy de kékéréh gu. Atin i de kénogo lagéy gom gito roy toowe tidew dob Tuluse, brab i de lukés gom so gito roy toowe tidew dob Tuluse amuk téméginéf ro. ¹⁸Atin fiyon foy de sugu-sugué ku, do lagéy brab do libun, ureté roy kékéréh guwe non tantuno ku bero irayan bé Rémogor guwe. ¹⁹Atin rémigowu do mékégaif dob lawayo brab dob fantade. Giton i darae, aféye, brab mégéfole bél. ²⁰Atin i téresange waléy délémon, brab i téresang kélunganone waléy furo maak dara. Been i niy mérigowe ké énda séna gérumah i émbantuge gaiy Kadnane kémukum. ²¹Atin i kéluhanay mongote tabang dob Kadnane, méfukas ro dob de sala ro.’”

²²Atin fentaus Pedrowey kékéréh ne mano, “Do dumo gu do Judio, fégélingo gom i ni! I Jesuse tidew Nasaret, Beeney fenuwit i Tuluse. Atin i de mékégaif do galbék fénrigoy Tuluse de, been i fégétuwana kome bé i Jesuse, Beeney tidewe dob Tuluse. Atin énggétuwa komén i ni non i kéluhanay de ni, ménrigo dob kérara gome. ²³Enggétigay Tulusey ati mérigowe non bénantak i Tuluse fékéfoén i Jesuse brab nirayén begom atin fénléhu gom fénkélabo bé de tete étew dob kruse. ²⁴Endob i Tuluse ténébuleén i Jesuse brab ténungkasén tidew dob kédawét i kéléhue non énda fo fakayén gétaus méléhu i Jesuse.

²⁵“Loo bé bénréh Dabide bé do gétah fantag bé Jesuse mano, ‘Démoyun gito guy Kadnane dob sékulo kuwe, Beeney dumo guwe dob kuwono kuwe, mélaw énda mélilaku. ²⁶Sabaf bé ni, toow fo fiyoy fédew guwe brab bérhéh kuy kérora guwe. Enda émbukuu bé lowoh guwe non wén i inam gu. ²⁷Non énda tagaké mo Begén dob gonoy de ménléhu. Brab énda fédayaé moy lowoh i fiyowe sugu-sugué mo ké mérénah. ²⁸Ténoroém begén i agéwone dob kényage. Atin sabaf bé Beem i dumo guwe, férorénu.’”

²⁹Fentaus Pedrowey kékéréh ne mano, “Do dumo gu, toow fo bérhéh ku begom i fantage bé katufua tome Dabid. I beene ménléhu brab lénébeng, atin taman béléewe ni ay ni soy lébeng ne. ³⁰Beeney ségétewé sénarigoy Tuluse muret bé kékéréh ne. Atin énggétiga noy fénasad i Tuluse dob beene bé i ségétewé bé de séfuén waléy datu loo bé beene. ³¹Enggétiga Dabide ké ati rigonéy Tuluse, komon énggérého noy fantage bé kétébule Kristowe mano, ‘Enda méntagakén dob gonoy de ménléhu brab énda mérénah i lowoh ne.’ ³²I Jesuse ni fentebule i Tuluse, brab kéluhana key énggégito bé ni. ³³Atin i Abay ne Tulus, féndiyatén i Jesuse mangéy dob kuwono nuwe, sani toowe fo basanan gonon. Atin i Jesuse, éndotén dob Beeney Rémogor i Tuluse loo bé fénasad ne. Mélaw i gito gome brab gélingoo kome bé béniy barakat i Rémogor i Tuluse

nirayén begey.³⁴ I bénréh Dabide, békén fantag bé lowoh ne non énda déményiat i Dabide mangéy dob lawayo, éndob been i ménbéréd mano, ‘Bénréh i Kadnane dob Kadna kuwe mano, sar go fingé dob kuwono kuwe,³⁵ taman tabana kuy de sébanil Beem.’³⁶ Mélaw, i de kéluhana tom do Judio, fatut gétuwa tom i Jesuse ni, sani kénlabo gome dob kruse, féndawét i Tulusey Kristowe Kadnan.” Been i niy bénréh Pedrowe.

³⁷I de étew, amun énggelingoo roy ni, ménbuku i de fédew ro. Atin ménenginsa ro dob Pedrowe brab dob de dumō no apostol maro, “Do dumō gey, ati fatute rigoné key?”

³⁸Atin séménumbul i Pedrowe mano, “I séngae ségétew begom fatut gésénule bé de salaén brab fébautis inok fégito noy kéunur ne bé Jesu Kristowe, inok i de salaén émfésagadan. Tidew béno, i Tuluse irayén i Rémogor ne dob begome.³⁹ Non i ni fasad i Tuluse, katom brab kay de nga tom, brab kay kéluhanay de étew dob de mérayu, non kay kéluhanay fénemili i Kadna tome Tulus munur dob Beene.”

⁴⁰Atin médooy nay bénréh Pedrowe bero fantag bé toowe brab fénfagayu no bero mano, “Sésuway gom bé de tête étew inok énda mékukum gom so.”⁴¹ Atin médooy étewe ménunur bé kékéréd Pedrowe brab ménfébautis ro, brab labi ro télew ngibu ménuman dob de kuyug Jesus bé béno.⁴² Atin sénga téklid fégélingoé roy kétoro i de apostol, atin ménseodor-odor ro maak do sétuwaréy ro. Brab séréngean ro mama brab démasal.

⁴³Atin i de apostol, fénrigoy Tuluse bero do médooy mémégaif galbék, mélaw toow fo mémgaif i kéluhanay de étew.⁴⁴ Atin i kéluhanay de munur bé Jesuse, démoyun ro sélimud atin i kéluhanay de languntama ro séntukid-tukid ro.⁴⁵ Atin fénbéléy roy de fantad ro brab de tamuk ro inok séntukid-tukidé ro loo bé atiy de kailanga ro.⁴⁶ Sénga fuweh sélimud ro dob lawi i Tuluse, brab séréngean ro mama dob de lawi ro. Brab lala ruwe mama, toow ro fo moror brab térifantad.⁴⁷ Sénga téklid dayewé roy Tuluse brab mégédaw i de étew bero. Atin sénga fuweh umanay Kadnane bero bé de mantu ménfukas étew.

I kéuuae bé fikate

3 ¹Wén i no sébaan fuweh, géraraan lémudug i téresange de, sani uras i kédasal i de Judio, i ro Pedrowe brab Juane ménangéy ro dob lawi i Tuluse. ²Dob bengaway lawi i Tuluse féndawét “Fiyo Fintu”, wén i ségétewe lagéy fikat tidew fanay kéumahén. Sénga fuweh uwitéy de dumō no mangéy dob ni bengawan inok mongot limus dob de étew mahur diyo. ³Amun énggito noy ro Pedrowe brab Juane mahur, ménongot limus dob berowe. ⁴Tidew béno, téneqténg ro Pedrowe brab Juaney ni lagéy fikat brab ménbéréd i Pedrowe mano, “Enténgén gey.”

⁵Mélaw ténéngténgén bero, manok iraya ro kurta. ⁶Endob i Pedrowe ni ménbéréh mano, “Enda i kurta gu taloo no bélowan, éndob iray gu beem i wéne dob begéne. Sabaf bé barakat i dawét Jesu Kristowe tidéw Nasaret, bérhéku beem, agéw go!” ⁷Atin génomak Pedrowey kuwonone kémérén brab féntindégén. Sonom bénou, tékow ménbagér i de sékéyén.

⁸Atin méntésongkow témindég brab ménggagéw. Atin ménahur dob lawi i Tuluse bero ro Pedrowe brab Juane, magéw brab sayaw-sayaw brab dayéwé noy Tuluse. ⁹Atin énggitoy kéluhanay de étew i ni lagéy magéw brab dayéwé noy Tuluse. ¹⁰Atin amun énggélolo ron beeney fikate démoyun mésar mongot limus dob “Fiyowe Fintu”, toow ro fo ménggaif bé ni ménrigo dob beene.

¹¹Atin i lala ne géménamak dob ro Pedrowe brab dob Juane dob kuridore féndawét “Kuridor Solomone” ménfégédét lémentu mangéy dob berowey kéluhanay de étew non ménggaif ro bé ni ménrigo. ¹²Amun énggito Pedrowey de étew ni, ménbéréh dob berowe mano, “Do dumo gu do Judio, sedek ménggaif gom bé ni? Sedek téngténgé kom begey loo bé nan? Aw makom ké ménggagéw i ni lagéy sabaf bé barakat geye taloo no sabaf bé fiyowe kékéngintulus gey? ¹³Endob Been i Tuluse féngadafé Abrahame, Isak, brab Jakob, brab de katufua tom, i ménirayane toow fo gérотор barakat dob Jesuse, sénuguén. Endob niray gom dob de gémamak kukuman, brab ménika gom de dob adafa Pilatowe inok kukumé no, fiyon fo ké ménuyot de témangéy. ¹⁴I Jesuse ni métintu brab énda i salaén, éndob ménika gom de brab énda féntangéy gom de. Yamula fentangéy gom uman i ségétéwe étew ménméléhu. ¹⁵Atin fénléhu gom i Jesuse sani miraye bé umule magufusa. Endob ténébule i Tuluse brab énggito gey i ni. ¹⁶Barakat i dawét Jesusey énggféadi-adiwe bé ni lagéy fikat gélo gom. Ménrigoy ni sabaf bé kénur geye bé Jesuse. Been i funa nuwe énggagéw dob téngaanga kome.

¹⁷“Atin béléewe do dumo gu, gétiga ku énda énggétiga kom i rénigo gome brab de odoro tom bé kékéhléhu gome bé Jesuse. ¹⁸Endob bé ni rénigo gom, ténunay Tulusey bénréh i de sénarigo no muret bé kékéhléh ne bé gétaho, bé i Kristowe fatut ferasayén. ¹⁹Mélaw tagak gom i de tete adat gom brab unur gom bé Tuluse inok fésagada no begom bé de sala gom. ²⁰Atin mélaw wén i do gai féfiyonéy Tulusey de fédéw gom. Atin féuwitén i Jesuse mangéy dob begome. Been i Kristowe, sani fénémili ne méguléw begom. ²¹Atin béléewe, i Jesuse batí séna dob lawayo taman bé kégumah i gaiwe féantunéy Tulusey kéluhanane. Been i niy bénréh i de sénarigoy Tuluse muret bé kékéhléh ne bé gétaho. ²²Non i Moisese ménbéréh bé gétaho dob de Judio mano, ‘I Tuluse sémugu moso ségétéw sarigo no loo bé begéne. Been i ségétéwe bé de séfu tom. Unuro kom i kéluhanay bérhé nuwe begom. ²³Atin i kéluhanay étewé énda munur ro de, fégananéy Tuluse bero tidéw dob de étewén, brab binasané no bero.’

Been i niy kékérél Moisese. ²⁴Bénréh i de dumo so sénarigoy Tulusey fantage bé de mérigo bé de ni do gai, tidéw dob Samuele brab dob kéléuhanay de énggétundug dob beene. ²⁵Atin i de fasad i Tuluse bénréh i de sénarigo no bé do gétah, kagom so. Atin kagom soy fasad i Tuluse dob de katufua kom. Non bénréhén dob Abraham mano, ‘Féfiyoné kuy kéléuhanay étewe dob duniyae fénagéw dob de séfuém.’ ²⁶Komon amun fén-uwit i Tulusey Kristowe, sénuguén sungu mangéy dob betome do Judio inok féfiyoné no betom bé kékésénule ne betom bé de tete rigoné tom.” Been i niy kékérél Pedrowe.

I Pedrowe brab Juane dob adafay de kéfédewan

4 ¹Amun émbérél sénay ro Pedrowe brab Juane dob de étew, énggégumah i de fadi, brab kafitay de mantay bé lawi i Tuluse, brab de Saduseo sani de étew énda munur ro bé kétébulee. ²Atin ménkérít ro non téménoro i ro Pedrowe brab Juane dob de étew bé i Jesuse méntébule. Mélaw fénggito ro wén i kétébule. ³Mélaw kénéfo ro bero, atin non sémingkufén bé bénou, fénrisu ro bero taman bé démoe de. ⁴Endob médooy ménunure bé de étew énggégélingo bé kékérél Pedrowe, atin i de munur énggégumah limo ngibuy kédooy de lagéy de saliyu na bé de libun de.

⁵Amun bé démoe de, ménsélimud dob Jerusalem i de odoroy de Judio brab de lukés bero brab de témo ro kukuman. ⁶Bero soy gérotore fadi féndawét Anas, brab Kaifas, brab Juan, brab Alejandro brab kéléuhanay samung i ni gérotor fadi. ⁷Atin féntindég roy de ruwo ni gétew apostol dob adafa ruwe brab fénenginsaa ro bero maro, “Ati gefee bé barakate brab ati gefee bé dawéte fénggérigo gom bé ni?”

⁸Tidéw bénou, fénémanduoy Rémogor i Tulusey Pedrowe atin mélaw séménumbul mano, “Do odoro key brab do lukés gey. ⁹Amuk fénenginsaa kom begey fantag bé fiyowe rénigo gey dob ni lagéy fikat brab ati kéféadi-adi geye de, ¹⁰fégétiga ku dob kéléuhana kome brab dob kéléuhanay de Judio. I funay ni lagéy téménindég dob adafa kome ménadi-adi, non bé barakat i dawét Jesu Kristowe tidéw Nasaret. Been i fénléhu gome dob kruse éndob ténebule i Tuluse. ¹¹Wén i ménsulate fantag bé Jesuse dob Ménsulate Kékérél i Tuluse mano, ‘I batéwe nikaa kom do rémigo lawi, been i ménwaléye toow fo mélaga batéw.’ I Jesuse, Been i nan batéw nikaa kom. ¹²Been saén i Mémukase,” bang Pedrowe, “non énda i ségiyo dob duniyae ni géfukas bé étewe.”

¹³Toow fo ménggaif i de odoroy de Judio bé kékérél Pedrowe brab Juane muret. Ménlabi na foy kégaij ruwe non énggétuwa roy énda i féngganad ro Pedrowe brab Juane. Atin mélaw énggélolo ro soy beroy de dumo Jesus. ¹⁴Endob énda i gébérého ro, non énggito roy lagéye ni fikat ménadi-adi téménindég dob sékulo Pedrowe brab Juane. ¹⁵Mélaw

fénsut ro bero tidéw dob sénlimudo ruwe sibéy. Tidéw béo ménsébéréh-béréh ro maro,¹⁶ “Ati kérigo tome bé de ni étew? Non kéluhanay de étew ni dob Jerusaleme ni, énggétiga roy mékégaife ni rénigo ro. Mélaw énda gédirungo tom de.¹⁷ Endob géléé tom saén bero bé éndaén bérhéh roy fantage bé Jesuse inok énda métarakén.”

¹⁸ Mélaw ténawag ro man bero mahur brab bénrého ro bero bé békénén bérhéh roy fantage bé Jesuse taloo no téromo ro labité roy dawét ne.

¹⁹ Endob i Pedrowe brab Juane séménumbul ro maro, “Fégitung gom ké ati isuwe métintu dob adafay Tuluse, odoro key i kagome sugu loo ké odoro key i sugu i Tuluse.²⁰ Non énda fakayén témérén gey muret fantag bé énggito geye brab bé énggélingoo keye.”²¹ Endob i de odoron toow na fo féningkél roy kégélé ruwe bero bé békénén ureté roy fantage bé Jesuse. Tidéw béo, ténangéy ro bero. Enda géodusana ro bero non bé kédooy de étew démayéw bé Tuluse sabaf bé mékégaife rénigo ro.²² Non i lagéye ni fén-adi-adi ro fotén folo gébélantuwa i idad ne, brab fikatén tidéw fanay kéumahén.

²³ Amun méntangéyén i ro Pedrowe brab Juane, ménule ro mangéy dob de dumo ro munur bé Jesu Kristowe. Atin nuret roy kékéréh i odoroy de fadi brab de odoroy de Judio.²⁴ Amun énggélingoo roy ni, ménséréngan ro démasal dob Tuluso maro, “Kadnan, Beemey léménimbage bé lawaye brab fantade brab dogote brab kéluhanay éntingayéne.²⁵ Fénbéréh i Rémogor me bé katufua keye Dabid sugu-sugué mo mano, ‘Sedek ménkérít i de étew békén Judio? Brab sedek bantakéy de étew i éndae gérigono ro dob Tuluse?’²⁶ I de datu téménafay ro brab de méguléw dob duniyae ni ménsélimud ro inok sébanil ro bé Kadnane brab Kristowe fénuitén.’ Been i niy sénulat Dabide.”

²⁷ Atin féntaus roy kédasal ruwe maro, “Méntuman i Ménsulate Kékéréhém non ménsélimud i ro Herode brab Ponsio Pilatowe dob ni ingéd beroy de étew békén Judio brab de dumo gey Judio. Ménsélimud ro sébanil bé Jesuse sani fiyowe sugu-sugué mo fénémiliém méguléw.²⁸ Ménsélimud ro rémigo bé kéluhanay éntingayéne fatut mérigo dob kaame kétayan brab dob barakat me mérigo.²⁹ Atin bé béní Kadnan, fégitungém i de tete kékérého ro begey brab tabanga mo begey do sugu-sugué mo inok émbaraw gey muret bé kékéréh me.³⁰ Brab féuwitém i barakat me émféadi-adi brab émférigo begey bé de mékégaif dob dawét i fiyowe sugu-sugué mo Jesus.”

³¹ Amun énggilid ron démasal, ménkuyung i lawie sénlimudo ro brab fénémanduoy Rémogor i Tuluse bero. Tidéw béo, ménbaraw ron muret bé kékéréh i Tuluse.

Séntukid-tukid roy de languntama ro

³² Atin i kéluhanay de munur bé Kristowe, ségiléw i de fédéw ro brab itunga ro. Atin énda i isu bero gefe bé de languntama ro, éndob falan

karo kéluhanan non séntukid-tukid ro. ³³Atin wén i barakat i de apostol féntaus roy kéuret ruwe fantag bé kétébule i Kadnane Jesus. Brab i Tuluse toow fo mégédaw bero. ³⁴Atin énda i ségétew bero wén i kulang bé kéfaguyag ne non fébéléy roy de fantad ro taloo no do lawi ro atin i kurtae gédoté ro, ³⁵iray ro dob de apostol. Atin saaré roy kurtae dob katabuwane kailangay kéluhanane.

³⁶ Atin wén i ségétewe bero féndawét Jose. Beeney ségétewe tidéw Siprus brab séfu i Lebitawe. Féndawét i de apostol so “Bernabe”. (I atag i ni “Ségétew émféfiyo fédéw”.) ³⁷Fénbéléyén i fantad ne atin nirayén dob de apostol i kurtae de.

Ananias brab Safira

5 ¹Wén i ségétewe lagéy féndawét Ananias, beroy bawag ne féndawét Safira, fénbéléy roy dumoy fantad ruwe. ²Endob nitongén i dumoy kurtae brab ménagayun soy bawag ne de. Atin nirayén i sama i kurtae dob de apostol. Endob bénréhén bé nirayén i kéluhanane. ³Mélaw bénréh Pedrowe dob beene mano, “Ananias, sedek féndayaém i Satanase mémanduon beem? Non téménugi go dob Rémogor i Tuluse, non nitongém i dumoy kurtae énggédotém bé fénbéléy me fantad. ⁴Amun énda séna fénbéléyém i fantad me, beem i gefee de. Atin amun fénbéléy mon, kaam soy kurtae de. Endob sedek bénantakém rénigoy ni? Békén téménugi go dob étewe, yamula dob Tuluse téménugi go!” ⁵Amun énggélingoo Ananiasey ni, méntuwar brab ménléhu. Atin i kéluhanay de énggégélingo fantag bé ni, toow ro fo ménggilak. ⁶Atin ménahur i de kénogo lagéy brab éndot roy bangkay ne brab bénauz ro atin nangéy ro lénébéng.

⁷Amun ménifus i téléwe géuras, énggumah i bawag ne, éndob énda séna énggétiga noy ati ménrigowe. ⁸Tidéw bénou, fénénginsaa Pedrowe mano, “Béréhém begén, aw been say niy kurtae énggédot i fantad gome?”

Atin séménumbul mano, “Hoo, been say nan.”

⁹Mélaw bénréh Pedrowe de mano, “Sedek ténéngkad gom i Rémogor i Tuluse? I bawag me mantu séna ménléhu atin i de ménangéy de lémbéng, ay nan ron dob liyuwan, brab i beeme témundug so.” ¹⁰Sonom bénou, méntuwar so brab ménléhu dob adafa Pedrowe. Amun ménahur i de kénogo lagéy, énggitro ménléhuén. Mélaw nangéy ro so lénébéng dob doror i bawag ne. ¹¹Atin toow fo méngkégilakan i kéluhanay de munur bé Kristowe, loo soy de kéluhanay de ségiyo étew énggégélingo bé ni.

Médooy de mékégaif

¹²Atin i de apostol, médooy de mékégaif rénigo ro énggitoy de étew. Brab i kéluhanay de munur bé Kristowe ménslimud ro diyo dob “Kuridor Solomone” dob lawi i Tuluse. ¹³Enda i ségétew ménamung bé de énda

munur bé Kristowe, fiyon fo ké fiyoy kékéréréh i de étew fantag bé de munur. ¹⁴ Endob minut médooy de étew do lagéy brab do libun munur bé Kadnane. ¹⁵ Atin ménbantug i de mékégaif rénígoy de apostol. Mélaw nuwit i de étew dob de aguwon i de démeruu. Féniro ro bero dob de katri brab dob de bénékah ikam inok buluk témara i Pedrowe, gébela i anlung ne dob berowe. ¹⁶ Atin énggumah soy médoowe étew tidéw dob de kloh ingéd géliwét dob Jerusalem. Brab nuwit roy de démeruu bero brab de étew rénahukoy de saitan. Atin kéluhana ro ménadi-adi.

I kérasay i de apostol

¹⁷ Tidéw béno, i gérotore fadi brab de dumo no sani de Saduseo, ménadaléw ro bé de apostol. Mélaw ménséfagayun ro bé rigoné ruwe. ¹⁸ Atin kénéfo roy de apostol brab fénrisu ro bero. ¹⁹ Endob bé béno kélungonon, nungka i télaiki Kadnaney de bengaway férisunone. Tidéw béno nuvitén bero mésut brab bénréhén mano, ²⁰ “Taus gom dob lawi i Tuluse brab uret gom dob de étew i fantage bé ni mantu umul.” ²¹ Tidéw béno, nodoroy de apostol i bénréh i télaikiwe ni. Mélaw amun géfuwénén, ménahur ro dob lawi i Tuluse brab téménoro ro.

Atin i gérotore fadi brab de dumo no, ténawag roy de odoroy de Judio inok sélimud i de kéfédéway de Judio. Tidéw béno, séménugu ro mangéy dob férisunone inok uwité roy de apostol mangéy dob adafa ruwe. ²² Endob amun énggumah i de sénugu dob férisunone, énda énggito roy de apostol. Mélaw ménséfule ro mangéy dob de kéfédewan do ménlimud brab nuret ro maro, ²³ “Amun énggégumah gey dob férisunone, énggito gey i de bengawan do ménkandado brab diyo soy de guwardiya mantay dob liyuwe. Endob amun nungka gey, énda i énggito gey étew dob rahure.” ²⁴ Mélaw i de odoroy de fadi brab kafitane odoroy de guwardiya bé lawi i Tuluse, amun énggelingoo roy ni, toow ro fo ménggaif. Atin fégítungé roy ati énggérigonoy de apostol. ²⁵ Tidéw béno, wén i énggégumahe ménlolok dob berowe mano, “I de lagéy do fénrisu gom, diyo ro téromo bé de étew dob lawi i Tuluse.” ²⁶ Mélaw ménangéy i kafitane dob lawi i Tuluse beroy de guwardiya no. Atin kénéfo roy de apostol brab nuwit ro séfule. Endob énda féndawéto ro bero non mégilak ro bé de étew diyo ké ibéro ro bero batéw inok féléhué ro bero.

²⁷ Nuwit roy de apostol mangéy dob adafay de ménlimud do odoron. Atin i gérotore fadi ménbéréréh dob bero mano, ²⁸ “Génlé geyén begom bé kagomén téromo fantag bé Jesuse, éndob énda nodoro kom de. Téngténg gom, ménlégébén dob Jerusaleme niy kétoro gome, atin bénréh gom, begey i ménmélhue bé Jesuse.”

²⁹ Endob séménumbul i Pedrowe brab de dumo no do apostol maro, “Fatut odoro key i Tuluse, békén étew. ³⁰ Amun énggilid gomén fénléhu i Jesuse bé kékélabo gome de dob kruse, i Tulus i de katufua tom i

ménfétébulee de. ³¹ Atin féndiyat i Tuluse mangéy dob kuwono nuwe inok Been i Méguléwe brab Mémukase. Mélaw Been i émfésagade bé de sala tom do Judio amuk gésénule tom. ³² Géureto key i de ni non énggito gey, loo soy Rémogor i Tuluse muret, sani Rémogore iray i Tuluse dob de étew munur dob Beene.”

³³ Atin i de odoron ni ménlimud, amun énggelingoo roy ni, toow ro fo ménkérít brab ménuyot ro ké féléhuén i de apostol ni. ³⁴ Endob i ségetéwe bé de Fariseo féndawét Gamaliel téménindég dob kérara ruwe ménlimud. Beeney témoree bé kitabe brab toow fo fégadatay de étew. Atin fénfésutén i de apostol. ³⁵ Tidéw béno ménbérél mano, “Do dumogu do Judio, ingata kom ké ati kérigo gome bé de ni do étew. ³⁶ Bé do gétah wén i ségetéwe étew féndawét Teudas, ménbérél been kun i toowe ménbantug gérotor étew. Atin fot ratuh gétew i ménwaléye kuyugén. Endob wén i ménméléhu de atin i de kuyugén ménbéragar ro brab énda i énggérígono ro. ³⁷ Tidéw béno, dob de gaiy késinsuse bé émfélistay kéluhanay de étew, énggumah man i ségetéwe étew féndawét Judas tidéw Galilea. Atin médooy soy ménwaléye kuyugén. Endob amun fénléhu soy Judase, ménbéragar soy de kuyugén. ³⁸ Ségiléw so keeyén bé kéléhu Jesuse. Mélaw bérhé ku begom, katom kémukum brab fédayaé tomén i de ni do étew. Non amuk aturay kéilawane saén, énda soy gérígono ro brab énda i rugaya ro. ³⁹ Endob amuk aturay Tuluse, énda gégéleo tom bero, non waléy tom saén sébanil bé Tuluse.”

Atin i de ménlimud do kéfédewan, ménagayun ro bé bénréh Gamaliele ni. ⁴⁰ Tidéw béno, fénahur ron man i de apostol brab féntafés ro bero. Atin génlé ron man bero bé békénén muret ro fantag bé Jesuse. Tidéw béno, ténangéy ro bero. ⁴¹ I de apostol amun ménuts ron tidéw dob de ménlimud do odoron, toow ro fo ménoror non kénarang i Tuluse médait ro kéfasangan brab kémalanen sabaf bé kéunur ruwe bé Jesu Kristowe. ⁴² Atin sénga fuweh ménangéy ro dob lawi i Tuluse brab dob de lawi i de étew. Atin diyo ro témore bér Fiyowe Uret fantag bé Jesu Kristowe.

I de fitéw gétew do témbang

6 ¹ Bé do no do gai, amun minutén médooy de munur bé Kristowe, wén i de tete kégébaa no bé de munur do Judio do sébérél Griego dob de munur do Judio do sébérél Hebreo. Ménbérél i de Judio do sébérél Griego bé émfédaya kun i de baléw bero, énda méirayan ro bé de kailanga ro sénga fuweh. ² Mélaw i de folo bra ruwo gétew do apostol ténimu roy kéluhanay de munur bé Kristowe brab bénréh ro dob berowe maro, “Enda fiyo no ké begey i sémaare bé de kailanga kom sénga fuweh, non fatut gey démoyun muret bé kébérél i Tuluse, brab énda fatut diguré key i galbék geye. ³ Mélaw do dumogu gey, fémili gom fitéw gétew lagéy, do météldtéed brab fémantuoy Rémogor i Tuluse. Atin iray gey beroy

aturane bé de ni, ⁴inok i begeye do apostol fakay gey démasal brab muret fantag bé Tuluse sénga tékélid.”

⁵ Atin ménagayun i kéluhana ruwe bé bénréh i de apostol ni. Mélaw fénemili roy Estebane, ségétew méégét i kéunur ne brab fémanduoys Rémogor i Tuluse. Fénemili ro soy ro Filipihe, Prokoro, Nikanor, Timon, Parmenas, brab Nikolas tidéw Antiokia ségétew békén Judio, éndob ménrugayén i kéunur ne bé kukumay de Judio. ⁶ Atin nuwit ro bero mangéy dob de apostol. Tidéw bénou, ténégéy de apostol i de bumbuna ro bé kéadasala ruwe bero inok tabangay Tuluse bero bé mantuwe ni aturan.

⁷ Atin mélaw ménlégébén i urete fantag bé Tuluse. Atin minut médooy munure bé Kristowe dob Jerusalem. Atin médoonén i de fadi mésaganay so munur.

I kékéfoe bé Estebane

⁸ Atin i Estebane toow fo fénfiyoy Tuluse inok wén i barakatén rémigo do mémégaif dob téngaangay de étew. ⁹ Endob wén i de étew ménisébanil bé Estebane. Beroy de étew dob simbaane féndawé “Méntangéy étew”. I de dumo bero do Judio tidéw Siren, brab tidéw Alejandria, I de ni do étew beroy de dumoy de Judio tidéw. Silika brab Asia, ménnganay ro séédél bé Estebane. ¹⁰ Endob toow fo fénggétigay Rémogor i Tulusey Estebane émbéréh. Mélaw énda i ségétew gésumbul bero. ¹¹ Mélaw niraya ro kurta i de étew inok bérhéroy éndae toow fantag bé Estebane maro, “Enggélingoo key i ni étew ménbérhé tete fantag bé Moisese brab Tuluse.” ¹² Mélaw fénkérit roy de étew brab de odoroy de Judio brab de témoreo kitab. Atin kénéfo roy Estebane brab nuwit ro dob adafay de ménlimud do kéfédewan. ¹³ Tidéw bénou, nuwit roy de étew émbéréh bé éndae toow fantag bé Estebane maro, “I Estebane ni démoyun émbéréh tete fantag bé méméfuwe lawi i Tuluse brab de kukuman sénulat Moisese. ¹⁴ Enggélingoo key bénréhén bé i Jesuse tidéw Nasaret, gébaé no kun i lawi i Tuluse brab fégaliné noy adate énggégéganada tom tidéw dob Moisese.” ¹⁵ Tidéw bénou, ténéngténg i kéluhanay de odoron i Estebane. Atin énggito roy rangih ne maak falas télaki.

I kéuret Estebane

7 ¹ Mélaw i gérotore fadi fénenginsaa noy Estebane mano, “Aw toow i de ni?”

² Atin séménumbul i Estebane mano, “Do dumo gu brab do lukés gu, fégélingo gom i bérhékuwe ni. I toowe fo ménbantug barakatan Tulus méméfégito dob katufua tome Abraham amun baté de séna dob Mesopotamia, bé énda séna ménagéwén de mangéy Haran. ³ Atin bénréhén de mano, ‘Tagakém i de samungém brab ingéd me atin agéw go mangéy dob gonone toroé ku beem.’ ⁴ Mélaw ténagakén i ingéd ne Kaldeo

brab ménagéw mangéy Haran, atin diyo ménbati. Atin amun ménléhu i boh Abrahame, fénagéw i Tuluse man mangéy dob ni ingéd gono kom bati béléewe ni. ⁵Bé do no do gai, énda nirayay Tulusey Abrahame fantad fiyon kloh. Endob fénasad i Tuluse dob Abrahame bé irayén dey ni fantad brab dob de séfuén témundug de, fiyon fo ké énda sénay nga Abrahame de. ⁶Ay niy bénréh i Tuluse bé Abrahame mano, ‘I de séfuém bati ro dob ségiyowe ingéd toow fo mérayu atin waléy ro do rifén diyo. Atin mérasay ro taman fot ratuh gébélintuwa. ⁷Endob kukumé kuy de étew rémifén bero. Atin i de séfuém tékédan ro dob nan ingéd atin féngadafé ro Begén dob ni gonon.’ Been i niy bénréh i Tuluse.” ⁸Atin fénauts Estebaney kékéréh ne mano, “Tidéw béno, sénugu i Tuluse dob Abrahamey ni adat sani kétulie inok wén i tanda bé ni fasad. Mélaw ténuli Abrahamey nga ne Isak amun ménwaléwén gétérésangan ménumlah. Atin i Isake ténulién soy nga ne Jakob. Atin i Jakobe ténulién soy de folo bra ruwo gétew ngaén. Atin beroy de katufua tom do Judio.

⁹“Endob i de nga Jakob ménDALÉW ro bé tuwaréy ruwe féndawét Jose. Mélaw fénbéléy ro atin ménwaléy rifén dob ingéde Egipto. Endob Tulus i dumo nuwe. ¹⁰Atin ténabangay Tuluse inok énda i sug-sugén fiyon fo ké médooy kérégénone. Atin amun diyo i Josehe dob adafay datue dob Egipto, fénfiyoy Tuluse brab niraya no kégétawan. Mélaw ménuyot i datue de. Tidéw béno fénwaléy i datuey Josehe odoron dob no ingéd brab beene soy odorone dob lawi i datue ni. ¹¹Tidéw béno, énggumah i dakéle lénggob dob ingéde Egipto brab dob Kanaan. Atin toow ro fo ménrasay. Atin i de katufua tom énda i amaé ro. ¹²Mélaw amun énggélingoo Jakobe wén i faréy dob Egipto, sénuguén i de ngaén, sani de katufua tom mangéy diyo bé gésungu nuwe. ¹³Dob gérubo nuwe gule ménangéy ro diyo, méntéfégéloy Josehe dob de dumo no sétiman boh. Atin énggétuway datuey fantage bé de samung Jose. ¹⁴Mélaw fénSamfay Josehey kékéréh ne bé féangéyén i boh ne Jakob brab kéluhanay de samungén. Atin fitew ro folo bra limo kéluhanan. ¹⁵Tidéw béno, ménagéw i ro Jakobe mangéy Egipto. Atin diyo ménléhu loo soy de ségiyo katufua tom. ¹⁶Atin nuwit i de bangkay ro mangéy Sekem, atin lénébéng ro dob lébéngone bénléy Abrahame dob de étew Hamor.”

¹⁷Atin fénauts Estebaney kékéréh ne mano, “Amun gédétén i gaiwe métuman i fasad i Tuluse dob Abrahame, toowén fo médooy de Judio dob Egipto. ¹⁸Atin bé béno, ségiyonén i datue dob Egipto, atin énda énggétiga noy fantage bé Josehe. ¹⁹Enda fo fiyoy ni datu. Fénggakara noy de katufua tom. Atin fénrasayén fo bero toow. Non fénégésén i de katufua tom bé ibéré roy de nga ro inok méléhu. ²⁰Atin bé no do gai, ménumlah i Moisese, toow fo fiyo nga. Rénitoy idéng ne sungu dob lawi ruwe taman télén gétérésang kélunganon. ²¹Amun fénliyu roy ngae dob lawie, éndot i libune nga i datue dob Egipto. Atin fénagifatén maak kaan so nga. ²²Mélaw

méntoro i Moisese bé kéluhanay kégétuwane dob Egipto. Atin ménwaléy énggétigan étew dob de kékérén brab dob de rigoné no.

²³“Amun fotén folo gébélantuwa i Moisese, ménuyot témukaw bé de dumo no do Judio. ²⁴Atin amun énggumah dob de dumo no, énggito noy kédusay ségétewe tidew Egipto bé dumo nuwe Judio. Mélaw téna bangén i dumo nuwe ni Judio brab séménuli fénléhuén i étew tidew Egipto.

²⁵Brab mano ké i de dumo no do Judio énggésobuto roy been i usaréy Tuluse témabang bero inok métangéy ro. Endob énda énggésobuto ro de.

²⁶Bé gétunduge de fuweh, énggito noy ruwowe gétew Judio sétiboh. Atin génléén bero mano, ‘Kagom sétiboh! Ségiléw gom falan Judio.’ ²⁷Endob i ségétewe de ferasayé noy dumo nuwe ni, dénién i Moisese brab ménbérén mano, ‘Békén beem i odoro keye taloo no kékédéwa key. ²⁸Aw méuyot go méméléhu begén loo bé kékéléhu me bé ségétewe tidew Egipto natémégéno?’ ²⁹Amun énggelingoo Moisesey ni, ménraréy tidew Egipto brab ménangéy bati dob ingéde féndawét Madian. Atin diyo énggébawag brab wén i ngaén ruwo gétew lagéy.”

³⁰Atin féntaus Estebaney kékérén ne mano, “Amun ménifus i fote folo gébélantuwa, méntefégitó dob Moisesey télakiwe dob mérinoe kayéw dob gonone énda i étew de bati, gédét dob tuduke féndawét Sinai. ³¹Toow fo ménggaif i Moisese bé ni énggito no. Atin amun ménfégédét inok gito no fo toow, énggelingoo noy bérén i Kadnane mano, ³²‘Begéney Tuluse fénengadaf i de katufua kom, ro Abraham, Isak, brab Jakob.’ Atin i Moisese léménukub bé kégilak ne brab éndaén géténgténgó no de. ³³Atin ménbérén man i Kadnane mano, ‘Kéda moy sinilas me non i gono muwe témidég mékétéfu fantad. ³⁴Enggito guy kékérasaye bé de étew gu dob Egipto. Brab énggelingoo kuy de dogés ro. Mélaw ménlusu inok fétangéy gu bero. Atin béléewe, sugué ku beem magéw mangéy Egipto.’”

³⁵Atin féntaus Estebaney kékérén ne mano, “Nikaay de dumo no Judioy Moisese bé kékérén ruwe maro, ‘Békén beem i odoro key taloo no kékédéwa key!’ Endob beeney sénugu i Tuluse méguléw bero brab émfétangéyé bero. Atin i télakiwe méntefégitó dob beene dob mérinoe kayéw i témenabangane de. ³⁶Atin fénanangguvitén i de étew mésut tidew Egipto. Rénigo noy de mékégaif dob Egipto brab dob dogote féndawét ‘Furo Dogot’ brab dob gonone énda i bati diyo amun ménagéw ro diyo bé fote folo gébélantuwa. ³⁷Atin i Moisesey ménbérén dob de Judio mano, ‘Emféuwit i Tuluse mangéy dob begome ségétew sarigo no muret bé kékérén ne ségiléw bé kékéuwit ne begén. Been soy ségétewe bé de séfu Israele.’”

³⁸Atin féntaus Estebaney kékérén ne mano, “Moisesey dumoy de Judio ménslimud dob gonone énda i ségétew étew bati diyo, bero soy de katufua tom brab télakiwe ménslérén de dob tuduke Sinai. Brab beeney énggégédote bé kékérén i Tuluse inok irayén so dob betome. I kékérén i Tuluse ni énda mékéda no taman sa taman.

³⁹“Endob i de katufua tom énda ménodor ro bé de sugu Moises. Yamula ménika ro de brab ménuyot ro séfule mangéy Egipto. ⁴⁰Mélaw bénréh ro dob Arone sani ofo Moisese maro, ‘Rigo go do kéninontow inok wén i féngadafé key, brab inok wén i manangguwit betom. Non énda gétiga key ké ati énggérígono Moisese sani ménanangguwite betom tidéw Egipto.’”

⁴¹Atin fentaus Estebaney kékéréh ne mano, “Bé no do gai réménigo ro kéninontow maak falas nati safi. Atin téménulak ro dob adafa nuwe brab kénandulio ro inok fégito roy kéroror ruwe bé ni rénigo ro. ⁴²Endob sabaf bé ni, téngak i Tuluse bero brab féndayaén bero méngadaf bé de giton dob lawayo loo bé sénulat i sénarigoy Tuluse féndawét Amos mano, ‘Do étew Judio, békén Begén i ténulaka kome dob gonone énda i ségettew de bati bé lala i kédiyo gome bé ménfote folo gébélantuwa. Yamula ségiyoy fénengadaf gome. ⁴³Non nuvit gom i batioy sébaane tulus féndawét Molok brab sébaane kéninontow maak giton tulus féndawét Renfan. Do kéninontow i fénengadaf gome, mélaw féangeyé ku begom fingé na diyo bé ingéde Babilonia.’”

⁴⁴Atin fentaus Estebaney kékéréh ne mano, “I de katufua tom wénén i ginise lawi sani tandaé énda tagakéy Tuluse bero. Nuwit ro amun ménagéw ro dob gonone énda i étew de bati. Rénigo roy ni loo bé bénréh i Tuluse bé Moisese, ségiléw bé fénggitoy Tuluse de. ⁴⁵Amun ménifus i firoye gébélantuwa, i de katufua tom énggédot roy ni tidéw dob de lukés ro. Atin i de katufua tom nuwit ro dob de ingéd ténaba ro bé gaiy kédédél i Tuluse bé de étew mésut dob do no gonon inok wén i batioy de Judio. Atin i odoro ruwey lagéye féndawét Josue. Atin fénbati roy lawi i Tuluse diyo taman bé gai Datu Dabide. ⁴⁶Toow fo ménswat i Tuluse bé Dabide. Atin nongotén dob Tuluse inok tungkasé no rémigo bé lawi i Tuluse, sani Tuluse fénengadaf Jakobe. ⁴⁷Endob i nga Datu Dabide féndawét Solomon i réménigowe bé nan lawi.

⁴⁸“Endob bérhéh ku begom, i toowe fo gérotor Tulus énda batien dob de lawi rénigoy kélawane. Non bénréh i ségettew sénarigoy Tuluse féndawét Isias mano, ⁴⁹‘Bang i Tuluse, laway i sara kuwe, atin i duniyaey ténaa kuwe bé de sékéy gu. Enda i lawi gérígono kom inok batio ku taloo no téreño ku. ⁵⁰Békén ba Begén i réménigowe bé kéluhanay étingayéne?’”

⁵¹Atin fentaus Estebaney kékéréh ne mano, “Toow fo métégas i de uléw gom! Enda séna fo ménfégalin i de fédew gom loo bé kétayay Tuluse. Brab toow gom fo do énda mégélingo bé kékéréh i Tuluse. Ségiléw gom so bé de katufua kom non atuho kom i Rémodor i Tuluse sénga tékélid. ⁵²I de katufua kom fénrasay roy kéluhanay de sénarigoy Tuluse muret bé kékéréh ne bé do gétah. Fénléhu roy de sénugu i Tuluse muret fantag bé Kristowe sani métintuwe fo Sugu-suguéy Tuluse. Atin i begome, kénéfo

gom brab fénléhu gom i Kristowe. ⁵³Enggétanggafa kom i de kukuman féniray i Tuluse bé de télaki, éndob énda nodoro kom de.” Been i niy bénréh Estebane.

I kéféléhue bé Estebane

⁵⁴Amun énggélingooy de odoron i kékéréh Estebane, toow ro fo ménkérít. Kémigét i de kifé ro bé kékérít ruwe. ⁵⁵Endob i Estebane toow fo fénémanduoy Rémogor i Tuluse, brab léménengag dob lawayo, atin énggito noy kéréndaw i Tuluse brab énggito noy Jesuse témindég dob kuwonoy Tuluse. ⁵⁶Atin ménbéréh i Estebane mano, “Téngténg gom! Enggito guy lawayo ménungka, brab i Nga i Kéilawane témindég fingé dob kuwonoy Tuluse.”

⁵⁷Toow fo ménkérít i de odoron ni, mélaw néféng roy de kélingo ro brab ménékes ro. Atin sénréngana roy magayase de gémamak. ⁵⁸Atin séngguyud ro mésut dob ingéde ni brab nibéro ro batéw. Atin i de témebo de, kénda roy de gérubo lafin bé de kégal ro, atin fénled ro dob kénogo lagéye féndawét Saulo. ⁵⁹Atin i lala ruwe mibéron batéw bé Estebane, déménasal dob Kadnane mano, “O Kadnan Jesus, tanggafém i rémogor guwe!” ⁶⁰Atin ménlingkuwéd brab ménbéréh métanug mano, “Kadnan, fésagadém i ni sala ro.” Sonom béno, ménléhu.

I kérasay i de munur

8 ¹⁻²Atin i Saulowe ménagayun bé kéféléhue bé Estebane. Atin i Estebane, lénébéng i de étew munur bé Kristowe brab toow fo rénuung ro. Atin méntidéwén bé no térésang i kékérasayay de munur bé Kristowe. Brab kéluhana ro, saliyu bé de apostol, ménbéragar ro tidéw Jerusalem mangéy Judia brab Samaria.

³Atin i Saulowe ténulama no binasanén i kéféngintulus i de munur bé Kristowe, ahuro noy séngae lawi brab kéfoé no séguyudén i de étew munur bé Kristowe. Brab uwité no bero dob férisunone, do lagéy brab do libun.

I kélégéb i Fiyowe Uret dob Samaria

⁴Atin amun ménbéragar i de étew munur bé Kristowe dob de ségiyo ingéd, nuret roy fantage bé Jesuse. ⁵Atin i Filipiwe ménangéy dob sébaane ingéd diyo dob Samaria, atin diyo nureténi Jesuse Been i Kristowe sani fénémili i Tuluse méguléw. ⁶I de étew, amun énggélingoo roy kékéréh ne brab énggito roy kéluhanay de mékégaif rénigo no, toow fo fénggélingo roy kékéréh Filipihe. ⁷Fénféraréyén i de saitan réménahuk dob de médoou étew, atin ménékes ro bé lala ruwe tékédan. Brab fén-adi-adi noy médoowe do fikat brab do kimoyén. ⁸Mélaw toow fo ménoror i de étew dob no ingéd.

⁹ Wén i ségétewe lagéy dob no ingéd féndawét Simon, ségétew béliyan. Bé de énggétah do gai, fénggaifén i médoowe do étew dob Samaria bé de tete kéfagakarén. Ménfébantug-bantug bé beene kun i gérotore étew. ¹⁰ Atin i kéluhanay de étew dob no ingéd do méskinan brab do kawasa, fénggélingo ro. Bénréh ro maro “I ni étew féndawét Ménfantug Barakatan, sani barakat i Tuluse.” ¹¹ Ménrugay i kéfegaif ne bero bé de tete kéfagakarén. Mélaw toow ro fo fénggélingo. ¹² Endob amun énggélingooy de étew i Fiyowe Uret nuret Filipiwe fantag bé kéféguléw i Tuluse brab Jesu Kristowe, ménunur ro brab ménfábautis ro, do lagéy brab do libun. ¹³ Atin fiyon i Simone ménunur so bé Kristowe. Brab amun ménbautisén, démoyun ménodor bé Filipiwe. Atin toow fo ménggaif i Simone bé de énggito no rénigo Filipiwe.

¹⁴ Amun énggélingooy de apostol dob Jerusalem i kétayakuf i de étew dob Samaria bé kékérén i Tuluse, fenuwit roy ro Pedrowe brab Juane mangéy diyo. ¹⁵ Amun énggégumah ro diyo, dénasala roy de étew munur bé Kristowe inok tayakufé roy Rémogor i Tuluse. ¹⁶ Non i Rémogor i Tuluse, énda séna énggumahén dob berowe fiyon ségétew. Ménbautison ro saén inok fégito roy kéunur ruwe bé Kadnane Jesus. ¹⁷ Tidéw béno, ténégé Pedrowe brab Juaney de bumbuna ro. Atin ténanggaf roy Rémogor i Tuluse.

¹⁸ Atin énggitoy béliyané ni Simon i kétanggaf ruwe bé Rémogor i Tuluse bé kétégéy de apostol bero. Mélaw bénréhén dob Pedrowe brab Juane bé iraya no bero kurta. ¹⁹ Brab bénréhén mano, “Irayanu so bé ni barakat inok amuk wén i tégné ku, gétanggaf so bé Rémogor i Tuluse.”

²⁰ Endob séménumbul i Pedrowe mano, “Mékukum go damén begom i kurta me, non mamo ké gébéléyo mo bé kurtaey niray i Tuluse. ²¹ Enda fakay go mamung bé galbék geye non énda séna métintuy fédew me dob adafay Tuluse. ²² Fatut go gésénule bé ni tete kéfítungém brab dasal go dob Kadnane inok fésagada no beem bé ni salaém. ²³ Non énggito guy toow fo mésina go brab bénlanggu i salae beem.”

²⁴ Tidéw béno, séménumbul i Simone mano, “Dasala kom begén dob Kadnane inok énda i métuman damén bé de bénréh gom dob begéne.”

²⁵ Atin i ro Pedrowe brab Juane, amun énggilid ron muret bé gétiga ruwe fantag bé Kristowe, brab bénréh roy kékérén i Kadnane, ménfáule ro mangéy Jerusalem. Bé késfule ruwe, ménawét ro dob médoowe do ingéd dob Samaria brab nuret roy Fiyowe Uret diyo.

I Filipihe brab odorone

²⁶ Atin i Filipihe, sénugu i télikay Kadnane mano, “Tafay go brab angéy go déligdigan dob agéwone tidéw Jerusalem mangéy Gasa.” (I ni agéwon éndaén i étew de magéwon.) ²⁷ Mélaw ménangéy diyo i Filipihe. Tidéw béno, énggébalaka noy ségétewe lagéy kafun sarigoy baiwe dob ingéde

Etiopia. Beeney ségétéwe gérotor étew mitong bé kurtae dob no ingéd. I ni étew séfule bé beno bé kéagéw ne ménangéy méngadaf dob Jerusalem.

²⁸ Diyo dob kalesah ne brab basané noy librowe sénulat i méntélatae sénarigoy Tuluse féndawét Isaias. ²⁹ Atin bénréh i Rémogor i Tuluse dob Filipihe mano, “Ay go fégédét diyo brab odor go bé nan kalesah.”

³⁰ Mélaw i Filipihe ménségéta mangéy fégédét brab énggelingoo noy kébasa nuwe bé librowe sénulat Isaiase. Atin fénénginsaa Filipihe mano, “Aw gésobuto moy nan basané mo?”

³¹ Séménumbul i ni sarigon mano, “Ati kégésobut guwe de ké énda i témoro de begén?” Tidéw beno, fénidaén i Filipihe dob kalesah ne atin ménséfingé ro ménsar. ³² Ay niy ménsulate dob libro Isaiase, bénasa no, “Beeney maake bili-bili fénléhu. Beeney maake nati bili-bili mantés ké kéléngén i buk ne, non énda fo ménbéréhén fiyon sétaga. ³³ Toow fo ménfémala brab énda méntintuy kékukume de. Atin énda i gébéréh fantag bé de séfuen non ménléhuén brab éndaén dini ro dob duniyae ni.”

³⁴ Atin ménénginsa i ni sarigon dob Filipihe mano, “Ati ni étew ménsulat dob ni? Aw bénréh i sarigoy Tulusey fantage bé kaane lowoh taloo no ségiyo étew?” ³⁵ Tidéw beno, fénggétiga Filipihe dob beeney atag ni bénasa no brab nuretén i Fiyowe Uret fantag bé Jesuse. ³⁶ Atin amun diyo ro séna lowoh aguwon, énggumah ro dob gonone wén i wayég de. Atin ménbéréh i ni odoron mano, “Ay wén i wayég dob ni. Aw fakayu mébautis?”

³⁷ Séménumbul i Filipihe mano, “Fakay bautisé ku beem amuk tintu gon munur bé Kristowe dob fédew me.”

Atin séménumbul i ni sarigon mano, “Munuru bé Jesu Kristowe, bé Beeney Nga i Tuluse.”

³⁸ Atin i ni sarigon féntéré noy kalesah ne brab ménlus bero Filipihe ménangéy dob wayége atin bénautis Filipihe. ³⁹ Amun géménaun ron tidéw dob wayége ni, nuwit i Rémogor i Kadnaney Filipihe. Endaén énggitoy sarigone niy Filipihe, éndob méntaus magéw toow fo moror. ⁴⁰ Atin i Filipihe méntékow énggégumah dob sébaane ingéd féndawét Asdod. Atin tidéw diyo ménuret bé Fiyowe Uret fantag bé Jesuse dob kéluhanay de ingéd énggétaraa no bé kéagéw ne mangéy dob ingéde féndawét Sesaria.

I kéwaléy Saulowe munur

9 ¹ Atin i Saulowe bé do no do gai, féntausén soy kérigo nuwe bé de kuyug i Kadnane. Non ménbéréh félhéué no kun bero. Atin ménangéy dob gérotore fadi, ² brab ménongot sulat dob beene mangéy dob de odoroy de Judio dob de lawi féngadafa ro dob ingéde Damasko inok kéfoé noy kéluhanay étewe gito no diyo do modor dob Agéwo Jesuse brab uwité no bero mangéy Jerusalem, do lagéy brab do libun.

³ Atin ménagéw i Saulowe mangéy Damasko. Amun gédétén dob no ingéd, méntékow wén i réndaw tidéw dob lawayo géliwét de. ⁴ Atin ménggétélengkéb i Saulowe dob fantade brab énggelingoo noy émbéréhé mano, “Saulo! Sedek férasayé mo Begén?”

⁵ Ménénginsa i Saulowe mano, “Ati Beeme, Kadnan?”

Atin séménumbul mano, “Begéney Jesuse férasayé mo. ⁶ Tindég go brab taus go mangéy Damasko, atin diyo wén i étewe béréhé no beem i fatute rigoné mo.”

⁷ Atin i de étew dumo Saulowe magéw, téménréni ro. Ménantés ro non énggelingoo roy émbéréhé ni éndob énda gitro de. ⁸ Atin i Saulowe téménindég brab bénékahén i de moto no, éndob énda gérito no. Mélaw narak i de dumo no taman Damasko. ⁹ Atin méntéléw gétérésangan énda gérito no, brab énda ménamaén taloo no méniném.

¹⁰ Atin diyo dob Damasko wén i ségettéwe kuyug Jesuse féndawét Ananias. Atin wén i fénggitoy Tuluse dob beene non ténavag i Kadnane mano, “Ananias!”

Séménumbul mano, “Ay niwu so Kadnan.”

¹¹ Atin ménbéréh i Kadnane mano, “Angéy go dob agéwone féndawét ‘Mééntang’ brab taus go dob lawi Judase brab fénginsaém diyo i lagéye féndawét Saulo tidéw Tarsus. Démasal sénay ni étew béni. ¹² Brab wén i fénggitoy Kadnane, brab dob ni énggito noy ségettéwe lagéy féndawét Ananias énggumah dob beene brab ténégé no inok gérito man.”

¹³ Séménumbul i Ananiase mano, “Kadnan, énggelingoo kuy uret i médoowe étew fantag bé ni lagéy, brab kéluhanay tetee rénigo no dob de kuyugém dob Jerusalem. ¹⁴ Atin ménangéy dini dob Damaskowe ni non wén i kuwagibe tidéw dob de odoroy de fadi inok kéfoé noy kéluhanay munure Beem brab de lémabit bé dawét me ké démasal ro.”

¹⁵ Endob ménbéréh i Kadnane mano, “Angéy go diyo non fénemili guy ni étew inok waléy sugu-sugué ku muret fantag bé Begéne dob de étew békén Judio brab dob de datu brab dob de Judio so. ¹⁶ Brab fégétiga ku dob beene bé waléy so toow fo mérasay sabaf bé kéunur ne Begén.”

¹⁷ Mélaw ménagéw i Ananiase mangéy diyo. Amun énggumah dob lawie ménahur so brab ténégé noy Saulowe ni. Atin bénréhén de mano, “Saulo, dumo gu, sénugu i Kadnane begén mangéy dob beeme. Beeney Jesuse sani méntéfítowe dob beeme dob aguwone bé kéangéy me dini. Sénuguén begén inok waléy go man gérito brab fémanduoy Rémogor i Tuluse beem.” ¹⁸ Sonom béno, i de maak éner ménlawu tidéw dob de moto Saulo brab énggítito. Atin ménagayas témindég brab ménfíbautis. ¹⁹ Amun énggilid mama, ménsefule i kébagér ne. Atin ménbati i Saulowe dob de kuyug Jesus dob Damasko bé ménfiroye gétérésangan.

I kéuret Saulowe dob Damasko

²⁰ Atin i Saulowe ménagayas ménahur dob de lawi féngadafay de Judio brab nureténi fantage bé Jesuse. Bénréhén mano, “I Jesuse ni, Beeney Nga i Tuluse.”

²¹ Atin i kéluhanay de énggégélingo de toow ro fo ménggaif brab méniséfenginsa ro maro, “Aw békén ba beeney étewe tidéw Jerusalem méméléhu bé de munur bé Jesuse? Aw békén ba ménangéy dini inok kéfoé noy de kuyug Jesus, inok uwité no mangéy dob odoroy de fadi dob Jerusalem?”

²² Endob ménwaléy toow fo émbagér muret i Saulowe brab fénggétiga no dob de Judio dob Damasko i Jesuse, Been i Kristowe, sani máguléwe tidéw dob Tuluse ongot-ongoté ro. Atin énda i énggésumbul bero.

²³ Amun ménifus i firoye gétérésangan, i de Judio ménslimud ro atin méniséfagayun ro bé féléhué roy Saulowe. ²⁴ Fuweh na kélungonon i kékantaya ruwe de dob de béngaway ni ingéd inok féléhué ro. Endob wén i ménlolok dob Saulowe fantag bé ni rigonné ro. ²⁵ Mélaw wén i no kélungonon, i de kuyugén nuwit roy Saulowe dob gératore diding fénggédiding bé ni ingéd. Atin nahur ro dob dakéle biton brab ténuntu ro mangéy fingé bala dob faliluwangay didinge ni.

²⁶ Atin ménule i Saulowe mangéy Jerusalem brab témlama magiyamongan bé de kuyug Jesus. Endob mégilak ro de brab énda munur ro de ké ménwaléyén kuyug Jesuse. ²⁷ Tidéw bénó, i Bernabewe nuvitén i Saulowe mangéy dob de apostol. Atin i Bernabewe nureténi dob berowey kétéfégitoj Kadnane brab késébérén ne dob Saulowe dob aguwone. Atin bénréh Bernabewe soy kébaraw Saulowe muret fantag bé Jesuse dob Damasko. ²⁸ Mélaw i Saulowe ménbati dob berowe dob Jerusalem. Brab sémenugud muret fantag bé Kadnane dob kéluhanay de gonon dob Jerusalem. ²⁹ Atin ménslimud brab ménslimud bé de Judio do sébérén Griego. Mélaw témlama ro féléhuén i Saulowe. ³⁰ Amun énggétigay de dumo no munur bé Jesuse, dénura ro mangéy Sesaria brab fénule ro mangéy Tarsus.

³¹ Atin bé do no gai, énda ménrasay i de munur bé Kristowe dob Judea brab dob Galilea brab dob Samaria. Ménwaléy ro do méégét munur brab méninut ro médoob non téabangay Rémogor i Tuluse bero, non toow fo féngadafé roy Kadnane.

I rénigo Pedrowe

³² Atin i Pedrowe, démoyun ménagéw mangéy dob de médoob do ingéd. Amun nangeyén téukaw i de dumo no munur bé Kristowe dob Lida, ³³ diyo énggabalaka noy ségétéwe lagéy féndawéti Eneas. I Enease

ni kimoyén brab ménwaléwén gébélintuwa i éndae kégétekén. ³⁴ Atin ménbéréh i Pedrowe dob beene mano, “Eneas, uwaé Jesu Kristowe beem. Tek go brab dili moy iroo muwa nan!” Sonom béno énggétek i Enease ni. ³⁵ Enggitoy kéluhanay de étew dob Lida brab dob Saron i ni lagéy ménadi-adi. Mélaw ménunur ro bé Kadnane.

³⁶ Atin diyo dob Jopa, wén i ségétewe libun munur so bé Kristowe féndawét Tabita. (Taloo no Dorkas dob késbéréhe Griego. Atin i atag ne “séladéng”.) Sénga tékélid rémigo fiyo dob de méskinan, brab tabanga no bero. ³⁷ Bé do no gai, ménwaléy démérueun brab ménléhu. Mélaw i de dumo no, nurah roy bangkay ne brab féndiyo ro dob sibéye dob rotor i lawie. ³⁸ Enda mérayu i ingéde Jopa dob ingéde Lida. Mélaw i de kuyug Jesus dob Jopa, amun énggelingoo ro diyo i Pedrowe dob Lida, séménugu ro ruwo gétew lagéy mangey diyo inok bérhéhe ro dob Pedrowe bé magayas mangéy dob berowe. ³⁹ Mélaw ménodor i Pedrowe bero. Amun énggumah ron, nuwit roy Pedrowe mangéy dob sibéye dob rotor i lawie. Atin i kéluhanay de libun do baléw ménfégédét ro dob Pedrowe, kémérew ro brab fénggito roy de kégal rénigo Dorkase bé kéuyag ne séna. ⁴⁰ Tidéw bénor, fénsut Pedrowe bero dob sibéye atin ménlingkuwéd démasal. Tidéw bénor, sénaréwén i bangkaye brab ménbéréh mano, “Tabita, tek go!” Tidéw bénor, bénékahén i de moto no brab amun énggito noy Pedrowe, méntek. ⁴¹ Atin i Pedrowe, génamakén i de kémérén brab féntindégén. Tidéw bénor, ténawagén i kéluhanay de munur bé Kristowe brab de libun do baléw, atin fénggito no beroy Dorkase ménuyag. ⁴² Atin i urete fantag bé ni ménlégéb dob ingéde Jopa. Mélaw ménwaléy médooy ménunure bé Kadnane. ⁴³ Atin ménrugay i Pedrowe dob Jopa. Ménbati dob lawi i ségétewe lagéy gémalbék léminis do kulit safi féndawét Simon.

I Pedrowe brab Korneliowe

10 ¹Dob Sesaria, wén i ségétewe lagéy féndawét Kornelio. Beeney kafitay de sundalo tidéw Roma sani de sundalo féndawét ro “Do tidéw Italiana”. ²I ni kafitan toow fo méngintulus, loo soy kéluhanay de dumo no dob kaane kuréngon. Démoyun miray tabang dob de Judío do méskinan. Brab sénga tékélid démasal dob Tuluse. ³Wén i no sébaan fuweh, géraraan lémuudug i térsange de, wén i fénggito Tuluse dob beene. Tintu fo énggito noy télikiy Tuluse ménahur dob lawi ne. Atin ténawag i télikiy ni mano, “Kornelio!”

⁴ Atin ténéngténgén i télikiy ni brab toow fo ménggilak. Atin séménumbul mano, “Ati no?”

Atin ménbéréh i télikiy ni mano, “Mésuwat i Tuluse bé kégédaw me bé de fiyo rénigo mo brab kédasal me. Atin énggétédémo no beem. ⁵Béleewe ni, sugu go do étew mangéy Jopa inok angéyé roy ségétewe lagéy féndawét Simon Pedro. ⁶Diyo bati dob lawi i lagéye gémalbék

léminis do kulit safi féndawét so Simon. I ni lawi gédét dob dogote.”

⁷Tidéw béno, méntékédan i télakiwe ni. Atin i Korneliowe ténawagén i ruwowe gétew bé de sugu-sugué no, brab ségétéwe bé de sundalo no toow fo méngintulus. Beene soy ségétéwe bé de sarigo no. ⁸Atin bénréhén beroy ni ménrigo. Tidéw béno, sénuguén bero mangéy dob ingéde Jopa.

⁹Dob gétunduge de fuweh, amun gédét ron dob Jopa, i Pedrowe ménénik dob datare atéf i lawie batio no brab déménasal. Géutuhén bé béno. ¹⁰Atin toowén fo mélawayaf brab ménuyot fo mama. Endob i lala i de étew dob nan lawi témafay séna bé amaé ruwe, wén i fénggitoy Tuluse dob Pedrowe ni. ¹¹Enggitoy noy lawaye ménungka brab wén i maake dakél safut térimféna mangéy fantad ténutun fot i sugud ne. ¹²Diyo ménfuyut i kéluhanay séségiyo-giyowe do binatang do magéw brab do rémagaf dob fantade brab do kloh manok. ¹³Brab énggelingoo noy émbéréhe mano, “Pedro, étek go! Sumbaliém brab amaém.”

¹⁴Endob séménumbul i Pedrowe mano, “Aba, énda fo gérigono ku de, Kadnan. Non tidéw féganay, énda séna ménamau bé de amaén liyén dob adat geye do Judio.”

¹⁵Atin énggelingoo no man i émbéréhe ni mano, “Kago béréhén liyén taloo no tete i bénréh i Tuluse fiyo.” ¹⁶Téléw gule ménrigoy ni. Tidéw béno, i ni ménutun ménbatun séfule mangéy dob lawayo.

¹⁷I lala Pedrowe mégitung bé atiy atag i ni énggito no, énggumah i de sénugu Kornelio. Non amun fénénginsa roy hon i lawie gono Pedrowe bati, ménangéy ro diyo. Brab diyo ro dob liyuy bengawane. ¹⁸Atin téménawag ro brab fénénginsa ro ké diyo bati i lagéye féndawét Simon Pedro.

¹⁹Atin i Pedrowe tafay so fégitungé noy atiy atag i ni énggito no. Tidéw béno, i Rémogor i Tuluse ménbérén dob Pedrowe mano, “Pedro, wén i téléw gétew lagéy séméléd beem. ²⁰Tek go brab lus go, brab kago magalang-galang modor bero non Begén i séménugu bero.” ²¹Mélaw ménlus i Pedrowe brab bénréhén bero mano, “Begén i nan sélédé kom. Ati funa kome séméléd begén?”

²²Séménumbul ro maro, “Sénugu kafitan Korneliowe begey mangéy dini. I ni étew toow fo métintu brab méngintulus, atin i kéluhanay de Judio fégadata ro. Ménbérén i télakiwe dob beene bé féangeyé no beem dob lawi ne inok fégélingoé noy ati béréhé muwe.” ²³Atin i Pedrowe ténayakufén bero dob lawie ni batio no, brab ménbati ro diyo ségéklungonon.

Atin bé démoe de ménodor bero brab wén soy do dumo bé de munur bé Kristowe dob Jopa ménodor de. ²⁴Dob gétunduge de fuweh, énggumah ro dob Sesaria. Diyo nongot-nongot Korneliowe bero. Atin ténawagén i kéluhanay de samungén brab do dumo no séloyuk. Mélaw diyo ro so. ²⁵Amun énggumahén i Pedrowe, bénalak Korneliowe brab

ménlingkuwéd dob adafa Pedrowe inok féngadafé no. ²⁶ Endob féntindég Pedrowe brab ménbérék mano, “Tindég go, non i begéné kéilawanu so loo bé beema nan.” ²⁷ Atin féntaus Pedrowey késébérék-bérék ruwe bé lala ruwe mahur dob lawie ni, atin énggito noy médoowe étew ménlimud. ²⁸ Tidéw béno ménbérék i Pedrowe mano, “Gétiga komén i adat geye do Judio. Enda fakayén dob kitab geye ké sémugud gey mangéy dob de lawi gom do békén Judio taloo no sélawék gey begom. Endob fénggétigay Tuluse begén bé mantuwe ni séna, bé fiyon fo ké ati no étew, éndaén fégitungé ku de mékérésik. ²⁹ Mélaw amun fén-angéy gom begén dini, éndaén ménsédélu de. Mélaw fénginsaa ku begom, ati funa kome ménfétawag begén?”

³⁰ Séménumbul i Korneliowe mano, “Amun naméntéléwo, loo so béni géraraan lémudug i térsange de, déménasalu dob lawi guwe ni. Méntekow méntéfégito lagéye toow fo sémelinang i kégal ne téménindég dob téngaanga kuwe. ³¹ Atin ménbérék mano, ‘Kornelio, énggelingoo Tulusey kédasal me brab énggétédémou noy kégédaw me brab de fiyo rénigo mo. ³² Mélaw sugu go étew mangéy Jopa témawag bé lagéye féndawét Simon Pedro. Diyo bati dob lawi i lagéye gémalbék léminis do kulit safi féndawét Simon gédét dob dogote.’ ³³ Mélaw ménagayasu séménugu mangéy témawag beem. Atin mégédaw go non ménangéy go dini. Atin ay ni gey ménlimud dob adafay Tuluse inok mégélingo bé fébérék i Kadnane beem.”

I kékérék Pedrowe

³⁴ Atin ménbérék i Pedrowe mano, “Béleewe ni énggétiga ku, i Tuluse énda i isu ramigo no bé de étew. ³⁵ Non tayakuféy Tulusey étewe mégadatan de brab rigoné noy fatute kétayay Tuluse, fiyon fo ké ati katufua nuwe taloo no ké ati tidéwo nuwe de. ³⁶ Gétiga kom i kékérék i Tuluse bé kékérék ne dob de Judio. Dob berowe fénayagén i Fiyowe Uret fantag bé kékéfiyowe fédew sabaf bé Jesu Kristowe. Endob Beeney Kadnay kéluhanane. ³⁷ Gétiga kom ké ati ménrigowe dob kéluhanay de ingéd dob Israel, méngganay dob Galilea amun i Juane nuretén i fantage bé kékautis ne. ³⁸ Brab énggétiga kom i fantage bé Jesuse tidéw Nasaret. I Tuluse nirayén témantu dob Beeney Rémogor ne brab barakat ne. Séménugud dob kéluhanay de ingéd, rémigo bé fiyowe brab fén-adi-adi noy de étew fénrasay Satanase. Enggérígono noy de ni non dob Beeney Tuluse. ³⁹ Brab begey i énggégítowe bé de ni rénigo no dob de ingéd i de Judio brab dob Jerusalem. Endob i de étew fénléhu roy Jesuse dob kruse. ⁴⁰ Endob ténébule i Tuluse dob gétéléw ne gétérésang brab fénggito noy Jesuse ménuyag. ⁴¹ Enda méntéfégito no dob kéluhanay étewe éndob dob begeye saén méntéfégito do fénémili i Tuluse. Ménseréngan begey mama brab miném amun méntébuleén. ⁴² Atin sénuguén begey mangéy muret

bé Fiyowe Uret dob kéluhanay étewe brab muret bé Beeney fénémili i Tuluse kémukum bé de méuyag brab bé de ménléhu. ⁴³ Atin i kéluhanay de énggétah do sénarigoy Tuluse muret bé kébéréh ne, nuret roy fantage bé Jesuse. Atin bénréh ro bé i kéluhanay munure dob Beene, fésagaday Tulusey de sala ro sabaf bé barakat i dawét ne.” Been i niy bénréh Pedrowe.

I kégumah i Rémogor i Tuluse dob de békén Judio

⁴⁴ Amun émbéréh sénay Pedrowe, i Rémogor i Tuluse méntérimféna mangéy dob kéluhanay de mégélingo bé uret ne. ⁴⁵ Atin i de kuyug Jesus do dumo Pedrowe ménodor de tidéw Jopa do Judio ro. Atin toow ro fo ménggaif bé kíray i Tuluse so témantu bé Rémogor ne dob de étew békén Judio. ⁴⁶ Enggétiga ro niray i Tulusey Rémogor ne dob de békén Judio non énggelingoo roy késébéréh ruwe bé de ségiyo késébéréh énda gétiga ro de brab dénayéw roy Tuluse. Mélaw bénréh Pedrowe bero mano, ⁴⁷ “I de ni do étew ténanggaf roy Rémogor i Tuluse, ségiléw so bé betome. Mélaw énda fakayén ké énda bautiséne ro bé wayége.” ⁴⁸ Mélaw bénréhén bero fatut fébautis ro inok féténgténg roy kéunur ruwe bé Jesu Kristowe. Tidéw bénó, fénbati ro nay Pedrowe dob berowe bé ménfiroye gétérésangan.

I Pedrowe dob Jerusalem

11 ¹ Atin i de apostol brab de dumo ro munur bé Kristowe dob Judea, énggelingoo roy fantage bé de étew békén do Judio ménwaléy ro munur bé kébéréh i Tuluse. ² Mélaw amun ménénagé i Pedrowe mangéy Jerusalem, i de munur bé Kristowe do Judio, dénowoy roy Pedrowe, ³ maro, “Séménugud go mangéy dob lawi i de békén Judio, sani de énda ménbuli. Atin ménseréngan go na bero mama.” ⁴ Mélaw nuret Pedrowe beroy kéluhanay ménrigowe tidéw féganay.

⁵ Ménbéréh i Pedrowe mano, “Amun diyou dob Jopa, déménasalu atin wén i fénggitoy Tuluse begén. Énggito gu tidéw dob lawayoy maake dakél safut ténutun fot i sugud ne. Atin ménténa dob téngaanga kuwe. ⁶ Tidéw bénó, ténéngténg gu fo toow atin énggito gu diyo ménfuyut i séségiyo-giyowe do ayam brab do mérayar binatang do magéw brab do rémagaf dob fantade, brab do kloh manok. ⁷ Tidéw bénó énggelingoo kuy émbéréhe mano, ‘Pedro, tindég go, sumbaliém brab amaém.’ ⁸ Endob séménumbulu maku, ‘Aba, énda fo gérígono ku de, Kadnan. Non énda séna énggéamaubé kéluhanay amaéne ménbéréh liyén dob adat geye do Judio.’ ⁹ Endob énggelingoo ku man ségule i ni émbéréh tidéw dob lawayo mano, ‘Kagonén béréréhliyén taloo no tete i bénréh i Tuluse fiyo.’ ¹⁰ Télédw gule ménrigoy ni. Tidéw bénó, ménbatun séfule mangéy dob lawayoy ni maak safut ménféno do binatang. ¹¹ Bé bénó so,

énggumah dob lawie gono ku bati i télwe gétew lagéy sénugu tidéw dob ingéde Sesaria mangéy témawag begén.¹² Atin i Rémogor i Tuluse bénréhén begén bé magéwu brab békénu magalang-galang modor bero. Tidéw bénor, ménodor so begén i de ném ni gétew do munur do dumo gu tidéw Jopa mangéy Sesaria. Amun énggumah geyén dob lawi Korneliowe, ménahur gey.¹³ Atin bénréhén begey i fantage bé télakiwe énggito no dob lawi ne. Atin bénréh i télakiwe de kun mano, ‘Sugu go étew mangéy témawag bé lagéye féndawét Simon Pedro dob Jopa.¹⁴ Ureté no beem i funa muwe méfukas dob de salaém begom i de samungém.’ Been i niy bénréh i télakiwe de kun.”

¹⁵ Atin fentaus Pedrowey kóbérén ne mano, “Amun méngganayu séna émbérén dob de étew ni dob Jopa, i Rémogor i Tuluse ménlus mangéy dob berowe ségiléw bé kéangéy ne dob betome do Judio bé féganayo.

¹⁶ Tidéw bénor énggétédémo kuy bénréh i Kadnane mano, ‘I Juane mautis bé wayége éndob bautison gom bé Rémogor i Tuluse.’ ”

¹⁷ Atin fentaus Pedrowey kóbérén ne mano, “Enggitonén i kéiray i Tuluse bé Rémogor ne dob de ni étew békén Judio ségiléw bé kéiray ne de dob betome amun ménunur tom bé Kadnane Jesu Kristo. Mélaw énda i kuwagib gu mélén bé Tuluse miray bé Rémogor ne dob berowe.”

¹⁸ Amun énggelingoo roy ni kóbérén Pedrowe, téménrén ron bé kéadowoy ruwe de. Atin dénayéw roy Tuluse maro, “Mégédaw so wayoy Tuluse bé de étew békén Judio non amuk gésénule ro, gédoté ro soy umule magufusa.”

I de munur dob Antiokia

¹⁹ I de munur bé Kristowe ménbéragar ro non bé kéferasaye bero tidewén bé kékélöhue bé Estebane. Mélaw énggégumah ro dob de mérayu ingéd. I de dumo de dob Fenisia atin i de dumo de dob Sipri brab dob Antiokia. Atin nuret roy Fiyowe Uret dob de Judio saén.²⁰ Endob wén i de dumo de tidéw Sipri brab do tidéw Sirin, amun énggégumah ro dob Antiokia nuret ro so dob de békén Judiroy Fiyowe Uret fantag bé Kadnane Jesus. ²¹ Atin i barakat i Kadnane té nabangén bero funay médoowe do étew énggésénule brab ménunur bé Kadnane.

²² Atin i urete fantag bé de ni énggumah dob de munur bé Kristowe dob Jerusalem. Mélaw fenuwit roy Bernabewe mangéy Antiokia. ²³ Amun énggumah diyo, énggito noy kégédaw i Tuluse bero. Toow fo ménoror i Bernabewe brab bénréhén bero kéluhanan bé fédayday ro bé kéunur ruwe dob kéluhanay de fidéw ro brab modor ro bé de sugu i Kadnane.

²⁴ Toow fo fiyo étew i Bernabewe ni. Fénémanduooy Rémogor i Tuluse brab méégét i kéunur ne. Mélaw sabaf bé kétoro ne, médooy de énggésénule brab ménunur ro bé Kadnane.

²⁵ Tidéw bénor, ménangéy Tarsus i Bernabewe inok sélédé noy Saulowe.

²⁶ Amun énggito no, nuvitén mangéy Antiokia. Atin ménségébélantuwa

diyo ro beroy de munur bé Kristowe brab téménoro ro dob de médoor étew. Atin diyo dob Antiokia, ménféganay i kétawage bé de munur bé Kristowe “Kristiyano”.

²⁷Bé do no do gai, wén i de sénarigoy Tuluse muret bé kébéréh ne énggumah dob Antiokia tidew Jerusalem. ²⁸Téménindég i ségétewé bero féndawét Agabo brab fénbéréh i Rémogor i Tuluse bé wén moso i géggumah dakél lénggob dob kéléuhanay de ingéd dob duniyae ni. (Atin énggégumah i ni bé gaiy kékéfugéw Klaudiowe dob Roma.) ²⁹Atin i de kuyug, ménséfagayun ro bé émféuwit ro tabang bé atiy tamay gagané ruwe mangéy dob de dumo ro do kuyug batí dob Judea. ³⁰Atin been i niy rénigo ruwe, brab fénuit ro bé ro Saulowe brab Bernabewey karowe tabang do kurta mangéy dob de odoroy de munur diyo dob Judea.

I kérasay i de munur

12 ¹Bé do no do gai, féngganay i datue féndawét Herod i kéférasay ne bé de dumo bé de munur bé Kristowe. ²I Santiagowe dumo Juane sétiman idéng, fénféléhu Herode bé sundange. ³Atin amun énggito no toow fo ménsuwat i de Judio bé ni rénigo no, fénkéfoén i Pedrowe. (Ménrigoy ni bé gaiy kékanduli i de Judio féndawét “Témara”, sani kandulie mama ro fan énda i fégéférul de.) ⁴Amun énggékéfoo roy Pedrowe, fénrisu ro brab fénbantaya ro bé fote lumfuk do sundalo. Wén i fot gétew dob séngae de sétumfuk. Atin bénantak Herode kukumén i Pedrowe dob téngaangay de étew amuk gilid i kékanduli ruwe. ⁵Mélaw ménbati i Pedrowe dob férisunone. Atin i de dumo no munur bé Kristowe téménantu ro démasal dob Tuluse inok tabanga noy Pedrowe.

I kétangéy Pedrowe tidew dob férisunone

⁶Amun ségékélungonon séden i télaa Herode kémukum bé Pedrowe, bé no kélungonon ménfidong i Pedrowe dob kérara i ruwowe gétew sundalo mantayan de. Brab nikét roy Pedrowe bé ruwowe timan sangkali. Atin wén soy do sundalo mantay dob bengaway férisunone ni. ⁷Atin tékow méntéfíttoy télaki Kadnane brab ménggékaya i sibéy ne dob férisunone. Atin i télakiwe ni kénuyungén i Pedrowe dob wara nuwe inok ulégé no brab ménbéréh mano, “Fagayas go tek!” Sonom béno ménukoh i de sangkali dob de kémérén. ⁸“Sintoro go brab sinilas go”, bang i télakiwe ni. Atin nodoro Pedrowey bénréh i télakiwe ni. Ménbéréh man i télakiwe ni mano, “Kégalém i géruwowe lafin kégalém brab odor go begén.” ⁹Atin ménodor i Pedrowe bé télakiwe ni brab ménusut. Endob énda gétiga no de ké toow i ni rénigoy télakiwe ni, look fénggitoy Tuluse de dob téginéfe saén. ¹⁰Ténaraa roy sunguwe brab géruwowe gonoy de sundalo ni do mantay. Tidew béno, énggumah ro dob bengaway férisunone ni futow i fintu ne. Atin ménungka so fyon fo ké énda i

ménungka de. Atin amun énggésut ron, méntaus ro magéw brab amun énggéliyuno ron i sébaane aguwon, tékow ménalfa i télakiwe ni.

¹¹ Tidéw béno énggétiga Pedrowe nén i ni ménrigo, mélaw énggóbérého no mano, “Béleewe énggétiga kun toow wayoy ni ménrigo! Sénugu i Kadnaney télaki nuwe témangéy begén inok énda gérigono Herode brab de Judiøy kétaya ruwe rigoné ro dob begéne.”

¹² Amun énggétiga noy ni, méntaus mangéy dob lawi Mariahe idéng Juan Markose. Diyo ménlimud i médoowe étew démasal. ¹³ Amun énggumah i Pedrowe, téménuktuk dob liyuy fintue dob fésayawane. Atin ménfégédét i ségettéwe sugu-suguén kénogon féndawéti Roda inok angéyé no susinén. ¹⁴ Amun énggélolo noy béréh Pedrowe, toow fo ménoror. Endob énda nungkaén i fintue. Yamula sabaf bé kéoror ne ménsegéta séfule mangéy dob de étew brab bénréhén bero i Pedrowe diyo dob liyuwe. ¹⁵ Endob ménbéréh ro maro, “Bunég go!” Endob énda téméré no émbéréh bé i Pedrowe diyo dob liyuwe. Mélaw bénréh ro maro, “Télaki Pedro keey i no.”

¹⁶ Tafay so témuktuk i Pedrowe ni. Tidéw béno nungka roy fintue ni brab amun énggito roy Pedrowe, toow ro fo ménggaif. ¹⁷ Endob séniniyasa Pedrowe bero bé féantés ro, brab nureténi beroy kéféesut i Kadnane de tidéw dob férisunone. Atin ménbéréh mano, “Uret gom i ni dob Santiagowe brab dob de dumo tom munur bé Kristowe.” Tidéw béno, ménagéw i Pedrowe mangéy dob ségiyowe gonon.

¹⁸ Amun géfuwénén, i de sundalo mantayan bé Pedrowe, toow ro fo ménggaif brab ménggilak. Enda énggétiga ro de ké ati énggérigono Pedrowe. ¹⁹ Atin fénsélé Herodey Pedrowe. Atin amun énda énggito ro de, fénénginsaa Herodey de mantay bé férisunone, atin fénféléhuén bero. Tidéw béno, léménudug i Herode mangéy Sesaria tidéw Judea brab diyo ménrugay bati.

I kéléhu Herode

²⁰ Bé béno gai, ménkérít i Herode bé de étew tidéw Tiro brab de étew tidéw Sidon. Mélaw ménsegagayun ro mangéy ro dob beene. Bé énda séna ménangéy ro dob Herode, ménsegáreh ro bé sarigo nuwe dob lawi ne féndawéti Blasto bé odoro no bero mangéy dob Herode inok ongoté ro de ké kédané noy kékérít ne bero. Non énda i ségiyo édoto ro bé amaé ruwe ké békén dob ingéde sakuf Herode.

²¹ Amun énggumahén i télaa ruwe mangéy diyo, i Herode kéménégál kégal datu brab ménasar dob saray datue. Tidéw béno nureto no bero. ²² Atin ménkes i de étew démayéw bé Herod maro, “Tulus i ni émbéréh, békén kélawan.” ²³ Sonom béno, kénukum i télaiky Kadnaney Herode non ténayakufén i késengadaf ruwe de, brab énda feféngadafé no bero bé Tuluse. Mélaw ménsofotén i lowoh ne atin ménléhu.

²⁴ Atin bé do no gai, i urete fantag bé Tuluse ménlégéb dob de ingéd atin minut so médooy munure bé Kristowe.

²⁵ Atin i ro Bernabewe brab Saulowe amun énggilid ron i galbék ruwe, méniséfule ro tidéw Jerusalem mangéy Antiokia, brab nuwit roy Juan Markose.

I késugue bé Saulowe brab Bernabewe

13 ¹Diyo dob Antiokia, wén i de sénarigoy Tuluse muret bé kébéréh ne brab do témodo. I de ni, ro Bernabe, Saulo, Simeon (féndawét so mitam lagéy), Lusio (tidéw Sirin), brab Manaen (sani dumo Herode ménggéséeruk). ²Wén i no sébaan fuweh, amun ménéngadaf ro dob Tuluse brab ménfuwasa ro, i Rémogor i Tuluse ménbérél mano, “Iray gom Begén i ro Bernabewe brab Saulowe inok rigoné roy galbéke fénemili gu iray gu bero.” ³Mélaw ménfuwasa ro brab déménasal ro brab ténégé roy ro Bernabewe brab Saulowe. Tidéw béno sénugu ro bero.

Dob Siprus

⁴ Atin i Bernabewe brab Saulowe do sénugu i Rémogor i Tuluse, ménagéw ro mangéy Selusia, atin tidéw Selusia ménda ro barko mangéy dob bungéde féndawét Siprus. Ménodor soy Juan Markose. ⁵Amun téménéfad ro dob ingéde Salamis, nuret roy kébéréh i Tuluse dob de lawi fénadafay de Judío. Atin téménabang soy Juan Markose.

⁶ Atin amun énggéifara ronén i ni bungéd mangéy dob ingéde Pafos, diyo énggébalaka roy béliyané ségétew Judío féndawét Bar-Jesus. (I dawét ne Elimas dob késébéréhe Griego.) Bénréhén been kun i sénarigoy Tuluse muret bé kébéréh ne. ⁷Brab i ni béliyan, been i dumoy ségétewé gobernador dob no bungéd féndawét Sergio Paulo, toow fo métileté. Atin i ni gobernador fentawagén i ro Bernabewe brab Saulowe non méuyot mégélingo bé kébéréh i Tuluse. ⁸Endob i béliyan ni Elimas, toow fo ménsebanil bero. Atin ténulama no balengén i fédew i ni gobernador inok énda munurén. ⁹Tidéw béno, i Saulowe (féndawét so Pablo) toow fo fénémanduoy Rémogor i Tuluse. Atin fénandangén fo toow i ni béliyan. ¹⁰Brab ménbérél i Pablwe mano, “I beema nan, nga Satanás go! Tintu sébanil go bé kéluhanay fiyowe. Ménfeno go bé tugie brab akar. Atin télamané mo féwaléyén tugi i toowe tidéw dob Kadnane. ¹¹Bé béní so, kukuméy Tuluse beem bé waléy go langafén brab mérugay énda gérito go.”

Sonom béno, i Elimase ménlangafén brab séménléd étew marak de. ¹²Atin i gobernadore ni ménunur bé Kristowe amun énggitoy ni ménrigo. Toow fo ménggaif bé kétoroe fantag bé Kadnane.

Dob Antiokia sakuf i ingéde Pisidia

¹³ Atin i Pablwe brab de dumá no méná ro man barko dob Pafos, brab énggégumah ro dob gonone féndawét Perga sakuf i ingéde féndawét

Pamfilia. Endob i Juan Markose ménsésuway bero atin ménséfule mangéy Jerusalem. ¹⁴ Atin tidéw Perga, méntaus ro mangéy Antiokia sakuf i ingéde Pisidia. Atin bé gaiwe kétérén, ménahur ro dob lawie féngadafay de Judio brab ménsar ro. ¹⁵ Amun énggilid i kébasawe bé de kitab sénulat Moisese brab de sénulat i de sénarigoy Tuluse, i de odoron dob lawie féngadafan fénbéréh roy ro Pablowe brab Bernabewe maro, “Do dumo gey, amuk wén i kéuyoto kom bérhéh kom dob de étew ni émféfiyo bé de fédew ro, kagom séko méangga, bérhéh gom so bero.”

¹⁶ Mélaw téménindég i Pablowe brab séniniyasa no bero bé de kémérén inok mantés ro. Tidéw béno, ménbéréh mano, “Do dumo gu do Judio, brab begome do étew békén Judio do méngintulus, toow gom fégélingo. ¹⁷I Tuluse féngadafé tom do Judio, i ménémilie bé de katufua tom. Atin fénwaléyén bero médoo amun ménbati ro dob mérayue ingéd Egipto. Endob fénésut i Tuluse so bero tidéw Egipto bé barakat ne. ¹⁸ Atin téningkéloy Tuluse bero bé ménfote folo gébélantuwa dob gonone énda i étew de bat. ¹⁹ Amun énggilid ténapa noy de fitew timan ingéd dob Kanaan, nirayén i fantade ni dob de Judio. ²⁰I kérugay i kéluhanay de ni fot ratuh bra limo folo gébélantuwa.

“Atin amun énggilid i ni, nirayay Tuluse bero do kéfédewan inok wén i méguléw bero taman dob gai Samuele, ségétew sénarigoy Tuluse muret bé kékéréh ne. ²¹ Tidéw béno, i de Judio ménongot ro dob Tuluse datu ro. Atin fénémili i Tulusey ségétéwe lagéy féndawét Saulo nga Kis tidéw dob katufua Benjamene. Atin ménwaléy datu roy Saulowe bérhéh ménfote folo gébélantuwa. ²² Amun kénday Tulusey Saulowe, Dabid i fénwaléy ne datu ro. Bénréh i Tuluse mano, ‘Enggitoy guy Dabide, nga Jessewe, kénsuwata ku. Rigoné noy kétaya kuwe.’”

²³ Atin fénautas Pablowej kékéréh ne mano, “Jesusoy ségétéwe bérhéh de séfu Datu Dabid. Brab Beeney fénwaléy i Tuluse Mémukas bérhéh de étew Judio loo bérhéh fénasad ne. ²⁴ Amun énda séna féngganay Jesusoy galbék ne, i Juan Bautistawé, nureténe dob kéluhanay de étew do Judio bérhéh fatut ro gésénule bérhéh de sala ro brab fénautis ro. ²⁵ Atin amun gédétén gilid i galbék Juane, bénréhne dob de étew mano, ‘Békén katabawan i kékaran gome begén. Non békénu Kristo sani ongot-ongoté kome. Endob gérumah gétundug begén. Atin gérotor na begén brab fiyon foy ikét i safatos ne, énda médatu de mukoh.’”

²⁶ Atin fénautas Pablowej kékéréh ne mano, “Do dumo gu do séfu Abraham, brab de begom do békén Judio do méngintulus so, betom i fén-uwitoy Tuluse bérhéh ni Fiyo Uret fantag bérhéh Mémukase. ²⁷I de étew dob Jerusalem brab de odoro ro énda énggétiga ro de ké Jesusoy Mémukase. Brab énda énggésobuto roy ménslate kékéréh i de sénarigoy Tuluse muret bérhéh ne fiyon fo ké bénasa ro sénga fadiyan bérhéh de gai kétérén. Endob fiyon fo ké loo bérhéh ni, ténuma ro soy

ménsumlate bé kékukum ro bé Jesuse. ²⁸ Atin fiyon fo ké énda i funa ro kémukum bé Jesuse, nongot ro so dob Pilatowe féléhuén i Jesuse. ²⁹ Amun énggétumana ron i kéluhanay Ménsumlate Kébéréh i Tuluse fantag bé Jesuse, kénda roy bangkay ne dob kruse brab lénébéng ro dob takube. ³⁰ Endob ténébule i Tulusey Jesuse. ³¹ Atin dob ménfiroye gétérésangan, médooy gule méntefégíttoy Jesuse dob de étew ménodor de amun ménagéw mangéy Jerusalem tidéw Galilea bé gátahe. Atin béléewe ni, beroy ménurete dob de Judio. ³²⁻³³ Brab ay ni gey inok ureté key dob begomey ni Fiyo Uret, sani Urete fantag bé fasad i Tuluse dob de katufua tom rigoné no. Atin i fasade ni, ménuman so dob betome do séfu ro non ténébuleén i Jesuse. Ay niy ménsumlate dob géruwowe Kanta dob Ménsumlate Kébéréh i Tuluse mano, ‘Beemey Nga guwe, béléewe ménwaléyu Bohém.’ ”

³⁴ Atin féntaus Pablowej kékéréh ne mano, “Ay niy bénréh i Tuluse fantag bé kétébule ne bé Jesuse inok énda mérénah i lowoh ne mano, ‘Tintu iray gu begom i kéluhanay kéfyonone loo bé fénasad guwe dob Dabide.’ ³⁵ Atin bénréhén so dob Tuluse mano, ‘Enda fédayaé moy lowoh i fiyowe sugu-sugué mo mérénah.’ ”

³⁶ Atin féntaus Pablowe man i kékéréh ne mano, “I ni sulat békén fantag bé Dabide, non amun énggilid rénigo Dabidey kénsuwatay Tuluse, ménléhu brab lénébéng dob sékuloy de katufua no atin ménréh i lowoh ne. ³⁷ Endob ténébule i Tulusey Jesuse, énda ménréh i lowoh ne. ³⁸ Mélaw do dumo gu, fatut gétiga kom i sabaf bé Jesuse saén i géureto keye begom, wén i kéfésagadén bé de sala gom. ³⁹ Atin i kéluhanay de méninugut dob Beene émfésagad i de sala ro. Enda émfésagad gom sabaf bé kéodoro kome bé de kitab sénulat Moisese. ⁴⁰ Mélaw, ingat gom inok énda mérigo dob begomey bénréh i de sénarigoy Tuluse maro, ⁴¹ ‘Téngténg gom, begom i de démiyangka bé Tuluse. Mégaif gom bé rigoné kuwe bé béní brab méléhu gom non énda ménngginugut gom de, fiyon fo ké wén i témenoro de begom.’ ” Been i niy bénréh Pablowe.

⁴² Tidéw bénó, ménsumtén i Pablowe brab Bernabewe tidéw dob lawie ni fénadafan. Atin bé lala ruwe mésut, rénafit i de étew man bero séfule bé gétunduge gai kétérén inok ureto ro man bero ségule fantag bé de ni. ⁴³ Amun ménsumtén i kéluhanane, médooy de Judio brab do békén Judio do ménngéodor bé kéfengintulus i de Judio, ménodor ro bé ro Pablowe brab Bernabewe. Atin i de ni apostol, nureto ro bero bé fétausé roy kétayakuf ruwe bé kégédaw i Tuluse bero.

⁴⁴ Amun dob gétunduge man gai kétérén, gédét kéluhanay de étew dob no ingéd ménangéy ro dob lawie fénadafan inok mégélingo ro man bé kékéréh i Kadnane. ⁴⁵ Atin toow fo ménadaléw i de Judio amun énggito roy de médooy do étew. Mélaw ménbéréh ro sébanil bé de béréhé Pablo, brab fénengiras ro. ⁴⁶ Endob toow na fo ménfébaraw émbéréh i ro Pablowe

brab Bernabewe maro, "Fatut ureté key i kékéréh i Tuluse dob begome do Judio sungu. Endob amun ménika gom de, fénggito gom énda médait gom gégedot bé umule magufusa. Mélaw tagaké key begom brab mangéy gey muret dob de békén Judio. ⁴⁷Non been i niy sugue niray i Kadnane begey mano, 'Féuwit gu begom maak do solo dob de étew békén Judio, inok i kéluhanay étewe dob duniyae ni gélingoo roy kéuret gome brab méfukas ro.' "

⁴⁸I de étew békén Judio, amun énggelingoo roy ni kéuret Pablwe brab Bernabewe, toow ro fo ménoror brab dénayéw roy kékéréh i Kadnane. Atin i de étew fénemili i Tuluse gégedot bé umule magufusa, ménunur ro bé Kristowe.

⁴⁹Atin i kékéréh i Kadnane ménلالag dob kéluhanay de gonon dob no ingéd. ⁵⁰Endob i de Judio rénimbur roy de odoron do lagéy dob no ingéd brab de gérotor libun do békén Judio do méngintulus. Atin féngganaya roy kéferasay ruwe bé ro Pablwe brab Bernabewe brab fénférraréy ro bero dob no ingéd. ⁵¹Mélaw i de apostol ni, ténaqttag roy de bubuk sébuwan dob de sékéy ro inok félégétiga ro bé de étew bé kukuméy Tuluse bero. Atin méntaus ro mangéy Ikonium. ⁵²Atin i de munur dob Antiokia dob sakuf i ingéde Pisidia, toow ro fo ménoror brab fénemanduoy Rémogor i Tuluse bero.

Dob Ikonium

14 ¹Atin loo so bé ménrigowe dob Antiokia, i ménrigowe dob Ikonium. I Pablwe bero Bernabewe ménahur ro so dob lawie féngadafay de Judio. Atin toow fo fiyoy kétoro ruwe, mélaw médooy de Judio brab do békén Judio ménunur bé Kristowe. ²Endob wén i de Judio do énda méniginugut ro brab rénimbur roy de étew békén do Judio inok waléy ro mélékrit bé de munur. ³Endob i ro Pablwe brab Bernabewe, ménrugay ro na ménbati diyo. Brab ménfébaraw ro muret fantag bé Kadnane. Atin niray Kadnane bero barakat inok gérito ro do mélégaif. Mélaw énggétigay de étew ni, toow i kéuret ruwe fantag bé kégédaw i Tuluse. ⁴Endob énda géséfagayun i de étew dob no ingéd. I de dumo bé de étew ménagayun ro dob de Judio. Atin i de dumo bero ménagayun ro dob de apostol.

⁵Tidéw bénou, i dumo bé de Judio brab de dumo bé de étew do békén Judio, beroy de odoro ro, bénantak ro bé dusané ro brab ibéro ro batéw i de apostol inok méléhu ro. ⁶Endob amun énggelingoo de apostol i ni bantak ro, ménraréy ro mangéy Listra brab Derbe, brab dob de ségiyo gonon dob sakuf i ingéde Lisonia. ⁷Atin diyo nuret roy Fiyowe Uret.

Dob Listra

⁸Atin diyo dob Listra, wén i ségétewe lagéy fikat non mén sadil i de sékéyén brab énda géagéwén tidéw fanay kéumahén. ⁹Mén sar brab

fénggélingoén i kétoro Pablowe ni. Atin énggito Pablowej kéunur ne funa no fakay waléy adi-adi. Mélaw ténéngténg Pablowe fo toow.

¹⁰ Atin féntanugén i kékérédé ne mano, “Fééntang go tindég.” Sonom béno, ménagayas tésongkow témindég i ni lagéy brab ménadi-adi, brab ménagéw-agéw. ¹¹ Amun énggitoy de étew i rénigo Pablowe ni, ménkes ro dob karowe késbérédé dob no ingéd Lisonia maro, “Ménlus i de tulus méntéfuwaléy ro do kéilawan mangéy dob betome!” ¹² Mélaw féndawét ro Seus i Bernabewe brab féndawét ro Hermes i Pablowe non beeney murete. Non Seus brab Hermes i ruwowe bé de tulus kun féngadaféy de étew ni. ¹³ Atin i lawie féngadafa ro bé tulus ruwe féndawét Seus, diyo dob liuyu bengaway ingéd ruwe. Atin amun énggélingooy béliya ruwey ni rénigo Pablowe brab Bernabewe, nuwito no do safi brab do flores inok témulak beroy de étew dob adafay de apostol.

¹⁴ Amun énggétiga ro Bernabewe brab Pablowej ni rénigo ro, sénkusi roy de kégal ro inok fégito roy kéika ruwe bé ni rigoné ro. Brab léménéntu ro mangéy dob kérara i de étew ni ménribuk brab ménkes ro maro, ¹⁵ “Kagom rigonén i nan! Do kéilawan gey so loo bé begoma nan. Ménangéy gey dini inok ureté key i Fiyowe Uret fantag bé Jesuse inok ikaa komén i de ni do adat énda i do lantékén. Méuyot gey de ké féngadafé kom i tintuwe Tulus sani réménigowe bé lawaye, fantad, dogot, brab kéléuhanay éntingayéne. ¹⁶ Bé de énggétah do gai, féndaya i Tuluse rigonéy de étew i kéléuhanay karowe kétayan. ¹⁷ Endob tidéw féganay, sénga téklid fénggétiga noy fantage bé Beene dob de kégédaw rénigo no. Iraya no begom rana tidéw dob lawayo inok mérük i de nohok gom ké gai ro. Iraya no begom amaé kom atin féfyioné noy de fédéw gom.” ¹⁸ Endob fiyon fo ké loo bé nan i kékérédé ne, ménkérégénan i Pablowe brab Bernabewe gémélé bero bé kétulaka ruwe bero.

¹⁹ Endob wén i do Judio énggégumah dob no ingéd do tidéw Antiokia sakuf i ingéde Pisidia brab do tidéw Ikonium. Atin bénaleng roy fédéw i de étew ni inok sébanil ro bé Pablowe. Mélaw nibéro ro batéw i Pablowe ni inok méléhu ro damén. Tidéw béno, génuyud ro mésut i Pablowe tidéw dob ni ingéd, atin tétagak ro non marok ménléhuén. ²⁰ Endob amun énggégumah i de dumo no munur bé Kristowe atin sénliwéto ro, témenindég i Pablowe brab ménahur man dob no ingéd. Atin bé démoe de ménagéw i ro Pablowe brab Bernabewe mangéy Derbe.

I késéfule ruwe mangéy Antiokia

²¹ Amun énggumah ro dob Derbe, nuret Pablowe brab Bernabewey Fiyowe Uret atin médooy ménunure bé Kristowe. Tidéw béno, ménfule ro mangéy Listra brab Ikonium brab Antiokia dob sakuf i ingéde Pisidia. ²² Brab fénbagér roy fédéw i de munur diyo brab bénrého ro bero bé fétausé roy kéodor ruwe brab késarig ruwe bé Jesuse. Brab ménbérédé

ro maro, “Kamarasayan tom na médoou gule sungu atin géahur tom dob kékéulguléw i Tuluse.”²³ Atin dob séngae do ménlimud do munur, i de apostol, ménémili ro do étew inok waléy ro odoroy de munur. Atin démasal ro brab fuwasa ro atin sarigé ro bero dob Kadnane, sani unuro ruwe.

²⁴ Atin ménagéw ro témara bé ingéde Pisidia atin énggumah ro dob Pamfilia. ²⁵ Nuret roy Fiyowe Uret dob ingéde Perga. Tidéw béno léménudug ro mangéy Atalia. ²⁶ Tidéw Atalia, menda ro barko séfule mangéy Antiokia, dob sakuf i ingéde Siria sani ingéde gonoy de dumo ro munur séménarig bero dob Tuluse inok tabanga no bero bé galbék ruwe mantu séna fénggilid ro.

²⁷ Amun énggumah ro dob Antiokia, lénimud roy de munur bé Kristowe atin nuret roy kéluhanay de rénígoy Tuluse bé kéagéw ruwe brab fantag bé kékéngaw i Tuluse bé agéwone inok i de étew békén do Judio géunur ro bé Kristowe. ²⁸ Atin ménrugay ro ménbati diyo beroy de dumo ro munur bé Kristowe.

I késélimude dob Jerusalem

15 ¹Bé béno, wén i de étew ménangéy Antiokia tidéw Judea brab ténero roy de munur bé Kristowe maro, “Taman énda fétuli gom loo bé ménbéréhe dob kitabe sénulat Moisese, énda mafukas gom dob de sala gom.” ² Endob i Pablwe brab Bernabewe ménika ro bé kétoro ruwe ni brab toow ro fo ménkérít brab ménasdél ro bé de ni do étew. Atin ménfagayun ro kéluhanan bé i ro Pablwe brab Bernabewe brab de dumo do munur dob Antiokia, mangéy ro dob de apostol brab dob de odoroy de munur dob Jerusalem inok fénginsaé roy fantage bé ni.

³ Atin i de étew do munur dob Antiokia sénugu ro bero mangéy Jerusalem. Atin bé kéagéw ruwe, énggétara ro dob de ingéd féndawét Fenisia brab Samaria. Atin diyo nuret roy fantage bé de étew do békén Judio ménwaléy do munur. Mélaw i de munur dob do no ingéd toow ro fo ménoror amun énggelingoo roy de ni. ⁴ Amun énggégumah ro dob Jerusalem, i de munur brab de apostol brab do odoron, tényakuf ro bero. Atin i Pablwe brab Bernabewe nuret roy kéluhanay rénígoy Tuluse dob berowe. ⁵ Endob i de dumo bé de Fariseo do ménwaléy munur bé Kristowe, téménindég ro brab ménbéréh ro maro, “Fatut tulién i de étew do békén Judio do ménwaléy munur bé Kristowe brab fatut suguén ro bé odoro roy kéluhanay de kukuman sénulat Moisese.”

⁶ Atin ménslimud i de apostol brab do odoron inok sétiawané roy fantage bé ni. ⁷ Amun ménrugay ron ménbéréh-béréh, téménindég i Pedrowe brab ménbéréh mano, “Do dumo gu, énggétiga kom i ni: Bé i kéluhana tome dini, fénemili i Tuluse begén bé do gétah inok ureté kuy Fiyowe Uret dob de békén Judio inok munur ro so. ⁸ I Tuluse gétiga noy

fédéw i kéluhanay étewe. Atin fénténgténgén i kétayakuf ne bé de békén Judio bé kéiray ne bé Rémogor ne dob berowe ségiléw so bé kéiray ne de dob betome. ⁹Enda fénésbida no betom bé berowe non léinisén soy de fédéw ro non ménunur ro bé Kristowe. ¹⁰Aw méuyot gom rémigo bé kéikaay Tuluse funa no kémukum begom? Aw féodoro kom beroy de sugu tidéw dob kitab Moisese foy de katufua tom brab betome énda énggéodoro tom de? ¹¹Békén i nan! Munur tom bé méfukas tom sabaf bé kégédaw i Kadnane Jesus, betom ségiléw so bé berowe.”

¹²Tidéw béno, ménantés ro kéluhanan amun énggelingoo roy bénréh ro Bernabewe brab Pablowe fantag bé de mékégaif fénrigoy Tuluse bero amun diyo ro dob de étew békén Judio. ¹³Amun énggilid ron émbéréh, ménbéréh i Santiagowe mano, “Do dumo gu, fégélingo gom! ¹⁴I Simon Pedrowe, mantu séna nureténi dob betomey sunguwe kégédaw i Tuluse dob de békén Judio amun fénémilién i de dumo bero ménwaléy so do kaan étew munur bé Beene. ¹⁵Ségiléw so bé niy bénréh i de méntélata do sénarigoy Tuluse muret bé kékéréh ne. Non sénulat ro mano, ¹⁶‘Ménbéréh i Kadnane mano, séfuleu moso dob de séfu Datu Dabid. Brab fétindégé ku man bero non ségiléw ro bé sébaane lawi ménrundas. ¹⁷Rigoné kuy ni inok i kéluhanay de étew munur ro dob Begéne, loo soy de étew békén Judio do fénemili gu waléy kagén do étew. ¹⁸Been i niy bénréh i Kadnane, sani ménfégétigane bé de ni tidéw féganay.’”

¹⁹Atin fentaus Santiagowey kékéréh ne mano, “I kagéne de karang, énda damén férégéno tom i de étew békén Judio énggésénule ron brab munur ro bé Tuluse. ²⁰Yamula, sulata tom bero, bé békén ro sa mama bé amaéne ménwaléyén mékérésik dob adafay Tuluse non ténulak dob de kéninontow, brab békén ro bigaén, brab békén amaé roy de binatang énda ménsumbalién, brab békén ro mama dara. ²¹Fatut rigoné roy ni inok énda mékérít i de Judio non ménrugayén i de kitab sénulat Moisese, ménbasanén dob kéluhanay de lawi féngadafay de Judio sénga gai kétéren, atin ménureténi dob kéluhanay de ingéd.”

I sulate mangéy dob de munur do békén Judio

²²Tidéw béno, i de apostol brab de odoron brab kéluhanay de munur bé Kristowe, ménfagayun ro ménémili bé de dumo bero. Atin fenuwit ro bero mangéy Antioquia ménodor ro bé Pablowe brab Bernabewe. Brab fénemili roy Judase (féndawét so Barsabas) brab Silase sani de ruwo gétew toow fo basanay de munur. ²³Atin fenuwit ro beroy sulate ni émbéréh mano, “I de begey do apostol brab do odoron, sani de dumo gom munur bé Kristowe dob Jerusalem, ségifaé key begom do dumo gey munur bé Kristowe do békén Judio bati dob Antioquia, dob Siria, brab dob Silisia. ²⁴Enggelingoo key wén i do dumo gey ménangéy dob begome brab fénbuku roy de fédéw gom bé de kékéréh ro. Endob énda sénugu

gey bero rémigo bé de ni. ²⁵Mélaw méniséfagayun gey ménémili do lagéy inok sugué key bero mangéy dob begome. Modor ro bé Pablowe brab Bernabewe sani de kégédawa key do dumo tom. ²⁶Beroy de étew niray roy férénawa ruwe dob galbék i Kadna tome Jesu Kristo. ²⁷Mélaw sugué key i ro Judase brab Silase inok ureté ro dob begomey ségiléwe bé ni sénulat gey. ²⁸I Rémogor i Tuluse fénggésobutén begey brab ménagayun gey bé éndaén férégénon gom saliyu bé de ni do sugu: ²⁹Kagom mama bé étingayéne ténulak dob de kéninontow, brab kagom mama dara, brab kagom mama bé de binatang énda ménsumbalién, brab kagom bigaén. Fijo ké odoro kom i de ni. Been say niy béréhé keye begom. Salamat.”

³⁰Tidéw bénou, ménagéw i de sénugu ro ni mangéy Antiokia. Amun énggégumah ro diyo, ténawag roy kéluhanay de munur bé Kristowe brab niray roy ni sulat. ³¹I de étew diyo amun énggébasana roy ni sulat, toow ro fo ménoror bé de ni kékérél funay de fédéw ro ménfiyo. ³²Atin i ro Judase brab Silase (beroy de sénarigoy Tuluse muret bé kékérél ne), ménrugay i kéureto ruwe bé de étew inok waléy fiyoy de fédéw ro brab inok waléy méégét i kéunur ruwe bé Kristowe. ³³Atin ménbati ro diyo bé ménfiroye géfadiyan. Tidéw bénou, fénséfule i de dumo ro munur bero mangéy Jerusalem dob de étew séménugu bero. Atin ménbérél ro mano, “Fijo damén i kéagéw gome.” ³⁴Endob i Silase ménbati dob Antiokia.

³⁵I Pablowe brab Bernabewe ménbati ro dob Antiokia bé ménfiroye gétérésang kélungonon. I berowe brab de médoob dumo ro munur bé Kristowe, nuret ro brab ténero roy kékérél i Kadnane dob de étew.

I késésuway Pablowe brab Bernabewe

³⁶Enda ménrugayén tidéw bénou, i Pablowe bénréhén dob Bernabewe mano, “Séfule to mangéy dob de ingéd nureto to bé kékérél i Kadnane inok angéyé to tukawén i de dumo tom munur bé Kristowe brab inok gétiga to ké ati falas ruwe diyo.” ³⁷Atin i Bernabewe méuyot de ké uwitén i Juane Markose. ³⁸Endob i Pablowe ménika muwit bé Juan Markose non téenagakén bero dob Pamfilia brab énda ménfédaydayén modor bero dob galbék i Tuluse. ³⁹Mélaw i Pablowe brab Bernabewe toow ro fo énggésédél fantag bé Juan Markose. Tidéw bénou ménésuway ro. Nuwit Bernabewey Juan Markose ménada bé barkowe mangéy Siprus. ⁴⁰Atin i Pablowe fénémilién i Silase modor de. Atin i de dumo ro do munur déménasal ro dob Kadnane inok Been i manangguwit bero bé kéagéw ruwe brab mégédaw bero. ⁴¹Atin ménagéw ro mangéy Siria brab Silisia, brab fénbagér roy kéunur i de dumo ro munur bé Kristowe dob de ni do ingéd.

Ménodor i Timoteowe

16 ¹Atin i Pablowe ménangéy dob de ingéd féndawét Derbe brab Listra. Diyo wén i ségitéwe lagéy munur bé Kristowe féndawét

Timoteo. I idéng ne ségettew libun Judio, munur bé Kristowe. Endob i boh ne békén Judio, i beene ségettew lagéy Griego. ² Atin i kéluhanay de munur bé Kristowe dob Listra brab Ikonium bénréh roy fiyowe fantag bé Timoteowe. ³ Atin i Pablowe ni ménuyot muwit bé Timoteowe ni modor bero. Mélaw ténulién loo bé adat i de Judio. Rénigo noy ni inok énda siyawéy de Judio de, non i kéluhanay de Judio dob de ingéd ayo ro, gétiga roy békén Judioy boh ne. ⁴ Atin ménagéw ro man. Amun ménawét ro dob de ingéd, nuret ro dob de munur bé Kristowey de sugu sénfagayunoj of apostol brab do odoron bé késélimud ruwe dob Jerusalem. Atin bénréh ro bero bé odoro roy de ni do sugu. ⁵ Mélaw i de ménlimud do munur bé Kristowe ménwaléy émbagér i kéfeginugut ruwe brab méninut ro médoó sénga fuweh.

Dob Troas

⁶ Ménagéw ro témara bé de sakuf i de gonon féndawét Frigia brab Galasia, non i Rémogor i Tuluse énda ténungkasén bero muret dob Asia. ⁷ Amun énggumah ro dob gonone féndawét Misia, téménlama ro mangéy Bitinia. Endob i Rémogor Jesuse énda ténungkasén bero mangéy diyo. ⁸ Mélaw léménudug ro mangéy dob ingéde Troas dob féedoror i dogote, témara bé gonone Misia. ⁹ Amun bé kélunganone de wén i énggétégénéf Pablowe, non wén i fénggitoy Tuluse de. Atin énggito noy ségettew lagéy tidéw Masedonia téménindég brab nongotén dob Pablowe mano, “Ay go dini dob Masedoniawe ni brab tabangén gey.” ¹⁰ Amun énggilid i ni téginéf, ménagékés gey mangéy Masedonia, non gétiga key ténawag i Tuluse begey dob Masedonia inok toroé key diyo i Fiyowe Uret.

Dob Filipos

¹¹ Dob Troas, ménda gey barko fééntang mangéy dob bungéde Samotrasia. Atin bé gétunduge de fuweh, ménauts gey mangéy Neapolis. ¹² Atin tidéw man Neapolis, ménagéw gey dob ingéde féndawét Filipos. Been i niy mélagae dakél ingéd dob sakuf i Masedoniawe. Brab médooy de étew tidéw Roma bati diyo. Atin ménbati gey diyo bé ménfiroye gétérésangan. ¹³ Bé gayi kétéréne, ménut gey tidéw dob ingéde ni brab ménangéy gey dob féedoror i dakéle wayég, non makey ké diyo i gonoy de Judio démasal. Amun énggumah gey diyo, ménut gey brab ménsebéréh-béréh gey i de libun ménlimud diyo. ¹⁴ I ségettewé bé de ni do libun, i dawét ne Lidia, tidéw dob ingéde féndawét Tiatira. I galbék ne émfébéléy bé de balilaga furo safut. Tintu fo ménintulus i ni libun. Atin féntayakuf i Kadnaney fédew ne atin ménunur bé de kétoro Pablo. ¹⁵ Mélaw ménfébautis i ni libun brab de dumo no sétifon. Tidéw bénó bénréhén begey mano, “Amuk gékaranga kom tintuwu fo munur bé Kadnane, ay gom dob lawi guwe atin diyo gom bati.” Mélaw fénodorén begey.

I Pablowe dob férисуноне

¹⁶ Wén i no sébaan fuweh, bé lala geye magéy dob gonone démasal, wén i ségétéwe rifén kénogon énggébalaka no begey.

Rénahukoy saitane, komon gébérého noy ati mérigowe moso dob de gégumah do gai. Atin dakél i gédotéy de gefe de kurta bé ni galbékén bérhénoy ati mérigowe moso dob de étew. ¹⁷ Atin ménfuray begey ro Pablowe brab ménkes mano, “I de ni do étew, beroy sugu-suguéy toowe fo gérotor Tulus. Ureté ro dob begomey atiy géfukase begom.” ¹⁸ Beeniy rénígo nuwe bé ménfiroye gétérésangan taman ménrarék i Pablowe.

Mélaw sénaréwén ténéngténgén i ni kénogon brab ménbéréh dob saitane mano, “Dob barakat Jesu Kristowe, sugué ku beem tékédan dob ni kénogon!” Sonom béno, méntékédan i saitane dob beene. ¹⁹ Endob i de gefe bé ni rifén, amun énggito ro éndaén gégedot ro de kurta, ménkérit ro fo toow. Atin kénéfo roy ro Pablowe brab Silase, atin génuyud ro bero mangéy dob de gémamak kukuman dob fadiyane. ²⁰ Atin nuwit ro bero mangéy dob adafay de odoron tidéw Roma, brab bénréh ro maro, “I de ni do étew, do Judio. Rimburé roy katome ni ingéd. ²¹ Toroé roy adate sébanil bé de kukuma tom. Do Romano tom, brab énda fakayén odoro tom i nan adat toroé ro.” ²² Atin médooy de étew ménamung lémubag bé ro Pablowe brab Silase.

Atin i de odoron fénkeda roy de kégal ro Pablo brab Silas brab fénbadas ro bero. ²³ Amun énggilid ro bénadas fo toow i ro Pablowe brab Silase, fénrisu ro bero, atin bénréh ro dob mantaye bé férисуноне bé toow fo bantaya no bero. ²⁴ Mélaw fénahurén bero dob sibéye dob kérara i férисуноне brab fénatungén i de sékéy ro dob toowe fo émbégat do dakél kayéw inok énda géagéw ro.

²⁵ Amun kérara kélungononén, i ro Pablowe brab Silase déménasal ro brab kéménanta ro dob Tuluse. Atin fénggélingo i de dumo ro férisu. ²⁶ Atin méntékow léménuba toow fo émbagér, atin i férисуноне ni ménkuyung fo toow. Brab sonom so béno, ménungka i kéluhanay de fintu. Atin ménukoh i de sangkali fénggéikét bé de sékéy i de férisu. ²⁷ Atin ménulég i mantaye bé de férisu. Amun énggito no ménungka i kéluhanay de fintu, manok énggésut i kéluhanay de férisu. Mélaw nawitén i sundang ne dob rumá ne brab fétoyoén damén, non gétiga no féléhuéy de odoron amuk énggésut i de férisu. ²⁸ Amun gédetén damén fétoyo, ténawag Pablowe mékes mano, “Kago fétoyo, ay ni gey so kéluhanan!”

²⁹ Atin i mantaye ni bé de férisu, téménawag ménongot solo brab ménsegéta mahur dob férисуноне ni. Toow fo léménukub bé kégilak ne, brab méntéléngkéb dob adafay de sékéy ro Pablo brab Silas. ³⁰ Tidéw béno, nuwitén bero mésut brab fénénginsaa no bero mano, “Ati fatute rigoné ku inok méfukasu dob de sala gu?”

³¹ Atin séménumbul ro maro, “Unur go bé Kadnane Jesus atin méfukas go. Beeme brab de samungém so.” ³² Atin nuret roy kékéréh i Kadnane dob beene brab dob kéluhanay de dumo no sétifon. ³³ Atin bé bénou so kélunganon, i mantaye ni nurahén i de fali ro. Atin tidéw bénou, ménagayas ménfábautis beroy de samungén. ³⁴ Atin fénlowotén i ro Pablwe brab Silase dob lawi ne brab fénamaén bero. Atin i ni ségékuréng toow fo ménoror non ménunur ron bé Tuluse.

³⁵ Atin bé géfuwéne de, i de odoron bé no ingéd, sénugu roy de sarigon mangéy dob férисуноне inok tangéyé ro bero. ³⁶ Mélaw i mantaye bé férисуноне бенрехене dob Pablwe mano, “I de méguléw séménugu ro béréfésutén go brab Silase. Mélaw ésut gomén brab kagomén émbuku.”

³⁷ Endob ménbéréh i Pablwe dob de sarigon mano, “Enda i funa ro begey kékumukum. Gido loo bénadas ro begey dob téngaangay médoowe étew, brab fénrisu ro begey fiyon fo ké énda méntiyawan gey. Brab i begeye do Romano so! Atin béléewe bunéyé ro saén i kékéfésut ruwe begey! Enda fakayén! Béréh gom dob de méguléw tidéw Roma, beroy mangéye dini émféfésut begey.”

³⁸ Atin i de sarigon ménsefule ro dob de méguléw tidéw Roma brab nuret roy kékéréh Pablwe. Atin amun énggelingoo ro Romano so wayoy ro Pablwe brab Silase, toow ro fo ménggilak. ³⁹ Mélaw ménagéw ro mangéy dob férисуноне brab nongot ro dob Pablwe brab Silase béréfésagadé ro bero. Tidéw bénou, nuwit ro bero mésut tidéw dob férисуноне brab nongot ro dob berowe béréfésagadé ronén dob ni ingéd. ⁴⁰ Atin i ro Pablwe brab Silase, amun ménusut ronén dob férисуноне, méntaus ro mangéy dob lawi Lidiahe. Atin diyo énggito roy de dumo ro munur béréfésagadé Kristowe. Brab bénrехене ro beroy fiyowe inok fiyoy de fédéw ro. Tidéw bénou ménkédan ro.

Dob Tesalonika

17 ¹ Atin amun méntaus magéw i ro Pablwe brab Silase, énggétara ro dob de ingéd féndawét Amfipolis brab Apolonia, atin énggégumah ro dob ingéde féndawét Tesalonika. Atin diyo wén i lawie féngadafan kay de Judio. ² Atin i Pablwe loo béréh adat ne ménahur dob lawie ni féngadafan. Méntélék gé-Sabadoy no, sani gaiy kétéré ruwe, i Pablwe ménsebéréh-béréh béréh de étew atin i kékéréh ne tidéw dob Ménsulate Kékéréh i Tuluse. ³ Fénggétiga no bero tidéw dob ni ménusulat béréfésagadé mérásay i Kristowe brab tébule. Ménbéréh i Pablwe mano, “Béréhé ku begom i toowe fantag béréh Jesuse. Beeney Kristowe, sani fénemili i Tuluse méguléw.” ⁴ Atin wén i de ménunur bero brab nodoro roy ro Pablwe brab Silase. Loo soy médoowe do Griego méngintulus brab do gérotor do libun.

⁵ Endob i de Judio méndaléw ro, mélaw lénimud roy de tete étew do énda i galbék ro tidéw dob de aguwon atin rénimbur roy ingéde ni. Atin

dénunsuk roy lawi i ségétéwe lagéy féndawét Jason inok sélédé roy ro Pablowe brab Silase, brab inok uwité ro bero dob adafay de médoor étew.
 6 Endob amun énda énggito ro bero, nuwit roy Jasone brab de dumo no munur bé Kristowe mangéy dob de méguléw bé ni ingéd. Atin ménkes ro maro, “Wén i de étew réménimbur bé kéluhanay de ingéd. Atin béléewe ni, ay ni ro énggégumah dob katome ni ingéd. 7 Atin i Jasone ni, fénbatién bero dob lawi ne. I kéluhana ruwe réménigo ro bé békéné fatut dob kitabe tidéw dob Datu tome dob Roma. Non bénréh roy wén i ségiyo datu, sani féndawéte Jesus.” 8 Amun énggélingoo roy ni kébéréh, ménrimbur i de médoor do étew ménlimud brab de méguléw bé ni ingéd.
 9 Tidéw béno, i de méguléw fénégés roy Jasone brab de dumo no mayad loo bé adat ruwe inok métangéy ro. Tidéw béno fénusut ro bero.

Dob Berea

10 Amun kélungononén, i de dumo ro munur bé Kristowe, fénuwit roy Pablowe brab Silase mangéy dob ingéde féndawét Berea. Amun énggégumah ro diyo, ménangéy ro dob lawie féngadafay de Judio.
 11 Atin i de étew dob Berea, toow na fo fiyoy adat ruwe bé de étew dob Tesalonika. Toow ro fo méuyot mégélingo bé kétoro Pablowe. Atin féganadé roy Ménsulate Kébéréh i Tuluse sénga fuweh inok susiné ro ké toow i kétoro Pablowe. 12 Atin médoor ro ménwaléy munur bé Kristowe. Loo soy de Griego, do lagéy brab do libun do gérotor dob no ingéd.
 13 Endob i de Judio dob Tesalonika, amun énggélingoo roy Pablowe muret bé kébéréh i Tuluse dob Berea, ménangéy ro diyo brab rénimbur roy de médoor étew diyo. 14 Mélaw i de munur bé Kristowe fénagayas ro fénuwit i Pablowe mangéy dob féror i dogote, éndob ménbati i Silase brab Timoteowe dob Berea. 15 I de déménuran bé Pablowe ménodor ro de taman Atenas. Tidéw béno ménsefule ro mangéy Berea. Atin nuwit roy kébéréh Pablowe dob ro Silase brab Timoteowe bé furay ro de magad.

Dob Atenas

16 I lala Pablowe ongot-ongot bero dob Atenas, toow fo ménbuku non médoor foy de kéninontow dob no ingéd. 17 Mélaw i Pablowe ménsebéréh bé de Judio brab de békén do Judio do méngintulus dob lawie féngadafan. Brab sénga fuweh ménsebéréh-béréh so dob fadiyane bé de étew témaria. 18 Ménsebéréh soy Pablowe bé de maistéro témoró bé kéfégitung i de Griego diyo féndawét Epikureo brab Estoiko. Atin ménbéréh i de dumo bero maro, “Ati béréhéy nan félangka-langka étew énda i gétiga-tiga no?”

Atin bang i de dumo de, “Béréhé no keeyén i de tulus dob de ségiyo ingéd.” Bénréh roy ni non nuret Pablowej fantage bé Jesuse brab kétóbulee. 19 Mélaw nuwit roy Pablowe mangéy dob adafay de ménlimud

do odoron, sani féndawét ruwe Areopayo brab ménbéréh ro maro, “Méuyot gey gétigan fantag bé ni mantu kétoro béréhé mo. ²⁰ Enda gésobuto key i de dumo bé de kékérém non toow fo ségiyo bé kageye kéfégitung. Brab méuyot gey de ké gétiga key i atag i de ni.” ²¹ (Loo bé niy kébéréh ruwe non i kéluhanay de étew dob Atenas brab de étew tidéw dob de ségiyo ingéd bati diyo, méuyot ro mégélingo brab séuret-uret bé de mantu uret sénga tékélid.)

²² Mélaw téménindég i Pablowe dob téngaangay kéluhanay de odoron diyo ménlimud. Atin ménbéréh mano, “Do étew dob Atenase ni, énggito gu toow gom fo mégéror méngadaf. ²³ Non amun ménsugud-sugudu dob kagome ni ingéd brab ténéngténg guy de gono kom méngadaf, énggito guy sébaane gono kom méngadaf témulak. Wén i sénulate de mano, ‘Dob ni, féngadafén i tuluse énda gélolono.’ I nan féngadafé kom fiyon fo ké énda gélolo gom de, Been i ni ureté ku begom. ²⁴ I Tuluse léménimbag bé duniyae ni brab kéluhanay éntingayéne. Been i Kadnay lawaye brab duniyae. Atin énda batién dob de lawi rénígoy kéilawane. ²⁵ Atin énda i éntingayén kailanga no géiray i étewe de tidéw dob de génalbéko no. Non Beeney méniraye bé kéuyage brab férénawawe dob kéluhanay de étew brab Been soy miraye bé kéluhanay éntingayéne kailanga tom. ²⁶ Tidéw dob ségétéwe étew, rénígo noy kéluhanay de séségiyo-giyo do étew brab bénragarén betom dob duniyae ni. Atin Been i ménemilie bé de gai tom brab de gono tom bati. ²⁷ Rénígo noy ni inok i de étew sélédé roy Tuluse brab dob késéléd ruwe de, gito ro so keeyén. Endob i toowe, énda mérayu i Tuluse dob betome do étew. ²⁸ ‘Non tidéw dob Beeney kéuyag tome brab férénawa tome brab kégéagéw tome.’ Loo so bé niy bénréh i de dumo gom do muret binuwaya maro, ‘Betome soy de ngaén.’ ”

²⁹ Atin féntaus Pablowej kékéréh ne mano, “Non betom i do nga i Tuluse, katom karangén de ké i falas i Tuluse loo bé falas i de kéninontow do bélownon taloo no do filak taloo no do batéw rénígoy kéilawane.

³⁰ Féndaya i Tulusey éndae kégéoloy de étew de bé do gétah, brab énda kénukumén bero. Endob béléewe ni sénuguén i kéluhanay de étew dob kéluhanay de ingéd bé fatut ro gésénule bé de tete rigoné ro brab fatut tagaké ro. ³¹ Non fénémili i Tuluse nén i gaiwe ké kukumé non i kéluhanay de étew dob duniyae ni bé toowe fo métintu. Atin i fékukumé nuwe Been i fénémili ne. Atin féngéololo noy ni dob kéluhanay de étew bé kékétébule ne de tidéw bé kéléhu ne.”

³² I de dumo bé de étew diyo, amun énggelingoo roy kékéréh Pablowe fantag bé kétóbulee, déniyangka roy Pablowe. Endob i de dumo de ménbéréh ro maro, “Méuyot gey man mégélingo beem muret féruman fantag bé de ni.” ³³ Mélaw méntékédan i Pablowe tidéw dob de ménlimud ni do étew. ³⁴ Atin i de dumo bé de étew ni ménwaléy ro munur bé Jesuse brab nodoro roy Pablowe. Ségétew beroy lagéye féndawét Dionisio,

ségétew kéfédewan diyo. Brab ségétew so libun féndawét Damares brab wén soy do ségiyo do étew do ménunur.

Dob Korinto

18 ¹Amun énggilid i ni, méntékédan i Pablwe dob Atenas brab ménangéy dob ingéde féndawét Korinto. ²Diyo énggabalaka noy ségétéwe Judio féndawét Akila tidew Ponto. Mantu séna énggumah tidew Italia beroy bawag ne féndawét Prisila, non i datus féndawét Klaudio, fentekéda noy kéluhanay de Judio diyo dob Roma. Atin nangéy Pablwe bero lénangu. ³Atin ménbati diyo non ségiléw i galbék ruwe Akilawé rémigo tulda. Brab ténabanga no bero gémalbék. ⁴Sénga gai kétérén, ménangéy i Pablwe dob lawie féngadafay de Judio, atin ménsbéréh bé de étew diyo inok i de Judio brab de békén Judio waléy ro géunur bé Kristowe.

⁵Amun énggumah i ro Silase brab Timoteowe tidew Masedonia, éndaén géménalbék i Pablwe saliyu bé kéuret ne fantag bé Jesuse. Nuretéen dob de Judioy Jesusey Kristowe, sani fénemili i Tuluse méguléw. ⁶Amun ménwaléy ro sébanil bé Pablwe brab bénrého ro do tete, ténagtag Pablwey de bubuk sébuwan dob kégal ne, brab ménbéréh mano, “Békénén kagén aturan ké énda méfukas gom. Yamula do begom soy séndito kom de. Tidew béeleewe ni mangéyun muret dob de békén Judio.” ⁷Mélaw méntékédan diyo brab ménangéy bati dob lawi i ségétéwe lagéy békén Judio méngintulus féndawét Titio Justo. Ménsedoror i lawi ne dob lawie féngadafay de Judio. ⁸Atin i lagéye féndawét Krispo, beeney méguléwe bé lawie féngadafan. I ni lagéy tintu fo ménunur bé Kadnane, loo soy kéluhanay de samungén. Atin wén i de médooy de ségiyo étew dob Korinto énggelingoo roy Fiyowe Uret, brab ménunur ro brab ménfébautis ro.

⁹Wén i no sébaan kélunganon, i Pablwe wén i énggétéginefo no brab i Kadnane ménsbéréh de mano, “Kago mégilak! Fétausém i kéuret me. Fiyon fo ké ati mérigowe, kago térenon i galbék me. ¹⁰Non démoyunu modor beem. Enda gésug-sug go non médooy de kagén étew dob ni ingéd.” ¹¹Mélaw ménbati diyo bé rugay i ségbélantuwa bra némi gétérésang kélunganon téromo bé kékéréh i Tuluse.

¹²Amun ménwaléy gobernador i lagéye féndawét Galion dob Akaya, ménselimud i de Judio brab kénéfo roy Pablwe brab nuwit ro dob adafay gobernadore ni inok kukumé no. ¹³Atin bénréh ro maro, “I ni lagéy, féfengintulusé noy de étew bé békéné fatut dob kitab geye.”

¹⁴Amun émbérhéhén damén i Pablwe, ménbéréh i gobernador Galione dob de Judio mano, “Amuk tete i rénigo nuwe taloo no énda nodoro noy kukumay de Romano, fakay getingkélo ku begom do Judio brab begén i kémukum de. ¹⁵Endob i de ni funa kom de sébanil, been say fantage

bé de dawét brab de kékérédh dob kagome kitab. Mélaw begom séden i kémukum de, non békén begén i kémukum de.”¹⁶ Brab féntékéda no bero dob gonone ni kémukum.¹⁷ Tidéw béno, kénéfo roy lagéye méguléw bé lawie féngadafay de Judio féndawét Sostenes brab lénubag ro dob téngaangay gonone kémukum. Endob féndaya Galione saén, brab énda méntete i fédew ne de.

I késéfule ro Pablowe mangéy Antiokia

¹⁸ Amun ménggilid i ni, ménbati nay Pablowe dob Korinto bé ménfiroye gétérésangan. Tidéw béno, ménggétaw dob de dumo no munur bé Kristowe. Amun énggumah dob Senkrea, ménfétébungow non méntumanén i fasade rénigo no. Tidéw béno, ménda barko bero ro Prisila brab Akila mangéy Siria.¹⁹ Amun énggumah ro dob Efeso, ténagak Pablowej ro Akilawe brab Prisilawe atin ménangéy dob lawie féngadafay de Judio. Atin diyo ménésbérédh bé de Judio.²⁰ Atin nongot ro dob beene ké férugay na bati dob berowe. Endob énda ménagayu no.²¹ Yamula amun mégétawén, bénréhén bero mano, “Amuk kétayay Tuluse, séfuleu so mangéy dini.” Tidéw béno, ménda barko brab méntékédan dob Efeso.

²² Amun déménunggu dob Sesaria ménangéy i Pablowe Jerusalem inok angéyé no ségifaén i de munur bé Kristowe diyo. Tidéw béno, méntaus mangéy Antiokia.²³ Atin ménbati saén diyo bé ménfiroye géfadiyan. Tidéw béno ménagéwén man. Atin ménawét man dob de gonon dob sakuf i de ingéd féndawét Galasia brab Frigia brab fénégétén i kénur i kéluhanay de kuyug Jesus diyo.

Fantag bé Apolose

²⁴ Atin wén i ségétewe Judio féndawét Apolos tidéw Alejandria, énggumah dob Efeso. Toow fo fiyo muret brab tintu fo gétiga noy Mén sulfate Kékérédh i Tuluse.²⁵ Méntoro fo bé fantage bé Agéwoy Kadnane. Atin toow fo émbagér i kéuret ne brab kétoro ne fantag bé Jesuse. Katabuwan fo brab toow i kétoro ne, éndob i gétiga nuwe saén i kékautis Juane.²⁶ Atin méngganay fébaraw émbérédh dob lawie féngadafay de Judio diyo, atin énggelingoo ro Akilawe brab Prisilawe. Mélaw nuwit ro mangéy dob lawi ruwe brab nuret ro dob beeney kéluhanay éndae séna gétiga no fantag bé Agéwoy Tuluse.²⁷ Tidéw béno, ménuyot i Apolose mangéy Akaya. Mélaw i de dumo no munur bé Kristowe dob Efeso, ténabanga ro atin séménulat ro dob de dumo ro munur bé Kristowe dob Akaya inok tayakufé ro ké gégumah diyo. Atin amun énggégumah i Apolose diyo, toow fo dakél i kétabang ne bé de étew do ménwaléy munur bé Kristowe sabaf bé kégédaw i Tuluse.²⁸ Non tabanan i de Judio de ké séédél ro dob téngaangay de médoó étew. Non tidéw dob Mén sulfate Kékérédh i Tuluse fénggélolo noy Jesuse, Beeney Kristowe.

I Pablowe dob Efeso

19 ¹Amun diyo i Apolose dob Korinto, i Pablowe ménawét dob de ingéd fingé dagé taman énggumah dob Efeso. Atin diyo énggito noy de dumoy de kuyug Jesus. ²Brab fénénginsaa no bero mano, “Amun munur gomén, aw énggumahén i Rémogor i Tuluse dob begome?”

Séménumbul ro maro, “Enda gétiga key de ké wén i Rémogor i Tuluse.”

³Atin ménénginsa man i Pablowe mano, “Ati funa kome ménfábautis?”

Séménumbul ro maro, “Ménfábautis gey bé Juane inok fégito gey i kéunur geye bé kétoro ne.”

⁴Atin ménbérél man Pablowe mano, “I kékautis Juane, been i nan i fégéolonone bé kégésénule i de étew bé de sala ro. Atin bénréh Juane dob de Judio bé fatut ro munur bé étewe gégumah gétundug de, sani Jesuse.”

⁵Amun énggelingoo roy ni, ménfábautis ro inok fégito roy kéunur ruwe bé Kadnane Jesus. ⁶Atin ténégé Pablowe bero atin énggumah i Rémogor i Tuluse dob berowe. Atin énggésébérél ro bé de ségiyo késébérél énda gétiga ro de brab nuret roy kékérél i Tuluse. ⁷Gédét ro folo bra ruwo gétew diyo.

⁸Bé rugay i méntéléwe gétérésang kélunganon diyo, i Pablowe démoyunén mahur dob lawie féngadafay de Judio brab ménchébérél bé de Judio diyo. Atin toow fo émbaraw muret émféunur bero bé kékéulgéw i Tuluse. ⁹Endob i de dumo bero toow fo métégas i de uléw ro, mélaw mika ro munur. Atin ménbérél ro na tête fantag bé Agéwoy Kadnane dob téngaangay kéluhanay de étew ménlimud. Mélaw méntékédan i Pablowe diyo brab nuvitén i kéluhanay de kuyug Jesus. Atin féntausén i kétoro ne bero dob sékuwelahane ka Tiranowe sénga fuweh. ¹⁰Atin téménoro diyo bé ménruwowe gébélantuwa. Mélaw i kéluhanay de étew bati dob Asia, do Judio brab do békén Judio, énggelingoo roy kékérél i Kadnane.

I de nga Eskeba

¹¹Atin fénrigoy Tuluse do médoo mékégaif i Pablowe. ¹²Fiyon i de munsala brab do tuwaliya nusar Pablowe, uwitén dob de démeruun atin waléy ro adi-adi brab i de saitan réménahuk dob de étew, ménraréy ro. ¹³Atin wén i do Judio démoyun magéw brab do démédél saitan réménahuk dob de étew. Atin ténulama ro nusar i dawét i Kadnane Jesus fégédédél ro saitan. Ménbérél ro dob de saitan maro, “Dob dawét Jesuse sani ureté Pablowe, sugué key beem méraréy.” ¹⁴I de dumo bé de ni do lagéy réménigo bé de ni, been i de fitew gétew nga i ségétéwe gérotor fadi i de Judio féndawét Eskeba.

¹⁵Endob dénawaay saitane bero mano, “Gélolo guy Jesuse brab Pablowe, éndob ati begoma nan?”

¹⁶Tidéw béno, sénayaway lagéye bero rénahukoy saitane brab énda énggégaga ro bé ni lagéy. Atin lénubagén bero. Mélaw ménraréy ro tidéw dob lawi ne ménfali brab ménlékas ro. ¹⁷Atin i kéluhanay de étew batí dob Efeso, do Judio brab do békén Judio énggélingoo roy fantage bé ni. Mélaw toow ro fo ménggilak. Atin ménumanan i kébantug i dawét i Kadnane Jesus. ¹⁸Atin médooy soy de munur bé Kristowe ménangéy dob téngaangay de étew atin ménémayag bé de tete rigoné ro. ¹⁹Atin i de dumo bero do béliyan nuwit roy de nusar ro do libro béliyan. Atin ténambak ro bero brab ténuwég ro dob téngaangay de étew. Atin bénilang ro ké firoy i laga i de ni do libro, énggégumah limo folo ngibu dob karowe kurta. ²⁰Atin loo bé niy kélalag i kélérah i Kadnane dob de étew diyo, brab minut médooy de étew munur de.

I kérimbure dob Efeso

²¹Amun énggilid i de ni, ménuyot magéw i Pablwe mawét dob de gonon sakuf i de ingéd féndawét Masedonia brab Gresia mangéy Jerusalem. Brab ménbéréh i Pablwe mano, “Amuk gérumahu dob Jerusalem, fatutu so mangéy Roma.” ²²Endob fénétah Pablwey de ruwo gétew témbangan de ro Timoteo brab Erasto mangéy Masedonia. Atin i beene ménbatí na dob Asia.

²³Bé do no do gai, toow fo mégukét i de étew dob Efeso sabaf bé Agéwoy Kadnane. ²⁴Diyo wén i ségetéwe lagéy fanday féndawét Demetrio, méndot médooy do étewén rémigo do kéninontow do filak. Atin i de ni kéninontow rénigo ro loo bé lawie féngadafan bé libune tulus ro féndawét Diana, atin fébéléy ro brab gégedot ro de médooy kurta. ²⁵Tidéw béno, i ni fanday féndawét Demetrio ténawagén i kéluhanay de étewén rémigo do kéninontow beroy de dumo ro na géségiléw galbék brab bénréhén dob berowe mano, “Gétiga kom i funa tome kawasa non bé ni galbék tom do rémigo kéninontow. ²⁶Endob énggito gomén brab énggélingoo komén i rigoné Pablwe ni. Bénréhén dob de étew, i de tulus do rénigo tom békén kun tintu tulus. Atin médooy de étew énggféunurén. Békén saén dob ingéd tome ni Efeso, éndob loo soy kéluhanay de ingéd dob Asia. ²⁷Mélaw mébinasa keeyén i katome ni galbék sabaf bé nan kétoro, non émbéréh tete i de étew fantag bé katome ni galbék. Brab saliyu na bé nan, tagakéy de étew moso i lawie féngadafa tom bé libune tulus Diana. Atin been i nan i funay ménbantuge tulus Diana mékédan. Beeney féngadaféy kéluhanay de étew dob ingéde Asia brab dob duniyae ni, éndob éndaén mosoén fégadata ro de.”

²⁸I de ménlimud do étew, amun énggélingoo roy ni, toow fo ménkérit ro brab ménkes ro maro, “Toow fo ménbantug i Dianahe sani tulus tome do tidéw Efeso.” ²⁹Tidéw béno, rénimbur roy ingéde. Atin kenéfo roy ruwowe gétew lagéy tidéw Masedonia ménodor bé Pablwe féndawét

Gayo brab Aristarko. Atin fénagayas ro nuwit mangéy dob dakéle lawi dob adafay de ménlimud do étew. ³⁰ Atin i Pablowe méuyot damén mangéy so dob adafay de ménlimud ni do étew. Endob i de dumo no munur énda fénagéw ro de. ³¹ Atin i de dumo bé de méguléw dob Asia sani de dumo Pablo, ménféuwit ro kékérél nongot ro so bé békén mangéy i Pablowe dob adafay de étew ni ménlimud. ³² Atin toow fo ménrimbur i kéléuhanay de étew ni ménlimud atin kéléuhana ro mékes séségiyo-giyoy bérhéhé ruwe, non i kédoono ruwe énda gétiga roy funa ruwe ménslimud. ³³ I de dumo bero marok Alejandrowey funa ruwe ménslimud non féntindég i de Judio dob adafay de étew. Atin i Alejandrowe séniniyasa noy de étew bé békén ro selekén inok émbérél bé mamfil so dob berowe. ³⁴ Endob amun énggétiga ro Judio soy beene, ménkes ro séréngan bé ménruwowe géuras maro, “Toow fo ménbantug i Dianahe, sani tulus tome do tidew Efeso.”

³⁵ Tidew béo, i ségétéwe bé de méguléw bé ni ingéd, féntanékén i de étew brab ménbérél mano, “Do dumo gu dob Efesowe ni, i kéléuhanay de étew énggétiga ro dob Efesowe niy gonoy lawie féngadafan bé ménbantuge tulus Diana brab mékétéfuwe batéw ménlawu tidew dob lawayo. ³⁶ Enda i gédirung de. Mélaw kagomén mékerit taloo no rémigo gom tete bé éndae métayéw funa no. ³⁷ Nuwit gom diniy de étew ni fiyon fo ké énda mon ménénakaw ro dob de lawi féngadafan taloo no ménbérél ro tete fantag bé tulus tome Diana. ³⁸ Mélaw i Demetriowe beroy de dumo no fanday, amuk wén i téboé ro, fatut ro mangéy dob de kémukum bé fatute gai. Atin fakay témo ro diyo. ³⁹ Endob amuk wén nay ségiyo kétaya kom, fakay fétiyawa kom bé kéléuhanay de étew sélimud begey do odoro kom. ⁴⁰ Non fakay betom i météboe bé ni késérimbur ménrigo béeewe ni. Brab énda géséliyah tom de non énda foy funa tom mérimbür.” ⁴¹ Amun énggilid bénréhén i ni, fénuleén i kéléuhanay de étew.

Dob Masedonia brab Akaya

20 ¹ Amun éndaén sérimbur ro, féntawag Pablowej kéléuhanay de munur bé Kristowe inok sélimud ro. Atin fénbagérén i de fédew ro bé kékérél ne. Tidew béo, ménggétawén dob berowe brab ménagéw mangéy Masedonia. ² Nangeyén ténukaw i de ingéd diyo brab fénfiyo noy fédew i de munur bé de kétoroén. Atin méntaus magéw taman énggumah dob Akaya. ³ Atin ménbati diyo télew gétérésang kélungonon. Amun magéwén damén mangéy Siria, énggelingoo noy bénantak i de Judio diyo féléhué ro. Mélaw ménfule i Pablowe témara bé Masedoniawe. ⁴ Atin wén i de lagéy de ménodor ro Sopater nga Piro tidew Berea, ro Aristarko brab Segundo tidew Tesalonika, Gayo tidew Derbe, brab Timoteo, brab Tikiko brab Trofimo do tidew Asia. ⁵ I de ni do lagéy méntah ro mangéy

Troas atin nongot-nongot ro begey diyo. ⁶ Amun énggilid i kékandulione bé kéamae bé fane énda i fénggféféruck de, ménda gey barko tidéw Filipos mangéy Troas. Ménlimo gétérésangan tidéw bé no, énggumah gey dob Troas atin diyo énggumaha key i de dumo gey. Atin ségéfadiyan gey ménbati diyo.

Dob Troas

⁷Bé sunguwe fuweh bé no fadiyan, ménsélimud gey mama bé fane émfégétédém bé kéléhu Jesuse. Atin i Pablowe ménuret toow fo mérugay énggumah kérara kélungonon, non magéw so bé démoe de. ⁸Atin médooy de solo dob sibéye dob rotor i lawie gono key ménsélimud. ⁹I nan sibéy, been i toowe fo gérotor dob lawie ni télécéw géandana i kégérotor ne. Wén i kénogo lagéy diyo féndawét Eutiko, ménsar dob faliluwangay gérotore ni sibéy. Endob énggfidong i ni kénogo lagéy, non toow fo métah i uret Pablowe. Tidéw béno, ménlawu mangéy fantad tidéw dob gono nuwe ni ménsar brab ménléhu. Atin amun nangéy ro fénurut, énggito ro ménléhuén. ¹⁰Endob ménlus soy Pablowe brab fénagayasén nangéy nékéf. Brab ménbéréh mano, “Kagom émbuku, méuyag so!” ¹¹Tidéw béno, ménénik man i Pablowe brab sénkébeng-kébengén i fane atin ménama. Atin féntausén i kéureto nuwe bero taman sémbangén i térsange. Tidéw béno, ménagéw i Pablowe. ¹²Atin nuwit i de étew mule i kénogo lagéye ni méuyag. Atin ménfiyoy de fédéw ro non ménuyag so.

Dob Mileto

¹³Tidéw béno, ménsésuway gey bé Pablowe dob Troas, atin ménda gey barko mangéy Asos. Diyo nongot-nongot gey i Pablowe loo bé késugu ne begey, non ménuyot mémantad tidéw Troas mangéy Asos. ¹⁴Amun énggéségitoy gey dob Asos, ménda soy Pablowe dob barkowe, atin kéluhana key méntaus mangéy Mitilin. ¹⁵Tidéw béno, ménangéy gey Kios bé démoe de. Atin bé gétunduge de fuweh énggumah gey dob Samos. Dob gétunduge de man fuweh énggumah gey dob Mileto. ¹⁶Atin i Pablowe ménuyot de ké témara gey saén dob Efeso inok énda méanggaén dob Asia non toow fo magayas. Méuyot de ké gégumah dob Jerusalem bé gaiy Pentekostese, amuk fakay.

Ménggétaw i Pablowe

¹⁷Mélaw tidéw Mileto, i Pablowe ménféuwit kékéréh mangéy Efeso brab féntawagén i de odoroy de munur bé Kristowe diyo inok balaké ro. ¹⁸Amun énggumah ronén, ménbéréh i Pablowe mano, “Enggétiga kom i kébati guwe dob begome tidéw fanay kégumah gu dob sakuf i ingéde Asia. ¹⁹Atin gétiga kom rénigo guy galbék i Kadnane bé béno. Atin énda téfégérotoru, yamula kéménrewu sabaf bé kégédaw guwe begom.

Atin téméningkélù bé kéluhanay de mérégén énggagéwo ku bé de tete rénigoy de Judio dob begéne.²⁰ Enda i sébaan dénígur gu bé funa kome fiyo dob de kétoro gu begom dob adafay médoowe étew taloo no dob de lawi gom.²¹ Méégét i kékérén guwe dob de Judio loo so dob de békén Judio bé fatut ro gésénule bé de sala ro atin munur ro bé Kadnane Jesus brab rigoné roy kétayay Tuluse.²² Atin béleewe ni fénémanduo Rémogor i Tuluse begén bé mangéyu Jerusalem. Atin énda gétuwa ku de ké ati mérigowé dob begéne diyo.²³ Been say niy gétuwa kuwe, dob séngae ingéd nawéto ku, i Rémogor i Tuluse féningatén begén bé méférisuwu brab mérégén i géagéwo kuwe.²⁴ Endob énda gulaané kuy umul guwe brab ulan den ké méléhuu, amuk géfélidil gu saén i galbéke niray i Kadnane Jesus begén, sani kéurete bé Fiyowe Uret fantag bé kégédaw i Tuluse.

²⁵ “Ménangeyu dob begome kéluhanan muret fantag bé kégékuléw i Tuluse bé de étewén. Atin gétuwa ku béni, éndaén géségito tom man ségule.²⁶ Mélaw béréhé ku begom béleewe ni, amuk wén i ségétew begom énda munurén bé Jesuse, békénén atura ku.²⁷ Non nuret gun begom i kéluhanay kétayay Tuluse.²⁸ Ingat gom brab diyaga gom i de lowoh gom loo soy de munur sénarig i Rémogor i Tuluse begom inok énda mékédan i de kéunur gom. Begom i maake témalima bé de bili-bili. Atin i de munur bé Jesuse beroy de maak do bili-bili. Atin i Tulusey gefee bé de bili-bili sabaf bé kéléhu i Nga ne.²⁹ Gétuwa ku, amuk tékédanun dini, wén i do gérumah do tugién téromo. Atin féteteé roy de fédew i de munur.³⁰ Atin wén mosoy do étew tidew so dob begome ménlimud, émbérén bé de tugi inok géuwito roy de munur dob békéné katabuwan agéwon.³¹ Mélaw ingat gom, brab kagom lifotén i de ténero gu begom kéluhanan, fuweh na kélungonon bé méntéléwe gébélantuwa. Atin toow fo kénrewo kuy kétoro guwe begom sabaf bé kégédaw guwe begom.

³² “Atin béleewe ni, sarigé ku begom dob Tuluse non tabanga no begom. Atin i kéuret guwe fantag bé kégédaw ne tabanga no so begom. Beeney émfébagére bé de kéunur gom, brab Been say miraye bé de kéfiyonon loo bé rigoné nuwe dob kéluhanay de étewén.³³ Enda méningaru bé étingayéne kagom, fiyon filak, taloo no bélowan taloo no kégal.³⁴ Gétiga kom i kégalbék guwe inok gédoté kuy kéluhanay kailanga keye begey i de dumo gu.³⁵ Fénggito gu begom i kéluhanay de rénigo gu bé fatut mégéror tom inok gétabanga tom i de étew mérasay. Brab katom lifotén i kékérén i Kadnane Jesus mano, ‘Toow na fo moror i étewe miray bé étewe médot.’ ”

³⁶ Amun énggilid i Pabloue émbérén, ménlingkuwéd ro kéluhanan brab déménasal ro.³⁷ Kéménrew ro kéluhanan brab nékéf roy Pabloue atin narék ro. Tidew bénou ménngétawén.³⁸ Ménlabi foy kétete i fédew ruwe bé bénréh Pabloue bé éndaén kun gito ro de féruman. Tidew bénou, dénura ro mangéy dob barkowe édaa no.

I kéagéw geye mangéy Jerusalem

21 ¹Amun énggégfégétaw geyén dob berowe, ménda gey brab méntaus gey mifar fééntang saréw dob bungéde Kos. Amun bé démoē de énggumah gey dob bungéde Rodas. Tidéw béno méntaus gey mangéy Patara. ²Diyo énggito gey i sébaane barko mangéy Fenisia, mélaw ménda gey diyo. ³Ménagéw gey taman énggékulaya key i bungéde Siprus, atin téménara gey saén mangéy de fingé déligdigan atin méntaus gey mangéy Siria. Atin déménunggu gey dob ingéde Tiro non féntefad roy de médoō do uwit diyo. ⁴Atin diyo énggito gey i de munur bé Kristowe, mélaw ménbati gey diyo ségéfadiyan. Atin non fénemanduoy Rémogor i Tuluse bero, fénnginau roy Pablwe bé békén taus mangéy Jerusalem. ⁵Endob amun énggumahén i gaiwe magéw gey, méntékédan gey dob no inged. Atin i kéluhana ruwe dénura ro begey mangéy dob barkowe, bero soy de bawag ro brab de nga ro. Atin amun énggumah gey dob dénsaane, ménlingkuwéd gey kéluhanan brab déménasal gey. ⁶Amun énggilid gey démasal, ménggétaw gey. Tidéw béno, ménda geyén man dob barkowe ni, atin ménule ro so kéluhanan.

⁷Atin tidéw Tiro méntaus gey magéw taman énggumah gey dob ingéde fénawéti Tolemaida. Diyo énggito gey i de dumo gey munur bé Kristowe. Atin téménrén gey diyo ménsegétérésangan. ⁸Dob gétunduge de fuweh, méntaus gey mangéy Sesaria. Amun énggumah gey diyo, ménbati gey dob lawi i ségétewe lagéy muret bé Fiyowe Uret fantag bé Jesuse fénawéti Filipi. Beeney ségétewe bé de fitew gétew ménrugayén fénemili dob Jerusalem waléy témabang. ⁹Atin wén i do fot gétew do ngaén falan kénogon do muret so bé kékérén i Tuluse. ¹⁰Ménfiroy gétérésang tidéw bé kégumah geye diyo, énggumah i ségétewe lagéy tidéw Judea fénawéti Agabo. Beeney sénarigoy Tuluse muret bé kékérén ne. ¹¹Tidéw béno, ménfégédét dob begeye brab éndotén i sintoro Pablwe brab nikétén i de kaan sékéy brab de kémérén brab ménbérén mano, “Ay niy bénréh i Rémogor i Tuluse mano, ‘I gefee bé ni sintoro ikétéy de Judio dob Jerusalem loo bé ni brab atéé ro dob de étew békén Judio.’”

¹² Amun énggelingoo key i ni, i begeye brab de dumo gey munur diyo ménfégédaw-gédaw gey bé Pablwe bé békén damén taus mangéy Jerusalem. ¹³ Endob i Pablwe séménumbul mano, “Sedek kéméréw gom? Kagom fébukuén begén! Fakayun féikét dob Jerusalem brab fakayun méléhu sabaf bé Kadnane Jesus.”

¹⁴ Atin énda fo génaga gey i gémlée bé Pablwe. Mélaw téménrén gey gémlé de brab ménbérén gey makey, “Mérigo damén i kétayay Kadnane.”

¹⁵ Amun énggilid i firoye gétérésangan, téménifés gey atin méntaus gey mangéy Jerusalem. ¹⁶ Atin wén i do ménodor begey do munur bé

Kristowe do tidéw Sesaria brab nuwit ro begey mangéy dob lawi i lagéye fébatio ro begey. Been i ségettéwe lagéy tidéw Siprus féndawét Mason. Beeney ségettéwe bé de toow fo énggétah do munur bé Kristowe.

Ténukaw Pablowey Santiagowe

¹⁷Atin amun énggumah gey dob Jerusalem, i de dumo gey do munur bé Kristowe ménoror ro témayakuf begey. ¹⁸Atin bé gétunduge de fuweh, i begeye Pablowe nangéy gey ténukaw i Santiagowe, sani odoroy de munur dob Jerusalem. Atin diyo soy kéluhanay de odoroy de munur bé Kristowe. ¹⁹Amun gilid séngifa Pablowe bero, nureténi i kéluhanay fénrigoy Tuluse de dob de békén Judio. ²⁰Amun énggelingoo roy ni, dénayéw roy Tuluse. Atin bénréh ro dob Pablowe maro, “Gétiga mo adih, firoy ngibuy Judiowe ménunur bé Kristowe, atin toow fo nodoro roy de kukuman tidéw dob Moisese. ²¹Enggelingoo roy fantage bé kétoro me kun dob kéluhanay de Judio bati dob de ségiyo ingéd beroy de békén Judio bé békénén odoro roy de kukuma Moises. Brab bénréhém kun éndaén tulién i de nga ro taloo no odoron i adat i de Judio. ²²Ati mélaw i fatute rigoné tom? Non gélingoo ro sékoy fantage bé kégumah me dini. ²³Mélaw rigo moy ni bérhé key beem. Wén i do fot gétew lagéy dini, réménigo ro fasad dob Tuluse loo bé adat tome do Judio. ²⁴Mélaw odor go bero brab amung go bé adat i kéfelinise dob adafay Tuluse. Atin sukaya mo bero bé ni kéfelinis. Tidéw bénó, fétébungow ro loo bé adat tome do Judio. Mélaw fégito mo dob kéluhanay étewe bé odoro moy kukuma Moisese, inok gétinga ro kéluhanan bé békén toow i urete fantag bé beeme. ²⁵Endob fantag man bé de étew do békén Judio do ménwaléy munur bé Kristowe, sénulata key bero bé békén ro mama bé étingayéne ténulak dob de kéninontow, taloo no mama dara, taloo no mama bé étingayéne énda ménsumbalién, taloo no ké bigaén ro.” Been i niy bénréh ro Santiagowe dob Pablowe.

²⁶Mélaw dob gétunduge de fuweh, nuwit Pablowey de fot ni gétew do lagéy brab ménfelinis ro dob adafay Tuluse loo bé adat ruwe do Judio. Tidéw bénó ménahur dob lawi i Tuluse, atin fénggétiga no dob de fadi i gaiy kéfégilid i kéfelinise brab kéiray ruwe tulak bé de ni fot gétew lagéy.

I kékéfoe bé Pablowe

²⁷Amun gédétén gilid i fitéwe gétérésangan, wén i de Judio tidéw Asia énggito roy Pablowe dob lawi i Tuluse. Atin rénimbur roy de étew ni ménlimud atin kénéfo roy Pablowe. ²⁸Ménkes ro maro, “Do dumo gey do Judio, tabangan gey! Been i niy étewe démoyun magéw mangéy témoiro dob kéluhanay de étew dob séngae ingéd bé békén odoro roy kukumane tidéw dob Moisese. Brab sébanil betom do Judio brab lawi i Tuluse. Atin saliyu na bé ni, ménuwit do békén Judio mahur dob lawi i Tuluse ni.

Mélaw fénwaléyén mékérésik i mékétéfuwe ni gonon.”²⁹ (Loo bé niy kékéréh ruwe non énggito roy ségettéwe lagéy békén Judio féndawét Trofimo tidéw Efeso ménséodor bé Pablowe mangéy Jerusalem. Atin marok nuwit Pablowe mahur dob lawi i Tuluse ni.)

³⁰ Ménrimbur i de étew dob Jerusalem. Atin maak dunuk i étewe gégumah tidéw dob kéluhanay de gonon diyo. Kénéfo roy Pablowe brab génuuyud ro mésut tidéw dob lawi i Tuluse. Tidéw béno, fénintu roy bengawane. ³¹ Amun télamané ro damén féléhuén, wén i ménangéye mélolok dob odoroy de sundalo tidéw Roma, bé mérimbür i kéluhanay étewe dob Jerusalem. ³² Sonom so béno, i odoroy de sundalo ni, nuvitén i de sundalo no ségéta mangéy dob gonoy de étew ni. Atin amun énggitoy de étew ni énggumah i de sundalo beroy odoro ruwe, ténréno roy kélubag ruwe bé Pablowe. ³³ Tidéw béno, i odoroy de sundalo ni, ménfégédét dob Pablowe brab kénéfoén. Atin fénikétén bé de sundalo no bé ruwowe timan sangkali. Tidéw béno fénénginsaa no bero mano, “Ati ni étew? Ati rénigo nuwe?” ³⁴ Atin ménkes i de étew ni séségiyogiyyoy késumbul ruwe. Atin i odoroy de sundalo ni énda énggésobuto noy ni ménrigo non toow ro fo selekén. Mélaw fénuwitén i Pablowe bé de sundalo no mangéy dob kutae. ³⁵ Amun énggumah ron dob géday kutae, nénat i de sundaloy Pablowe non bé kékérit i de étew ni. ³⁶ Ménfuray i de étew ni mékes maro, “Féléhu gom!”

I kéuret Pablowe

³⁷ Amun gédét ron féahurén dob kuta i de sundalo ni, ménbéréh i Pablowe dob odoroy de sundalo ni mano, “Aw fakay gésébéréhu beem?”

Atin séménumbul i odoroy de sundalo ni mano, “Aw gétigan go wayo sébéréh Griego? ³⁸ Makuk beemey étewe tidéw Egipto méngganay bé késétibohe bé de gémamak kukuman. Atin ménanangguwit fot ngibu do méméléhu do étewén brab ménangéy ro bati dob gonone énda i do étew de bati.”

³⁹ Séménumbul i Pablowe mano, “I begéne, ségettéwu Judio tidéw Tarsus dob Silisia, sani ménbantuge ingéd. Aw fakay so dob beeme ké gébéréhu dob de étew ni?”

⁴⁰ Atin ténungkas i odoroy de sundalo ni. Mélaw téménindég i Pablowe dob gédate brab séniniyasa noy de étew bé fétanék ro. Amun mémentanék ronén, ménbéréh i Pablowe dob Hebreowe, sani késébéréh i de Judio.

22 ¹Bang Pablowe, “Do dumo gu brab do lukés gu, fégélingo gom i béréhé kuwe ni bé kéamfilo kuwe bé lowoh guwe.” ² Amun énggelingoo ro ménsbéréh dob karowe késbéréh, toow na fo ménantés ro. Atin fentaus Pablowej kékéréh ne mano, ³“I begéne, ségettéwu Judio ménunah dob Tarsus dob Silisia. Endob dob Jerusaleme ni ménruku. Atin méngganadu dob toowe fo ménbantug témore féndawét Gamaliel.

Atin toow fo téneroén begén bé de adat tom do Judio loo bé kukumay de katufua tom. Atin toow fo ménuyotu modor bé kétayay Tuluse ségiléw so bé begome ni béléewe.⁴ Fénrasay gu brab fénléhu guy de étew munur bé Jesuse. Atin kénéfo guy de lagéy brab do libun brab fénrisu gu bero.⁵ I gérrotore fadi brab kéluhanay de kéfédewan, gébéréh ro toow i ni béréhé ku begom. Niraya ro begén sulat mangéy dob de dumo tom Judio dob Damasko. Atin ménangéyu diyo inok kéfoé kuy de munur bé Kristowe diyo, atin uwité ku damén dob Jerusaleme ni ikétén bé sangkalie inok kukumén ro.

⁶“Endob amun géutuh térésang, diyou dob agéwone gédét dob Damasko. Atin méntékow wén i réndaw tidéw dob lawayo mangéy dob begéne.⁷ Sonom béno, ménggétéléngkébu dob fantade, atin énggelingoo kuy émbéréhé mano, ‘Saulo! Sedek ferasayé mo Begén?’⁸ Tidéw béno ménenginsau maku, ‘Ati beeme Kadnan?’ Atin séménumbul mano, ‘Begéney Jesuse tidéw Nasaret, sani ferasayé muwe.’⁹ Atin i de dumo gu ménodor begén, énggito roy ni réndaw éndob énda énggelingoo roy béréhé ni ménsébéréh begén.¹⁰ Atin fénenginsaa ku maku, ‘Kadnan, ati fatute rigoné ku?’ Atin séménumbul i Kadnane mano, ‘Tindég go brab taus go mangéy Damasko. Atin diyo wén i étewe béréhé no dob beemey kéluhanay kétayay Tuluse rigoné mo.’¹¹ Bé béno so, ménwaléyu langafén non bé réndawe ni énggito gu. Atin narak i de dumo gu begén taman enggumah gey dob Damasko.”

¹² Atin féntaus Pabloney kébéréh ne mano, “Atin diyo wén i ségétéwe lagéy féndawét Ananias. Toow fo ménintulus brab toow fo nodoro noy de kitab tom. Atin tintu fo fénggadata noy kéluhanay de Judio bati diyo.¹³ Atin ménangéy dob begéne brab ménbéréh mano, ‘Saulo, dumo gu, gérito gonén!’ Sonom béno, énggégítowu man atin ténéngténg gu.¹⁴ Atin ménbéréh man mano, ‘I Tuluse, fénengadaf i de katufua tom, fénemilién beem inok gétigan i kétaya nuwe, brab inok giton i métintuwe sugusuqué no féndawét Jesus, brab inok gélingoon i kébéréh ne.¹⁵ Non waléy go muret dob kéluhanay de étew fantag bé Kristowe émbéréh bé énggito muwe brab énggelingoo muwe.¹⁶ Atin béléewe, kagonén téangga-angga. Tindég go brab fébautis gon, brab dasal go dob Kadnane. Atin i de salaém mékédan.’”

¹⁷ Atin féntaus Pabloney kébéréh ne mano, “Tidéw béno ménsefuleu mangéy Jerusalem. Atin amun déménasalu dob lawi i Tuluse, wén i fénggitoy Tuluse begén.¹⁸ Enggito guy Kadnane brab ménbéréh dob begéne mano, ‘Fagayas go, tagakém i Jerusaleme ni, non i de étew dini énda tayakufé roy kéuret me fantag bé Begéne.’¹⁹ Atin séménumbulu maku, ‘Kadnan, gétiga roy démoyune kéagéw gu mangéy kémfo brab lémubag bé de munur Beem dob de lawi féngadafa ro.²⁰ Atin amun féléhué roy Estebane sani ségétéwe muret fantag bé Beeme, diyou de

so ménagayun de. Begén i ménantay bé de kégal i de ménméléhu de.’

²¹ Endob ménbérél i Kadnane dob begéne mano, ‘Agéw go. Sugué ku beem mangéy mérayu dob de békén Judio.’”

²² Atin amun bénréh Pablouey ni fantag bé de étew békén Judio, éndaén mégélingo i de étew de. Atin ménkes ro toow fo métanug maro, “Féléhu gom, énda médait méuyag i ni étew.” ²³ Atin ménkes ro, brab sénawér roy de bubuk sébuwan mangéy rotor bé kékérít ruwe brab kénda roy de dumo bé de kégal ro brab nafir ro dob rotoro. ²⁴ Mélaw i odoroy de sundalo ni, fénuwitén i Pabloue mahur dob kutae ni, brab sénuguén i de sundalo no bé badasé ro inok gébérého noy ati rénigo nuwe, sani funay de Judio ni mékes brab mékérít. ²⁵ Endob amun nikét roy Pabloue inok badasé ron damén, ménbérél i Pabloue dob ségétéwe kafitan mano, “Aw fakay badasén i ségétéwe Romano fiyon fo ké énda séna ménkukumén ménalsa?”

²⁶ Atin amun énggelingoo kafitaney ni bénréh Pabloue, ménangéy dob odoroy de sundalo brab ménbérél mano, “Ati rigoné muwe? I ni étew ségétéw wayo Romano.”

²⁷ Mélaw i odoroy de sundalo ménangéy dob Pabloue brab ménenginsa mano, “Aw Romano go wayo?”

Séménumbul i Pabloue mano, “Hoo.”

²⁸ Atin ménbérél i odoroy de sundalo ni mano, “I begéne, Romanowu so. Brab dakél i énggabayada kuwe inok waléyu Romano.”

Atin ménbérél man i Pabloue mano, “Endob i begéne, ménumahu ségétéw Romano.”

²⁹ Sonom béno, i de sundalo ni madasén damén bé Pabloue énggésunud ro. Atin i odoroy de sundalo ni toow fo ménggilak non fénikétén bé de sangkali i ségétéwe so Romano.

Dob adafay de kéfédewan

³⁰ Atin i odoroy de sundalo ni ménuyot de ké gétiga noy funay de Judio ni témbó bé Pabloue ni. Mélaw bé gétunduge de fuweh, fénkéda noy de sangkali fénggékít ro bé Pabloue. Atin sénuguén i de odoroy de fadi brab kéléuhanay de kéfédéway de Judio sélimud. Tidéw béno, nuwitén i Pabloue brab féntindégén dob adafa ruwe ménlimud.

23 ¹ Atin ténéngténg Pablouey de ménlimud ni brab ménbérél mano, “Do dumo gu Judio, toow fo fiyoy fédéw guwe dob adafay Tuluse fantag bé de rénigo gu taman so béleewe ni.” ² Tidéw béno, i gérotore fadi féndawét Ananias, sénuguén i de étew téménindég gédét dob Pabloue bé tamfilingé roy ba ne. ³ Atin ménbérél i Pabloue mano, “I beema nan ubo-ubo go méngintulus! Tamfilingéy Tuluse so moso beem. Kukumé mo begén dob kitabe éndob rénigo moy éndae fakay dob kitabe bé kéfétamfiling me begén.”

⁴ Tidéw béno, ménbéréh i de étew gédét dob Pablowe maro, “Sedek émbéréh go tete loo bé nan dob gérotore fadi i Tuluse?”

⁵ Séménumbul i Pablowe mano, “Do dumo gu, énda gétuwa ku de ké beeney gérotore fadi. Amuk énggétiga ku, énda damén fémalané ku de. Non bénréh i Ménsulate Kébéréh i Tuluse mano, ‘Kago émbéréh tete fantag bé odoro kome.’ ”

⁶ Atin amun énggito Pablowej de dumo do lukés Saduseo brab de dumo do Fariseo, féntanugén i kékéréh ne dob de ménlimud do odoron mano, “Do dumo gu, i begéne, ségétewu Fariseo brab i de lukés gu do Fariseo so. Mékukumu béni sabaf bé kénéunur guwe bé kétébule i de ménléhu.”

⁷ Amun énggilid bénréh Pablowej ni, méngganay so séédél i de Fariseo brab de Saduseo, atin ménsébaad ro. ⁸ (Non i de Saduseo énda munur ro bé kétébulee, taloo no munur ro bé wén i do télaki taloo no do rémogor. Endob i de Fariseo munur ro bé kéluhanay de ni). ⁹ Atin minut métanug i kékékes ruwe. Atin i de dumo bé de témoreo kitab do Fariseo, téménindég ro brab émbagér i kékéréh ruwe maro, “Enda i funa key kémukum bé ni lagéy. Wén keey i rémogor taloo no télaki tintu ménsébéréh de.”

¹⁰ Atin minut toow fo méduf i késéédél ruwe ni. Atin i odoroy de sundalo ni, mégilak de ké mébinasay Pablowe ni. Mélaw sénuguén i de sundalo no mangéy dob kérara i de ménlimud étew brab nuwit roy Pablowe séfule mangéy dob kutae.

¹¹ Dob gétunduge de kélungonon, téménindég i Kadnane dob sékulo Pablowe brab ménbéréh mano, “Fébaraw go. Nureté i fantage bé Begéne dob Jerusaleme ni. Atin fatut mangéy go so muret dob Roma.”

I bantak i de Judio

¹² Atin bé géfuwéne de, wén i de dumo Judio ménsélimud ro inok géséfagayun ro bé ati rigoné ruwe. Atin ménséfasad ro bé énda mama ro taloo no miném taman énda géféléhuo roy Pablowe ni. ¹³ Labi fot folo gétew i réménigowe bé ni. ¹⁴ Tidéw béno, ménangéy ro dob de odoroy de fadi brab dob de odoroy de Judio brab ménbéréh ro maro, “Séménafa gey bé énda mama gey taman énda géféléhuo key i Pablowe. ¹⁵ Mélaw ay niy rigoné tome. I begome brab de kénédewan, féuwit gom kékéréh mongot dob odoroy de sundalo tidéw Roma bé uwité noy Pablowe mangéy dob begome. Atin ubo-ubo toow fo méuyot gom ménginsaan bé Pablowe. Endob i begeye bonoé key dob de agéwon.”

¹⁶ Endob i lagéye nga i libu Pablowe énggelingoo noy ni bantak ro. Mélaw ménangéy dob kutae brab fénlolokén i ni dob Pablowe. ¹⁷ Tidéw béno i Pablowe, ténawagén i ségétewe bé de sundalo brab ménbéréh mano, “Uwitém i ni kénogo lagéy mangéy dob odoro kome. Non wén i béréhé no de.” ¹⁸ Atin nuwit i sundalowey ni kénogo lagéy mangéy dob odoro nuwe brab ménbéréh dob odoro nuwe mano, “Féntawag i férisuwe

Pablo begén brab féndura no begén i ni kénogo lagéy non wén kun i béréhé no beem.”

¹⁹ Tidéw béno, narak i odoroy de sundaloy ni kénogo lagéy brab ménférayu ro inok ruwo ro saén. Tidéw béno, fénénginsaa no mano, “Ati no béréhé mo begén?”

²⁰ Atin séménumbul mano, “I de odoroy de Judio ménséfagayun ro bé ongoté ro dob beemey féuwitém démo i Pablowe mangéy dob de ménlimud do kéfédewan. Ubo-ubo saén fénginsaa roy Pablowe inok méuman i gétiga ruwe fantag bé beene. ²¹ Endob kago magayun bé nan. Non wén i labi fot folo gétew do lagéy rékunéy dob de agéwon inok bonoé ro. Séménafa ro bé énda kun mama ro taloo no miném ro taman énda géféléhuo roy Pablowe ni. Ténafaya ron béleewe ni brab ongot-ongoté ro séden i kaame kéfagayun.”

²² Atin séménumbul i odoroy de sundalo ni mano, “Kago uretén i ni bénréhém begén dob de ségiyo.” Tidéw béno, fénuleén i ni kénogo lagéy.

Sénugu i Pablowe mangéy dob Felikse

²³ Tidéw béno, i odoroy de sundalo ni, téménawag ruwo gétew kafitan brab bénréhén bero mano, “Tafay gom ruwo ratuh sundalo, brab fitew folo do kuda brab do sundalo kémudaan bero, brab ruwo ratuh do sundalo muwit dilék inok magéw ro mangéy Sesaria alas siyow séko bé ni kélungonon. ²⁴ Atin tafay gom soy kudae kudaa Pablowe brab uwit gom mangéy dob Gobernadore Feliks. Ingata kom fo toow inok énda gésug-sugén.” ²⁵ Tidéw béno, séménulat i odoroy de sundalo ni mano, ²⁶ “Ay niy sulate tidéw dob Klaudio Lisiase mangéy dob Gobernador Felikse. Fiyo téresang. ²⁷ I ni lagéy kénéfo i de Judio brab féléhué ron damén. Endob amun énggétiga ku ségétew so Romano, fénanangguwit guy de sundalo gu brab nangéy gey ténabang. ²⁸ Atin tidéw béno, ménuyotu de ké gétiga kuy funa ruwe de témo. Mélaw nuwit gu mangéy dob de ménslimud do témiyawan. ²⁹ Atin bé béno, énggétiga ku énda i tete rénigo no, funa ro de méméléhu taloo no férисunén. Fantag saén bé de kitab roy funa ruwe de témo. ³⁰ Amun énggétiga kuy bénantak i de Judio bé féléhué ro, fénagayas gu fenuwit mangéy dob beeme. Atin bénréh gu dob de témo de bé mangéy dob beeme mélolok bé kéluhanay funa ruwe de témo.”

³¹ Amun fénggilid i odoroy de sundaloy sulat ne, nodoroy de sundaloy sugu ne. Mélaw nuwit roy Pablowe mangéy Antipatris bé no kélungonon.

³² Bé gétunduge de fuweh ménsefule i de ménagéw saén do sundalo mangéy Jerusalem. Endob i de sundalo do kémuda, beroy déménurane bé Pablowe taus mangéy Sesaria. ³³ Amun énggumah ro dob Sesaria, fénira-ira roy Pablowe dob gobernadore brab niray ro soy sulate. ³⁴ Atin bénasay gobernadorey sulate ni. Tidéw béno, fénénginsaa noy Pablowe ké ati ingéde tidéwo no. Atin séménumbul i Pablowe mano, “Tidéwu Silisia.”

35 Atin ménbéréh i gobernadore mano, “Fégélingoé ku beem dob gaiwe gégumah i de témbo beem.” Tidéw béno, fénbantaya noy Pablowe dob lawie fénrigo téleta Datu Herode.

I kétébo i de Judio bé Pablowe

24 ¹Ménlimo gétérésangan tidéw béno, i gérotore fadi féndawét brab ségétewe gétigan bé kitab i de Romano féndawét Tertulo. Ménangéy ro dob adafa Felikse, sani gobernadore, inok téboé roy Pablowe. ²Atin i Felikse, amun féntawagén i Pablowe, fénbéréhén i Tertulowe. Mélaw féngganaya noy témboe bé Pablowe mano, “Gobernador Feliks, toow fo fégadata key beem. Atin fiyoy kéféguléw me non i gaiy kaame kéféguléw énda sénay ménsétiboh de. Atin médooy de rénigo mo fiyo inok minut waléy fiyoy ingéd tome ni. ³Atin sabaf bé ni, toow fo moror gey de brab fésalamat gey kéluhanan dob beeme sénga tékélid. ⁴Endob inok énda kélébuwan go méangga, éndaén férugayé kuy kékéréh guwe. Mélaw fégédawan gey brab fégélingoén gey fiyon magad saén. ⁵Enggétiga key i Pablowe ni toow fo samuk non rénimburén i de Judio dob kéluhanay de ingéd dob duniyae ni. Atin beeney odorone bé ségéklasiwe kéfégintulus féndawét Nasareno. ⁶Atin ténlama no fénwaléy mékérésik i mékétéfuwe lawi i Tuluse, bé rénigo nuwe liyén. Mélaw kénéfo gey brab kukumé key damén dob kageye kitab. ⁷Endob i odoroy de sundalo féndawét Lisiás nangeyén nafas dob begeye bé lala geye de ménfélubag. ⁸Tidéw béno, bénréhén begey bé angéyé key kun téboén i ni étew dob beeme. Atin amuk fénginsaa moy ni lagéy, gétiga moy kéluhanay funa keye de témbo.” ⁹Tidéw béno, i de Judio ménamung ro so témbo brab bénréh roy toow i de bénréh Tertulo ni.

I kéamfilo Pablowe bé lowoh ne

¹⁰Tidéw béno, i gobernadore fénbéréhén i Pablowe. Atin ménbéréh i Pablowe mano, “Gétiga ku toow gon fo ménrugay kémukum dob ni ingéd brab gétigan go odoro key do Judio. Mélaw toowu fo moror émbéréh bé kéamfilo kuwe bé kagéne lowoh dob adafa muwe. ¹¹Ménfolo bra ruwo gétérésang saén i kégumah guwe dob Jerusaleme ni inok méngintulusu. Fakay go ménginsa dob de ségiyo étew inok toow fo gétiga moy ni. ¹²Atin i de Judio, énda énggitro begén ménseédél bé de étew dob lawi i Tuluse taloo no rénimbur guy de étew dob de lawi féngadafan taloo no dob ségiyowe ingéd dob Jerusalem. ¹³Atin énda i fefégitro ro émféféngintoow bé kétébo ruwe begén. ¹⁴Endob fayagé ku beem i kéfégadaf guwe bé Tuluse fénéngadaf i de katufua key bé kéodor guwe dob Agéwo Kristowe. Been i niy bénréh i de étew ni békén toow kéfégintulus. Endob munuru so bé kéluhanay de kitab sénulat Moisese brab kéluhanay sénulat i de

méntelata do sénarigoy Tuluse muret bé kébérén ne.¹⁵ Ségiléw so bé de ni étew témbo begén, munuru so bé kéfétébule i Tuluse bé de ménléhu, do fiyo étew loo soy de tete étew.¹⁶ Atin mélaw démoyunu toow fo témélama rémigo fiyo dob adafay Tuluse brab dob adafay de étew inok énda i sala gu.

¹⁷“Amun dob ménfiroye gébélintuwa énda ménbatiu dob Jerusalem, ménfuleu mangéy diyo inok uwité kuy kurta i de dumo gu Judio brab inok témulaku.¹⁸ Atin been i niy rénigo guwe bé kégito ruwe begén dob lawi i Tuluse, amun gilidu ménfelinis dob adafay Tuluse loo bé adat geye. Enda toow médooy étewe dumo gu diyo brab énda i rénimbur gu diyo.¹⁹ Endob wén i de Judio énggumah diyo do tidéw Asia. Bero damén i mangéy dob beeme témbo begén amuk wén i funa ro begén témbo.²⁰ Taloo no fébérém i de étew ni ménangéy dini ké ati salae énggito ro dob begéne bé kédini guwe dob adafay de ménlimud do Judio do sétiyawan,²¹ saliyu bé sébaane bénréh gu métanug amun diyou dob adafa ruwe maku, ‘Kukumé kom begén non munuru bé kétébule i de ménléhu.’”

²² Atin i Gobernador Felikse, toow fo gétiga noy fantage bé Agéwo Jesuse, mélaw téménrén kémukum. Atin ménbérén mano, “Fégilidé kuy kékukum guwe amuk gégumah i Lisiase sani odoroy de sundalo tidéw Jerusalem.”²³ Atin sénuguén i kafitane bé bantaya noy Pablowe, éndob niraya no so kuwagib i Pablowe rémigo bé kétaya nuwe. Brab ténungkasén soy de dumo Pablo magifat de.

²⁴ Amun énggilid i firoye géterésangan, ménfuleu mangéy diyo i Felikse brab bawag ne Drusila ségitew libun Judio. Atin fentawag roy Pablowe brab fénggelingo roy kéuret ne fantag bé kéunur ne bé Jesu Kristowe.²⁵ Endob amun fentaus Pablowej kéuret ne fantag bé mééntange káfaguyag brab kédigure bé de tete kétayan brab gaiwe gégumah i kékukum i Tuluse, ménwaléy ménngilak i Felikse. Mélaw ménbérén mano, “Fakay gon séfule brab fétawagu man beem ké wén i gai gu.”²⁶ Atin i dob fédew Felikse ni, mano ké iraya Pablowe kurta. Mélaw fentawagén médooy gule inok séuret-uret de.

²⁷ Amun énggilid i ruwowe gébélintuwa, békénén Feliks i gobernadore. Endob i Felikse ménuyot de ké mésuwat i de Judio de, mélaw féndayaén i Pablowe dob férisonone. Atin i ménwaléye gobernador i lagéye féndawét Porsio Festo.

I Pablowe brab Festowe

25

¹ Amun énggilid i télewe géterésangan tidéw bé kégumah Festowe dob sakuf i Judea, ménagéw tidéw Sesaria atin ménangéy Jerusalem.² Atin i de odoroy de fadi brab de odoroy de Judio ménangéy ro dob beene brab nuret ro diyo i funa ruwe téménébo bé

Pablowe.³ Atin ménfégédaw-gédaw ro dob Festowe ni bé féuwitén i Pablowe mangéy Jerusalem, non bénantak ro féléhuén dob de agéwon.⁴ Séménumbul i Festowe mano, “I Pablowe ménférisu dob Sesaria, atin séfuleu so magad mangéy diyo.⁵ Mélaw i de odoro kom fatut ro modor begén mangéy Sesaria brab tébo gom i nan étew ké wén i tete rénigo no.”

⁶ Atin i Festowe ménbati na dob berowe bé ménlabiwe ségéfadiyan. Tidéw béno ménséfule mangéy Sesaria. Atin bé gétunduge de fuweh, ménangéy mésar dob gono nuwe kémukum brab séménugu bé uwitén i Pablowe mangéy dob adafa nuwe.⁷ Amun énggégumah i Pablowe, i de Judio tidéw Jerusalem téménindég ro géliwé de, brab bénréh roy kéluhanay gétimale fo kétébo ro de. Endob énda i toow géfégito ro bé kétébo ruwe de.⁸ Endob i Pablowe bénréhén i kéamfilo nuwe bé lowoh ne mano, “Enda i rénigo gu tete dob kitab geye do Judio, taloo no réménigowu tete sébanil bé lawi i Tuluse, taloo no dob toowe fo gérotor datu dob Roma.”

⁹ Endob i Festowe méuyot de ké mésuwat i de Judio de, mélaw fénénginsaa noy Pablowe mano, “Aw méuyot go mangéy Jerusalem inok diyo kukumé ku beem ké toow i de kétébo ro beem?”

¹⁰ Séménumbul i Pablowe mano, “Ay niy gono muwe kémukum, non wén i kuwagibém tidéw dob toowe fo gérotor datu dob Roma. Atin ay niwu dob adafa muwe brab beem i fatute kémukum begén. Enda i rénigo gu tete dob de Judio brab fiyon i beeme gétila moy ni.¹¹ Amuk wén i rénigo gu tete dob kitabe atin fatutu féléhuén, énda méuyotu méraréy. Endob amuk énda toow i kéluhanay kétébo i de Judio begén, éndaén fatutu iray dob berowe. Ongoté ku dob beeme bé mangéyu dob adafay toowe fo gérotor datu dob Roma inok been i kémukume begén. Non ségetéwu so Romano, brab wén i kuwagib gu mékukum dob adafay datue dob Roma.”

¹² Tidéw béno, ménsébérén i Festowe dob de dumo no témabang. Amun énggilid, ménbérén dob Pablowe mano, “Amun nongotém i mangéye dob adafay datue dob Roma, mélaw uwitén go mangéy diyo.”

I Pablowe brab Agripawe

¹³ Amun ménggélafas i firoye gétérésang, énggumah i datue féndawét Agripa brab bawag ne féndawét Berenis dob Sesaria. Nangéy ro ténuakaw i Festowe diyo.¹⁴ Amun ménfiroy ron gétérésang énggumah diyo, nuret Festowe dob Agripahey fantage bé Pablowe mano, “Wén i ménférisuwe lagéy dini bé Feliks sénay méguléwe de.¹⁵ Amun ménangéyu Jerusalem, i de odoroy de fadi brab de odoroy de Judio, ténebo ro dob begéne atin nongot roy féléhuén.¹⁶ Endob bénréh gu dob berowe bé békén adat tom Romanoy matée bé ségetéwe étew méntébo ké énda séna énggésétengaang roy de témbo de taloo no énda séna méniraya no gai

mamfilon bé kaane lowoh.¹⁷ Atin amun ménangéy ro dini, fénagayas gu so bé démoe de féntawag dob gono kuwe kémukum i ni lagéy.¹⁸ Amun énggésétengaang ron, téménindég i de téménébo de brab ménbérélh ro. Endob énda wayoy tete rénigo no funa ro de témo. ¹⁹ Endob i funa ruwe saén séédél i fantage bé kéféngintulus ruwe brab fantag bé ségétewe lagéy féndawét Jesus. Ménléhuén i ni étew éndob i Pablowe bénréhén méuyag kun.²⁰ Bé béno, énda gétiga kuy fiyowe kétiyawa ku bé ni, mélaw fénenginsaa kuy Pablowe ké méuyot mangéy Jerusalem atin diyo kukumén.²¹ Endob i Pablowe nongotén bé bantayan brab mangéy dob adafay datu tome dob Roma inok been i témiyawane de. Mélaw fénsefule gu man dob férisonne taman énda séna géfieuwito ku de mangéy dob datue dob Roma.”

²² Atin ménbérélh i Agripahe dob Festowe mano, “I begéne so, Méuyotu ké gélingoo kuy nan lagéy.”

Atin séménumbul i Festowe mano, “Fégélingoém fo démo.”

²³ Amun bé démoe de, énggumah i ro Agripahe brab Berenise, beroy de odoroy de sundalo brab do gérotor étew dob no ingéd. Atin toow fo fégadatan ro ménahur dob gonone kémukum. Atin i Festowe séménugu bé uwitén i Pablowe mangéy dob dakéle ni sibéy.²⁴ Brab ménbérélh i Festowe mano, “Datu Agripa brab do kéluhaná kom dini, ay niy lagéye ténebo i kéluhanay de Judio dob begéne, dini brab dob Jerusalem. Brab mékes ro énda kun médaitén méuyag.²⁵ Endob énda mon i énggito gu de funan de méméléhu. Atin amun nongotén i mangéye dob toowe fo gérotor datu tom dob Roma, ménuyotu de ké féuwit mangéy diyo.²⁶ Endob énda i gétiga ku sulaté ku mangéy dob datu tome fantag bé ni étew. Mélaw Datu Agripa, fén-angéy gu dob adafa muwe beroy kéluhanay ni étew inok amuk gilid énggésusino komén, wén i gésulata ku mangéy dob datue dob Roma.²⁷ Non gétiga ku bé békén fatut féuwit i ségétewe férisu mangéy dob datue dob Roma ké énda i féodorén de kétébo de.”

26 ¹ Atin ménbérélh i Agripahe dob Pablowe mano, “Tungkasé ku beem émbérélh bé kéamfilo muwe bé lowoh me.”

Atin bémenter Pablowej de kémérén bé kékérélh ne mano,² “Datu Agripa, toowu fo moror béléewe non gébérého ku beem i kéamfilo kuwe bé lowoh guwe fantag bé kéluhanay de kétébo i de Judio begén.³ Non toow fo gétiga moy kéluhanay de adat tom do Judio brab de funa tom séédél. Mélaw ongoté ku dob beeme, kago mératér mégélingo begén.

⁴ “Gétigay kéluhanay de Judioy kagéne adat tidéw fanay kékloh gu dob kagéne ingéd loo so dob Jerusalem.⁵ Ménrugayén énggétiga ro begén, brab géfayaga ro toow i ni ké kétaya ro, ségétewu toow fo méngintulus mamung dob de Fariseo modor fo toow bé de kitab tom.⁶ Atin béléewe ni kukuménu non bé inam guwe, sani késarig guwe bé fénasad i Tuluse bé de katufua key.⁷ Been soy ni fasade ongot-ongotéy kéluhana tome do

Judio, do sénaar dob foloe bra ruwo gétribo, non wén soy inam ro de. Mélaw méngeintulus ro fuweh na kélungonon. Atin sabaf bé ni inam gu o Datu, ténébé i de Judio begén. ⁸Endob sedek toow fo mérégén i kéunur gome bé késétébule i Tuluse bé de ménléhu?”

⁹Atin féntaus Pablowey kékéréd ne mano, “Atin fiyon i begéne, bé gétahé makuk fatut rigoné kuy kéluhanay sébanile bé de étew munur bé Jesuse tidew Nasaret. ¹⁰Atin bé gétaho, been i niy rénigo guwe dob Jerusalem. Atin méndotu kuwagib tidew dob odoroy de fadi atin médooy fénrisu guwe bé de munur bé Tuluse. Brab amun kukumén ronén bé féléhuén ro, ménagayunu de so. ¹¹Atin médooy gule ménangéyu dob de lawi féngadafan inok férasayé ku bero. Atin ténulama gu bero fénégés démirung bé kéunur ruwe bé Jesuse. Atin bé kékérít guwe bero ménangéyu dob de ségiyo ingéd inok férasayé ku bero diyo.

¹²“Been i nan i funa kuwe ménangéy Damasko, non tidew dob de odoroy de fadi, wén i kuwagib gu kémfo bé de munur bé Jesuse diyo. ¹³Atin, Datu, amun diyou dob de agéwon mangéy Damasko bé géutuhe térsang, énggito guy réndawe toow na fo géfékaya tidew bé térsange, tidew dob lawayo mangéy dob begéne brab dob de dumo gu. ¹⁴Atin kéluhana key énggétélengkéb dob fantade. Atin énggelingoo kuy émbéréhé ménsébéréd begén dob késébéréd tome Judio mano, ‘Saulo! Sedek férasayé mo Begén? Beem soy kérégénane bé nan rigoné mo non maak ayam go séménifa sabaf bé kédédél i gefee beem.’ ¹⁵Tidew béno ménénginsau maku, ‘Ati Beeme, Kadnan?’ Atin séménumbul mano, ‘Begéney Jesuse sani férasayé muwe. ¹⁶Tindég go! Méntefégitouw dob beeme inok beemey fémilié kuwe waléy sugu-sugué ku. Uretém dob de étew i kégito muwe Begén béléewe ni brab de féténgténg gu beem moso. ¹⁷Tabanga ku beem inok énda gébinasanay de Judio brab de békén Judio beem. Atin sugué ku beem mangéy muret dob de étew do békén Judio. ¹⁸Féfégésobutém beroy fantage bé Begéne inok gésénule ro tidew dob délémone agéwon brab gito roy géfékaya tidew dob Tuluse. Atin inok éndaén munur ro dob barakat Satanase, yamula munur ro bé barakat i Tuluse. Atin inok sabaf bé kéunur ruwe Begén i de sala ro émfatasagadan, atin waléy ro so do étew i Tuluse sabaf bé kéunur ruwe dob Beene.’”

¹⁹Atin féntaus Pablowey kékéréd ne mano, “Mélaw Datu Agripa, nodoro kuy no énggito gu tidew dob lawayo. ²⁰Mélaw ménuretu sungu dob Damasko, tidew béno dob Jerusalem. Tidew béno dob kéluhanay de ingéd i de Judio, tidew béno dob ingéd i de békén Judio. Nureto ku bero bé fatut ro gésénule bé de sala ro brab munur ro bé Tuluse. Atin féfégito roy kégésénule ruwe bé de fiyo rigoné ro. ²¹Been i niy funay de Judio kéménéfo begén dob lawi i Tuluse brab féléhué ron damén begén. ²²Endob taman so béléewe ni, ténabangay Tuluse so begén. Mélaw béléewe ni téménindégu dini muret dob kéluhanay de étew do gérotor

brab do gérifantad. Atin i kéuret guwe ségiléw bé kékéréh Moisese brab de étew sénarigoy Tuluse muret bé kékéréh ne mérigo. ²³Bénréh roy fantage bé Kristowe, bé fatut kun férasayén brab féléhuén. Atin Beeney sanguwe tébule inok fukasé noy de Judio brab de békén Judio.”

²⁴Amun émbéréh sénay Pablwe bé kéamfilo nuwe bé lowoh ne, ménkes i Festowe mano, “Pablo, bunég go! I dakéle kégétiga moy funa muwanan ménwaléy bunég.”

²⁵Endob séménumbul i Pablwe mano, “Gobernador Festo, békenu bunég. I ni kékéréh gu métintu brab toow. ²⁶Datu Agripa, gétiga moy kéluhanay de ni. Mélaw énda mégilaku de émbéréh dob beeme. Non gétiga ku, énda méndirungén dob beeme non ménrigoy de ni dob gonone gétigay kéluhanay de étew. Ménlalag mélaw i kéurete de. ²⁷Datu Agripa, aw munur go bé kékéréh i de étew sénarigoy Tuluse muret bé kékéréh ne? Gétiga ku munur go de.”

²⁸Tidéw béo ménbéréh i Agripahe dob Pablwe mano, “Dob ni foko kéureté, aw gékaranga mo géfuwaléyo mo begén munur bé Kristowe?”

²⁹Séménumbul i Pablwe mano, “Fiyon fo ké foko taloo no métaah, dasalé ku dob Tuluso bé i beeme brab kéluhanay de étew ni mégélingo begén, waléy gom munur bé Kristowe ségiléw bé begéne éndob békén méférisu loo bé begéne.”

³⁰Tidéw béo téménindé i datue, brab gobernadore brab libune féndawét Berenis brab kéluhanay de étew diyo atin ménagéw ro. ³¹Amun ménagéw ron, ménsebéréh-béréh ro maro, “I ni étew, énda i tete rénigo no funan de méméléhu taloo no férisonén.”

³²Atin ménbéréh i Agripahe dob Festowe mano, “Amuk énda saén nongotén i mangéye dob datue dob Roma, fakayén damén tangeyén.”

I kéagéw Pablwe mangéy Roma

27 ¹Amun sénfagayuno ron i émféuwite begey dob barkowe mangéy Roma dob sakuf i dakéle ingéd Italiya, naté roy ro Pablwe beroy de ségiyo do férisu dob odoroy de sundalo tidéw Roma féndawét Julio. I de ni do sundalo, féndawét ro “Do sundaloy Datue”. ²Ménda gey dob barkowe tidéw Adramitio, non tafayén mangéy dob de ingéd dob sakuf i Asiawe. Ménodor begey i Aristarkowe ségétew Masedonian tidéw Tesalonika. ³Amun bé démoe de déménunggu gey dob Sidon. Atin i Juliowe, sani odoroy de sundalo, toow fo mégédaw bé Pablwe brab ténungkasén mangéy lémangu bé de dumo no inok fagifaté ro. ⁴Atin méntaus gey magéw tidéw diyo. Atin rénumfak i réfuruhey barko geye, mélaw ménengindoror gey bé bungéde féndawét Siprus fingé tégonon inok mékélung gey bé réfuruhe. ⁵Tidéw béo, nifar gey i dogote mangéy bé doror i de ingéd féndawét Silisia brab Pamilia taman énggégumah gey dob Mira, sébaan ingéd dob sakuf i Lisiawe. ⁶Atin diyo énggitoy

kafitaney sébaane barko tidéw Alejandria mangéy Italia, mélaw féndaén begey dob ni barko.

⁷Atin méntana i kéagéw geye bé ménfiroye gétérésangan brab ménrégén i kéagéw geye taman téménara gey dob ingéde féndawét Kinido. Atin éndaén méntaus gey mangéy fingé diyo non rumfakéy réfuruhey barko geye. Mélaw ménifar gey mangéy fingé bé déligdigay bungéde Kreta inok mékélung gey bé réfuruhe. Atin téménara gey méngindoror bé gonone Salmon. ⁸Atin ménéngindoror gey brab ménrégén foy kégumah geye dob ingéde féndawét “Fiyo Dungguon” gédét dob ingéde Lisia.

⁹Atin ménrugay gey na diyo batí taman éndaén mékégilak i magéwe dob dogote bé do no do gai non gai mélégénéy. Mélaw féngginau Pablwe bero mano, ¹⁰“Enggitó gu toow fo mékégilak i kéagéwe tidéw dini. Médooy de mébinasa bé de uwit dob barkowe brab barkowe so. Brab wén soy do dumo betom méléhu.” ¹¹Endob i odoroy de sundalo énda ménagayu no bé bénréh Pablwe, yamula nodoro noy kébéréh i kafitane bé barkowe brab gefee de. ¹²Atin énda kun fiyo térenon i dunguone ni ké gai mélégénéy. Mélaw ménuyot i kédoono ruwe ké magéw ro inok gégumah ro dob Fenisia dob bungéde Kreta. Been i niy dunguone fingé dob élédoj déligdigane brab élédoj tégnone. Mélaw fiyoy téméréne diyo taman gilid i gaiwe mélégénéy.

I défuke

¹³Atin bé bénó so, méniyuf i réfuruhe énda émbagérén tidéw déligdigan. Mélaw i de étew dob barkowe maro ké fakayén i tause magéw mangéy Fenisia, loo bé bénantak ruwe. Brab bénatu ron i fériwatune atin ménagéw ro ménéngindoror bé dénsaane dob Kreta. ¹⁴Endob énda ménrugayén tidéw bénó, i toowe fo émbagér réfuruh féndawét “Tégénoy Sébangane” énggumah tidéw fantad. ¹⁵Atin énggóbéla i ni réfuruh dob barko geye. Atin énda fakay gey gétaus magéw rémumfak bé réfuruhe ni. Mélaw féndaya gey séden i kéuwit i réfuruhe begey. ¹⁶Atin amun énggétara gey dob sébaane kloh bungéd féndawét Kauda fingé sébangan, ménalang i réfuruhe diyo. Atin i klohe awang bénégéng i barkowe, éndot ro tidéw dob dogote éndob toow fo mérégén. ¹⁷Atin amun ténaléy ron i awange ni, nikét roy géliwéte bé barkowe ni bé de dakél taléy inok énda mérundasén. Mégilak ro ké mélébéng i barkowe dob fantad i dogote non éndaén ménalémén gédét dob Libia. Mélaw kénda roy layage brab ménteanur séden i barkowe modor bé kéfanir i réfuruhe de. ¹⁸Atin énda so téménréni émbagére ni défuk. Mélaw dob gétunduge de fuweh féngganaya roy lémawue bé de uwit dob barkowe ni. ¹⁹Atin bé gétunduge de man fuweh nibér roy de dumoy de usarén dob barkowe. ²⁰Ménfiroy gétérésangan, i éndae kégito gey bé térsange taloo no do gitoon atin démayday soy défuke ni. Tidéw bénó, éndaén foy inam gey ké méuyag gey na.

²¹ Amun ménrugayén i éndae kégéama i de étew ni, téménindég i Pablowe dob téngaanga ruwe brab ménbéréh mano, “Do dumo gu, amuk fénggelingo gom saén begén, énda damén méntékédan tom dob Kreta, brab énda damén i do mén singgula brab do ménbinasa. ²² Endob béleewe ni ay niy béréhé kuwe begom, kagom mégilak non énda i ségétew méléhu betom. Endob i barkowe ni mébinasa. ²³ Non bé nakélungonono ménteférito dob begéney télakiy Tuluse, sani Tuluse féngadafé ku brab gefee bé lowoh guwe. ²⁴ Ménbéréh i télakiwe ni dob begéne mano, ‘Kago mégilak Pablo! Non fatut go témindég dob adafay datue dob Roma. Atin sabaf bé kégédaw i Tuluse beem, tabangé no soy kéluhanay de dumo mo ni dob kéagéw gome inok énda méléhu ro.’ ²⁵ Mélaw,” bang Pablowe, “kagom mégilak non sémarigu dob Tuluse bé métuman i kéluhanay de bénréhén begén. ²⁶ Endob méfanir tom mangéy dob sébaane bungéd.”

²⁷ Ménfoloén bra fot gékélungonon i kéfanir i réfuruhe bé barko geye dob dogote Medeteranean. Tidew béno amun kérara kélungononén, i de étew gémalbék dob barkowe marok gédét geyén dob fantade. ²⁸ Mélaw lénawu roy taléye wén i fériwatun de, inok témbuné roy kénéalem ne. Atin énggétiga ro fot folo gémitroy kénéalem ne. Atin énda ménrugayén tidew béno, lénawu ron man i taléye ni atin télew folo gémitro séden i kénéalem ne. ²⁹ Atin non bé kégilak ruwe ké mésanggat i barkowe dob de dakél batéw, mélaw lénawu roy fote fériwatun tidew dob igor i barkowe brab déménasal ro inok fuwehén damén. ³⁰ Atin i de étew gémalbék dob barkowe ni sénfagayuno roy méraréye damén. Mélaw ténuntu roy klohe awang dob dogote. Ubo-ubo lawué roy de fériwatun dob uléw i barkowe ni. ³¹ Endob ménbéréh i Pablowe dob odoroy de sundalo brab dob de sundalo no mano, “Amuk tékédan i de étew ni gémalbék dob barkowe ni, énda méuyag gom.” ³² Mélaw kénléng i de sundaloy de taléy fénggékét bé awange ni brab féndaya ro mélawu inok méanur sésuway bé barkowe.

³³ Amun mangéyén fuweh, nongot Pablowej mama ro kéluhanan brab ménbéréh mano, “Ménfoloén bra fot gétérésangan i kéongot-ongot gome atin énda i nama gom. ³⁴ Mélaw ama gom! Toow fo kailanga kom i mamae inok méuyag gom. Béréhé ku begom i ni, énda i sébaan betom wén i sug-sugén.” ³⁵ Amun énggilid bénréhén i ni, méndot i Pablowe bé fane brab ménfésalamat dob Tuluse dob téngaanga ruwe. Tidew béno bénAADÉN brab ménama ro. ³⁶ Atin éndaén ménbuku ro atin ménama ro kéluhanan. ³⁷ Ruwo gey ratuh bra fitew folo bra néma kéluhanan. ³⁸ Amun ménbésor ronén, nibér roy de faréy dob dogote inok waléy féngkag i barkowe.

Ménbinasay barkowe

³⁹ Amun géfuwénén, wén i énggito geye fantad éndob i de étew gémalbék dob barkowe, énda gélo ro de ké ati no gonon. Endob énggito roy linéke brab dob dénsaane de wén i do médo de farék. Atin

ménsfagayun ro amuk fakay diyo ro démunggu. ⁴⁰ Mélaw kénélgéroy de fériwatun brab féndaya ro ménlawu dob ménaléme de. Atin nukoh ro soy ikét i de suwil. Tidew bénou, ténunggul roy layage inok faniréy réfuruhe mangéy dob dénsaane. Mélaw ménagéw gey. ⁴¹ Endob i barkowéni ménsanggat dob fanser i dogote brab téménrén diyo. Ménlébéng i lulung i barkowéni atin ménrundas i ulina nuwe non énggébela diyo i émbagére do bagél.

⁴² Sénfagayunoy de sundaloy méméléhue bé de férisu inok énda i gélonguy brab géferaréy bero. ⁴³ Endob i odoroy de sundalo mika de ké féléhuén i Pabloue. Mélaw génléén i de sundalo no bé éndaén féléhuén i de férisu. Atin sénuguén i de gétigan lémonguy bé téfélaway ron dob dogote sungu brab lémonguy mangéy dob dénsaane. ⁴⁴ Atin i de dumobero énda gétigan ro lémonguy, sénuguén bero médot bé de fafan brab do réfa i barkowéni inok rémantaw ro. Atin i kéluhana keye énggégumah dob dénsaane, énda i énggésug-sug begey.

Dob Malta

28 ¹ Amun énggégumah geyén dob dénsaane énda ménkaid gey, wén i ménbéréhé dob begeye bé Malta wayoy dawét i no bungéd. ² Toow fo mégédaw i de étew dob no ingéd begey. Non amun réménana brab toow fo mélégénéy, ménuyag ro aféy brab ténuganul ro begey. ³ Atin i Pabloue ménurut do kayéw fégésénuk. Atin amun féndiyoén i de kayéw dob aféye, ménsut i ulée tidew dob de kayéw ni non kénédufan bé aféye brab kénékeén i kémér Pabloue brab ménbiti-bitin diyo. ⁴ I de étew batidob no ingéd amun énggito roy ulée ni ménbiti-bitin dob kémér Pabloue, ménsebéréh-béréh ro maro, “Ménméléhu étew keeyén i ni lagéy, non fiyon fo ké énda ménléhuén dob dogote, bagién soy méléhue.” ⁵ Endob kénuyung Pablouey kémér ne atin ménlawu i ulée ni dob aféye brab énda i kaidén. ⁶ Nongot-nongot i de étew ké lémbag i kémér Pabloue loo ké tékow métuwar brab méléhu. Endob amun ménrugayén i kéongot-ongot ruwe de atin énda i énggérígono no de, ménfégalin i de itunga ro brab ménbéréh ro maro, “Ségétew tulus i nan.”

⁷ Enda mérayuén tidew diyo i fantade kay lagéye féndawét Publio. Beeney méguléwe bé no bungéd. Atin tényakufén begey dob lawi ne bé méntrélewe gétérésangan brab toow fo méngédaw begey. ⁸ Atin i boh Publiowe démérúun méniro dob kamawenon toow fo démfug brab mégudu. Atin i Pabloue ménahur dob sibéy ne. Tidew bénou, ténégré no brab déménasal atin modor so bénou, ménadi-adi so. ⁹ Sabaf bé ni ménrigo, i kéluhanay de démérúun do étew dob no ingéd ménangéy ro dob Pabloue. Atin kéluhanay ro ménadi-adi. ¹⁰ Atin niraya ro begey médoob do éntingayén. Brab amun ménada geyén dob barkowéni, niraya ro begey bé kéluhanay éntingayéne kailanga key bé kéagéw geye.

¹¹ Diyo wén i sébaane barko tidéw Alejandria féndawét “Do Séfing Tulus”, non téménréni diyo bé gaiwe mélégénéy. Mélaw amun énggélafas i télewe gétérésang kélungonon, ménda gey. ¹² Atin déménunggu gey dob ingéde féndawét Sirakusa brab téménréni gey diyo télew gétérésangan.

¹³ Atin tidéw diyo, méntaus gey mangéy Regio. Atin bé démoe de déménufar i réfuruhe tidéw déligdigan brab énggumah gey dob Peteoli bé ménruwowe gétérésangan. ¹⁴ Atin diyo énggito gey i de dumogey munur bé Kristowe brab fénbati ro begey diyo ségéfadiyan. Tidéw bénou, méntaus gey magéw mangéy Roma. ¹⁵ I de dumogey munur bé Kristowe bati dob Roma, énggelingoo roy lalag i kégumah geye. Mélaw ménagéw i de dumogey bero mangéy dob ingéde féndawét “Foro de Apio” brab de dumogey ménangéy “Tres Tabernas” inok balaké ro begey. Amun énggito Pablowe bero, ménfésalamat dob Tuluso brab ménbagér i fédéw ne.

Dob Roma

¹⁶ Amun énggégumah gey dob Roma, ténungkas roy Pablowe bati dob sébaane lawi beroy ségétewe sundalo mantayan de.

¹⁷ Amun énggélafas i télewe gétérésangan, fentawag Pablowe odoroy de Judio inok sélimud ro. Amun ménslimud ron, bénréh Pablowe bero mano, “Do dumogu, fiyon fo ké énda i rénigo gu sébanil bé de dumotom do Judio taloo no bé adate tidéw dob de katufua tom, fénrisu ro begén dob Jerusalem atin naté ro begén dob de Romano. ¹⁸ Atin i de méguléw tidéw Roma fénénginsaa ro begén brab tangéyé ron damén begén non gétiga ro énda i rénigo gu tete funa ku méléhu. ¹⁹ Amun énda ménagayun i de Judio de, nongot guy mangéye dob datue dob Roma, fiyon fo ké énda i fégétéro gu bé de dumogu Judio. ²⁰ Been i niy funa kuwe ménongot géségito begom brab sébéréh begom. I funa kuwe ménikét bé de sangkali ni non bé kéunur guwe bé Kristowe, sani inam i kéluhanay de Judio.”

²¹ Atin séménumbul ro maro, “Enda sénay énggédot gey sulat tidéw Judea fantag bé beeme. Atin i de dumotom do Judio ménangéy dini tidéw diyo énda mon i nuret ro tete fantag bé beeme. ²² Endob méuyot gey mégélingo ké ati kaame de kékéfítung non gétiga key dob kéluhanay de gonon, wén i do étew émbéréh ro tete fantag bé kaame kékéfíngintulus.”

²³ Mélaw ménfagayun ro mémili térsang sélimud bé Pablowe. Atin toow fo médooy ménangéye dob lawie gono Pablowe bati bé no térsang. Atin tidéw fanay géfuwén énggumah kélungonon i kétoro Pablowe bero fantag bé kékéfúléw i Tuluse bé de étewén. Atin ténulama no bero fénunur bé Jesuse bé kélabit ne bero bé de sénulat Moises brab de étew sénarigoy Tuluse muret bé kékéfúléh ne. ²⁴ Atin i de dumogero énggénur bé kékéfúléh ne, éndob i de dumogero énda fo munur ro de. ²⁵ Mélaw amun méntékan ro, ménfagayun ro béréh Pablowe mano, “Toow i fénbéréh i Rémogor i Tuluse bé Isaiase ségétew sénarigoy Tuluse muret

bé kébérél ne dob de katufua kom, ²⁶ mano, ‘Agéw go mangéy dob de ni do étew brab bérhém bero, Mégélingo gom éndob énda gésobuto kom de, brab téméngteng gom éndob énda gito gom de. ²⁷Non métégas i de uléw i de étew. Ménéfeng i de kéklingo ro, brab méntéléfédéng i de moto ro. Amuk énda loo no bé nan, gégitoy de moto ro, brab gégléngi i de kéklingo ro, brab gésobut i de itunga ro, brab balengé roy de fédéw ro mangéy dob Begéne inok féadi-adiné ku bero.’ ”

²⁸ Féntaus Pablowey kébérél ne mano, “Mélaw fatut gétiga kom i uret i Tuluse fantag bé kéfukas ne ménureténi dob de békén Judio. Atin i berowe fégélingoé ro fo toow.” ²⁹ Amun énggilid bénréh Pablowey ni, ménule i de Judio séédél ro fo toow.

³⁰ Atin bé rugay i ménruwowe gébélantuwa, ménbati i Pablowe dob lawie gono no mafin. Atin tényakufén i kéluhanay de étew mangéy de témukaw. ³¹ Atin nureténi i kéféguléw i Tuluse, atin ménbaraw ténoréni i fantage bé Kadnane Jesu Kristo brab énda i géménlé de.

I Sulat Pablowe dob de Munur bé Kristowe dob Roma

Been i niy sébaane bé de sénulat Pablo fégétoro bé de munur bé Jesu Kristowe. Bé gétahe, toow fo mérarék i Pablowe bé de munur bé Jesuse, atin ménuyot méméléhu bero. Endob tidew béno, méntéfegítøy Jesuse dob Pablowe tidew dob lawayo. Tidew béno, bénalengén i fédew Pablowe brab ménwaléy munur bé Jesuse. Tidew man béno, ménwaléy i Pablowe bantugan muret fantag bé Jesuse. Séménugud mangéy dob de médooy do ingéd inok féunuré noy de étew dob Jesu Kristowe. Atin médooy de ménunur sabaf bé kéuret Pablowe ni.

Amun sénulat Pablowej ni sulat dob de munur do bati dob Roma, énda séna énggéangéyén de diyo. Endob ménuyot foy Pablowe mangéy diyo. Mélaw sénulatén i ni fégéségifaén bero. Sénulatén soy ni inok toroé no bero fantag bé Jesu Kristowe. Ténero Pablowe so bé i kéluhanay de étew, wén i do sala ro. Atin i bayad i salae, been i kéléhue. Endob i Tuluse, sénuguén i Nga ne Jesu Kristo dob duniyae ni inok féléhuén. Ménléhu i Jesuse génantino noy de kéilawan. Mélaw fésagadéy Tulusey de sala i de étew amuk munur ro bé Jesuse. Atin i de munur bé Jesuse, féwaléyéy Tuluse bero métintu dob adafa nuwe. Been i niy kétoroe dob ni sulat Pablowe ni.

1 ¹Begéney Pablowe sulata ku begom do munur bé Jesuse dob ingéde Roma. Begéney ségétéwe sugu-sugué Jesu Kristowe. Fénemili i Tuluse begén waléy apostol inok ureté kuy Fiyowe Uret fantag bé Jesuse.

²I ni Fiyo Uret, fénasad i Tuluse bé do gétah bé kéfésulat ne bé de sénarigo no muret bé kékérén ne dob Mékétéfuwe Libro. ³Atin i ni uret, been i niy fantage bé Nga i Tuluse, sani Kadna tome Jesu Kristo. Ségétew so kéilawan non ménumlah tidew dob katufua nuwe Datu Dabide. ⁴Atin i Jesuse ni, Mékétéfu so Tulus non fénggito noy Been i Nga i Tuluse bé kétébule ne bé barakat ne. ⁵Atin sabaf bé sénugu Kristowe begén, niray i Tuluse begén i fiyowe galbék gu non fénwaléy i Tuluse begén ségétew apostol inok émbantug i Kristowe. Atin mélaw démoyunu magéw muret témoró dob de étew dob kéluhanay de ingéd inok munur ro so bé Jesuse. ⁶Atin fiyon i begome do munur bé Kristowe dob Roma, fénemili i Tuluse so begom waléy do kuyug Jesuse.

⁷Mélaw sulata kuy kéluhana kome dob Roma do kénimuoy Tuluse brab fénémilién waléy kuyugén.

I Abay tome Tulus brab Kadnane Jesu Kristo mégédaw ro damén begom brab iray ro damén begom i métanéke fédéw.

Fésalamat i Pablowe bé Tuluse

⁸Ay niy sunguwe bérhéhé ku begom: Fésalamatu bé Tuluse dob Jesu Kristowe sabaf bé begome. Non énggélingooy kéluhanay étewey fantage bé kéunur gome. ⁹Sabaf bé Tuluse, mégéroru gémalbék muret bé Fiyowe Uret fantag bé Nga ne Jesu Kristo. Atin énggétigay Tulusey kédasala kuwe begom sénga tékélid. ¹⁰Atin démoyunu mongot bé kédasala kuwe bé féfakayéy Tulusey kéagéw guwe mangéy témukaw begom amuk kétaya no, non ménrugayén i kétaya kuwe témukaw begom. ¹¹Non toow fo méuyotu géségito begom inok gétoroo ku begom i ténero i Rémogor i Tuluse begén funa kom waléy méégét i kéunur gome. ¹²Mélaw séféfiyo tom fédéw bé kéunur tome bé Kristowe.

¹³Do dumo gu, méuyotu ké gétiga kom i ni, médoonén gule bénantak guy mangéye témukaw begom éndob wén foy manggae begén. Méuyotu damén mangéy diyaan inok géfénuro kuy de étew békén Judio dob begome dob Roma bé Jesuse, loo bé rénigo guwe dob de békén Judio dob de ségiyo ingéd. ¹⁴Non maak wén i dakél utong gu dob kéluhanay de étew. Atin i bayad guwe de, been i kéuret guwe fantag bé Jesuse. Fatut ureté ku dob de métillédtéd brab dob de légléngén, dob de énggégéganad brab dob de énda énggégéganad. ¹⁵Mélaw toowu fo méuyot muret bé Fiyowe Uret dob begome so do bati dob Roma.

I Fiyowe Uret

¹⁶Enda fo mémalawu muret bé ni Fiyo Uret non fiyon fo ké ati munure de, i sunguwe do Judio brab tidéw béno do békén Judio, been so fukaséy Tuluse inok énda mékukumén. ¹⁷Non ménfayag dob Fiyowe ni Uret bé féwaléyéy Tuluse métintuy de étew munur bé Kristowe sabaf saén bé kéunur ruwe. Non wén i Ménssulate Kébéréh i Tuluse mano, “I étewe ménwaléy métintu sabaf bé kéunur ne bé Tuluse, méuyag taman sa taman.”

Ménsala i Kéilawane

¹⁸Atin i Tuluse dob lawayo, fénggito noy kékérit ne bé de tete adat i de étew brab de sala ro. Non sabaf bé de tete rigoné ro, alangé roy toowe kétoro. ¹⁹Kukuméy Tuluse bero non magad damén gésobuto roy fantage bé Tuluse. Non fénkéntayéy Tuluse néni i kéfégétiga nuwe de dob berowe. ²⁰Mélaw énda i funay ségétéwe étew gébéréh mano, “Enda gétiga ku de ké wén i Tulus.” Non tidéw bé kélimbag i Tuluse bé duniiae ni, énggétuwanén

i magufusae barakat i Tuluse bé ati lénimbag ne fiyon fo ké énda giton i Tuluse. Atin sabaf so bé atiy lénimbag ne, fatut gétigay kéluhanay étewe bé tintu Tulus i Tuluse. ²¹I de ni do étew énda munur ro bé Tuluse, gétiga roy fantage bé Tuluse éndob énda fégadata ro de loo damén bé fatute. Enda so fésalamata ro de. Yamula i kéfégitung ruwe ménwaléy énda i lantékén brab maak délémon. Non éndaén gésobuto roy toowe tidew dob Tuluse. ²²Atin fiyon fo ké bérhé ro do métiledté ro, éndob ménwaléy ro do dufang. ²³Non énda féngadafé roy barakatane Tulus magufusa, yamula féngadafé roy de kéninontow rénigo ro loo bé falas i kéilawane énda magufusaén, brab do kloh manok, brab do binatang, brab do ulé.

²⁴Atin non toow fo dufang i de ni do étew, té nagak i Tuluse bero brab féndayaén bero rémigo do tete kétaya ro. Atin mélaw toow fo tete brab mémé malay de kérigo ro bé de lowoh ro. ²⁵Atin énda munur ro bé toowe fantag bé Tuluse. Yamula munur ro bé de tugi. Féngadafé roy de lé nimbag i Tuluse, énda féngadafé roy Beene léménimbag bé de ni. Médayew damén i Tuluse taman sa taman. Amen.

²⁶Atin sabaf bé kétagak ruwe bé Tuluse, té nagak i Tuluse bero brab féndayaén bero rémigo bé de tete do mémala kétaya ro. Fiyon i de libun bero, ménwaléy ro maak lagéy. Mika ro sé tayan bé de lagéy loo damén bé fatute. Yamula sé tayan ro falan bero do libun. ²⁷Atin i de lagéy rigoné roy tete loo so bé ni. Ménwaléy ro maak libun. Mika ro sé tayan bé de libun loo damén bé fatute. Yamula sé tayan ro falan bero do lagéy. Rigoné roy toowe fo tete funa ro fatut mémala. Atin mémukum ro loo bé fatute sabaf bé de tete rigoné ro bé de lowoh ro.

²⁸Sabaf bé kíika ruwe munur bé Tuluse, té nagak i Tuluse bero brab féndayaén bero bé de tete kégitung ro. Mélaw rigoné roy de tintu fo tete énda damén fatutén rigonén. ²⁹Atin falan tete i dé moyune fénggitung ro. Ménwaléy ro do tete étew, do arumén, do rémigo tete, do toow fo médaléw, do méméléhu, do méuyot sétiboh, do tugién, do dusá, brab do géméno. ³⁰Atin dé moyun émbéréh ro tete fantag bé de dumo ro brab mérarék ro bé Tuluse. Enda fégadata roy dumo ruwe brab toow ro fo félangka-langka. Toow ro fo furung mégitung bé de tete rigonén. Atin énda odoro roy sugu i de lukés ro. ³¹Atin furah ro brab énda tumané roy de fasad ro. Atin énda mégédaw ro taloo no méuray i na ruwe bé dumo ruwe. ³²Enggétiga roy kóbéréh i Tuluse bé fatut méméléhu i étewe rémigo bé de ni do késalaan. Endob fiyon fo ké loo bé ni, fétausé ro soy de tete rigoné ro, atin méuyot ro de uman ké mamung soy de dumo étew bé de ni do rigoné ro.

I kékukum i Tuluse

2 ¹Mélaw gétiga tom fatut kukumén i de tete étew. Endob énda i ségétew begom gékukum bé de ni do étew non fatut gom so mémukum. Non

rémigo gom so tete ségiléw bé berowe. Mélaw amuk dowoyé kom bero, dénowoy gom soy de lowoh gom. ² Atin gétiga tom mééntang i kékukum i Tuluse bé de étew rémigo tete loo bé de ni. ³ Fiyon fo ké dowoyé kom i de ni do tete étew, éndob fiyon i begome rémigo gom so tete ségiléw bé berowe. Mélaw kagom fégitungén de ké géséliyah gom bé kékukum i Tuluse.

⁴ Makom keeyén ké éndaén kailanga kom odoron i kétayay Tuluse non toow fo mégédaw i Tuluse brab tingkélé noy kékérít ne. Endob gétiga kom damén i funay Tuluse mégédaw brab témingkél inok gésénule gom bé de sala gom.

⁵ Endob toow fo métégas i de atura kom funa kom mika gésénule. Mélaw méumanan i kékérity Tuluse begom. Atin toow na fo gétimal i kékukum i Tuluse begom bé gaiwe félégito noy méméntange kékukumén. ⁶ Non iray i Tulusey fatute irayén dob séngae étew sabaf bé de rénigo no. ⁷ Wén i do étew rigoné roy fiyowe sénga téklid non méuyot ro de ké dayéwéy Tuluse bero brab fégadata no bero brab iraya no bero bé umule magufusa. Mélaw tintu fo iray i Tuluse beroy umule magufusa. ⁸ Endob wén soy do étew toow fo do méitung. Mika ro rémigo fiyo, yamula rémigo ro tete. Mélaw toow fo émbéyat i kékukum i Tuluse bero, non tintu fo mélérít bé de rigoné ro. ⁹ Toow fo kérasayan brab kérégénan i kéluhanay de étew rémigo tete, dob de Judio sungu, tidéw bénō dob de étew békén Judio. ¹⁰ Endob i de étew rémigo bé fiyowe, dayéwéy Tuluse bero brab iraya no bero bantugan brab kédané noy kékuku ruwe. Sungu-sungu dob de Judio, tidéw bénō dob de étew békén do Judio. ¹¹ Non i kékukum i Tuluse toow fo mééntang, atin énda i ramigo no.

¹² I de étew békén do Judio, énda gétiga roy de sugu i kitabe tidéw dob Moisese. Mélaw amuk gésala ro, kukuméy Tuluse bero, éndob énda usaré noy kitabe fégékukumén bero. Endob i de Judio, gétiga roy de sugu i kitabe tidéw dob Moisese. Mélaw amuk gésala ro, kukuméy Tuluse bero bé kitabe. Atin i bayad i sala i de étew kéléhu. ¹³ Non i Tuluse énda féwaléyé no métintuy étewe mégélingo saén bé kitabe. Yamula béréhéy Tuluse métintuy de étew modor bé kitabe. ¹⁴ I de étew békén do Judio, énda gétiga roy kitabe tidéw dob Moisese. Endob fiyon fo ké énda gétiga roy kitabe, wén i no géodoro ro soy atiy ménsgue dob kitabe. Non gétiga ro dob de fédéw roy atiy fatute rigonén. Mélaw maak wén soy kitab dob de fédéw ro. ¹⁵ Bé de fiyo rigoné ro, félégito ro gétiga ro dob de fédéw roy fatute dob kitabe. Atin gétiga ro so dob de itunga roy fatute brab tete. Non amuk rigoné roy fiyowe, moror ro. Endob amuk rigoné roy tete, tete soy fédéw ruwe de. ¹⁶ Mélaw loo bé niy kékukum Jesu Kristowe bé de ménbunéy do kékéfítung i de kéilawan bé gaiwe fékukuméy Tuluse loo bé ménbéréhe dob Fiyowe Uret ureté ku.

Fantag bé de Judio

¹⁷ Atin fantag bé begome do Judio. Méuyot gom de fo ké fédawét gom i de lowoh gom do “Judio”. Atin sémarig gom bé kéodoro kome bé kitabe

brab félangka-langka gom non begom i fénémili i Tuluse. ¹⁸Gétiga kom i kétayay Tuluse rigoné kom atin gétiga kom i fatute non ténero i kitabe begom. ¹⁹Makom ké begom i manangguwite bé de étew maak langafén non énda gétiga roy fantage bé Tuluse. Brab makom ké begom i do maak solo émfégito bero bé agéwone mangéy dob Tuluse. ²⁰Atin makom ké begom i do téromo bé de dufang, brab do maistéro dob de étew mantu séna méngganad fantag bé Tuluse. Loo bé niy késégitung gome non niray i Tuluse begom i kitabe, atin diyo giton i tintuwe kégétigan brab toowe. ²¹Démoyun gom téromo dob de ségiyo, éndob fatut toroé kom i kagome lowoh. Téromo gom makom, “Kagom ménakaw”, éndob ménakaw gom so. ²²Béréhé kom makom, “Kagom lémamfa”. Endob lémamfa gom so. Brab bénréh gom mika gom bé de kéninontow, éndob mahur gom dob de lawi féngadafan inok ménakaw do kéninontow. ²³Félangka-langka gom non niray i Tulusey kitabe dob begome. Endob fémalané kom i Tuluse bé éndae kéodoro kom bé kitabe. ²⁴Wén i Ménsulate Kébéréh i Tuluse mano, “Ménbéréh i de békén Judio tete fantag bé Tuluse non bé de tete rénigo gom do Judio.”

²⁵Atin i begome do Judio, makom ké toow fo mélaga i kétulie begom. Atin toow, wén i lagaén amuk odoro kom i kitabe. Endob amuk énda odoro kom i kitabe, énda i laga i kétulie begom. ²⁶Ufama, i étewe békén Judio, fiyon fo ké énda méntulién, amuk odoro noy kitabe, maak méntuli so dob adafay Tuluse. ²⁷Mélaw i de étew békén Judio do énda méntulién, amuk modor ro bé kitabe, fégito ro bé fatut mékukum gom. Non énda odoro kom i kitabe fiyon fo ké dob begome sénulat i kitabe ni, brab do méntuli gom. ²⁸Non i étewe métandaan saén i lowoh ne bé kétulie de éndob énda séna méntintuy fédew ne, békén tintu Judio. Non i funane fétuli békén saén dob lowohe. ²⁹Yamula i tintuwe Judio, been i étewe métintuy fédew ne. Non maak méntuli i fédew ne non fénwaléy i Rémogor i Tuluse métintuy fédew ne. Békén i kitabey ménféwaléye de méntintu. Atin i étewe ménwaléy méntintu non bé galbék i Rémogor i Tuluse, médayéw i Tuluse de, fiyon fo ké énda médayéw i de étew de.

3 ¹Amuk toow i ni, aw wén i laga i étewe ké Judio loo ké énda? Aw wén i laga i kénéfétulie loo ké énda? ²Toow fo dakél i laga ne. Non wén i do dakél kénéfétulie loo ké énda? ³Fiyon fo ké i de dumo tom do Judio énda munur ro bé Kébéréh i Tuluse, been so tumanéy Tulusey fasad ne. ⁴Non fiyon fo ké i kéléuhanay de kéilawan do tugién, énda tugién i Tuluse. Non wén i ménsulate kénéfétulie Dabide fantag bé Tuluse mano, “Falan fo toow brab métintuy kénéfétulie me. Atin amuk wén i témo Beem, Been so témaban i Tuluse.”

⁵Endob amuk wén i dufang émbéréh mano, “Amuk rémigo tom tete, fiyo so, non gétigay de étew i kénéfétulie Tuluse amuk gito roy kétete tome.

Non mas gésobuto roy fiyowe rigonéy Tuluse bé de rigoné tom. Mélaw énda fatutén kukuméy Tuluse betom.” Endob toow fo dufang i étewe gébéréh loo bé ni. ⁶Békén toow i nan dufang kékéréh, non amuk énda métintuy Tuluse, énda gékukumo noy kéilawane.

⁷Atin amuk wén soy dufang étew émbéréh mano, “Fijo so ké tugién tom inok giton i éndae kétugiéy Tuluse. Mélaw gédayéwoy de étew i Tuluse non toow na fo fiyoy Tuluse bé betome. Mélaw énda fatut tom mékukum bé de sala tom.” Endob toow fo dufang i ni kékéréh.

⁸Non ségiléw bé niy dufange kékéréh mano, “Rémigo tom tete inok méumanan i fiyowe.” Toow fo dufang i nan kéfégitung. Endob wén i do étew téménifu begén bé bénréh gu kun i nan kédufangan. Endob énda i énggékérého ku loo bé nan. Fatut mékukum i de étew ménbéréh tugién fantag bé begéne loo bé nan. Atin mékukum ro mon.

Enda i métintu étew

⁹I betome do Judio, katom fégitungén de ké toow na fo fiyoy katome gohon bé de étew békén do Judio. Non fénggito gun begom i funa tome ségiléw. Enda i sébidana tom do Judio brab de békén Judio non kéluhanan tom énggésala. ¹⁰Non wén i Ménsulate Kékéréh i Tuluse mano, “Enda i métintu dob adafay Tuluse, fiyon ségétew. ¹¹Enda i gésobut bé Tuluse, brab énda i séméléd bé agéwone mangéy dob Tuluse. ¹²Non i kéluhanay étewe téragak roy Tuluse. I kéluhanan réménigo tete. Enda i réménigo fiyo, fiyon ségétew. ¹³I de ba ro maak do lébéng énda méntamfurén.

Non toow fo tete i de kégébaa ro. Atin toow ro fo émbagér témugi. I de kékéréh ro maak bisa ulé. ¹⁴Démoyun ron mémula brab mékétete fédew i de kékéréh ro. ¹⁵Toow ro fo magad méméléhu. ¹⁶Atin i kéluhanay géayo ruwe mébinasa brab kékéfasangan. ¹⁷Sétiboh saén i gétiga ruwe. ¹⁸Atin énda fo fégadata roy Tuluse.” Been i niy Ménsulate Kékéréh i Tuluse.

¹⁹Atin énggétiga tom i ni: I kitabe tidew dob Moisese kay de Judio, sani de téménlama modor bé ni kitab. Sénulatén inok énda i funay étewe gébéréh bé énda i salaén. Atin mélaw i kéluhanay kéilawane fakay kukuméy Tuluse. ²⁰Non i kéilawane réménigo bé éndae fakay dob kitabe. Mélaw énda i étew ménwaléy métintu dob adafay Tuluse sabaf bé kéodoro nuwe bé kitabe. I funane wén i kitab inok fégito noy sala i étewe.

I kékétintuy Tuluse

²¹Endob béléewe ni, fénggitoy Tulusey kékétintu nuwe bé étewe. Békén sabaf bé kéodoro étewe bé kitabe. Nuret i Ménsulate Kékéréh i Tulusey fantage bé de ni. ²²I Tuluse, féwaléyé no métintuy étewe sabaf bé kéunur ne bé Jesu Kristowe. Rigoné noy ni dob kéluhanay de munur bé Kristowe non énda i ramigoy Tuluse. ²³I kéluhanay étewe énggésala brab toow fo kulang i kéluhanané dob fatute kétayay Tuluse. ²⁴Gido loo, sabaf bé

kégédaw i Tuluse saén, fénwaléyén betom métintu non bé kéunur tome bé Jesu Kristowe sani kémédane bé de sala tom.²⁵ Sabaf bé de sala tom, kukuméy Tuluse damén betom bé kéléhue. Endob i Tuluse fénféléhuén i Jesu Kristowe inok gantino no betom bé de sala tom, brab inok mékédan i kékukum i Tuluse betom. Mélaw fésagadéy Tuluse betom bé de sala tom sabaf bé kéunur tome bé Jesuse, sani tulake niray i Tuluse. Rénigoy Tulusey ni inok fégito noy kééntang i kékukum ne. Bé do gétah, énda kénukumén i de étew ménṣala non toow fo témingkél i Tuluse.²⁶ Gido loo, fatut kukuméy Tulusey de sala. Been i niy funa nuwe kénukumén i Jesuse. Rénigo noy ni inok fégito noy kééntang i kékukum ne. Atin mélaw béleewe ni, fénwaléyén métintuy de étew munur bé Jesuse.

²⁷Mélaw énda i funa tom félangka-langka. Non énda ménwaléy tom métintu sabaf bé kéunur tome bé Jesu Kristowe.²⁸ Been i niy funa kuwe ménbéréh bé funay étewe waléy métintu, békén sabaf bé kéodorone bé kitabe, yamula sabaf saén bé kéunure bé Jesuse.²⁹ Non i Tuluse békén saén i de Judioy géfengadafe de, éndob fiyon foy de békén Judio géfengadafa ro soy Tuluse.³⁰ Non sébaan saén i Tuluse. Atin ségiléw i kéfétintu nuwe bé de Judio brab de békén Judio, sabaf saén bé kéunur ruwe bé Jesuse.³¹ Endob kagom fégitungén de ké ikaa tomén i kitabe. Békén! Non amuk munur tom bé Jesuse, géodoro tom mélaw i kitabe.

Fantag bé Abrahame

4 ¹Ufama, i Abrahame, sani katufua keye do Judio. ²Amuk ménwaléy métintu non bé kéodoro nuwe bé de sugu i Tuluse, wén i funa no félangka-langka. Endob gétiga tom ménṣala soy Abrahame, atin mélaw énda i funa no félangka-langka. ³Non wén i Ménsulate Kébéréh i Tuluse mano, “Ménunur i Abrahame bé Tuluse. Atin mélaw kénarang i Tuluse métintu sabaf bé kéunur ne.” ⁴Ufama, amuk wén i ségitew étew géménalbék, gédoté noy sahud ne. Atin médait sémahud. Békén saén niray de non sahudén bé géménalbék nuwe. ⁵Endob békén loo bé nan i kéfétintuy Tuluse betom do munur dob Beene. Non féwaléyé no betom métintu sabaf saén bé kégédaw ne. Enda médait tom médot bé ni non énda géménalbék tom de. Ménsala tom, gido loo kénarang i Tuluse betom métintu non bé kéunur tome bé Jesuse. ⁶Been i niy atag i kébéréh Dabide bé méoror kun i étewe ménwaléyén métintu dob adafay Tuluse békén sabaf bé galbék ne. ⁷Bénréh Dabide mano, “Méoror i de étew fén sagaday Tulusey de sala ro brab ménkédan i de tete rénigo ro. ⁸Toow fo méoror i étewe lénifot i Kadnaney de salaén.” ⁹Atin i ni kéfiyonon, békén saén niray dob de Judio, sani de méntuli. Yamula niray so dob de békén Judio, sani de énda méntuli. Non wén i ni Ménsulat Kébéréh i Tuluse lénabit gu bé gétahe mano, “Ménunur i Abrahame bé Tuluse, atin mélaw

kénarang i Tuluse métintu sabaf bé kéunur ne.”¹⁰ Ati gaiwe de fénwaléy i Tuluse métintuy Abrahame? Féntintuy Tulusey Abrahame bé énda séna méntulién de.¹¹ Tidéw béno, ménfétuli i Abrahame. Atin i funa nuwe ménfétuli inok wén i tanda fégito no bé kéfétintuy Tuluse de sabaf bé kéunur ne fiyon fo bé énda séna méntulién de. Mélaw i Abrahame ménwaléy maak katufuay de munur bé Tuluse, sani de ménwaléy métintu dob adafa nuwe, fiyon fo ké énda séna méntuli ro.¹² Beene soy katufuay de Judio do munur, éndob békén saén sabaf bé kéfétuli ruwe. Yamula sabaf so bé ségiléw i kéunur ruwe bé Abrahame fiyon fo ké énda séna méntulién de.

I Kéunure

¹³ I Tuluse fénasada noy Abrahame brab de séfuén bé irayén i duniyae dob berowe. Endob i funay Tuluse réménigo bé ni fasad békén sabaf bé kéodoro Abrahame bé kitabe. Yamula non ménunur bé Tuluse funa no so ménwaléy métintu.¹⁴ Non amuk i fénasad i Tuluse irayén dob de étew modor bé kitabe, énda i atag i kéunur i étewe brab énda i laga i fasad i Tuluse.¹⁵ Endob énda waléy tom métintu bé kéodor tome bé kitabe, non been i kitabey funay Tuluse mékérít betom. Non énda géodoro tom de. Endob amuk énda i kitab, énda géféliso tom de.

¹⁶ Rénigoy Tulusey fasad ne sabaf bé kéunur Abrahame de, inok giton i fasad i Tuluse sabaf saén bé kégédaw ne, békén sabaf bé galbék i étewe. Atin i fasade ni kay kéluhanay de séfu Abraham. Non kay de Judio modor bé kitabe brab kay de étew so békén Judio munur loo bé Abrahame. Non i Abrahame, beeney maake katufuay kéluhanay de munur, do Judio brab de békén Judio.¹⁷ Non wén i Ménsulate Kébéréh i Tuluse dob Abrahame mano, “Féwaléyé ku beem katufuay de étew dob de médoor ingéd.” Mélaw dob adafay Tuluse, i Abrahame ménwaléy katufuay de munur bé Tuluse non ségiléw i kéunur ruwe bé beene. I Tuluse unuro tom, toow fo barakatan brab fakay tébuleé noy de ménléhu brab gélimbaga noy de éntingayén énda séna ménlimbagén.¹⁸ I Abrahame ménunur bé Tuluse fiyon fo ké éndaén i inamén géfégéngä. Mélaw ménwaléy katufuay de étew dob de médoor ingéd. Non wén i Ménsulate Kébéréh i Tuluse mano, “I de séfúém waléy ro médoor loo bé kédooy de gitoom dob lawayo.”¹⁹ Bé béno gai toowén fo lukés i Abrahame, gédét mératuh gébélantuwa i idad ne, brab gétinga no éndaén fakayén géfégéngä. Atin gétinga no soy bawag ne Sarah éndaén fakayén géfégéngä non toowén fo lukés so. Endob fiyon fo ké loo bé niy kélubay i lowoh ne, émbagér i kéunur Abrahame bé Tuluse.²⁰ Brab énda ruwo-ruwoy fédéw ne fantag bé fasad i Tuluse de, yamula fénégétén i kéunur ne brab dénayéwén i Tuluse.²¹ Non tintu fo séménarig dob Tuluse bé rigoné noy atiy fénasad ne dob beene.²² Atin mélaw kénarang i Tuluse métintu sabaf bé kéunur ne.²³ Atin bang i ni

Ménsumlat Kébéréréh i Tuluse mano, “Kénarang i Tuluse métintu” békén saén fantag bé Abrahame.²⁴ Yamula sénulatén so dob betome do munur bé Tuluse, sani téménébulee bé Jesuse Kadna tom, inok karangéy Tuluse so betom métintu sabaf bé kéunur tome.²⁵ Non i Jesuse sénugu i Tuluse inok féléhuén gémantinon betom sabaf bé de sala tom. Tidéw beno, méntébule, inok waléy tom métintu dob adafay Tuluse.

I kénéfintuy Tuluse

5 ¹Mélaw i Tuluse fénwaléyén betom métintu dob adafa nuwe sabaf bé kéunur tome bé Kadna tome Jesu Kristo. Atin sabaf bé ni rénigo Jesuse, éndaén mékérit i Tuluse betom. ²Atin non bé kéunur tome bé Jesuse, fénfakayén i kégédote bé kégédaw i Tuluse béleewe. Mélaw toow tom fo moror non gétiga tom rémendaw tom moso loo bé Tuluse. ³Atin békén saén i niy funa tome moror. Moror tom so bé de mérégén géagéwo tom non sabaf bé de kérégénon, waléy tom gáfedayday munur. ⁴Atin amuk gáfedayday tom munur, mésuwat i Tuluse betom. Atin amuk mésuwat i Tuluse betom, waléy émbagér i inam tome. ⁵Atin i inam tome métuman, non fénggitoy Tulusey kégédaw ne betom bé kíray ne bé Rémogor ne mangéy dob de fédew tom.

⁶ Amun maak do férisu tom séna bé de sala tom brab énda gétabanga tom i lowoh tome, i Tuluse ténabangén betom dob fénemili ne gai. Non ménléhuén i Nga ne Jesus inok fukasé no betom do tete étew. ⁷Toow fo mérégén i ségétéwe étew méléhu inok tabangé noy métintuwe étew. Gido loo, wén so keey i ségétéw étew méléhu inok tabangé noy métintuwe étew. ⁸Endob i Tuluse, fénggitoy kégédaw ne betom, non fiyon fo ké ménalsa tom de séna, ménléhu i Kristowe génantino no betom. ⁹Atin béleewe ni, ménwaléy tom métintu dob adafay Tuluse sabaf bé kéléhu Kristowe. Mélaw toow na fo gétiga tom bé mífukas tom tidéw dob kékukum i Tuluse sabaf bé Kristowe. ¹⁰Bé gétahe de, sébanil i Tuluse betom, éndob sabaf bé kéléhu i Nga ne, ténayakufén man betom. Mélaw non béleewe ni do dumoy Tuluse nén betom, tintu gétiga tom mífukas tom sabaf bé kétébule i Nga ne. ¹¹Atin békén saén bé ni! Méror tom fo toow non bé kégédaw i Tuluse fénggitoy no fénagéw dob Kadna tome Jesu Kristo. Been i niy funay Tuluse ménkédan i kérít ne betom brab ténayakufén betom.

I Adame brab Kristowe

¹²I funa nuwe wén i do tete dob duniyae ni, non ménalsa i sunguwe étew féndawét Adam. Atin kéléhu i bayad i salae. Tidéw beno, léménégéb i tete mangéy dob kéluhanay étew. Mélaw i kéluhanay kílawane méléhu non i kéluhanane ménalsa. ¹³Fiyon fo ké énda séna niray Moisesey kitabe de, wénén i do sala dob duniyae ni. Endob amun énda

sénay kitab de, énda so ménbilang i de sala de. ¹⁴Gido loo, ménléhu i kéluhanay étewe tidéw dob Adame taman dob Moisese, fiyon foy de étew énda ménsala ro loo bé kéfélis Adame bé sugu i Tuluse.

I Adame maak anlung Kristowe non wén i gédotéy kéilawane tidéw dob berowe. ¹⁵Endob békén ro ségiléw non i iray i Tuluse békén ségiléw bé sala Adame. Médooy étewe ménléhu sabaf bé sala Adame. Endob toow na fo dakél i kégédaw i Tuluse irayén bé kéfésagad ne bé médoowe étew sabaf bé kégédaw Jesu Kristowe. ¹⁶Atin loo so bé ni, békén ségiléw i kégédaw i Tuluse bé sala Adame. Non mékukum i kéilawane sabaf bé sébaane saén sala Adame. Endob amun médooy de étew réménigo médoo do sala, ménwaléy métintuy kéilawane dob adafay Tuluse sabaf saén bé kégédaw ne. ¹⁷Sabaf bé sala Adame, méléhu i kéluhanay kéilawane. Endob toow na fo mékégaif i rénigo Jesuse non sabaf bé kégédaw Jesu Kristowe, gédotén i kéfésagad i Tuluse brab kéfétintu nuwe. Atin i de étew do waléy métintu sabaf bé kégédaw i Tuluse, beroy Tuluse méguléw.

¹⁸Mélaw amuk sabaf bé sébaane sala Adame, mékukum i kéluhanane de, ségiléw so bé sébaane fiyo rénigo Jesu Kristowe. Non sabaf bé rénigo Jesuse, méfukas i kéluhanane inok énda mékukum ro brab gédoté roy umule magufusa. ¹⁹Non i médoowe ménwaléy ménsala sabaf bé Adame énda modorén bé sugu i Tuluse, éndob médooy ménwaléye métintu dob adafay Tuluse sabaf bé kéodor Jesuse bé sugu i Tuluse.

²⁰I funay Tuluse nirayén i kitabe inok méuman i kégitone bé salae. Endob amun minut médooy kégitone bé salae, toow na fo méuman i kégédaw i Tuluse bé kéilawane. ²¹Mélaw fiyon fo ké dakél i bagér i salae non méléhu i de étew, toow na fo barakatan i kégédaw i Tuluse non féwaléyé no betom métintu. Mélaw méuyag tom taman sa taman sabaf bé Kadna tome Jesu Kristo.

Maak ménléhu i tafaye adat

6 ¹Ati mélaw i fégitungé tome? Wén keey i dufang gébéréh bé fatut fétausé tom kun i késala tome inok méuman i kéfésagad i Tuluse brab kégédaw ne betom. Endob békén fo katabuwan i nan. ²Enda fakayén ké taus tom mésala non i sunguwe adat tom maak ménléhuén brab ménwaléy tomén métintu. ³Aw énda gétiga kom de kéluhanan bé amun bénautis tom, fénggito tom ménwaléy tom do dumo Jesu Kristowe, maak ménamung tom so bé kéléhu ne? Non Been i géménantinon betom. ⁴Mélaw amun bénautis tom maak ménamung tom so bé kéléhu ne brab kélébéngé de. Atin sabaf bé barakat i Tuluse, méntébule i Kristowe. Ménrigoy ni inok wén soy katom bé mantuve umul brab adat.

⁵Non amuk ménamung tom bé kéléhu Kristowe, tintu fo géamung tom so bé kétébule ne. ⁶Atin gétuwa tom i ni, i tafaye umul tom brab adat tome maak ménléhuén énggéodor bé Kristowe dob kruse, inok i

tafaye adat ménsala mékédanén. Mélaw békénén riféy salae betom, non éndaén géfégéso no betom rémigo tete. ⁷Non i étewe ménléhuén, éndaén gésalaén. ⁸Atin non maak ménléhu tomén séréngan bé Kristowe, munur tom bé méuyag tom so betom ro Kristowe. ⁹Non gétiga tom éndaén méléhu ségule i Kristowe non méntébuleén. Mélaw éndaén gétabanay léhuone de. ¹⁰Ménléhu saén ségule inok gantino noy kéléhu i kéilawane non bé de sala tom. Atin méntébule, brab i umul ney funay Tuluse mésuwat. ¹¹Mélaw loo so bé ni, fatut tédemé kom bé éndaén kailanga kom i rémigowe sala, non maak ménléhu gom séréngan bé Jesuse. Atin tédem gom i mantuve umul gom brab adat gome sabaf bé kewaléy gome do dumo Jesu Kristowe brab i umul gomey funay Tuluse mésuwat.

¹²Mélaw, do dumo gu, kagom fédayaén i de tete kétaya kom émfésala bé de lowoh gom dob duniiae ni. Kagom magayun bé de tete. ¹³Atin kagom fédayaén i réfa i de lowoh gom mésala usaré kom fégérigo gom tete. Yamula iray gom i lowoh gome dob Tuluse inok usaré no bé fiyowe rigonén. Non been i fatute rigoné kom do ménfukasén tidéw dob kéléhue brab wénén i mantu umul gom brab adat. ¹⁴Mélaw kagomén fédayaén i salae méguléwon begom, non éndaén sémarig gom bé kéodoro kome bé kitabe. Yamula sémarig gom bé kégédaw i Tuluse.

I kérigowe bé fiyowe

¹⁵Wén keey i dufang gébéréh bé fatut fétausé tom kun soy késala tome non éndaén sémarig tom bé kéodor tome bé kitabe, atin sémarig tom saén bé kégédaw i Tuluse. Endob békén i nan. ¹⁶Gétiga kom, amuk mamfun gom, waléy gom do rifén. Mélaw amuk modor gom bé amu gome sala, méléhu gom. Endob amuk modor gom bé amu gome Tulus, waléy gom métintu. ¹⁷Fésalamatu bé Tuluse non fiyon fo ké riféy salae begom bé do gétah, ménwaléy gom so méégét munur bé toowe kétoro fantag bé Jesuse énggelingoo kom. ¹⁸Atin amun méntangéy gomén tidéw dob salae, ménwaléy gom do métintu sugu-suguéy Tuluse. ¹⁹I funa kuwe ménbéréh bé ni ufama fantag bé riféne brab amue, inok magad i kégésobut gome bé kétoro guwe. Bé do gétah, maak do rifén gom bé de tete kétaya kom. Mélaw namfuno kom i de tete do mékérésik rigoné kom brab ménumanan i de sala gom. Endob béléewe ni téféwaléy gom rifén dob métintuwe inok gérigono kom i fiyowe kétayay Tuluse.

²⁰Bé do gétah, amun riféy salae séna begom, énda gétiga kom i fantage bé fiyowe brab métintuwe. ²¹Bé do no gai, énda gédoté kom i barase sabaf bé de tete rénigo gom. Kéléhu saén i gédoté kome de sabaf bé de ni sala. Atin béléewe ni mémala gom fantag bé de rénigo gom bé do gétah. ²²Endob béléewe ni méntangéy gomén dob salae brab ménwaléy gom do sugu-suguéy Tuluse. Atin i gédoté kome baras i fiyowe umul taman sa taman brab fiyowe adat funa kom gérigo bé kétayay Tuluse. ²³Non

i étewe mésala, gédote noy bayad i salae, sani kéléhue. Endob i étewe munur bé Kadna tome Jesu Kristo, iray i Tulusey umule magufusa dob beene.

Fantag bé kitabe

7 ¹Do dumo gu, gésobuto kom damén i ni non énggétiga kom i fantage bé kitabe. I kitabe wén i atura no bé étewe taman méuyag séna. ²Ufama, i libune wén i bawagén. Ménbéréh dob kitabe bé énda fakayén sétayan bé ségiyowe saliyu bé bawag ne taman méuyag ro séna. Endob amuk ménléhuén i bawag ne, fakayén mawag ségiyo. ³Mélaw amuk sétayan bé ségiyowe lagéy ké méuyag sénay bawag ne, énggélamfa brab énda nodoro noy kitabe. Endob amuk ménléhuén i bawag ne, fakayén mawag ségiyo brab énda ménslaén. ⁴Mélaw do dumo gu, ségiléw so bé betome, non amun ménléhuén i Kristowe génantino no betom, maak ménléhu tom so. Mélaw éndaén kailanga no odoro tom i kitabe niray Moisese. Atin béleewe méuyag tom man séréngan bé Jesuse sabaf bé kétébule ne. Non i betome maak lowoh Kristowe brab Been i uléw tome. Mélaw gérígono tom i atiy kétayay Tuluse. ⁵Bé do gétah, ménodor tom séna bé de tete kétaya tom. Atin non wén i de médoó do énda fakayén dob kitabe, toow fo ménuyot tom de rémigo. Atin non rénigo tom, ménkukum tom bé bayad i salae, sani kéléhue. ⁶Endob béleewe, munur tomén bé Jesuse, mélaw fénukasén betom dob kitabe. Atin mélaw éndaén kailanga tom i modore bé kitabe inok waléy tom métintu, non amun ménléhu i Jesuse, maak ménléhu tom so funa tom ménfukas. Atin béleewe ni, wén i mantuwe agéwon fatut odoro tom. Been i Rémogor i Tuluse, sani témabangane betom. Mélaw éndaén kailanga tom i modore bé tafaye agéwon inok waléy tom métintu, sani kitabe tidéw dob Moisese.

⁷Ati mélaw i gébérého tome fantag bé kitabe? Aw been i kitabey funa tome gésala? Békén! Yamula, i kitabe, fénggito no begén i de sala gu. Ufama, amuk énda énggétiga kuy kitabe mano, “Kago mingar,” énda gétiga kuy fantage bé kéingare. ⁸Mélaw amun énggétiga ku tete i mingare, ménumanan i kényot guwe mingar sabaf bé kitabe. Non amuk énda i kitab, énda i bagér i salae. ⁹Amun énda séna gétiga kuy fantage bé kitabe, énda méuyotu rémigo sala. Endob amun énggétiga kun i kitabe, toow fo ménuyotu rémigo sala, ¹⁰atin ménwaléyu médait méléhu. I funay Tuluse méniray bé kitabe, inok i de munur de méuyag ro taman sa taman. Endob ménisébélue non been uman i funa kuwe ménkukum méléhu non énda géodoro ku de. ¹¹Fénggakaray salae begén bé kitabe, atin kénukum i salae begén méléhu bé kitabe.

¹²Endob i kitabe, tidéw dob Tuluse, brab métintu brab fiyo brab méméchéfu. ¹³Wén keey i dufang gébéréh bé i fiyowe kitab i funa tome ménkukum méléhu. Endob békén toow i ni. Yamula, de sala tom i funa

tome mélukum méléhu non énda géodoro tom i fiyowe kitab émfégito bé de sala. Mélaw sabaf bé kitabe, giton toow fo tete i de sala tom.

¹⁴ Gétiga tom fiyoy kitabe non tidéw dob Rémogor i Tuluse. Endob riféy salae begén non kéilawanu saén. ¹⁵ Enda gésobuto kuy rigoné kuwe. Non i kétaya kuwe rigonén, énda gérigono ku de. Yamula gérigono ku uman i kéikaa kuwe rigoné ku. ¹⁶ Atin amuk rigoné kuy éndae fakay dob kitabe, fiyon fo ké mikau de rémigo, giton i kéfagayu kuwe bé métintuy kitabe. ¹⁷ Mélaw, békén begén i rémigowe bé de ni do sala. Yamula rigonéy teteetee dob lowoh guwe. ¹⁸ Gétiga ku énda i fiyo dob tafaye adat gu. Non fiyon fo ké méuyotu fo rémigo bé fiyowe, éndob énda gérigono ku de. ¹⁹ Non énda gérigono kuy fiyowe kétaya ku rigoné ku. Yamula gérigono kuy teteetee kéikaa ku. ²⁰ Atin amuk rigoné kuy békéne kétaya ku, békén begén i rémigowe de. Yamula rigonéy teteetee dob lowoh guwe.

²¹ Ay niy mérigowe dob begéne. Amuk méuyotu rémigo fiyo, élénéy teteetee dob lowoh guwe. ²² Endob i fiyowe dob fédéw guwe toow fo méuyot modor bé kétayay Tuluse. ²³ Endob i teteetee dob lowoh guwe sébanil bé fiyowe dob fédéw guwe. Atin fégésé no begén rémigo bé békéne kétayay Tuluse. Mélaw maak ménférisuwu dob salae. ²⁴ Toowu fo mékégédaw-gédaw. Ati gétabange begén inok énda rifénu dob kagéne ni lowoh toow fo tete funa ku mélukum méléhu? ²⁵ I Tuluse, Been saén i gétabange begén. Mélaw toow fo fésalamata kuy Tuluse! Non téngéyén begén sabaf bé rénigoy Kadna tome Jesu Kristo.

Mélaw i fédéw guwe modor bé kétayay Tuluse, fiyon fo ké i lowoh guwe géodor bé teteetee.

I mantuwe adat

8 ¹ I betome do ménwaléy dumo Jesu Kristowe, énda kukuméy Tuluse betom. ² Non sabaf bé kewaléy tome dumo Jesu Kristowe, i Rémogor i Tuluse fénukasén betom brab nirayén betom i umule magufusa. Atin mélaw éndaén i mémégés betom mésala funa tom méléhu. ³ I kitabe énda gétabanga no betom, non énda géodoro tom de. Endob i Tuluse, Been i témbangane betom. Sénuguén i Nga ne Jesus inok waléy kéilawan éndob énda i salaén. Tidéw bénou, ménléhu i Jesuse génantino no betom inok mékédan i de sala tom. Mélaw éndaén kailanga tom i modore bé de tete kétaya tom. ⁴ I funay Tuluse réménigo bé ni inok géodoro tom i fatute dob kitabe. Fakay i ni amuk fémanduoy Rémogor i Tuluse betom, brab éndaén fémanduoy teteetee kétayay de lowoh tom betom. ⁵ Non i de étew fémanduoy teteetee kétayay de lowoh ro, fégitungé ro saén i fantage bé teteetee kétayay de lowoh ro. Endob i de étew fémanduoy Rémogor i Tuluse, fégitungé roy fiyowe loo bé kétayay Rémogor i Tuluse. ⁶ I étewe fémanduoy teteetee kétayay lowoh ne, méléhu. Endob i étewe fémanduoy

Rémogor i Tuluse, méuyag taman sa taman, atin éndaén mékérit i Tuluse de. ⁷Non i de étew fémanduoy de tete kétayay de lowoh ro, sébanil bé Tuluse. Non énda modor ro bé kitab i Tuluse non énda gagané ro de. ⁸I de étew fémanduoy tetee kétayay de lowoh ro, énda géfésuwata roy Tuluse.

⁹Endob i begome, éndaén fémanduoy tetee kétayay de lowoh gom begom. Yamula fémanduoy Rémogor i Tuluse begom, amuk bati i Rémogor i Tuluse dob begome. Atin i éndae batioy Rémogor Kristowe, békén so kuyug Kristowe. ¹⁰Endob amuk bati i Kristowe dob de fédew gom, fiyon fo ké méléhu i de lowoh gom sabaf bé de sala gom, méuyag gom taman sa taman non métintu gom dob adafay Tuluse. ¹¹I Tuluse, Been i téménébulee bé Kristowe. Atin amuk bati i Rémogor i Tuluse dob de fédew gom, tébuleé no so begom bé Rémogor ne bati dob begome.

¹²Mélaw do dumo gu, kailanga tom i modore, éndob békén i tetee kétayay de lowoh tom i fatute odoro tom. ¹³Non amuk odoro kom i fémandu i tetee kétayay de lowoh gom, méléhu gom. Endob amuk odoro kom i fémandu i Rémogor i Tuluse, tagaké kom i tetee tafay adat brab méuyag gom taman sa taman. ¹⁴Non i de fémanduoy Rémogor i Tuluse, beroy de nga i Tuluse. ¹⁵Non i Rémogor i Tuluse nirayén dob betome, békén fénwaléyén betom do rifén mégilak bé Tuluse. Yamula fénwaléyén betom do nga i Tuluse. Atin sabaf bé Rémogor i Tuluse, gétawaga tom i Tuluse “Boh tom.” ¹⁶Atin i Rémogor i Tuluse, Been i émfégésobute betom bé do nga Tulus tom. ¹⁷Atin amun do ngaén betom, gédoté tom moso i de kéfiyonon fénasadén betom. Atin gédoté tom soy de étingayén gédoté Kristowe. Non amuk mérasay tom ségiléw bé kérasay Kristowe, gédoté tom i toowe fo fiyo séréngan bé Beene.

I gaiwe moso

¹⁸Atin dob karang guwe de, ulanden bé de kérasay tom dob duniiae ni béleewe. Non toow na fo dakél i bantugane gédoté tom moso. ¹⁹Non i kéluhanay de étingayén lénimbag i Tuluse, toow fo ongot-ongoté roy gaiwe fégitoj Tulusey de ngaén. ²⁰Non i de étingayén lénimbagén, éndaén ménfiyo ro, békén dob karowe kétayan éndob dob kétayay Tuluse non Been i kéménukume de. Endob wén soy inam de, ²¹non i kéluhanay lénimbag ne, fégaliné no so inok éndaén mérénah ro, brab éndaén riféy kéléhue bero, non félaléyéy Tuluse bero mantu loo bé kétéwaléy ne bé de ngaén mantu. ²²Non gétiga tom taman béleewe ni, i kéluhanay de lénimbagén démorong ro loo bé kédorong i kékumahane libun. Non ongot-ongoté roy kétuwaleye bero mantu. ²³Atin békén saén i berowe. Non i betome, énggédot tomén i Rémogor i Tuluse, sani tandaé bé wén nay iray i Tuluse betom. Mélaw démorong tom so dob de fédew tom bé kéongot-ongot tome bé kétuwaleye i Tuluse betom do ngaén brab kékégali nuwe bé de lowoh tom. ²⁴Ménfukas tom sabaf bé inam tome bé Tuluse émféantu betom inok méuyag tom taman sa taman. Endob

amuk gito tomén, békénén inam. Non wén i inam tom amuk énda séna gito tom i no ongot-ongoté tom. ²⁵Endob amuk wén i inam tom atin énda séna gito tom i no inam tom, témingkél tom ongot-ongot.

²⁶Loo so bé nan i kétabangay Rémogor i Tuluse betom amuk énda tintu méégét i kéunur tome. Non énda gétiga tom i atiy fatute dasala tom. Endob fédasaléy Rémogor i Tuluse betom dob de fédéw tom usaré noy de éntingayén énda gébérého tom de. ²⁷Atin i Tuluse, sani gétiga noy de fédéw tom, gésobuto noy kédasal i Rémogor ne non démasal mongot témabang betom do munur loo bé kétayaw Tuluse.

²⁸Atin gétiga tom i ni. I de betom fénimu i Tuluse, sani de étew fénémilién sabaf bé kétaya nuwe, fiyon atiy mérigowe dob betome, rigonéy Tulusey nan bé kéfiyono tome. ²⁹Non bé do gétah, énggétigay Tuluse nén atiy isuwe do waléy ngaén. Atin fénémilién bero inok rénigo no bero waléy loo bé Nga ne Jesus, inok i Beene waléy ofo tom. ³⁰Atin i de betom do fénémili, fénunurén betom, atin féntintu no betom, maak énda i sala tom. Atin féamungé no so betom bé kégérotor Kristowe.

I kégédaw i Tuluse

³¹Amuk fégitungé tom i fantage bé ni, gétiga tom i ni: I Tulusey dumo tome. Mélaw énda i gétaban betom. ³²I Tuluse énda ménikaén miray bé buntunge Ngaén Jesus. Yamula ténulakén féngéganti no betom kéluhanan. Amuk loo bé nan i kégédaw ne, irayén so betom i kéluhanay kailanga tome. ³³Enda i gétébo betom do fénémili i Tuluse. Non Tulusey ménféwaléye betom métintu dob adafa nuwe. ³⁴Enda i gékukum betom. Non i Jesu Kristowe, Been i ménléhu brab méntébule brab déméniat mangéy dob kuwonoy Tuluse inok ongoté no fésagadan tom. ³⁵Enda i gékédan bé kégédaw Kristowe betom. Fiyon fo ké kérégénan tom, taloo no wén i émférasay betom, taloo no mélayah tom, taloo no méskinan tom, taloo no kakaidan tom, taloo no méléhu tom, énda gékédana roy kégédaw Kristowe betom. ³⁶Non wén i Ménsulate Kébéréh i Tuluse mano, “Kakaidan tom féléhuén sénga tékélid sabaf betom i do kuyugén. Maak do bili-bili tom gédét do sumbalien.” ³⁷Mélaw fiyon fo ké kakaidan tom, témaban tom so sabaf bé Jesuse sani mégédawe betom. ³⁸Non gétiga ku énda i gékédan bé kégédaw i Tuluse betom, fiyon fo ké méléhu tom taloo no méuyag tom. Fiyon i de télaki taloo no do saitan, énda gékédana roy kégédaw Jesuse betom. Enda i éntingayén dob ni béleewe taloo no mangéy séna dini, gégaga de. I de barakat ro énda gégaga ro. ³⁹Enda i éntingayén dob rotoro, taloo no dob ménaléme, gégaga de. Enda i sébaan lénimbag gékédan bé kégédaw i Tuluse betom fénagéwén dob Kadna tome Jesu Kristo.

Fantag bé de Judio

9 ¹Wén i bérhé ku begom. Atin i ni bérhé ku, toow fo toow. Munuru bé Kristowe, mélaw énda témugiu. I Rémogor i Tuluse bati dob

fédew guwe brab mémanduon begén. Mélaw gétiga ku, toow i ni béréhé ku begom. ²Toow fo tete i fédew guwe béléewe ni brab démawéti fédew guwe non bé de étew gu, do dumo gu Judio, non énda munur ro bé Kristowe. ³Amuk gagané ku saén, méuyotu damén mékukum gémantinon bero, brab waléyu sésuway bé Kristowe, inok i de dumo gu do Judio waléy ro munur bé Kristowe. ⁴Beroy de tényakuf i Tuluse bé do gétah maak do ngaén. Fénggito no beroy barakat ne, brab fénasada no bero féfioné no bero. Brab nirayén beroy kitabe, brab fatute adat bé kénéngadafé, brab do fasad. ⁵Fénémili i Tulusey de katufua ro. Brab i Kristowe, ségétew bero amun ménwaléy kéilawan, non ménúmah ségétew Judio. Mélaw i Tuluse, sani méguléwe bé kéluhanane, médayew dam taman sa taman! Amen!

⁶Enda bénréh gu de ké énda tumanéy Tulusey fasad ne dob de Judio. Non békén kéluhanay de Judio do tintu méngrintulus loo bé fatute damén. ⁷Békén kéluhanay de Judio, sani de séfu Abraham, do tintu méngrintulus. Non bénréh i Tuluse dob Abrahame bé do gétah mano, “Do séfu i nga me Isak saén i de tintu séfuém.” ⁸Ay niy atag i ni, békén kéluhanay de séfu Abraham do nga i Tuluse. Non i Isake ménúmah sabaf bé kénur Abraham bé fasad i Tuluse. Atin ségiléw so béléewe ni. Non i de étew do séfu Isake tidéw dob fasad i Tuluse dob Abrahame, i ménwaléye do nga i Tuluse. ⁹Non fénasad i Tuluse bé Abrahame mano, “Bé fatute gai, séfuleu. Atin bé bénó, géfégénga i bawag me Sarah ségétew nga lagéy.”

¹⁰Atin békén saén i ni. Non i nga ruwe féndawéti Isak wén i ruwo gétew ngaén bé bawag ne Rebekah. Beroy de séfing féndawéti Jakob brab Esaw. ¹¹⁻¹²Atin amun obor sénay Rebekahe de, bénréh i Tuluse de mano, “I ofoe de waléy sugu-suguéy tuwaréye de.” Mélaw bénréh i Tulusey fantage bé ati mérigowe dob de ni do nga, fiyon fo ké énda séna ménúmah ro, brab fiyon fo ké énda séna réménigo ro fiyo taloo no tete. Rénigoy Tulusey ni inok gétiga tom i kénémi i Tuluse bé békén sabaf bé fiyowe rigonéy de étew taloo no bé tete, yamula sabaf bé kétayay Tuluse saén. ¹³Non wén i Ménsumate Kébéréh i Tuluse mano, “Toow na fo fénimu guy Jakobe bé Esawe.”

¹⁴Amuk loo bé ni, aw gébérého tom ba énda ménétang i rigonéy Tuluse? Békén! ¹⁵Non ménbéréh i Tuluse dob Moisese bé do gétah mano, “I étewe kétaya ku kéurayay na guwe, ménuray i na guwe de. Atin mégédawu bé étewe kétaya ku kégédawa ku.” ¹⁶Mélaw i funay Tuluse féfioné noy étewe békén sabaf bé rénigoy étewe loo ké kétayay étewe. Yamula i funa nuwe saén émféfiyo bé étewe non bé kégédaw ne de. ¹⁷Non wén i ni Ménsumat Kébéréh i Tuluse dob datue dob Egipto mano, “I funa kuwe beem ménféwaléy datu inok fégito guy barakat guwe sébanil beem, atin émbantugu mélaw dob kéluhanay sugud i duniyae ni.” ¹⁸Mélaw gétiga tom ménédaw i Tuluse bé de étew kétaya no kégédawa no. Brab fétégasé noy uléw i de étew kétaya no fétégasé no.

¹⁹ Atin amuk sumbulo kom begén bé bénréh guwe makom, “Sedek kukuméy Tulusey de étew ké énda munur ro sabaf bé kékétégas i Tuluse bé de uléw ro? Enda i géatuh bé Tuluse.” ²⁰ Endob énda i kuwagib gom sémumbul démowoy bé Tuluse loo bé nan. Ufama, i binanggae énda géríklamo no dob réménigowe de mano, “Sedek rénigo mo begén loo bé ni?” Ségiléw so bé étewe, énda fatut riklamo no dob Tuluse. ²¹ Non i rémigowe bé ruwowe timan binangga, fiyon fo ké sébaan saén i fégérigowe de, sani métégase fantad, wén i kuwagibén rémigo bé sébaane de toow na fo fiyo brab balilaga.

²² Ségiléw so bé rénigoy Tuluse. Méuyot i Tuluse émfégito bé kékérit ne brab émfégétigan bé barakat ne. Atin toow fo téningkélén i kékérit ne bé de étew fatut mékukum. ²³ Atin méuyot so émfégito bé toowe kéfiyo no, énggiton dob dakéle kégédawén betom do méntafayén féwaléyé no fiyo loo bé Beene. ²⁴ Non betom i de fénémili i Tuluse, békén saén tidéw dob de Judio, yamula fiyon foy tidéwe dob de békén Judio so. ²⁵ Non wén i Kébéréh i Tuluse fénsulatén bé Hoseawe mano, “I de étew békén kagén, féwaléyé ku bero do kagén étew. Atin i de étew énda séna mégédawu bero, mégédawunén bero. ²⁶ Atin dob ingéde bénrého ku bé békén ro do kagén étew, diyo fédawétén ro do nga i méuyage Tulus.” ²⁷ Atin ménbéréh soy Isaiase bé do gétah fantag bé de Judio mano, “Fiyon fo ké médooy de Judio loo bé kédooy de farék dob de dénsaan énda kéluhana ro méfukas dob de sala ro, éndob kloh saén. ²⁸ Non i Kadnane fagayasé no kukumén i kéluhanay kéilawane.” ²⁹ Atin ménbéréh soy Isaiase bé do gétah mano, “I barakatane Kadnan Tulus, amuk énda méuray i na nuwe betom do Judio, météy tom mékukum kéluhanan loo bé kékukum ne bé de étew dob Sodom brab dob Gomora.”

³⁰ Ay niy atag i ni bénréh gu. I de békén Judio, fiyon fo ké énda téménlama ro waléy métintu, wén i do ménwaléy métintu bero dob adafay Tuluse sabaf bé kéunur ruwe. ³¹ Endob i de Judio, énda waléy ro métintu fiyon fo ké télamané roy waléye métintu bé kéodoro ruwe bé kitabe. ³² Sede? Non énda séménarig ro bé Jesu Kristowe. Yamula séménarig ro bé de rigoné ro. Mélaw maak énggébangkud ro dob dakéle batéw. ³³ Non wén i Ménsulate Kébéréh i Tuluse mano, “Fédiyoé kuy batéwe dob Sion, sani ingéd i de Judio. Atin i de étew énda mésinugut ro de, maak gébangkud ro brab mélawu ro. Endob i de étew munur ro de, féfiyoné ku bero.”

10 ¹ Do dumo gu, ay niy kétaya kuwe brab kédasal guwe dob Tuluse: Méuyotu de fo ké méfukas i de dumo gu Judio dob de sala ro. ² Gétiga kuy témantu ro méngintulus, éndob békén katabawan i kékéngintulus ruwe non békén toow i kétoroe unuro ro. ³ Enda nodoro roy aguwone fantag bé kékétintuy Tuluse bé étewe. Yamula téménlama ro rémigo karo agéwon waléy métintu, sani kéodoro ruwe bé kitabe. Atin

mélaw énda ménodor ro bé agéwoy Tuluse. ⁴Wén i mantuwe agéwon mangéy dob Tuluse. Been i kéunure bé Jesu Kristowe. Mélaw i de munur bé Kristowe waléy ro métintu. Atin éndaén kailanga roy modore bé kitabe inok waléy ro métintu.

⁵Sénulat Moisesey fantage bé kéwaléye métintu sabaf bé kéodorone bé kitabe mano, “Amuk wén i étew tintu fo modor bé kitabe énda félisé no de, gédoté noy umule magufusa.” ⁶Endob ay niy Ménsulate Kébéréh i Tuluse fantag bé kéwaléye métintu sabaf bé kéunure mano, “Kagom fégitungén de ké kailanga kom sélédén i Kristowe dob lawayo inok féangéyé kom fantad mangéy dob betome. ⁷Atin kagom fégitungén de ké kailanga kom i mangéye dob gonoy de ménléhu inok angéyé kom tébuleén i Kristowe.” ⁸Non ay niy Ménsulate Kébéréh i Tuluse mano, “Toow fo gédét i kébéréh i Tuluse dob begome. Diyo dob de ba gom brab dob de fédew gom.” Atin been i niy Fiyowe Uret fantag bé kéunure bé Kristowe ureté key. ⁹Non amuk fayagé kom i Jesuse Kadnan bé de ba gom, brab amuk toow fo mérinugut gom dob de fédew gom bé ténébule i Tulusey Jesuse, méfukas gom dob de sala gom. ¹⁰Non i kéunure dob de fédew i funane waléy métintu dob adafay Tuluse. Brab bé kéfayage de bé baey funane méfukas dob de sala. ¹¹Non wén i Ménsulate Kébéréh i Tuluse mano, “I kéluhanay munure de gédoté ro saén i fiyowe.” ¹²Non dob adafay Tuluse énda i sébidanay de Judio brab de békén Judio. Enda i ramigoy Tuluse. Non i Kristowe, Been i Kadnay kéluhanay de munur dob Beene, brab tabangé noy kéluhanay de témawag mongot dob Beene. ¹³Non wén i Ménsulate Kébéréh i Tuluse mano, “I kéluhanay de témawag bé Kadnane mongot tabang, méfukas ro.”

¹⁴Endob énda gétawagay de étew de amuk énda séna munur ro de. Atin énda géunur ro amuk énda séna énggelingoo roy fantage bé Jesuse. Atin énda gélingoo ro de amuk énda i muret fantag bé Jesuse dob berowe. ¹⁵Atin énda i géuret de amuk énda i séménugu bé murete. Wén i Ménsulate Kébéréh i Tuluse fantag bé ni mano, “Toow fo fiyoy kégumah i de étew magéw mangéy muret bé Fiyowe Uret.” ¹⁶Endob békén kéluhanay de mégélingo munur bé Fiyowe Uret. Non wén i sénulat Isaiase dob Ménsulate Kébéréh i Tuluse mano, “Kadnan, kloh i de munur bé uret geye.” ¹⁷Mélaw géunur i étewe amuk gélingoo noy toowe uret fantag bé Kristowe.

¹⁸Wén keey i émbéréh mano, “I funay de étew énda munur non énda séna énggelingoo ro de.” Endob békén toow i nan non i kéluhana ruwe énggégélingo ron. Non wén i Ménsulate Kébéréh i Tuluse mano, “I urete énggelingoon dob kéluhanay sugud i duniyae, atin i kébéréhe ménlégéb dob kéluhanane.” ¹⁹Atin amuk wén i émbéréh mano, “Endob i de Judio énda énggésobuto ro de keey,” énda toow i nan. Non sénulat Moisese dob Ménsulate Kébéréh i Tuluse mano, “Fédaléwé ku begom do Judio

non fukasé kuy de békén Judio. Atin fékérité ku begom non mégédawu bé de étew énda énggétiga ro Begén bé do gétah.”²⁰ Atin ménkéntay i késulat Isaiase de so mano, “I de étew énda sénléd ro Begén, énggétiga roy fantage bé Begéne non fénfégétiga ku bero.”²¹ Endob bénréhén i fantage bé de Judio mano, “Toow fo métégas i de uléw ro brab énda modor ro bé kétaya kuwe. Non fiyon fo ké démoyun tawagé ku bero, éndob mikra ro mégélingo.”

Fantag bé de Judio moso

11 ¹Gido loo, kagom fégitungén de ké ténagak i Tuluse nén i de Judio. Fiyon i begéne, ségétewu so Judio tidew dob katufua keye Abraham brab ségétewu so séfu Benjamen, ségétew so Judio. ²I Tuluse énda ténagakén i de kaan do étew fénémilién bé do getah. Gétiga kom damén i sénulat Eliase fantag bé sala i de Judio. Déménasal i Eliase dob Tuluse mano, ³“Kadnan, fénléhu i de Judioy de sénarigo mo muret bé kébérén me. Atin généba roy de ahyan do tulakan gonoy de étew méngadaf Beem. Atin begén séden i ménさまe méngadaf Beem, brab méuyot ro so méméléhu begén.” ⁴Endob i Tuluse séménumbul mano, “Wén i fitew ngibu do dumo mo do Judio fénliyu gu inok énda mamung ro méngadaf bé kéninontowe Baal.” ⁵Ségiléw so bé béléewe ni, non wén soy kloh fénémili i Tuluse bé de Judio sabaf bé kégédaw ne bero. ⁶Fémilié noy de étewén békén sabaf bé de rénigo ro, yamula sabaf saén bé kégédaw ne bero. Non amuk fémilié noy de étew sabaf bé galbék ruwe, békén sabaf saén bé kégédaw ne bero.

⁷Amuk loo bé nan, i de Judio énda gito roy sélédé ruwe, sani kétintuwe. Non kloh saén bé de Judioy ménwaléye de métintu, sani de fénémili i Tuluse. Atin i de dumo de ménwaléy métégas i de uléw ro.

⁸Non wén i Mén sulfate Kébérén i Tuluse mano, “I Tuluse fénwaléyén bero énda géfégitung brab énda gérito brab énda gégléingo inok énda gésobut ro taman béléewe ni.” ⁹Atin bénréh Dabide so dob Mén sulfate Kébérén i Tuluse mano, “Géfégitung ro damén bé énda i sala ro non bé de médo ro kéfiyonon niray i Tuluse bero. Mélaw méukum ro damén. ¹⁰Waléy ro damén do langafén, inok énda gérito ro. Brab waléy ro damén do sungkungan taman sa taman sabaf bé de émbégat kérégénon oboé ro.”

¹¹Mélaw i de dumo gu do Judio maak énggébangkud ro sabaf énda ménunur ro bé Kristowe. Endob kagom fégitungén de ké ménlawu ro brab énda géfétindégo Tuluse bero. Non i kéika ruwe bé Kristowe, ménwaléy kéfiyonoy de békén Judio. Non i urete fantag bé Kristowe ménlégb dob de békén Judio funa ro ménfukas dob de sala ro. Ménrigoy ni inok i de Judio waléy ro médaléw. ¹²I kégésala i de Judioy funay kéluhanay étewe fénfiyoy Tuluse. Non sabaf bé kéika i de Judio de, ménwaléy do munur i de békén Judio. Mélaw méumanan i kéfiyonone iray i Tuluse bé gaiwe gésénule i de Judio brab munur ro bé Kristowe.

Ufama bé Kayéwe

¹³ Atin fantag man bé begome do békén Judio, wén i béréhé ku begom. I begéne ségétewu apostol sénugu mangéy dob begome do békén Judio. Atin i funa kuwe magayas gémalbék, ¹⁴ inok i de dumo gu do Judio waléy ro damén médaléw bé kéfukase begom funay de dumo bero waléy so moso munur bé Kristowe inok mífukas ro so. ¹⁵ Non amun ménika i Tuluse bé de Judio, énggésénule i de békén Judio atin ménwaléy ro do dumoy Tuluse. Atin mélaw méumanan i kéfiyonone iray i Tuluse amuk séfule i de Judio waléy dumoy Tuluse, non maak do ménléhu do méntébule.

¹⁶ Atin non i Abrahame munur bé Tuluse, wén so mosoy do séfuén waléy munur bé Tuluse. Non amuk fiyoy darir i kayéwe, fiyo soy de fongo no. ¹⁷ I de Judio ségiléw ro bé kayéwe mégonok. Atin Tulusey gefee de. Atin kénléngén i dumoy de fongo. Atin i begome, sénumpat i Tuluse begom diyo atin fénwaléyén begom do mantu fongoy kayéw i Tuluse. Mélaw gégedot gom so do kéfiyonon tidéw dob Tuluse ségiléw bé de Judio. ¹⁸ Endob kagom fégitungén de ké toow gom fo gérator na bé de Judio. Non ségiléw gom so do falan fongo. Atin fatut gétiga kom i ni, i darire uyagé noy fongowe, békén i fongowey tuyage bé darire.

¹⁹ Atin amuk émbéréh gom makom, “I Tuluse kénda noy de dumoy de Judio inok tanggafé no betom do békén Judio.” ²⁰ Toow i nan. Endob i funa ruwe ménkédan non énda munur ro. Atin i funa kome ménsumfat non munur gom. Mélaw ingat gom, brab kagom félangka-langka. ²¹ Non amuk kénléng i Tulusey de sungu do fongo sani de Judio, kélengé no so begom do mantu fongo amuk témérén gom so munur. ²² Mélaw énggiton i kégédaw i Tuluse brab kékukum ne. Kukumé noy de étew énda munur ro. Endob toow fo mégédaw begom amuk fédayday gom témayakuf bé kégédaw ne. Endob amuk énda fédayday gom, kédané no begom loo bé de sungu do fongo. ²³ Atin i de Judio, amuk éndaén fédayday ro mika bé Tuluse brab amuk munur ro bé Jesuse, tayakuféy Tuluse man bero brab sumfaté no bero dob sunguwe gonon dob kayéw ne non fakay rigonéy Tulusey ni. ²⁴ Non amuk i de fongo tidéw dob ségiyowe kayéw, sani begome do békén Judio, fakay sumfaté no dob kayéw ne, toow na fo magad i késumfat ne ségule bé de fongo tidéw dob nan kayéw, sani de Judio.

I kégédaw i Tuluse

²⁵ Do dumo gu, méuyotu de fo ké gétiga kom i toowe tidéw dob Tuluse fiyon fo ké énda gésobutoy de étew de bé gétahe. I funa kuwe de émfégétigan begom inok énda fédayéw-dayéw gom non makom ké toow gom na fo gérator bé de Judio. I kétégas i uléw i de Judio, énda

démaydayén. Non wén so moso i gai gésénule ro. Been i gaiwe moso ké munur i kéluhanay de békén Judio fénemili i Tuluse. ²⁶Tidéw béno, i kéluhanay de Judio méfukas ro so. Non wén i Ménsumlate Kébéréh i Tuluse mano, “Wén i mémukase gégumah tidéw dob de Judio inok féwaléyé no métintuy de Judio. ²⁷Atin kédané kuy de sala ro loo bé fénasad guwe bero.” ²⁸I de dumo bé de Judio ménwaléy ro sébanil bé Tuluse non énda munur ro bé Fiyowe Uret. Ménrigoy ni inok méfukas gom do békén Judio. Gido loo, mégédaw i Tuluse bé de Judio non beroy de fénemilién, atin non bé fasad i Tuluse dob katufuay de Judio. ²⁹Non i Tuluse énda méfegalín i kéfégitung ne bé atiy fémilié nuwe brab iraya nuwe kéfiyonon. ³⁰Atin fantag man bé begome do békén Judio, bé do géyah énda modor gom bé de sugu i Tuluse. Endob béleewe énggédot gom i kégedaw i Tuluse non fénlis i de Judio. ³¹Atin loo soy berowe, non fiyon fo ké énda modor ro bé de sugu i Tuluse béleewe ni, fakay i Tuluse méuray i na nuwe bero brab fésagadé no bero moso loo bé rénigo nuwe dob begome sabaf bé kégedaw ne. ³²Non i Tuluse, maak fénférisu noy kéluhanay de étew sabaf bé de sala ro brab fénggito no médait ro mémukum. I funa nuwe réménigo bé ni inok mégédaw bé kéluhanane bé kéfésagad ne.

³³Toow fo mégédaw i Tuluse! Toow fo gétigan i Tuluse brab métiledtéd! Enda i gésobut bé kégtiga nuwe taloo no rigoné nuwe. ³⁴Non wén i Ménsumlate Kébéréh i Tuluse mano, “Enda i étew gésobut bé kégtigay Tuluse taloo no kéfégitung ne. Atin énda i géféginau bé Tuluse.” ³⁵Atin wén soy Ménsumlate Kébéréh i Tuluse mano, “Enda i géfélét dob Tuluse inok wén i utongén.” ³⁶Non i Tulusey léménimbage bé kéluhanay de éntingayén, brab Beeney muyage brab méguléwe bé kéluhanane. Atin i kéluhanay de éntingayén kaan inok médayéw. Médayéw damén i Tuluse taman sa taman. Amen.

I galbéke kay Tuluse

12 ¹Mélaw do dumo gu, sabaf bé dakéle gédaw i Tuluse betom, ongoté ku dob begome ké fidaya gom i Tuluse méguléwon begom. Been i maake tulak gom énda méléhuén. Fatut tintu fo fiyoy rigoné kome inok mésuwat i Tuluse de. Been i fatute kéfengintulus gom. ²Atin kagom miring bé adat i de tete dob duniyae ni. Yamula fidaya gom i Tuluse fégaliné no begom bé kéfewaléy ne mantu bé de kéfégitung gom. Tidéw béno, gétiga kom i kétayay Tuluse sani fiyowe brab métintuwe brab mémésuwate.

³Atin non niray i Tuluse begén i aturane, bérhéku begom i ni: Kagom fégitungén de ké toow gom na fo gérotor bé de dumo gom. Yamula téritantad gom brab i séngae ségétew begom fatut kémarrang bé lowoh ne

loo bé kéunure niray i Tuluse dob beene.⁴ Ufama, fégitung gom i lowoh i étewe. Wén i médo do réfaén. Atin i de réfa lowoh békén ségiléw i de rigoné ro.⁵ Atin ségiléw so bé niy betome do munur bé Kristowe. Non fiyon fo ké médo tom, ménwaléy tom maak do réfa i lowoh Kristowe. Atin maak sésumfat tom kéluhanan.⁶ Toow fo mégédaw i Tuluse. Non tidéw dob Beene wén i do séségiyo-giyo kéfurungo tom. Mélaw fatut rigonéy séngae ségétew i kéfurungone niray i Tuluse de. Amuk i ségétewé betom furung muret bé kébérén i Tuluse, fatut muret loo bé kéunure niray i Tuluse de.⁷ Amuk furung go tétabang, tabang go. Amuk furung go témoro, toro go.⁸ Amuk furung go émféfiyo fédew, rigo mo. Amuk furung go miray, iray go témantu. Amuk furung go méguléw, fégéror go féguléw. Amuk furung go mégédaw, férorém i na muwe mégédaw.

⁹ Atin békén ubo-ubo saén i kégédaw gome bé de dumo gom. Atin fatut ikaa kom i tete. Atin lékafit gom dob fiyowe.¹⁰ I betome, do sédumon tom sabaf bé Kristowe, mélaw fatut tom ségédaw. Atin fatut méraan i na tome séfégadat.¹¹ Kagom faukén, yamula fatut fégéror gom rémigo bé kétayay Kadnane sabaf bé fiyowe fédew gom.¹² Fatut moror tom non wén i inam tom dob Tuluse. Atin fatut témingkél tom bé de mérégén. Atin fatut démoyun tom démasal.¹³ Atin fatut sétukidé tom i étingayéné katom dob de dumo tom munur bé Kristowe amuk méskinan ro. Brab fatut tayakufé tom i de étew dob de lawi tom fiyon fo ké énda gélolo tom de séna.

¹⁴ Kagom ongotén i kékukum i Tuluse bé de étew émférasay begom. Yamula fatut dasal gom dob Tuluse inok féfiyoné no bero.¹⁵ Fatut mamung tom moror brab mamung tom kémérew dob de étew kémérew.¹⁶ Fatut waléy sébaan i fédew tome do munur bé Jesuse. Atin kagom félangka-langka, yamula fatut tom séloyuk bé de étew térifantad. Atin kagom fégitungén de ké do toow gom fo métiledtéd.

¹⁷ Amuk wén i réménigo tete dob begome, kagom sémulti. Yamula fatut rigo gom saén i fiyowe inok énda i géadowy begom.¹⁸ Rigo gom i fiyowe taman gagáné kom inok énda i ségiyo étew mékerit begom.¹⁹ Atin do dumo gu, fégétédém gom i ni, kagom sémulti bé tete. Yamula fédaya gom i Tuluse sémulti bé kérít ne. Non wén i Ménsulate Kébérén i Tuluse mano, “Bégén i sémulti. Bégén i kémukum, bang i Kadnane.”²⁰ Atin fatut odoro tom i ni Ménsulat Kébérén i Tuluse mano, “Amuk mélayah i sébanile beem, féamaém. Atin amuk térumén, féinémém. Non amuk rigoné moy ni, waléy de mémala.”²¹ Kagom fédayaén i tete sému gom rémigo tete. Yamula rigo gom fiyo inok tabanan i tete.

Fantag bé de gémamak kukuman

13 ¹Fatut i kéluhanay étewe modor bé sugu i de gémamak kukuman. Non i kéluhanay méguléwe, nirayay Tuluse bero aturan. Atin i

ménfétindége bé gobernowe, Tulus. ²Mélaw i sébanile bé gobernowe, sébanil bé féntindég i Tuluse, atin mélaw mékukum i no étew. ³Non i de rémigo fiyo énda kailanga ro mégilak bé de gémamak kukuman. Yamula i de rémigo tete kailanga ro mégilak ro bero. Amuk méuyot gom ké énda i funa kom mégilak bé de méguléw, rigo gom saén i fiyowe. Atin dayéwé ro so begom. ⁴Non i de méguléw, berowey sugu-suguéy Tuluse inok fiyoy goho kome. Endob amuk rémigo gom tete, fatut mégilak gom bero non wén i kuwagib ro kémukum. Berowey suguéy Tuluse kémukum bé de rémigo tete. ⁵Mélaw fatut tom modor bé sugu i de gémamak kukuman. Békén saén sabaf bé kékukum ruwe éndob sabaf so bé gétiga tom i fatute.

⁶ Been i ni soy funa tome mayad buwis. Non i de méguléw, berowey de sugu suguéy Tuluse amuk rigoné roy fatute rigoné ro. ⁷Mélaw fatut bayada tom bé katabuwaney kéluhanay buwis tome. Atin fatut fégadata tom i de gémamak kukuman.

⁸Kagom mutong. I maake utong gom saén i kégédaw i dumo gome, atin bayada kom bé gédawe sénga tékélid. Non i tintuwe mégédaw bé dumo nuwe tumané noy kitabe. ⁹Non wén i ménsulate dob kitabe mano, “Kagom lémamfa. Kagom méméléhu. Kagom ménakaw. Kagom mingar.” Atin i de ni sugu brab de dumo de, fakay odoro tom amuk modor tom bé ni sugu mano, “Fégédaw go bé dumo muwe, ségiléw bé kégédaw me bé kaame lowoh.” ¹⁰I étewe mégédaw bé dumo nuwe, énda rigoné noy tetee dob beene. Mélaw i kégédawe, been i niy kétumane bé kéluhanay de kitab.

¹¹Atin fatut ségédaw tom non gétiga tom i ni gai. Endaén mérugayén tidéw béeleewe, séfule i Kristowe. Béeleewe toow na fo gédét i nan gai bé amun méngganay gomén munur bé Kristowe. Mélaw fatut mingat tom de brab kagom iringén i ségétéwe fidong. ¹²Non béeleewe ni maak kélungonon éndob gédétén fuweh, sani késéfule Kristowe. Mélaw fatut kédané tom i de tete adat tom tidéw dob délémone. Atin fatut tom rémigo fiyo non been i niy maake kulangé tom niray Kristowe betom do étew bati dob géfékaya. ¹³Fatut rigoné tom i fiyowe loo bé fatute rigonén dob géfékaya. Mélaw kagom téolo-olon, taloo no mamung bé de tete karagiya, kagom sétayan bé ségiyowe saliyu bé bawag gome, kagom sékérít, brab kagom médaléw. ¹⁴Yamula ongot gom dob Kadname Jesu Kristo tabanga no begom rémigo bé fatute. Atin kagom odoron i de tete kétayay de lowoh gom loo bé tafaye adat gom.

Fantag bé amaéne

14 ¹Amuk wén i dumo gom munur bé Kristowe, éndob énda séna méégét i kéunur ne, tayakuf gom. Atin kagom séédél de ké ati kaane karang. ²I étewe méégét i kéunur ne, gékaranga noy fakay amaé

noy kéluhanay de amaén. Endob i étewe énda séna méégét i kéunur ne, karangé noy fénéngalaf saén i fakaye amaé no. ³I étewe mama bé kéluhanay amaéne, békén fatut siyawé noy dumo nuwe ké mama saén fénéngalaf. Atin i étewe mama saén fénéngalaf, békén fatut dowoyé noy dumo nuwe ké mama bé kéluhanane. Non ségiléw ro ténayakuf i Tuluse bero. ⁴Enda fatutén ké kukumé tom i dumo tome. Non ségiléw tom do sugu-suguéy Tuluse. Mélaw Tulus saén i fatute kémukum betom bé ati fiyowe brab tetee. Atin i dumo gome munur bé Jesuse rigoné noy fiyowe non i Kadnaney témabanga ne de.

⁵Loo so bé de gai. Wén i do étew kémarang bé wén kun i toow na fo mékétéfu gai. Endob wén soy do ségiyo étew kémarang bé i kéluhanay de gai fantay-fantay ro dob adafay Tuluse. Fatut fégitungéy séngae ségétew i kétayay Tuluse. Tidéw béno fatut rigoné noy ati karangé nuwe kétayay Tuluse. ⁶Amuk wén i étew karangé no wén i gai toow na fo mékétéfu, rigoné no inok basana noy Kadnane. Amuk wén i étew mama bé kéluhanay amaéne, rigoné no inok basana noy Kadnane. Gétiga tom i ni non fésalamata no dob Tuluse sabaf bé amaé no. Atin amuk wén i étew énda mamaén bé kéluhanay de amaén, rigoné no inok basana noy Kadnane brab fésalamata no so dob Tuluse. ⁷Non i betome do munur bé Jesuse, i funa tome méuyag brab méléhu békén inok rigoné tom saén i kétaya tome. ⁸Yamula amuk méuyag tom séna, rigoné tom i funay Kadnane médayéw. Brab amuk méléhu tom, méléhu tom inok médayéw i Kadnane de. Mélaw amuk méuyag tom taloo no méléhu tom, kay Kadnane betom. ⁹I funa Kristowe féndayaén i kéféléhue de atin méntébule, inok Been i Kadnane féguléwo noy de méuyag brab de ménléhu. ¹⁰Mélaw kagomén dowoyén i de dumo gom munur bé Jesuse. Brab kagomén siyawén i de dumo gom munur. Non kéluhana tom so moso témindég dob adafay Tuluse bé gaiy kékukum ne. Mélaw Tulus saén i kémukume. ¹¹Non wén i Ménsulate Kébéréh i Tuluse mano, “Loo bé kétoow i kéuyag guwe, i kétoow i kéluhanay étewe lémingkuwéd dob adafa kuwe. Atin i kéluhanay étewe fayagé ro Begén i Tuluse.” Been i bénréh i Kadnane. ¹²Mélaw fétindégéy Tulusey séngae étew dob adafa nuwe inok béréhé roy kéluhanay de rénigo ro.

¹³Mélaw kagomén kukumén i de dumo gom. Yamula fatut mingat tom inok i de dumo tom énda gésala ro sabaf bé de rénigo tom. ¹⁴Sabaf sétiman i fédew guwe bé Kadnane Jesus, toow fo gétiga ku ténungkas i Tuluse betom mama bé kéluhanay amaéne. Endob amuk wén i étew karangé no liyén dob adafay Tulusey sébaane amaén, békén de fatut mama. ¹⁵Endob amuk gito no begom mama, atin waléy tete i fédew ne de, énda mégédaw gom de. Mélaw kagom amaén i amaéne funay dumo gome gésala. Non i Jesuse ménléhu inok mékédan i de salaén. ¹⁶Atin amuk wén i fiyo rénigo gom éndob kénarang i de étew sala, kagom

rigonén de mon, inok énda gébéréh ro tete fantag bé begome. ¹⁷Non dob kéféguléw i Tuluse bé de étewén, énda mélaga i de amaén taloo no do inémén. Endob i toowe fo mélaga i kétintuwe brab kéfiyoy fédéwe, brab kérorore sabaf bé kérémandu i Rémogor i Tuluse. ¹⁸Amuk modor tom bé Kristowe loo bé ni, mésuwat i Tuluse betom. Atin mésuwat soy de ségiyo étew betom.

¹⁹Mélaw fatut démoyun télamané tom rigonén i funa tome fiyoy de fédéw tom brab funa tome waléy méégét i kéunur tome. ²⁰Kagom binasanén i rigonéy Tuluse sabaf bé amaéne saén. Ténungkas i Tuluse betom mama bé kéluhanay amaéne. Endob kagom mama bé éntingayéne funay dumo gome gésala. ²¹Ay niy fatute. Kagom mama karne, taloo no miném arak taloo no rémigo éntingayén funay dumo gome gésala. ²²Odoro kom i de kékaran gom fantag bé de amaén. Endob kagom séédél bé de dumo gom fantag bé de ni non Tulus i méguléwe begom. Méoror i étewe fiyoy fédéw ne non rigoné noy gékaranga nuwe fiyo. ²³Endob i étewe amaé noy gékaranga nuwe tete, kukuméy Tuluse non gétiga no gésala ké rigoné no. Non amuk rigoné tom i gékaranga tome tete, gésala tom de.

15 ¹Atin i betome méégétén i kéunur tome, fatut tingkélo tom i de énda séna méégét munur, brab fatut tabanga tom bero. Enda fatut rigoné tom i de katom kétayan saén. ²Yamula fatut rigoné tom soy mékésuwate dob de dumo tom inok waléy méégét i kéunur ruwe. ³Non fiyon i Jesu Kristowe énda rénigo noy kaane kétayan. Non wén i Mén sulfate Kébéréh i Tuluse mano, “I de tete bénréh ro dob Tuluse, bénréh ro so dob Begéne.” Sénulatén i ni inok giton rénigo Jesusey kétayay Tuluse fiyon fo ké fénrasay ro. ⁴Non i kéluhanay Mén sulfate Kébéréh i Tuluse, mén sulfate inok métoro tom, brab inok wén i inam tom sabaf bé kewaléy tome témingkél brab sabaf bé kéfiyoy de fédéw tom ké masa tom bé Mén sulfate ni Kébéréh i Tuluse. ⁵I Tuluse fetingkél no betom brab féfiyoné noy de fédéw tom. Mélaw fésétimané no damén i de fédéw tom miring bé Jesu Kristowe, ⁶inok séréngan tom démayéw bé Tuluse Abay Kadna tom Jesu Kristo.

⁷Mélaw sétayakuf gom maak do sétuwaréy ségiléw bé kétayakuf Kristowe betom, inok médayéw i Tuluse de. ⁸Bérhé ku begom, i Kristowe ménwaléy maak sugu-suguéy de Judío inok fégito no tintu fo tumanéy Tulusey fasad ne fénasadén dob katufuay de Judío bé do gétah. ⁹Atin rénigo noy ni inok i de békén Judío dayéwé ro soy Tuluse sabaf bé kégédaw ne. Non wén i Mén sulfate Kébéréh i Tuluse mano, “Toow fo dayéwé ku Beem Tulus, brab dayéwéy de békén Judío so Beem. Dayéwé key Beem bé de kanta gey.” ¹⁰Atin wén soy ni Mén sulfate Kébéréh i Tuluse mano, “I de begom do békén Judío, oror gom séréngan bé de Judío do fénemili étew.” ¹¹Atin wén soy ni Mén sulfate Kébéréh i Tuluse mano, “I de

begom do békén Judio, dayéw gom i Kadnane. Atin i kéluhanay étewe fatut dayéwé roy Tuluse.” ¹² Atin sénulat Isaiase soy ni mano, “Gégumah i ségétewé étew séfu Jessehe. Atin Beeney waléye méguléw bé de békén Judio. Atin sémarig ro dob Beene.”

¹³ Atin i Tuluse, sani miraye kéfiyonon ongot-ongoté tom, féororé no damén begom, brab féfiyoné no damén i de fédew gom sabaf bé kéunur gome de, inok minut méégét i inam gome dob Tuluse sabaf bé barakat i Rémogor ne.

¹⁴ Atin fantag bé begome do dumo gu, gétiga ku fiyoy de adat gom brab médooy de gétiga kom brab gétigan gom sétoro. ¹⁵ Gido loo, ménbarawu témořo begom dob ni sulat inok énda gélifoto kom de. Ménbarawu non niray i Tuluse begén i aturane, ¹⁶ inok muretu dob begome do békén Judio. Non sénugu Jesu Kristowe begén rémigo bé ni. Gémalbéku maak fadi non ureté kuy Fiyowe Uret i Tuluse inok i begome do békén Judio waléy gom maak ténulak dob Tuluse. Atin tayakuféy Tuluse begom non fentintuy Rémogor i Tuluse begom. ¹⁷ Atin non bé kétabang Jesu Kristowe begén, énda mémalawu émbéréh fantag bé kéluhanay rigoné kuwe bé galbék i Tuluse. ¹⁸ Endob i gébérého kuwe saén i fantage bé fénrigo Kristowe begén bé kéusar ne begén. Non wén i de begom do békén Judio ménodor bé sugu i Tuluse sabaf bé kétoro guwe brab rénigo guwe. ¹⁹ Non i barakat i Rémogor i Tuluse fénrigo no begén i médoowe do mékégaif. Mélaw amun ménagéwu tidéw dob ingéde Jerusalem taman dob ingéde Iliriko, tintu fo nuret guy Fiyowe Uret fantag bé Jesu Kristowe. ²⁰ Toow fo méuyotu muret bé Fiyowe Uret dob de ingéd énda séna énggégélingo i de étew fantag bé Kristowe. Non mikau muret saén dob de étew énggégélingo ron fantag bé Jesuse tidéw dob de ségiyo étew. ²¹ Non wén i Mén sulfate Kébéréh i Tuluse mano, “I de étew énda séna énggégélingoo roy fantage bé Beene, gétiga ro moso. Atin i de étew énda séna ménureton ro, gésobuto ro moso.”

²² Been i niy funa kuwe médoonén gule ménangga mangéy dob begome. Non ménggeroru magéw mangéy dob de séségiyo-giyo ingéd. ²³ Endob béléewe ni, énggilidén i rigoné kuwe dob de ni gonon. Atin ménrugayén i kényot guwe mangéy dob begome. ²⁴ Mélaw méuyotu mangéy dob begome. Non magéwu mangéy Espaniya, atin fiyo ké mawétu dob begome singkow bé kéagéw guwe mangéy diyo. Atin amuk gilidén i fiyowe kétukaw gu begom, fiyo ké tabanga kom damén begén bé kéagéw guwe mangéy Espaniya. ²⁵ Endob béléewe ni mangéyu Jerusalem inok uwité kuy tabange kay de munur bé Jesuse bati diyo. ²⁶ Non wén i niray i de munur bé Kristowe dob Masedonia brab Akaya kay de méskinan do munur bé Kristowe diyo dob Jerusalem. Niray ro non been i kétaya ruwe. ²⁷ Toow ro fo moror témabang non maak wén i utong ro bé de munur dob Jerusalem. Non i de Judio ténukido ro bero bé kéunur

ruwe bé kéangéy guwe dob de békén Judio. Mélaw i de békén Judio, fatut témabang ro miray kurta dob de méskinan do Judio dob Jerusalem. ²⁸ Atin amuk fégilidé kuy ni galbék atin géiraya kun beroy kéluhanay ni kurta, tausu nén mangéy Espaniya brab mawétu dob begome. ²⁹ Atin gétiga ku amuk mangéyu dob begome, féfiyoné Kristowe betom sabaf bé kéagéw guwe.

³⁰ Atin do dumo gu, non bé kéunur tome bé Kadna tome Jesu Kristo brab non bé késégédaw tome tidéw dob Rémogor i Tuluse, ongoté ku begom dasal gom témantu inok tabangay Tuluse begén. Amuk rigoné kom i ni, géamung gom bé galbék guwe. ³¹ Dasala kom begén inok i de énda munur dob Judea énda fésug-sugé ro begén. Brab dasal gom inok moror i de munur dob ingéde Jerusalem sabaf bé uwité kuwe bero. ³² Amuk mérigoy ni brab amuk kétayay Tuluse, gétausu mangéy dob begome, brab toowu fo moror. Mélaw géséféfiyo tom do fédew bé kétukaw guwe begom. ³³ I Tuluse, sani funa tome fiyoy fédew tome, fémanduo no damén begom kéluhanan. Amen.

I késégifa Pablowe

16

¹ Wén i ségétéwe libun féndawét Febe mangéy dob begome. Beeney dumo tome so munur bé Jesuse brab fiyoy adat ne. Atin béeewe témabang gémalbek dob de munur dob ingéde Senkrea. ² Tayakuf gom damén sabaf bé Kadnane loo bé fatute rigoné tom do munur bé Jesuse. Atin tabang gom bé atiy kailanga nuwe, non médooy tétabang ne, atin tétabangén so begén.

³ Atin fégérarém gom begén i Prisilahe brab Akilahe. Non beroy de dumo gu gémenalbék bé galbék Jesu Kristowe. ⁴ Niray roy férénawa ruwe bé kétabanga ruwe begén, gédét ro féléhuén. Mélaw fésalamata ku bero loo soy de étew békén Judio do munur bé Kristowe. ⁵ Atin fégérarém gom so begén i de munur sélimud dob lawi ro Prisilahe brab Akilahe. Brab fégérarém gom so begén i Epenetowe, sani kégédawa kuwe dumo gu. Beeney sunguwe étew ménunur bé Kristowe dob Asia. ⁶ Atin fégérarém gom so begén i Mariahe, sani mégérore gémalbék begom. ⁷ Atin fégérarém gom so begén i Andronikowe brab Juniase, sani de dumo gu Judio. Bé gétahe, beroy de dumo gu do férius. I de apostol toow fo basana ro bero, brab ménunur ro bé Jesuse bé énda séna munuru de.

⁸ Atin fégérarém gom so begén i Ampliatowe, sani kégédawa kuwe dumo tom munur bé Kadnane. ⁹ Atin fégérarém gom so begén i Urbanowe, sani dumo tome gémalbék bé galbék Jesu Kristowe. Brab fégérarém gom so begén i Estakiwe, sani kégédawa kuwe dumo gu. ¹⁰ Atin fégérarém gom so begén i Apolose, sani ménfégítowe bé kéimu ne bé Kristowe. Atin fégérarém gom so begén i de étew dob kuréngo Aristobuluse. ¹¹ Atin fégérarém gom so begén i Herodione, sani dumo

guwe Judio. Atin fefégerarém gom so begén i de étew dob kuréngo Narsisuse munur bé Kadnane.

¹² Atin fefégerarém gom so begén i Trifaenawe brab Trifosowe, sani de gémalbék bé galbék i Kadnane. Atin fefégerarém gom so begén i Peruse, sani kégédawa kuwe dumo gu, sani mégérore gémalbék bé galbék i Kadnane. ¹³ Atin fefégerarém gom so begén i Rufuse, sani ménbantuge gémalbék kay Kadnane. Atin fefégerarém gom so begén i idéng ne, sani maake idéng gu so sabaf bé kégédaw ne begén. ¹⁴ Atin fefégerarém gom so begén i Asinkrituse, Flegon, Hermes, Patrobas, Hermas, brab de dumo ro munur. ¹⁵ Atin fefégerarém gom so begén i Filologuse, Julia, brab Nereuse, brab libu nuwe brab Olimpase brab kéluhanay de dumo ro munur.

¹⁶ Atin fégito gom i kégédaw gome amuk sémégifa gom. I kéluhanay de munur fésamfayé roy késégifa ruwe begom.

¹⁷ Atin do dumo gu, ongoté ku dob begome bé ingat gom bé de émféséédél brab téromo bé ségiyowe kétoro bé féngganad gome. Férayu gom de inok énda kédané roy kéunur gome. ¹⁸ Non i de ni do étew, énda rigoné roy kétayay Kadnane Jesu Kristo. Yamula rigoné roy karowe kétayan. Atin tugio roy de énda séna féngganadén bé de furung kébérén ureté ro. ¹⁹ I kéluhana keye, énggélingoo key i fantage bé kéodoro kome bé Fiyowe Uret funa ku moror. Méuyotu fo ké gétiiga kom i kéluhanay fiyowe. Endob énda damén gétiiga kom i tetee. ²⁰ Atin i Tuluse, sani émféfiyowe bé fédew tome, tabanga no begom inok tabana kom sékoy Satanase.

Atin mégédaw fo damén i Kadnane Jesus begom.

²¹ I Timoteowe, sani dumo guwe gémalbék, ségifaé no begom. Atin i Lusiowe brab Jasone brab Sosipatare do dumo gu Judio, ségifaé ro so begom.

²² Atin i begéne, Tersio sani fénsulat Pablwe bé ni, ségifaé ku so begom sabaf bé Kadnane.

²³ Atin i Gayowe, sani gefee bé lawie batio key brab sélimudo keye do munur, ségifaé no so begom. Atin i Erastowe, sani mitonge bé kurtae dob ni ingéd, brab Kartuse dumo tom, ségifaé ro so begom.

²⁴ Atin mégédaw fo damén i Kadna tome Jesu Kristo begom kéluhanan. Amen.

²⁵ Dayéwé tom i Tuluse. Géfélégéto noy de kéunur tom bé Jesuse. Gérígono noy ni sabaf bé Fiyowe Uret fantag bé Jesu Kristowe ureté ku. Been i niy Fiyowe Uret énda gésobutoy de étew de non ménbunéy ménrugayén. ²⁶ Endob béleewe, i Fiyowe Uret fantag bé Jesuse giton dob de sénulat i de sénarigoy Tuluse muret bé kébérén ne. Atin non sénugu i magufusae Tulus, fégétiiga key bé de étew dob kéluhanay de ingéd, inok i kéluhanay de étew damén méninugut ro de.

27 Atin médayéw damén i sébaane Tulus. Enda i ségiyo saliyu bé Beene. Gétiga noy kéluhanane. Médayéw damén sabaf bé Jesu Kristowe taman sa taman. Amen.

Pablo

I Sunguwe Sulat Pablowe dob de Munur bé Kristowe dob Korinto

Been i niy sébaane bé de sénulat Pablo, sani ménbantuge muret fantag bé Jesu Kristowe. Tafayén séménugud i Pablowe dob ingéde Korinto. Atin i de dumo bé de étew diyo ménwaléy ro munur bé Jesu Kristowe sabaf bé kéuret Pablowe.

Endob amun méntékédan i Pablowe diyo, wén i de dumo bé de munur diyo rénigo roy tete. Atin i de dumo de, wén i de ménénginsa fantag bé ati fatute rigoné ro sabaf bé kéunur ruwe. Médooy de fénginsaé ro non mantu ro séna munur bé Kristowe.

Mélaw séménulat i Pablowe inok sumbulo no bero bé de fénginsaé ro. Nugar Pablowe soy de dumo bero do ménalsa.

1 ¹Begéney Pablowe, fénémili i Tuluse ménwaléy apostol Jesu Kristowe sabaf bé kétayay Tuluse. I Sostenese dumo tom munur bé Jesuse brab begéne, sulata key begom ²do munur bé Tuluse bati dob Korinto. Fénémili i Tuluse begom inok waléy mélénis dob adafa nuwe sabaf bé Jesu Kristowe. Ménwaléy gom do étew i Tuluse beroy kéluhanay de étew dob kéluhanay de ingéd munur bé Jesu Kristowe, sani Kadna ruwe brab Kadna tome so.

³I Abay tome Tuluse brab Kadna tome Jesu Kristo toow fo mégédaw damén begom brab iray ro damén i métanéke do fédew.

I kéfiyonone sabaf bé Kristowe

⁴Toow fo démoyunu fésalamat bé Tuluse non bé kégédaw ne begom fénagéw dob Jesu Kristowe. ⁵Non toow fo fénfiyyoy Tuluse begom bé kewaléy gome do dumo Jesu Kristowe. Mélaw tintu fo énggésobuto kom i toowe kétoro brab gétigan gom so témodo de. ⁶Ménwaléy toow fo méégét i kéunur gome bé ténero geye begom fantag bé Kristowe. ⁷Mélaw i Tuluse nirayén begom i kéluhanay kéfurunge kailanga kom tidéw dob Rémodor ne, bé lala gome ongot-ongot bé késéfule i Kadna tome Jesu Kristo. ⁸Beeney émféégéte bé kéunur gome taman dob tamfaday duniiae, inok

énda i sala gom dob gaiy késéfule ne. ⁹Toow fo gésarig tom bé Tuluse, sani ménémilie betom inok waléy tom do dumoy Nga ne Jesu Kristo, sani Kadna tome.

Ménsébaad ro

¹⁰Do dumo gu, sabaf bé kéféguléw i Kadna tome Jesus betom ongoté ku begom kagom sébaad-baad. Yamula séfagayun gom inok waléy ségiléw i de fédew gom brab de kéfégitung gom. ¹¹Non do dumo gu, bénréh i de étew do dumo Kloewe démoyun gom kun séédél. ¹²Wén kun i do dumo begom émbéréh maro, “Kuyug Pablo gey i begeye.” Atin i de dumo de kun émbéréh maro, “Kuyug Apolos gey i begeye.” Brab i de dumo begom émbéréh ro maro, “Kuyug Pedro gey i begeye.” Atin i de dumo do émbéréh maro, “Kuyug Kristo gey i begeye.” ¹³Toow fo tete i nan. Maak sénufak-ufak gom i Kristowe. Békén begén i ménléhue dob kruse inok méfukas gom bé de sala gom. Brab énda ménbautis gom inok waléy gom do kagén kuyug.

¹⁴Fésalamatu dob Tuluse non békén begén i ménautise begom saliyu bé Krispowe brab Gayowe. ¹⁵Mélaw énda i gébéréh de ké ménbautis gom dob dawét guwe. ¹⁶(Bénautis guy Estabanase brab kéluhana ro ségélawi. Endob éndaén i ségiyo énggétédémo ku bénautis gu.) ¹⁷I funa Kristowe begén séménugu békén ké mautisu. Yamula sénuguén begén muret bé Fiyowe Uret. Atin énda fénfurungén begén muret loo bé de étew dob duniyae ni, inok i de étew mégélingo, énda munur ro saén sabaf bé kéfurung guwe émbéréh. Yamula munur ro sabaf bé barakat i Tuluse. Mélaw énda émbunéy i barakat Kristowe mémukas bé de étew sabaf bé kéléhu ne dob kruse.

I kégétigay Tuluse

¹⁸I de étew mékukum ro, marok énda i laga i kéurete fantag bé kéléhu Jesuse dob kruse. Endob i betome do ménfukasén dob de sala tom, gétiga tom toow i Fiyowe Uret brab fégitoy noy barakat i Tuluse.

¹⁹Wén i Ménsulate Kébéréh i Tuluse fantag bé ni mano, “Binasané kuy kégétigay de méngganad. Atin fégitoy gu énda i laga i kéfégitung i de étew marok do métileédtéed ro.” ²⁰Mélaw gétiga tom énda i laga i kégétigay de énggféganad taloo no de métileédtéed taloo no de furung émbéréh dob ni duniya. Non fénggitoy Tuluse énda i lanték i kégétigay kéilawane.

²¹Toow fo gétigan i Tuluse. Bénantakén bé énda gésobutoy de étew de sabaf bé de kégétiga ro saén. Yamula ménswat i Tuluse mémukas saén bé de étew munur bé Fiyowe Uret ureté key, fiyon fo ké béréh i de étew énda i laga i Fiyowe Uret. ²²I de Judio méuyot ro gérito do mékégaif inok géunur ro de. Atin i de étew tidéw Akaya méuyot ro mégélingo bé de gétigan muret inok géunur ro de. ²³Endob ureté tom i fantage bé

Kristowe ménléhu dob kruse. Endob i de Judio mika ro de. Atin i de étew békén Judio fégitungé ro énda i lagaén.²⁴ Endob i de étew do fénémili i Tuluse munur ro, do Judio brab do békén Judio, gétiga roy barakat i Tuluse brab kégétiga nuwe fénggito no dob kéléhu Jesu Kristowe.²⁵ Non i kégétigay Tuluse toow na fo gérotor bé kégétigay de étew, fiyon fo ké fégitungé ro énda i lagaén. Atin i barakat i Tuluse toow na fo émbagér tidew bé kébagér i de étew, fiyon fo ké wén i do étew fégitungé ro énda i bagér i Tuluse.

²⁶ Do dumo gu, fégétédém gom i ni. Amun fénwaléy i Tuluse begom do munur, énda sénay médoob begom do gétigan, brab énda sénay médoob begom do odoron, taloo no do gérotor étew.²⁷ Endob i Tuluse fénémilién i de étew léngléngén ro dob adafay kéilawane inok kémalianan i de étew marok toow ro fo gétigan. Atin fénémilién i de étew do gérifantad dob adafay kéilawane inok kémalianan i de étew do téfégérotor.²⁸ I Tuluse fénémilién i de étew diyangkaén brab ikaan brab énda i laga ro kun dob duniyae ni inok fégit no énda i laga i de éntingayén karangéy de étew toow fo mélaga.²⁹ Mélaw énda i étew gégélangka-langka dob Tuluse.

³⁰ Gido loo, fénwaléyéy Tuluse betom dumo Jesuse. Atin i kéluhanay de kégétiga tom tidew dob Tuluse fén-angéyén bé Kristowe. Atin sabaf so bé Kristowe, ménwaléy tom do métintu brab malinis dob adafay Tuluse brab méfukas tom bé de sala tom.³¹ Mélaw toow i Ménsulate Kébéréh i Tuluse mano, “Amuk wén i méuyot fébantug-bantug, fatut fébantug-bantug saén bé atiy rénigoy Kadnane.”

I Fiyowe Uret

2 ¹Atin do dumo gu, amun énggégumahu dob begome, nuret guy Fiyowe Uret i Tuluse. Endob énda ménfurungu émbéréh taloo no muret loo bé ségétéwe wén i kégétiga no.² Non ménuyotu saén muret dob begome fantag bé Jesu Kristowe brab fantag bé kéléhu ne dob kruse.³ Mélaw amun énggumahu dob begome, toowu fo ménggilak brab léménukub, non gétiga ku énda furungu muret.⁴ Atin amun nureto ku begom, énda ménusaru bé furunge kébéréh taloo no kégétigan. Yamula i Rémogor i Tuluse diyo dob begéney ménféunure begom bé barakat ne,⁵ inok i kéunur gome békén sabaf bé kégétigay étewe. Yamula munur gom saén sabaf bé barakat i Tuluse.

I kégétigay Tuluse

⁶ Endob i toowe, toroé kuy tintuwe ménalém kégétigan dob de étew méégét i kéunur ruwe. Endob i ni kégétigan békén tidew dob kéilawane taloo no tidew dob de méguléw dob duniyae bé ni do gai. Non mérékan i káféguléw ruwe.⁷ Yamula toroé kuy ménaléme kégétigay Tuluse, sani ménbunéye non énda fénggitoy Tuluse de bé do gétah. Non amun énda

séna lénimbag i Tulusey duniiae ni, énggétiga non i atiy rigoné nuwe bé fukasé no betom inok méuyag tom taman sa taman dob lawayo. ⁸Enda i ségétew méguléw dob duniiae ni énggésobuto noy ni ménalém kégétigan. Non amuk énggésobuto ro, énda damén fénléhu roy barakatane Kadnan dob kruse. ⁹Non wén i Mén sulfate Kébérél i Tuluse mano, “Enda i ségétew énggégito taloo no énggégélingo taloo no énggégéfítung bé de fiyo do languntaman ténavay i Tuluse kay de étew méimu de.” ¹⁰Atin i de ménbunéy bé do gétah, fénggésobut i Rémogor i Tuluse dob betome. Non gétigay Rémogor i Tulusey kéluhanane, fiyon i de ménalém kégétitung i Tuluse. ¹¹Enda i gétigan bé atiy dob kégétitung i ségétewe étew saliyu bé beene so. Ségiléw so bé Tuluse. I Rémogor i Tuluse saén i gétigane bé atiy dob kégétitung i Tuluse. ¹²Atin énggédot tom i Rémogor i Tuluse bati dob de fédew tom. Békén rémogor tidew dob duniiae ni, éndob Rémogor i Tuluse. Fégétiga no betom i kéluhanay niray i Tuluse betom.

¹³Mélaw toroé tom i téno i Rémogor i Tuluse betom, békén tidew saén dob kégétigay étewe. Toroé tom i toowe tidew dob Rémogor i Tuluse dob de étew bati i Rémogor i Tuluse diyo dob de fédew ro. ¹⁴Endob i étewe énda diyo i Rémogor i Tuluse dob fédew ne, énda gétayakufo noy de éntingayén tidew dob Rémogor i Tuluse non énda gésobuto no de. Atin karangé noy énda i lagaén non i Rémogor i Tuluse saén i émfégésobute de. ¹⁵I étewe batioy Rémogor i Tulusey fédew ne, gésobuto noy kéluhanane. Endob i étewe énda diyo i Rémogor i Tuluse dob beene, énda gésobuto noy kégétitung i de étew diyo i Rémogor i Tuluse dob berowe. ¹⁶Non wén i Mén sulfate Kébérél i Tuluse mano, “Enda i gétigan bé atiy dob itungay Tuluse brab, énda i gétoro bé Tuluse.” Endob i betome do munur, fénggito Kristowe betom i kégétitung ne.

Do sugu-suguéy Tuluse

3 ¹Do dumo gu, amun diyou séna dob begome, énda énggóbérého ku begom i ségiléwe bé kékérél guwe dob de étew fénémanduo Rémogor i Tuluse. Non kailanga kuy émbéréhe dob begome maak do nga munur bé Kristowe. Non odoro kom sénay de tete kétaya kom. ²Mélaw énda gétoroo ku begom bé de ménalém kégétigan, non ségiléw gom bé ngae énda géamaa noy métégase amaén, éndob ratah saén. Fiyo béléewe ni, énda gésobuto kom i ménaléme gétoro gu. ³Non odoro kom sénay de tete kétaya kom. Wén sénay do médaléw brab do séédél begom. Mélaw giton dob begomey kéodoro kome bé de tete kétaya kom, ségiléw bé de énda munur bé Jesuse. ⁴Non amuk wén i émbéréh begom maro, “Begey i kuyug Pablwe”, brab émbéréh i de ségiyo maro, “I begeye do kuyug Apolos gey”, fégito gom i késégiléw gome bé de énda séna munur.

⁵Fégétitung gom i fantage bé de ni. I begéne, sani Pablwe, ati begéne? Atin ati Apolose? Ségiléw gey falan do sugu-suguéy Kadnane saén.

Fénuret i Tuluse begey inok munur gom. Rigoné key saén i galbéke sénugu i Tuluse sénga ségétew begey rigoné key. ⁶ Maak do gémalbék gey dob fantade. I begéne ségiléwu bé mohoke. Atin i Apolose ségiléw bé mitisone de wayég. Endob Tulusey émféruke bé de nohok. ⁷ Mélaw békén i mohoke taloo no mitisone de wayég i fatute de médayéw. Endob Tulus saén i fatute de médayéw non Been i émféruke de. ⁸ I mohoke brab mitisone de wayég, énda i isu bero toow na fo gérotor. Atin irayay Tuluse bero baras loo bé kédakél i de galbék rénigo ro. ⁹ Non i begeye Apolosey de sugu-suguéy Tuluse brab sétabang gey gémalbék. Atin i begome maak do nohok i Tuluse.

Atin ségiléw gom bé sébaane lawi rénígoy Tuluse. ¹⁰ Atin i Tuluse fénwaléyén begén ségétew furung rémigo lawi. Mélaw begén i ménfédiyoe bé batéwe gonoy de liléy ménbunsud. Atin ségiyo man i émfétause bé kérigowe bé ni lawi. I atag i ni, wén i ségiyo téromo begom béléewe ni. Atin i émfétause bé galbéké fatut ingata noy rigoné nuwe. ¹¹ Atin sébaan saén i batéw i lawi i Tuluse. Been i Jesu Kristowe fénwaléy i Tuluse maak batéw non Been saén i unuro tome. ¹² Atin i de rémigo bé lawi i Tuluse, médooy de fégérigo ro de. Atin i de séségiyo-giyo fégérigo bé lawie ségiléw bé de séségiyo-giyo kétoro. Amuk fiyoy kétoroe maak do bélownon brab do filak brab do balilaga do batéw. Enda métuwégi de ni do éntingayén. Endob amuk énda fiyoy kétoroe, ségiléw bé de kayéw brab do kéroon. I de ni do éntingayén magad do métuwégi. ¹³ Bé gaiwe moso séfule i Kadnane mangéy kémukum, giton i galbék i kéluhanay de étew. Atin téngkadé noy de galbék ro bé aféye. Amuk fiyo, énda métuwégi. Endob amuk tete, métuwégi. ¹⁴ Atin amuk énda métuwégi i galbék i ségétewe étew, gédoté noy baras ne tidew dob Tuluse. ¹⁵ Endob amuk météy métuwégi i galbék i ségétewe étew, énda gédoté noy baras ne fiyon fo ké ménfukas inok énda mékukumén. Ségiléw bé étewe énggáféraréy tidew dob métuwégi lawi éndob énda i énggéuwito no.

¹⁶ Gétiga kom damén i begome maak lawi i Tuluse non diyo i Ré mogor ne batí dob de fédew gom. ¹⁷ Atin amuk wén i minasa bé lawi i Tuluse, binasanéy Tuluse soy nan étew, non i lawi i Tuluse mékétéfu. Atin begom i nan lawi.

¹⁸ Kagom tugion i lowoh gome. Non amuk wén i ségétew begom manok toow fo gétigan dob adafay de dumo no dob duniiae ni, fatut waléy énda i gétiga no dob adafay de étew, inok waléy toow fo gétigan dob adafay Tuluse. ¹⁹ Non i kégétigane dob duniiae ni énda i lagaén dob adafay Tuluse. Non wén i Ménsulate Kébéréh i Tuluse mano, “Usaréy Tulusey de akar i de énggétigan do étew fégélangkébén bero.” ²⁰ Atin wén i Ménsulate Kébéréh i Tuluse mano, “I Kadnane gétiga noy kéfégítung i de gétigan do étew énda i lagaén.” ²¹ Mélaw kagom fégélangka-langka i kéfuray gome bé de étew. Non i begeye do sugu-sugué kom, békén gey

funa kom félangka-langka. ²² Atin i begéne brab Apolose brab Pedrowe, niray i Tuluse begey dob begome inok tabanga key begom. Fiyon i duniyae ni, brab de éntingayén géumah moso, brab de éntingayén béleewe ni, brab fiyon i de umul brab kéléhu, niray i Tuluse inok féfioné no begom. ²³ Atin i begome ka Kristowe, brab i Kristowe kay Tuluse.

Do apostol

4 ¹ Atin fantag bé begeye do téromo, fatut karangé kom begey do sugu-sugué Kristowe. Non sénarig i Tuluse dob begeyey de ménalém kébéréné. ² Atin i sarigone fatut odoro noy de sugu i amu ne. ³ Endob énda émbukuu fantag bé ati kékégitung gome begén taloo no i kékégitung i de ségiyo étew begén. Fiyon i begéne, énda kukumé kuy kagéne lowoh. ⁴ Enda tete i fédew guwe fantag bé de rénigo gu. Gido loo, énda séna gito no ké fiyo taloo no ké tete i de rénigo gu, non Kadnaney kémukume begén. ⁵ Mélaw kagom sékukum béleewe ni. Yamula ongot-ongot gom i késéfule i Kadnane. Non fégito no bé bénou i kéluhanay rénigoy de étew do énda séna gito no béleewe ni. Atin fégito no soy ati dob fédew i kéluhanay étewe. Bé bénou gai, i Tuluse dayewé noy séngae ségétew look énda, sabaf sa bé de rénigo ro.

⁶ Do dumo gu, énggélabito kuy dawét guwe brab Apolose. Endob i begeye do ufama saén inok gétiga kom bé fatut odoro kom saén i fénsulat i Tuluse. Mélaw kagom karangén de ké toow na gérotor i ségétew téromo bé dumo nuwe téromo. ⁷ Fégitungé kom keey do toow gom na fo gérotor bé de ségiyo. Endob dufang i nan kékégitung. Non i kéluhanay de éntingayén do kagom, Tulus i méniraye de dob begome. Mélaw kagom félangka-langka, non énda foy éntingayén do kagom saliyu bé de gédoté kom tidew dob Tuluse.

⁸ Fégitungé kom keeyén bé éndaén kailanga kom i tabange tidew dob Tuluse. Fégitungé kom keeyén bé énggédot gom i kéluhanay de kéfionon tidew dob Tuluse. Fégitungé kom keeyén bé béleewe ni méguléw gom séréngan bé Kristowe fiyon fo ké i begeye do apostol énda séna méguléw gey. Endob i toowe, énda séna méguléw gom. Endob méuyotu damén ké béleewe ni méguléw gom inok méguléw gey so bénou séréngan begom.

⁹ Non dob karang guwe de, rénigoy Tuluse begey do apostol do toow fo gérifantad. Ségiléw gey bé de fériusu gédétén féléhuén dob téngaangay kéluhanay de étew brab de télaki. ¹⁰ I kékarang i de ségiyo étew begey, do dufang non munur gey bé Kristowe. Endob i begome, makom ké do toow gomén gétigan sabaf bé Kristowe. Atin i begeye toow gey fo kun mélubay. Endob i begome, makom ké émbagér gomén. Atin énda fégadatay de étew begey fiyon fo ké fégadatay ro begom. ¹¹ Atin taman so béleewe ni i begeye mélayaf gey brab térumén gey, brab kulang i de kégal gey. Brab ferasayén gey lubagén brab énda i lawi gey. ¹² Mégéror gey gémalbék inok gédoté

key i de kailanga key. Atin amuk ingonéy de étew begey, dasala key bero inok féfiyonéy Tuluse bero. Amuk ferasayén gey, fédayaé key saén. ¹³ Amuk wén i émbéréh tete fantag bé begeye, sumbulo key bé fiyowe kébéréh saén. Maak do ruhuk gey saén. Taman béeleewe ni siyawéy de étew begey dob duniaye.

¹⁴ Do dumo gu, békén sénulat guy ni ké fémalané ku begom. Yamula inok toroé ku begom maak do gulaané ku nga gu. ¹⁵ Non fiyon fo ké médooy témoree begom fantag bé Kristowe, ségettew saén i maake abay gom, sani begéne. Non ménwaléy gom munur bé Kristowe amun nuret guy Fiyowe Uret dob begome. ¹⁶ Mélaw ongoté ku begom iring gom begén. ¹⁷ Been i funa kuwe sému gom munur bé Kristowe mangéy dob begome. Been i toowe fo kégédawa ku maak nga gu sabaf bé Kadnane, brab modor bé de sugué ku de. Amuk gérumah dob begome, fefégétédémén begom i de kétooro gu fantag bé de adat tom sabaf bé Kristowe, ségiléw bé ténero guwe dob de munur dob kéluhanay de ingéd.

¹⁸ Wén i do dumo begom do ménwaléy félangka-langka non marok éndaén séfuleu mangéy diyaan. ¹⁹ Endob séfuleu so mangéy diyaan amuk kétayay Tuluse. Atin bé béo, susiné kuy kédooy énggérigonoy de félangka-langka, békén i de kébéréh ro saén. ²⁰ Non i kéféguléw i Tuluse betom békén dob kébéréhe saén, éndob dob barakat ne. ²¹ Ati isuwe kétaya kom? Amuk énda témérén gom bé de tete rigoné kom, séfuleu moso ferasayé ku begom. Endob amuk tagaké kom i de tete adat gom, séfuleu mégédaw begom.

Wén i ségettew bero mén sala

5 ¹ Wén i énggelingoo kuwe bé wén kun i ségettew begom réménigo toow fo tete. Lénamfaén kun i bawag i boh ne. Fiyon i de énda méngintulus, énda gérigono roy loowe bé ni. ² Gido loo, toow gom fo wayo félangka-langka. Endob fatut gom damén mémala brab émbuku. Atin fatut énda tungkasé kom méngintulus sélimud begom i ni étew réménigo bé ni. ³ I begéne, fiyon fo ké mérayuu dob begome maak diyou so dob begome non doyuné ku so begom fégítungén. Atin sabaf bé atura kuwe, kénukum gun i ni étew mén sala, loo bé rigoné kuwe damén ké diyou dob begome. ⁴ Amuk sélimud gom, maak diyou so non diyo soy fédew guwe. Mélaw dob atura kuwe tidéw dob Kadnane Jesu Kristo, ⁵ sugué ku begom miray bé ni étew dob Satanase inok binasané noy lowoh ne. Tidéw béo, gésénule damén, atin mélaw énda mékukum i rémogor ne bé gayi kékukum i Kadnane Jesus.

⁶ Kagom damén félangka-langka. Gétiga kom i kébéréhe mano, “Géférerukoy klohe saén fégféreruk i kéluhanay fane.” ⁷ Atin i étewé ni mén sala, ségiléw bé fégféreruke bé fane. Fatut kédané kom tidéw dob begome inok énda waléy gom tete kéluhanan. Yamula waléy gom damén

tintu fiyo. Atin gétiga ku méntintu gomén béni sabaf bé kéunur gome bé Kristowe. Non i Kristowe ségiléw bé native bili-bili fénléhu ténulak bé gaiy kandulie féndawét “Témara”. Non fénléhuén i Jesuse ténulak gémantinon betom inok méfukas tom bé de sala tom.⁸ Mélaw rigoné tom i mantuve kanduli sani kéamae émfégétédém bé kétulake bé Jesuse. Atin fatut amaé tom saén i fane énda i fénggfééruk de. I atag i ni, fatut kéda kom i de tafay tete adat gom atin fatut toow fo fiyoy de adat gom brab béréh gom saén i toowe.

⁹ Amun sénulata ku begom bé gétahe, bénréh gu begom bé kagomén séloyuk bé de étew mélkérésik i de adat ro. ¹⁰ Endob i kékérén guwe ni, fantag bé de békén munur bé Jesuse, sani de bigaén, de arumén, brab de lémiful, brab de méngadaf bé de kéninontow. Non amuk dini gom dob duniyae ni, kailanga kom séloyuk bero sénga téklid. ¹¹ Endob i bénréh guwe, been i fantage bé de étew émbérén do munur bé Jesuse éndob do toow fo bigaén, do arumén, look méngadaf ro do kéninontow, look émbérén do tete tugi fantag bé de étew, do molon, do lémiful. Kagom séloyuk bé de ni do étew émbérén do munur ro kun bé Jesuse éndob taus ro mésala loo bé de ni. Fiyon mama, kagom séréngan bero.

12-13 I de étew énda munur ro bé Jesuse, énda i atura tom kémukum bero, non Tulus saén i kémukume bero. Endob i de dumo gom ménbérén munur ro bé Jesuse, fatut kukum gom bero amuk ménalsa ro loo bé ni. Non wén i Ménsulate Kékérén i Tuluse mano, “Kéda kom i tetee étew dob begome.”

Fantag bé késébanil-banile

6 ¹ Amuk wén i méuyot témbó begom bé dumo gome munur bé Jesuse, kagom téboén de dob adafay de gémamak kukuman do békén munur. Yamula, fatut téboé kom dob adafay de dumo gom munur. ² Enda keey gétiga kom de, do betom munur i kémukume moso bé kéluhanay de étew dob duniyae ni. Atin amuk betom i kémukume bé duniyae ni, gékukumo tom i kéluhanay de kloh étingayén béléewe ni. ³ Enda keey gétiga kom de, betom i kémukume moso bé de télaki dob lawayo. Mélaw toow fo fakay tom sétiyawan béléewe ni dob fantade. ⁴ Mélaw amuk wén i témbó begom bé dumo gome munur, énda fatutén téboén dob adafay de gémamak kukuman non énda munur ro bé Jesu Kristowe. ⁵ Fémala-mala gom! Aw énda foy ségétew gétigan begom témiyawan bé de ménsebanil dob begome munur bé Jesuse? ⁶ Endob réménigo gom wayo énda fiyo non sétebo gom dob adafay de étew gémamak kukuman, énda munur ro bé Jesuse.

⁷ Atin sabaf bé de késétébo gom, giton fo toow i kékulang i késarig gome bé Tuluse. Toow na fo fiyo ké fidaya gom ké wén i déménufang begom taloo no ké wén i léméniful begom. ⁸ Endob i toowe, begom i de

ménsala brab do léméniful bé de dumo gom munur. ⁹Gétiga kom damén i de étew énda métintu ro, énda féguléwoy Tuluse bero. Fétuntay gom. I de bigaén, brab de méngadaf bé de kéninontow, brab do lémamfa, brab do bakla, énda géahur ro dob kéféguléw i Tuluse. ¹⁰Atin loo soy de ménakaw, brab de arumén, brab do molon, brab do émbéréh do tete tugi fantag bé de étew, brab do lémiful, énda so géahur ro dob kéféguléw i Tuluse. ¹¹Bé do gétah, wén i do dumo begom loo bé nan. Endob béléewe ni ménlinis gomén tidew dob de sala gom, atin do ménwaléy gomén do étew i Tuluse. Fénwaléyén begom do métintu bé barakat i Kadnane Jesu Kristo brab Rémogor i Tuluse.

I fiyowe adat

¹²I betome do munur, fakay gérigono tom i kéluhanay éntingayéne amuk énda teteén. Gido loo, békén kéluhanay éntingayéne fiyo. Fiyon fo ké fakay rigoné kuy kéluhanane, éndob békén fo fatut waléyu maak riféy de rigoné ku. ¹³Ufama, i sure, kay amaéne. Atin i amaéne kay sure. Toow i nan. Endob wén moso i gai kédanéy Tulusey sure brab amaéne.

Atin i lowohe békén fégésébiga. Yamula rénígoy Kadnaney lowoh i de étew inok rigoné roy galbék i Kadnane. Atin sabaf bé Kadnane, waléy mantuy de lowoh tom moso. ¹⁴Non Tulusey ménfétébulee bé Kadnane Jesus, atin fétébuleé no so mélaw betom bé barakat ne.

¹⁵I de begom do munur, gétiga kom damén i de lowoh gom maak réfa i lowoh Kristowe so. Mélaw énda fatutén sumfata tom bé sundale. Toow fo tete i ni. ¹⁶Gétiga kom damén i ni. I étewe sumfaté noy lowoh ne dob sundale, waléy ro sétiman lowoh. Non wén i Ménssulate Kébéréh i Tuluse fantag bé sébawage mano, “I de ruwo gétew waléy ro sétiman lowoh.” ¹⁷Endob i étewe sumfaté noy fédew ne dob Kadnane waléy ro sétiman fédew.

¹⁸Mélaw kagom témayan bé ségiyowe saliyu bé de bawag gom. I de dumo do sala énda sébanilén bé lowohe loo bé ni. Endob i étewe bigaén, ménsala sébanil bé lowoh ne. ¹⁹Gétiga kom damén i lowoh gome maak lawi i Tuluse non i Rémogor i Tuluse nirayén begom, batí dob de fédew gom. Mélaw i lowoh gome békén kagom. ²⁰Yamula Tulus i gefee bé de lowoh gom non bénléyén begom, atin i Nga ney fénggébayad ne de amun ménléhu dob kruse mémukas betom. Mélaw usar gom i de lowoh gom bé funay Tuluse médayéw.

Fantag bé késébawage

7 ¹Atin fantag man bé de fénénginsa gom begén dob de sulat gom, ay niy késumbulo kuwe de. Fiyo ké énda mawag i lagéye. ²Endob sabaf médooy de étew do bigaén, fiyo ké i séngae lagéy fatut mawag ségétew libun, brab i séngae libun fatut mawag ségétew lagéy. ³Atin fantag man

bé de sébawag, fatut ro séfidong. I lagéye énda fatutén émbéréh “Kago” dob bawag ne. Loo soy libune énda fatutén émbéréh “Kago” dob bawag ne. ⁴Non i libune békén been i gefee bé lowoh ne, non kay bawag ne. Atin i lagéye békén so been i gefee bé lowoh ne, non kay bawag ne. ⁵Mélaw kagom élénén i bawag gome ké rigoné noy kailanga nuwe. Endob amuk i de sébawag énda séfidong ro bé firoye kélungonon inok démasal ro, fakay. Endob amuk gilid i no, fatut fétausé roy késéfidong ruwe inok énda kudiyunéy Satanase bero sabaf bé kétayay lowoh ruwe.

⁶Enda sugué ku begom bé de ni bénréh gu. Yamula féginau gu saén begom bé fiyo ké énda sébawag gom. ⁷Non méuyotu de damén ké iringé kom begén énda i bawag gu. Endob énda ségiléw tom kéluhanan. Non irayay Tulusey séngae ségétew kaan kéfurungan loo bé étewe énda mawagén. Atin i de ségiyo étew, irayay Tuluse bero ségiyo kéfurungan.

⁸Ay niy béréhé kuwe dob de énda séna bawagén brab dob de baléw: Toow na fo fiyo ké énda mawag gom, ségiléw bé begéne. ⁹Endob amuk énda gétingkélo kom i kétayay de lowoh gom, toow na fo fiyo ké mawag gom. Non toow na fo fiyoy mawage bé kérégénan gom sabaf bé kétayay lowohe.

¹⁰Atin fantag man bé begome wénén i do bawag gom, ay niy béréhé kuwe dob begome. Been i niy sugu i Kadnane, békén saén kagén. I libune békén fo fatut ké ségélak bé bawag ne. ¹¹Endob amuk wén i libun génlak i bawag ne, énda fo fakayén ké mawag man ségiyo. Endob fakay séfule dob bawag ne. Atin i lagéye békén fo fatut ké gélaké noy bawag ne.

¹²Atin fantag man bé begome do sébawag, ay niy kagéne saén féginau dob begome. (Non énda sénugu i Kadnaney ni.) Amuk wén i lagéy dumo tom munur bé Jesuse éndob i bawag ne énda munurén, atin i bawag ne ni mika ségélak, énda fatutén ké gélaké no. ¹³Atin amuk wén i libun dumo tom munur bé Jesuse, éndob i bawag ne énda munurén, atin i bawag ne mika ségélak, énda fatutén gélaké no. ¹⁴Non i bawage énda séna munurén, waléy malinis dob adafay Tuluse sabaf bé bawag ne munur bé Jesuse. Amuk békén loo bé ni, i de nga ro énda malinis ro dob adafay Tuluse maak do nga i de békén méngintulus. Endob i toowe fo, malinis ro dob adafay Tuluse. ¹⁵Endob i bawage énda munurén, amuk gélaké noy bawag ne, fédaya gom gélaké no. Fakay i ni, non kétayay Tuluse ké métanék i kébati tome. ¹⁶Fatut fédayaé no ké gélakéy bawag ne, non fiyon fo ké énda ségélakén, énda so gétiga no de ké sabaf bé beene waléy géunur i bawag ne loo ké énda.

¹⁷Atin fiyon fo ké atiy gohoy séngae ségétew betom bé gaiwe fén-unur i Tuluse betom fatut fétausé tomén. Non niray i Kadnaney nan gohon. Been i sugué kuwe dob de munur dob kéluhanay de ingéd. ¹⁸Amuk i ségétewé begom méntulién bé énda séna ménwaléyén de munur bé Jesuse, éndaén fatutén ké kédané noy kétuli ne béleewe. Atin amuk i ségétewé begom

énda séna méntulién amun ménwaléyén munur, éndaén fatutén fétuli béleewe. ¹⁹ Non ulanden ké méntuli gom loo ké énda. I toowe fo mélaga i kéodoro kome bé de sugu i Tuluse. ²⁰ Mélaw fiyon fo ké atiy gohoj séngae ségétew betom bé gaiwe fén-unur i Tuluse betom, fatut fédidayday tomén loo bé nan. ²¹ Amuk ségétew go rifén bé gaiwe ménwaléy gon munur, kago émbuku de. Endob amuk fakay tangéyén go, rigo mo. ²² Non amuk ségétew go rifén bé gaiwe ménunur go, féwaléyé Kadnane beem békénén rifén dob adafa nuwe. Atin loo so bé ni, amuk békén go ségétew rifén bé gaiwe ménunur go, waléy go rifé Kristowe. ²³ I Tuluse bénléyén betom amun nirayén i buntunge Ngaén fénléhu géménantinon betom. Mélaw békén tom fatut waléy riféy kéilawane saén. Yamula riféy Tuluse betom. ²⁴ Do dumo gu, fiyon fo ké atiy goho tome bé gaiwe fén-unur i Tuluse betom, fatut fétausé tom, non Tulus i dumo tome.

²⁵ Atin fantag man bé de étew énda sénay bawag ro, énda i gébérého ku sugu tidéw dob Kadnane. Endob ay niy karang guwe de, brab ségétewu gésarigo kom non bé kégédaw i Kadnane begén. ²⁶ I karang guwe de, fiyo ké énda mawag gom non mérégén i de gai béleewe ni. ²⁷ I étewe énda i bawagén, békén fatut sélédé no. Atin i étewe wén i bawagén, békén fatut gélaké no. ²⁸ Endob amuk wén i étew méuyot mawag, fakay. Békén sala i mawage. Endob géagéw gom mérégén. Been i niy funa kuwe énggóbéréh bé kagom fatut mawag béleewe ni, non mikau de ké kérégénan gom loo bé de kékérégénay de sébawag.

²⁹ Non bérhéh ku begom do dumo gu, éndaén mérugay i gai tome. Mélaw tidéw béleewe ni, i étewé wén i bawagén, fatut mégéror rémigo bé galbék i Kadnane maak énda i bawagén. ³⁰ Ségiléw so bé de tete fédewén, brab de fiyo fédewén, brab de wén do languntama ro brab do énda i languntama ro. Ulanden non fatut ro mégéror rémigo bé galbék i Kadnane. ³¹ Atin amuk musar tom bé de étingayén dob duniiae ni, békén fatut toowé tom gulaanén. Non éndaén mérugay i duniiae ni.

³² Méuyotu de fo ké énda émbuku gom. I lagéye énda i bawagén toow na fo mégéror rémigo bé galbék i Kadnane non énda i mangga de. Mélaw i fégitungé nuwe saén i funay Kadnane mésuwat. ³³ Endob i lagéye bawagan, fégitungé noy de étingayén dob duniiae ni inok fésuwaté noy bawag ne. ³⁴ Sabaf bé ni, mésébaad i kégitung ne. Ségiléw so bé libune énda i bawagén, fégitungé no saén i fantage bé Kadnane inok toow fo mégéror rémigo bé galbék i Kadnane. Endob i libune wén i bawagén, fégitungé noy de étingayén dob duniiae ni non méuyot de ké fésuwaté noy bawag ne.

³⁵ Békén bénréh guy ni ké énda fébawagé ku begom. Békén! Bénréh guy ni inok tabanga ku begom rémigo bé fatute brab inok mégéror gom rémigo bé galbék i Kadnane, atin énda i mangga begom bé ni.

³⁶ Fantag man bé de ménséfasad sébawag moso, amuk méuyot ro de ké éndaén fétausé roy késébawag ruwe inok énda i angga ro rémigo

bé galbék i Tuluse, fiyo. Endob amuk méuyot ro fo séfidong, fatut ro sébawag loo bé kétaya ruwe. Enda mésala ro amuk sébawag ro.³⁷ Endob i lagéye, amuk énda i mémégés de éndob toow fo kétaya no ké éndaén fétausé no bawagén i libune fénasada no bawagé no, fiyo so.³⁸ Mélaw, fiyo ké bawagé noy kénogone fénasada no. Endob toow na fo fiyo ké énda bawagé no de.

³⁹ I libune wén i bawagén, énda fakayén ké mawag ségiyo taman méuyag sénay bawag ne. Endob amuk ménléhu i bawag ne, fakay man mawag bé kétaya nuwe, éndob fatut ségétew so munur bé Kadnane Jesus.⁴⁰ Endob toow na fo méoror ké éndaén mawagén ségule. Beeniy kéfégitung guwe de. Atin gékaranga ku, fénggésobut i Rémogor i Tuluse begén i ni.

Fantag bé amaéne

8 ¹ Atin fantag man bé fénénginsa gome ké fakay tom mama bé amaéne ténułak dob adafay de kéninontow, ay niy késumbul guwe de. Gétiga tom kéluhanan énda i barakat i de kéninontow. Gétiga tom énda i lanték ro. Endob i de étew marok do gétigan ro, waléy ro félangka-langka. Endob békén tom fatut félangka-langka, yamula fatut mégédaw tom inok féfiyoné tom i fédew i de dumo tom. ²I étewe manok toow fo gétigan, énda séna gétiga noy ati fatute gétiga no. ³ Endob i étewe toow fo féimué noy Tuluse, géloy Tuluse non ménwaléy étew i Tuluse.

⁴ Na, fantag man bé amaéne ténułak dob adafay kéninontowe, gétiga kom i kéninontowe énda méuyagén taloo no Tulus. Non sébaan saén i Tuluse, atin éndaén i ségiyo de. ⁵ Bénréh i de dumo do étew wén kun i médo do tulus brab kadnan dob lawayo brab dob fantade. Atin toow, wén i médo fénkadaféy de étew. ⁶ Endob gétiga tom, sébaan saén i Tuluse, sani Abaye ménfélimbag bé kéluhanane. Been i odoro tome brab fénkadafé tom sénga téklid. Atin sébaan saén i Kadnane sani Jesu Kristowe léménimbag bé kéluhanay éntingayéne brab Beeney funa tome méuyag.

⁷ Endob békén kéluhanay étewe gétiga roy ni. Wén i de dumo étew marok do tulus i de kéninontow non beeniy karowe kéunur bé do gétah bé énda séna ménunur ro de bé Jesuse. Mélaw amuk mama ro bé amaéne ténułak dob adafay kéninontowe, marok énggérigo ro bé salae funa ro tete fédew. ⁸ Endob gétiga tom, békén amaén i funay Tuluse betom mésuwat. Non amuk mama tom de, loo so ké énda mama tom de, ulanden dob Tuluse.

⁹ Gido loo, ingat gom inok i de rigoné kom, békén funay dumo gome énda séna méégét i kéunur ne, waléy gésala. ¹⁰ I begome wén i gétiga kom, amuk mama gom dob lawie fénkadafan bé kéninontowe, atin amuk énggitoy ségétewe énda séna gétiga noy fantage bé de ni kétoro, waléy

so méuyot de mama, fiyon fo ké dob fédéw ne sala i mamae bé amaéne ténulak dob adafay kéninontowe. ¹¹ Mélaw i ni étew énda séna méégét i kéunur ne, énggésug-sug, non rénigo noy gékaranga nuwe mésala de. Enda fiyoy nan, non beene soy funa Kristowe ménléhu inok mékédan i sala ne. Mélaw i kégétiga muwe wayoy funay dumo muwe waléy gésala. ¹² Mélaw amuk rigoné moy ni, beem i mésalae sébanil bé Kristowe non mésala go sébanil bé dumo muwe bé késala me bé dumo muwe énda méégét i kéunur ne. ¹³ Mélaw amuk sabaf saén bé karnehey funay dumo muwe gésala, kagon mama de inok énda mésala i dumo muwe de.

Fantag bé sahud i de apostol

9 ¹Enda i ségiyo étew géatur begén non ségétewu apostol brab non méntefégitoy Kadna tome Jesus dob begéne. Atin i begome, ménunur gom bé Jesuse sabaf bé kétoro guwe begom. ²Mélaw fiyon fo ké i de ségiyo do étew énda fégéoloné ro begén ségétew apostol, fatut fégéoloné kom begén non i kéunur gomey fégéolonone bé i begéne ségétewu apostol. Non begén i murete fantag bé Kadnane dob begome do étew dob Korinto.

³Atin amuk wén i démowoy begén, ay niy késumbulo kuwe de: ⁴Aw békén ba fatutu irayan kéama gu bé kégalbék guwe téromo fantag bé Kristowe? ⁵Aw énda bay kuwagib gu miring bé rénigoy de dumo gu do apostol brab de tuwaréy Jesus brab Pedrowe? Non kéluhana ro wén i do bawag ro munur so bé Jesuse. Atin amuk magéw ro, uwité roy de bawag ro. Mélaw wén soy kuwagib gu rémigo damén bé nan. ⁶I Bernabewe brab begéne, énda fatut gey gémalbék saliyu bé kétoro geye saén. Fatut irayan gey amaén bé kétoro geye saén. Sedek énda mérigoj ni loo bé mérigowe dob de ségiyo téromo? ⁷Ufama, énda i ségétew sundalo been soy mayadan bé kaane lowoh bé kégalbék ne sémundalo. Ségiléw so bé mohoke, wén i kuwagibén mama bé de kéntewén. Loo soy témalimae bé de bili-bili, fatut gédoté noy de dumo gatas i de bili-bili talimaé no.

⁸I ni bénréh gu békén saén tidéw dob kéilawane, non been soy niy ménbéréhe dob kukumay Tuluse. ⁹Ménbéréh dob kitabe sénulat Moisese mano, "I ayame sad-sadé noy faréye inok mérek, békén fatut ikétén i ba ne." Atin i Tuluse békén saén bénréhén i ni fantag bé ayame. ¹⁰Non bénréhén so fantag bé begeye do muret bé Fiyowe Uret. I démaduwe brab kémétéwe wén i inam ro gégédot bé kéntew ruwe. ¹¹Atin ségiléw so bé begeye. Nohok gey i kékérén i Tuluse dob begome inok méuyag gom taman sa taman. Mélaw fatut irayan gey amaé key inok méuyag gey dob duniya ni. ¹²Non amuk i de ségiyo téromo begom wén i kuwagib ro médot tidéw dob begome, toow na fo dakél i kuwagib geye de.

Gido loo, énda séna ménongot gey tidéw dob begome. Yamula féndaya gey kéluhanay mérégéne inok énda saén méangga i kéuret geye bé

Fiyowe Uret fantag bé Kristowe. ¹³Gétiga kom damén i de étew gémalbék dob lawi i Tuluse, mama ro so diyo. Atin i de fadi témulak, mama ro so bé dumoy ténulak ruwe. ¹⁴Ségiléw soy ni bé begeye. Non sénugu i Kadnane bé fatut médot i de témodo bé kéfaguyag ruwe tidew dob de ténero ro.

¹⁵Endob fiyon fo ké wén i kuwagib gu médot bé kéfaguyag guwe tidew dob de ténero gu, énda séna ménongotu dob berowe. Atin békén sémulatu béní inok mongotu dob begome. Mikau fo mongot dob begome. Toowu na fo méuyot ké méléhuu mélawayaf kisak mékédan i funa kuwe félangka-langka, sani kégalbék guwe fiyon fo ké énda médotu sahud. ¹⁶Endob énda i kuwagib gu félangka-langka sabaf bé kéuret guwe bé Fiyowe Uret. Non sénugu i Kadnane begén muret fantag bé Kristowe. Atin mélaw amuk énda rigoné ku de, toowu fo mékégédaw-gédaw non mékukumu fo toow. ¹⁷Amuk muretu sabaf bé kétaya kuwe saén, gédoté kuy sahud guwe de. Endob sénugu i Tuluse bégén, mélaw fatut rigoné ku sabaf sénarigén i ni galbék dob begéne. ¹⁸Ati mélaw i sahud guwe de? Ay ni: Been i dakéle kéoror gu bé kéuret guwe bé Fiyowe Uret fiyon fo ké énda mongotu bé kéfaguyag guwe loo damén bé kuwagib guwe de.

¹⁹Atin fiyon fo ké békénu ségétew rifén, waléy maak riféy kéluhanay étewe inok tabangé ku bero waléy do munur bé Jesuse. ²⁰Mélaw amuk diyou dob de Judio, iringé kuy adat i de Judio inok munur ro. Fiyon fo ké énda kailanga no modoru bé kitabe tidew dob Moisese, modoru de amuk diyou dob de modoron de inok munur ro bé Jesuse. ²¹Atin amuk diyou dob de békén Judio, iringé ku soy adat ruwe inok munur ro so bé Jesuse. Endob fiyon fo ké éndaén modoru bé kitab Moisese, modoru bé kitab Kristowe. ²²Atin amuk diyou dob de étew énda séna gétiga roy fatute amaé tom bé kéluhanay de amaén, énda amaé kuy amaéne karangé ro énda fiyo no. Rigoné kuy ni inok tabanga ku bero munur bé Jesuse. Mélaw rigoné kuy adat i de udenén étew dumo gu inok i de dumo bero waléy géunur bé Jesuse.

²³Rigoné kuy kéluhanay de ni inok munur ro bé Fiyowe Uret fantag bé Jesuse, inok gédoté ku soy de kéfiyonon iray i Tuluse sabaf bé kélégéb i Fiyowe Uretén. ²⁴Gétiga kom damén i ni. Amuk sékuya i de étew, kéluhana ro léméntu, éndob ségétew saén i tétabane brab gégedote bé barase. Mélaw fégérör gom loo bé sékuyaé inok barasay Tuluse begom moso. ²⁵I étewe sékuya toow fo fégérör bé rigoné nuwe inok waléy émbagér i lowoh ne. Rigoné noy ni inok tétaban, atin gédoté noy barase de énda fo métinkélén. Endob i betome mégérör gémalbék bé galbék i Kadnane, gédoté tom soy katome baras énda mébinasa no taman sa taman. ²⁶Beeniy funa kuwe magayas féntang léméntu mangéy dob fégilidoy sékuyaane. Atin ségiléwu bé ségétewé sémuntuk, toow fo tiliké no inok toow fo guraté no. ²⁷Atin i lowoh guwe ni, amuk wén i tete

kétaya no, dusané ku inok énda modoru bé nan tete kétaya ku. Rigoné kuy ni inok i begéne téménoro bé médoowe, énda waléy mékédan i kagéne baras.

10 ¹Do dumō gu, méuyotu de ké gétiga kom i énggéagéwoy de katufua tom amun ménodor ro bé Moisese. Déniyagay Tuluse bero kéluhanan. Non ténléb i rawéne bero bé kéagéw ruwe brab énggéifara roy dogote féndawét Furo Dogot. ²Mélaw maak bénautison ro bé rawéne brab dogote inok waléy ro do kuyug Moises. ³Atin ménama ro kéluhanan bé amaéne tidéw dob Tuluse. ⁴Atin méniném ro kéluhanan bé wayége tidéw dob Tuluse, non féniném i Tuluse bero bé wayége tidéw dob sébaane batéw ménodor bero. I ni batéw been i Kristowe. ⁵Gido loo, énda ménswat i Tuluse béré kédoono ruwe. Mélaw médooy ménléhue bero diyo dob gonone énda i étew de batí.

⁶I funa nuwe ménrigoy de ni inok wén i do ufama témoro betom, inok gétiga tom énda fatut féngonoyé tom i de tete éntingayén loo bé berowe. ⁷Enda fatut tom ménigadaf bé de kéninontow loo bé rénigoy de dumō bero. Non wén i Ménssulate Kébérél i Tuluse mano, “Ménssar ro dob adafa nuwe mama brab miném. Tidéw bénó, téménindég ro mésayaw dob adafa nuwe.” ⁸Atin énda fatut tom bigaén loo bé rénigoy de dumō bero, non kénukum i Tuluse bero bé kéléhu i ruwowe folo bra télew ngibu bé ségétérésangane. ⁹Atin békén fatut tukawa tom i Kadnane bé de rigoné tom do tete loo bé rénigoy de dumō bero, funay de ulé kéméneke bero atin ménléhu ro. ¹⁰Atin énda fatut tom riklamo loo bé rénigo ruwe funay Tuluse sénuguén i téakiwe méméléhu bero.

¹¹I funay de ni do ménrigo inok wén i do ufama témoro brab émféingat bé kéluhanay étewe, non éndaén mérugay i tamfadai gaiwe tidéw béléewe ni.

¹²Mélaw, i étewe manok toow fo mécégét i kéunur ne, fatut mingat inok énda mésalaén. ¹³I de kétukawa no bé séngae ségétew étew békén saén ménantu, non i kéluhanay kélawane ménukawanén loo bé begome. Atin toow tom fo gésarig bé Tuluse non énda fidayaé no betom métukawan bé kétukawe gélamfas na betom. Non bé gaiwe métukawan tom, tintu fébagéré no betom inok wén i kétungkél tom, inok énda damén gérigo tom sala.

¹⁴Mélaw do gulaané ku do dumō gu, kagom ménigadaf bé de kéninontow. ¹⁵Gétiga kom i fatute, mélaw fégitung gom i de bénréh gu inok gétiga kom ké toow look énda. ¹⁶Amuk mamung tom bé “komiyuniyune” fégétédémé tom i kéléhu Kristowe, mama tom fan brab miném tom arak fénsalamata key dob Tuluse. I inémé tome, been i dara Kristowe sétukidé tom. Atin i amaé tome, been i lowoh Kristowe sétukidé tom. ¹⁷Sébaan i fane. Mélaw i kéluhana tome waléy sébaan so non mama tom bé sébaane fan.

¹⁸ Fégitung gom i fantage bé de étew Judio. I kéluhanay de mama bé ténulake, séréngan ro do méngadaf bé Tuluse. ¹⁹ Ay niy atag i ni kétoro gu begom. I kéninontowe, rénígoy étewe saén. Atin mélaw énda i atag i amaéne ténulak dob adafay de kéninontow. ²⁰ Gido loo, békén saén do kéninontow i de féngadafé ro, ké témulak ro do saitan so. Békén Tulus i féngadafé ruwe. Mélaw mikau de ké mamung gom bé kféngadafé bé de saitan. ²¹ I betome do munur bé Kristowe, amuk mama tom bé komiyuniyone, fégétédémé tom i Kadnane Jesus brab Beeney féngadafé tome. Mélaw énda fakay tom mama so bé de amaén ténulak dob adafay de saitan non maak mamung tom méngadaf bé de saitan. ²² Békén fatut fédaléwé tom i Kadnane. Non toow fo barakatan brab gékukumo no betom, atin énda gésélyah tom de.

²³ Fiyon fo ké fakay rigoné tom i kéluhanane békén fiyoy kéluhanay de rigonén. Atin fiyon fo ké fakay rigoné tom i kéluhanane, békén fégétabang bé de dumo tom i kéluhanay de rigonén. ²⁴ Békén fatut tabanga tom saén i de katom lowoh. Fatut tabanga tom soy de dumo tom.

²⁵ Fakay amaé tom i de udenén karne fébéléy dob fadiyane, brab békén fatut fénginsaé tom ké ténulak dob adafay de kéninontow, inok énda waléy tete i de fédew tom amuk amaé tom. ²⁶ Non ténungkas i Tuluse betom mama bé kéluhanay amaéne dob Ménsulate Kébéréhén mano, "Tulusey gefee bé duniyae brab kéluhanay étingayéne."

²⁷ Amuk wén i ségetéw étew énda munurén bé Kristowe atin séngkaté no begom mama, brab amuk magéw gom mangéy diyo, fatut amaé kom i kéluhanay féama ne begom. Endob kagom fénginsaén de ké ténulak i amaéne ni dob kéninontowe, inok énda waléy tete i de fédew gom ké mama gom de. ²⁸⁻²⁹ Endob amuk wén i émbéréh de begom mano, "I ni amaén ténulak dob adafay kéninontowe", kagom amaéne de, inok i ménberéhe dob begome énda waléy tete i fédew ne.

Endob amuk ménginsa gom makom, "Amuk fakay amaé kuy atiy kétaya kuwe, sedek énda géamaa ku de sabaf saén bé ségetéwe étew énda gétiga no de ké ténungkas i Tuluse betom mama bé kéluhanane? ³⁰ Sedek wén i démowoy begén bé amaéne fénsalamata ku dob Tuluse?"

³¹ Ay ni késumbul guwe de: Amuk wén i rigoné kom look amaé kom look inémé kom, rigo gom i kéluhanane inok médayéw i Tuluse de.

³² Mélaw kagom rigonén i funay dumō gome tete i fédew ne, fiyon Judio, taloo no békén Judio, loo soy de munur bé Kristowe. ³³ Iring gom i rigoné kuwe. Kétaya ku ké démoyun fésuwaté kuy kéluhanay étewe. Enda rigoné kuy kféiyonoy kagéne saén lowoh, yamula rigoné ku soy funay kéluhanay de étew fiyo inok munur ro so bé Jesuse brab méfukas ro bé de sala ro.

11 ¹ Mélaw iring gom begén loo bé kféiring guwe bé Kristowe.

Fantag bé de libun

² Do dumō gu, dayéwé ku begom, non démoyun fégétédémé kom begén brab odoro kom i de kétoro gu begom. ³ Atin méuyotu de ké gésobuto

kom i ni. I lagéye uléw i bawag ne. Atin i Kristowey uléw i lagéye. Atin Tulus i uléw Kristowe. ⁴Mélaw i lagéye amuk ureté noy kékérén i Tuluse taloo no démasal, fatut énda météléb i uléw ne inok fégito noy Kristowe uléwén. ⁵Endob i libune amuk ureté noy kékérén i Tuluse taloo no démasal, fatut téléléb noy uléw ne inok énda émfémalay bawag ne. Non amuk énda, ségiléw bé libune ménérih i uléw ne. ⁶Atin amuk énda téléléb noy uléw ne, fatut fékéléngén i buk ne. Endob toow fo mékémala ké ménkéléng i buk i libune taloo no ménérih i uléw ne, mélaw fatut téléléb noy uléw ne. ⁷Endob i lagéye énda fatut téléléb noy uléw ne ké démasal taloo no ké muret bé kékérén i Tuluse. Non beeney maake anlung i Tuluse non niray i Tuluse dey aturay duniyae ni. Békén libuney funay bawag ne médayéw. ⁸Non i sunguwe lagéy békén tidéw dob libune. Yamula libuney tidéwe dob lagéye. ⁹Atin i lagéye békén lénimbag inok kay libune. Yamula lénimbag i libune inok kay lagéye. ¹⁰Mélaw fatut télélébey libuney uléw ne inok fiyon i de télaki gétiga roy lagéy i uléw ne. ¹¹I betome do munur bé Kadnane, i lagéye brab libune fatut sétabang. Non i libune kailanga noy kétabang i lagéye. Atin i lagéye kailanga noy kétabang i libune. ¹²Non loo bé gétaho, i sunguwe libun tidéw dob sunguwe lagéy, béeleewe i lagéye mumah tidéw dob libune. Atin i kéluhanane tidéw dob Tuluse, non Been i lémimbage bé kéluhanane.

¹³Begom séden i mégitunge de. Aw fakay ba démasal i ségitewé libun dob simbaane amuk énda téléléb noy uléw ne? Gétiga tom énda fakayén. ¹⁴Atin gétiga tomén dob de fédéw tom bé énda fo fiyo no ké métaah i buk i lagéye. Toow fo mékémala. ¹⁵Endob toow fo fiyo ké métaah i buk i libune funa no médayéw. Non niray dey buk ne inok météléb i uléw ne. ¹⁶Amuk wén i mika bé ni kétoro, ay niy késumbul guwe de. Enda i ségiyo adat ténero gey saliyu bé ni bé kékéngadafé. Atin ménagayun soy kéluhanay de munur bé Tuluse dob kéluhanay de ingéd.

I kéama i Kadnane

¹⁷Ay niy ségiyowe na béréhé ku begom. Enda dayéwé ku begom sabaf bé késélimud gome méngadaf. Non énda fiyoy rigoné kome, rigoné kom i tetee. ¹⁸Non énggelingoo ku, buluk sélimud gom kun, ménsébaad-baad gom. Atin gétiga ku wén i kétoow i ni. ¹⁹Gido loo, kailanga kom i mésébaade inok toow fo giton i isuwe tintu fo sémarig bé Tuluse. ²⁰Amuk sélimud gom mama bé amaéy Kadnane sani komiyuniyune, énda fiyoy nan rigoné kom. Mélaw békén gom tintu mama bé amaéy Kadnane. ²¹Non amuk mama gom, i de dumo begom toow fo arumén. Mélaw i de dumo de mule ro méléyaf. Atin saliyu na bé nan, waléy i de dumo begom molon ké sélimud gom. ²²Sedek énda mama gom brab miném dob de kagom lawi? Non bé kéarumé kome, fémalané kom i de méskinan begom. Mélaw i de ségiyo étew émbérén ro tete fantag bé begome do munur

bé Jesuse. Ati mélaw i fiyowe bérhéhé ku? Enda fo dayéwé ku begom loo damén bé kétaya kome de. Yamula bérhéhé ku begom, toow fo tete i rigoné kome.

²³ Non i ténero guwe begom fantag bé komiyuniyune ségiléw so bé kétoro i Kadnane de begén. Bé kélungonone fénkéfo Judasey Kadnane Jesus, éndot Jesusey fane. ²⁴ Atin amun gilid ménfésalamat dob Tuluse, sénbaad-baadén. Atin ménbéréh mano, “Ay niy lowoh guwe, niray inok méfukas gom. Ama gom i ni fégétédémo kom Begén.” ²⁵ Loo so bé no, amun énggilid ro mama fétémégén, éndotén i tabue. Brab ménbéréh mano, “I ni tabu, beeniy mantuve fasad i Tuluse rénigo bé dara guwe. Amuk miném gom de, rigo gom fégétédémo kom Begén.”

²⁶ Non taman so bé késéfule i Kadnane, sénga mama gom bé fane ni brab miném dob tabue ni, fégito gom i késarig gome bé kéléhu ne fégéfukas begom. ²⁷ Mélaw amuk wén i étew mama bé éfay Kadnane brab miném dob tabu ne, éndob énda méégét i kéfégitung ne fantag bé atag i komuniyone ni, ménsala sébanil bé Kadnane. Non énda basana noy lowoh ne brab dara ne. ²⁸ Mélaw fatut susinéy séngae étew i kaane lowoh ké fiyo taloo no tete i kéféngadaf ne. Amuk gékaranga no fiyo, fakay mama bé fane brab miném dob tabu i Kadnane. ²⁹ Endob amuk wén i étew mama de brab miném de, atin énda rénigo no de inok fégétédémé noy kéléhu i Kadnane, kukuméy Tuluse de sabaf bé nan rénigo no. ³⁰ Beeniy funa kome médooy de mélubay begom brab do démeruun, atin wén soy do ménléhu begom. ³¹ Endob amuk susiné tom na sunguy de katom lowoh bé kéféngadaf tome bé Kadnane, énda kukuméy Tuluse betom. ³² Endob bé kéfifit i Tuluse betom béleewe ni, toroé no betom inok énda kukumé no betom moso loo bé gétimale kékukumén bé de étew énda munur ro bé Jesuse.

³³ Mélaw do dumo gu, amuk sélimud gom mama bé komiyuniyone, kagom magayas. Yamula séongot-ongot gom. ³⁴ Atin amuk wén i mélayah, fatut mama na métah dob lawi ne. Atin tidéw béno, mangéy sélimud. Mélaw énda kukuméy Tuluse begom ké sélimud gom. Atin fantag man bé de ségiyo kéféginau gu begom, bérhéhé ku fo ké séfuleu mangéy diyaan.

I iray i Rémogor i Tuluse

12 ¹ I kéuyoto kuwe bérhéhé ku begom i fantage bé de iray i Rémogor i Tuluse. Do dumo gu, méuyotu de fo ké gésobuto kom i de ni. ² Bé gétahe, amun énda séna munur gom bé Jesuse, wén i ménféfengadaf begom bé de kéninontow. Atin sabaf bé ni, énggésala gom, fénéngadaf gom i de kéninontow, sani de énda méuyag. ³ Mélaw méuyotu de ké gétinga kom i ni. I étewe fémanduoy Rémogor i Tuluse, énda géfémulaa noy Jesuse. Brab énda soy étew gébéréh mano, “Jesusey Kadna kuwe,” saliyu bé fénémanduoy Rémogor i Tuluse.

⁴ Médoor gékélasiy de kéfurungon iray i Rémogor i Tuluse, éndob sébaan saén i tidéwo ruwe sani Rémogor i Tuluse. ⁵ Médoor gékélasiy kégalbéke, éndob sébaan saén i Kadnane galbékón. ⁶ Médoor gékélasiy de rigoné tom, éndob sébaan saén i Tuluse émférigo de dob betome kéluhanan. ⁷ I Rémogor i Tuluse niraya noy séngae ségétew betom bé sébaane kéfurungon inok fégétabang tom bé kéluhanay de dumo tom munur. ⁸ Non i Rémogor i Tuluse, irayén dob de dumo étew i kéfurunge émbéréh bé toowe kégétigan. Atin dob ségiyowe man étew, irayén i kéfurunge émfégésobut bé ménaléme kétoro. ⁹ Atin dob de ségiyo, irayén i émbagére kéunur. Atin dob de ségiyo, irayén i kégétigane muwa. Endob sébaan saén i Rémogor i Tuluse miray de. ¹⁰ Atin dob de ségiyo, irayén i barakate inok gérigo ro do mékégaif. Atin dob de ségiyo, irayén i kéfurunge muret bé kékéréh i Tuluse. Atin irayén dob de ségiyoy kéfurunge mégélolo bé barakate ké atiy tidéwo nuwe de, inok gétiga ro ké tidéw dob Tuluse loo ké tidéw dob Satanase. Atin irayén dob de ségiyoy kéfurunge sébéréh bé de séségiyo-giyo késébéréh énda séna gétiga ro de. Atin irayén dob de ségiyoy kéfurunge émfégésobut bé de ni do késébéréh. ¹¹ Atin fiyon fo ké médoor gékélasiy de kéfurungon irayén, sébaan saén i Rémogor i Tuluse miray de. Atin irayén saén dob séngae ségétew kétaya no iraya no de.

Maak lowoh

¹² I Kristowe ségiléw bé sébaane lowoh. Atin betomey maake réfa i lowoh Kristowe. Wén i do séségiyo-giyo kéfurungo tom ségiléw bé rigonéy de réfa i lowohe. Endob sébaan saén i lowohe. ¹³ I begome kéluhanan, do Judio taloo no do békén Judio, do rifén taloo no do békén rifén, sébaan saén i Rémogor i Tuluse ménautison betom. Mélaw ménwaléy tom maak sébaan lowoh fémanduoy Rémogor i Tuluse.

¹⁴ Sébaan saén i lowoh i ségétewe étew éndob médooy de réfaén. ¹⁵ Ufama, amuk émbéréh i sékéye mano, “Békénu réfa i lowohe non békénu kémér,” békén toow i nan. Non i sékéye, fiyon fo ké énda gégamakén loo bé kémére, réfa i lowohe soy beene. ¹⁶ Atin amuk émbéréh i kelingoe mano, “Békénu réfa i lowohe non békénu moto,” békén toow i nan. Non i kelingoe, fiyon fo ké énda gégito no loo bé motowe, réfa i lowohe soy beene. ¹⁷ Ufama, amuk i sébaane lowoh falan saén moto, énda gégélingoén. Atin amuk falan saén kelingo, énda gétéréhungén. ¹⁸ Endob énda lénimbag i Tulusey étewe loo bé nan. Non rénigo noy de séségiyo-giyo réfa i lowoh i étewe loo bé kétayay Tuluse de. ¹⁹ Mélaw amuk ségéréfa saén i lowohe, énda médawétén lowoh. ²⁰ Endob i toowe, médoor tom do réfa i lowoh Kristowe.

²¹ Mélaw i motowe énda gébéréhén dob kémére mano, “Enda kailanga ku beem.” Atin i uléwe énda gébéréhén dob sékéye mano, “Enda kailanga ku beem.” ²² I toowe, i de réfa i lowohe fégitungé tom do énda

fo toowén balilaga, beroy de toow fo do kailangan. ²³ Atin i de réfa i lowohe fégitungé tom do toow fo gérifantad, toowé tom fo talimaén. Atin i de dumo réfaén énda toowén fiyo, toowé tom féfiyonén bé kégale. ²⁴ Enda kailanga no rigonén dob de dumoy réfa i lowohe do fiyo falas. Non rénígoy Tulusey de lowoh tom inok talimaé tom i de réfaén karangé tom énda balilaga ro. ²⁵ Mélaw békén fatut sésinay de réfa i lowohe non rénígoy Tuluse bero inok sétabang ro. ²⁶ Atin amuk kédaŵétan i ségéréfae bé lowohe, kédaŵétan ro so kéluhanan. Atin amuk médayéw i ségéréfae de, méoror ro kéluhanan.

²⁷ Mélaw betomey lowoh Kristowe, brab kéluhana tom do réfa i lowoh ne. ²⁸ I betome do munur maak sébaan saén i lowoh tome. Atin niray i Tuluse dob séngae ségétew betom i kaane galbék. Fénémili i Tulusey de étew gémalbék loo bé ni. I sunguwe de, rénígo noy dumoy de étew do apostol. I géruwowe de, rénígo noy de dumoy de muret bé kékérénne. I gétéléwe de, rénígo noy de dumoy de témore. I de dumoy de rénígo no bero gétigan rémigo bé de mékégaif. I de dumoy de rénígo no bero gétigan muwa bé de démérūun. I de dumoy de rénígo no bero témaňabang bé de dumoy ro. I de dumoy de rénígo no bero do fiyo odoron. Atin rénígo noy de dumoy de furung sébérén bé séségiyo-giyowe késébérén énda gétiga ro de. ²⁹ Enda fakayén ké kéluhana tom do apostol, taloo no do muret bé kékérén i Tuluse, taloo no do témore, taloo no do rémigo bé de mékégaif. ³⁰ Enda fakayén ké kéluhana tom muwa bé de démérūun, taloo no gésébérén bé de séségiyo-giyo késébérén énda gétigano, taloo no émfégésobut bé de ni do késébérén. ³¹ Mélaw fatut ongoté kom dob Tulusey de kéfurungan toow fo balilaga.

Endob wén na foy toow de balilaga sani kégédawe.

I kégédawe

13 ¹ Fiyon fo ké gésébéréhu bé de séségiyo-giyo késébérén i de étew brab de télaki, éndob amuk énda mégédawu, énda i laga i kéfurung guwe non ségiléwu saén bé selekéné agung taloo no loo bé selekéné banting. ² Atin fiyon fo ké furungu témore bé kékérén i Tuluse, brab gésobuto kuy de ménalém kékérén tidew dob Tuluse, brab fiyon fo ké toowu fo gétigan, brab toow fo émbagér i kénur guwe inok géféaguwo kuy de tuduk, éndob amuk énda mégédawu, énda foy lanték gu. ³ Atin fiyon fo ké iray guy kéluhanay de languntama ku inok tabanga kuy de méskinan, brab iray guy lowoh guwe fétuwégu bé de étew, éndob amuk énda mégédawu, énda i baras gédoté ku.

⁴ I étewe mégédaw toow fo tingkélo noy de dumoy no. I étewe mégédaw rigoné noy fiyowe dob de dumoy no. I étewe mégédaw énda médaléwén bé de dumoy no. I étewe mégédaw énda félangka-langkaén taloo no fébantug-bantug. ⁵ I étewe mégédaw énda lémigis-ligisén. I étewe mégédaw énda arumé no. I étewe

mégédaw énda magadén mékérít. I étewe mégédaw magad fésagada noy de dumo no. ⁶I étewe mégédaw énda méororén bé tete. Yamula méoror bé fiyowe brab métintuwe. ⁷Atin i étewe mégédaw tingkélé noy kékérasaya nuwe ké tete i de rigonéy de dumo no dob beene. Fédayáé no sa bero. I étewe mégédaw, énda mékédan i késarig ne taloo noy inam ne bé fiyoy de rigonéy de dumo no étew.

⁸I de kéfurung émbéréh bé kékéréh i Tuluse, mékédan moso. I de kéfurung sébéréh bé de séségiyo-giyo késbéréh énda gétiga no, mékédan so moso. I kégétigane, mékédan so moso. Endob i kégédawe énda mékéda no. ⁹Non kulang sénay kéfurung tome émbéréh bé kékéréh i Tuluse brab de kégétiga tom. ¹⁰Endob amuk gumah i gaiwe iray i Tuluse betom i tintuwe fiyo, mékédan i de éntingayén do kulang.

¹¹Bé kéénga guwe séna émbéréhu loo bé ngae, brab i kéfégitung guwe, nga so. Endob amun ménwaléyun métuwa, ménkédanén i de adat gu loo bé ngae. ¹²Ségiléw so bé betome. Béleewe ni, i kégétiga tome brab kégésobut tome bé Tuluse, kloh saén. Ségiléw bé anlunge téngténgé tom dob rébure féngalungan. Endob amuk gégumah moso i gaiwe gito tomén foy Jesu Kristowe, gésobuto tomén i kéluhanane, ségiléw bé kéfégésobut i Tuluse de betom, békénén maak anlung.

¹³Mélaw télaw i éntingayéne énda mékéda no: kéunur, inam, brab kégédaw. Endob i toowe de fo imfortante, been i kégédawe.

I iray i Rémogor i Tuluse

14 ¹Mélaw fatut tom toow fo méuyot bé kégédawe bé de dumo tom. Atin fatut so méuyot tom bé de dumo do kéfurungon tidéw dob Tuluse. Labi-labi na foy murete bé kékéréh i Tuluse. ²I étewe sébéréh bé késbéréhe énda gétiga no, dob Tuluse saén sébéréh, békén dob étewe. Non énda gésobuto ro de. Béréhé no saén i de ménbunéy non fébéréh i Rémogor i Tuluse de. ³Endob i étewe muret bé kékéréh i Tuluse, ureté no dob de étew inok tabanga no bero émféégét bé de kéunur ro brab féginauné no bero, brab émféifiyo bé de fédew ro. ⁴I étewe sébéréh bé késbéréhe énda gétiga no, tabanga no saén i kaane lowoh. Endob i murete bé kékéréh i Tuluse, tabanga noy kéluhanay de munur mégélingo.

⁵Méuyotu de damén ké gésbéréh gom kéluhanan bé de késbéréh énda gétiga kom de, éndob toowu de na fo méuyot ké ureté kom i kékéréh i Tuluse. Toow na fo gérotor i étewe ureté noy kékéréh i Tuluse bé étewe sébéréh bé késbéréhe énda gétiga no, saliyu ké béréhé noy atag i bénréh ne inok gégéfiyono noy fédew i de dumo no munur. ⁶Mélaw do dumo gu, amuk gégumahu diyaan atin sébéréhu bé késbéréhe énda gétiga tom de, énda gétabanga ku begom. Toow na fiyo ké ureté ku begom i fénggitoy Tuluse begén, taloo no béréhé ku begom i de gétiga ku, taloo no ureté ku begom i kékéréh i Tuluse, taloo no toroé ku begom. Non amuk rigoné kuy de ni, tabanga ku begom.

⁷Ufama, fégitung gom i de baat. I faléndage taloo no fégérung, amuk i ségétéwe étew énda gétiga noy kéiyuf ne bé faléndage taloo no énda gétiga noy kékébit ne bé fégérunge, ati fanu-fanuy kégétigay de mégélingo de ké atiy linggengé nuwe. ⁸Atin amuk wén i sundalo iyufé noy témburiwe inok mangéy sétiboh i de dumo no, éndob énda fékéntayé noy kéiyuf ne bé témburiwe, ati fanu-fanuy kégésobut ruwe de ké fatut ro magayas mangéy sétiboh. ⁹Ségiléw so bé begome, amuk sébérélh gom bé késébéréhe énda gétiga kom de, énda mon i gésobut de. Mélaw énda i atagén brab énda i lagaén. ¹⁰Médooy de séségiyo-giyo do késébéréh dob duniiae ni, éndob wén i atag i séngae késébéréh. ¹¹Endob amuk énda gésobuto kuy késébéréh i dumo guwe séuret-uret, énda fo gésésobutan gey. ¹²Atin i begome, toow fo méuyot gom de ké gégédot gom bé de kéfurung tidew dob Rémogor i Tuluse. Endob fatut télama gom usar i de kéfurung émfébagér bé kéunur i de dumo gom.

¹³Mélaw i étewe furung sébérélh bé késébéréhe énda gétiga no, fatut démasal dob Tuluse mongot kégétigan émfégésobut bé atag i késébéréh ne dob de dumo no. ¹⁴Non amuk fédasaléy Rémogor i Tuluse begén dob késébéréhe énda gétiga ku de, moror i rémogor guwe fiyon fo ké énda gésobutoy itunga kuwe de ké atiy atag ne. ¹⁵Ati mélaw i fiyowe rigoné ku? Fatut fédayaé kuy Rémogor i Tuluse émfédasal begén dob rémogor guwe. Endob usaré ku soy itunga kuwe ké démasalu. Fatut fédayaé kuy Rémogor i Tuluse émfékanta begén dob rémogor guwe, éndob fatutu so kémanta dob itunga kuwe. ¹⁶Amuk i ségétéwe étew dayewé noy Tuluse bé rémogor ne saén, i de étew énda gétiga roy fantage bé ni kéfurung, énda fo gésobuto ro de. Mélaw énda géséfagayun ro maro, “Amen” non énda gésobuto ro de. ¹⁷Fiyon fo ké fiyoy késéfalamat ne dob Tuluse, énda géfébagéro noy kéunur i de dumo no.

¹⁸Fésalamatu dob Tuluse, non toow na fo gésébéréhu bé késébéréhe énda gésobuto ku de bé begome kéluhanan. ¹⁹Endob amuk sélimudu bé de dumo gu munur bé Kristowe inok méngintulus, toow na fo méuyotu sébérélh bé késébéréhe gésobutoy kéluhanane fiyon sétaga saén bé médoowe kékéraléh énda gésobuto ro de. Mélaw gétoroo kuy de étew.

²⁰Do dumo gu, kagom miring bé kékégitung i de nga. Endob iring gom i kékégitung i de nga fantag bé tetee non énda gétiga roy tetee. Saliyu na bé nan, iring gom i kékégitung i étewe gétigan. ²¹Wén i Ménsulate Kékéraléh i Tuluse mano, “Sugué ku mangéy dob de Judioy de étew ségiyoy de késébéréh ro tidew dob ségiyowe ingéd. Endob fiyon fo ké mérigoj ni, énda so fégélingoé ro Begén, bang i Kadnane.” ²²Mélaw i kéfurunge sébérélh bé késébéréhe énda gétiga no, niray i Tuluse inok i de énda munur gélolo ro tidew dob Tuluse. Endob i kéfurunge muret bé kékéraléh i Tuluse, niray i Tuluse inok émfébagér i kéunur i de munur.

²³Mélaw amuk sélimud gom do munur, atin sébérélh gom bé késébéréhe énda gétiga kom de, atin gégumah i étewe énda munurén

taloo no énda gétiga noy fantage bé ni kéfurung niray i Tuluse, manok bunég gom. ²⁴⁻²⁵ Endob amuk kéluhana kom muret bé kébérén i Tuluse, atin i étewe énda séna munurén bé Jesuse ménangéy témukaw begom, gésobuto noy késébérén gome. Mélaw waléy gétiga noy de salaén, atin gésénule. Mélaw lémingkuwéd méngadaf bé Tuluse brab émbérén mano, “Tulus i tintuwe mémanduon begom.”

²⁶ Mélaw do dumo gu, amuk sélimud gom méngadaf, fiyo ké wén i kémanta, brab wén soy témo, brab wén soy muret bé atiy féngitoy Tuluse de. Atin fatut wén soy émbérén dob séségiyo-giyowe késébérén énda gétiga no, brab fatut wén soy émfégésobut bé ni késébérén. Rigo gom i kéluhanay de ni émfébagér bé kéunur i de dumo gom. ²⁷ Atin amuk wén i gétigan sébérén bé késébérén énda gétiga no, fatut ruwo loo ké télén saén i rémigowe de. Atin fatut sétélés-télés ro émbérén. Atin fatut wén soy émfégésobut bé kébérén ruwe. ²⁸ Endob amuk énda i émfégésobut de, fatut mantés ro kéluhanan atin sébérén ro séden bé Tuluse dob de fédew ro. ²⁹ Atin fakay émbérén i ruwowe taloo no télén gétew étew muret bé kébérén i Tuluse. Brab i kéluhanay étewe fatut fégelingoé ro fo toow inok gétiga ro ké katabawan i kétoru ruwe taloo no békén. ³⁰ Atin amuk wén i ségétew bé de ménsar mégélingo, wén i féngitoy Tuluse de, fatut témérén i émbérén inok gébérén i ni étew. ³¹ Fakay kéluhana kom muret bé kébérén i Tuluse, endob sétélés-télés gom muret, inok métoro brab émféfiyoy fédew i kéluhanane. ³² I kéluhanay de étew nirayay Tuluse kégétigan muret bé kébérén ne, fatut séongot-ongot brab sétélés-télés ro muret. ³³ Non mikä i Tuluse ké mégukét i késélimud gome, yamula méuyot bé mélosoe.

Atin wén soy ni sugu gu begom, sani ségiléwe bé rigonéy de munur dob kéluhanay de ingéd. ³⁴ I de libun fatut féantés ro ké gai sélimud ro méngadaf, non énda fatutén ké émbérén ro. Non dob kitab i de Judio, i libune fatut saén mégélingo brab séodor-odor saén. Enda fakay ro méguléw. ³⁵ Atin amuk méuyot ro méganad, fatut ménginsa ro dob de bawag ro dob de lawi ro, non mémala ké émbérén i de libun ké sélimud gom dob simbaane.

³⁶ Kagom fégitungén de ké tidew saén dob begomey kébérén i Tuluse, taloo no makom ké begom saén i nirayan de. Toow fo békén i nan. ³⁷ Amuk wén i ségétew begom manok niray i Tulusey kébérén ne, look wén i kéfurunge tidew dob Rémogor i Tuluse, fatut magayun bé do sugu i Tulusey de ni kétoro sulaté ku dob begome. ³⁸ Atin amuk wén i étew énda modorén bé ni sulat, kagom fégelingoén de.

³⁹ Mélaw do dumo gu, fatut méuyot gom muret bé kébérén i Tuluse. Endob kagom fétérenén i étewe émbérén dob késébérén énda gésobuto no de. ⁴⁰ Endob fatut féfiyo gom i de adat gom brab fétanék gom ké sélimud gom méngintulus.

Fantag bé kétébule Kristowe

15 ¹Atin béeewe, do dumo gu, fefégétédém gu begom i Fiyowe Uret nuret gun begom bé do getah. Bé bénor tintu ménunur gom bén ni Fiyo Uret fantag bé Jesu Kristowe taman so béeewe ni. ²Non i Fiyowe Uret nuret gu dob begome, been i mémukase begom tidew dob de sala gom. Non énda kukuméy Tuluse begom amuk démayday gom munur. Non amuk énda fédayday gom, békén gom tintu munur.

³Atin i Fiyowe ni Uret, ténero gu begom i ténero begén. Toow fo gérotor i ni kétoro. I Kristowe ménléhu génantino no betom inok énda mékukum tom sabaf bén de sala tom. Been soy kéuret i Ménsulate Kébérél i Tuluse. ⁴Atin lénébeng i Kristowe brab méntébule dob gétéléw ne gétérésang loo bén kéuret i Ménsulate Kébérél i Tuluse. ⁵Tidew bén, méntéfégito dob Pedrowe. Tidew bén, méntéfégito dob kéluhanay de folo bra ruwo kuyugén. ⁶Tidew bén, méntéfégito dob labiwe limo ratuh do dumo tom munur amun ménlimud ro. I kédoono ruwe méuyag ro séna béeewe ni, éndob i de dumo bero ménléhu ron. ⁷Tidew bén, méntéfégito dob Santiagowe. Tidew bén dob kéluhanay de apostol.

⁸Atin amun gilid méntéfégito dob berowe, méntéfégito so dob begéne énggáfuray. Atin ménunuru maak ségétewu nga ménfégés i kéumah ne. Non fiyon fo ké mikau de munur, fén-unur i Tuluse so begén. ⁹Atin begéne foy toowe gérifantad bén kéluhanay de apostol, non amun énda séna munuru de, toow fo fénrasay guy kéluhanay de munur bén Jesuse. Mélaw énda médaitu fédawétén apostol. ¹⁰Endob sabaf saén bén kégédaw i Tuluse, fénwaléyén begén apostol. Atin non bén kégédaw ne, wén i fiyowe ménrigo. Non toow na mégéror i kagéne galbék bén de dumo do apostol. Endob békén begén i gémalbék. Yamula tabangay Tuluse de begén. ¹¹Atin ulanden ké énggelingoo kom i Fiyowe Uret tidew dob begéne look tidew dob de dumo gu apostol. Non ségiléw i de kétoro gey. Atin been i nan i nunuro kome.

Fantag bé kétébule i de munur

¹²Atin ay niy ténero guwe begom: Méntébule i Jesu Kristowe. Mélaw sedek i de dumo begom émbérél bén énda kun fakayén tébule i de ménléhu moso? ¹³Non amuk énda fakay tébule i de ménléhu, fiyon i Kristowe énda séna méntébuleén. ¹⁴Atin amuk énda méntébule i Kristowe, énda foy lanték i kétoro geye brab énda i funa tom munur. ¹⁵Atin békén saén i ni, non amuk loo bén nan i begeye, do tugién gey sébanil bén Tuluse. Non begey i ménbéréhe bén féntébule i Tulusey Kristowe. Mélaw tugién gey amuk énda tébule i de ménléhu, loo soy Kristowe. ¹⁶Non amuk énda tébule i de ménléhu, énda so tébule i Kristowe. ¹⁷Atin amuk énda méntébule i Kristowe, énda i lanték i kéunur

gome. Mélaw énda séna mékédan i de sala gom brab mékukum gom.
 18 Atin amuk énda i kétébule, i de ménléhu do munur bé Kristowe, énda man méuyag ro, yamula mékukum ro so. 19 Atin amuk i inam tome bé Kristowe taman saén dob kéléhu tome, toow tom fo mékégédaw-gédaw bé kéluhanay étewe.

20 Endob i toowe, méntébule i Kristowe. Mélaw gétiga tom tébule soy kéluhanay de ménléhu. Non Beeney sunguwe saén méntébule. 21 I funay kéluhanay étewe méléhu non ménsala i sunguwe étew, sani Adame. Atin i funay kéluhanay étewe tébule, non bé rénigoy ségétéwe sani Jesuse.

22 I kéluhanay kéilawane méléhu non énggédot tom i kéléhue tidéw dob katufua tome Adam. Atin ségiléw so bé ni, i kéluhanay munure bé Kristowe tébule, non énggédot roy umule énda i tamana no tidéw dob Beene. 23 I sunguwe méntébule inok méuyag taman sa taman, Been i Jesu Kristowe. Tidéw béo, do betom kuyugén i gétunduge tébule dob gaiwe séfule moso. 24 Tidéw béo dob tamfaday de gai, i Kristowe tabana noy kéluhanay de méguléw do sébanil dob Tuluse. Binasané noy atura ruwe brab barakat ruwe. Atin irayén i kékéulgéwe dob Tuluse Abayén. 25 Non i Kristowe kailanga noy méguléwe taman tabanay Tulusey kéluhanay de sébanil de. 26 Atin i toowe fo géfuray tabana Jesuse sébanil dey kéléhue. 27-28 Non wén i Ménsulate Kébéréh i Tuluse mano, “I Tuluse rigoné noy Kristowe méguléw bé kéluhanane.” Mélaw féguléwo Kristowey kéluhanane saliyu saén bé Tuluse, non Been i ménféguléwe bé Kristowe. Atin amuk Kristoy méguléwe bé kéluhanane, tidéw béo féguléwén bé Abay ne Tuluse i Beene. Mélaw Kristowey méguléwe bé kéluhanane, brab Tulusey méguléwe bé Kristowe brab kéluhanane so.

29 Amuk énda i kétébule i de ménléhu, ati funay de étew fébautis gémanti bé de ménléhu? 30 Atin amuk énda i kétébule, sedek fédayday gey rémigo bé galbék i Tuluse béní ké kakaidan gey sénga tékélid? 31 Do dumo gu, i de sébanil bé Tuluse, sénga fuweh i kéuyot ruwe méméléhu begén. Atin gétigay Tuluse toow i ni loo bé kéooow i kéroror guwe sabaf bé kénur gome bé Kadna tome Jesu Kristo. 32 Toowu fo kérégénan dob ni ingéd, Efeso. Non i de sébanil begén maak do mérayar binatang méuyot ro begén méméléhu. Mélaw amuk énda i kétébule, énda i funa ku gémalbék. Amuk énda i kétébule, modoru bé kékéréhe mano, “Mama tom, brab miném tom brab méguyaya tom béleewe ni, non démo méléhu tom.”

33 Ingat gom inok énda munur gom bé éndae toow. Non amuk séloyuk gom bé de étew do tete i de adat ro, waléy gom de géiring. 34 Féfiyo gom i de adat gom, brab tagak gom i de tete rigoné kom. Fatut mémala gom non wén i do dumo gom énda gétiga roy toowe kétoro fantag bé Tuluse.

35 Endob amuk wén i ménginsa mano, “Ati kékéingé-fingé i kékétbule i Tuluse bé de ménléhu? Brab ati falas i lowoh ruwe?” 36 Ay niy késumbul

guwe de. Toow fo dufang i da nan kékénginsa. Non i bénee lélébengén dob fantade ké ohokén. Tidew béno, méuyag. ³⁷Amuk mohok gom, énda ohoké kom i dakéle idéng kayéw, yamula ohoké kom i bénee saén. ³⁸Tulusey méniraye bé lowoh i bénee loo bé kétaya nuwe de. Atin i séngae klase béne wén i kaan mantu lowoh ké mérükén.

³⁹I kéluhanay de lénimbag do mérénawa, séségiyo-giyoy de lowoh ro. I kéilawane ségiyoy lowoh ne. I de binatang ségiyo soy de karo lowoh. I de kloh manok brab do sédo ségiyo soy de lowoh ro.

⁴⁰Wén i do séségiyo-giyo do lowoh dob lawayo brab dob fantade. Atin i kéluhanay de lénimbag i Tuluse, falan fiyoy de falas ro. Endob énda ségiléw i kéfiyoy de lowoh dob lawayo brab de lowoh dob fantade. ⁴¹Ufama, fiyoy falas i de solo dob lawayo éndob békén ségiléw. I térsange ségiyoy falas ne, i térsang kélungonone ségiyo soy kaane falas, i de gitoon ségiyo so. Fiyon i de gitoon énda kéluhana ro ségiléw i de falas ro.

⁴²Ségiléw so bé niy kétébule i de ménléhu. Non amuk ménlébengén i ménléhue, mébinasay lowoh ne. Endob amuk méntébuleén, éndaén mébinasay lowoh ne non mantu nén brab méuyag taman sa taman.

⁴³Amuk ménlébengén i bangkaye, teteén i falas ne brab éndaén i bagérén. Endob amuk méntébuleén, toowén fo fiyoy falas ne brab émbagérén. ⁴⁴I bangkaye lénébeng, tidew dob fantade ni. Endob féwaléyéy Tuluse mantuy lowoh ne inok médait ro méuyag beroy Tuluse taman sa taman. Mélaw amuk wén i lowoh médait dob duniiae ni, wén soy lowoh médait dob lawayo. ⁴⁵Non wén i Ménsulate Kébéréh i Tuluse mano, "I sunguwe étew, sani Adame, nirayay Tuluse férénawa inok méuyag dob duniiae ni." Endob i Kristowe, sani féndawéte "Géruwowe Adam", Been i miraye bé umule magufusa inok méuyag tom taman sa taman dob lawayo. ⁴⁶Békén i umule dob lawayoy énggéétahe, non énggéétahe i umule dob duniiae ni. ⁴⁷I Adame, sani sunguwe étew, ménlimbag bé fantad i duniiae ni. Endob i Kristowe, sani maake géruwo Adam, tidew dob lawayo. ⁴⁸I kéluhanay kéilawane, ségiléw i lowoh ruwe bé Adame tidew dob fantade. Endob i kéluhanay waléye kuyug Kristowe, ségiléw moso i lowoh ruwe bé Kristowe dob lawayo. ⁴⁹Amuk kéluhana tom ségiléw bé Adame tidew dob duniiae, gégumah so moso i gaiwe waléy tom so ségiléw falas bé Kristowe tidew dob lawayo.

⁵⁰Do dumo gu, ay niy atag i bérhéhé kuwe begom. I de lowoh tom ni méléhu non énda géahurén dob lawayo. I loowe bé ni lowoh, énda gédoté noy umule magufusa.

⁵¹Fégélingo gom i ni ménbunéy fénggétigay Tuluse begén. Enda kéluhana tom méléhu, éndob méfégalin i de lowoh tom bé de mantu lowoh. ⁵²Toow fo magad i kékéngali nuwe, loo bé ségulee kémérék-mérék i motowe, ké émbéréh i toowe géfuray témburi. Atin modor so ké fébéréh

i Tulusey ni témburi, i kéluhanay de ménléhu tébule ro. Atin i de lowoh ro émfégalin inok éndaén méléhu ro, non mélouwas tom kéluhanan.

⁵³ Non i tafaye lowoh fatut mélouwas inok éndaén méléhuén. Fatut émfégalin i mébinasawe lowoh inok éndaén mébinasa no. ⁵⁴ Atin amuk ménfégalinonén i tafaye lowoh bé mantuwe lowoh éndaén méléhuén, bé béno métumanén i Ménsulate Kébéréh i Tuluse mano, “Endaén i méléhu non kénday Tuluse nén non ténaba nonén.” ⁵⁵ Mélaw éndaén mégilak tom méléhu non éndaén i kéléhu. Atin éndaén i funan émbuku bé kéléhue non méntabananén. ⁵⁶ I funa nuwe wén i kéléhu non ménalsa tom. Atin i funa nuwe ménalsa tom non énggéliso tom i kukumay Tuluse. ⁵⁷ Endob fésalamat tom bé Tuluse non bé rénigo nuwe. Non éndaén mégilak tom bé kéléhue non fénukasén betom sabaf bé rénigoy Kadna tome Jesu Kristo.

⁵⁸ Mélaw, do dumo gu do kégédawa ku, fébagér gom i késarig gome bé Kadnane inok énda mékédano. Fégéror gom dob galbék i Kadnane. Non gétinga tom énda mésinggula i galbék tome, amuk rigoné tom kay Kadnane.

I tabange kay de munur dob Jerusalem

16 ¹ Atin wén i ségiyowe sugu gu begom. Fatut timu gom kurta fégétabang gom bé de dumo gom munur bé Jesuse dob Judea. Sénugu gu soy ni dob de munur dob ingéde Galasia. ² Sénga Dumingga, fatut témafay i séngae ségétew begom bé atiy iray ne dob Tuluse. Fatut iray gom dob Tulusey baade gédoté kom. Itong gom inok amuk gérumahu diyaan, éndaén kailanga kom i téminue. ³ Atin amuk gérumahu diyaan, sugué kuy de étew fénemili gom mangéy dob Jerusalem inok uwité roy de iray gom. Atin émféuwitu so do sulat émfégétigan bé de étew dob Jerusalem fantag bé kétabang gome. ⁴ Atin amuk kailanga ku soy magéwe mangéy dob Jerusalem, féodoré ku bero.

I bantak Pablowe

⁵ Mangéyu diyaan ké gilidu nén téménara dob ingéde Masedonia. Non métahu mangéy diyo. ⁶ Atin amuk gumahu dob begome, batiu na keey diyaan firoy gétérésang kélungonon look taman gilid i basa barate. Atin amuk tausu magéw, fiyo ké tabanga kom begén bé kéagéw guwe dob atiy ayo kuwe. ⁷ Non énda méuyotu mawét diyaan ké magadu de saén. Yamula méuyotu de damén ké batiu na diyaan bé firoye gétérésang kélungonon, amuk fakay dob Kadnane.

⁸ Endob batiu na dob Efesowe ni taman gilid i kandulie féndawét Pentekostes. ⁹ Non dini médooy de méuyot mégélingo bé Fiyowe Uret toroé ku. Endob médooy sébanile de begén.

¹⁰ Atin i Timoteowe, amuk gérumah diyaan, fégédaw gom de brab tayakuf gom. Non gémalbék so kay Kadnane, ségiléw bé begéne. ¹¹ Atin

énda fatutén ké siyawé kom. Yamula fégadata kom atin amuk taus i kéagéw ne séfule mangéy dob begéne, fatut tabanga kom. Non ongot-ongoté ku beroy de dumo no munur.

¹² Atin fantag man bé dumo tome Apolos, féngginau gu fo bé angéyé no begom tukawén diyaan beroy de dumo no munur. Endob miká séna mangéy diyaan béleewe. Yamula mangéy fo kun diyaan ségiyo gai.

¹³ Fatut mingat gom, brab fédayday gom i kéunur gome bé Jesuse. Kagom mémala fantag bé kéunur gome. Yamula fébaraw gom brab fébagér gom. ¹⁴ Atin fiyon atiy rigoné kome, fégédaw gom.

¹⁵ Gétiga kom i fantage bé Stefanase brab de dumo no ségélawi. Beroy de sungu ménunur bé Kristowe dob Akaya. Toow ro fo mégéror témbang bé de dumo ro munur. ¹⁶ Mélaw, méuyotu ké fidaya gom i kéféguléw i de étew loo bé beene brab kéluhanay étewé mamung bé karowe galbék.

¹⁷ Toow fo mororu bé kégumah ro Stefanase, brab Fortunatowe brab Akaikowe dini. Non té nabang ro begén bé kégundoy guwe begom.

¹⁸ Fénfiyo roy fédew guwe loo bé késéfiyo ruwe bé de kagom so fédew. Mélaw fatut fégadata kom i de étew loo bé nan.

¹⁹ I de munur dob kéluhanay de ingéd dob Asia ségifaé ro begom kéluhanan. I ro Akilawe brab Prisilawe, toow ro fo ségifaén so begom sabaf bé Kadnane. Loo soy de munur sélimud dob lawi ruwe, ségifaé ro so begom. ²⁰ Atin i kéluhanay de dumo tom munur dini, ségifaé ro so begom.

Fatut fégito gom i kégédaw gome amuk ségifaén gom.

²¹ Taman saén dob niy béréhé kuwe begom. I begéne, Pablo, sulaté kuy ni géfuray kékéréh bé kagéne kémér. Ségifaé ku so begom.

²² Amuk wén i do énda émféimu bé Kadnane, kukuméy Tuluse damén bero. Séfuleén damén i Kadnane. (Maranata.)

²³ Atin fétauséy Kadnane Jesus damén i kégédaw ne begom.

²⁴ Toowu fo méimu begom sabaf bé kéunur tome bé Jesu Kristowe.

Pablo

I Géruwowe Sulat Pablowe dob de Munur bé Kristowe dob Korinto

Ay niy sébaane bé de sénulat Pablo, sani ménbantuge muret fantag bé Jesu Kristowe. I ni sulat, been i niy géruwowe sulat sénulat Pablowe dob de munur do bati dob ingéde Korinto. Dob sunguwe sulat Pablowe, téneroén i de étew bé ati fatute rigoné ro. Atin dob ni géruwo sulatén, bénréh Pablowy kéror ne sabaf bé kéodor ruwe bé ni kétoro.

Diyo dob Korinto, wén i do étew ménbérédéh bé békén kun tintu apostol i Pablowe. Mélaw dob ni so sulat, bénréh Pablowy funa nuwe toow fo tintu apostol, non toow fo mégotor lémégéb bé Fiyowe Uret fantag bé Jesu Kristowe. Mégotor gémalbék, fiyon fo ké toow fo mérásay sabaf bé kéuret ne ni.

1 ¹Begéney Pablowe, ségétew apostol sénugu Jesu Kristowe non been i galbéke kétayay Tuluse rigoné ku. I begeye Timoteowe, ségétew so dumo gu munur bé Jesuse, sulata key begom do munur dob ingéde Korinto brab dob kéluhanay de ingéd dob Akaya.

²I Tuluse Abay tom brab Kadnane Jesu Kristo mégédaw damén begom brab iray ro damén begom i métanéke fédew.

Fésalamat dob Tuluse

³Fatut tom fésalamat bé Tuluse sani Abay i Kadna tome Jesu Kristo. Toow fo mégédaw i Abaye Tulus, atin Been i tidéwoy kéluhanay tabange. ⁴Tabanga no betom dob kéluhanay de kérégéno tom inok gétabanga tom soy de dumo tom amuk kérégénan ro fiyon ati klasi nuwe. Iraya tom so bero tabang loo bé tabange niray i Tuluse betom. ⁵Non amuk toow fo mérásay tom loo bé Kristowe sabaf bé kéunur tome de, gédoté tom soy tintuwe kétabang tidéw dob beene. ⁶I funa keye téférásay inok gédoté kom i tabange brab inok méfukas gom bé de sala gom. Atin amuk métabangan gey, métabangan gom so brab gédoté kom i bagére inok géfedayday gom témingkél bé de kérégénon ségiléw bé begeye. ⁷Atin i késarig geye begom, méégét non gétikeye amuk mérásay gom ségiléw

bé begeye sabaf bé kéunur gome bé Kristowe, tabangay Tuluse so begom ségiléw bé kétabang ne begey.

⁸Do dumo gey, méuyot gey de ké gétiga kom i fantage bé kérasay geye dob ingéde Asia. I de étew diyo, toow fo fénrasay ro begey, atin mélaw makey ké éndaén méuyag gey. ⁹Makey ké méléhu geyén bé beno. Endob ménrigoy ni inok énda sémarig gey bé kageye lowoh, yamula fatut sarigo key saén i Tuluse sani témébulee bé de ménléhu. ¹⁰Ténabangén begey dob de makakaid inok énda méléhu gey sabaf bé de makakaid. Atin gétiga key tabangé no begey sénga tékélid. Sémarig gey bé énda téréno noy kétabang ne begey. ¹¹Atin fatut tabanga kom begey bé de kédasal gom, inok médooy étewe fésalamat dob Tuluse non bé tabange nirayén begey sabaf bé kédasal i de médooy étew.

¹²Do dumo gey, wén i funa key fidayéw-dayéw, brab gétiga key toow fo toow i ni. Fiyoy de rénigo gey dob begome brab dob kéluhanay de étew, non modor gey bé kétayay Tuluse. Atin tabangay Tuluse begey inok bérhé key i fiyowe brab towe, békén dob kageye kégétigan éndob sabaf saén bé kégédaw i Tuluse. ¹³⁻¹⁴Sulata key begom bé gébasana kome brab gésobuto kom. Méuyotu de damén ké gésobuto komén fo toow i de énda séna énggésobuto kom toow béleewe ni inok bé gaiwe séfule i Kadnane Jesus, moror gom sabaf bé begeye atin i begeye moror gey so sabaf bé begome.

¹⁵⁻¹⁶Atin non gétiga ku fo toow gésobuto kom i ni, bénantak guy mangéye sémugud dob begome sungu bé do gétah bé kéangéy guwe dob ingéde Masedonia. Atin bénantak gu soy mawéte man ké séfuleu inok gétabanga ku begom ruwo gule, brab gétabanga kom so begén bé kéagéw guwe mangéy Judea. ¹⁷Endob énda énggérígono kuy ni. Mélaw makom keeyén ké mífegalín i itunga kuwe sénga tékélid. Brab makom keeyén ké ségiléw i kífégitung guwe bé de étew dob duniyae ni énda sarigon ro non magad fo fégaliné roy de itunga ro. Békén loo bé nan. ¹⁸Bérhé ku begom i towe, ségiléw bé kétoow i Tuluse, tintu fo bénantak guy rigoné kuy fénasad guwe begom. ¹⁹Non témélamawu miring bé Jesu Kristowe Nga i Tuluse, sani ureté keye begom ro Silase brab Timoteowe. Non i Jesuse énda magad fégaliné noy itunga nuwe. Yamula tumané noy kéluhanay de bérhé no. ²⁰Non i Jesusey téménúmane bé kéluhanay fénasad i Tuluse. Been i niy funa tome émbéréh “Amen” (i atag ne “toow”) fantag bé kóbéréh i Tuluse inok médayéw i Tuluse. ²¹I Tuluse, Beeney émféégeité bé kéunur tome bé Kristowe inok tintu tom do dumo no. Atin Tulus soy ménémilie betom. ²²Brab téndaaa no begey inok gélolon Beeney gefee begey. Atin nirayén betom i Rémogor ne batí dob de fédéw tom inok fégétiga no betom i irayén i kéluhanay fénasad ne.

²³Amuk énda toow i bérhé kuwe begom, kukuméy Tuluse damén begén. Gétiga roy funa kuwe énda ménangéy diyan dob Korinto inok

énda géadowoyo ku begom. ²⁴ Enda méuyot gey sémugu begom ké ati fatute unuro kom. Non gétiga key méégétén i kéunur gome bé Kristowe. Yamula sétabang tom gémalbék inok toow gom na fo moror.

2 ¹ Atin do dumo gu, toow fo fénggitung gu bé énda mangéyu diyaan amuk féteteé ku saén i de fédew gom ségiléw bé gétaho. ² Non amuk féteteé kuy de fédew gom, ati émféfiyowe bé kagéne fédew? Enda, non énda géfifiyono kom i fédew guwe amuk fétete guy de fédew gom.

³ Beeniy funa kuwe séménulat dob begome bé do gétah. Ménikau mangéy dob begome, non i begome fatut damén féororé kom begén. Endob amuk ménangéy diyaan bé bénou, fétete gom saén i fédew guwe. Gétiga ku fo toow, amuk mororu, moror gom so. ⁴ Amun sénulata ku begom, toow fo tete i fédew guwe brab émbukuu brab énggékérewu. I funa kuwe sémulat békén ké féteteé kuy de fédew gom. Yamula inok fégétiga ku begom i toowe kéimu gu begom kéluhanan.

Kéfésagad bé ségétéwe ménsala

⁵ I étewa nan ménsala diyaan, énda féteteén i fédew guwe, yamula féteteén i de fédew gom, taloo no de fédew i de dumo saén begom. Non énda méuyotu de ké fékélébuwanén i kédusawe de bé ni kékérén gu.

⁶ Katabuwanén i kékukum i kédoono kome de. ⁷ Atin béleeewe ni, fatut fésagad gomén brab féfiyo gom i fédew ne, non amuk énda, mékedan keeyén i késarig ne bé Tuluse sabaf bé kélébuwan i kétete i fédew ne.

⁸ Mélaw, ongoté ku begom bé fégétiga kom dey toow i kéimu gome de.

⁹ I funa kuwe séménulat dob begome bé gétaho inok téngkadé ku begom brab inok gétiga ku ké modor gom bé kéluhanay de sugué ku begom.

¹⁰ Atin amuk fésagadé kom i ségétéwe étew, fésagadé ku so. Atin amuk wén i ménsala, fésagada ku inok moror gom. Gétiga Kristowe tintu fo fésagadé ku. ¹¹ Atin i funa kuwe rémigo bé ni, inok énda lifulé Satanase betom. Non gétiga tomén i teteet bantakén.

¹² Amun énggumahu dob ingéde Troas inok muretu bé Fiyowe Uret fantag bé Kristowe, énggito gu ténafoy i Kadnaney agéwo kuwe bé galbék guwe diyo. ¹³ Gido loo, toow fo ménbukuu non énda énggito gu diyo i dumo tome munur Tito. Mélaw ménggétawu dob de étew diyo, atin méntausu magéw mangéy dob ingéde Masedonia.

¹⁴ Endob toowu fo fésalamat bé Tuluse. Non sabaf bé kéunur tome bé Kristowe, fétengténgén betom dob kéluhanay de étew inok fégétiga noy barakat ne. Mélaw sabaf bé betome, wén i de étew dob kéluhanay de gonon gétiga roy fantage bé Kristowe. ¹⁵ Maak do dukah tom ténuwég Kristowe brab ténlakén dob adafay Tuluse. Atin i amut ne mélégéb dob de étew do ménfukas brab dob de étew so énda méfukas ro. ¹⁶ Dob de étew énda munur bé Kristowe, maak ahu ménléhu i kétoro tome fantag

bé Fiyowe Uret, non mékukum ro sabaf bé nan kétoro. Endob dob de étew munur dob Kristowe, maak mamut i kétoro tome non fégétiga no bero bé iray i Tuluse beroy umule magufusa. Toow fo Fiyoy Urete ni. Mélaw énda i étew tintu médait lémégéb de. ¹⁷Endob i begeye, énda ségiléw gey bé de ségiyo do témore. Non i berowe, ureté roy kékérén i Tuluse inok gédoté roy kurtae. Endob sabaf Tulus i séménugue begey, gétiga no ureté key i toowe, non begey i do sugu-sugué Kristowe.

I mantuwe aguwon

3 ¹Ati kéfégitung gome de, aw félangka-langka geyén man fantag bé de ni? Enda. Enda ségiléw gey bé de ségiyo témore kailanga ro nay sulate tidéw dob de ségiyo étew émfégito bé kuwagib ruwe témore inok tayakufé kom bero. Atin kailanga ro soy sulate tidéw dob begome amuk mangéy ro témore dob de ségiyo. ²Endob i begeye, énda kailanga key i de sulat loo bé nan. Non i kéunur gomey maake sulat ménusulat dob de fédéw gey inok gétigay kéléhanay de étew i fantage bé de kétoro gey. ³Atin gétiga roy begom i de maak do sulat tidéw dob Kristowe, fénsamfayén dob begeye. Atin i fénggésulate de békén tinta, yamula Rémogor i méuyage Tulus i fénggésulate de. Atin i sulatane de békén do batéw loo bé kitabe niray Moisese, yamula i de fédéw gey i sulatane de.

⁴I funa keye gébérén loo bé ni non sémarig gey bé Tuluse, sabaf bé Kristowe. ⁵Enda gébérén key de ké kagey kégétigan i funa keye gérito bé ni galbék. Non Tuluse saén i funa keye de gérito. ⁶Tulus i ménirayane begey kégétigan inok gétoroo key i mantuwe agéwon. Atin i mantuwe ni agéwon, békén nirayén begey i kitabe, yamula nirayén begey i Rémogor i Tuluse. Non amuk sémarig tom bé kéodoro tome bé kitabe niray Moisese, méléhu tom. Endob amuk sémarig tom bé Rémogor i Tuluse, irayén i mantuwe umul magufusa dob betome.

⁷Bé do gétah, amun sénulat i Tulusey kitabe dob de batéw, fénggito noy barakat ne. Amun énggito Moisesey kéréndaw i Tuluse, réménéndaw soy kaane falas, funay de Judio énda gétengteng de, fiyon fo ké ménlumén i kéréndaw ne. Mélaw amuk loo bé nan i barakat i kégumah i kitabe muwit kéléhu, ⁸toow na fo fiyoy rigonéy Rémogor i Tuluse. ⁹Amuk barakatan i galbéké kémukum bé de étew, labi na fo dakél i barakat i galbéké émfétintu bé de étew. ¹⁰Mélaw i kitabe toow fo barakatan bé gétaho, éndob éndaén i barakatén béleewe ni. Non béleewe ni, wén na foy toow barakatan tidéw bé beene. ¹¹Non amuk barakatan i kitabe wén i tamana no, labi na fo barakatan i mantuwe agéwon énda i tamana no.

¹²Atin sabaf bé ni késarig tom bé énda mékédan i ni, toow tom fo émbaraw muret. ¹³Enda ségiléw tom bé Moisese ténlébén i falas ne inok énda gitoy de Judioy kékélum i kéréndaw ne taman mékédan. ¹⁴Endob toow fo métégas i de uléw i de Judio. Mélaw taman so béleewe ni

méntéléb so tafay i de kégésobut ro. Météléb i de kégésobut ro amuk gébasana roy kitabe sani tafaye agéwon. Endob amuk wén i ségétew bero waléy dumo Kristowe sabaf bé kéunur ne de, mékedanén i kétéléb i itunga nuwe brab toow fo gésobuto no. ¹⁵Taman so béleewe ni amuk basané roy kitabe tidéw dob Moisese, météléb i de itunga ro. ¹⁶Endob amuk munur ro bé Kadnane, mékedan i kétéléb i de itunga ro. ¹⁷I Kadnane ni ménlabit, Been i Rémogor i Tuluse. Atin i étewe bat i Rémogor i Tuluse dob beene, ménfukas dob kitabe, non éndaén kailanga no modor de inok méfukas bé de salaén. ¹⁸Mélaw i kéluhanay tome do munur bé Kristowe, giton i anlung i kérédaw i Kadnane dob falas tome, non énda météléb i de kéfégitung tom. Non giton i mantuwe adat tom miring bé Kristowe. Non i Rémogor i Tulusey mégaline betom loo bé kéfiyoy Kadnane. Mélaw minut fiyo miring bé Kadna tome Jesu Kristo.

4 ¹I Tuluse mégédaw begey, atin mélaw fénémilién begey inok rigoné tom i ni galbék. Mélaw énda mékedan i kéror geye bé galbék geye. ²Dénigur gey i de tete brab de ménbunéy do rigonén toow fo do mémálama. Enda témugi gey brab énda fégaliné key i kékérédaw i Tuluse. Yamula bérhé key i tintuwe fo toow inok i kéluhanay étewe gétiga ro do métintu gey, brab inok gétigay Tuluse so. ³Non amuk ménbunéy i Fiyowe Uret ureté key, ménbunéy saén dob de étew énda méfukas ro dob de sala ro. ⁴Enda munur ro non ténléb Satanasey kéfégitung ruwe. Been i féngadaféy de étew dob duniyae ni. Télébé noy de kéfégitung ro inok énda gito roy kégéfekaya i Fiyowe Uret fantag bé kégérotor Kristowe, sani tintuwe anlung i Tuluse. ⁵Non énda muret gey inok waléy gey émbantug. Yamula ureté key i Jesu Kristowe, Been i Kadnane, inok Been i waléye émbantug. Atin ureté key bé begeyey témabangane begom inok médayéw i Jesuse. ⁶Amun lénimbag i Tulusey kéluhanay éntingayéne, ménbérédéh mano, “Mékedan damén i délémone brab waléy wén damén i gégékaya.” Been soy émfégéfekayaé bé de itunga tom inok gésobuto tom i kéfiyoy Tuluse fénténgtengén dob Jesu Kristowe.

⁷Endob i de betom, maak do binangga tom saén nahuron drantung inok giton i barakate dob de lowoh tom békén katom, yamula kay Tuluse. ⁸Démoyun gey mérásay éndob énda méntabanan gey. Wén i do no, énda gésobuto key de, éndob énda mékedan i kéunur geye de. ⁹Médooy de sébanil begey, éndob énda tagakéy Tuluse begey. Wén i no fédawéto ro begey, éndob énda mébinasa gey. ¹⁰Ségiléw gey bé Jesuse non sénga téklid médooy de mérarék begey, brab méuyot ro méméléhu begey. Mélaw giton i kéuyag Jesuse béleewe ni non Been i témabangane begey. ¹¹Amuk méuyag gey séna, démoyun gey gédét damén méléhu sabaf bé kékuret geye fantag bé Jesuse. Mérigoi ni inok giton i Jesuse méuyag non tabanga no begey démoyun. ¹²I funa keye démoyun kakaidan non

bé kéuret geye fantag bé Jesuse. Endob ulandenén, non been i niy funa kome gégédot bé umule magufusa.

¹³ Wén i Ménsulate Kébéréh i Tuluse mano, “Ménunuru de, mélaw bérhéh ku.” Ségiléw so bé begeye, non munur gey de, mélaw bérhéh key.

¹⁴ Non gétiga key i Tuluse sani téménébulee bé Kadnane Jesus, tébuleé no so begey brab begome brab féangéyé no betom dob adafa nuwe dob lawayo. ¹⁵ Atin i funa keye téférasay inok gédoté kom i de kéfiyonon. Atin bé lala ne minut médooy gégédote bé kégédaw i Tuluse, waléy so médooy de fésalamat dob Tuluse inok toow fo médayéw.

¹⁶ Been i niy funa keye énda mékédan i kéror geye gémalbék. Non fiyon fo ké démoyun gey waléy lukés brab minut mélubay i lowoh geye, fébagéréy Tulusey kéunur geye sénga fuweh. ¹⁷ Atin i de kérasay gey béléewe do kloh saén brab mékédan so moso. Atin sabaf bé de kéfédayday gey bé de ni kérégénon, toow na fo médayéw gey dob lawayo diyo moso, brab énda téméréno Mélaw toow na fo dakél i ni moso bé de kérégénon béléewe. ¹⁸ Non i de gulaané key békén i de éntingayén giton dob duniyae ni. Yamula toow gey fo méuyot bé de éntingayén do énda gito no. Non i de éntingayén giton dob duniyae ni, do méalfa ro moso. Endob i de énda séna giton, sani de éntingayén iray i Tuluse, énda mékédan ro.

5 ¹ Non gétiga key i ni. I de lowoh tom dob duniyae ni maak do lawi saén bation bé firoye gébélantuwa taman mékédanén, san ké méléhu tomén. Endob i Tuluse rénigo no soy de lawi tom dob lawayo. Been i de mantu do lowoh tom méuyag taman sa taman. ² Atin non bé de kérégénon béléewe, toow fo méuyot tom de ké gédoté tomén magayas i de mantu lowoh tom dob lawayo. ³ Amuk gédoté tomén i mantuwe lowoh tom, éndaén mékédano. ⁴ Endob amuk bati tom séna dob de lowoh tom dob duniyae ni, gédogés tom bé de kérégénon. Gido loo, énda fo méuyot tom témagak bé tafaye lowoh tom. Yamula méuyot tom saén kémégal bé mantuwe lowoh inok i tafaye lowoh méumbayan bé mantuwe de éndaén méléhuén. ⁵ Tulus i téménafaye bé de ni inok mérigo dob betome moso. Brab nirayén betom i Rémogor ne maak tising tandaén bé kétuma nuwe bé kéluhanay de ni moso.

⁶ Mélaw toow fo méégét i kéunur tome sénga téklid. Gétiga tom amuk bati tom séna dob de tafay lowoh tom dob duniyae ni, énda gébati tom sétifon bé Kadnane diyo dob lawayo. ⁷ Non dob de rigoné tom béléewe ni, énda furay tom bé atiy gito tome, yamula furay tom bé atiy unuro tome. ⁸ Tintu fo émbagér i kéunur tome brab méuyot tom témagak bé de tafay lowoh tom inok mule tom bati sétifon bé Kadnane. ⁹ Gido loo, i toowe fo kétaya tom rigoné tom i késuwata nuwe fiyon udenén gono tom, dini taloo no diyo dob lawayo. ¹⁰ Non i kéluhana tome kailangan fo mékukum dob adafa Kristowe. Atin i séngae ségétew étew gédoté noy ati fatute

barasén look kékukume de sabaf bé de rénigo no, fiyo loo soy tetee dob duniyae ni.

Do dumoy Tuluse

¹¹ Atin non gétiga key i kégilake bé kékukum i Kadnane, télamané key féunurén i de étew. Gétigay Tulusey de fédew gey brab méuyot gey de so ké gétiga kom soy de fédew gey. ¹² I funa kuwe sémulat bé de ni kékérén gu, békén inok dayewé kom begey. Yamula inok gétiga kom i fiyowe rigoné key brab inok gétiga kom i séumbulone bé de étew dayewé ro saén i falas i étewe, békén i adat ne. ¹³ Wén keey i do étew mégitung marok do bunég gey. Endob i funa ruwe marok bunég gey non toow fo rigoné key témantuy kétayay Tuluse. Endob gétiga kom énda bunég gey, non gétiga kom gémalbék gey inok tabanga key begom.

¹⁴ Toow fo mégédaw i Kristowe begey funa key mégéror gémalbék. Gétiga key ménléhu i ni ségetew étew inok méuyag i kéluhanay de étew. Mélaw maak ménléhu i kéluhanane sabaf bé kégantino Kristowe bero. ¹⁵ Ménléhu géménantinon bé kéluhanay étewe inok i de méuyag, éndaén rigoné roy kétaya ruwe. Yamula rigoné roy kétaya Kristowe, sani ménléhue brab mémentebulee inok éndaén mékukum ro.

¹⁶ Mélaw i kífégitung geye békén loo bé kífégitung i de étew énda munur ro bé Kristowe. Endob bé do gétah, i kífégitung geye loo saén bé kéilawane, funa key makey ké kéilawan saén i Kristowe. ¹⁷ I étewe waléy dumo Kristowe sabaf bé kénur ne de, ménwaléy mantu étew. I tafaye adatén mémentagakén atin ménwaléyén mantuy adat ne. ¹⁸ Tulus i réménigowé bé de ni, non sabaf bé Kristowe, fénwaléyén betom éndaén sébanil dob Beene. Non séloyukén begey. Atin fégalbéké no begey inok féunuré key i de étew inok waléy so séloyuk i Tuluse bero. ¹⁹ Mélaw ay niy kéuret geye: I Tuluse nusarén i Kristowe mémukas bé de kéilawan inok waléy tom séloyuk bé Tuluse atin fénsagadén i de sala tom. Atin sénarigo no begey muret fantag bé kíféwaléy ne betom séloyuk dob Beene.

²⁰ Mélaw begey i de sarigo Kristo muret bé kéongot i Tuluse. Féongoté no begey bé fagayun gomén bé kétaya nuwe. Non kétayay Tuluse fémawléyé no begom do dumo no séloyuk. ²¹ Enda i sala Kristowe. Endob sabaf bé kéluhanay de sala tom, kénukum i Tulusey Kristowe, inok waléy tom métintu loo bé Tuluse non bé kewaléy tome do dumo Kristowe sabaf bé kénur tome de.

6 ¹ Non begey i do témabang bé galbék i Tuluse, ongoté key begom do téménanggaf bé kégédaw i Tuluse, usar gom i kégédaw ne fégérigo bé fiyowe. Kagom mika de. ² Non wén i Ménslate Kékérén i Tuluse mano, “Dob fatute gai, féngélingo guy de kédasalém, atin ténabang gu beem dob fatute gaiy kékufkas guwe bé kéilawane.” Fégélingo gom: Béleewe niy

gaiwe fatut tayakufé kom i kégédaw i Tuluse. Béleewe niy gaiwe fatut fédaya gom i Tuluse mémukas begom bé de sala gom.

³Toow fo ingata key i de rigoné key inok énda i géféika gey munur brab inok énda i géadowoy bé galbék geye lémégéb bé Fiyowe Uret. ⁴Yamula, dob kéluhanay de rigoné key, fégito gey begey i de sugu-suguuéy Tuluse. Non fiyon fo ké kérégénan gey brab kérasayan gey, témingkél gey. ⁵Atin ménlubag gey, ménférisu gey, ménggésug-sug gey bé de mérimbur étew. Atin wén i no taluwan geyén gémalbék, atin mélaw énda géama gey, brab énda géfidong gey. ⁶Atin énda i rénigo gey mékérésik adat, brab gésobuto key i kébérélh i Tuluse, brab témeningkél gey, brab tétabanga key i de étew. Atin Rémogor i Tulusey mémanduone begey brab toow gey fo ménggédaw. ⁷Atin nuret gey i toowe kétoro, brab i barakatane Tulus tabanga no begey. Mélaw bé kéluhanay de ni fénggito gey, begey i de sugu-suguuéy Tuluse. Atin i métintuwe brab fiyowey maake kélung gey brab dilék gey. ⁸Wén i do masanan begey, éndob wén soy do émfémala begey. Wén i do démayéw begey, éndob wén soy do méngiras begey. Wén i do ménbérélh do tugién gey kun, éndob toow i de bérélhé key. ⁹Wén i de étew émbérélh énda kun gélolo ro begey, éndob toow fo gélolon gey. Gédét geyén méléhu sénga téklid, éndob méuyag gey so. Ménkukum gey éndob énda méléhu gey. ¹⁰Fiyon fok wén i do émfétete bé de fédew gey, éndob démoyun moror gey. Maak toow geyén fo méskinan, éndob sabaf bé begeye, médooy de étew ménwaléy ro maak kawasa taman sa taman. Maak énda i do kagey bé de éntingayén, éndob wén i kagey bé de kéluhanay de iray i Tuluse.

¹¹Do dumo gey dob Korinto, bénréh geyén begom i kéluhanay dob de fédew gey, brab énda i ménbunéy de. ¹²Enda kulang i kéimu geye begom, éndob kulang i kagome kéimu begey. ¹³Bérélhé ku begom do maak nga gu, féimuén gey loo bé kéimu geye begom.

Kagom mawag bé de énda munur

¹⁴Kagom sébawag bé de étew énda munur ro bé Kristowe. Non énda ségiléw i fiyowe brab tetee, mélaw énda fakay ro waléy sébaan. Enda fakay sétifon i géfekaya brab délémons. ¹⁵I Kristowe brab Satanase énda géséfagayun ro. Atin énda waléy sétiman fédew i étewe munur bé Kristowe bé étewe énda munurén bé Kristowe. ¹⁶I lawi i Tuluse, sani gonone méngadaf, énda fakayén ké diyo so féngadafén i de kéninontow. Atin i betome maak lawi batioy méuyage Tulus. Non bénréh i Tuluse mano, “Batiu dob de kagén étew brab modoru bero. Atin begén i féngadafé ruwe, brab beroy de étew gu.” ¹⁷Atin bénréh i Kadnane so mano, “Tagak gom i de étew féngadafé roy de kéninontow brab sésuway gom bero. Férayu gom dob de mékérésik adat ro, atin tanggafé ku begom. ¹⁸Waléy Boh gom, atin waléy gom do nga gu do lagéy brab do libun. Been i niy bénréh i toowe fo barakatan Kadnan.”

7 ¹Do dumo gu, been i niy de fénasad i Tuluse betom rigoné no. Mélaw tagaké tom i kéluhanay de tete, dob lowoh tome taloo no dob fédew tome. Atin linisé tom i de lowoh tom brab télamané tom rigonén i de malinis dob adafay Tuluse inok toow fo métintu tom. Rigoné tom i ni non fégadata tom i Tuluse.

I kéoror Pablowe

²Fatut toow gom féimu begey. Enda i rénigo gey tete dob ségétéwe étew, taloo no fénasa gey, loo ké lénañis gey. ³Enda béréhé kuy de ni ké dowoyé ku begom. Non loo bé bénréh guwe bé do gétah, toow fo gulaané ku begom. Amuk méuyag gey look méléhu gey, mégédaw gey so begom. ⁴Toow fo sémarig gey begom brab géfélangka-langka gey sabaf bé begome. Mélaw fiyon fo ké kérasayan gey, fiyoy de fédew gey, brab toow gey fo moror sabaf bé begome.

⁵Atin amun énggumah gey dini dob Masedonia, énda fo énggétérén gey. Non toow fo ménkérégénan gey. Ménséédél begey i de sébanil begey. Atin ménbuku gey fantag bé de mantu munur bé Kristowe. ⁶Endob i Tuluse toow fo gétiga noy émféfiyowe bé de fédew i de étew tete i de fédew ro. Mélaw fénororén i de fédew gey bé kégumah Titoe. ⁷Atin békén saén i kégumah ney funa keye ménoror, non loo soy bénréh ne fantag bé kékéfiyo gome bé fédew ne. Atin nureténi begey i kéuyot gome géségitó begén. Brab toow gom fo kun énggésénule atin fénagayas gom bénréh dob de étew témo begén i kéamfilo kome begén. Mélaw toowu na fo moror.

⁸Non fiyon fo ké méntete i de fédew gom bé sulat guwe, énda énggésénule de ménféuwit dob begome. Endob bé do gétah, énggésénule de brab ménuyotu de damén ké éndaén fénuwit gu de dob begome amun énggétiga ku ménwaléy tete i de fédew gom. ⁹Endob béléewe ni toow fo mororu, éndob békén sabaf bé kétete i de fédew gom. Yamula mororu béléewe ni non énggésénule gom. Non té nagak gom i de tete rigoné kom sabaf bé kétete i de fédew gom. Fénsénule i Tuluse begom brab nusarén i kétete i de fédew gom. Mélaw fiyoy rénigo geye dob begome bé nan sulat. ¹⁰Non amuk féteteéy Tulusey fédewe, muwit kégésénule brab kédigur bé de sala. Brab beeniy muwite bé kékukume. Mélaw toow fo fiyoy nan kétete fédew. Endob i kétete i fédew i de étew énda munur bé Kristowe, muwit kéléhu. ¹¹Endob i begome, fégitung gom i fiyowe rénigo Tuluse dob begome sabaf bé kétete i de fédew gom. Non sabaf bé kétete i de fédew gom, tintu méuyot gom rémigo bé fiyowe, brab toow fo méuyot gom émfégitó bé éndaén i sala gom béléewe ni. Atin ménkérít gom brab ménbuku gom bé salae rénigo ségétéwe begom. Atin méuyot gom émfésuwat begén. Mélaw, sabaf bé kétete i de fédew gom, kénukum gom i ni sala,

atin fénténgténg gom bé békén kagom sala i ni. ¹² Mélaw i funa kuwe séménulat dob begome bé gétahe békén saén sabaf bé nan étew ménsala, taloo noy étewe énggésalaa no. Yamula gétigay Tuluse séménulatu inok fégétiga ku dob begomey kédakél i kégédaw gome begey. ¹³ Been i niy funay de fédéw gey ménfiyo. Atin ménumanan foy kéfiyoy de fédéw gey. Non i Titoe fénororén begey bé kéuret ne fantag bé kéféroror gome de. ¹⁴ Ménfélangka-langkau fo muret dob Titoe fantag bé begome, atin fénggito gom foy kétoow i kéuret guwe. Démoyun gey émbéréh bé toowe dob begome. Atin ségiléw so énggito Titoey kétoow i funa keye félangka-langka fantag bé begome. ¹⁵ Mélaw minut dakél i kéimu ne begom, bé lala ne gétédém bé kéuyot gome modor bé de sugu gu, brab kébasana kome de. ¹⁶ Toowu fo méoror non gésarigo ku fo begom toow.

I kéiraye dob Tuluse

8 ¹Atin do dumo gey, méuyot gey de fo ké gétiga kom i ménrigowe dob de munur bé Kristowe dini dob Masedoniawe ni bé kégédaw i Tuluse. ²Fiyon fo ké toow ro fo kérasayan brab kérégénan, toow ro fo moror. Mélaw fiyon fo ké toow fo méskinan ro, toow ro fo ménggédaw méniray kurta fégétabang bé de dumo ro munur. ³Atin bérhéhé ku begom i toowe, niray roy gagané ruwe. Tidéw béno, ménuman ron man miray non been i niy kétaya ruwe rigoné ro. ⁴Komon nongot ro fo dob begeye ké tungkasé key bero mamung témabang bé de dumo tom munur bé Kristowe dob ingéde Judea. ⁵Toow gey fo ménggaif non rénigo roy békéne fo bantak fédéw gey gérigono ro. I sunguwe de niray roy de lowoh ro brab de fédéw ro dob Kadnane. Tidéw béno, nom rénigo roy kétayay Tuluse, nodoro roy de sugu gey. ⁶Atin non Titoey méngganaye bé ni rigonén, féngginau gey bé fétausé noy kétimu ne kurta fégétabang bé de munur dob Judea inok géfégilido kom i galbéke ni rénigo gom bé kégédaw gome. ⁷Gétiga ku énda kulang gom bé de kéunur gom, taloo no de kéuret gom, loo soy de kégétiga kom, loo soy kétaya kome témabang, loo soy kégédaw gome begey. Mélaw méuyot gey de ké fégito gom soy énda i kulang bé kégédaw gome bé kéiraye.

⁸Enda sugué ku de begom, éndob méuyotu de ké gétiga kom i fantage bé de dumo gom munur dob de ségiyo gonon. Témantu ro fo témabang. Beeniy funa kuwe émbéréh de dob begome béléewe, inok iringé kom bero. Mélaw gétiga ku ké toow gom fo mégédaw. ⁹Gétiga tom i kégédaw i Kadna tome Jesu Kristo. Non fiyon fo ké toow fo kawasa dob lawayo, ménwaléy méskinan dob duniyae ni bé kewaléy ne kéilawan inok waléy gom kawasa dob lawayo sabaf bé kétérifantad ne.

¹⁰Atin féginauné ku begom béri, fiyo ké fégilidé kom i féngganaya kome galbék bé no énggéétah bélintuwa. Begom i de sungu téménimu do kurta fégétabang, atin begom soy de sungu méuyot témabang. ¹¹Mélaw

fatut fétausé kom taman géfégilido kom. Fatut méuyot gom magayas mégilid de ségiléw bé kéfagayas gome bé kékantak gome de. Atin iray gom i atiy wéne begom. ¹² Amuk méuyot gom miray bé atiy wéne begom, mésuwat i Tuluse témayakuf bé nan. Endob i Tuluse énda méuyotén ké iray gom i éndae gagané kom.

¹³ Enda méuyot gey de ké kérégénan gom sabaf bé de kétabang gom miray dob de ségiyo inok éndaén kérégénan ro. Endob kétaya key ké ségiléw-giléw i kéluhanane. ¹⁴ Béleewe ni gétabang gom bé de ségiyo non gaba-gabay kagome kéfaguyag. Endob kulang foy karowe de. Atin dob gaiwe kulang gom brab gaba-gaba roy berowe, tabangé ro so begom. Mélaw ségiléw-giléw i késétabang gome. ¹⁵ Non wén i Ménsulate Kébéréh i Tuluse mano, “I étewe énggétimu médoo, énda gaba-gaba no. Atin i étewe énggétimu kloh saén, énda so kulangén.”

¹⁶ Toow fo ménfésalamat gey dob Tuluse non bé kéuyot Titoé mégédaw begom loo bé kégédaw geye begom. ¹⁷ Amun nongot gey dob beene ké tabanga no begom, toow fo ménuyot de rémigo. Atin non toow fo méuyot tétabang begom, mélaw méuyot mangéy diyaan. ¹⁸ Féodoré key bé Titoey ségétewe dumo tom munur, mégéror fo muret bé Fiyowe Uret, funa no toow fo fégadatay de munur dob de ségiyo ingéd. ¹⁹ Atin saliyu na bé nan, beeney fénémili i de munur dob de séségiyo-giyo ingéd inok modor begey bé kéagéw geye mangéy muwit bé kurtae fégétabang bé de méskinan munur bé Kristowe. Rigoné key i ni galbék inok médayéw i Kadnane de brab fégito gey i kéuyot geye tétabang.

²⁰ Méuyot gey ké modor i de ni étew non toow gey fo mingat bé kéuwt geye bé ni dakél iray inok énda i témo begey. ²¹ I kétaya keye rigoné key i fatute dob adafay Tuluse loo so dob adafay étewe.

²² Atin saliyu na bé ni, sugué key soy ségétewe dumo tom munur. Médoonén fo gule ténéngkad gey atin mélaw gétiga key méuyot fo tétabang. Atin béléewe ni toow na fo méuyot tétabang begom non dakél foy késarig ne dob begome. ²³ Atin i Titoé, beeney dumo guwe gémalbék tétabang begom. Atin i de étew modor bé Titoé, beroy de sénarigoy de munur dob de séségiyo-giyo ingéd mangéy tétabang begom inok médayéw i Kristowe. ²⁴ Fégito gom i kégédaw gome bero inok i de munur dob de ségiyo ingéd gétiga roy kégédaw gome brab gétiga ro so toow i funa keye géfélangka-langka fantag bé begome.

9 ¹ Endaén kailanga kuy sémulate dob begome fantag bé kétabang gome bé de dumo tom munur do méskinan dob Judea. ² Non gétiga ku toow gom fo méuyot tétabang. Brab dénayéw gu begom dob de munur dini dob Masedoniawe ni. Bénréh gu bero maku, “I de dumo tom munur dob ingéde Akaya, tafay ron tétabang tidéw bé no énggéétah bélintuwa.” Amun énggelingoo roy ni, i kédoono ruwe ménwaléy méuyot tétabang. ³ Mélaw béléewe ni, sugué ku mangéy dob begomey de ni do

dumo tom munur inok tabanga ro begom métuman i ni brab gétafaya komén i tabang gome loo bé bénréh geye. Giton mélaw toow i kédayéw geye begom. ⁴Non amuk i de étew tidéw Masedonia modor ro begén mangéy diyaan, atin amuk énda i ténafoy gom kurta, toow fo mémala gey de, brab kékmalanan gom de so. Non makey ké wén i ténafoy gom kurta. ⁵Mélaw, makuk fiyo ké sugué ku métah mangéy diyaan i de ni do dumo tom munur inok gétafaya kom i iray gome, sani fénasad gome. Mélaw amuk gérumahu diyaan, méntafayén i de iray gom. Mélaw giton i kéuyot gome miray énda ménfégés gom de.

⁶Fégettédém gom i ni, i étewe mohok kloh, kémétew so kloh. Atin i étewe mohok médoo, kémétew so médoo. ⁷Mélaw, sénga ségtéw étew fatut irayén i bénantak ne irayén. Atin békén fatut miray ké tete i fédew ne de taloo no ké manok ménfégés de saén. Non toow fo mégédaw i Tuluse bé étewe toow fo moror ké miray. ⁸Atin i Tuluse géirayén begom i mas na médoo bé de kailanga kom inok démoyun gaba-gabay kéfaguyag gome atin géiray gom so tabang dob de ségiyo. ⁹Non wén i Ménsulate Kébérél i Tuluse mano, “Iraya no témantuy de méskinan, brab i kégédaw ne énda i tamana no.” ¹⁰Atin i Tuluse irayén i de béne dob de mohok, inok mama i de étew. Mélaw iraya no so begom do béne, sani de kétabang gom dob de ségiyo, inok dakél i gékétéwo come, sani de médoo do fiyo rénigo gom sabaf bé dakélé kégédaw gom. ¹¹Démoyun iray i Tuluse begom i katabuwane inok gétantu gom miray tabang sénga tékélid, inok médooy fésalamate bé Tuluse sabaf bé tabange tidéw dob begome uwité key. ¹²Non i ni galbék rigoné kom, békén saén i kétabangé bé de munur, éndob been soy funay de médoo étew fésalamat dob Tuluse. ¹³Atin amuk gito roy dakélé kégédaw gom loo bé ni, médooy démayéwe bé Tuluse sabaf bé kéodor gome bé sugu Kristowe, brab sabaf bé kéégét i kéunur gome bé Fiyowe Uret fantag bé Kristowe, non mégédaw gom miray dob berowe brab dob kéluhanay de ségiyo. ¹⁴Atin mélaw dasala ro begom dob Tuluse atin toow fo gulaané ro begom. Atin i funa ruwe gémulaan begom non bé dakélé kégédaw gom bero tidéw dob Tuluse. ¹⁵Mélaw fésalamat tom dob Tuluse non bé Nga ne Jesu Kristo toow fo mélaga nirayén betom.

Fantag bé Pablowe

10 ¹Atin i begéne, sani Pablowe, wén i ongoté kuwe dob begome. Wén i de ménbérél térifantadu kun ké diyou dob begome. Endob amuk énda kun diyou dob begome, toowu fo émbaraw sémulat dob begome. Endob ongoté ku dob begome bé toowe mélanat kébérél loo bé kégédaw Kristowe. ²Ongoté ku dob begome, féfiyo gom i de rigoné kom inok énda kailanga kuy fébarawé ké gérumahu dob begome, loo bé rigoné kuwe dob de étew émbérél bé i begeye kun ségiléw gey i de étew énda munur ro bé

Kristowe. Non rigoné key kun i de tete kétaya key. ³Toow kéilawan gey saén, éndob énda sarigo key i kébagér i kéilawane fégésétiboh sébanil bé Satanase. ⁴Non i kéuret geye énda ségiléwén bé kéuret i de tete étew dob duniyae ni. Yamula i kéuret geye tidew dob Tuluse brab wén i barakatén inok témaban gey bé de kétoro énda toowén. ⁵Fégito gey énda toow i kéluhanay uret i de étew sébanil bé Tuluse brab kébérén i de étew félangka-langka malang bé toowe kétoro fantag bé Tuluse. Atin fiyon i de kéfégitung ro énda toowén, fégaliné key inok modor so bé de sugu Kristo. ⁶Atin amuk fégito gom tintu odoro kom i de sugu Kristo, tidew béno kukumé key i de ségiyo munur amuk énda modor ro bé de suguén.

⁷Kagom téngténgén saén i falas i étewe, yamula fatut fégitung gom soy fantage bé fédew ne. Amuk wén i étew gékaranga no been i sugu-sugué Kristowe, fatut karangé no so begey, do sugu-sugué Kristowe so. ⁸Non énda mémalawu félangka-langka bé aturane niray i Kadnane begey. Non nirayén dob begeye inok féégeté key i kéunur gome, énda mébinasa gom de. ⁹Mikau ké fégitungé kom fégilaké ku saén begom dob de sulat gu. ¹⁰Endob wén keeyén i étew émbérén mano, “Dob de sulat Pablo, toow fo émbaraw brab émbagér. Endob amuk dini dob betome, toow fo mélanat i de kébérén brab énda furungén muret.” ¹¹Endob i étewe mégitung loo bé nan, fatut gétiga noy ni. I de sénulat gey béleewe ni, fiyon fo ké sérayu tom, been soy nan i de rigoné key ké gésétengaang tomén.

¹²Endob énda féségiléwé key i begeye bé de étew do félangka-langka. Toow ro fo dufang, non marok bero saén i do gérotor, brab dayewé ro soy de karo lowoh brab de étew miring bé adat ruwe. ¹³Endob i begeye, énda taluwan gey démayew bé de lowoh gey, non béréhé key saén i de rénigo gey dob galbéké niray i Tuluse begey, loo bé de rigoné key dob begome. ¹⁴Atin énda taluwan gey démayew bé de lowoh gey, non begey i de sungu ménangéy diyaan muret dob begome bé Fiyowe Uret fantag bé Kristowe. ¹⁵Enda félangka-langka gey fantag bé galbék i de ségiyo dob de ségiyo gonon énda sénugu i Tuluse begey. Endob méuyot gey de ké amuk minut émbagér i kéunur gome, gétabanga kom begey émféunur bé de dumo gom dob kagome ingéd. ¹⁶Tidew béno, géureto key i Fiyowe Uret dob de ingéd géliyu begom. Mélaw énda fégéfélangka-langka gey i galbék i ségiyowe étew.

¹⁷Non wén i Ménsulate Kébérén i Tuluse mano, “Fiyon atiy méuyote félangka-langka, fatut félangka-langka sabaf saén bé rénigoy Kadnane.” ¹⁸Non i étewe dayewé noy kaane lowoh, énda i lanték i kédayew ne. Endob amuk Tulus i démayewe bé ségétéwe, giton médait médayew.

Do ubo-ubo apostol

11 ¹Méuyotu de damén ké tingkélo kom na begén kloh bé kéuret guwe ni fiyon fo ké maak dufangu. ²Toowu fo médaléw fantag bé

begome loo bé kédaléw i Tuluse. Non i begome ségiléw gom bé ségétewe kénogon féntisingonén. Atin i Kristowe maak beeney lagéye ménfétisingon bé ni kénogon. Atin begéney maake ménfétisingon de brab toow fo méuyotu de ké gésébawag ro. ³Mégilaku de ké tagaké kom i Kristowe loo ké éndaén modor gom bé de suguén taloo no ké éndaén gulaané kom de. Embukuu ké fésélawéké kom i toowe fantag bé Kristowe bé tugi i de ségiyo kéfengadaf. Amuk rigoné kom i nan, géiringo kom moso i sala i sunguwe libun féndawét Eba, non méndurat bé kétugiéy ulée, sani Satanase. ⁴Non amuk wén i ségétew étew gégumah dob begome, brab muret ségiyo kétoro fantag bé Jesuse bé kétoro geye, munur gom de wayo. Taloo no fiyon fo ké ureté roy ségiyowe rémogor brab ségiyowe kéfengintulus, munur gom de so wayo, fiyon fo ké énda ségiléwén bé kageye kétoro.

⁵Atin i do no étew diyaan do ubo-ubo do gérotor do apostol ro, gétinga ku énda i ségétew bero toow na fo gérotor begén. ⁶Fiyon fo ké énda furungu muret, énda kulang i kégétiga kuwe. Fénggito gey begom médoonén gule i kéluhanay de rénigo gey.

⁷Nuret gu dob begomey Fiyowe Uret i Tuluse, éndob énda fénbayada ku de begom, fiyon kloh. Atin ménterifantadu inok waléy gom gérotor. Aw békén ba fiyoy nan rénigo gu? ⁸Amun diyou dob begome gémalbék, i de munur bé Kristowe dob ségiyowe gonon i ménayadane begén. Mélaw énggéédotu dob berowe inok gétabanga ku begom. ⁹Atin amun diyou dob begome, énda ménongotu kurta tidéw dob begome fiyon fo ké wén i kailanga ku. Yamula i de dumo tom munur dob Masedonia, nuwito ro begén bé kéluhanay de kailanga ku. Atin loo so bé do géyah, énda fo doté ku mosoy tabange tidéw dob begome. ¹⁰Atin been i niy funa kuwe félangka-langka. Non énda méndotu kurta tidéw dob begome loo so dob de udenén ingéd dob Akaya. Atin énda so médotu moso tidéw dob begome. Been i fasad guwe brab gétinga ku fo toow loo bé kétoow i kétoro Kristowe. ¹¹Fégitungé kom keey énda méimuú begom non bé de ni kékéréd gu. Endob gétingay Tuluse, toow fo féimué ku begom.

¹²Fétausé ku rigonén i de rigoné ku béléewe ni, mélaw énda mongotu tabang tidéw dob begome, inok i de téfégérotor do ubo-ubo saén do apostol, énda i funa ro félangka-langka brab inok énda gébéréd ro ségiléw i karowe rigonén bé kageye de. ¹³I berowe, békén tintu ro apostol Kristowe. Yamula do ubo-ubo ro saén, brab do témuji ro. Magakar ro saén inok makom ké do tintu ro do apostol Kristowe. ¹⁴Endob énda mégaifu de, non gétinga ku fiyon i Satanase géfarino noy falas ne loo bé falas i télakiy Tuluse. ¹⁵Mélaw énda mérégéno ké ubo-ubo i de sugu-sugué Satanas inok maak do tintu sugu-sugué métintuwe Tulus. Endob mékukum ro moso loo bé fatute sabaf bé de ni do tete rigoné ro.

I kérasyay Pablowe

¹⁶Séguleé ku man bérhéhén, kagom fégitungén de ké dufangu. Endob amuk karangé kom begén dufang, tingkélonu inok wén i funa ku

géfélangka-langka loo bé ségétewe dufang. ¹⁷I ni bérhéhé ku begom béléewe ni, békén tidew dob Kadnane, non fébantug-bantugu saén loo bé ségétewe dufang. ¹⁸Endob non médooy de émbéréh félangka-langka sabaf saén bé de éntingayén dob ni duniya, fakay so félangka-langkau. ¹⁹Atin non makom keey ké toow gom fo do métiledtéd, fatut moror gom témingkélon bé de dufang. ²⁰Non amuk wén i téfégérotor étew sugué no begom, taloo no afasé noy de languntama kom, taloo no lifulé no begom, taloo no félangka-langka dob téngaanga kome, taloo no tamfilingé no begom, tingkélo kom brab fidayaé kom saén. ²¹Toow fo émbaraw ro, éndob i begeye énda émbaraw gey loo bé nan. Makom keeyén ké talaw gey non énda i rénigo gey tete loo bé nan dob begome.

Atin amuk félangka-langka ro, géfélangka-langkau so, fiyon fo ké dufang i ni kékéréh fégéfélangka-langka. ²²Félangka-langka ro non do Judio ro. Endob ségétewu so Judio. Atin bérhéhé ro do étew Israel ro, éndob loo soy begéne. Atin bérhéhé ro do séfu Abraham ro, éndob ségétewu so séfu Abraham. ²³Gétiga ku émbéréhu béni maak ségétew bunég, éndob énda gétérénou. Aw bénréh ro beroy de sugu-sugué Kristo? Endob i begéne ségétew so sugu-sugué Kristowe, atin toowu na fo mégéror gémalbék bé berowe. Mas médoonén gule ménfériwu sabaf bé kékuret guwe bé Kristowe. Mas médoonén so gule ténafésu, brab mas médoonén gule gédétun méléhu. ²⁴Limo gule bénadas i de Judio begén bé télewe folo bra siyow gule badas. ²⁵Téléw gule bénadas i de Romano begén. Atin wén i no gai, i de étew nibéro ro begén batéw taman marok méléhuu nén. Téléw gule méndau barko falan ménrundas dob dogote, brab wén i no gai ségétérésangan brab ségékélungonon i kérantaw-rantaw guwe dob dogote. ²⁶Dob démoyune kéagéw gu, médooy de makakaid do énggagéwo ku: do makakaid dob de wayég dunuk, do makakaid dob do tulisan, do makakaid sabaf bé de dumo gu Judio brab do békén Judio so, de makakaid dob de ingéd brab dob de gonon énda i do étew de batí, brab do makakaid dob dogote. Atin wén soy do makakaid tidew dob de ubo-ubo saén do dumo gu munur, éndob i toowe, sébanil ro begén. ²⁷Toowu fo gémalbék, brab wén i no énda géfidongu. Atin wén i no mélayahu brab téruménu, atin kulang i amaé kuwe brab kégal guwe, brab énda i batí ku. ²⁸Atin békén saén i nan, non démoyunu émbuku fantag bé kéluhanay de sélimud do munur bé Kristowe. ²⁹Non amuk wén i kérasayan sabaf mélubay i kéunur ne, mérasayu so bé kékuku guwe. Taloo no amuk wén i ségétew munur gésala sabaf wén i ménfésala de, tete i fédew guwe de brab méméritu bé ménfésala de.

³⁰Enda méuyotu félangka-langka, éndob amuk félangka-langkau, bérhéhé ku saén i de fantag bé de kérégéno ku inok giton énda fo furungu. ³¹I Tuluse sani Abay i Kadnane Jesus, médayéw damén i dawéti ne taman sa taman. Gétiga no toow i kékéréh guwe. ³²Bé do gétah amun diyou de séna

dob ingéde Damasko, wén i ségétéwe méguléw diyo fénémili Datu Aretase. Atin sénuguén i de sundalo no mantay dob béngaway no ingéd inok kéfoé ro begén. ³³Endob wén do téménabang begén, nahur ro begén dob dakélé biton. Atin ténuntu ro begén dob faliluwangay didinge fénggélangkat bé no ingéd. Mélaw énggékéraréyú.

12 ¹Kailanga kuy fébantug-bantuge fiyon fo ké énda i lanték gu.

Béréhé ku béleewe niy fantage bé de fénggitoy Kadnane begén loo soy de fénayagén dob begéne. ²Wén i gélolo guwe lagéy munur bé Kristowe, atin ménfoloén bra fot gébélintuwa i kéuwt i Tuluse de mangéy dob toowe fo gérotor laway. Endob énda saén gétiga ku de ké toow énggéangéy diyo taloo no fénggitoy Tuluse de saén. Tulus saén i gétigane de. ³Mélaw énda gétiga ku de ké ménangéy i lowoh ne dob bélówone fantad loo ké rémogor ne saén. Tulus saén i gétigane de. ⁴Enggélingoooy ni étew diyo i de éntingayén énda gébéréhoy de kéilawan de, brab énda fo fakayén béréhéy étew. ⁵Mélaw fébantug-bantugu sabaf bé ni étew, éndob énda fébantug-bantugu fantag bé kagéne lowoh saliyu saén bé de éntingayén fégito no énda fo furungu de. ⁶Amuk fébantug-bantugu, énda rigoné ku de loo bé ségétéwe dufang non béréhé kuy toowe. Endob énda fébantug-bantugu non mikau de ké karangéy de étew begén toowu na fo gérotor bé fatute. Non fatut karangé ro begén sabaf saén bé de gito ro rigoné ku brab de gélingoo ro béréhé ku.

⁷Atin inok énda géfélangka-langkau sabaf bé de fiyo énggito gu, nirayén begén i déruune toow fo démwé. Atin i Satanase nusarén fégékérasayén begén inok énda géfélangka-langkau. ⁸Téléw gule déménasalu dob Kadnane fantag bé ni ongoté ku ké kédané noy ni déruun. ⁹Endob séménumbul i Kadnane mano, “Kégédaw guwe saén i kailanga muwe. Non toow fo minut dakél i barakat guwe témabang ké toow fo minut go mélubay.” Mélaw mororu félangka-langka sabaf bé de kélubay gu inok fébagéré Kristowe begén bé barakat ne. ¹⁰Atin mélaw toow fo mororu sabaf bé de kélubay gu, brab kéingone begén, brab kédusawe begén, brab kéférasaye begén, brab de mérégén géagéwo ku sabaf bé kéunur guwe bé Kristowe. Non gétiga ku amuk mélubayu, wén soy gai fébagéré Kristowe begén.

¹¹Béleewe ni rigoné kuy rigoné ségétéwe dufang non fébantug-bantugu. Endob fénégés gom de begén rémigo non fatut damén begom i mamfilone begén. Non fiyon fo ké gérifantadu, toowu na fo gérotor bé da nan do ubo-ubo saén do apostol diyo dob begoma nan. ¹²Atin amun diyou dob begome, fénggitoy gu dob begomey ségétéwu fo tintu apostol. Non rénigo guy de mékégaif fiyon fo ké énggédaydaya kuy de mérégén. ¹³I rénigo guwe dob begome ségiléw so bé rénigo guwe dob de munur dob de ségiyo ingéd saliyu saén bé ni. Enda méndotu kurta dob begome fégétabang gom begén loo bé kéédot guwe dob de ségiyo. Amuk karangé kom énggésalau sabaf bé ni, fésagadanu!

¹⁴ Beeniy gétéléwoy kétafay guwe mangéy témukaw begom, éndob énda mongotu kurta fégéfaguyag gu tidéw dob begome. Non begomey gulaané kuwe, békén i kurta gome. Ufama, i de nga békén fatut miray kéfaguyag dob de lukés ro, yamula i de lukés roy fatute miray kéfaguyag dob de nga ro. Atin begomey maake do nga gu non ménunur gom sabaf bé kéuret guwe. ¹⁵ Atin toowu de fo moror ké géétéyo ku miray i kéluhanay languntama kuwe brab férénawa guwe fégétabang begom. Endob maak minut kloh i kéimu gome begén bé lala guwe minut dakél i kéimu guwe begom.

¹⁶ Gétiga kom bé énda fénrégéno ku begom non énda i nongot gu kurta dob begome. Endob wén keeyén i émbéréhe begom mano, “I Pablowe toow fo tugién, fénagakara no betom, brab lénifulén betom.” ¹⁷ Endob ati étewe fénagakara ku, taloo no ténugio ku, taloo no léniful gu? Enda! Aw wén i éndot gu tidéw dob begome bé késugu guwe bé de sarigo ku mangéy dob begome? Enda! ¹⁸ Nongot guy Titoe magéw mangéy diyaan brab sénugu gu modor soy ségétéwe dumo tom munur. Aw wén i éndot Titoe tidéw dob begome, taloo no lénafisén begom? Enda! Aw békén ba ségiléw i rénigo geye non sébaan saén i kétaya keye rigonén, sani témabange begom?

¹⁹ Makom keey ké bérhéhé key i de ni inok féténgténg gey begom énda i sala gey. Békén i nan. Non gétigay Tulusey, bérhéhé key saén i fébéréh Kristowe begey. Do dumogu, i kéluhanay de rigoné key, rigoné key inok émbagér i kéunur gome. ²⁰ Toow fo émbukuu ké gégumahu dob begome, gito gu begom rémigo bé békéne kétaya kom. Atin gito gom mélaw begén rémigo bé békéne kétaya kom. Been ké gumaha ku begom, séédél, mésérédaléw, sékérít, séitung, séingon, ségéno, séfélangka-langka, brab sérimbur. ²¹ Atin ménbukuu amuk gégumahu diyaan, fémalanéy Tuluse begén dob téngaanga kome, non gékérewu sabaf bé de médoobegom do ménalsa bé do gétah, éndob énda séna énggésénule ro témagak bé de tete rigoné ro loo bé de kébigaé ro brab de tete kétaya ro.

13 ¹⁻² Beeniy gétéléwe gule kétukaw gu begom. Atin wén i Mén sulfate Kébéréh i Tuluse mano, “Amuk wén i ségétew étew ténebo ménalsa, kailangan wén i ruwo gétew taloo no télaw gétew énggégito de atin fayagé roy ati énggito ruwe fantag bé ni kétébo.” Mélaw amuk gégumahu diyaan, fégélingoé kuy de kétébo gom brab kukumé kuy de étew ménalsa. Bénréh gun i ni dob begome bé do gétah amun nangéy gu begom ténuukaw bé gérubo nuwe gule. Atin bérhéhé ku man ségule dob ni sulat. ³ Bé beno gai, amuk gégumahu diyaan, fégito gu begom i kéluhanay émféngintoowe bé de kébéréh gu, toow fo tidéw dob Kristowe. Amuk wén i rigoné no dob begome, énda mélubayén, yamula fégito noy barakat ne dob begome. ⁴ Non fiyon fo ké maak énda i barakat Kristowe bé kéléhu ne dob kruse, méuyag béleewe ni sabaf bé barakat i Tuluse. Atin ségiléw

bé begeye, maak énda i barakat gey non kérégénan gey sabaf bé kéunur geye bé Kristowe. Endob sabaf so bé kéunur geye bé Kristowe, i barakat i Tulusey muyage begey inok taus i kétabanga keye begom.

⁵Sétengkad gom inok gétiga kom ké tintuy kéunur gome bé Kristowe loo ké énda. Atin gétiga kom damén ké bat i Kristowe dob de fédew gom. Amuk énda bat i Kristowe dob begome, énda séna tintuy kéunur gome de. ⁶Atin gétiga kom damén begey i de tintu apostol Jesu Kristowe. ⁷Atin démasal gey dob Tuluse énda damén rigoné kom i tete. I funa keye démasal loo bé ni békén ké fégito gey toow fo mégulit i kageye galbék ménféunur begom. Yamula démasal gey loo bé ni inok rigoné kom i fatute fiyon fo ké maak énda mégulit i de rénigo gey. ⁸Non amuk modor gom bé towe kétoro, énda fégito gey begom i atura keye. Non énda usaré key i atura keye rémigo sébanil bé towe, yamula usaré key i atura keye témbang bé de étew inok modor ro bé towe kétoro. ⁹Atin toow fo mororu amuk gito gu begom émbagér i kéunur gome atin mélaw énda fégito gey i atura keye. Mélaw démasal gey inok minut émbagér i kéunur gome. ¹⁰Been i niy funa kuwe sémulat bé de ni amuk énda diyou dob begome. Mélaw amuk gérumahu diyaan énda damén kailanga kuy démusawe kémukum begom. Non niray i Kadnane begén i aturay ségétéwe apostol inok fébagéré kuy kéunur gome, békén kukumé ku begom.

¹¹Taman saén dob niy sulaté kuwe begom. Féfiyo gom fo toow i de rigoné kom, odoro kom i de kéféginau gu begom. Séfagayun gom brab fétanék gom i fédew gome. Mélaw i Tuluse, sani towe fo mégédaw begom brab mirayan begom bé métanéke, démoyun diyo dob begome.

¹²Atin amuk séségifa gom fatut fégito gom i késégédaw gome.

I kéluhanay de munur bé Kristowe bat i dob de ségiyo ingéd ségifaé ro begom.

¹³Atin mégédaw damén i Kadnane Jesu Kristo begom, brab mégédaw damén i Tuluse begom, loo soy Rémoor i Tuluse démoyun damén bat i dob kéluhanay de fédew gom.

Pablo

I Sulat Pablowe dob de Munur bé Kristowe dob Galasia

Ay niy sébaane bé de sénulat Pablo, sani ménbantuge muret fantag bé Jesu Kristowe. Tafayén séménugud i Pablowe dob ingéde Galasia, atin médooy de étew ménwaléy munur bé Jesuse sabaf bé kéuret ne. Séménulat i Pablowe dob berowe.

I kédoonoy de étew do bati dob Galasia, békén Judio. Mélaw énda ménodor ro bé kitabe taloo no adat i de Judio. Endob dénowoy i de Judiyo de munur bé Jesuse brab ténero ro bé kailanga ro soy modore bé kitab i de Judio.

Endob i Pablowe, énggétiga no énda kailangay de étew i modore bé kitab i de Judio inok méfukas ro dob de sala ro. Yamula kailanga ro saén i munure bé Jesu Kristowe. Mélaw séménulat i Pablowe dob de munur do bati dob Galasia inok toroé no bero bé énda kailanga roy modore bé kitab i de Judio.

1 ¹⁻² Begéney Pablowe, sulata ku begom do munur bé Jesu Kristowe dob de ingéd sakuf i Galasiawe. I begéne brab kéluhanay de dumogu munur dini, ségifaé key begom. I begéne ségétéwu apostol békén sénugu i kéilawane, taloo no kéilawan saén i méniraye aturan dob begéne. Yamula i Jesu Kristowe brab Abay tome Tulus sani téménébulee bé Jesusey ménémilie begén, brab de ménféwaléy begén apostol brab de séménugu begén.

³ I Abay tome Tulus brab Kadnane Jesu Kristo, mégédaw ro damén begom brab fétanéké ro damén i de fédéw gom.

⁴ I Kristowe, nirayén i umul ne bé kéléhu ne dob kruse inok i de sala tom émfésagad, brab inok énda mékukum tom loo bé de étew rémigo tete béléewe ni. I funa Kristowe nirayén i umul ne, non nodoro noy kétayay Abay tome Tulus. ⁵ Médayéw i Tuluse damén taman sa taman! Amen.

Sébaan saén i Fiyowe Uret

⁶ Toow fo ménggaifu bé rénigo gome. Sedek toow fo magad i kétagak gome bé Tuluse sani ménféunure begom sabaf bé kégédaw Kristowe.

Non balengé kom i de fédew gom brab munur gom bé ségiyowe “Fiyo Uret”. ⁷Endob i toowe, énda i ségiyo Fiyo Uret non sébaan saén i toowe kétoro. Endob wén i do étew diyaan fénbuku ro begom bé de tugién kétoro ro non méuyot ro mégalin bé toowe Fiyo Uret fantag bé Jesu Kristowe. ⁸Endob amuk wén i muret atin i kéuret ne énda ségiléwén bé kageye kéuret fantag bé Jesuse dob begome, mékukum damén mangéy dob emfernowo. Fiyon fo ké do télaki taloo no begey, amuk fégaliné key i toowe kétoro, mékukum gey so damén! ⁹Bénréh geyén begom atin bérhé ku man ségule béleewe ni. Amuk wén i témore fantag bé Jesuse atin énda ségiléwén bé kétoroe nunuro komén bé do gétah, mékukum damén mangéy dob emfernowo!

¹⁰Enggito gomén dob ni sulat énda sélédé kuy kédayéw i étewe. Non méuyotu saén ké Tulus i démayéwe begén. Amuk méuyotu de saén ké mésuwat i de étew begén, éndaén damén tausu waléy sugu-sugué Kristowe.

¹¹Do dumo gu, méuyotu de ké gétiga kom i ni, i Fiyowe Uret ténero gu begom békén tidew dob kéilawane. ¹²Non énda énggédot gu de tidew dob étewe, brab énda i ségiyo de témenoro begén. Yamula fénggétiga Jesu Kristowe begén.

¹³Enggélingoo kom i fantage bé tafaye adat gu. Toowu fo ménodor bé kétoro i de dumo gu Judio. Atin i de munur bé Kristowe, fénrasay gu fo bero toow brab ténlama gu béninasay kéféngintulus ruwe inok éndaén i étew munur bé Jesuse. ¹⁴I kédooy de dumo gu do Judio ségiléw gey idad, énda gérféngó ro begén bé kéodoro kuwe bé kétoro i de Judio. Brab toow na fo nodoro kuy adat i de katufua key.

¹⁵Endob fiyon fo ké loo bé nan, i Tuluse toow fo mégédaw begén. Non bé énda séna ménumahu de, fénemili non begén inok waléy sugu-sugué no. ¹⁶Atin sabaf bé kétaya nuwe, fénggito no begén i Nga ne Jesus inok ureté kuy fantage bé Beene dob de békén Judio. Endob énda i féntoroo ku fantag bé Kristowe. ¹⁷Atin énda ménangéyu dob ingéde Jerusalem inok ménginsau dob de sungu do apostol. Yamula ménagayasu mangéy dob ingéde féndawét Arabia. Tidew béno, ménésfuleu mangéy dob ingéde Damasko. ¹⁸Atin télew gébélintuwa tidew béno, ménangéyu Jerusalem inok tukawé kuy Pedrowe. Brab ménbatiu dob beene ruwo géfadiyan. ¹⁹Atin bé béno, énda i ségetew énggito gu bé de dumo do apostol saliyu saén bé Santiagowe sani tuwaréy i Kadnane Jesus.

²⁰Bérhé ku begom bé toow i ni sulaté ku begom, békén tugi. Gétigay Tuluse so toow i ni.

²¹Tidew béno, ménangéyu dob de ingéd dob Siria brab dob Silisia. ²²Bé do no do gai, i de munur bé Kristowe dob Judea, énda séna énggébalaka ro begén taloo no gélolo ro begén. ²³Enggélingoo ro saén i bénréh i

de étew fantag bé begéne maro, "I étewe toow fo fénrasayén betom bé do gétah brab ténlama no kédanén i kéunure bé Kristowe, béleewe ni ménbalengén i fédew ne brab ménwaléyén wayo muret fantag bé Kristowe." ²⁴Mélaw dénayéw roy Tuluse sabaf bé begéne ménwaléy munur bé Kristowe.

2 ¹Folo bra fot gébélantuwa tidéw béno, ménséfuleu man mangéy Jerusalem begey Bernabewe. Brab nuwit gu soy Titoe. ²Ménséfuleu non fénggétigay Tuluse begén bé fatutu mangéy diyo. Atin ménsélimud gey i de odoroy de munur, éndob énda i ségiyo étew diyo. Atin nuret gu dob berowey Fiyowe Uret ténero gu dob de békén Judio. Rénigo guy ni inok énda mékédan i kéluhanay galbék guwe sani kéfénur guwe bé de békén Judio. ³Endob ménsuwat ro bé galbék guwe. Mélaw i dumo guwe Tito, fiyon fo ké ségétew békén Judio, énda fénégés ro de fétuli. ⁴Endob bé béno, wén i de étew do ubo-ubo saén munur bé Kristowe brab ménamung ro dob begeye, méuyot ro de fo ké tulién. I de ni do étew, i funa ruwe ménamung dob begeye, inok susiné ro saén ké modor gey bé kitabe niray Moisese loo ké énda. Brab méuyot ro de ké féwaléyé ro begey riféy kitabe, fiyon fo ké ménfukas geyén bé kéodorone bé kitabe tidéw dob Moisese sabaf bé kéunur geye bé Jesu Kristowe. ⁵Endob énda fo ménagayun gey de, inok énda mésélawék i ségiyowé kétoro bé Fiyowe Uret ténero gey begom.

⁶Atin i de odoron diyo, énda numana roy de kagén kétoro non katabuwanén. (Féndawét gu bero do odoron non bero kun i odoroy de munur bé Kristowe. Endob ulanden dob begéne non gétiga ku énda i isu ramigoy Tuluse.) ⁷Atin i de ni do odoron gétiga ro fénémili i Tuluse begén inok muret bé Fiyowe Uret dob de békén Judio loo bé kéfémili i Tuluse bé Pedrowe inok muret dob de Judio. ⁸Non i Tuluse fénwaléyén begén apostol dob de békén Judio ségiléw bé kéféwaléy ne bé Pedrowe apostol dob de Judio. ⁹Atin i de odoron diyo ro Santiago, Pedro, brab Juan, énggésobuto ro niray i Tuluse begén i ni galbék. Mélaw ménséalamano ro begey Bernabewe fégétanda bé kégéséfagayu keye. Ménséfagayun gey bé i Bernabewe brab begéne magéw gey mangéy muret dob de békén Judio atin i berowe mangéy ro muret dob de Judio. ¹⁰Wén i sébaane saén nongot ro, sani kétabange bé de méskinan do munur bé Kristowe bati dob Jerusalem. Endob toow fo ménuyotu néen téocabang bero, bé énda séna ménongot ro.

¹¹Endob amun ménangéy i Pedrowe dob Antioquia, bénréh gu dob beene dob adafay de munur bé békén fo fatut i rénigo nuwe. ¹²Ay niy rénigo nuwe. Amun énda séna énggumah i de Judio sénugu Santiagowe, i Pedrowe séréngan mama bé de békén Judio. Endob amun énggumah ron, éndaén ménsérénga no mama bé de békén Judio. Non mégilak bé

de Judio do témoro bé kailangan métuli i de békén Judio. ¹³Tidéw béno, i kéluhanay de Judio do munur diyo, ménggilak ro so loo bé kégilak Pedrowe. Mélaw éndaén sérénigan ro mama bé de békén Judio do munur so. Atin fiyon i Bernabewe ménamung so. Enda fiyoy rénigo ruwe fiyon fo ké gétiga roy fatute. ¹⁴Amun énggito guy rénigo ruwe ménsébanil bé Fiyowe Uret, bénrého kuy Pedrowe dob téngaangay kéluhana ruwe maku, “Pedro, fiyon fo ké i beeme ségétew go Judio, éndob té nagak mon i adat i de Judio. Sede mélaw ké fégésé moy de békén Judio modor bé adat i de Judio?” Beeniy kégélé guwe bé Pedrowe.

I Kéunure

¹⁵I begeye, ménunah gey do Judio, békén gey do étew békén Judio do ménalsa. ¹⁶Gido loo, gétiga tom i funay étewe waléy métintu dob adafay Tuluse. Békén sabaf bé kéodor ne bé kitabe tidéw dob Moisese. Yamula sabaf saén bé kéunur ne bé Jesu Kristowe. Atin i begeye do Judio, ménunur gey so bé Jesu Kristowe inok waléy gey métintu sabaf bé kéunur geye dob Beene. Békén sabaf bé kéodor geye bé kitabe tidéw dob Moisese. Non énda i ségétew waléy métintu sabaf bé kéodor ne bé kitabe. ¹⁷I de begeye do Judio, amuk ménwaléy gey métintu sabaf bé Kristowe, giton ménalsa gey so ségiléw bé de békén Judio. Endob kagom fégitungén de ké Kristowey muwite bé salae. Békén i nan! ¹⁸Endob amuk séfuleu modor bé kitabe tidéw dob Moisese fiyon fo ké té nagak gun, fégito guy begéne ségétewu toow fo ménalsa, non énda ménodoru bé kitabe. ¹⁹Maak ménléhuun, atin mélaw éndaén kailanga no modoru bé kitabe tidéw dob Moisese. Endob méuyagu non énggédot guy mantuve umul tidéw dob Tuluse. Atin sabaf bé kéunur guwe bé Kristowe, maak ménserénganu de méléhu dob kruse, non been i géménantinon begén. ²⁰Mélaw békénén begén i méuyage, yamula méuyag i Kristowe dob begéne. Atin i kéuyag guwe béléewe ni, méuyagu non bé kéunur guwe bé Jesuse Nga i Tuluse. Toow fo mégédaw begén. Ménléhu inok méuyagu. ²¹Enda mikau bé kégédaw i Tuluse. Endob amuk waléy métintuy kéilawane sabaf bé kéodor ne bé kitabe, énda i atag i kéléhu Kristowe.

Fantag bé kitabe

3 ¹Do étew dob Galasia, toow gom fo dufang! Sedek fénggélingo gom i de étew manangguwit begom témagak bé Fiyowe Uret? Toow fo ménkéntay i kétoro guwe begom fantag bé rénigo Jesu Kristowe amun ménléhu dob kruse. ²Wén i fénginsaé kuwe begom, ati kégédot gome bé Ré mogor i Tuluse? Aw sabaf bé kéodor gome bé kitabe tidéw dob Moisese? Békén! Non gédoté kom i Ré mogor i Tuluse sabaf saén bé kékéngélingo gome brab kéunur gome bé Fiyowe Uret fantag bé Jesuse. ³Aw toow gom fo dufang? Ménwaléy gom métintu sabaf bé késarig gome

bé Rémogor i Tuluse. Aw makom ké géumana kom i kétintu gome sabaf bé késarig gome bé de lowoh gom? Enda fakayén! ⁴Aw mén singgula i de kéfyonon énggédot gom sabaf bé kéunur gome bé Jesuse? Enda fo damén mésinggulaén. ⁵Aw niray i Tulusey Rémogor ne dob begome brab rénigo noy de mékégaif galbék dob téngaanga kome non nodoro kom i kitabe tidew dob Moisese? Enda! Yamula sabaf bé kéfégélingo gome brab kéunur gome bé Fiyowe Uret fantag bé Jesuse.

⁶Ségiléw so bé ménrigowé dob katufua keye Abraham. Non wén i Mén'sulate Kébérél i Tuluse mano, "I Abrahame, ménunur bé Tuluse. Atin sabaf bé kéunur ne, kénarang i Tuluse métintu." ⁷Mélaw fatut gésobuto kom i ni: I de étew munur bé Tuluse ségiléw bé kéunur Abrahame, beroy de ménwaléy do tintu séfu Abrahame, sani de tintu Judio. ⁸Wén i Mén'sulate Kébérél i Tuluse bé fétintunéy Tuluse soy de békén Judio sabaf bé késarig ruwe. Mélaw nuret i Tuluse dob Abrahamey Fiyowe Uret bé do gétah, mano, "Fénagéw dob beeme, féfyoné kuy kéluhanay de étew dob duniyae." ⁹I Abrahame ménunur bé Tuluse, mélaw i beene féfyonay Tuluse. Atin ségiléw so bé ni, i kéluhanay de étew munur, féfyonéy Tuluse so bero.

¹⁰Endob i de étew sémarig bé kéodoro ruwe bé kitabe tidew dob Moisese, mékukum ro. Non bang i Mén'sulate Kébérél i Tuluse, "I étewé énda démoyuno modor bé kéluhanay de sugu dob kitabe, kukuméy Tuluse." ¹¹Mélaw gésobuto tom bé énda i ségétew ménwaléy métintu dob adafay Tuluse sabaf bé kéodoro ne bé kitabe tidew dob Moisese. Non wén soy Mén'sulate Kébérél i Tuluse mano, "I étewé ménwaléy métintu sabaf bé kéunur ne bé Tuluse, méuyag taman sa taman." ¹²Endob i étewé sémarig bé kéodoro nuwe bé kitabe, békén ségétew sémarig bé Tuluse. Non wén i Mén'sulate Kébérél i Tuluse mano, "I étewé modor sénga téklid bé kéluhanay de sugu i kitabe tidew dob Moisese, méuyag taman sa taman."

¹³Endob gétiga tom bé énda i ségétew gérigo bé nan. Gido loo, i Kristowe fénukasén betom inok énda mékukum tom bé kitabe. Non i Kristowe ménukumén génantino no betom. Non wén i Mén'sulate Kébérél i Tuluse mano, "I étewé ménléhu bénitin dob kayéwe, ménriko non kénukum i Tuluse." ¹⁴Atin i funa Jesuse féndayaén i kéféléhue de loo bé nan, inok i kéfyonone fénasad i Tuluse nirayén dob Abrahame, irayén so dob de békén Judio sabaf bé Jesu Kristowe. Mélaw gédoté tom i Rémogor i Tuluse fénasadén sabaf bé kéunur tome bé Jesu Kristowe.

¹⁵Do dumo gu, ay niy ufamawe. Amuk wén i ruwo gétew mén'sefagayun brab rénigo roy fasade bé késulat ruwe bé de dawét ro, énda i gékédan de taloo no géuman de. ¹⁶Atin loo so bé niy, rénigoy Tuluse fasad dob Abrahame brab dob séfu ne. I Mén'sulate Kébérél

i Tuluse énda ménbéréhén mano, “de séfuém” non énda médo no. Ménbéréh saén mano, “séfuém”, atin i atag i ni ségétew saén, sani Kristowe. ¹⁷Atin ay niy atag i bénréh guwe ni. I Tuluse rénigo noy fasade dob Abrahame. Atin fot ratuh bra télaw folo gébélantuwa tidew béno, énggumah i kitabe tidew dob Moisese. Endob i kitabe énda gékédana noy fasade non toow fo tumanéy Tulusey fasad ne. ¹⁸Non amuk iray i Tulusey de kéfiyonon sabaf bé kitabe, békénén sabaf bé fasade. Endob i toowe, niray i Tulusey de kéfiyonon dob Abrahame sabaf saén bé fasad ne.

¹⁹Atin amuk loo bé nan, ati ulane bé kitabe? Niray i kitabe inok giton i sala i étewe taman gérumah i séfu Abrahame, sani fénasad i Tuluse. I ni kitab i Tuluse, fénuitén bé de télaki mangéy dob ségétewé kéfédewan sani Moisese. ²⁰Endob amun niray i Tulusey fasad ne dob Abrahame énda kailanga noy kéfédewane non ségétew saén i réménigowe bé fasade, sani Tuluse.

²¹Aw makom ké énda géséfagayun i kitabe brab fasad i Tuluse? Kagom fégitungén de loo bé nan. Non amuk i kitabe muwit umul magufusa dob betome, fakay tom waléy métintu sabaf bé kitabe. ²²Endob wén i Ménssulate Kébéréh i Tuluse bé i kéluhana tome do kélawan dob duniyae ni mékukum tom sabaf bé de tete rigoné tom. Mélaw i Tuluse ténuma noy fasad ne dob betome sabaf saén bé kéunur tome bé Jesu Kristowe. Atin féfiyoné no betom sabaf saén bé kéunur tome.

²³Amun énda séna fénggétiga no betom i mantuve aguwon mangéy dob lawayo, sani kéunure bé Jesuse, maak ménférisu tom dob kitabe. Atin énda géésut tom taman énda fénggito no betom i mantuve aguwon. ²⁴Mélaw kitab i méguléw betom taman dob kégumah Kristowe inok waléy tom métintu sabaf bé kéunur tome de. ²⁵Atin béeleewe ni ménwaléy tomén munur bé Kristowe, mélaw i kitabe éndaén féguléwo no betom.

²⁶Atin ménwaléy gom do nga i Tuluse sabaf bé kéunur gome bé Jesu Kristowe. ²⁷Atin ménfératis gom inok féténgténg gom i kéunur gome bé Kristowe. Mélaw ménwaléy gom loo bé Kristowe non ménwaléy gom do dumo no. ²⁸Mélaw i de Judio brab de békén Judio, ségiléw ro. Fiyon i de rifén brab de békén rifén, do lagéy brab do libun, falan ro ségiléw. I kéluhana tome do munur bé Kristowe ségiléw-giléw tom dob adafay Tuluse. ²⁹Amuk do kuyug Kristo gom, ménwaléy gom so do maak séfu Abrahame brab gédoté kom i kéluhanan fénasad i Tuluse.

4 ¹Ufama, amuk wén i kawasa étew brab ménléhu atin wén i ségétew ngaén fénledén. I nan nga, amuk ménguwéd séna, maak sugu-suguén saén, fiyon fo ké been i gefee bé kéluhanane. ²Brab wén i do sénarigoy ménélatae bohén témalima de brab mégatur de. Endob amuk dakéléni i ni naga brab gérumahén dob idade bénréh i boh ne, gédoté non i kéluhanane.

³Ségiléw so bé betome, amun énda séna munur tom bé Kristowe, maak do rifén tom, non bé do gétah nodoro tom i de rémogor do uléw dob duniyae ni. ⁴Endob amun énggumahén i fatute gai, i Tuluse sénuguén i Nga ne dob duniyae ni. Atin ménwaléy kéilawan bé kéumah ne dob ségétéwe libun. Tidéw béno, nodoro noy kitabe tidéw dob Moisese. ⁵Rénigo noy ni inok fukasé no betom do étew maak do ménférisu dob kitabe inok waléy tom do nga i Tuluse.

⁶Atin i Tuluse sénuguén i Rémogor i Nga ne mangéy bati dob de fédéw tom. Been i émbéréhé dob de fédéw tom mano, “Abay gu Tulus”. Rénigoy Tulusey ni inok gétiga tom do ngaén so betom. ⁷Mélaw békén tomén do rifén, yamula ménwaléy tom do nga i Tuluse. Mélaw gédoté tom i kéluhanay étingayéne kay de ngaén.

⁸Bé do gétah, énda séna gélolo gom i Tuluse. Mélaw bé do no gai, rifén gom dob kéluhanay de tabaré kom do tulus, éndob békén tintu Tulus. ⁹Endob béleewe ni, gélolo gomén i Tuluse non fénemilién begom. Mélaw sedek méuyot gom séfule dob de tafay kéféngintulus gom, énda i lantékén? Aw méuyot gomén man waléy rifén ségule dob de ni? ¹⁰Sedek fégadata kom i de gai, do bélintuwa brab do térsang kélungonon brab do térsang sabaf bé kitabe? ¹¹Ménbukuu fantag bé begome non maak ménsinggula i kéluhanay de ténero gu begom.

¹²Ongoté ku begom do dumo gu, iring gom begén, loo bé kéiring guwe begom bé kétagak guwe bé kitabe tidéw dob Moisese. Atin énda séniyaw gom begén, ¹³fyon fo ké énggétiga kom i kédéruu kuwe bé do no do gai. Endob been i niy funa kuwe énggéuret bé Fiyowe Uret dob begome bé gésunguwe. ¹⁴Endob énda séniyaw gom begén taloo no ménika gom begén, fyon fo ké ménkérégénan gom fo toow sabaf bé kédéruu kuwe. Yamula tényakuf gom begén maak ségétew télakiy Tuluse look maak begéney Jesu Kristowe. ¹⁵Brab toow gom fo ménoror bé béno. Tintu gétiga ku ké amuk fakay sa damén, fyon i de moto gom iray gom fégétabang begén. Endob sedek ménbaleng i de fédéw gom? ¹⁶Aw ménsébanil gom begén sabaf bé kéuret guwe bé toowe?

¹⁷I de ségiyo étew téromo begom bé de énda toow, fiyoy de rigoné ro dob begome, éndob énda fo fiyoy funa ruwe rémigo bé de ni. Méuyot ro de ké tagaké kom begén inok bero saén i de dumo gom séloyuk. ¹⁸Enda tete i késédumone amuk fiyoy funane de. Méuyotu de ké séloyuk gom bé kéluhanay étewe, békén ké begén saén. Brab amuk énda diyou dob begome, fatut wén i do ségiyo do dumo gom séloyuk. ¹⁹Maak do gulaané ku do nga gu begom. Ségiléw bé libune kéararan ongot-ongoté noy kéumah i nga ne, démawét i fédéw guwe sabaf bé begome taman ségiléw i adat gome bé Kristowe. ²⁰Toowu fo méuyot damén ké diyou dob begome béleewe ni, inok séuret-ureté tom i fiyowe. Non émbukuu fo toow béni. Atin beeniy funa kuwe sémulat loo bé ni.

²¹I begome do méuyot modor bé kitabe, fétuntay gom i atag i kitabe.
²²Non ménbéréh i kitabe bé i Abrahame wén i ruwo gétew ngaén lagéy. I ségétéwe de ngaén bé bawag ne rifén féndawét Agar, atin i ségétéwe de ngaén bé bawag ne békén rifén féndawét Sarah. ²³I kéumah i nga ne bé libune rifén ségiléw bé kéumah i kéluhanay de nga. Endob i kéumah i nga ne bé libune békén rifén, ménrigo non fénasad i Tuluse bé Abrahame fiyon fo ké toow fo lukésen i Abrahame brab bawag ne Sarah brab énda i nga ro. ²⁴I de ni do ruwo gétew libun maak binuwaya. Ay niy atag ne. Wén i ruwo gékelasi do étew, do étew riféy kitabe brab de étew békén riféy kitabe. I libune féndawét Agar, ségiléw bé tafaye aguwon, sani kéodore bé kitabe énggedot Moisese dob tuduke Sinai. Brab i kéluhanay de ngaén, do rifén non i Agare rifén. ²⁵I riféne ni libun Agar anlung i tuduke Sinai dob Arabia, ségiléw bé de Judio dob Jerusalem non beroy de riféy kitabe tidew dob tuduke Sinai. ²⁶Endob i bawag Abrahame féndawét Sarah békén rifén. Maak do ngaén betom non békén riféy kitabe betom. ²⁷Non bang i Ménssulate Kébéréh i Tuluse, “I beeme libun énda énggégéngéga go, oror go! Fiyon fo ké énda ménkédawétan go bé kékéumaha muwe, fatut mékes go bé kéoror me! Non fiyon fo ké téngak i bawag me beem, toow na fo médooy kaame do nga bé libune wén i bawagén.”

²⁸Mélaw do dumo gu, i begome do nga i Tuluse so sabaf bé fasad ne, ségiléw bé Isake ménnumah dob Sarahe non fénasad i Tuluse bé Abrahame, fiyon fo ké lukés ron. ²⁹Atin bé bénou, i nga Abrahame ménnumah loo bé kéumah i de nga dob duniyae ni, fénrasayén i tuwaréy ne ménnumah sabaf bé tabang i Rémogor i Tuluse. Ségiléw so bé de mérigo dob betome béléewe ni non i de riféy kitabe férasayé ro betom. ³⁰Ay niy Ménssulate Kébéréh i Tuluse mano, “Féféraréyém i libune rifén brab nga ne, non i nga i riféne énda fakayén gégedot bé de languntaman iray dob nga i békéne rifén. Non i kéluhanane kay nga i békéne rifén.” ³¹Mélaw, do dumo gu, békén tom maak do nga rifén. Yamula i betome maak do nga i békéne rifén.

5 ¹I Kristowe téngéyén betom. Békénén do riféy kitabe betom. Non éndaén kailanga tom i modore bé kitabe. Mélaw kagom man waléy riféy kitabe ségule.

²Bégéney Pabloye, mélaw fégélingo gom i béréhé kuwe ni begom. Amuk sarigo kom i kétulie begom inok méfukas gom bé de sala gom, énda fukasé Kristowe begom. ³Atin géléé ku man begom ségule. I étewe fétuli inok méfukas bé de salaén, kailanga no soy modore bé kéluhanay kitabe. ⁴I begome do sémarig bé kéodoro kome bé kitabe inok waléy gom métintu, énggésésuway gom bé Kristowe, brab énda tayakufé kom i kégédaw i Tuluse. ⁵Endob i begeye, munur gey bé Kristowe. Mélaw sémarig gey bé Rémogor i Tuluse féwaléyé no begey do métintu sabaf bé

kéunur geye. ⁶Non amuk munur tom bé Jesu Kristowe, ulanden ké métuli tom look énda. I toowe saén mélaga i kéunur tome bé Jesuse. Atin giton i kéunur tome bé de kégédaw tom.

⁷Bé do gétah, tintu fo munur gom bé toowe kétoro. Ati ménanangguwite begom sésuway bé toowe kétoro? ⁸I kéfanangguwite begom sésuway bé toowe, békén galbék i Tuluse. Non Been i téménawage begom inok munur gom de. ⁹I tugie kétoro begom ségiléw bé fégfééruke bé fane. Non fiyon fo ké kloh saén i fégfééruke de, mélégéb dob kéluhanay fane. ¹⁰Endob fiyon fo ké loo bé nan, sémarigu bé Kadnane tabanga no begom inok énda munur gom bé de ségiyo kétoro saliyu bé kagéné kétoro. Atin fantag man bé nan étew fénbukuén begom bé de tugi kétoro, gétiga ku kukuméy Tulusey nan étew.

¹¹Do dumo gu, wén keeyén i émbéréh begom bé toroé ku soy fatut gom fétuli. Endob amuk toow i nan, sedek taman so béeewe niy kéférasay i de Judio begén? Non taman so béeewe ni, mékérít ro begén bé kétoro guwe fantag bé kéléhu Kristowe dob kruse, sani funa tome saén méfukas bé de sala tom. ¹²I da nan do étew ménfébuku begom bé de tugi kétoro ro bé fatut gom fétuli, méuyotu de damén ké fékafun ron fo!

¹³Do dumo gu, fénémili i Tuluse betom inok méfukas tom dob kitabe. Endob fiyon fo ké loo bé nan, énda fatut odoro tom i de tete kétayay de lowoh tom. Yamula fatut ségédaw tom inok démoyun tabanga tom i de dumo tom munur bé Jesuse. ¹⁴Non i kéluhanay de sugu dob kitabe tidéw dob Moisese géodoron so amuk rigonén i ni sébaan sugu, “Fégédaw go bé dumo muwe, loo bé kégédaw me bé kaame lowoh.” ¹⁵Endob amuk démoyun gom séédél brab séfétete fédéw, binasané kom i kéfengintulus gome.

¹⁶Mélaw ay niy bérhéh kuwe begom: odoro kom i fémandu i Rémogor i Tuluse, atin mélaw énda odoro kom i de tete kétayay de lowoh gom. ¹⁷Non i de tete kétayay de lowoh tom toow fo sébanil bé kétayay Rémogor i Tuluse. Enda fo séfagayun ro. Mélaw wén i no, énda gérigono tom i fiyowe kétaya tom rigonén. ¹⁸Endob amuk odoro kom i fémandu i Rémogor i Tuluse, énda kailanga kom i modore bé kitabe tidéw dob Moisese.

¹⁹Gélolo tom i de tete kétayay de lowoh tom, sani do kébigén, brab do toow fo tete do rigonén, ²⁰brab kéfengadaf bé de kéninontow, brab do kébélyan brab do rémamut, brab do étew démoyun mérarék brab sétiboh, do médaléw, do sékérít, brab do arumén, brab do sébaad-baad atin do sébanil ro, ²¹brab do mingar, brab do molon, brab do sérimbur, brab do ségiyo na tete do rigonén. Bérhéh ku man begom ségule, i de ni do étew énda géahur ro dob kéféguléw i Tuluse.

²²Endob gélolo tom soy de étew modor bé fémandu i Rémogor i Tuluse. Beroy de étew gulaané roy de dumo ro, brab moror ro, brab fiyoy de

fédew ro, brab témingkél ro ongot-ongot, brab mégédaw ro, brab rigoné roy fiyowe, brab gésarigon ro,²³ brab térifantad ro, brab énda modor ro bé de tete kétayay de lowoh ro. Amuk rigoné tom i de ni, énda félisé tom i de sugu tidéw bé do gétah.²⁴ Atin i kéluhana tome do étew ka Jesu Kristowe, maak fénléhu tomén i de tete adat tom dob krus Jesuse. Mélaw ténagak tom i tafaye adat tom brab de tete kétaya tom.²⁵ I Rémogor i Tulusey mirayane betom bé mantuwe umul, mélaw fatut odoro tom i fémandu ne.²⁶ Katom félangka-langka, taloo no séfekérit taloo no séingar.

6 ¹Do dumo gu, amuk énggétékasa kom ménsala i dumo gome munur, fatut i de begom fémanduoy Rémogor i Tuluse gélé gom inok énda tausén mésala. Endob fatut mélémak saén i kékérén gome de. Brab ingat gom so inok énda so gésala gom.² Atin fatut sétabang gom sénga tékélid, non amuk rigoné kom i ni, modor gom bé sugu Kristowe.³ Atin amuk wén i étew manok tintunén fo fiyoy adat ne éndob énda fo toowén, tugio noy kaane lowoh.⁴ I kéluhana kome fatut susi gom i de lowoh gom. Amuk fiyoy de rigoné kom, fatut moror gom de. Endob kagom usarén i adat i dumo gome fégétémbu gom bé kagome adat.⁵ Non i séngae ségétew étew mékukum dob adafay Tuluse sabaf bé de rénigo no. Mélaw kagom sékukum.

⁶ I de étew ténero fantag bé Jesuse, fatut tukidé roy kéfiyono ruwe dob témore de.

⁷Kagom munur bé éndae toow. Enda i ségétew géfagakara noy Tuluse. Gétiga noy kéluhanane. Mélaw buluk atiy ohokéy ségétewe, been soy nan i kétewé nuwe. Atin loo so bé ni, i Tuluse irayén i fatute dob séngae ségétew étew sabaf bé rénigo nuwe.⁸ I étewe rémigo bé tetee non odoro noy tetee kétayay lowoh ne, gédoté noy kéléhue énda i tamana no. Endob i étewe rémigo bé kétayay Rémogor i Tuluse, gédoté noy umule magufusa tidéw dob Rémogor i Tuluse.⁹ Mélaw katom lugotén rémigo bé fiyowe. Non amuk fédayday tom bé fiyowe rigoné tom, gédoté tom moso i fiyowe baras tom tidéw dob Tuluse.¹⁰ Mélaw fatut démoyun tom rémigo bé fiyowe dob kéluhanay étewe, brab labi na fo dob de dumo tom munur bé Jesuse.

¹¹ Téngténg gom i kédakél i de késulat gu, non begén i sémulat bé de ni géfuray kékérén bé de kagén kémér.¹² I de étew fégésé ro begom fétuli, félangka-langka ro brab méuyot ro saén ké dayewéy de dumo ro bero kéilawan. Méuyot ro fétuli begom non mégilak ro ké ferasay i de dumo ro bero Judio sabaf bé késarig ruwe bé kéléhu Kristowe.¹³ I de étew témo ro bé fatut gom fétuli inok modor gom bé kitabe, i berowe énda so mon modor ro démoyun bé kitabe. Méuyot ro de ké fétuli gom inok dayewéy de dumo ro bero Judio sabaf bé kétéfuti gome.¹⁴ Endob i begéne, i kagéne saén funan fédayew-dayew i Kadna tome Jesu Kristo sabaf bé

kéléhu ne dob kruse. Non éndaén rifénu dob de tete kétayan dob duniyae ni brab éndaén géfégésoy de tete kétayan begén rémigo sala, sabaf bé kéléhu Jesuse dob kruse. ¹⁵ Ulanden ké métuli i ségétéwe étew, look énda. I toowe saén mélaga i kéwaléy i adate mantu sabaf bé Kristowe. ¹⁶ Atin i de étew modor bé ni ténero gu, mégédaw damén i Tuluse bero brab iraya no damén bero bé métanéke fédew, loo so dob kéluhanay étew i Tuluse.

¹⁷ Atin ay niy tamfaday béréhé kuwe begom dob ni sulat. Tidéw béléewe ni, fiyo damén ké éndaén i ségétéw émférégénon begén. Non i de laas gu dob lowoh guwe ni, beeniy émfégitowe bé begéney tintuwe sugué Jesuse. Non i de étew sébanil bé Jesuse bénadas ro begén médoogule.

¹⁸ Do dumo gu, mégédaw fo damén i Kadna tome Jesu Kristo begom kéluhanan. Amen.

Pablo

I Sulat Pablowe dob de Munur bé Kristowe dob Efeso

Ay niy sébaane bé de sénulat Pablo, sani ménbantuge muret fantag bé Jesu Kristowe. Tafayén séménugud i Pablowe dob ingéde Efeso, atin wén i do étew diyo ménwaléy ro do munur bé Jesu Kristowe sabaf bé kéuret ne. Séménulat i Pablowe dob berowe.

Amun sénulat Pablowej ni, ménférisu de nén sabaf bé kéuret ne fantag bé Kristowe. I funa Pablowe séménulat bé ni, non énggelingoo noy éndaén séodor-odor i de fédéw i de munur diyo. Endob mika i Pablowe de ké énda sétiman i fédéw i de kéluhanay de munur, fiyon fo ké do Judio ro look do békén Judio ro. Mélaw sénulatén i ni dob de békén Judio do munur bé Kristowe. Ténoroén bero bé fatut sétiman fédéw i kéluhanay de munur bé Jesu Kristowe, non maak sébaan saén i lowoh ruwe, atin i Jesuse, Been i uléw ruwe.

1 ¹Begéney Pablowe, sani apostole sénugu Jesu Kristowe non beeniy kétayay Tuluse. Sulata ku begom do dumo gu munur bé Jesu Kristowe do batí dob Efeso, sani de énda témérén modor bé kétaya nuwe.

²I Abay tome Tulus brab Kadnane Jesu Kristo, mégédaw ro damén begom brab iray ro damén begom i métanéke fédéw.

³Toow fo fésalamat tom bé Tuluse sani Abay i Kadna tome Jesu Kristo. Non nirayén betom i kéluhanay kéfiyonone dob lawayo sabaf bé kéunur tome bé Kristowe. I de ni kéfiyonon kay de rémogor tom, békén kay de lowoh tom. ⁴Bé do gétah, amun énda séna ménlimbag i duniyae de, fénemili i Tuluse nén betom sabaf bé Kristowe inok waléy tom do métintu étew dob adafa nuwe énda i do sala tom.

⁵Atin non toow fo mégédaw betom, bénantakén i émféwaléye betom do ngaén sabaf bé rénigo Jesu Kristowe. Réningo noy ni non been i niy kétaya nuwe. ⁶Dayéwé tom i Tuluse non bé fiyowe kégédawén betom bé kéiray ne bé toowe fo gulaané no Ngaén, Jesu Kristo. ⁷Non sabaf bé kéléhu Kristowe, fénukasén betom dob de sala tom, non fénsgad non i de sala tom. Toow fo mégédaw i Tuluse! ⁸Enda gétémbunon i kégédaw

i Tuluse betom! Atin fénggétiga no brab fénggésobutén betom i fantage bé Beene. ⁹Atin fénggétiga no betom i ménbunéye bantakén bé sunguwe fantag bé kérigo nuwe betom bé Kristowe. Fénggétiga no betom non been i niy kétaya nuwe rigoné no. ¹⁰Atin ay niy bénantak ne rigoné no. Amuk gégumahén i fatute gai, féwaléyé noy kéluhanane dob lawayo brab dob duniyae ni sétiman uléw, atin Kristowey uléw ruwe.

¹¹I kéluhanay de rénigoy Tuluse, rénigo no non kétaya no brab bénantakén rigoné no. Atin been soy funa nuwe fénémilién betom bé énda séna ménlimbag i duniyae of inok waléy tom do étewén sabaf bé kéunur tome bé Kristowe. ¹²Mélaw i begeye do Judio do sungu munur bé Kristowe, toow fo dayéwé key i barakatane Tulus.

¹³Ségiléw so dob begome. Non amun énggelingoo kom i toowe kétoro sani Fiyowe Uret fantag bé kéfukase dob de sala, ménunur gom so bé Kristowe. Mélaw i Tuluse nirayén begom i Rémogor ne inok bati dob de fédew gom loo bé fénasad ne. Rénigo noy ni inok wén i tanda bé kéfukas gome. ¹⁴Atin i Rémogor i Tuluse ni, Been soy maake tising inok tintu gétiga tom tumanéy Tulusey kéluhanay fénasad ne irayén betom brab fégilidé noy kéfukas ne betom dob de sala tom. Toow fo dayéwé tom i barakatane Tulus!

¹⁵Mélaw amun énggelingoo kuy fantage bé kéunur gome bé Kadnane Jesus brab kégédaw gome bé kéluhanay de dumo gom munur, ¹⁶énda fo témérénú fésalamat dob Tuluse sabaf bé begome. Atin dasala ku begom dob Tuluso. ¹⁷Atin ongoté ku dob Tulus i Kadna tome Jesu Kristo sani barakatane Abay tom, bé irayén begom i Rémogor ne. Atin i Rémogor i Tuluse ni féwaléyé no begom métiledtéd brab fégétinga no begom i Tuluse inok toow fo waléy gétiga kom i Tuluse. ¹⁸Ongoté ku so dob Tuluso, fégésobuté no begom inok gétiga kom i de médo do kéfiyonon gédoté tom. Been i inam tome sabaf bé kéfemili ne betom inok munur tom bé Kristowe. ¹⁹Atin démasalu so inok waléy gétiga kom i kédakél i barakat i Tuluse témabang betom do munur. Atin i ni barakat i Tuluse, ²⁰funa no énggétébule bé Kristowe brab énggfédiyat de mangéy mésar dob kuwono nuwe. ²¹I Kristowe, Beene foy toowe gérotor méguléw. Toow na fo gérotor bé kéluhanay de datu, do odoron, do amu, brab do barakatan étew. Atin i dawét ne toow na fo gérotor bé kéluhanay de dawét dob de ni do gai brab dob de gai gégumah moso. ²²Atin i Tuluse, fénwaléyén i Kristowe méguléw bé kéluhanane inok tabangé no betom do munur de. ²³Atin i kéluhana tome do munur, maak betom i lowoh Kristowe brab Been i uléw tome. Enda i kulang dob Beene brab énda i kulang dob lawayo taloo no dob fantade sabaf bé Beene.

2 ¹Bé do gétah, maak do ménléhu gomén sabaf bé de sala gom. ²Bé beno, ménodor gom bé de tete adat i do étew sébanil bé Tuluse. Brab

ménodor gom bé Satanase sani datu i de barakatan saitan dob lawayo brab méguléw bé de étew énda modor ro bé Tuluse.³ I toowe, bé gétahe, kéluhana tom ménamung bero modor bé de tete kétayay de lowoh tom brab de tete itunga tom. Atin bé béno, ségiléw tom so bé kéluhanay kéilawane, non mékérít i Tuluse betom, brab fatut mékukum tom.

⁴ Endob i Tuluse toow fo ménuray i na nuwe betom brab toow fo mégédaw betom. ⁵ Mélaw fiyon fo ké maak ménléhu tom sabaf bé de sala tom, nirayén so betom i mantuwe umul séréngan bé kéfétébule ne bé Kristowe. Mélaw i funa tome saén méfukas dob de sala tom non bé kégédaw i Tuluse. ⁶ Sabaf ménwaléy tom do dumo Kristowe, maak méntébule tom séréngan de inok mamung tom so dob Beene méguléw dob lawayo. ⁷ I funa nuwe réménigo bé ni, inok fétengtengén taman sa taman i dakéle kégédawén betom bé Jesu Kristowe. ⁸ Non ménfukas tom dob de sala tom sabaf bé kégédaw i Tuluse amun ménunur tom. Ménkédan i kékukum ne betom békén sabaf bé galbék tome, yamula nirayén betom i umule magufusa sabaf saén bé kégédaw ne. ⁹ Mélaw énda géfélangka-langka tom sabaf bé kfukas tome, non énda ménfukas tom dob de sala tom sabaf bé fiyowe galbék tom. Yamula sabaf saén bé gédaw i Tuluse. ¹⁰ Sabaf bé kéunur tome bé Jesu Kristowe, lénimbag i Tuluse betom inok wén i mantu umul tom brab mantu adat tom. Fénwaléyén betom mantu inok rigoné tom i fiyowe galbék ténafadéyén rigoné tom.

¹¹ I de begom do békén Judio, fégétédém gom i sunguwe goho kom. I de Judio, rigoné roy adat ruwe fétuli (sani tanda i lowoh ruwe), atin fédawét ro begom do “Békén tuli”. ¹² Bé béno, bé énda séna munur gom, ménésuway gom bé Jesu Kristowe, brab énda mén-amung gom dob de étew fénemili i Tuluse. Brab békén kagom i fasad i Tuluse bé de étewén. Bé béno, fiyon fo ké méuyag gom dob duniiae ni, énda i inam gom brab énda gélolo gom i tintuwe Tulus. ¹³ Endob béleewe ni, munur gomén bé Jesu Kristowe funa kom ménwaléy do dumo no. Mélaw éndaén mérayu gom dob Tuluse non fénfégédét i Tuluse nén begom sabaf bé kéléhu Kristowe génantino no begom.

¹⁴ Sabaf bé Kristowe, i begeye do Judio brab de begom do békén Judio, ménwaléyén sébaan i uléw tome. Mélaw éndaén sébanil tom brab ménwaléy tomén sédumon sabaf bé kéléhu Jesu Kristowe dob kruse. ¹⁵ Atin amun ménléhuén, fénukasén betom inok éndaén kailanga tom i modore bé de sugu i kitab i de Judio. Atin i betome do ruwo gékélasi do étew, fénwaléyén betom sébaan mantu gékélasi do étew ménodor dob Beene. Mélaw ménkédanén i késébanil tome. ¹⁶ Atin kénda noy késékérít tome do Judio brab do békén Judio sabaf bé kéléhu ne dob kruse. Atin fénwaléyén betom ségékélasi do étew inok séfule tom méngadaf bé tintuwe Tulus. ¹⁷ I Kristowe ménangéy dob duniiae ni brab nureténi

Fiyowe Uret fantag bé kékéday kékérit i Tuluse. Nuretén i ni dob begeye do Judio do gédét dob Tuluse loo so dob begome do békén Judio do mérayu dob Tuluse. ¹⁸ Atin sabaf bé kéunur tome bé Kristowe, i betome, do Judio brab do békén Judio, fakay tom géfégédét dob Abaye Tulus sabaf bé tabang i Rémogor ne.

¹⁹ Mélaw i begome do békén Judio, éndaén sésuway gom bé de étew i Tuluse. Yamula ménwaléy tom sédumon sétiman Abay sani Tuluse, sabaf bé kéunur tome bé Kristowe. ²⁰ Atin i betome do munur bé Kristowe, ségiléw tom bé sébaane lawi féntindég i Tuluse dob sébaane dakél batéw. I Kristowe, Been i nan i maake batéw. Atin i de apostol brab de sénarigoy Tuluse muret bé kékérén ne, beroy de maak do liléy i nan lawi. ²¹ Mélaw émbagér i ni lawi sabaf bé Jesu Kristowe, brab Beeney funa tome ménwaléy lawi i Tuluse féngadafan de. ²² Atin i begome do békén Judio brab de kéluhana tom munur, féwaléyéy Tuluse betom sébaan lawi fébatio no bé Rémogor ne.

3 ¹ Atin sabaf bé kéluhanay de ni, dasala ku begom dob Tuluse. Atin i begéne Pablo ségétew munur bé Jesu Kristowe, ménférisuwu non fénférisu ro begén amun nuret gu begom do békén Judio fantage bé Jesuse. ² Gétiga ku énggelingoo kom i kégédaw i Tuluse begén bé sénarigén dob begéney ni galbék muret dob begome fantag bé Kristowe inok méfukas gom so. ³ Bé do gétah, ménbunéy i bantak i Tuluse. Endob fénggétiga no begén. Sénulat gun begom i klohe fantag bé de ni. ⁴ Atin amuk gébasana kom i sulat guwe ni, gétiga kom i kégésobut guwe bé ni ménbunéy kétoro fantag bé Kristowe. ⁵ Bé do gétah, i Tuluse énda fénggétiga no dob de étew i fantage bé ni ménbunéy. Endob béleewe ni, dob kétabang i Rémogor ne, fénggétiga noy ni dob begeye do apostol brab dob de sénarigo no muret bé kékérén ne. ⁶ Atin ay niy ni ménbunéy. I begome do békén Judio, féfiyonéy Tuluse so begom loo so bé de Judio, sabaf bé kéunur gome bé Fiyowe Uret. Atin mélaw ménwaléy tom maak sétiman lowoh brab Kristowey uléwe. Mélaw waléy so kagom i de fasad iray i Tuluse bé de munur bé Jesu Kristowe.

⁷ Atin i begéne, fénemili i Tuluse begén inok waléyu sugu-sugué no magéw mangéy muret bé Fiyowe Uret. Atin i Tuluse férigo no begén i ni galbék sabaf bé kégédaw ne begén brab sabaf bé barakat ne ménggféwaléy begén sugu-sugué no. ⁸ Begéney toowe fo gérifantad bé kéluhanay de munur bé Kristowe. Gido loo, fénfiyoy Tuluse begén bé késugu ne begén mangéy dob de békén Judio muret bé Fiyowe Uret fantag bé de toow fo fiyo do kéfiyonon gédotén sabaf bé kéunure bé Kristowe. ⁹ Brab sénuguén begén inok féfégésobut gu dob kéluhanay de étew i fantage bé kétumay Tuluse bé de bantakén. I Tuluse, sani léménimbage bé kéluhanane, bénunéyén i bantak ne bé do getah. ¹⁰ I funa nuwe bénunéyén i bantak ne, inok bé béleewe ni usaré no betom

do munur bé Kristowe fefégétiga no dob de barakatan do odoron do méguléw dob lawayoy fantage bé de médooy do kégétigay Tuluse.¹¹ I funa nuwe réménigo bé ni, non tumané noy bénantak ne bé do gétah bé énda séna ménlimbag i de éntingayén de. Atin ténuma non béléewe ni nusarén i Kadna tome Jesu Kristo.¹² Atin ménwaléy tom do dumo Kristowe sabaf bé kéunur tome de. Mélaw éndaén mémala tom fégédét dob Tuluse.
¹³ Mélaw, do dumo gu, ongoté ku dob begome, bé kagom tete i de fédew gom bé kérasay guwe ni bé kétabanga kuwe begom. Yamula fatut moror gom de non kéfiyono kom i funa kuwe mérasay inok féfiyonéy Tuluse begom.

¹⁴ Amuk fégitungé kuy kéluhanay de rénigoy Abaye Tulus dob betome, lémingkuwédu brab démasalu dob Beene.¹⁵ I kéluhanay de munur dob duniyae ni taloo no dob lawayo, ténavagén betom do étewén.¹⁶ Atin ongoté ku dob Tuluse bé usaré noy dakéle barakatén fégéfélbagér bé de fédew gom bé barakat i Rémogor ne.¹⁷ Brab ongoté ku so bé fébatié noy Kristowe dob de fédew gom sabaf bé kéunur gome. Atin ongoté ku so bé fébagéré noy de kégédaw gom,¹⁸ inok i begome brab kéluhanay de dumo tom munur bé Kristowe gédoté tom i kégétigane inok gésobuto tom i kédakél i kégédaw Kristowe betom.¹⁹ Hoo, méuyotu de ké gétiga kom i kégédaw ne, fiyon fo ké énda i ségétew étew tintu gésobut de fo, inok énda témérén bati i Tuluse dob de fédew gom brab énda so témérén i Tuluse mémanduon begom inok maak ménféno gom bé tintuwe Tulus.

²⁰ Dayewé tom i Tuluse, sani témabangane betom bé barakat ne, brab toow na fo médooy gérígono nuwe bé de ongoté tom brab de fégitungé tom.²¹ I kéluhana tome do munur brab i Jesu Kristowe, dayewé tom damén i Tuluse taman sa taman. Amen.

4 ¹Mélaw i begéne, sani ménférisuwe sabaf bé rénigo guy galbék i Kadnane, ongoté ku dob begome bé rigo gom i fiyowe loo bé adate kétayay Tuluse, non begom i de étew fénemili i Tuluse inok munur de.
²Fatut démoyun gom térfantad brab métanék i adat gome brab tingkél gom. Atin fatut fégito gom i kégédaw gome bé de késétingkél gom.
³Atin tintu fo ingat gom inok énda fésésuwayén i de fédew gom taloo no sébanil gom, non i Rémogor i Tuluse fénwaléyén betom sédumon brab ségiléw i de fédew tom inok énda séédél tom.⁴ Non sébaan saén i lowohe, sani de betom do munur bé Kristowe, atin Been i uléwe. Atin sébaan saén i Rémogore mémanduon betom kéluhanan. Atin sébaan saén i inam tome sani umule magufusa sabaf bé kékemili i Tuluse betom.⁵ Atin sébaan saén i Kadnane sani Kristowe, brab sébaan saén i unuro tome sani Kristowe, brab Been saén i funa tome ménbautis.⁶ Sébaan saén i Tuluse, sani Abay i kéluhanay de étew, sani Kadnay kéluhanane. Been i batie dob kéluhana tome do munur brab férigo no betom kéluhanan i kaane galbék.

7 I séngae ségétew betom munur de, iraya no kéfurung loo bé kétaya Kristowe iraya no de. 8 Non wén i Ménsulate Kébérél i Tuluse mano, "Amun déméniyat mangéy dob lawayo, nuwitén i médoowe do fériusu. Atin wén i de nirayén bé de étewén." 9 Ati atag i "déméniyate mangéy dob lawayo?" Ay niy atag ne: bé sunguwe ménlus mangéy dob duniyae. 10 Mélaw i Beene ménlus, sani Kristowe, Beene soy déméniyate. Atin ménangéy dob toowe fo gérotor laway inok diyo dob kéléuhanay de gonon. 11 Atin Beeney méniraye bé de kéfurungoy de étew. I de dumo betom, fénémilién waléy apostol. Atin i de dumo de sénarigén dob berowey murete bé kéléréh ne. I de dumo de muret bé Fiyowe Uret. Atin i de dumo de, fénwaléyén do pastor. Brab i de dumo de, fénwaléyén do téromo. 12 Rénigo noy ni inok tafayé no betom kéléuhanan dob galbék i Tuluse, inok waléy émbagér i lowoh Kristowe, sani de betom do munur de. 13 Mélaw waléy ségiléw i de fédew tom bé kéunur tome brab kégétiga tome bé Jesu Kristowe Nga i Tuluse. Atin waléy méégét i kéunur tome de brab waléy géiringo tom i tintuwe fiyo adat Kristowe. 14 Atin amuk mérigoj ni, békén tomén maak do nga, magad munur bé de séségiyo-giyo do tugi kétoro i de étew do magakar. 15 Yamula, i betome fatut démoyun ureté tom i towe bé lala tome mégédaw bé de dumo tom. Atin fatut maak méruck tom inok énda i kulang dob kéunur tome brab minut tom loo bé Kristowe sani uléw tome. 16 Non i betome do munur bé Kristowe, maak betom i sébaane lowoh, brab Beeney uléwe. Atin i kéléuhanay de réfa i lowohe toow fo fiyoy késumfat ruwe sabaf bé Kristowe. Mélaw amuk sétabang i de réfaén, fiyo brab méruck i lowohe. I atag i ni, amuk rigoné tom i de séségiyo-giyo galbék niray i Kadnane, waléy tom minut ségiléw bé Kristowe sabaf bé késégédaw tome.

17 Amun begéney sénarigoy Kadnane muret, ay niy bérhékuwe begom: Kagomén rigonén i ségiléwe bé adat i de békén méngintulus, non énda i lanték i de itunga ro. 18 Brab délémon i de kégéitung ro. Enda i karo bé mantuwe umul tidew dob Tuluse non énda i gétiga-tiga ro sabaf bé kétégas i de uléw ro. 19 Enda mémala ro fantag bé de tete adat ro. Atin odoro ro saén i de tete kétayay de lowoh ro, brab témantu ro fo rémigo bé kéléuhanay de udenén klasi do tete.

20 Endob i begome, amun ménunur gomén bé Kristowe, békén i nan i ténoroe begom. 21 Non toow fo énggelingoo kom i fantage bé Jesuse. Brab amun ménwaléy gom do kuyugén, téneroén begom i towe tidew dob Beene. 22 Mélaw tagak gom i tafaye itunga kom brab de tete adat gom brab de kétaya kom bé do gétah, non toow fo tete i de kétayay de lowoh gom témugion begom funa kom waléy mébinasa. 23 I de fédew gom brab de itunga kom fatut fo waléy mantu. 24 Fatut féwaléy gom mantuy de adat gom lénimbag i Tuluse ségiléw bé Beene. Tidew bénou, giton métintu gom brab fiyo gom.

²⁵ Mélaw kagomén témugi! Fatut kéluhana kom bérhé kom i toowe dob de dumo gom. Non i begome do munur ségiléw tom do réfa i lowoh Kristowe atin Been i uléwe. ²⁶ Atin amuk mékérít gom, kagom fédayaén de gésala gom bé kékerit gome. Atin kagom férugayén de ké mékérít gom, kagom fégumahén de témégén. ²⁷ Inok énda fakayén fanangguwité Satanase begom. ²⁸ I ménakawe fatut témérén ménakaw. Atin fatut gémalbék inok gédoté noy méntintuwe kéfaguyag atin inok gétabanga noy de méskinan. ²⁹ Kagom émbéréh tete. Yamula béréh gom i fiyowe dob de dumo gom sani kébéréhe gétabang bero brab géféeégét bé kéunur ruwe. Témabang gom mélaw bé de mégélingo begom bé ati kailangay de fédéw ro. ³⁰ Atin kagom rigonén i kékiaay Rémogor i Tuluse, sani funa nuwe tete i fédéw ne. Non i Rémogor i Tuluse, Been i tanda i Tuluse émfégito bé do étew i Tuluse betom. Brab Been i maake tising émfégito bé fégilidéy Tuluse moso i kéfukas ne betom dob de sala tom. ³¹ Fatut kéra komén kéluhanan i kékerit gome brab kétete i de fédéw gom bé de dumo gom. Kagom fémalanén i de dumo gom taloo no bérého kom bero tete. Brab kagomén sémiyaw. ³² Yamula fatut gom ségédaw brab séfésagad gom, loo bé kéfésagad i Tuluse begom sabaf bé Kristowe.

5 ¹ Atin non ménwaléy gomén do nga i Tuluse toow fo gulaané no, fatut iring gom de. ² Fatut démoyun gom ségédaw loo bé kégédaw Kristowe betom funa no nirayén i férénawa nuwe féngéfukas betom. Ménwaléy maak dukah ténułak toow fo mamut, sani funay Tuluse ménswat.

³ Atin non do étew i Tuluse begom, kagom arumén, taloo no bigaén gom, taloo no rémigo gom bé tete. Atin kagom séuret-uret fantag bé de ni. ⁴ Atin kagom so labitén i de tete do mékérésik brab do dufang do késébéréh. Yamula fatut usaré kom i de ba gom fésalamat dob Tuluse. ⁵ Non bérhé ku begom i toowe, i de étew do bigaén taloo no do rémigo tete, énda géahur ro dob kéféguléw Kristowe brab Tuluse. Atin énda so géahur i de étew do arumén non i káruméne ségiléw bé kéfengadafé kéninontow.

⁶ Kagom munur bé de tugién uret énda i lantékén. Non wén i de étew téromo bé ulanden ké tete i de rigonén. Endob been i de niy funay Tuluse mékérít brab kukumé noy de étew énda modor ro bé de suguén. ⁷ Mélaw kagom séloyuk bé de ni do tete étew. ⁸ Bé do géyahur, rénigo gom i de tete brab maak ménagéw gom dob délémone. Endob amun ménwaléy gomén munur bé Kadnane, magéw gom dob géfekayae. Mélaw rigo gom i fiyowe loo bé fatute rigonéy de étew i Kadnane. ⁹ Non amuk magéw gom dob géfekayae, gérigono kom i fatute brab métintuwe brab toowe. ¹⁰ Féganad gom i adate émfésuwat bé Kadnane. ¹¹ I de étew batí séna dob délémone, sani de énda séna gétiga roy Kadnane, kagom mamung bé de tete rigoné ro énda i lantékén. Yamula fégito gom i fiyowe adat inok

témérén ro damén bé de tete rigoné ro. ¹²I de ménbunéy do tete fo rigoné ro, toow fo mékémala fiyon fo ké labitén saén. ¹³Endob amuk réméndaw i Soloe, giton tete foy de ni do ménbunéy. ¹⁴Atin mélaw waléy ro bati dob géfékayae. Non wén i binuwayae fantag bé de tete étew mano, “I beeme fidong, tékénal go, brab tébule go! Atin i Kristowe réméndaw dob beeme.”

¹⁵Mélaw fétuntay gom i de adat gom. Kagom iringén i rigonéy de étew énda gétiga roy fatute. Yamula iring gom i rigonéy de étew toow fo gétigan. ¹⁶Toow fo tete i de rigonén dob de ni do gai. Mélaw amuk wén i fiyo gérigono kom, fagayas gom rigo. ¹⁷Mélaw kagom rémigo kédufangan. Yamula fétuntay gom i kétayay Tuluse, inok gétiga kom.

¹⁸Atin kagom molon bé arake funa kom mébinasa. Yamula fatut maak méféno gom bé Rémogor i Tuluse. ¹⁹Atin amuk séuret-uret gom, sébéréh gom bé de kanta tidéw dob Ménsulate Kébéréh i Tuluse. Brab kanta gom i de kanta démayéw bé Kadnane loo bé kéfemandu i Rémogor i Tuluse. Atin fatut kémanta gom dob Tuluse bé de fédéw gom. ²⁰Fatut fésalamat gom bé Abaye Tulus sénga téklid sabaf bé kéluhanay de kéfiyonon nirayén dob begome. Atin labit gom i dawét i Kadna tome Jesu Kristo ké fésalamat gom.

Fantag bé de sébawag

²¹Fatut térifantad gom brab sébasa gom inok giton i kébasana kome bé Kristowe.

²²I begome do libun bawagan, fatut odoro kom i sugu i bawag gome, ségiléw bé kéodoro kome bé de sugu i Kadnane. ²³Non i lagéye, beeney uléw i bawag ne ségiléw bé Kristowey uléw i de munur. Non betom i maake lowohén brab Been i uléwe sabaf bé kéfukas ne betom. ²⁴Mélaw i de libun do bawagan, fatut odoro roy de sugu i de bawag ro loo bé kéodoro tome do munur bé de sugu Kristo.

²⁵Atin i begome do lagéy bawagan, fatut mégédaw gom bé de bawag gom loo bé kégédaw Kristowe betom do munur de. Gétiga tom i kégédaw ne betom non nirayén i férénawa nuwe bé kéfukas ne betom. ²⁶Rénigo noy ni inok waléy tom malinis dob adafay Tuluse, sabaf bé kéfábautis tome dob wayége brab kéodoro tome bé kékéréh ne. ²⁷Rénigo noy ni inok i kéluhanay de munur maak bawag Kristowe, uwitén dob adafa nuwe toow fo malinis, brab métintu énda i salaén. Féwaléyé no betom fiyo inok géttanggafa no betom. ²⁸Fatut i de lagéy mégédaw ro bé de bawag ro loo bé kégédaw ruwe bé karowe lowoh. I lagéye mégédaw bé bawag ne mégédaw so bé lowoh ne, non ménwaléy ro maak sétiman lowoh. ²⁹Non énda i étew ikaa noy kaane lowoh. Yamula féamaé no brab talimaé no, ségiléw bé kétalima Kristowe betom do munur de. ³⁰Non betom i de réfa i lowoh ne. Brab Beeney uléwe. ³¹Non wén i Ménsulate Kébéréh i Tuluse

mano, “Been i niy funay lagéye témagak bé boh ne brab idéng ne inok mawag. Atin i ni ruwo gétew étew waléy sébaan i lowoh ruwe.”³² Been i niy sébaane fo dakél toow fénggétigay Tuluse betom dob Ménuslate Kébérén. Atin gésobuto kuy atag i ni fantag bé Kristowe brab de betom do munur de.³³ Gido loo, i atag ne fantag so bé késébawage. Non i séngae lagéy fatut mégédaw bé bawag ne. Brab i séngae libun fatut basana noy bawag ne.

Fantag bé de nga brab de lukés ro

6 ¹Atin i begome do nga, fatut odoro kom i sugu i de lukés gom, non been i nan i fatute rigonéy de munur bé Kadnane. ²Wén i sugue dob kitabe mano, “Basana moy boh me brab idéng me.” Been i niy sunguwe sugu wén i fasade,³ mano, “Amuk basana moy de lukésém, féfiyoné ku beem brab méraru go dob duniyae ni.”

⁴Atin i begome do boh brab do idéng, amuk sugué kom i de nga gom, kagom fékéritén bero. Yamula fifit gom bero brab féginau gom bero dob kétoro i Kadnane.

⁵Atin i begome do rifén, fatut odoro kom i sugu i de amu gom, brab fatut basana kom bero brab mágilak gom bero. Rigo gom i ni tidéw dob fiyowe fédéw gom maak odoro kom i de sugu Kristo. ⁶Fatut rigo gom i fiyowe sénga tékélid, békén saén dob gaiwe téngténgéy amu gome begom inok mésuwat begom. Yamula tidéw dob fiyowe fédéw gom, rigo gom i kétayay Tuluse maak begom i de rifé Kristo. ⁷Atin fatut moror gom ké gémalbék gom, maak Kadnan i galbéko kome, békén saén kéilawan. ⁸Atin fégétédém gom i ni, i Kadnane barasa noy séngae ségétew étew, fiyon fo ké rifén taloo no békén, sabaf bé fiyowe rénigo no.

⁹Atin i begome do amu, fatut féfiyo gom i kérigo gome bé de rifé kom. Kagom fégilakén bero bé de tete kébérén gom. Fégétédém gom i ni, i begome brab de rifé kom ségiléw gom so falan riféy Tuluse dob lawayo, brab énda i isu ramigo no.

I de kulangén iray i Tuluse

¹⁰Do dumo gu, ay niy tamfaday bérhéhé kuwe begom dob ni sulat. Fébagér gom dob barakat i Kadnane inok émbagér i kéunur gome.

¹¹Usar gom i kéluhanay de kulangén niray i Tuluse begom inok géatuh gom bé Satanase brab de tete akarén. ¹²Non békén do kéilawan i dumo tome sétiboh. Yamula sétiboh tom bé de saitan brab do tete odoron dob délémore ni duniya brab dob lawayo. ¹³Mélaw béleewe ni gamak gom i de kulangén tidéw dob Tuluse inok amuk géumah i tetee gai dunsukoy Satanase begom, géatuh gom de. Tidéw bénó, amuk gilid i késétilbohe, témanban gom.

¹⁴Mélaw ingat gom. Béréh gom i toowe. Been i niy maake légét gom kay sundalowe. Atin rigo gom i métintuwe. Been i niy maake futow fégékélung gom bé de kuméng gom. ¹⁵Atin uret gom démoyun i Fiyowe Uret fantag bé kétanéke tidéw dob Kristowe. Been i niy maake safatos gom kay sundalowe. ¹⁶Atin féginugut gom bé Kadnane sénga tékélid. Been i nan i maake kélung gom. Mélaw énda guratén gom bé de mérino séléb fégéfana Satanase begom. ¹⁷Tayakuf gom i kéfukas i Tuluse begom dob de sala gom. Non been i niy maake futow sayaf fégétéléb bé de uléw gom. Atin usar gom i kébéréh i Tuluse, non been i niy maake sundang gom tidéw dob Rémogor i Tuluse. ¹⁸Dasal gom sénga tékélid ongot gom tabang dob Tuluse. Atin fédaya gom fédasaléy Rémogor i Tuluse begom. Fatut mingat gom sénga tékélid brab dasala kom soy de dumo gom munur inok tabangay Tuluse so bero. ¹⁹Atin dasala kom so begén inok fémanduoy Tuluse begén muret bé kébéréh ne, brab inok énda mégilaku émfégétigan bé de Fiyo Uret ménbunéy bé do gétah. ²⁰Atin sabaf bé Fiyowe ni Uret, begén i ségétéwe sénarigon magéw mangéy muret. Gido loo, béléewe ni ay niwu dob férisunone sabaf bé kéuret guwe. Mélaw dasalanu inok émbarawu muret bé Fiyowe Uret loo bé fatute.

²¹I Tikikowe, sani kégédawa tome dumo tom munur brab gésarigone sugu-suguéy Kadnane rémigo bé galbék ne, beeney murete begom bé goho kuwe ni dini inok gétiga kom i ati rigoné kuwe. ²²Been i niy funa kuwe de sémugu mangéy dob begome inok ureté noy fantage bé de goho key dini brab inok féfiyoné noy de fédéw gom.

²³I Abaye Tulus brab Kadnane Jesu Kristo, mégédaw ro damén bé kéluhana kome do munur brab iray ro damén begom i métanéke fédéw brab émféégét bé de kéunur gom. ²⁴Atin mégédaw damén i Tuluse bé kéluhanay de énda témérén féimu bé Kadna tome Jesu Kristo taman sa taman.

Pablo

I Sulat Pablowe dob de Munur bé Kristowe dob Filipos

Ay niy sébaane bé de sénulat Pablo, sani ménbantuge muret fantag bé Jesu Kristowe. Tafayén séménugud i Pablowe dob ingéde Filipos atin wén i de étew diyo ménwaléy ro do munur bé Jesuse sabaf bé kéuret ne. Séménulat i Pablowe dob berowe.

Amun sénulat Pablowej ni, ménférисунén sabaf bé kéuret ne fantag bé Kristowe. I de munur diyo bati dob Filipos, amun énggélingoo ro ménférису Pablowe, sénugu roy ségétewe bero mangéy bati sétifon bé Pablowe dob férисунone inok tabanga no brab fagifaté no. Ménféluit ro so kurta fégébayad bé fégéfaguyag Pablowe amun ménférису. Mélaw sénulat Pablowej ni sulat émfésalamat dob berowe sabaf bé tabang ruwe de.

Fiyon fo ké ménférису Pablowe, toow fo méoror sabaf bé kéunur ne bé Jesu Kristowe. Séménulat soy Pablowe dob de munur do bati dob Filipos inok énda témérén ro munur, fiyon fo ké ati kérasaye gégumah dob berowe. Ténoro Pablowe bero bé fatut ro méoror sabaf bé Kristowe.

1 ¹I begeye Pablo brab Timoteo do sugu-sugué Jesu Kristowe. Sulata key begom do munur bé Jesu Kristowe dob Filipos brab dob de odoro kom do munur brab do témabang.

²I Abay tome Tulus brab Kadnane Jesu Kristo mégédaw ro damén begom brab iray ro damén begom i métanéke fédéw.

³Fésalamatu dob Tulus tome sénga gétédémo ku begom. ⁴Atin sénga dasala ku begom kéluhanan, toowu de fo moror, ⁵non bé kétabanga kome begén bé galbék guwe muret bé Fiyowe Uret tidéw fanay kéunur gom taman so béléewe ni. ⁶Mélaw gétiga kuy ni: I fiyowe rigonén féngganay i Tuluse dob begome, fétausé no taman dob gaiwe séfule i Jesu Kristowe moso. ⁷Toow fo gulaané ku begom kéluhanan. Fatut gulaané ku begom non ténabanga kom begén bé galbék guwe. Fiyon fo ké béléewe ni diniwu dob férисунone ni loo so bé do gétah bé kétoro guwe brab késumbul guwe fantag bé Fiyowe Uret, ténabanga kom so begén bé ni galbék niray i Tuluse non mégédaw betom. ⁸I Tuluse gétiga no toow foy ni béréhé

ku begom. Toowu fo mégundoy begom brab féimué ku fo begom loo bé kéimu Jesu Kristowe betom.

⁹ Atin démasalu dob Tuluse bé minut dakél i késégédaw gome brab minut so dakél i kégétiga come bé toowe brab fatute, ¹⁰ inok géfémilio kom i tintuwe fiyo. Mélaw énda i sala gom fégétébo begom dob gaiwe séfule i Kristowe moso. ¹¹ Atin gérigo gom bé médoowe fiyo sabaf bé kéféwaléy Kristowe begom métintu, inok médayéw brab basanay Tuluse.

¹² Do dumo gu, méuyotu de ké gétiga kom i ni: I kéluhanay de ménrigo dob begéne, been i da nan i téménabange bé kélégéb i Fiyowe Uret.

¹³ Non i kéluhanay de sundalo mantay dob lawi i datue ni brab kéluhanay de étew so dini, gétiga roy funa kuwe ménférisu dini non begén i sugusuqué Kristowe. ¹⁴ Atin sabaf so bé kékérégéa i késarig ruwe bé Kadnane. Mélaw méninut ro émbaraw brab éndaén mágilak ro muret bé kékérégéa i Tuluse.

¹⁵ I de dumo de ureté roy fantage bé Kristowe non médaléw ro begén brab méuyot ro de ké gélawana roy de rénigo gu. Endob i de dumo de, fiyoy funa ruwe muret fantag bé Kristowe. ¹⁶ Ureté roy fantage bé Kristowe sabaf bé késégédaw ruwe non gétiga ro fénemili i Tuluse begén muret brab sémumbulon bé de étew sébanil bé Fiyowe Uret. ¹⁷ Endob i de dumo de, énda fo fiyoy funa ruwe muret bé Fiyowe Uret. Non muret ro sabaf saén bé kéuyot ruwe waléy émbantug. Atin marok géumana roy kékérégéa kuwe dob férisunone ni.

¹⁸ Endob ulanden! Mororu sabaf bé kéuret ruwe fantag bé Kristowe. Fiyon fo ké tete i funa ruwe muret bé Fiyowe Uret loo ké fiyo, i toowe fo mélaga ké ureténi i Kristowe. ¹⁹ Atin énda témérénu moror, non gétiga ku géumah soy gaiwe métangéyu dob férisunone ni, sabaf bé de kédasal gom brab dob tabang i Rémogor Jesu Kristowe. ²⁰ Atin i toowe fo kétaya ku brab wén i inam gu bé gétausu rémigo bé kétaya nuwe inok énda i funa ku mémala. Atin démoyun damén émbarawu fo toow inok i kéluhanay de rigoné ku, been i de niy funa Kristowe médayéw. Mélaw fiyon fo ké méuyagu taloo no méléhuu, médayéw i Kristowe sabaf bé kéluhanay de rigoné ku. ²¹ I karang guwe de, i funa kuwe méuyag inok médayéw i Kristowe. Endob amuk méléhuu, toow na fo fiyo, non diyou dob lawayo. ²² Mélaw énda gétiga kuy isuwe fémilié ku. Non amuk méuyagu, gétausu rémigo bé fiyowe galbékén. ²³ Endob méuyotu méléhu inok gétékédanun dob duniyae ni brab inok géséloyukun bé Kristowe dob lawayo, inok toow na fo fiyoy kébati guwe. ²⁴ Endob toow na fo fiyo ké méuyagu dini inok gétaus i kétabanga kuwe begom. ²⁵ Atin sabaf bé ni, gétiga ku tausu séna méuyag. Atin batiu dob begome kéluhanan inok gétabanga ku begom émféégét bé kéunur gome bé Kadnane brab émfétaus bé kéroror gome sabaf bé kéunur gome, ²⁶ inok amuk géséfuleu

mangéy dob begome, méumanan i funa kome démayéw bé Jesu Kristowe sabaf bé begéné.

²⁷Endob fiyon fo ké ati mérigowe dob begéné, fatut féfiyo gom i de adat gom loo bé kétoro i Fiyowe Uret fantag bé Kristowe, inok fiyon fo ké énda géangéyu diyaan, gétiga ku énda émbaleng i de fédew gom. Yamula gélingoo ku bé sébaan i de fédew gom brab méuyot gom gémalbék bé galbék i Tuluse inok waléy médooy étewe munur bé Fiyowe Uret fantag bé Jesu Kristowe. ²⁸Atin kagom mégilak bé de sébanil begom. Non amuk énda mégilak gom bero, gétiga ro niray i Tuluse begom i umule magufusa, atin gétiga ro so kukuméy Tuluse bero. ²⁹Non mégédaw i Tuluse begom, nirayén begom i kuwagibe munur bé Kristowe loo soy kérasaye sabaf bé Kristowe. ³⁰Non béleewe ni kéluhana tomén mérasay. Enggito gomén i kérasay guwe sabaf bé ni galbék bé do gétah, brab énggelingoo komén i fantage bé kérasay guwe béleewe ni. Atin béleewe ni, mérasay gom so loo bé ni.

Fantag bé Kristowe

2 ¹Do dumo gu, ménwaléy émbagér i de fédew gom sabaf bé kéunur gome bé Kristowe. Atin ménwaléy fiyoy de fédew gom sabaf bé kégédaw Kristowe. Atin ménwaléy gom sédumon sabaf bé Rémodor i Tuluse. Atin ménwaléy gom ségédaw brab méséuray na. ²Mélaw, sabaf bé de ni, ongoté ku dob begome, fésébaa kom saén i de fédew gom brab de itunga kom, brab fésébaa kom saén i de kétaya kom, brab fébagér gom i késégédaw gome. Toowu fo moror begom amuk rigoné kom i de ni. ³Atin kagom rémigo bé de éntingayén non bé kéuyot gome saén émbantug look inok waléy gom gérotor. Yamula térifantad gom brab kagom fégitungén de ké toow gom na fo gérotor bé de dumo gom. ⁴Atin kagom saén fégitungén i fantage bé de kagom do kailangan. Yamula fégitung gom soy ati kétabanga kome bé de dumo gom. ⁵Fatut iring gom i adat Jesu Kristowe brab itunga nuwe. ⁶Non fiyon fo ké ségiléw bé Tulusey Kristowe, énda fégitungé no fatut témulama rémeféng bé Tuluse. ⁷Yamula tétagakén i kégérotor ne brab méntéfwaléy ségétew sugu-suguén bé kéumah ne dob kéilawané. ⁸Atin amun ménwaléyén ségétew kéilawan, toow fo méntérfantad bé kéodoro nuwe bé de sugu i Abay ne Tulus taman so bé kéfélhue de dob kruso. ⁹Atin sabaf bé ni, toow fo fénwaléy i Tuluse gérotor brab nirayén dey dawéte toow na fo gérotor bé kéluhanay de ségiyo dawét, ¹⁰inok amuk labitén i dawét Jesuse, i kéluhanay de étew dob lawayo, brab dob duniiae ni, loo soy dob fantad i duniiae, lémingkuwéd ro. ¹¹Atin kéluhana ro fayagé roy Jesu Kristowe, Been i Kadnane, inok médayéw i Abaye Tulus.

¹² Mélaw do dumo gu, odor gom bé de sugu gu. Amun diyou séna dob begome, toow fo nodoro kom i de sugu gu. Atin béleewe amun éndaén

diyou dob begome, fatut na fo odoro kom i kéluhanay de sugu gu. Mélaw fédayday gom i kégalbék gome dob kéodoro kome bé Tuluse brab dob kénéfagadata kome de inok méfukas gom dob kékukume énda i tamana no. ¹³ Non démoyun i Tuluse diyo dob begome brab tabanga no begom inok kétaya kom brab gérigone kom i késuwata nuwe.

¹⁴ Rigo gom i kéluhanay kétaya nuwe, kagom riklamo de taloo no séédél gom de, ¹⁵ inok waléy gom do métintu étew nga i Tuluse brab énda i do sala gom fégétébo i de étew begom fiyon fo ké sélawék gom bé de tete étew bati dob délémond ni duniya. Ségiléw gom bé de giton dob lawayo, ¹⁶ non ureté kom dob berowey fantage bé mantuwe umul. Atin amuk rigoné kom i ni, toowu fo moror sabaf bé begome dob gaiwe moso séfule i Kristowe. Non giton énda ménsinggula i kéluhanay rénigo guwe bé kétabang guwe begom inok munur gom.

¹⁷ Iray guy kéuyag guwe keeyén maak tulak dob Tuluse. Amuk lee, méororu séréngan begom, atin maak umanén dob kagome tulak iray gom dob Tuluse sénga fuweh bé kéunur gome de. ¹⁸ Atin loo soy begome, fatut so moror gom séréngan begén amuk mérigo ni.

¹⁹ Sémarigu bé Kadnane Jesus bé fakay séko sugué kuy Timoteowe mangéy dob begome. Atin amuk séfule mélaw mangéy dini, gébérého no begén i fantage bé begome funay fédew guwe waléy fiyo. ²⁰ Been saén i dumo guwe dini gulaané no so begom. ²¹ I de ségiyo étew, fégitungé ro saén i fantage bé de karo kéfiyonon. Enda fégitungé roy fantage bé galbék Jesu Kristowe. ²² Endob i Timoteowe, gétiga kom toow fo fiyoy adat ne. Ténabangén begén lémegéb bé Fiyowe Uret loo bé kétabang i ségétéwe nga bé abay ne gémalbék. ²³ Mélaw, méuyotu de sému gom mangéy diyaan amuk toowén fo gétiga kuy mérigeowé dob begéne. ²⁴ Atin sémarigu so dob Kadnane bé énda mérugayén tidew béní, i begéne so géangéyu so dob begome.

²⁵ Atin gékaranga ku kailangan fo sugué ku séfule mangéy dob begomey dumo tome Epafrodit. Beeney dumo guwe gémalbék muret bé Fiyowe Uret fiyon fo ké wén i do sébanil begey. Beeney sénugu gome mangéy dob begéne inok tabanga no begén, atin béleewe ni féséfuleé kun mangéy dob begome. ²⁶ Toowén fo mégundoy begom kéluhanan brab méliu i na nuwe non énggelingoo kom i kédéruu nuwe. ²⁷ Toow fo ménfasang démeruun, gédétén fo méléhu. Endob toow fo ménuray i nay Tuluse de loo soy begéne. Non amuk ménléhu de, méuman i kétete i fédew guwe de. ²⁸ Mélaw toow fo méuyotu de ké géuleén mangéy diyaan non gétiga ku toow gom de fo moror ké géségo gom, brab éndaén mélaw i funa ku émbuku. ²⁹ Mélaw fatut toow gom de fo moror témayakuf non beeney dumo tome munur bé Kadnane. Atin fatut basana kom loo soy de étew loo bé beene ni. ³⁰ Non géfédew fo méléhu bé kégalbék nuwe bé Kristowe. Nirayén i férénawa nuwe bé kétabanga nuwe begén bé galbék guwe énda gétabang gom de.

3 ¹Mélaw, do dumo gu, ay niy de tamfaday de béréhé ku begom dob sulat guwe ni. Oror gom sabaf bé Kadnane! Atin ulanden ké séguleé ku man sultatén i fantage bé de sénulat gun begom bé do gétah. Non amuk séguleé ku man béréhén i de ni, mas kloh i kaid gome. ²Ingata kom i de étew tete i de rigoné ro. Fégésé ro begom mémali bé de lowoh gom non sénugu i Tuluse kun. ³Endob i toowe, betomey de tintu étew i Tuluse, békén i berowe. Non maak ténuli i Tuluse betom sabaf bé késarig tome bé Jesuse. Non féngadafé tom i Tuluse dob Rémogor ne brab moror tom sabaf bé kéunur tome bé Jesu Kristowe. Enda sémarig tom bé de adat loo bé kétulie loo bé de rigoné ro. ⁴Endob amuk fatut i késarige bé de adat loo bé nan, fakayu de so gésarig. Atin amuk wén i étew gékaranga no toow fo nodoro noy adat i de kéilawan brab gésarig de, labi na foy begéné. ⁵Non amun ménsegéfadiyan sénay kéumah guwe de, méntuliun. Begén i ségétéwe séfu Benjamene, séfu i katufua keye Israel. Tintuwu fo Judio. Atin fantag man bé kitab i de Judio, toow fo nodoro ku non ségétéwu Fariseo. ⁶Atin non toow fo odoro kuy de adat i de Judio, fénrasay gu foy de munur bé Jesuse. Atin fantag so bé kéodore bé kitabe inok i étewe waléy méntintu, énda fo énggáféliso ku de. ⁷Bé do gétah, makuk i kéluhanay de ni méumanan i kétintu guwe de. Endob béléewe ni gétiga ku fo énda i do lantékén. Atin tétagak guy de ni atin gésarigu bé Kristowe. ⁸Atin békén saén i de niy de tétagak gu, non tétagak guy kéluhanane inok gédoté kuy toowe na fo fiyo, sani kégétiga kuwe bé Kadna kuwe Jesu Kristo. Sabaf bé Kristowe tétagak guy kéluhanay de éntingayén. I kéfégitung guwe de, maak do réhuk saén do nibér gu inok gédoté kuy Kristowe, ⁹brab waléy dumo no. Brab inok waléy métintu dob adafay Tuluse sabaf bé kéunur guwe bé Kristowe. Enda waléy métintu sabaf bé kéodore kuwe bé kitabe. Mélaw i funa kuwe waléy métintu békén tidéw dob lowoh guwe, yamula tidéw dob Tuluse sabaf bé kéunur guwe bé Kristowe. ¹⁰I toowe fo kéuyoto ku béléewe ni ké gétiga ku fo toow i Kristowe brab barakat ne sani Kaane barakat sabaf bé kétébule ne. Atin méuyoto de so ké géamungu bé de kérasayén loo bé kéiray ne bé férénawa nuwe dob kruse, ¹¹inok i begéné so gétébuleu so moso.

¹² Enda béréhé kuy de ni ké ménwaléyun fo métintu loo bé ni taloo no éndaén foy sala gu. Békén! Endob fédaydayu brab télamané ku inok mérigo moso i kéluhanay de ni, non been i niy funa Kristowe fénwaléyén begén kaan. ¹³Do dumo gu, gétiga ku fo toow, énda séna méntuman i de ni dob begéné. Endob i sébaane télamané ku rigonén, sani lémifote bé de rénigo gu bé do gétah inok géfégitungo kuy de gérígono ku moso. ¹⁴I begéné ségiléwu bé ségétéwe sékuya. Fééntangu léméntu taman dob tamfaday sékuyaane inok témabanu brab gédoté kuy baras guwe, sani

kébati guwe dob lawayo sabaf bé kétawag i Tuluse begén sabaf bé Jesu Kristowe.

¹⁵Loo bé nan i fatute fégitungéy kéluhanay de méégét munur. Endob amuk wén i dumo begom énda magayun no bé begéné, i Tuluse féfégétiga no begom i katabuwane. ¹⁶Endob fatut odoro tom i kétoroe nodoro tomén taman so béleewe ni.

¹⁷Atin do dumo gu, fédayday gom iring begén, brab iring gom i de étew ségiléw i adat ruwe bé begeye. ¹⁸Médoonén gule bénréh guy ni bé do gétah. Atin béleewe ni kérewo kuy kékérél guwe de man ségule dob begome. Médooy de étew toow fo tete i de adat ro. Brab sabaf bé de ni tete rigoné ro, giton dob niy sébanil ro bé kéurete fantag bé kéléhu Kristowe dob kruse. ¹⁹Atin géangéy ro moso dob emfernowo, non i maake tulus ro sani de tete kétayay de lowoh ro. Atin félangka-langka ro bé de tete rigoné ro funa ro damén fatut mémala. Atin fégitungé ro saén i fantage bé de étingayén dob duniyae ni. ²⁰Endob i betome, dob lawayo diyo i tintuwe ingéd tom. Atin ongot-ongoté tom i mémukase betom ké séfuleén mangéy dini tidéw dob lawayo, sani Kadna tome Jesu Kristo. ²¹Amuk gérumahén i nan gai, fégaliné noy de ni gérifantad lowoh tom brab rigoné no loo bé kaane barakatan lowoh. Atin rigoné noy ni dob barakat ne sani barakat ne fégéséguléwén bé kéluhanay étingayéne.

4 ¹Mélaw do dumo gu, fédayday gom i késarig gome bé Kadnane brab odor gom bé de suguéen. Toow fo gulaané ku begom brab mégundoyu fo begom. Mororu fo sabaf bé begome, brab géfedayéw-dayéwu fo sabaf bé begome.

²Atin i begome Eudia brab Sintiki, ongoté ku dob begome, séfagayun gomén non i begome sédumon sabaf bé Kadnane. ³Atin i beeme so, sani tintuwe dumo gu gémalbék, ongoté ku dob beeme tabanga moy de ni libun inok géséfagayun ro. Non mégéror ro témenabangan begén bé galbéké lémégéb bé Fiyowe Uret, bero ro Klemente brab de ségiyo dumo gu gémalbék. I kéluhanay de dawét ro ménsulatén dob libroy Tuluse sani listanane bé de dawét i de étew gégedot bé umule magufusa.

⁴Oror gom sénga tékélid sabaf bé Kadnane. Séguléé ku man béréhén: Oror gom!

⁵Atin fatut ségdaw gom non gédétén i késéfule i Kadnane. ⁶Atin kagom émbuku. Yamula dasal gom dob Tuluse brab ongot gom i de kailanga kom brab fatut so fésalamat gom dob Beene ké mongot gom. ⁷Atin i kétanéke tidéw dob Tuluse, diyagané noy de fédéw gom sabaf bé kewaléy gome do dumo Jesu Kristowe inok énda émbuku gom. Toow fo fiyoy kétanéke tidéw dob Tuluse, mélaw énda gésobutoy de étew de.

⁸Atin do dumo gu, umana kuy de ni sulté ku bé ni sa: Fégitung gom i de étingayén do fiyo, brab toow, brab métintu, brab malinis. I de ni étingayén funay de étew médayéw brab mébasanan amuk rigoné ro.

⁹Atin rigo gom i de ténero gu begom brab de énggito gom rénigo gu. Atin mélaw diyo dob begomey Tuluse, sani miraye bé kétanéke dob betome.

¹⁰Toow fo dakél i kéoror guwe brab kédayéw guwe bé Kadnane non fénggito gom man i kégédaw gome begén. Ménrugayén énda fénggito gom de fiyon fo ké méuyot gom de émfégito, énda fakayén.

¹¹Békén bérhéhé kuy ni sabaf bé wén i kulang bé de kailanga ku. Non téneroén begén i ni, bé fiyon fo ké atiy goho kuwe, fatut fo kasukudanu.

¹²Enggéagéwo kuy mérasaye kéfaguyag loo soy gaba-gabawe kéfaguyag. Atin téneroén begén bé fatutu kasukudan sénga tékélid dob séngae gonon, fiyon fo ké mélayahu taloo no bésoru, fiyon fo ké mérasay i kéfaguyag guwe taloo no gaba-gaba. ¹³Gérigono kuy kéluhanane sabaf bé tabang Kristowe émfébagér begén.

¹⁴Endob toow fo fiyoy rénigo gome dob begéne, non ténabanga kom begén dob gaiwe ménkérégénanu. ¹⁵I begome bati dob Filipos, gétiga kom fo toow bé begom saén i de munur téménabangan begén amun téragak guy gono kome dob Masedonia dob gaiwe mantu séna nuret guy Fiyowe Uret. Enda i ségiyo do munur ménamung begom mirayan begén kurta. ¹⁶Atin amun diyou séna dob Tesalonika, médoor gule fén-uwito kom begén tabang. ¹⁷Enda bérhéhé kuy ni ké iraya kom man begén. Yamula kétaya ku fo ké dakél i barase gédoté kom sabaf bé gédaaw gome. ¹⁸Enggédot gun i tabange fénuit gom begén bé Epafroditowe. Atin toow fo gaba-gabay fénuit gome begén. Mélaw ménwénén i kéluhanay kailanga kuwe béleewe ni. I nan do niray gom maak toow fo mamut tulak émfésuwat bé Tuluse brab gétaggafa no. ¹⁹Atin i Tulus guwe, iraya no begom bé kéluhanay kailanga kome tidéw dob toowe fo kékawasa no sabaf bé Jesu Kristowe. ²⁰Médayéw damén i Abay tome Tulus taman sa taman. Amen.

²¹Ségifaé kuy kéluhana kome do munur bé Jesu Kristowe diyaan. Atin i de dumo gu dini ségifaé ro so begom. ²²Atin i kéluhanay de munur dob ni gonon ségifaé ro so begom, labi na foy de munur bati dob lawi i datue ségifaé ro so begom. ²³Mégédaw damén begom kéluhanan i Kadnane Jesu Kristo.

Pablo

I Sulat Pablowe dob de Munur bé Kristowe dob Kolosas

Ay niy sébaane bé de sénulat Pablo, sani ménbantuge muret fantag bé Jesu Kristowe. I Pablowe ni, énda séménugudén mangéy dob ingéde Kolosas, éndob énggélolo noy odoroy de munur diyo féndawét Epafras. I Epafrase ni, ménwaléy munur non énggélungoo noy kéuret Pablowe dob ingéde Efeso.

Amun sénulat Pablowej ni, ménférisu de nén sabaf bé kéuret ne fantag bé Kristowe. Ménangéy i Epafrase dob Pablowe brab bénréhén dob beene bé wén i do tugién témodo énggumah dob de munur do bati dob ingéde Kolosas. Bénréh i de ni tugién témodo bé wén kun i de télaki do mas na gérotor bé Jesu Kristowe atin wén so kun i do étew fatut féngadaféy de étew. Atin i de ni tugién témodo, bénréh ro so bé de munur bé Kristowe, fatut ro kum modor bé kitab i de Judio.

Mélaw séménulat i Pablowe dob de munur do bati dob Kolosas inok toroé no bero bé i Jesuse, Been i tintuwe Nga i Tuluse, atin mélaw énda i mas na gérotor bé Beene. Ténoroén i Kristowe Beene saén i fatute féngadaféy de étew, békén do télaki taloo no do ségiyo. Atin ténoroén bé i funay de étew méfukas ro bé de sala ro, non bé kéunur ruwe saén bé Jesu Kristowe. Mélaw énda kailanga roy modore bé kitab i de Judio. Sénulat Pablowej ni dob berowe inok gétiga roy toowe fantag bé Kristowe atin inok énda munur ro bé de kétoro i de tugién témodo énggumah dob berowe.

1 ¹I ni sulat tidéw dob begéne, sani Pablowe ségétew apostol sénugu Jesu Kristowe non been i niy kétayay Tuluse. I begéne brab dumo tome munur Timoteo sémulat gey mangéy dob begome ²do munur bé Kristowe dob Kolosas, sani de dumo gey démayday fo modor bé Kristowe.

I Abay tome Tulus mégédaw damén begom brab irayén damén begom i métanéke fédew.

³Sénga dasala key begom dob Tuluse, sani Abay i Kadna tome Jesu Kristo, démoyun gey fo fésalamat dob Beene sabaf bé begome. ⁴Non énggélungoo key i fantage bé méégéte kéunur gom bé Jésu Kristowe brab kégédaw gome bé kéluhanay de dumo tom munur. ⁵Atin i funa

kome munur brab mégédaw, non bé inam gome bé de baras gom gédoté kom moso dob lawayo. Atin énda mékédan i de ni baras gom. Enggétiga kom i fantage bé ni amun mén-uret dob begomey toowe, sani Fiyowe Uret fantag bé Jesuse. ⁶Atin i ni Fiyo Uret énggélungoo kom, been soy niy lémégébe dob médoowe do étew dob duniyae ni. Atin sabaf bé kéunur ruwe de, waléy fiyoy adat ruwe loo bé begome tidéw dob sunguwe gai énggélungoo kom i kégédaw i Tuluse brab tintu gésobuto kom i ni kégédaw i Tuluse. ⁷Enggélungoo kom i fantage bé ni kégédaw i Tuluse tidéw dob Epafrase, sani gulaané tome dumo tom sugu-sugué Kristowe. Beeney mésarigone gémalbék tétabangan begey muret fantag bé Kristowe. ⁸Bénréhén begey i fantage bé kégédaw gome sabaf bé kéfemanduoy Rémogor i Tuluse begom.

⁹Mélaw tidéw fanay kégélingo gey bé de ni, démoyun dasala key begom. Ongoté key dob Tuluse, fefégétiga no begom i kétaya nuwe rigoné kom, brab fefégésobuté no begom brab fefégétiga no begom i fatute dob kéfemandu i Rémogor ne. ¹⁰Atin mélaw, gérigono kom i kétayay Kadnane inok mésuwat bé de adat gom. Gérigono kom i de kéluhanay de fiyo brab waléy gétiga kom i fantage bé Tuluse. ¹¹Atin démasalu bé fébagéré no begom bé barakat ne inok fédayday gom témingkél brab moror gom fiyon fo ké mérégén i de gétamana kom. ¹²Atin géfésalamat gom dob Abaye Tulus non fénaitén so begom inok gégedot gom bé de irayén dob de étewén, sani de étew dob géfekayaé munur bé Kristowe. ¹³Non i Abaye Tulus, fénukasén betom tidéw dob délémone, sani kéféguléw Satanase brab fénbatién betom dob géfekayaé, sani kéféguléw i gulaané nuwe Ngaén Jesus. ¹⁴Atin sabaf bé kéléhu i Nga ne, ménfukas tom tidéw dob Satanase brab ménfésagad i de sala tom.

Fantag bé Kristowe

¹⁵Enda giton i Tuluse, éndob i Kristowe, been i ménfégítowe bé atiy Tuluse non giton i Kristowe. Atin Beeney sunguwe Ngaén non ménwénén bé énda séna lénimbag i Tulusey de udenén éntingayén. Atin Been i toowe na fo gérotor bé kéluhanay de lénimbag i Tuluse. ¹⁶Non fénlimbag i Tuluse bé Kristowey kéluhanay éntingayéne, dob lawayo brab dob fantade, do giton brab de énda do giton, fiyon i de rémogor do énda gitono brab de odoro ro loo soy de méguléw bero, falan Kristoy léménimbage bé kéluhanay de éntingayén inok usaré noy kéluhanane. ¹⁷Wénén i Kristowe bé énda séna ménlibag i de udenén éntingayén. Atin i kéluhanay de éntingayén diyo dob karowe gonon non Kristowey méguléwe béro. ¹⁸I kéluhana tome do munur, betom i maake lowoh Kristowe atin Beeney uléwe. Atin Been i miraye umul dob betome do munur de. Beeney sunguwe Nga i Tuluse, atin Beeney toowe na fo gérotor bé kéluhanay de tébule. Mélaw Beeney toowe fo gérotor, gérotor na bé kéluhanane. ¹⁹Non sabaf fo dob kétayay Tuluse,

tintu fo ségiléw soy Kristowe bé Beene. ²⁰ Atin méuyot de so ké i kéluhanay éntingayéne dob duniiae ni brab dob lawayo géséfagayun de non bé Nga ne. Atin bé kéléhu i Nga ne dob kruse, énggféwaléyoy Tulusey kéluhanane dumo no.

²¹ Bé do gétah, méravy gom dob Tuluse brab sébanil gom bé Tuluse non bé de tete rénigo gom brab de tete kéfítung gom. ²² Endob béleewe ni non bé kéléhu Kristowe, fénwaléy i Tuluse begom do dumo no, inok waléy gom métintu dob adafa nuwe énda i sala gom brab énda i gétébo begom. ²³ Endob kailanga kom i émfédidaye bé késarig gome bé toowe kétoro. Atin féégét gom i kénur gome. Brab kagom térenon i kégéinam gome bé de kéfiyonon fénasad i Tuluse begom amun énggelingoo kom i Fiyowe Uret. Been i niy toowe fo Fiyo Uret énggumah dob begome atin béleewe ni lémégéb mangéy dob kéluhanay ingéde dob duniiae ni. Atin i begéne, sani Pablwe, been i galbék guwe non sénugu Kristowe begén mangéy muret bé ni Fiyo Uret.

²⁴ Atin béleewe ni, mororu sabaf bé kérasay guwe tétabangan begom. Mororu non sabaf bé de kérasay gu, gétabangu émféglid bé kérasay Kristowe inok waléy fiyoy lowoh ne, sani de munur de. ²⁵ I Tuluse fénwaléyén begén sugu-suguéy de munur inok gétabanga ku begom bé kéuret guwe bé kéluhanay de kékéréhén. ²⁶ Been i niy kékéréh i Tuluse ménbunéy dob kéluhanay de étew bé do gétah. Endob béleewe ni féngétiga noy de étewén. ²⁷ Béleewe ni méuyot i Tuluse de ké fégétiga no dob kéluhanay de étewén i ni toow fo fiyo kétoro ménbunéy bé do gétah. Atin ay niy nan kétoro: Bati i Kristowe dob de fédew gom, atin sabaf bé ni waléy gom toow fo fiyo dob lawayo loo bé kéfiyoy Tuluse. I ni kétoro kay kéluhanay de étew. ²⁸ Mélaw ureté key i fantage bé Kristowe dob kéluhanay de étew. Brab féingaté key i kéluhanane brab toroé key beroy kéluhanay gétiga keye inok kéluhana ro munur bé Kristowe inok waléy ro énda i kulang dob kénur ruwe. ²⁹ Atin i begéne fégéroru gémalbék inok mérigo damén i de ni. Atin fébagéréy barakat Kristowe begén inok gérigo kuy de ni.

2 ¹ Méuyotu de ké gétiga kom i kégéror guwe gémalbék tétabangan begom brab de munur diyo dob Laodisea, loo soy kéluhanay de étew énda séna gólolo ro begén. ² Fégéroru gémalbék inok émbagér i de fédew gom brab inok waléy gom maak sédumon sabaf bé dakéle késégédaw gom, brab inok tintu munur gom bé toowe sabaf bé kégésobut gome bé toowe kétoro féngétigay Tuluse begom, sani fantage bé Kristowe. ³ Non Kristo saén i miraye bé tintuwe kégétigan brab tintuwe kégésobut.

⁴ Békéréh ku begom i ni inok énda géunur gom bé de tugi do akar i de étew fiyon fo ké maak toow i de kéuret ro. ⁵ Non fiyon fo ké énda diyoy dob begome, démoyun so fégítungé ku begom. Atin mororu fo non gétiga ku émbagér i kénur gome bé Kristowe, brab énda térenon kom de.

⁶ Atin non ténayakuf gom i Kristowe Kadna kom, fatut rigo gom i tintuwe miring bé Beene non begom i de dumo no. ⁷ Ufama, i kayéwe déménarir dob fantade. Atin i begome, maak déménarir gom dob Kristowe. Mélaw kagom sésuway bé Beene. Rigo gom i kétaya nuwe brab fébagér gom i kéunur gome loo bé ténoroe nén begom. Atin fatut démoyun gom fésalamat dob Tuluse sabaf bé Kristowe. ⁸ Atin ingat gom inok énda i magakaran begom émféunur bé de tugi do kétoro énda i lantékén, fiyon fo ké maak toow i de ni. Non tidéw saén dob kélawane, brab tidéw dob de saitan. Békén toow i nan kétoro non békén tidéw dob Kristowe. ⁹ I funa kuwe muret bé ni dob begome, inok gétiga kom i toowe fantag bé Kristowe. I Kristowe ménwaléy kélawan. Gido loo, i Kristowe, tintu ségiléw bé Tuluse. ¹⁰ Atin i Tuluse niraya no begom bé tintuwe umul sabaf bé begom i de dumo Kristo. Beeney toowe méguléw, gérotor na bé kéluhanay barakatane méguléw brab do odoron. ¹¹ Atin sabaf bé begom i de dumo Kristo maak do méntuli gomén. I kétuli gome, békén i kétulie rigonéy de étew loo bé adat i de Judio. Yamula Kristoy maake téménuli begom bé kékéda nuwe bé de tafayén tete do adat gom tidéw dob begome inok éndaén kailanga kom i rémigowe tete. ¹² Brab amun ménbautis gomén maak ménlébéng gomén brab maak méntébule gom ménggéodor bé Kristowe, sabaf bé kéunur gome bé barakat i Tuluse ménfétébule de. ¹³ Bé do gétah énda i umul gom magufusa, non médooy de sala gom brab non énda modor gom bé kitabe niray Moisese, loo bé kéodoroy de Judio de. Endob béleewe ni niray i Tulusey umule magufusa dob begome loo bé ménfétébulee bé Kristowe. Atin tintu fo fénsagadén i kéluhanay de sala tom. ¹⁴ Maak kénayasén i kéluhanay mén sulfate do sala tom brab kitabe atin maak kénlabo no dob kruso séréngan bé Jesuse inok amun ménléhu i Kristowe ménkédan i nan sulat fantag bé de sala tom brab kitabe so. ¹⁵ Bé bénou amun ménléhu i Kristowe, i Tuluse kénda noy kuwagib i de saitan méguléw brab de tete méguléw. Atin fénémala no bero dob téngaangay kéluhanay de étew bé kétabana nuwe bero bé kéléhu Kristowe dob kruse.

¹⁶ Mélaw kagom fédayaén i de étew sémugu begom bé atiy fatute amaé kom brab inémé kom, taloo no sugué ro begom bé fatut kun fégadata kom i de mékétéfu do gai, brab do mantu térsang kélungonon, brab do gai kétérén. ¹⁷ Non i kéluhanay de ni maak do anlung i kéluhanay de étingayén saén do gégumah mosoén, atin i tintuwe, been i Kristowe. ¹⁸ Kagom fédayaén i de étew do félangka-langka kukumé ro begom sabaf bé de énggito ro kun tidéw dob Tuluse. Télamané ro begom féféngadafén bé de télaki. Endob kagom fédayaén de. I de ni do étew do ubo-ubo saén do téritantad ro, éndob i toowe, do félangka-langka ro. Atin marok do gérotor ro sabaf bé de fiyo kégétiga ro kun, éndob i toowe, énda i funa ro félangka-langka. ¹⁹ I de ni do étew éndaén ménsumfat ro dob lowohe, sani Kristowe. Endob i betome maak lowoh Kristo, atin Been i uléwe.

Ménsufat tom kéluhanan loo bé de réfa i lowohe, atin férukéy Tuluse betom non ménsufat tom kéluhanan dob Kristowe.

²⁰ Maak ménléhu gom énggédor bé Kristowe. Mélaw méntangéy gomén tidéw dob de saitan brab éndaén géféguléwo ro begom. Mélaw kagomén modor bero. ²¹ Atin kagom odor-odor ké sugué ro begom maro, “Kagom kuwahén i ni”, taloo no, “Kagom amaén i nan”. ²² Non i amaéne waléy mékédan ké namaén. Mélaw kagom odoron i da nan do sugu non tidéw saén dob kéilawane. ²³ I de ni étew maak fiyoy de sugu ro, non fégésé roy de étew méngadaf bé de télaki, brab ubo-ubo ro térfantad, brab do lubagé roy de lowoh ro. Endob i de ni do sugu énda fo fiyo no brab énda fo toowén. Non énda gétabanga ro betom mika bé de tete kétayay lowoh tome.

3 ¹ Maak méntébule gomén ménggédor bé Kristowe, non wén i umul gom magufusa sabaf bé Beene. Mélaw fatut fégitung gom i fantage bé de éntingayén dob lawayo diyo. Non diyo i Kristowe méguléw mésar dob kuwonoy Tuluse. ² Fégitung gom i de éntingayén dob lawayo diyo, békén i de éntingayén dob fantade ni. ³ Non maak ménléhu gomén non éndaén modor gom bé de tete adat. Atin wén i tintuwe umul gom sétifon bé Kristowe dob lawayo. Atin énda mékédan i ni umul non sédumon i Kristowe bé Tuluse. ⁴ I tintuwe umul gom diyo dob Kristowe. Atin amuk séfule giton i kéfiyo nuwe, brab giton soy kéfiyoy mantuwe umul gom non géodor gom bé Kristowe.

⁵ Mélaw fatut tagak gom i de tete kétayay de lowoh gom, loo bé de kébigaén, brab mékrésike rigonén brab do kéarumén. Non i kéaruméne ségiléw bé kéfengadafe bé kéninontowe. ⁶ I de étew rémigo bé de ni, kukuméy Tuluse bero non énda modor ro bé de suguéen. ⁷ Atin fiyon i begome, rénigo gom i da nan bé do gétah, non tete sénay de adat gom bé béno.

⁸ Endob béleewe ni, fatut tagak gom i kéluhanay de ni, loo bé kékérite, brab kéraréke, brab de ségiyo na do tete kébéréh. ⁹ Kagom tugion i de dumo gom, non ténak gomén i de tafay do tete adat gom. ¹⁰ Brab ménfukas gomén bé kégédot gome bé mantuwe brab fiyowe adat. I ni mantu adat tidéw dob Tuluse. I Tuluse démoyun féwaléyé no begom mantu brab fiyo loo bé Beene inok toow fo gétiga kom i fantage bé Beene. ¹¹ Mélaw ségiléw-giléw i de mantu étewén, fiyon fo ké do Judio taloo no do békén Judio, fiyon fo ké do méntuli taloo no énda, fiyon fo ké do énggédéganad taloo no énda, fiyon fo ké do rifén taloo no békén. Enda i ségiyo gérotor saliyu bé Kristowe, brab Been i batie dob kéluhana tome do munur de.

¹² Betomey de étew fénemili i Tuluse waléy do étewén sabaf bé kégédaw ne betom. Mélaw fatut mégédaw gom brab méuray i na gome, brab térfantad

gom, brab métanék i de adat gom brab témingkél gom. ¹³ Atin fatut sétabang gom, brab séfésagad gom amuk wén i réménigo tete dob begome. Fatut fésagad gom i de dumo gom loo bé kéfésagad i Kadnane begom. ¹⁴ Atin saliyu na bé de ni, fatut ségédaw gom, non been i niy funa kome waléy sétiman i de fédéw gom loo bé fatute. ¹⁵ Atin fédaya gom i Kristowe fétanéké noy de fédéw gom, inok énda sékérít gom non been i niy funay Tuluse fénwaléyén begom sébaan lowoh. Atin fatut démoyun gom fésalamat. ¹⁶ Atin i kéluhanay de fiyo kétoro Kristowe fatut démoyun bati dob de fédéw gom. Atin fatut sétoro gom brab séféginau gom loo bé kéfégétigay Tuluse de begom. Atin kanta gom i de kanta démayéw bé Tuluse brab de kanta émfésalamat dob Tuluse. ¹⁷ Mélaw i rigoné kome, fiyon fo ké dob de kébérél taloo no dob de rigonén, fatut rigo gom sabaf begom i de kuyug i Kadnane Jesus. Atin sabaf bé kéunur gome bé Kristowe, fatut démoyun gom fésalamat dob Abaye Tulus.

¹⁸ I de begom do bawagan libun, odoro kom i de sugu i de bawag gom, non been i niy fatute rigonéy de munur bé Kristowe. ¹⁹ Atin i de begom do lagéy, fatut fégédaw gom bé de bawag gom brab kagom dusanén bero.

²⁰ I de begom do nga, odoro kom i kéluhanay sugu i de lukés gom, non been i niy késuwatay Tuluse. ²¹ Atin i de begom do boh brab do idéng, kagom fékélébuwanén i kéadowoy gome bé de nga gom taman waléy ro mémérit brab éndaén méuyot ro rémigo fiyo.

²² I de begom do rifén, odoro kom i kéluhanay sugu i de amu gom. Fatut rigo gom i fiyowe sénga téklid, békén saén dob gaiwe téngténgéy amu gome begom inok mésuwat begom. Yamula tidéw dob fiyowe fédéw gom odoro kom i de sugu ro sabaf bé dakéle kébasana kom bé Kadnane. ²³ Brab fiyon fo ké ati rigoné kome, fatut toow gom fo fégérör, maak békén saén kéilawan i galbéko kome éndob maak Kadnan i galbéko kome. ²⁴ Fégétédém gom i ni, i Kadnane barasa no begom. Non i Kadnane barasa no begom bé de kéfiyonon irayén dob de étewén. Non Kristowey tintuwe amu gom. ²⁵ Atin i de étew rémigo tete, kukuméy Tuluse bero loo bé kégétimal i de sala ro. Non i Tuluse, énda i isu ramigo no.

4 ¹Atin i de begom do amu, fatut rigo gom i métintuwe brab fiyowe dob de rifé kom. Fégétédém gom i ni, fiyon i begome, wén soy Amu gom dob lawayo.

²I kéluhana kome do munur, fatut fédayday gom i kédasal gome dob Tuluse. Brab kagom manat ké démasal gom. Atin fatut fésalamat gom dob Tuluse ké démasal gom. ³Atin dasal gom so mongot dob Tuluse tabanga no begey inok wén i do gai géureto key i kébérél ne brab géfégétiga key i Kristowe dob de étew. Been i niy kétoroe ménbunéy bé gétahe. Atin ménfériwu béléewe ni sabaf bé kéuret guwe bé ni Fiyo Uret. ⁴Mélaw dasal gom inok fékéntayéy Tulusey kéuret guwe loo bé fatute rigoné ku.

⁵ Atin fatut fétuntay gom i de rigoné kom dob de étew do énda séna munur bé Kristowe, atin tulama gom uret i Kristowe sénga gai fakay ureté kom. ⁶ Atin féfiyo gom démoyun i késéuret-uret gome bero brab i késéuret-uret gome fatut wén i lagaén. Brab fatut gétiga kom i fatute késumbul gom dob kéluhanay de étew.

⁷ I gulaané tome dumo tom Tikiko, sani mésarigone gémalbék brab dumo gu so ségiléw sugu-suguéy Kadnane, been i émfégétigane begom fantag bé begéné brab goho kuwe ni dini. ⁸ Been i niy funa kuwe de sému mangéy dob begome, inok féroré no begom bé kéuret ne begom fantag bé de goho key dini. ⁹ Atin wén soy ségétéwe lagéy dumo gom sébaan gonon féndawét Onesimo modor de. Beeney gulaané tome dumo tom munur bé Jesuse. Toow fo mésarigon i ni étew. I berowe, ureté ro dob begomey kéluhanay de ménrigo dini.

¹⁰ I Aristarkowe, ségifaé no begom. Been i dumo guwe ménférisu dini. Ségifaé Markose so begom, sani dumo Bernabewe sétiman bebe. Fén-uwito kun begom kébérélh fantag bé Markose, bé fatut tayakufé kom amuk gérumah dob begome. ¹¹ Atin i Jesuse (féndawét so Justo) ségifaé no so begom. Enda i ségiyo do Judio mamungon begén muret fantag bé kéguléw i Tuluse, saliyu bé de ni do télew gétew. Toow fo tétabanga ro begén.

¹² Atin i Epafrase, ségifaé no so begom, sani dumo gome sébaan gonon brab ségétéw so sugu-sugué Jesu Kristowe. Sénga tékélid démasal fo dob Tuluso inok méégét i kéunur gome brab énda téméréno, brab inok rigoné kom fo toow i kétayay Tuluse. ¹³ Enggitu gu foy kégéror ne gémalbék, mélaw géureto ku dob begomey fantage bé kégéror ne tétabangan begom brab de étew dob Laodisea loo soy de étew dob Hierapolis. ¹⁴ Atin i Lukase, sani gulaané tome muwa brab Demase so, ségifaé ro begom.

¹⁵ Atin fésamfay gom so dob de munur dob Laodiseay késégifa geye bero brab dob libune féndawét Nimfas brab dob de munur sélimud ménadaf dob lawi ne. ¹⁶ Amuk gilid basané kom i sulat guwe ni, fatut fébasa gom so dob de munur bati dob Laodisea. Brab wén soy sulat guwe mangéy dob de munur dob Laodisea, fatut basa gom so. ¹⁷ Atin bérélh gom dob Arkipowe bé fatut fétausé noy galbéke niray i Kadnane de.

¹⁸ I begéne Pablo, sulaté kuy ni géfuray késégifa bé de kagén kémér. Kagom lifotén begén nikét bé sangkalie dob férisunone ni.

Mégédaw damén i Tuluse begom.

Pablo

I Sunguwe Sulat Pablowe dob de Munur bé Kristowe dob Tesalonika

Ay niy sébaane bé de sénulat Pablo, sani ménbantuge muret fantag bé Jesu Kristowe. Tafayén séménugud i Pablowe dob ingéde Tesalonika, atin médoou bé de étew i ménwaléye do munur bé Jesuse sabaf bé kéuret ne. Endob i de Judio do bati diyo dénédél roy Pablowe mésut tidew dob ni ingéd, non ménika ro bé kétoro ne fantag bé Kristowe.

Amun tékédan i Pablowe tidew dob ingéde ni Tesalonika, ménbuku fantag bé de mantu do munur bati diyo. Ménbuku ké témérén ro munur bé Kristowe sabaf bé kéférasay i de Judio bero. Mélaw sénugu Pablowy ségétéwe dumo no gémalbék féndawét Timoteo inok susiné no ké ati gohoy de munur. Amun mén'séfule i Timoteowe mangéy dob Pablowe, nureténi fantage bé de munur dob Tesalonika bé fétausé roy kéunur ruwe bé Kadnane Jesu Kristo, fiyon fo ké mérasay ro. Mélaw sénulat Pablowy ni inok ureté no dob berowey kéoror ne brab inok féfiyo noy fédew ruwe. Dob ni sulat, ténero Pablowe soy fantage bé késéfule Kristowe brab kétébule i Tuluse bé de munur moso.

1 ¹I begeye Pablo, Silas brab Timoteo, sémulat gey mangéy dob begome do munur bé Kristowe dob ingéde Tesalonika, do étew i Abaye Tulus brab Kadnane Jesu Kristo.

Mégédaw damén i Tuluse begom brab irayén damén i métanéke fédew.
2 Démoyun gey fésalamat dob Tuluse sabaf bé begome kéluhanan, atin sénga tékélid dasala key so begom dob Tuluso. 3 Non buluk démasal gey dob Abay tome Tulus, gétédémo key i de fiyo rigoné kom sabaf bé kéunur gome bé Kristowe. Brab gétédémo key i kégéror gome gémalbék sabaf bé kéimu gome bé Kristowe. Brab gétédémo key i kéégét i inam gome bé késéfule i Kadna tome Jesu Kristo. 4 Do dumo gey, gétiga key méimu i Tuluse begom brab fénémilién begom waléy do étewén. 5 Non amun nuret gey dob begomey Fiyowe Uret, énda nureto key saén begom, yamula fénggito gey so begom i de mékégaif rénigo gey dob barakat i Rémogor i Tuluse. Atin tintu énggétiga key toow fo fiyoy toowe dob Fiyowe Uret. Atin énggito gom i fiyowe adat gey amun diyo gey dob begome atin

rénigo gey i kéluhanay de ni inok tabangé key begom. ⁶Atin i begome, niring gom i adat geye brab adat i Kadnane. Fiyon fo ké ménggéagéw gom médoō kérasay, tényakuf gom i Fiyowe Uret. Atin toow fo ménoror gom, non fénoror i Rémogor i Tuluse so begom. ⁷Mélaw, ménwaléy gom do étew fatut iringéy de munur dob Masedonia brab Akaya. ⁸Non i kékéréh i Kadnane nuret gom békén saén ménlégéb dob Masedonia brab Akaya. Yamula i kéurete fantag bé kénéunur gome bé Tuluse ménlégéb mangéy dob kéluhanay de ingéd. Mélaw éndaén kailanga key i murete fantag bé kénéunur gome. ⁹Non kéluhanay de étew muret fantag bé kétayakuf gome begey bé kénéangéy geye témukaw begom. Atin ureté ro soy kétakaf gome bé kékéngadaf gome bé de kéninontow amun ménunur gomén bé tintuwe brab méuyage Tulus inok féngadafé kom brab rigoné kom i kétaya nuwe. ¹⁰Atin ureté roy fantage bé kóngot-ongot gome bé késéfule i Nga ne Jesus tidéw dob lawayo. Beeney ténebule i Tuluse. Atin Beeney mémukase betom inok énda kukuméy Tuluse betom amuk kukumé no moso i de kéilawan.

2 ¹Do dumo gey, begom soy énggétigane de bé wén i fiyo rénígoy kétukaw geye begom. ²Gétiga kom i kékérasaye begey brab kékéngirase begey dob ingéde Filipos. Ménrigoy ni bé énda séna ménagéw gey de mangéy dob begome. Endob fénbaraw i Tuluse begey inok géureto key begom i Fiyowe Uret tidéw dob Beene, fiyon fo ké médooy sébanile begey. ³Atin i kéuret geye dob begome békén tidéw dob tugie kétoro, taloo no tete i funa keye témore, taloo no fagakara key begom. ⁴Yamula, doyuné key béréhén i kétayay Tuluse, non gékarangay Tuluse médait gey muret bé Fiyowe Uret funa no sénarigén dob begeye. Atin énda télamané key fésuwatén i de étew, yamula méuyot gey émfésuwat bé Tuluse sani gétigane bé de fédéw tom. ⁵Gétiga kom i kageye kékéréh. I kageye kékéréh békén saén kékuvéy taloo no fégékurta gey. Gétigay Tuluse so toow i ni. ⁶Atin énda séménléd gey bé de kédayéw gom begey taloo no kédayéw i de ségiyo. ⁷Wén i atura key sémugu begom témabang begey non do apostol Kristo gey, éndob énda rénígo gey de. Yamula amun diyo gey dob begome, mélémak i kérigo geye begom ségiléw bé ségétéwe idéng toow fo mélémak i kérigo nuwe bé de ngaén. ⁸Atin sabaf bé kékéimu geye begom, nuret gey dob begomey Fiyowe Uret tidéw dob Tuluse. Atin békén saén i ni, yamula ménuyot gey so séloyuk begom bé kéluhanay de rigoné kom, non toow fo gulaané key begom. ⁹Do dumo gey, gétiga key gétédémo kom soy kégéror geye gémalbék. Amun nuret gey dob begomey Fiyowe Uret tidéw dob Tuluse, fuweh na kélungonon i kégalbék geye inok gédoté key i kékaguyag geye. Mélaw énda méngkérégéan gom begey.

¹⁰Gétiga kom brab gétigay Tuluse so bé fiyo brab métintuy de rénígo gey dob begome do munur. Enda i rénígo gey funay ségétéwe gétébo begey. ¹¹Gétiga kom i de rénígo gey dob séngae ségétéw begom, ségiléw

bé kérigoy ségétéwe boh bé de ngaén. ¹² Non fénbagér gey brab fénfiyo gey i de fédew gom. Atin nongot gey dob begome bé rigoné kom i fiyowe sénga téklid loo bé fatute rigonéy de étew i Tuluse. Been i ménémilie begom inok féguléwo no begom brab inok gétiga kom i kéfiyo nuwe.

¹³ Atin ay ni soy funa keye démoyun fésalamat dob Tuluse. Amun nuret gey dob begomey kékéréh i Tuluse, fénggélingo gom brab tényakuf gom. Ménunur gom de bé békén saén kékéréh i kélawane, yamula kékéréh i Tuluse. Atin tintu fo tidew dob Tulusey kékéréh geye, non usaréy Tulusey kékéréh ne émfébagér bé kéunur i betome do munur bé Jesuse. ¹⁴ Atin do dumogu, i ménrigowé dob begome ségiléw bé ménrigowé dob de étew i Tuluse do munur bé Jesu Kristowe bati dob Judea. Fénrasay i de dumoro bero do Judio. Atin ségiléw so bé begome, i de dumogom bati dob kagome ingéd férasayé ro so begom sabaf bé kéunur gome bé Jesuse. ¹⁵ I de Judio dob Judea fénléhu roy Kadnane Jesus brab de sénarigoy Tuluse muret bé kékéréh ne. Atin fénrasay ro so begey. Toow fo énda mésuwat i Tuluse bero. Atin sébanil ro so bé kéluhanay étewe. ¹⁶ Non ténlama roy gémélée begey muret bé Fiyowe Uret dob de békén Judio, funa ro méfukas dob de sala ro. Mélaw ségiléw bé gétahe, toow fo ménféno ron bé salae. Mélaw béleewe ni, toow fo mékérít i Tuluse bero.

¹⁷ Atin do dumogey, amun énggéséféka tom bé magade saén énda gélifoto key begom. Yamula toow fo mégundoy gey begom atin toow fo témenlama gey man mangéy diyaan inok géségito tom. ¹⁸ Méuyot gey séfule mangéy dob begome. Brab i begéne, Pablo, médoonén gule témenlamawu mangéy diyaan. Endob alangé Satanase fo begey. ¹⁹ I funa keye damén méuyot séfule mangéy sugud-sugud diyaan, non toow fo gulaané key begom. Atin gulaané key begom non sabaf bé begome, ménwaléy méégét i kéongot-ongot geye bé késéfule Jesu Kristowe. Atin sabaf bé begome, toow gey fo moror. Atin amuk diyo gey moso dob adafay Kadnane Jesu Kristo ké séfule, géureto key i fiyowe fantag bé de rénigo gey sabaf bé kéunur gome. ²⁰ Toow, begom i funa keye moror brab géfélangka-langka.

3 ¹ Amun éndaén foy fégifusa key bé kégundoy geye begom, ² ménfagayun gey téliew gétew bé i begeye ruwo gétew bati gey dob Atenas, ³ brab ségétew saén i mangéye diyaan. Mélaw sénugu gey i Timoteowe, sani dumotome munur brab dumogey gémalbék dob Tuluse muret bé Fiyowe Uret fantag bé Jesu Kristowe. Sénugu gey i Timoteowe inok fébagéré noy kéunur gome brab féfioné noy de fédew gom, ³ inok énda i ségétew begom mébaleng i kéunur ne sabaf bé de kékérasay begom. Gétiga kom soy de ni do kérasay mérigo dob betome non beeniy bantak i Tuluse. ⁴ Non amun diyo gey séna dob begome, bénréh geyén dob begome bé férasayén tom moso. Atin tintu gétiga kom so bé toow

fo ménrigo.⁵ Been i niy funa kuwe séménugu bé Timoteowe mangéy dob begome. Endob téningkél guy kébuku guwe fantag bé begome. Mélaw sénugu guy Timoteowe inok susiné noy fantage bé kéunur gome. Ménbukuu ké ténéngkad Satanase begom brab bénalengén i kéunur gome atin mésinggula mélaw i kéluhanay galbék geye.

⁶ Atin mantu séna énggumah i Timoteowe tidéw dob begome. Atin nuwitén i fiyowe uret fantag bé kéunur gome brab kégédaw gome. Atin bénréhén begey i doyuné kom kun fégitungén i fiyowe fantag bé begeye. Brab bénréhén soy kéuyot gome géségito begey loo bé kéuyot geye géségito begom. ⁷Mélaw do dumo gey, fiyon fo ké béléewe ni médooy de mérégén géagéwo key brab kérasayan gey, ménfiyoy de fédéw gey sabaf bé begome. I kéunur gomey funay de fédéw gey ménfiyo. ⁸Non bé do gétah, toow fo ménbukuu gey fantag bé begome. Endob béléewe ni, moror gey non gétiga key mécégéti i kéunur gome bé Kadnane brab éndaén fo émbaleng i de fédéw gom. ⁹Béléewe ni, gefsalamat gey dob Tuluso fantag bé begome. Fefsalamat gey sabaf bé kéoror geye démasal dob Tuluso fantag bé begome. ¹⁰Fuweh na kélungonon, démasal gey fo toow dob Tuluse ongoté key dob Beene tungkasé no betom géségito man ségule inok géféeégéto key i kéunur gome amuk wén i kulang de.

¹¹I Abay tome Tulus brab Kadna tome Jesus, tafayé ro damén i agéwone inok géagéw gey mangéy dob begome. ¹²Atin féinutéy Kadnane fédakélén damén i késégédaw gome brab kégédaw gome bé kéluhanay de étew, inok waléy ségiléw bé kédakél i kégédaw geye begom. ¹³Mélaw fébagéré noy de fédéw gom, brab féwaléyé no begom toow fo fiyo brab do métintu inok énda métébo gom amuk diyo gomén dob adafay Abay tome Tulus bé gaiwe séfule i Kadnane Jesus beroy kéluhanay de étewén.

4 ¹Atin do dumo gey, wén soy bérhé keye begom. Ténoro gey begom i fatute adat rigoné kom inok mésuwat i Tuluse de. Atin been i niy rénigo gome. Atin béléewe ni sabaf bé atura keye tidéw dob Kadnane Jesus, ongoté key dob begome bé umana kom i da nan fiyo rigoné kom. ²Gétiga kom i kétoro geye begom sabaf bé atura keye tidéw dob Kadnane Jesus. ³Kétayay Tuluse ké métintu gom brab kagom bigaén. ⁴I kéluhana kome fatut féfiyo gom i kékawag gome. Rigo gom i fatute loo bé kétayay Tuluse. ⁵Mélaw féfiyo gom i kékawag gome loo bé fatute. Kagom iringén i de énda méngintulus, modor ro saén bé de tete kétayay de lowoh ro. ⁶Mélaw fatut énda i ségétew begom rémigo késalaan loo bé ni dob dumo gome munur bé Kristowe taloo no lafisé kom. Non i Kadnane kukumé noy de étew rémigo tete loo bé ni. Bénréh geyén i ni dob begome bé do gétah brab sulaté ku man béléewe ni. ⁷Non i Tuluse fénémilién betom inok waléy tom do métintu étew. Enda fénémilién betom inok sétayan tom bé békéne do bawag tom. ⁸Mélaw amuk wén i étew mika bé ni kétoro, békén étew i kéikaa nuwe, yamula Tulus, sani miraye bé Rémogor ne dob betome.

⁹Enda kailanga kuy sémulatane begom fantag bé kégédaw gome bé de dumo gom munur. Non Tulus i téménoroe begom bé fatut ségédaw gom.
¹⁰Atin gétiga key mégédaw gom bé kéluhanay de dumo gom munur bati dob Masedonia. Gido loo do dumo gey, ongoté key dob begome bé umana kom i kégédaw gome. ¹¹Fatut fétanék gom i kébati gome, brab kagom furaya fédew i de dumo gom. Brab fatut fégérör gom gémalbék inok gédoté kom i kéfaguyag gome, loo bé bénréh geye begom bé do gétah.
¹²Amuk rigoné kom i ni, fiyon i de énda munur fégadata ro begom, brab énda kailanga kom i mongote dob de ségiyo inok gédoté kom i kéfaguyag gome.

I késéfule Jesuse

¹³Atin do dumo gey, méuyot gey de ké gétiga kom i fantage bé de ménléhuén kuyug Kristowe. Non amuk gétiga kom i toowe fantag bé ni, énda tete i de fédew gom loo bé de étew énda i inam ro. ¹⁴Non munur tom bé i Jesuse, ménléhu, tidew béno méntébule, atin séfule moso. Mélaw munur tom bé i de ménléhu munur bé Jesuse, tébule ro brab féséfuleéy Tuluse moso bero modor bé Jesuse.

¹⁵Ay ni sulate key i kétoro i Kadnane: I de betom do méuyag séna dob gaiwe séfule i Kadnane, énda géétah tom bé de ménléhu do kuyug Jesuse. ¹⁶Non bé gaiwe séfule i Kadnane mélus tidew dob lawayo, wén i mékes toow fo métanug, brab émbérérh i gérotore télakiy Tuluse, brab émbérérh i témburiy Tuluse. Tidew béno, i de étew munur bé Kristowe do ménléhuén, beroy de sangu tébule. ¹⁷Tidew béno, i de betom do kuyug Jesuse do méuyag séna bé béno gai, sétimu tom betom i de mantu méntébule dob rawéno diyo. Atin sébalak tom bé Kadnane dob rotoro diyo. Tidew béno, diyo tom dob Kadnane taman sa taman. ¹⁸Mélaw séfelyo gom fédew bé de ni do kékérérh gu.

5 ¹Do dumo gey, énda kailanga key i sémulatane begom fantag bé gaiwe mérigoy de ni. ²Non gétiga kom i fantage bé késéfule i Kadnane moso. Kétékowan moso i de étew de loo bé kékétékoway ségétewe étew ké géumah i ségétewe ménakaw ké kélungonon. ³Bé lala i de étew émbérérh maro, “Métanék i ni gai brab énda i makakaid bé ni kébati,” sonom béno tékow géumah i gaiwe mébinasa ro. Atin énda géséliyaha ro de. Atin métékow i géumah i nan gai loo bé géumah i gaiwe kéararan i ségétewe libun obor. ⁴Endob do dumo gu, énda bati gom dob délémone loo bé de étew énda gétiga roy fatute. Mélaw énda fatut gom kétékowan bé géumah i gaiwe séfule i Kadnane loo bé ségétewe kétékowan ké géumah i ségétewe ménakaw. ⁵I kéluhana kome bati gom dob géfekayae sani dob fangangaturay Tuluse. Enda bati tom dob délémone, sani dob fangangatura Satanase. ⁶Mélaw katom démoyun féfidongén i de itunga tom loo bé de étew énda ongot-ongoté roy géumah i Kadnane. Fatut démoyun tom mingat brab féfiyoné tom i adat

tome brab énda odoro tom i de tete kétayay de lowoh tom. ⁷Kélungonon i kéfidong i de étew brab kélungonon soy kéolo ruwe. ⁸Endob i betome do batidob géfékayaé énda fatut odoro tom i de tete kétayay de lowoh tom. I betome do munur, fatut iringé tom i sundalowe, non fatut kégalé tom i kénur tome bé Tuluse brab kégédaw tome bé de dumotom non been i niy maake futow kémélung bé de kuméng tom. Brab fatut féégét tom i inam tome bé kéfukas tome dob de sala tom non been i niy maake futow sayaf téméléb bé de uléw tom. ⁹Non fénemili i Tuluse betom békén inok kukumé no betom. Yamula fénemilién betom inok fukasé no betom sabaf bé Kadnane Jesu Kristo. ¹⁰Non i Jesuse génantino no betom méléhu inok méuyag tom bati dob beene taman sa taman fiyon fo ké ménléhu tomén taloo no méuyag tom séna dob gaiwe séfule mangéy dini. ¹¹Mélaw fatut fétaus gom i késéfifiyo gome fédew brab késétabang gome loo bé rigoné kome béleewe ni.

¹²Atin do dumotom gey, ongoté key dob begome bé fégadata kom i de gémalbék dob begome, sani de odoro kom fénemili i Kadnane témore begom. ¹³Basana kom bero brab féimu gom bero sabaf bé galbék ruwe dob begome. Atin kagom sétiboh bé de dumotom munur.

¹⁴Atin do dumotom gey, ongoté key dob begome bé béréh gom dob de faukén bé fatut ro gémalbék. Atin fatut fébagér gom i fédew i de mégilak. Atin fatut tabanga kom i de étew kailanga roy tabange. Atin fatut tingkélo kom i kéluhanay de étew. ¹⁵Féginau gom i de étew bé békén ro sémulti ké wén i réménigo tete dob berowe. Yamula fatut rigo gom fiyo dob de dumotom munur brab dob kéluhanay de étew sénga tékélid.

¹⁶Atin fatut moror gom sénga tékélid. ¹⁷Brab fatut dasal gom démoyun. ¹⁸Atin fiyon fo ké ati goho kome, fatut fésalamat gom dob Tuluse. Non been i niy kétayay Tuluse rigoné kom sabaf bé kéwaléy gome do dumotom Jesu Kristowe.

¹⁹Atin kagom alangén i Ré mogor i Tuluse. ²⁰Atin kagom mika bé urete tidew dob Tuluse. ²¹Téngkad gom i kéluhanane brab tayakuf gom i fiyowe. ²²Atin féravy gom dob kéluhanay teteet.

²³I Tuluse, sani émfétanéke bé de fédew gom, féwaléyé no damén begom métintu. Atin diyagané no damén i de lowoh gom brab de rémogor gom brab de fédew gom inok énda i rigoné kom fatut sénditon gom de taman dob gaiwe séfule i Kadna tome Jesu Kristo. ²⁴I Tuluse, sani ménféwaléye begom do munur, rigoné noy ni non toow fo gésarigon.

²⁵Do dumotom gey, dasala kom so begey.

²⁶Fatut ségifa gom i kéluhanay de dumotom munur, brab fégito gom i kégédaw gome bero ké séségifa gom.

²⁷Atin sabaf bé atura kuwe tidew dob Kadnane, ongoté ku dob begome bé basa gom i ni sulat dob kéluhanay de dumotom munur diyaan.

²⁸Mégédaw damén begom i Kadna tome Jesu Kristo.

Pablo

I Géruwowe Sulat Pablowe dob de Munur bé Kristowe dob Tesalonika

Ay niy sébaane bé de sénulat Pablo, sani ménbantuge muret fantag bé Jesu Kristowe. Been i niy géruwowe sulatén dob de munur do bati dob ingéde Tesalonika. Dob sunguwe sulat Pablowe, téneroén i fantage bé késéfule Jesuse. Endob i de dumo bé de étew diyo, énda gésobuto ro de. Mélaw sénulat Pablowe man i ni sulat inok fégétiga no beroy fantage bé késéfule Jesuse, non bé sungu-sunguwe, gégumah i Ségétewe Sébanil bé Kristowe. I ni étew, médooy férigo nuwe tete bé de étew énda munur ro bé Kristowe.

Dob ni sulat, fénfiyo Pablowej fédéw i de étew do munur diyo inok fédayday ro munur fiyon fo ké mérasay ro sabaf bé kéunur ruwe.

1 ¹I begeye, Pablo, Silas brab Timoteo, sémulat gey mangéy dob begome do munur bé Kristowe dob ingéde Tesalonika, sani de étew i Abay tome Tulus brab Kadnane Jesu Kristo.

²I Abaye Tulus brab Kadnane Jesu Kristo, mégédaw ro damén begom brab iray ro damén begom i métanéke fédéw.

³Do dumo gey, fatut gey démoyun fésalamat dob Tuluse sabaf bé begome. Non toow fo minut méégét i kéunur gome brab minut fo dakél i késégédaw gome. ⁴Been i niy funa keye émbéréh bé fiyowe fantag bé begome dob de munur bé Kristowe dob de simbaay Tuluse dob de ségiyo ingéd. Ureté key i fantage bé kéunur gome brab kétingkél gome bé de kéférasay begom brab de mérégén géagéwo kom. ⁵Dob kéluhanay de ni, giton métintuy kékukum i Tuluse, atin waléy gom toow fo médait féguléwo no. Atin i funa kome mérasay, sabaf bé kéféguléwoy Tuluse begom. ⁶Endob métintuy Tuluse atin mélaw férasayé no moso i de étew émférasay begom béléewe ni. ⁷⁻⁸Atin kédané noy kérasay gome brab de kagey so kérasay. Rigoné noy ni dob gaiwe téfégito moso i Kadnane Jesus ké séfule tidéw dob lawayo kémégal mérino aféy, beroy de barakatan do télaki no. Atin bé beno kukumé noy de étew mika ro bé Tuluse brab de

énda munur bé Fiyowe Uret fantag bé Kadna tome Jesus. ⁹Mékukum ro mébinasa taman sa taman. Sésuway ro bé Kadnane brab dob barakat ne réméndaw. ¹⁰Mérigoy ni dob gaiy késéfule ne inok dayéwéy kéluhanay étew ne brab fégadatay kéluhanay de munur de. Atin géamung gom so dob berowe non ménunur gom bé kéureto keye begom.

¹¹ Been i niy funa keye démoyun démasal mongot dob Tuluse bé féwaléyé no fiyoy de adat gom loo bé fatute rigonéy de étew fénemili i Tuluse. Ongoté key so dob Beene bé tabanga no begom bé barakat ne inok gérigono kom i fiyowe kétaya kom rigonén sabaf bé kéunur gome de. ¹²Mélaw dayéwé kom i Kadna tome Jesus, brab i Beene dayéwé no so begom. Mérigoy ni sabaf bé kégédaw i Tulus tome brab Kadnane Jesu Kristo.

I késéfule Jesuse

2 ¹Do dumo gey, fégétiga key begom i fantage bé késéfule i Kadna tome Jesu Kristo brab kétimu ne betom inok diyo tom dob Beene. Ongoté key dob begome, ²bé kagom magad mégilak taloo no émbuku i de fédew gom amuk wén i gélingoo kom uret bé énggumahén kun i gaiy késéfule i Kadnane. Kagom munur de fiyon fo ké ségétew kun sénarigoy Tulusey ménbéréhe de taloo no bénréh i ségétewe kun muret taloo no wén kun i sulat tidew dob begeye fantag bé ni. ³Mélaw kagom fo fédayaén i de étew fagakara ro begom. Non i gaiwe séfule i Kadnane, énda gérumahén taman énda médooy de waléy sébanil bé Tuluse brab téfegitoy Tetee Etew sani tintuwe fo sébanil bé Tuluse, sani mangéye dob emfernowo moso. ⁴Atin ay niy rigonéy nan étew: Sébanil bé kéluhanay fengadaféy de étew brab kéluhanay de mékétéfu kun. Atin toow fo téfégérotor dob kéluhanay de ni. Atin mahur so dob lawi i Tuluse brab mésar diyo atin béréhé no been kun i Tuluse.

⁵ Aw énda gétédémo kom i de ni? Bénréh gun i ni dob begome bé do gétah bé kédiyo guwe séna dob begome. ⁶Endob béleewe ni wén i malang bé ni Tete Etew, atin gétiga kom i malange de. Endob téfegitoy ni Tete Etew dob fatute gai. ⁷Béleewe ni, gémalbékén i barakat i ni Tete Etew, éndob móbunéy i de rigoné no. Endob i malange de, taus i kéalang ne de taman mékédan. ⁸Tidew bénou, i Tetee Etew téfegito. Endob amuk gérumah i Kadnane Jesus, féléhué noy ni Tete Etew bé kéiyuf ne de brab binasané no dob barakat i kéréndaw ne. ⁹Endob amuk gérumah i ni Tete Etew, wén i barakatén tidew dob Satanase. Brab gérigono noy kéluhanay de séségiyo-giyo do mékégaif do galbék do énda toowén non békén tidew dob Tuluse. ¹⁰Brab rémigo do médooy do gékélasi do tete inok fagakara noy de étew do méléhu. Méléhu ro non énda ténayakuf roy toowe kétoro inok mífukas ro dob de sala ro. Yamula ménika ro de. ¹¹ Been i niy funay Tuluse fénfégitungén bero bé békéne katabawan inok munur ro bé de

tugi. ¹²Mélaw i kéluhanay de étew énda munur ro bé toowe kétoro éndob méuyot ro rémigo tete, kukuméy Tuluse bero.

¹³Do dumo gey, toow fo mégédaw i Kadnane begom. Fatut démoyun gey fésalamat dob Tuluse sabaf bé begom. Non fénemili i Tuluse begom fukasé no bé sunguwe. Hoo, fénwaléyén begom do métintu do étewén bé barakat i Rémogor ne brab dob kéunur gome bé toowe kétoro. ¹⁴Atin sénengkat i Tuluse begom munur dob Beene bé Fiyowe Uret nuret gey begom, inok kagom soy kéfiyoy Kadna tome Jesu Kristo. ¹⁵Mélaw do dumo gey, féégét gom i kéunur gome brab lékafit gom dob de toow ténero gey begom dob de kéuret gey brab dob sulat geye.

¹⁶⁻¹⁷I Kadna tome Jesu Kristo brab Abay tome Tulus fébagéré ro damén begom brab féfiyoné ro damén begom inok démoyun gom gérigo brab gébéréh bé fiyowe. Toow fo mégédaw i Tuluse betom, sani émfébagére bé de fédew gom brab émféegéte bé kégéniam tome bé de kéfiyonon irayén.

3 ¹Atin do dumo gey, ay niy tamfaday béréhé keye begom. Dasala kom begey inok magad mélégéb i kékéréh i Kadnane brab médooy de étew munur dob Beene brab fégadata ro so ségiléw bé de rénigo gom. ²Dasal gom so dob Tuluse inok énda fédayaé noy de tete étew ferasayé ro begey. Non médooy de étew énda munur ro bé Fiyowe Uret.

³Endob toow fo gésarig tom bé Kadnane. Fébagéré noy de fédew gom brab diyagané no begom tidéw dob Satanase. ⁴Atin sabaf bé kéunur geye bé Kadnane, gésarigo key begom. Gétiga key rigoné kom béleewe niy de sénugu gey begom brab taus gom so dob de gétundug do gai moso.

⁵I Kadnane fanangguvité no damén begom inok minut méégét i kéféimu gome bé Tuluse brab inok fédayday gom fo toow sabaf bé kétabang Kristowe.

Fatut gémalbék

⁶Do dumo gey, sabaf bé atura keye tidéw dob Kadnane Jesu Kristo, sugué key begom féravyu dob de faukén do munur, sani de énda modor bé de ténero gey bero. ⁷Gétiga kom fatut rigo gom i ségiléwe bé rénigo geye. Enda ménfaukén gey amun diyo gey dob begome. ⁸Atin énda nongot gey saén i kéfaguyag geye. Yamula bénlýey gey i de amaé key. Atin ménfégéror gey gémalbék fuweh na kélungonon inok énda kérégénan gom sabaf bé begeye. ⁹Rénigo gey i de ni fiyon fo ké wén i kuwagib gey médot bé kéfaguyag geye tidéw dob begome. Endob i funa keye énda ménidot bé kéfaguyag geye tidéw dob begome inok iringé kom i fiyowe adat fénggito gey begom. ¹⁰Atin amun diyo gey séna dob begome, ténero gey begom i ni: "I étewe mika gémalbék énda fatutén féamaén."

¹¹I funa keye sémulat bé ni non énggelingoo key wén i do faukén begom énda gémalbék ro. Enda kun i saliyu rigoné ro ké békén furaya fédew roy rigonéy de dumo ro. ¹²Mélaw sabaf bé atura keye tidéw dob

Kadnane Jesu Kristo, sugué key dob de faukén étew bé rigoné roy fatute.
Fatut gémalbék ro inok gédoté roy kéfaguyag ruwe.

¹³ Endob i begome, do dumo gey, kagom lugotén rémigo bé fiyowe.

¹⁴ Amuk wén i dumo gom énda modorén bé kétoro geye dob ni sulat,
fégilolo gom. Tidéw béno, kagom séloyuk de inok waléy mémala.

¹⁵ Endob kagom sébanil de, yamula féginau gom loo bé fatute rigoné kom
dob de dumo gom munur bé Jesuse.

¹⁶ I Kadnane, sani émfétanéke bé de fédew tom, toow fo damén
fétanéké noy de fédew gom sénga tékélid fiyon fo ké ati goho kome. Atin
diyo damén i Kadnane dob begome kéhuhanan.

¹⁷⁻¹⁸ Sulaté kuy ni bé kagéne kémér. Ségifaé ku begom. Loo bé niy
kéfirmana kuwe bé kéluhanay de sulat gu. Loo bé niy késulat guwe.

Mégédaw damén begom kéluhanan i Kadna tome Jesu Kristo.

Pablo

I Sunguwe sulat Pablowe dob Timoteowe

Ay niy sébaane bé de sénulat Pablowe, sani ménbantuge muret fantag bé Jesu Kristowe. Sénulatén dob ségétéwe lagéy féndawét Timoteo. I Timoteowe ni, been i dumō Pablowe amun ménagéw mangéy muret fantag bé Kristowe. Ténabanga Timoteowey Pablowe atin beeny maake nga Pablowe.

Sénulat Pablowej ni inok féingaté noy Timoteowe fantag bé de tugién do émbéréh énda kun fakay i mamae bé de dumō amaén. Wén soy de ségiyo tugién kétoro ro.

Dob ni sulat, ténero Pablowej fantage bé fiyowe kékéngintulus, atin téneroén soy fantage bé ati klasiy étewe fatut waléy odoroy de munur.

1 ¹⁻²Timoteo,
Sulata ku beem, sani maake nga gu sabaf bé kéunur me bé Kristowe. I begéné Pablo, sani ségétéwe apostol Jesu Kristowe non i Tuluse brab Jesu Kristowe sénugu ro begén muret fantag bé Kristowe, sani mémukase betom dob de sala tom. Atin i Jesuse, Beeney sarigo tome.

I Abaye Tulus brab Kadna tome Jesu Kristo mégédaw ro damén beem, brab méuray damén i na ruwe beem, atin iray ro damén beem i métanéke fédew.

Fantag bé tugiéne kétoro

³Féginauné ku beem loo bé rénigo guwe bé do gétah amun téナgak gu beem bé kéagéw guwe mangéy Masedonia. Kago tékédan dob Efeso, non wén i de étew témorō diyo bé éndae toow. Mélaw méuyotu de ké géléé mo bero. ⁴Béréhém bero bé békénén féganadé roy de kétutul brab de kélabit bé de médo do katufuan funa ro démoyun séédél. I de ni do éntingayén énda fégésobuté ro betom i bantak i Tuluse non i tintuwe aguwon, been i kéunure bé Kristowe. ⁵I funa kuwe sémugu bé ni inok ségédaw ro sabaf bé kétagak ruwe bé de sala ro brab sabaf bé fiyoy fédew ruwe brab sabaf bé tintuwe fo kéunur ro. ⁶Endob wén i de étew diyo bénaleng roy de ni inok témantu ro séédél bé éndae lantékén. ⁷Méuyot ro

témoro bé kitabe tidéw dob Moisese. Endob fiyon i karowe kékéréh, énda gésobuto ro de taloo no de kétoro ro do fégésé ro dob de ségiyo étew.

⁸ Endob i betewe, gétiga to fiyoy kitabe tidéw dob Moisese amuk fiyoy kékusare de. ⁹ Gétiga to, i kitabe békén rénigo inok kay de fiyo do étew. Yamula rénigoy kitabe inok wén i gémélé bé de tete étew, brab i de étew do ménsala, brab de énda méngintulus, brab de étew énda fégadata roy Tuluse, brab de méméléhu bé de lukés ro brab de méméléhu do étew, ¹⁰ brab de étew sétayan bé de békén do bawag ro, brab de bakla, brab de miyag, brab de témugi, brab de témo bo bé éndae toow, brab de étew félisé roy toowe kétoro. ¹¹ Atin i ni toow kétoro, tidéw dob Fiyowe Uret i ménbantuge barakatan Tulus, sani Fiyowe Uret sénarig dob begéne inok légébé ku.

¹² Fésalamatu fo dob Kadna tome Jesu Kristo, sani émfébagére begén inok gérígono kuy ni galbék. Fésalamatu dob Beene non kénarangén begén mésarigon funa no fénémilién begén inok waléyu sugu-sugué no. ¹³ Fénémilién begén fiyon fo ké bé do gétah ménbéréhu fo tete fantag bé Beene, brab fénrasay gu, brab fénengiras gu. Endob i Tuluse toow fo ménuray i na nuwe begén non énda séna ménunuru, mélaw énda gétiga kuy fatute rigoné ku bé beno. ¹⁴ Atin i Kadna tome toow fo ménggédaw begén brab fénunurén begén brab ménggédaw begén non been i de niy rigoné nuwe dob de étew do dumo Jesu Kristowe.

¹⁵ Wén i toowe kékéréh, fatut tayakuf gom brab unuro kom mano, “I Jesu Kristowe ménangéy dob duniyae ni inok fukasé noy de ménsala do étew inok énda mékukum ro.” Atin begéney toowe fo tete bero kéluhanan. ¹⁶ Endob been i niy funay Tuluse ménuray i na nuwe begén, inok giton i kédakél i kétinkél Jesu Kristowe bé kégédaw ne begén sani toowe fo tete étew. Mélaw i kéluhanay de étew munur dob Beene moso, sani de gégedot bé umule magufusa, gétiga ro toow fo mégédaw i Kristowe. ¹⁷ I tintuwe Tulus, sani éndae giton, brab sani méguléwe bé kéluhanane, brab sani énda i féganayay kéuyag ne taloo no tamana no, médayéw damén brab basanan taman sa taman. Amen!

¹⁸ Timoteo, beemey maake nga gu, sugué ku beem béleewe, loo bé kékéréhe bénréh i sénarigoy Tuluse fantag bé beeme bé do gétah.

Odor go bé de ni do kékéréh inok gétabana moy de békén toow kétoro loo bé ségétéwe sundalo tabana noy dumo nuwe sébanil. ¹⁹ Féégétém i kénur me brab odoro moy fatute. Non wén i do étew énda rigoné roy gétiga ruwe fatut, funay kénur ruwe mébinasa. ²⁰ I de dumo bero, been i ro Himeneowe brab Alejandrowe. Endob tétagak gu bero brab kénukum gu bero bé kériray guwe bero dob Satanase inok gétiga ro énda fakay ro émbéréh tete fantag bé Tuluse.

2 ¹ I toowe fo sungu ongoté ku dob beeme, fatut dasala kom i kéluhanay étewe. Fégédaw-gédaw gom ongot dob Tuluse atin

fésalamat gom dob Beene bé kéluhanay de rigoné no dob begome.

²Fatut dasala kom i de datu brab kéluhanay de méguléw inok métanék i kébati tome atin énda i sétiboh bé lala tome rémigo bé fiyowe loo bé kétayay Tuluse. ³I funa kuwe mongot bé ni non fiyoy démasale. Been i niy funay Tuluse, sani mémukase betom, mésuwat. ⁴I Tuluse méuyot de ké méfukas i kéluhanay de étew inok énda mékukum ro. Brab méuyot so ké gétiga roy toowe kétoro. ⁵Non sébaan saén i Tuluse brab sébaan saén i kéfédéway Tuluse brab kéilawane, Been i étéwe Jesu Kristo. ⁶Non i Jesuse, nirayén i férénawa nuwe inok mékédan i kékukume bé kéluhanay étéwe. Mélaw dob fatute gai, fénggito noy kéuyot i Tuluse mémukas bé kéluhanay étéwe inok énda mékukum ro. ⁷Atin been i niy funa nuwe ménémili begén inok waléyu apostol, atin sénuguén begén mangéy dob de békén Judio inok toroé ku bero inok munur ro bé toowe kétoro. Tintu fo béréhé kuy toowe, énda fo témugiu.

⁸Dob séngae gonon, méuyotu ké démasal i de lagéy. I de lagéy démasal, fatut fiyoy de adat ro. I de kémér ro tunggulén bé lala ruwe démasal, békén fatut fégérigo sala. Atin i de ni lagéy, békén ro fatut mékérit bé de dumo ro taloo no séédél ro. ⁹Atin méuyotu de so ké kémégal i de libun bé fatute kékégal. Enda fatut ro miring bé de libun énda mémala ro. Fatut ro météméd. Mélaw énda fatut fékélébuwané roy émféfiyowe bé de buk ro bé de séségiyo-giyo kéfutus taloo no de kéfégono bé de bélwon do ono look perlas, taloo no de kékégal bé de balilaga do kégal. ¹⁰Yamula i funa ruwe médayéw non fiyoy de rigoné ro loo bé fatute rigonéy libune méngintulus. ¹¹Atin i de libun fatut mantés ro brab téribantad ro ké gai kéfeganad. ¹²Enda tungkasé kuy de libun téromo taloo no sugué roy de lagéy. Fatut mégélingo ro saén. ¹³Non Adam i lénimbage sungu, tidéw bénō Eba. ¹⁴Atin békén Adam i fénggakara Satanase. Yamula, Eba i fénggakara Satanase inok géféliso noy sugu i Tuluse. ¹⁵Endob i de libun, tabangé no bero ké mégénga ro, amuk fédayday ro munur, brab mégédaw ro, brab téribantad ro, brab rémigo ro fiyo.

Fantag bé de odoron

3 ¹Toow i ni kébérén mano, “Amuk méuyot i ségétewe waléy odoroy de munur, toow fo fiyo, non tintu fo fiyoy nan galbék kétaya no.” ²I ségétewe odoroy de munur fatut ségétew lagéy énda i salaén funan de témo. Atin fatut ségétew saén i bawag ne. Atin fatut mééntang i kéfegitung ne. Atin fatut énda odoro noy de tete kétayay lowoh ne. Atin fatut fo métintu, brab tayakufé noy de étew dob lawi ne fiyon fo ké énda gélolo no bero. Atin fatut gétiga noy témoree. ³I odoroy de munur énda fatutén molon bé arake taloo no méuyot sétiboh. Yamula fatut métanék i adat ne brab mika sétiboh. Atin énda fatutén ké toow fo méuyot bé kurtæ. ⁴I étéwe odoroy de munur, fatut fiyoy kéféguléw ne bé bawag ne

brab de ngaén. I de ngaén fatut odoro roy de suguén brab fatut fégadata ro démoyun. ⁵ Non amuk énda gétiga noy méguléwe bé kaane kuréngon, énda so gétiga noy méguléwe bé de munur bé Tuluse. ⁶ Atin i étewé mantu séna ménwaléy munur bé Kristowe, békén fatut waléy odoroy de munur. Non amuk mérigoy ni, waléy félangka-langka atin mélaw mékukum ségiléw bé Satanase. ⁷ Atin i étewé waléy odoroy de munur, fatut ségétew fégadatay de békén munur inok énda génoé ro de. Mélaw énda gégégakara Satanase de funa no gésala.

⁸ Atin fantag man bé de témabang bé simbaane, sani de fédawétén do “dikon”, fatut so fiyoy de adat ro brab do métintu ro do étew. Enda fatut ro molon bé arake taloo no arumén ro. ⁹ Atin fatut méégét i kéunur ruwe bé toowe kétoro, brab énda fatut ruwo-ruwoy de fédew ro. ¹⁰ Amuk wén i ségétew méuyot waléy témabang dob simbaane, fatut téngkadén na métah. Brab amuk énda i funan de témbo, fakay waléy “dikon”. ¹¹ Atin i bawag i dikone, fatut fiyoy adat ne. Enda fatutén géméno bé étewe. Fatut mééntang i kéfégitung ne. Atin fatut fo mésarigon. ¹² Atin i témabange, fatut ségétew saén i bawag ne. Atin fatut fiyoy kéféguléw ne bé bawag ne brab de ngaén. ¹³ Atin i de témabang do géménalbék fiyo, fégadatay de munur bero. Atin géfébaraw ro muret fantag bé kéunur ruwe bé Jesu Kristowe.

¹⁴ I lala guwe ni sémulat dob beeme, wén i inam gu mangéy séko témukaw beem. ¹⁵ Endob amuk wén i malang begén, fégétigay ni sulat dob beemey fatute adat tom do étew i Tuluse. Betomey simbaay méuyage Tulus. Betomey maake do liléy brab sérinan, brab i toowe kétoro féndiyoén dob betome. ¹⁶ Tintu fo gétiga tom i ni: Toow fo fiyoy kétoro i katome kékéngintulus fénggitoy Tuluse betom. Non been i ni: I Kristowe ménwaléy kéilawan. Brab i Rémogor i Tuluse fénggito noy Kristowe métintu. Atin énggitoy de télaki. Atin wén i do ménuret fantag bé Kristowe dob de békén Judio. Atin médooy de étew dob duniiae ni ménunur de. Atin déméniyat mangéy dob lawayo.

Fantag bé Amaéne

4 ¹ Ménkéntay i kékéréh i Rémogor i Tuluse bé wén moso i do étew témérén munur bé toowe, brab waléy ro munur bé de tugién do rémogor brab de kétoro i de saitan. ² I de ni do kétoro tidéw dob de témugi étew do ubo-ubo ro saén munur bé Kristowe. Enda tete i de fédew ro ké rémigo ro tete non éndaén gétiga roy fatute. ³ I de ni do étew toroé roy énda kun fakay i mawage brab énda kun fakay i mamae bé de dumo anaén. Endob sedek lénimbag i Tulusey de amaén? I funay Tuluse léménimbag bé de amaén inok i betom do gétigan brab munur bé toowe kétoro mama tom de. Mélaw fakay tom mama bé de ni amaén amuk

gilid tom démasal fésalamat dob Tuluse. ⁴Fiyoy kéluhanay de éntingayén lénimbag i Tuluse. I kéluhanay de séségiyo-giyo do amaén fatut amaén tom amuk gilid tom démasal fésalamat dob Tuluse. Enda fatut ikaa tom i lénimbag i Tuluse. ⁵Gétiga tom féfiyonéy Tulusey de amaé tom non bé kéfésalamat tome de, atin non been i niy kétoro i kébérén i Tuluse de.

⁶Toow go fiyo sugu-sugué Jesu Kristowe amuk toroé moy de ni dob de dumo mo munur bé Kristowe. Atin taus go minut waléy fiyo sugu-suguén bé kéféganad me bé Fiyowe Uret brab toowe kétoro nunuro mo. ⁷Endob kago fégélingoén i de tutul énda médaitén uretén. Mika i Tuluse bé de ni non békén toow. Yamula fébagérém i kéunur me bé toowe kétoro inok rigoné moy kétayay Tuluse. ⁸⁻⁹Wén i toowe kébérén, fatut unuroy de étew mano, “Fiyo ké fébagéré moy lowoh me. Endob toow na fiyo ké fébagéré moy kéunur me, non wén i lagaén dob de gai béleewe ni brab dob de gérumah do gai dob lawayo moso.” ¹⁰Been i niy funa tome mégérör gémalbék, non sémarig tom bé méuyage Tulus, sani mémukase bé kéluhanay de étew, brab tintuwe mémukas bé de étew munur dob Beene.

¹¹Mélaw toroém i de ni brab suguémo dob de étew. ¹²Atin kago fidayaén i de étew énda fégadata ro beem non ménguwéd go séna. Yamula féfiyo moy kébérén me brab adat me brab kégédaw me brab kéunur me brab kérigo muwe bé lowoh me, inok i de munur bé Kristowe iringé ro beem. ¹³Atin tantu go basa bé Ménsulate Kébérén i Tuluse dob adafay de étew taman gérumahu diyaan. Atin toroém bero brab ureto mo bero. ¹⁴Atin kago lifotén i kéfurunge niray i Tuluse beem amun ménbérén i de sénarigoy Tuluse muret atin ténegréy de odoroy de munur i bumbuna muwe. ¹⁵Tantu mo rigoy de ni inok i kéluhanay de étew gito ro minut métintuy adat me rémigo bé kétayay Tuluse. ¹⁶Ingata moy de rigoné mo brab de toroé mo. Non amuk taus go rémigo bé de ni, méfukas go bé de salaém brab méfukas soy de gélingo beem.

5 ¹Kago ugarén i de lukésén lagéy. Yamula féginau mo bero maak do bohém. Atin féginau moy de kénogo lagéy maak do dumo mo sétiman idéng. ²Atin i de lukés do libun, féginau mo bero maak do idéngém. Atin dob de kénogon, féginau mo bero maak do dumo mo sétiman, idéng, kago dufangén bero.

³Atin i de baléw énda i samung ro magifat bero, fégadata mo bero brab tabanga mo bero. ⁴Endob amuk wén i do nga i de baléw taloo no do bebe ro, fatut do nga ro brab do bebe roy magifate bero inok baliwana roy kékagifat i de lukés ro bero brab de bebe ro. Non been i niy kétayay Tuluse rigoné ro, sani kégédawe bé de lukés, tidéw béno bé de ségiyo étew. ⁵Endob amuk énda i samung i baléwe magifat de, sémarig dob Tuluse atin démasal fuweh na kélungonon mongot tabang dob Tuluse. ⁶Endob i baléwe rigoné noy tetee kétaya no, maak ménléhuén fiyon fo ké

méuyag séna. ⁷Toroém beroy de ni bénréh gu inok énda i gétébo bero. ⁸Endob amuk wén i ségétew munur atin énda fagifaté noy de samungén brab énda fo fétintuné noy kéfagifat ne bé de dumo no sétifon lawi, téenagakén i kénur ne brab ménwaléy toow na fo tete bé ségétewe énda munur bé Kristowe.

⁹Kago listanén i baléwe dob listanay de baléw fatut tabangan amuk énda séna labi no ném folo gébélantuwa. Atin békén saén i ni, fatut so éndaén mawagén man. ¹⁰Brab fatut toow fo gétigay de étew fiyoy adat ne loo bé fiyowe kéfagifatén bé de ngaén, brab tanggafé noy de kana dob lawi ne, brab urahé noy sékéy i de dumo no munur, brab tabanga noy de étew kérasayan, brab rigoné noy fiyowe sénga tékélid.

¹¹Endob kago listanén i de baléw do ménguwéd séna. Non amuk méuyot ro man mawag sabaf bé kétayay de lowoh ro, gétagaka roy galbék Kristowe. ¹²Atin amuk rigoné roy ni, énda gétumana roy sunguwe fasad ro bé Kristowe. ¹³Atin saliyu na bé ni, waléy ro faukén brab démoyun ro saén sugud-sugud. Atin umana ro nay teteé bé kégéno ruwe bé de étew bé éndae fatut bérhé ro, brab furaya fédew ro. ¹⁴Mélaw dob kagéne de kéfégitung, fiyo ké mawag man ségule i de ménguwéd do baléw brab mégéngá ro, brab fagifaté roy de dumo ro sétifon lawi inok i de étew sébanil betom énda i góbérého ro tete fantag bé betome. ¹⁵Non i de dumo do baléw ménbaleng i de fédew ro atin béléewe ménwaléy ro do kuyug Satanas.

¹⁶Amuk wén i libun munur bé Kristowe brab wén i do baléw do samungén, fatut fagifaté no. Fatut tabanga no bero inok énda kérégénan i de munur magifat bero. Mélaw i de munur gégafifata roy de baléw énda i do samung ro magifat bero.

¹⁷I de odoroy de munur, amuk toow fo fiyoy galbék ruwe, médait ro sémahud ruwo takéf, labi na foy de mégéror muret brab téromo bé kóbéréh i Tuluse. ¹⁸Non wén i Ménsulate Kóbéréh i Tuluse mano, “Kago ikétén i ba i safie amuk sad-sadé noy faréye inok mérek.” Non fatut mama i safie mérek bé de énrekén. Atin wén soy Ménsulate Kóbéréh i Tuluse mano, “I gémalbéke, fatut gédoté noy sahud ne.”

¹⁹Atin kago fégélingoén i kétéboe bé ségétewe odoron taman énda i ruwo gétew taloo no télew gétew émféféngintoow de. ²⁰Atin géléém dob adafay de munur i ségétewe odoron énda témérénó rémigo tete inok mágilak i de dumo de.

²¹I Tuluse brab Jesu Kristowe brab de télikiy Tuluse, fiyon fo ké énda gito tom bero béní, téngténgé ro betom béléewe ni. Mélaw sugué ku beem bé odoro moy de ni ténero gu beem. Brab kago wén i isu ramigo mo bé de étew. Yamula ségiléw-giléw i kérigo muwe bé kéluhanay de étew. ²²Atin kago magad mémili do étew inok waléy ro odoroy de munur. Non amuk mésala ro, beem soy mésénditon de. Fatut énda i gétébo beem.

²³ Atin kago miném saén wayég. Fatut miném go so kloh arak fégéuwa bé sur me, non démoyun go démériun.

²⁴ Wén i do étew magad fo giton i de sala ro, mélaw magad ro so mékukum. Endob wén soy do étew mélubunéy i de sala ro atin énda gito no taman wén i sémusi de. ²⁵ Atin ségiléw so bé ni, wén i do étew toow fo magad giton i de fiyo rigoné ro. Endob wén soy do étew énda fo magad giton i de fiyo rigoné ro, éndob giton so moso.

6 ¹I de munur do rifén, fatut toow fo fégadata roy de amu ro sénga tékélid, inok énda i góbéréh tete fantag bé Tuluse taloo no fantag bé kétoro tome. ² Atin i de munur do rifén, amuk munur soy de amu ro, énda fatut ro mérarék bé de amu ro, non falan so bero do munur brab maak sétiman ro idéng. Yamula fatut umana roy kégéror ruwe gémalbék non i de tabangé ro, falan so bero do gulaané ro dumo ro munur.

Fatut toroém beroy de ni brab férido mo bero. ³ Amuk wén i étew téromo bé ségiyowe kétoro brab énda magayu no bé toowe kóbéréh i Kadna tome Jesu Kristo brab mika bé toowe kétoro fantag bé kétayay Tuluse, ⁴ toow fo félangka-langka i nan étew brab énda i gétiga no. Wén i tete kétaya no séédél brab méngiras, brab mantém fiyon fo ké énda i funa no, ⁵ brab méuyot fo séédél bé de dumo étew tete i de kégéror ruwe brab de étew do éndaén munur ro bé toowe kétoro. I de ni do étew marok waléy ro kawasa bé kégéngintulus ruwe.

⁶ Endob i toowe, i de tintu do méngintulus maak do kawasa amuk fiyo ronén bé kéluhanay éntingayéne karo, énda mingar ro bé ségiyowe. ⁷ Non bé kékumah tome, énda i nuwit tom. Brab amuk méléhu tom, énda soy uwité tom. ⁸ Mélaw, amuk wén i amaé tom brab kégal tom, fatut fiyo tom den. ⁹ Endob i de étew toow fo méuyot waléy kawasa, magad ro fo métukawan mésala bé de tete brab do dufang kétaya ro, funa ro mébinasa brab méléhu. ¹⁰ Non i kétayane bé kurtaey funay étewe rémigo bé kéluhanay kélasiy tete. Wén i do étew toow fo méuyot ro bé kurtae, funa ro témérén munur bé Kristowe brab funa ro toow fo tete i de fédew ro.

¹¹ Endob i beeme, Timoteo, ségétew go sugu-suguéy Tuluse. Mélaw féraru go dob de ni do adat. Brab télama mo rigoy métintuwe brab kétayay Tuluse. Atin féégétém i kénur me, brab fégédaw go bé de dumo mo, brab tingkél go, brab fétanékém i adat me. ¹² Atin fégéror go rigo bé fatute sabaf bé kénur me, loo bé ségétewe toow fo méraan léméntu sékuya. Atin dotém i umule magufusa. Non i funay Tuluse beem ménémili waléy munur inok gédoté moy umule magufusa. Atin énggédotém i umule magufusa non fénayagém i Kristowe dob adafay médoowe étew. ¹³ I Tuluse, sani tuyage bé kéluhanay éntingayéne, brab Jesu Kristowe, sani ménbéréhe bé toowe dob adafa Ponsio Pilatowe téngténgé ro betom béleewe ni. Mélaw sugué ku beem bé ¹⁴ tintu mo

fo odoron i de sénugu gu beem brab rigo mo inok énda i gétébo beem. Rigo moy ni taman dob késéfule i Kadna tome Jesu Kristo. ¹⁵ Féséfuleéy Tulusey Jesuse dob fatute gai. Atin i Tuluse, Beeney barakatane méguléw bé kéluhanane, brab Beeney odoroy de odoron brab Kadnay de datu. ¹⁶ Been say méuyage tidéw féganay brab méuyag so taman sa taman. Brab bati dob géfékayaé énda i géfégédét de. Enda i ségétew énggégito de taloo no wén i gérito de. Médayew damén i Tuluse brab méguléw damén taman sa taman. Amen.

¹⁷ Atin i de kawasa do munur, bérém bero bé békén ro félangka-langka brab békén ro sémarig bé de kurta ro taloo no de éntingayén do karo, non magad so mécédan. Yamula fatut sémarig ro bé Tuluse, sani témantuwe mirayan betom bé kéluhanay éntingayéne inok fiyoy goho tome. ¹⁸ Toroém i de kawasa rémigo fiyo, inok maak kawasa ro bé fiyowe rigoné ro. Fatut ro mégédaw brab fatut miray ro tabang dob de ségiyo atin fatut tukidé roy de languntama ro. ¹⁹ Amuk rigoné roy ni, wén i gédoté ro tidéw dob Tuluse dob de gai gérumah moso funa ro tintu kawasa, brab énda mécédan no taman sa taman. Atin gédoté roy tintuwe umul magufusa.

²⁰ Timoteo, kago tagakén i toowe kétoro sénarig dob beeme. Kago fégélingoén i de késéuret-uret ikaay Tuluse. Atin féravy go dob de dufang kégéitung i de étew fédawété ro “Kégétigan.” ²¹ Non wén i do étew émbéréh wén kun i kégétiga ro. Endob been i niy funa ruwe téménréen munur.

Mégédaw damén i Tuluse begom.

Pablo

I Géruwowe Sulat Pablowe dob Timoteowe

Ay niy sébaane bé de sénulat Pablo, sani ménbantuge muret fantag bé Jesu Kristowe. Been i niy géruwowe sulat Pablowe dob Timoteowe, sani téménabangane de lémégéb bé Fiyowe Uret. Amun sénulat Pablowej ni, ménféririsunén sabaf bé kéuret ne fantag bé Kristowe. Gétiga no éndaén mérugayén taman féléhuénén. Mélaw sénulatén i ni sulat dob Timoteowe inok sarigé noy galbék ne dob beene, atin inok fébagéré noy fédéw Timoteowe inok énda témérén no témore bá toowe fantag bé Jesu Kristowe.

1 ¹⁻²Timoteo,
Sulata ku beem maak ségétew nga gu gulaané ku. I begéne Pablo ségétew apostol Jesu Kristowe non been i niy kétayay Tuluse. Sénuguén begén inok ureté kuy fantage bá mantuwe umul fénasadén betom, sani umule magufusa énggédot tom sabaf bá kéunur tome bá Jesu Kristowe. I Abaye Tulus brab Kadna tome Jesu Kristo mégédaw ro damén beem brab méuray damén i na ruwe beem brab iray ro damén beem i métanéke fédéw.

³ Begén i ségétéwe sugu-suguéy Tuluse brab fiyoy fédéw guwe bá kérigo guwe bá galbék i Tuluse loo bá rénigoy de katufua ku. Atin fuweh na kélungonon fésalamatu dob Tuluse démasal ongoté ku dob Beene bá tabanga no beem. ⁴Toowu fo mégundoy beem. Atin gétédémo kuy kékérew me amun téngak gu beem. Méuyotu géségito man beem inok mororu fo man. ⁵Gétédémo kuy tintuwe kéunurém, ségiléw bá kéunur i bebe me Loida brab idéng me Eunis. Gétiga kuy méégét soy kaame kéunur. ⁶Atin sabaf bá ni, fefégétédém gu beem bá fatut fébagérém i kéfurunge niray i Tuluse beem amun téngé ku beem. ⁷Non i Tuluse énda nirayén betom i Rémogor ne inok talaw tom. Yamula nirayén betom i Rémogor ne inok émbaraw tom brab inok ségédaw tom brab inok gérigono tom i fatute.

⁸Mélaw kago mémala muret fantag bá Kadna tome, brab kago mémala fantag bá begéne sani ménférisu sabaf bá kéunur guwe dob Beene. Yamula amung go bá kérasay guwe sabaf bá Fiyowe Uret. Gérigono moy

ni non fébagéréy Tuluse beem. ⁹I Tuluse fénukasén betom dob de sala tom, brab fénémilién betom waléy do étewén. Rénigo noy ni békén sabaf bé fiyowe rénigo tom. Yamula fénukasén betom sabaf bé kaane funan brab sabaf bé kégédaw ne betom bé énda séna ménlimbag i duniyae de. Atin i kégédaw ne betom fénagéwén dob Jesu Kristowe. ¹⁰Atin béléewe ni fénggito noy kégédaw ne bé kégumah Jesu Kristowe sani mémukase betom dob de sala tom. Atin i Jesuse kénda noy barakat i kéléhue brab fénggétiga no betom i umule magufusa fénagéw dob Fiyowe Uret.

¹¹ Atin i Tuluse fénémilién begén waléy apostol inok ureté ku brab toroé kuy ni Fiyo Uret. ¹² Been i niy funa kuwe mérasay béléewe ni. Endob énda mékédan i késarig guwe, non toow fo gétiga kuy Tuluse unuro ku brab gétiga ku diyagané no begén taman gégumah i gaiwe séfule i Kadnane inok gérigono kuy galbéke sénarigén dob begéne. ¹³ Fédidaydém i kéodoro muwe bé de toow kékérén ténero gu beem. Atin fédiday go unur bé Tuluse brab fégédaw go bé de dumo mo. Gérigono moy ni non begom i de dumo Kristowe. ¹⁴ Bantaya moy toowe kétoro sénarig dob beeme. Gérigono moy ni sabaf bé barakat i Rémodor i Tuluse bati dob betome.

¹⁵ Gétiga moy kétagak i kéluhanay de dumo gu munur begén dob Asia, fiyon i ro Figelowe brab Hermogenese. ¹⁶ Endob féfiyonéy Tuluse damén i Onesiforowe brab de samungén. Non médofo gule fénoror ro begén. Enda mémala ro fantag begén ségétéwu fériku. ¹⁷ Yamula, amun énggumah i Onesiforowe dob Roma, fénagayasén begén sénléd taman énggito no begén. ¹⁸ Toow fo gétiga moy kétabanga nuwe begén dob ingéde Efeso. Mélaw mégédaw damén i Kadnane de dob késéfule ne moso mangéy kémukum.

2 ¹ Atin i beeme Timoteo, maak ségétéw go nga gu, fébagérém i kéunur me. Gérigono moy ni sabaf bé kégédaw i Tuluse betom do dumo Jesu Kristowe. ² Enggélingoo moy de kétoro gu nuret gu dob de médofo étew. Mélaw i beeme, fatut toroém soy de étew gésarigo mo inok gétoro ro so dob de ségiyo.

³ Fatut amung go bé kérasay guwe sabaf bé kéunur guwe, inok waléy go so sugu-sugué Jesu Kristowe mérasay ségiléw bé fiyowe sundalo. ⁴ I sundalowe énda furaya fédewén i de rigonén békén kay sundalowe. Yamula rigoné noy funay odoro nuwe mésuwat. ⁵ Atin i sugu-suguéy Tuluse ségiléw bé ségétéwe sékuya léméntu. Enda gétaba no saliyu ké odoro noy de sugu bé késékuya. ⁶ Atin i sugu-suguéy Tuluse ségiléw so bé ségétéwe mégéror gémalbék dob fantade. Fatut been i sunguwe gégédot bé kentéw ne. ⁷ Fétuntayém i de ni do sénulat gu, non i Kadnane fefégésobutén beem i kéluhanay de ni.

⁸ Fégétédémém i Jesu Kristowe, sani séfu Datu Dabide. Ménléhuén, endob méntébule. Been i niy Fiyowe ni Uret toroé ku, ⁹ funa ku mérasay

béleewe ni, nikétu bé sangkalie maak ségétew ménénakaw. Endob i kékérél i Tuluse énda ménikétén! ¹⁰ Been i niy funa kuwe ni fédayday témingkél bé kéléuhanay de kérasay, inok gétabanga kuy de étew fénémili i Tuluse, inok méfukas ro so bé de sala ro sabaf bé kéunur ruwe bé Jesu Kristowe brab inok toow fo fiyoy goho ruwe beroy Tuluse taman sa taman. ¹¹ Wén i toowe kékérél mano, “Amuk séréngan tom de méléhu bé kégantino Jesuse betom, séréngan tom de so méuyag taman sa taman. ¹² Atin amuk témingkél tom bé de kékérasay betom, gégumah so moso i gaiwe méguléw tom séréngan bé Jesuse. Endob amuk dirungé tom i Jesuse bé békén tom do kuyugén, dirungé no so betom. ¹³ Atin fiyon fo ké énda géfedayday tom rémigo bé kétaya Jesuse, fédayday so fo rémigo bé ati bénréh ne rigoné no dob betome. Non énda fakayén ké énda tumané noy kékérél ne.”

¹⁴ Fefégétédémém bé de munur diyaan i fantage bé de ni. Suguém bero dob adafay Tuluse bé békén ro séédél fantag bé atag i kékéréhe saén. Non énda gédotén i kékifionone bé késéédéle loo bé ni, yamula mébinasa saén i kéunur i de mégélingo de. ¹⁵ Rigo moy kéléuhanay gérigono muwe inok mésuwat i Tuluse bé galbék me. Mélaw énda i funa mo mémala brab katabuwan i kétoro me bé toow i kékérél i Tuluse. ¹⁶ Férayu go dob de énda do lantékén késéuret-uret ikaay Tuluse, non i de étew rémigo bé ni minut ro mérayu dob Tuluse. ¹⁷ I kétoro i de énda méngintulus, ségiléw bé de toow fo mékébinasa kéraing magad fo témunoh dob lowohe. Ro Himeneo brab Fileto i ruwowe gétew dumoy de ni témoro. ¹⁸ Ténagak roy toowe aguwon brab béninasa roy kéunur i de dumo bé de munur. Non bénréh roy énggildén kun i kétébule tome. ¹⁹ Endob i toowe kétoro i Tuluse ségiléw bé toowe fo dakél batéw non énda émfarino. Non wén i Ménssulate Kékérél i Tuluse mano, “I Kadnane, gétiga noy ati kaane do étew.” Brab wén soy ségiyowe Ménssulat Kékérél i Tuluse mano, “I étewe émbérél bé been i étew i Kadnane, fatut tagaké noy de tete rigoné no.”

²⁰ Dob dakéle lawi, wén i do séségiyo-ségiyo do biléw brab do limfung diyo. I de dumo de do bélwon brab do filak. Atin i de dumo de do kayéw rénigo do biléw brab i de dumo de métégas fantad rénigo do biléw. Mélaw i gefee de, usaré noy de balilaga de amuk wén i do gérotor kana no. Atin i de dumo de usaré ro sénga fuweh. ²¹ Ségiléw soy de ni bé étewe. Amuk toow fo malinis i fédew i ségétewe étew bé kétagak ne bé de tete adatén, maak do bélwon tamuk i Tuluse usaré no dob fiyowe galbék, non médaït usaréy Tuluse dob fiyowe galbék. ²² Mélaw, férayu go dob de tete kétayay lowoh i ménguwéde étew. Atin télama mo rigoy métintuwe, brab fébagérém i kéunur me, brab fégédaw go démoyun, brab fétanékém i de fédew i de dumo mo inok énda i sétiboh. Non been i niy adat i de fiyo étew démasal dob Kadnane mongot tabang. ²³ Atin férayu

go dob de dufang késéédél énda i lantékén. Non been i niy funay de étew gésékérit. ²⁴Enda fatut séédél i sugu-suguué Kadnane. Yamula fatut mégédaw bé kéluhanane. Brab fatut fiyo brab témingkél bé kétoro ne. ²⁵Enda fatutén mékérit, yamula fatut féfiyoné noy kétoro ne bé de sébanil de, inok fégalinéy Tuluse keeyén i de fédew ro atin gésobuto ro mélaw i toowe. ²⁶Tidew béno, mééntang i de kéfégitung ro brab géféraréy ro tidew dob Satanase, sani kéménéfoe bero inok fégésé no bero modor bé kétaya nuwe.

3 ¹Fégétédémém i ni. Dob tamfaday de gai, toow fo moso mérégén. ²I de étew moso, do méitung brab arumén, brab do toow fo félangka-langka, brab do tete i de kégébaa ro, brab énda odoro roy de sugu i de lukés ro, brab do énda fésalamat ro, brab do mika ro modor bé de sugu i Tuluse. ³Atin énda fo mégédaw ro, brab énda méuray i na ruwe bé dumo ruwe, brab do émbagér géméno fégébinasa ro bé dumo ruwe, brab do magad sétiboh brab mékérit, brab mika ro bé fiyowe. ⁴Békén saén i de ni, do tugién ro fo, brab énda fégitungé roy de tete rigoné ro, brab do félangka-langka ro fo, brab énda méimu ro bé Tuluse éndob rigoné ro saén i de kétayay de karo lowoh. ⁵Atin ubo-ubo féngadafé roy Tuluse, éndob énda munur ro bé barakat ne. Férayu go dob de ni do étew. ⁶I de dumo bero, mahur ro dob de lawi inok toroé ro brab féguléwo roy de libun énda émbagér i de fédew ro brab mégilak ro sabaf bé de sala ro, atin médooy foy de tete kétaya ro. ⁷Been i de niy de libun toow fo télamané ro féganadén i toowe éndob énda fo gésobuto ro de. ⁸Ségiléw so bé késébanil ro Janese brab Jambrese bé Moisesey késébanil i de ni do lagéy bé toowe kétoro. Enda foy lanték i de kéfégitung ro brab békén toow i kéunur ruwe. ⁹Endob énda mégulit i de rigoné ro, non gitoy kéluhanay de étew i kédufang ruwe, ségiléw bé kégityo de étew bé kédufang ro Janese bero Jambrese.

¹⁰Endob i beeme Timoteo, gétiga moy kétoro guwe brab adat guwe brab funa kuwe gémalbék. Atin énggito moy kéunur guwe brab kéttingkél guwe brab kégédaw guwe brab kétédayday guwe fiyon fo ké gai mérégén. ¹¹Atin énggito moy kékérasaye begén. Brab énggétiga moy ménrigowe dob begéne dob Antiokia, brab dob Ikonium, brab dob Listra. Toow fo gétimal i kékérasaye begén dob de ni do ingéd. Endob té nabangay Tuluse begén dob kéluhanay de ni inok énda mébinasawu. ¹²Atin béréhé ku beem i toowe, i kéluhanay de étew méuyot modor bé kétayay Tuluse sabaf bé kéunur ruwe bé Jesu Kristowe, toow ro fo férasayén kéluhanan. ¹³Endob i de tete étew brab ubo-ubo saén i de kéunur ro, toow fo minut ro tete. Géfagakara roy de ségiyo étew bé de kétugié ro brab fagakara ro soy karowe lowoh. ¹⁴Endob i beeme, fétausém i kéunur me bé toowe té nboroén beem brab nunuro mo. Non gétiga moy de té nboroén beem. ¹⁵Brab

gétédémo mo tidéw fanay kééngaém, énggésobuto mon i Ménsulate Kébéréh i Tuluse. Atin been i niy ménfégétigane beem inok méfukas go dob de salaém sabaf bé kéunur me bé Jesu Kristowe.¹⁶ Atin i kéluhanay de Ménsulat Kébéréh i Tuluse, sénulat i de étew non fénémanduoys Tuluse de bero. Atin i kéluhanay de ni do ménsulat fiyo fégétoro bé towe, brab fégéfééntang bé de tugi, brab fégégélé bé tetee, brab fégétoro bé métintuwe adat.¹⁷ Mélaw dob kéféganade de, i étew i Tuluse waléy furung brab gérigo bé kéluhanay de séségiyo-giyo do fiyo galbék.

4 ¹Maak diyo to dob adafay Tuluse brab Jesu Kristowe, sani séfulee moso brab méguléw brab kémukum bé kéluhanay de étew, do méuyag loo soy do ménléhu. Mélaw sugué ku beem, ²bé uretém i kékéréh i Tuluse. Fatut tafayém démoyun inok fiyon fo ké ati gaiwe de, géuret go, fiyon fo ké mika mégélingo i de étew. Féégétém i kékéfúnur me bero. Géléém i de étew bé békén ro rémigo tete, brab féginau mo bero. Atin fatut tingkélo moy kétoro me bero. ³Gégumah moso i gaiwe éndaén fégélingoéy de étew i towe kétoro. Yamula odoro roy de tete kétaya ro. Atin séméléd ro bé de maistéro do téromo saén bé de karo do kétayan atin fétoro ro bero. ⁴Atin éndaén fo fégélingoé roy towe kétoro. Yamula fégélingoé ro saén i de békén do toow do tutul. ⁵Endob i beeme, fégitung go fiyo inok gérigo moy métintuwe sénga tékélid, fiyon fo ké atiy gégumahe mérégén dob beeme. Atin fédiday go fiyon fo ké kérégénan go. Atin fétausém i galbék me muret bé Fiyowe Uret, brab rigo moy kéluhanay kétayay Tuluse rigoné mo non beem i sugu-sugué nuwe.

⁶I begéne maak ségétewu tulak non énggumahén i gaiwe méléhuun. ⁷Enggilid gun i kéluhanay fatute rigoné ku, ségiléw bé kékéfélid i ségétewe sékuya léméntu. Enggilid gun i galbéké niray i Tuluse begén. Atin énda ménkédan i kéunur guwe bé towe kétoro. ⁸Atin dob gaiwe kémukum moso i Kadnane, gédoté kuy barase kay de métintu do étew i Kadnane, sani métintuwe kémukum. Atin békén saén begén i gégédote bé ni baras, yamula irayén so dob kéluhanay de étew toow fo ménggundoy bé Kristowe brab ongot-ongoté roy késéfule ne.

⁹Timoteo, toow fo télama moy magayase mangéy dini. ¹⁰I Demase, téngak non begén sabaf bé kégulaa nuwe bé de éntingayén dob duniyae ni. Mélaw ménangéy dob ingéde Tesalonika. Atin i Kresentewe ménangéy Galasia, atin i Titoe ménangéy Dalmasia. ¹¹Lukas saén i dumo guwe dini. Angéyém i Markose brab uwitém mangéy dini non gétabanga no begén bé de galbék gu dini. ¹²Sénugu guy Tikikowe mangéy dob ingéde Efeso. ¹³Amuk mangéy go dini, uwitém i mégéfole kégal gu fénled gu dob lawi Karpowe dob Troas. Uwitém soy de libro gu, labi na foy de sulat gu.

¹⁴I Alejandrowe, sani fandaye galang, toow fo tete i rénigo nuwe dob begéne. Endob Kadnan séden i kémukume de. ¹⁵Atin ingata mo non toow fo émbagér i kéuret ne sébanil bé de kétoro tom.

¹⁶Enda i dumo gu bé sunguwe kéamfilo ku bé lowoh guwe non ténagak ro begén kéluhanan. Fésagadéy Tuluse damén bero. ¹⁷Endob énda ténagak i Kadnane begén. Been i dumo guwe brab fénbagérén begén, inok énggéureto kuy kéluhanay Fiyowe Uret dob kéluhanay de bekén Judio. Atin té nabanga no begén inok énda géféléhuoy de tete étew begén. ¹⁸Atin gétiga ku, tabangay Kadnane begén inok énda gébinasana ro begén. Atin uwité no begén mangéy dob kékéguléw ne dob lawayo énda i sug-sug gu. Médayéw damén i Kadnane taman sa taman. Amen!

¹⁹Ségifaém begén i de sébawag ro Prisila brab Akila, brab kéluhanay de étew dob lawi Onesiforowe. ²⁰I Erastowe ménbati dob ingéde Korinto, brab té nagak guy Trofimowe dob Mileto non démérūn. ²¹Télama mo foy mangéye dini lokut énda séna gumah i gaiy mélégénéye. I ro Ebulowe, Pudente, Lino, Klaudia, brab kéluhanay de dumo tom do munur ségifaé ro beem.

²²Diyo damén i Kadnane dob beeme. Atin mégédaw damén i Tuluse begom kéluhanan.

Pablo

I Sulat Pablowe dob Ségétéwe Lagéy Féndawét Tito

Ay niy sébaane bé de sénulat Pablo, sani ménbantuge muret fantag bé Jesu Kristowe. Sénulatén i ni dob ségétéwe lagéy féndawét Tito, sani témabangane de bé kélégéb ne bé Fiyowe Uret.

Dob ni sulat, ténero Pablowej ati klasiy étewe fakay waléy odoroy de munur. Ténoroén soy fantage bé fiyowe adat i de munur bé Jesu Kristowe.

1 ¹Tito,

I begéne, Pablo sani sugu-suguéy Tuluse brab ségétew apostol Jesu Kristowe. Begéney fénemili i Tuluse inok sugué no begén mangéy témabang émfébagér bé kéunur i de étew fénemili i Tuluse brab inok fefégesobut gu beroy toowe kétoro i katome kéfengintulus. ²I ségiyowe de funa ku sémugu, inok gésobuto ro gésarig ro bé méuyag ro taman sa taman. I Tuluse, been i niy fénasad ne dob betome tidew féganay bé énda séna ménlimbag i duniye de, bé irayén betom i umule magufusa. Atin gétiga tom énda fakayén ké énda tumanéy Tulusey fasad ne. ³Atin béléewe niy gaiwe fégétiga noy kékérén ne. Non sénarigén dob begéney kékérén ne brab ureté ku non been i niy sénugu i Tulus tome mémukas.

⁴Sémulatu mangéy dob beeme, sani ménwaléye maak tintu nga gu bé kéunur tuwe bé Jesuse. I Abaye Tulus brab Jesu Kristowe, sani mémukasse betom dob de sala tom, mégédaw damén beem, brab iray ro damén beem i métanéke fédew.

⁵I funa kuwe téménagak beem diyoan dob bungéde Kreta, inok géfégilido moy galbék tome, brab inok géfémili go do étew waléy odoroy de munur dob séngae ingéd diyo. Fégétédémém i de kétoro gu fantag bé de ni. ⁶I fémilié muwe odoron, fatut ségétew lagéy énda météboén. Atin fatut ségétew saén i bawag ne. Atin i de ngaén, fatut do munur ro brab énda karangéy de étew bero do dufang taloo no mémélis bé de suguén. ⁷I odorone, fatut ségétew énda météboén, non beeney sarigone bé galbék i Tuluse. Enda fatutén félangka-langka, taloo no magad mémérit, taloo no

miném arak taman molon, taloo no méuyot sétiboh, taloo no arumén bé kurtae.⁸ I odorone, fatut féfiyoné noy kéfagifat ne bé de kana no. Brab fatut méuyot rémigo fiyo. Fatut métintuy kérigo nuwe bé de dumo no atin rigoné noy kétayay Tuluse. Brab fatut énda odoro noy de tete kétayay lowoh ne.⁹ Atin fatut toroé no saén i atiy modore bé toowe kétoro, sani mésarigone kétoro to. Amuk rigoné noy ni, waléy émbagér i kéunur i de étew bé toowe kétoro. Atin gégéfrito no énda katabuwan i kékéréh i de étew sébanil bé toowe kétoro.

¹⁰ Non médooy de étew mika mégélingo bé toowe kétoro brab duraté ro soy de ségiyo étew bé de tugi kétoro ro énda i do lantékén, labi na foy kétoro i de munur do Judio. ¹¹ Fatut fo géléen ro inok éndaén téromo ro. Non gukété roy de ségékuréng bé de kétoro ro énda fatutén toroén. I funa ruwe saén téromo loo bé nan non méuyot ro saén kémurta. Fatut ro damén mémala. ¹² Bé gétahe wén i ségetéwe béliyan tidéw so diyaan dob Kreta, ménbéréh mano, “I de étew dob Kreta do toow fo tete brab do tugién. Faukén ro so, éndob do arumén ro mama.” ¹³ Toow i nan bénréhén. Mélaw géléém fo bero toow inok waléy fiyoy kéunur ruwe. ¹⁴ Brab inok éndaén munur ro bé de békén toow do tutul i de Judio loo soy de sugu i de étew mika bé toowe kétoro. ¹⁵ I étewe malinis dob adafay Tuluse, karangé noy kéluhanay éntingayéne malinis. Endob énda i malinis dob de étew énda séna malinis i de fédéw ro brab énda séna munur ro bé de Kristowe non énda séna mélinis i de itunga ro brab énda mémala ro bé de sala ro. ¹⁶ Béréhé ro gétiga ro kun i Tuluse, éndob giton dob de tete rigoné ro énda gétiga roy Tuluse. Toow fo tete i de adat ro brab énda modor ro bé fatute. Enda médait ro rémigo fiyo.

2 ¹Mélaw i beeme, fatut toroém saén i atiy modore bé toowe kétoro. ²Béréhém dob de lukés lagéy bé fatut féfiyoné roy de rigoné ro brab fatut mécitung ro fiyo brab fatut énda odoro roy de tete kétayay de lowoh ro. Atin fatut féégéte roy kéunur ruwe bé Kristowe, brab fatut mégédaw ro bé de dumo ro, brab fatut ro témingkél. ³Atin loo so bé niy toroé muwe bé de lukés libun bé fatut ro rémigo fiyo loo bé kétayay Tuluse. Békén ro fatut géméno, taloo no démyoun ro miném arak. Atin fatut téromo ro fiyo, ⁴inok métoro i de ménguwéd do libun bé féimué roy de bawag ro brab de nga ro, ⁵brab fatut énda odoro roy de tete kétaya ro taloo no de tete kétayay de lowoh ro. Brab fatut fégéror ro gémalbék dob de lawi ro, brab fatut odoro roy sugu i de bawag ro, inok énda i émbéréh tete fantag bé kékéréh i Tuluse unuro tom.

⁶ Atin loo so bé niy toroé muwe dob de ménguwéd do lagéy bé fatut énda odoro roy de tete kétaya ro. ⁷Atin i beeme, fatut féfiyo moy de rigoné mo, inok iringéy de dumo étew beem. Fatut toroé moy toowe, brab kago séfoyok bé lala me téromo. ⁸Atin usarém i fiyowe kékéréh ké téromo go inok énda i géadowoy bé de béréhé mo. Mélaw i de sébanil beto mémala ro non énda gétéboo ro beto.

⁹Toroém dob de rifén bé fatut odoro roy sugu i de amu ro brab fatut rigoné roy mékésuwate saén. Békén ro fatut séédél bé de amu ro. ¹⁰Békén ro ménakaw. Yamula, fatut féténgténg ro bé de amu ro bé démoyun ro rémigo fiyo brab mésarigon ro. I de munur do rifén, amuk rigoné roy ni, médayéw i kétoroe fantag bé Tulus tome mémukas betom dob de sala tom.

¹¹I kégédaw i Tuluse, sani funay de étew méfukas, fénggito no dob kéluhanay de étew. ¹²Atin i ni kégédaw, fégétiga no betom bé fatut tagaké tom i de tete rigonén kéikaay Tuluse, brab téréno tom i kéodoro tome bé de tete kétayay de lowoh tom, inok métintu tom brab rémigo tom fiyo loo bé kétayay Tuluse amuk bati tom séna dob duniyae ni, ¹³bé lala i kéongot-ongot tome bé fiyowe fo gai séfule i toowe fo barakatan Tulus tom Jesu Kristo, sani mémukase betom. Bé béno, giton i kéréndaw ne. I késéfule ne, been i niy inam tome. ¹⁴Nirayén i férénawa nuwe génantino no betom inok fukasé no betom dob kéluhanay tete. Atin inok féwaléyé no betom do malinis do étewén méuyot rémigo fiyo.

¹⁵Toroém i de ni. Wén i atura mo méguléw bé de étew diyoan. Mélaw usarém i atur me méginau bero brab géléém bero ké rémigo ro tete. Atin kago fédayaén bero énda fégadata ro beem.

3 ¹Féfégétédémé bér de munur diyaan bér fatut odoro roy de sugu i de méguléw do gémamak kukuman. Fatut mamung ro bér de udenén bér de fiyo rigonéy de gémamak kukuman. ²Béréhém bero bér békén ro fatut émbéréh tete fantag bér de étew taloo no sétiboh ro. Yamula fatut ro rémigo fiyo dob kéluhanay de étew, brab fatut ro émbéréh fiyo dob kéluhanay de étew. ³Non i betome so do munur, bér do gétah, do dufang tom brab énda ménodor tom bér de sugu i Tuluse brab énda énggétiga tom i fatute. Brab ménodor tom fo toow bér kéluhanay de tete kétayay de lowoh tom. Démoyun rénigo tom i tete, brab toow fo médaléw tom. I de dumo do étew mérarék ro betom brab mérarék tom so bero. ⁴Endob fukaséy Tuluse betom, non amun fénggito noy kégédaw ne betom, ⁵kénda noy de sala tom. Rénigo noy ni békén sabaf bér fiyowe rénigo tom, yamula sabaf bér kéuray i na nuwe betom. Fénukasén betom bér kélinis i Rémogor i Tuluse betom, sani kéumah tome man ségule inok wén i mantu umul tom brab mantu adat tom taman sa taman. ⁶I Tuluse ténantuno no betom nirayan bér Rémogor ne fénagéwén dob Jesu Kristowe, sani mémukase betom. ⁷Rénigo noy ni inok waléy tom métintu dob adafay Tuluse sabaf bér kégédaw ne betom, brab inok gédoté tom i umule magufusa, sani ongot-ongoté tome. ⁸Toow i ni kétoro.

Méuyotu de ké toroé moy de ni dob de munur bér Tuluse diyaan inok waléy ro rémigo bér fiyowe galbék. Non amuk fiyoy galbék ruwe, been i noy fégétabange bér de ségiyo étew. ⁹Endob kago mamung bér de késéédél

énda i lantékén. Brab kago fégélingoén i toowe fo métaah kélabit bé de katufuan brab de késékérít fantag bé kitabe. I kéluhanay de ni do énda i lantékén. ¹⁰Fatut géléém i étewe émfésébanil bé de munur. Atin amuk énda téméré no, géléém man ségule. Atin amuk énda fo téméré no, kago néni séloyuk de. ¹¹Non toow fo gétiga mo tete i étewe loo bé ni, atin giton ménsala non bé de tete rénigo no.

¹²Sugué ku mangéy diyaan i Artemase brab Tikikowe. Amuk gérumah ro diyaan, toow fo télama moy mangéye dob begéne dob ingéde Nikapolis, non méuyotu bati diyo bé gaiwe mélégénéy. ¹³Toow fo télama mo tabangan i Apolose brab Sénase sani gétigane bé kitabe inok magad i kégéagéw ruwe. Brab tabanga mo bero bé kéluhanay de kailanga ro. ¹⁴Toroém i de dumo to munur bé fatut ro fégérör rémigo fiyo inok gétabanga roy de étew do mérásay. Békén ro faukén.

¹⁵Ségifaéy kéluhanay de dumo gu beem dini. Atin i de dumo gey munur do méimu begey, fésamfayém dob berowey késégifa geye bero. Mégédaw damén i Tuluse begom kéluhanan.

Pablo

I Sulat Pablowe dob Filemone

Ay niy sébaane bé de sénulat Pablo, sani ménbantuge muret fantag bé Jesu Kristowe. I Filemone ni, wén i rifé no féndawét Onesimo. Endob ténulis Onesimowey kurta Filemone, atin ménraréy. Amun énggumah i Onesimowe dob ingéde Roma, énggébalaka noy Pablowe. Atin nuret Pablowey fantage bé Jesu Kristowe dob beene. Tidéw béno, énggésénule i Onesimowe bé de salaén atin ménwaléy munur bé Kristowe. Tidéw béno, ténabangén i Pablowe brab fénagifatén non diyo i Pablowe dob férисunone.

Dob kitab i de Romano, fatut féléhuén i Onesimowe non ségétew rifén ménraréy. Mélaw sénulat Pablowey ni sulat dob Filemone, sani gefee bé Onesimowe inok ongoté no dob beene bé fésagadé noy Onesimowe. Tidéw béno, fénuitén i ni sulat bé Onesimowe non séfule mangéy dob Filemon.

¹Filemon,

Begéney dumo muwe Pablo. Ay niwu dob férисunone sabaf bé kéunur guwe bé Jesu Kristowe. I begéne brab Timoteowe, sani dumo tome munur, sulata key beem. I beeme, gulaané key beem dumo gey gémalbék bé galbék i Tuluse. ²Atin sémulat gey so mangéy dob de munur sélimud méngadaf dob lawi me. Loo so dob Apiawe, sani maake libu key sabaf bé Kristowe, brab dob Arkipowe sani dumo geye maak sundalo gémalbék bé galbék i Tuluse.

³I Abay tome Tulus brab Kadnane Jesu Kristo, mégédaw ro damén begom brab iray ro damén begom i métanéke fédéw.

⁴Sénga démasalu, démoyunu fo fésalamat dob Tuluse sabaf bé beeme, Filemon. ⁵Non énggélingoo kuy fantage bé mégéte kéunurém bé Kadnane Jesus brab fantag bé kégédaw me bé kéluhanay de dumo mo munur.

⁶Atin démasalu so dob Tuluso bé waléy gétiga kom non bé késédumo tome sabaf bé kéunur tome bé Jesuse. Mélaw gésobuto kom i de kéfiyonon gédoté tom sabaf bé kéunur tome bé Kristowe. ⁷Atin i kégédaw me bé de dumo mo, been i niy funa kuwe toow fo moror brab fiyoy fédéw guwe. Atin moror soy kéluhanay de munur bé Kristowe sabaf bé beeme.

⁸⁻⁹Mélaw, wén i ongoté kuwe dob beeme. Fakay gésuguo ku beem rémigo bé fatute non bé atura kuwe tidéw dob Kristowe. Non begén i Pablowe, ségétew sarigo Jesu Kristowe, atin béléewe ni ménférisu sabaf bé Beene. Gido loo, ongoté ku saén dob beeme non toow fo gulaané ku beem. ¹⁰Mélaw, ongoté ku dob beeme bé fésagadém i Onesimowe. Beeney maake nga gu sabaf bé kéunur ne bé Kristowe. Non amun diniwu dob férисуноне ni, fénunur gu. ¹¹Bé do gétah, énda i tabang Onesimowe beem. Endob béléewe ni toow fo énggétabangén dob beeme, loo so dob begéné.

¹²Atin béléewe ni féséfuleé ku mangéy dob beemey ni toow fo gulaané ku étew. ¹³Méuyotu de damén émfébati dob begéné bé lala guwe bati dob férисуноне ni sabaf bé kéfélégéb guwe bé Fiyowe Uret. Non amuk bati dini, gétabanga no begén loo bé beeme amuk dini go damén. ¹⁴Endob énda rigoné kuy ni amuk énda tungkasé mo de begén. Non énda méuyotu mémégés beem. Yamula méuyotu de ké tidéw fo dob kaame kétayan i kétabanga muwe begén.

¹⁵I funa nuwe keyén énggéséfkay Onesimowe beem bé magade saén, inok amuk séfule mangéy dob beeme, éndaén géséfeka gom tidéw béléewe ni. ¹⁶Atin béléewe ni, i Onesimowe, békénén rifé mo saén. Yamula ménwaléyén maak dumo mo sétiman idéng sabaf bé kéunur ne bé Kristowe. Toow fo gulaané ku éndob toow na fo gulaané mo non békén saén rifé mo, yamula ménwaléyén maak dumo mo sétiman idéng sabaf bé Kadna tome.

¹⁷Mélaw amuk fégitungé mo begén ségétew dumo mo, tayakufém loo bé kétayakuf me damén begén. ¹⁸Atin amuk réménigo tete dob beeme taloo no wén i utongén beem, dob begéne séden étukém. ¹⁹Sulaté kuy ni bé de kagén kémér: I begéne, Pablo, bayada ku beem. (Endob kago lifotén de wén i utongém begén, sani mantuwe umulém sabaf bé kéunur me bé Kristowe.) ²⁰Mélaw adih, toow fo damén méuyotu de ké tabanga mo begén bé rigoné moy nan nongot gu. Féororénu non sédumon tom sabaf bé kéunur tome bé Kristowe.

²¹Toow fo gétiga ku béléewe ni, rigoné moy kéluhanay ongoté kuwe beem dob sulat guwe ni, atin gétiga ku umana moy kérigo muwe bé éndae ongoté ku. ²²Atin wén nay ségiyo ongoté ku dob beeme. Tafayantu sibéy inok wén i batio ku ké mangéy diyaan. Non wén i inam gu féséfuleéy Tuluse begén mangéy diyaan sabaf bé kédasala kome bé késéfule guwe mangéy diyoan.

²³Atin i Epafrase dumo gu ménférisu sabaf so bé kéunur ne bé Jesu Kristowe, ségifaé no beem. ²⁴Atin ségifaéy de dumo gu so gémalbék beem, ro Markos, Aristarko, Demas brab Lukas.

²⁵Mégédaw damén begom kéluhanan i Kadnane Jesu Kristo.
Pablo

I Sulate dob de Judio do Munur bé Jesu Kristowe

Enda gétiga tom de ké ati séménulate bé ni sulat, non i séménulate de énda sénulatén i dawét ne. Endob gétiga tom sénulatén dob de Judio do munur bé Jesu Kristowe. Sénulatén i ni inok fébagéré noy de fédew ro, non i de dumo ro do Judio fénrasaray ro bero sabaf bé kéunur ruwe bé Jesuse funa ro éndaén odoro roy kitab i de Judio.

Dob ni sulat, wén i kétoroe bé Jesuse, Been i Nga i Tuluse, atin mélaw toow na fo gérotor bé de télaki brab de sénarigoy Tuluse muret bé kébérén ne brab fiyon i Moisese. Wén soy kétoroe bé fénléhu i Jesuse fégétulak fégékédan bé de sala i de kéilawan. Mélaw éndaén kailangay de étew i témulake do ayam taloo no do ségiyo éntingayén. Wén soy kétoroe bé toow fo kailangay de étew i munure bé Jesuse non Been i kéfédéway de étew mangéy dob Tuluse.

1 ¹Bé do gétah do gai, ménsébérén i Tuluse bé de katufua tom do Judio fénagéwén dob de étew do sénarigo no muret bé kébérén ne. Fénbérén hén bero médoou gule brab dob sésigiyo-giyowe aguwon. ²Endob béléewe ni, dob de ni géfuray do gai, ménsébérén dob betome fénagéwén dob tintuwe Ngaén. I Tuluse, fénlimbagén bé Nga ne niy kéluhanay éntingayéne, atin fénémili i Tulusey Beene waléy so gefe bé kéluhanane. ³Atin i Nga i Tuluse ni, réméndaw bé barakat i Tuluse, non ségiléw so bé Tulusey ni Nga. Atin i Nga i Tuluse ni, Beeney émfétause bé kéluhanay éntingayéne inok énda méalfa ro. Rigoné noy ni dob barakatane kébérén hén. Atin amun énggilid kénda noy sala i de kéilawan, ménséfule mangéy dob lawayo inok mésar fingé dob kuwonoy Tuluse inok méguléw.

⁴Mélaw i Nga i Tuluse, ménwaléy toow na fo gérotor bé de télaki. Loo so bé ni, bé kéfédawéti Tuluse Jesusey Nga ne, giton toow na fo gérotor i Jesuse bé de télaki. ⁵Non wén i Ménsulate Kébérén i Tuluse bénréhén dob Jesuse mano, “Beemey Nga guwe, béléewe ménwaléyu Bohém.” Bénréh i Tulusey ni dob Jesuse, éndob énda bénréhén de dob de télaki no. Atin wén soy Ménsulate Kébérén i Tuluse mano, “Begéney Boh ne, atin Beeney Nga guwe.” Bénréh i Tulusey fantage bé Jesuse,

békén fantag bé de télaki. ⁶Atin amun gédétén i gaiwe féuwit i Tulusey toowe fo gérotor Ngaén mangéy dob duniyae ni, ménbéréh man mano, “I Beene, fatut féngadaféy kéluhanay de télaki gu.” ⁷Endob ay niy kébéréh i Tuluse fantag bé de télaki no mano, “I de télaki gu, sani de sugu-sugué ku, féwaléyé ku bero do réfuruh brab do aféy.” ⁸Endob ay niy kébéréh i Tuluse fantag bé Nga ne mano, “Beemey Tuluse brab méguléw taman sa taman. Métintu foy kéféguléw me. ⁹Atin méimu go bé fiyowe, brab mérarék go bé tetee. Been i niy funa kuwe, sani Tulus me, ménémili Beem inok fégérоторé ku Beem bé de dumo mo. Atin fénoror gu so beem.” ¹⁰Atin wén soy ségiyowe Ménsulat Kébéréh i Tuluse dob Nga ne mano, “I Beeme, Kadnan, bé feganayo Beemey léménimbage bé duniyae. Atin rénigo moy lawaye bé de kémérém. ¹¹I duniyae brab lawaye, méalfa ro moso, éndob i Beeme, méuyag go taman sa taman. I de ni waléy ro tafay ségiléw bé kégale. ¹²Ségiléw bé kékédét me bé kégale inok baliwana mo bé mantuwe de. Endob i Beeme, énda méfégalin go, atin énda i tamanay kéuyag me.” ¹³Atin ménbéréh soy Tuluse dob Nga ne mano, “Sar go fingé dob kuwono kuwe ni taman fétabané ku Beem bé de sébanil Beem.” Endob énda bénréh i Tulusey ni dob de télaki no. ¹⁴Mélaw, i de télaki, beroy do sugu-suguéy Tuluse saén. Enda gito gey bero, éndob suguéy Tuluse bero témabang betom do étew gégédot bé umule magufusa tidéw dob Beene.

2 ¹Mélaw fatut fo fétuntayé tom i de toow kétoro énggelingoo tom, inok taus i kéunur tome de. ²Non toow i kitabe niray i Tuluse fénuwitén bé de télaki. Mélaw i kéluhanay de mémélis bé kitabe, ménkukum ro loo bé fatute. ³Atin ségiléw so bé ni, tintu mékukum tom so amuk fédayaé tom brab énda odoro tom i kétoroe fantag bé fiyowe kéfukas i Tuluse betom bé de sala tom. I Kadna tome Jesus i sunguwe ménuret betom fantag bé ni kéfukas, sani amuk munur tom bé Jesuse, kédané noy de sala tom inok énda mékukum tom. Atin i de étew énggégélingo bé ni kéuret i Kadnane, bénréh roy toow fo toow i kéuret ne de. ⁴Atin i Tuluse, fénggito no so toow i ni kéuret bé kéférigo nuwe bero do ségiyo-giyo do mékégaif bé barakat ne. Atin nirayén dob de ni muret i de kéfurungon sabaf bé kéfémantuoy Rémogor i Tuluse bero. Niray i Tuluse beroy loowe bé kétaya nuwe de irayén dob séngae ségétew bero.

⁵Atin bérhéhé ku begom i fantage bé mantuwe duniya gégumah moso. I Tuluse, énda fénémilién i de télaki méguléw bé ni mantu duniya. ⁶Yamula fénémilién i de étew. Non wén i Ménsulate Kébéréh i Tuluse mano, “Tulus, sedek énda lifoté moy de étew? Non kéilawan ro saén. Sede mélaw ké fagifaté mo bero? ⁷Fénggérifantadém bero bé de télaki singkow saén. Endob niraya moy de kéilawan bantugan brab fénfégadata mo bero. ⁸Atin fénémiliém i de étew méguléw bé kéluhanay de éntingayén.” Been i niy Ménsulate Kébéréh i Tuluse. Mélaw gétiga tom féguléwoy

kéilawaney kéluhanay éntingayéne, atin énda i éntingayén énda féguléwo no de. Endob gétiga tom so, béleewe ni énda séna méguléw i kéilawane bé kéluhanay éntingayéne. ⁹Endob gido loo, gétiga tom i Jesuse fénggérifantad i Tuluse bé de télaki bé singkowe saén inok méléhu gantino noy kéluhanay de étew inok énda méléhu ro. Ménrigoy ni sabaf bé kégédaw i Tuluse. Atin béleewe, bantugén i Jesuse brab fégadatan fo toow sabaf bé kékédaya ne bé kékéfélhue de. ¹⁰I Tuluse, lénimbagén i kéluhanay éntingayéne brab Beeney émfétause bé kéluhanane. Atin fiyoy rénigo nuwe bé kékédaya ne bé Jesuse. Mérasay, non sabaf bé kérasay ne, énda i kulang dob kékufkas ne betom. Rénigoy Tulusey ni inok féwaléyé no betom médo do ngaén inok médayéw tom séréngan bé Jesuse taman sa taman. Non i Jesuse, Beeney aguwoy de étew inok méfukas ro tidéw dob de sala ro.

¹¹I Jesuse, linisé noy de étew dob de sala ro. Atin i betome do ménlinisén dob de sala tom, sétiman tomén Boh bé Jesuse, sani Tuluse. Been i niy funa Jesuse énda mémala no fédawété no betom do tuwaréyén. ¹²Non wén i Ménssulate Kébérén mano, “Tulus, béréhé kuy fantage bé Beeme dob de tuwaréy gu. Atin dayéwé ku Beem dob kéluhanay de étew sélimud féngadafé ro Beem.” ¹³Atin bénréh Jesuse so mano, “Sémarigu dob Tuluse.” Atin bénréhén so mano, “Ay niwu, begey i de nga i Tuluse nirayén dob Begéne.”

¹⁴Atin i de betom do nga i Tuluse, méléhu tom non kéilawan tom saén. Been i funa Jesuse ménwaléy so kéilawan loo bé betome. Rénigo noy ni inok méléhu, inok bé kéléhu ne, énggébinasana noy Satanase, sani tidéwoy kéléhue. ¹⁵Atin rénigo noy ni inok géfukasa noy kéluhanay de étew bé ménrugayén i kégilak ruwe méléhu. ¹⁶Atin békén do télakiy tabanga nuwe. Yamula betom do séfu Abraham i tabanga nuwe. ¹⁷Been i niy funa nuwe kailanga noy waléye ségiléw bé betome do tuwaréyén, inok Beeney waléye toow fo mégédaw brab tintu fo gésarigon gérotor fadi tom dob adafay Tuluse, inok gékédana noy de sala tom do kéilawan. ¹⁸Atin mélaw, gétabana noy de étew téngkadé Satanase, non i Beene ténengkad Satanase so brab toow fo fénrásayén.

3 ¹Do dumo gu do munur bé Kristowe, sani de sénéngkat i Tuluse batí moso dob lawayo diyo, fégitung gom i fantage bé Jesuse. Been i no sénugu i Tuluse mangéy dob duniiae ni. Sénuguén inok waléy gérotor fadi bé kékéngintulus tome dob Beene. ²I Jesuse ni, toow fo nodoro noy kéluhanay de fénrigoy Tuluse de, ségiléw bé kéodoro Moisese bé kéluhanay de galbékén dob de étew i Tuluse. ³I étewe rémigo lawi, mas na émbantug bé lawie. Ségiléw so bé Jesuse, mas na émbantug bé Moisese. ⁴I kéluhanay de lawi, wén i do réménigo bero. Atin Tulus i réménigowe bé kéluhanay éntingayéne. ⁵I Moisese, fiyoy rénigo nuwe amun sugu-suguén dob de étew i Tuluse. Atin i rénigo nuwe ménwaléy

maak anlung i rigonéy Tuluse moso. ⁶Endob i Kristowe, Beeney Nga i Tuluse brab Been soy sarigone méguléw bé de étew i Tuluse. Atin i betome do munur de, betom i de étew i Tuluse, amuk méégét i kéunur tome de brab amuk énda mékédan i késarig tome de bé kéongot-ongot tome de.

⁷Non wén i Mén sulfate Kébérél i Ré mogor i Tuluse mano, “Amuk gé lingoo kom i kékérél i Tuluse béléewe ni, ⁸kagom fétégasén i de uléw gom loo bé kétégas i uléw i de katufua kom amun ménika ro bé kétayay Tuluse dob gonone énda i étew de bat. Non ténéngkad ro diyo i kétinkél i Tuluse. ⁹Fiyon fo ké énggito roy de mékégaif do rémigo gu bé ménfote folo gébélintuwa,” bang i Tuluse, “ténéngkad roy kétinkél guwe bé de tete adat ro. ¹⁰Mé law ménkérítu bero brab bénréh gu maku, ‘Démoyun ro mika bé kétaya kuwe brab énda fo modor ro bé de sugu gu.’ ¹¹Mé law ménkérítu bero, brab fénasada ku bero maku, ‘Enda géahur ro dob gono kuwe inok gétérén ro moso séréngan Begén.’ ” Been i niy kékérél i Tuluse.

¹²Mé law, do dumo gu, ingat gom inok énda i ségétew begom waléy tete i itunga nuwe brab énda munurén bé Tuluse. Non amuk loo bé ni, diguré noy méuyage Tulus. ¹³Yamula, fatut séfifiyo tom fédew sénga fuweh lokut wén sénay gai tom inok énda i ségétew betom énggégéfakaran rémigo sala funa no waléy métégas i uléw ne. ¹⁴Non amuk féégétē tom i késarig tome bé Kristowe taman sa taman loo bé gétaho, toow fo gétaus tom sédumon bé Kristowe.

¹⁵Been i niy bénréh i Mén sulfate Kébérél i Tuluse mano, “Amuk gé lingoo kom i kékérél i Tuluse béléewe ni, kagom fétégasén i de uléw gom loo bé kétégas i uléw i de katufua kom amun ménika ro bé kétayay Tuluse.”

¹⁶Ati de étew énggégélingo bé kékérél i Tuluse, éndob natuho roy Tuluse? Beroy de étew do Judio do fénanangguwit Moisese tidew Egip. ¹⁷Ati de étew kénritoy Tuluse bé ménfote gébélintuwa? Bero soy de Judio do mén sala dob Tuluse funa ro ménléhu dob gonone énda i étew de bat. ¹⁸Beroy de étew fénasaday Tuluse mano, “Enda fakayén ké mahur ro dob gono kuwe inok gétérén ro moso séréngan Begén.” Non énda modor ro bé kékérél i Tuluse. ¹⁹Mé law gé tiga tom énda énggéahur ro non énda ménunur ro bé Tuluse.

4 ¹Fiyon fo ké énda géahur i de énggétah do étew, énda mékédan i fasad i Tuluse bé fakay géahur i de étew dob gonoy Tuluse témérén. Mé law fatut mingat tom inok kéluhana tom géahur diyo. ²Non énggégélingoo tom i Fiyowe Uret ségiléw bé kégégingo i de katufua tom de. Endob fiyon fo ké énggégélingoo ro, énda énggédot roy fiyowe non énda ménunur ro de. ³Endob i betome do munur de, géahur tom dob gonoy Tuluse inok gétérén tom. Endob i de étew do énda munur,

énda fakayén mahur ro. Non wén i Ménsulate Kébéréh i Tuluse mano, “Ménwaléyu mékerit, atin réménigowu fasad bé énda géahur ro dob gono kuwe témérén.” Bénréh i Tulusey ni fiyon fo ké méntafayén i gono nuwe, non ménggilidén i galbék ne tidéw bé kélimbag ne bé duniyae ni. ⁴Non wén i Ménsulate Kébéréh i Tuluse fantag bé géfitéw ne gétérésangan mano, “Amun énggilid i Tuluse bé galbék ne, téménréni dob géfitéw ne gétérésangan.” ⁵Atin wén man i Ménsulate Kébéréh i Tuluse mano, “Enda fakayén ké mahur ro dob gono kuwe témérén inok gétérén ro séréngan Begén.” ⁶I de sungu étew énggégélingo bé Fiyowe Uret, énda énggéahur ro dob gonoy Tuluse, non énda ménahur ro. Mélaw wén i do ségiyo étew géahur dob gonoy Tuluse inok gétérén ro séréngan de. ⁷Gétiga tom i ni non réménigo man ségiyo gaiy Tuluse inok géahur i de étew dob gono nuwe témérén. Non amun ménifus i ménrugaye nén gai tidéw bé gaiwe énda ménunur i de sungu do étew, fénbéréh i Tuluse Datu Dabide mano, “Amuk gélingoo kom i kékéréh i Tuluse béléewe ni, kagom fétégasén i de uléw gom.” ⁸Atin fantag man bé de ni do sungu étew, amuk énggfanangguwito Josuehe bero mangéy dob tintuwe gonoy Tuluse inok tintu gétérén ro, éndaén damén ménbéréh i Tuluse fantag bé ségiyowe gai géahur i de étew dob gonoy Tuluse inok gétérén ro. ⁹Mélaw gétiga tom géahur soy de étew i Tuluse dob gonoy Tuluse inok gétérén ro ségiléw bé kétérény Tuluse dob géfitéw ne gétérésangan amun énggilid léménimbag. ¹⁰Non i kéluhanay de étew géahur dob gonoy Tuluse inok gétérén ro séréngan de, gétérén ro so dob de galbék ro ségiléw bé kétérény Tuluse bé kélimbag ne. ¹¹Mélaw toow tom fo télamanén i mahure inok gétérén tom séréngan bé Tuluse. Katom félisén i kékéréh i Tuluse loo bé rénigoy de énggéétah do étew funa ro énda énggéahur.

¹²I kékéréh i Tuluse toow fo barakatan brab miray bé umule magufusa. Ségiléw bé sundange toow fo murém. Non i kékéréh i Tuluse maak diléké noy de itunga tom brab de fédew tom. I Nga i Tuluse gétiga noy kéluhanane fantag bé betome. Gétiga noy itunga tome brab fédew tome. ¹³I Tuluse gétiga noy kéluhanane, énda i éntingayén mébunéy dob Beene. Gito noy kéluhanane, fiyon i de rigoné tom. Mélaw wén mosoy gai kailanga tom témindég dob adafa nuwe brab bérhéhén dob Beeney fantag bé kéluhanay de rénigo tom.

¹⁴Mélaw fatut fo fétausé tom i kékégét i kéunur tome bé Jesu Kristowe loo bé fénayag tome. Non wén i toowe fo fiyo gérotor fadi tom, sani Jesuse Nga i Tuluse, déméniyat mangéy dob Tuluse. ¹⁵Atin i ni gérotor fadi, toow fo gésobuto noy kélubay tome non kéilawan tom saén. Non i Jesuse ménwaléy kéilawan brab ténukaw Satanase bé séngae gékélasi kétukawan de ségiléw bé betome, éndob énda fo énggésala i Jesuse. ¹⁶Mélaw, katom mégilak fégédét dob mégédawe Tulus. Non ménuray i na nuwe betom brab mégédaw betom, atin tabanga no betom dob de gai kérégénan tom.

5 ¹I kéluhanay de gérotor do fadi, fénémilién bero inok waléy ro do kéfédéway de étew mangéy dob Tuluse. I galbéke sénarig dob berowe, témulak ro dob Tuluse inok mélékan i sala i de étew. ²I de gérotor do fadi, do kéilawan ro saén atin mélubay ro. Mélaw gétinkélo roy de étew ké gésala ro atin méuray i na ruwe bé de étew gésala non énda gésobuto roy fatute. ³Atin i de gérotor fadi, kéilawan ro saén, mélaw énda démoyun ro gérido bé fatute. Mélaw kailanga roy témulake inok kédanéy Tulusey de karo sala ségiléw bé de sala i de ségiyo do étew. ⁴Atin i galbék i gérotore fadi, toow fo fégadatay de étew. Atin énda i ségétew étew géfémili bé kaane lowoh waléy gérotor fadi. Non Tulus saén i mémilie bé ati isuwe waléy gérotor fadi loo bé kéfémili ne bé Aarone bé do gétah.

⁵Atin ségiléw so bé niy Kristowe, békén Been i ménémilie bé lowoh ne inok waléy gérotor fadi. Yamula Tuluse i ménémilie de, sani ménbéréhe dob Beene mano, “Beemey Nga guwe, béléewe ménwaléyu Bohém.” ⁶Atin wén soy ségiyowe kébéréh i Tuluse mano, “Beemey ségétewe fadi taman sa taman, ségiléw bé Melkisedeke.”

⁷Amun ménbati sénay Jesuse dob duniyae ni, déménasal brab kéménrew ménfégédaw-gédaw dob Tuluse, sani géfukase de bé kéléhue. Atin fénggélingo i Tuluse non bénasana noy Tuluse brab nodoro noy kétayay Tuluse. ⁸Fiyon fo ké Nga i Tulusey Jesuse, féngganadén i kéodore bé de sugu i Tuluse bé kérasaye énggéagéwo no. ⁹Atin amun énggilid non i kéluhanay sénugu i Tuluse de, ménwaléy Been i mémukase bé kéluhanay de étew modor dob Beene inok gédoté roy umule magufusa. ¹⁰Atin tidéw béno, fénwaléy i Tulusey Jesuse gérotor fadi ségiléw bé fadie Melkisedek bé do gétah.

¹¹Médooy gébérého keye fantag bé ni. Endob mérégén i kékéfésobute de dob begome non métana gom gésobut. ¹²Ménrugay gomén ménunur bé Jesuse. Mélaw fatut gomén damén do téromo. Endob énda fakayén non taman so béléewe ni kailangan gom séna toroén inok gésobuto kom i de sungu kétoro fantag bé kébéréh i Tuluse. Fatut damén mama gomén bé de métégas do amaén, sani ménaléme kétoro, éndob taman so béléewe ni maak témutu gom séna. ¹³I de témutu séna, do nga ro séna. Enda gésobuto roy kétoroe fantag bé kétintuwe. ¹⁴Endob i de lukés, mama ron bé métégase do amaén. Atin gélolo ronén i fiyowe brab tetee sabaf bé kéfeganad ruwe de.

6 ¹Mélaw katomén séduli-dulién i de sungu kétoro fantag bé Kristowe. ²Yamula féganadé tom i de ménalém de. Endaén kailanga tom démoyun féganadén i de kétoro, loo bé fatut tagakéy de étew i de rigonén énda géfukasa no bero, brab fatut munur ro bé Tuluse. ³Endaén kailanga tom féganadén i kétoroe fantag bé kébautise, brab fantag bé kétégéné bé de bunbunan bé lala i kédasalane de, brab fantag bé kétébule i de étew,

brab fantag bé kékukum i Tuluse taman sa taman. ³ Yamula féganadé tom soy de ménalém do kétoro, amuk tungkaséy Tuluse damén.

⁴I de étew témenrén ro munur, éndaén gésénule ro man ségule. Bé do géyah, énggésobuto ronén i toowe kétoro fantag bé Jesuse. Brab énggédot ronén i niray i Tuluse fénagéw dob Kristowe brab énggédot ronén i Rémogor i Tuluse. ⁵Bé do géyah, énggétiga ronén toow fo fiyoy kékérén i Tuluse. Brab énggétérédama ronén i barakat i Tuluse fégito no moso dob de mantu do gai. ⁶Gido loo, té nagak roy de ni. Mélaw éndaén fakayén fégésénuleén ro man. Non maak séguleé ro man féléhuén i Nga i Tuluse. Mélaw fémalané roy Nga i Tuluse dob adafay de étew.

⁷Ufama, i betome tidéw dob fantade ni do kéilawan ségiléw tom bé fantade démoyun méraaan. Amuk témunoh i de fiyo ohokén do amaén, féfiyonéy Tulusey no fantad. ⁸Endob amuk féerukéy fantadey de suwar brab de kéeroon, énda i do lagaén. Mélaw tuwégéy gefee de. Ségiléw so bé ni, i étewe miring bé fantade ni, kukuméy Tuluse.

⁹Mélaw, do dumo gu, fiyon fo ké loo bé niy kékérén guwe dob begome, gétiga ku taus gom rémigo fiyo loo bé fatute rigonéy de étew ménfukas dob de sala ro. ¹⁰Toow fo métintuy adat i Tuluse. Enda mélifotén bé de fiyo rénigo gom brab kéimu gome bé Tuluse fénggito gom bé kétabanga kome bé de dumo gom munur bé Kristowe. Atin taman so béléewe niy kétabanga kome bero. ¹¹Toow fo méuyot gey de ké fétausé kom kéluhanan i kégeror gome taman bé késéfule Kristowe, inok gédoté kom i kéluhanay inamé kome. ¹²Mika gey de ké waléy gom faukén. Yamula fatut iring gom i de étew do munur brab do témingkél. Beroy de étew gégedot bé fénasad i Tuluse.

¹³Fégitung gom i katufua tome Abraham. Amun fénasaday Tulusey Abrahame, énda i ségiyo toow na fo gérotor bé Tuluse inok usaré noy dawét ne fégésafaén. Mélaw nusar i Tulusey kaane dawét fénggésafaén bé ni fasad. ¹⁴Ménbérén i Tuluse mano, “Fasada ku beem bé féfiyoné ku beem brab iraya ku beem médoó do séfuém.” ¹⁵Atin témeningkél i Abrahame, mélaw énggédotén i fénasad i Tuluse de. ¹⁶Amuk sémafa i étewe, usaré noy dawét i ségétéwe étew toow na fo gérotor bé beene. Atin géunur mélaw i de étew gégélingo de. ¹⁷Ségiléw so bé ni, i Tuluse toow fo fénbagérén i fasad ne bé kérigo nuwe bé safá ne, inok i de étew fénasada no toow fo fégito no bero brab fégétiga no beroy énda émfégalin i fasad ne brab tintu fo tumané no. ¹⁸Mélaw ruwo timan éntingayén i éndae fégaliné no. I sébaane de, been i fasad ne. Atin i géruwono nuwe, been i safá ne. Mélaw gétiga tom énda témuji i Tuluse. Mélaw i de betom do étew fédiyaga bé Tuluse, toow fo méégét i géunur tome dob Beene loo soy inam tome bé gédoté tom i fénasad ne dob betome. ¹⁹⁻²⁰Toow fo méégét i inam tome bé tumanéy Tulusey fasad ne betom. Non sénarig tom i nan

dob Tuluse. Mélaw énda mékédan i kéunur tome de. Atin i funa nuwe énda mékédan i késarig tome de non wén i kéfédéwa tom dob sékuloy Tuluse, sani Jesu Kristowe. Maak ménahur dob sibéy i Tuluse mangéy fingé bala bé rindunge dob lawi i Tuluse. Atin diyo mélaw dob sékuloy Tuluse. Ménwaléy gérotor fadi tom taman sa taman loo bé fadie féndawét Melkisedek bé do gétah.

7 ¹I Melkisedeke ni, beeney datu i ingéde Salem bé do gétah. Atin been soy fadie méngadaf bé toowe fo gérotor Tulus. Atin wén i no gai, ménsétiboh i Abrahame bé de ségiyo datu, sani de kéménéfo bé samung ne, atin énggáféléhu no bero. Atin bé lala Abrahame mule, énggébalaka noy Melkisedeke. Atin nongot Melkisedeke dob Tuluse, bé féfiyoné noy Abrahame damén. ²Tidéw bénou, niray Abrahame dey géfoloe bé ténaba nuwe énggédotén dob de datu fénléhuén. I atag i dawéte Melkisedek, “Métintu Datu”. Atin non datu i Melkisedeke dob Salem, i atag i dawét ne so, “Datu Kémédan bé Késétibohe”. ³Enda ménsulatén ké ati boh Melkisedeke taloo no ati idéng ne taloo no ati katufua nuwe. Atin énda so ménsulat i fantage bé kéumah ne taloo no fantag bé kéléhu ne. Mélaw maak Nga i Tuluse non énda gétigay de étew de ké ati tidéwo nuwe de taloo no ati ténamana nuwe de. Mélaw i Melkisedeke fadi taman sa taman.

⁴Mélaw gétiga tom toow fo gérotor i Melkisedeke. Non fiyon i Abrahame sani katufua tome do Judio, nirayén i géfoloe bé ténaba nuwe énggédotén bé késétiboh ne. ⁵I de fadi i de Judio, sani de séfu Lebi, séfu ro soy Abrahame. Sénugu i kitabe bero médot bé géfoloe tidéw dob de Judio. Mélaw éndot ro tidéw dob de dumo ro do Judio, fiyon fo ké do séfu Abraham ro so kéluhanan. ⁶Endob i Melkisedeke békén séfu Lebiwe. Gido loo, éndotén i géfoloe tidéw dob Abrahame, atin nongotén dob Tuluse bé féfiyoné noy Abrahame. Rénigo noy ni, fiyon fo ké Abraham i étewe fénasaday Tuluse. ⁷Atin gétiga tom, i étewe ongoté no dob Tuluse bé féfiyoné noy ségétéwe étew, toow na fo gérotor i nan étew. ⁸I de fadi i de Judio médot bé géfoloe tidéw dob de dumo ro Judio, méléhu ro. Endob i Melkisedeke, sani méndote bé géfoloe tidéw dob Abrahame, énda ménsulatén dob kékérén i Tuluse fantag bé kéléhu ne. ⁹⁻¹⁰Atin amun niray Abrahamey géfoloe dob Melkisedeke, maak Lebi soy méniraye. Non fiyon fo ké énda séna ménumph i Lebiwe de, maak diyo séna dob lowoh i katufua nuwe Abraham bé kégébalak ne bé Melkisedeke. Atin Lebiy katufuay de fadi médot bé géfoloe tidéw dob de Judio. Mélaw giton bé ni, mas gérotor i kékadi Melkisedeke bé kékadi i de séfu Lebi.

¹¹Amun niray i Tulusey kitabe dob de Judio, ménemili do fadi, sani de séfu Lebi, inok beroy de gémamak bé kitabe. Endob amuk fakay waléy métintuy kéilawane sabaf bé galbék i de fadi tidéw dob de séfu Lebi, éndaén damén kailangan i ségiyowe fadi loo bé Melkisedeke, békén loo

bé kéfadi Aarone sani séfu Lebiwe. ¹² Atin amuk fégalinén i fadie, fatut so fégalinén i kitabe. ¹³⁻¹⁴ Atin i Kadna tome Jesu Kristo, sani mantuwe fadi bénréh gu, békén séfu Lebiwe. Yamula, Beeney séfu Judahe, atin énda i ségiyo bé de séfu Judah do ménwaléy fadi. Mélaw bé kéluhanay de séfu Judah, Jesuse saén i ménwaléye de fadi. Non énda bénréh Moisese de ké waléy do fadi i de séfu Judah.

¹⁵ Atin ménggiton fo toow bé amuk wén i mantu fadi loo bé Melkisedeke baliwana no bé de séfu Lebi, wén soy mébaliwanan bé kitabe niray Moisese. ¹⁶ Atin i Jesuse énda ménwaléyén fadi sabaf bé kitabe sénugu bé i de séfu Lebi saén i waléye do fadi. Yamula ménwaléy fadi sabaf bé kébarakatay umul ne énda méléhuén taman sa taman. ¹⁷ Non wén i Ménsulate Kébérén i Tuluse mano, “Waléy go fadi taman sa taman, loo bé fadie Melkisedek.” ¹⁸ Mélaw i de tafay sugu fantag bé de fadi ménkédanén non énda i laga ro brab énda gétabanga ro betom. ¹⁹ Non i kitabe niray Moisese, énda fakayén ké waléy tom métintu sabaf bé kéodor tome de. Mélaw niray i Tuluse betom i mantuwe aguwon toow na fo fiyo. Atin sabaf bé ni, géfégédét tom dob Tuluse.

²⁰ Atin saliyu na bé ni, ay niy ségiyowe funan mas na fiyoy mantuwe ni agéwon. Amun rénígoy Tuluse fadi i Jesuse, réménigo so safá dob Beene. Endob énda rénígo noy ni safá bé kérigo nuwe bé de séfu Lebi do fadi. ²¹ Endob i Jesuse, ménwaléy fadi bé safá i Tuluse mano, “I Begéne Kadnan, rigoné kuy fasade bé waléy go fadi taman sa taman. Atin énda fégaliné kuy kétaya kuwe.” ²² Mélaw sabaf bé ni safá i Tuluse gétiga tom toow na fo fiyoy mantuwe aguwon rénígoy Tuluse inok tanggafé noy de étew, sani kéunur tome bé Jesuse.

²³ Atin ay ni ségiyowe funan mas na fiyoy mantuwe agéwon. I de fadi do séfu Lebi, kailangan médoo ro non méléhu ro, atin amuk méléhu i ségétéwe de, kailangan wén i baliwa no. ²⁴ Endob i Jesuse, méuyag taman sa taman. Mélaw énda i baliwa no. ²⁵ Mélaw fakay géfukasa noy de étew tidéw dob de sala ro, sani de étew modor de mangéy dob Tuluse. Gérígono noy ni sénga tékélid taman sa taman. Non méuyag taman sa taman, atin mélaw wén i kéfédéwa tom mongot dob Tuluse.

²⁶ Mélaw Jesus i gérotore fadi kailanga tom. I Jesuse, mékétéfu brab énda i salaén. Enda ségiléwén betom do gésala. Atin amun déméniyat i Jesuse, rénígoy Tuluse toow fo gérotor. ²⁷ Ségiyo foy Jesuse bé de ségiyo do fadi. Enda kailanga noy témulake dob Tuluse sénga fuweh inok ménkédan i kaane sala, atin tidéw béno témulak man inok ménkédan i de sala i de ségiyo étew. Non nirayén i sébaane tulakén, sani lowoh ne. Mélaw éndaén kailanga noy témulake. ²⁸ I kitabe niray Moisese, mémili do gésala étew inok waléy ro do gérotor fadi. Endob ménrugay tidéw béno, ménwaléy gérotor fadi i Nga i Tuluse non fénémili i Tuluse sabaf

bé fasad ne bé safá ne. Atin i Jesuse ni, énda i salaén taloo no udenén kulang de. Atin ménwaléy gérotor fadi taman sa taman.

8 ¹Ay niy atag i kéluhanay de uret gey begom dob ni sulat. Wén i gérotor fadi tom loo bé nan nuret gu, Been i Jesu Kristowe. Diyo dob lawayo mésar fingé dob kuwonoy barakatane Tulus. ²Mélaw diyo i Jesuse rigoné noy galbék i fadie dob tintuwe lawi i Tuluse dob lawayo. Békén étew i réménigowe bé ni lawi, yamula Kadnan i réménigowe de.

³I kéluhanay de gérotor do fadi, fénwaléyén bero do fadi inok miray ro do ayam tulakén dob Tuluse. Mélaw ségiléw so bé ni, i katome gérotor fadi, fatut wén i tulakén irayén dob Tuluse. ⁴Amuk diniy Jesuse dob fantade ni, énda fakayén waléy fadi. Non wénén i do fadi do miray tulak loo bé fatute dob kitabe niray Moisese. ⁵Endob i toowe, i galbéke rigonéy de fadi dob fantade ni, maak anlung i toowe galbék rigoné Jesuse dob lawayo diyo. Ségiléw so bé rénigo Moisese. Non amun gédétén rigoné noy safute lawi i Tuluse, bénréh i Tuluse de mano, “Rigo mo loo bé falas i tintuwe simbaan dob lawayo fénggito gu beem dob tuduke.” ⁶Atin i galbék Jesu Kristowe bé kéfadi ne toow na fo fiyo bé galbék i de fadi do séfu Lebiwe. Atin ségiléw so bé ni, i mantuwe aguwon rénigoy Tuluse inok tanggafé noy de étew toow na fo fiyo dob tafaye aguwon. Non toow na fo fiyoy fasade fégérigo bé mantuwe aguwon.

⁷Amuk énda i kulang bé sunguwe aguwon, éndaén kailangan i mantuwe de. ⁸Endob i Tuluse énda ménswatén bé de étew modor bé sunguwe aguwon. Non wén i Ménsulate Kébéréh i Tuluse mano, “Gégumah i gaiwe, bang i Kadnane, rigoné kuy mantuwe aguwon inok tayakufé kuy de étew do séfu Israel. ⁹Békén loo bé sunguwe aguwon rénigo gu kay de katufua ro bé gaiwe fénanangguwit gu bero mésut tidéw Egipto. Non énda ménodor ro bé no aguwon rénigo gu bero. Atin féndaya gu mélaw bero, bang i Kadnane. ¹⁰Ay niy mantuwe aguwon rigoné ku kay de séfu Israel dob de gai moso, bang i Kadnane: Sulaté kuy de kitab gu dob de itunga ro brab dob de fédew ro. Atin Begéney Tulus ruwe, brab beroy de étew gu. ¹¹Atin mélaw, éndaén kailanga no moso toroé ro dob de dumo roy fantage bé Begéne maro, ‘Fatut gétila kom i Kadnane.’ Non i kéluhanay de étew, do gérotor brab do gérisantad, gétila ron Begén. ¹²Atin fésagadé kuy de sala ro, brab éndaén tédémé kuy de tete rénigo ro.” Been i niy kékébéréh i Tuluse. ¹³Atin mélaw gétila tom i sunguwe aguwon tafayén brab éndaén i lagaén, non bénréh i Tuluse bé wén i mantu de. Mélaw gétila tom éndaén méusar i tafaye de non ménkédanén.

9 ¹I sunguwe aguwon rénigoy Tuluse inok tanggafé noy de étew, wén i do suguén fantag bé kéfengadafé brab fantag bé fatute lawi fénadafan rigonéy de étew. ²Rénigo roy safute lawi fénadafan. Atin wén i ruwo timan sibéyén. I sunguwe de, féndawét “Mékétéfu gonon”,

atin wén i solo de brab ahayan brab fan tulakén dob Tuluse féndiyo dob ahayane.³ Dob bengaway ni lawi wén i rindunge de. Atin wén soy rindung fégétéléb bé bengaway géruwonoy sibéy ne. Atin i ni sibéy féndawét “Toow fo Mékétéfu Sibéy”.⁴ Diyo wén i bélowone ahayan gonon témuwég bé dukahe. Diyo soy baule méntéléb bé bélowone. Atin i baule ni, been i niy tandaé bé fasad i Tuluse. Dob ni baul wén i bélowone binangga nahuron bé amaéne féndawét “maná”. Atin diyo so dob baule niy tugé Aarone déméraun. Atin diyo soy de lumfayfay do batéw sénulatay Tuluse bé kitab ne.⁵ Dob rotor i baule ni, diyo féntindég i de kéninontow i de barakatan do télaki émfégétigan bé diyo i Tuluse. Atin ménbekah i de fafak ro dob rotor i gonone frikon bé darae fégékédan bé de sala. Endob énda kailangan fégétiga key begom i kéluhanay de fantag bé ni gonon béleeewe ni.

⁶ Atin amun ménlosoén i kéluhanane loo bé ni, mahur i de fadi dob sunguwe sibéy féndawét “Mékétéfu gonon” sénga fuweh inok rigoné roy galbék ruwe. ⁷ Endob gérotor fadi saén i géahure dob géruwowe sibéy féndawét “Toow fo Mékétéfu Sibéy”. Atin ségule saén mahur sénga ségbélintuwa. Atin amuk mahur diyo, muwit dara tulaké no dob Tuluse inok mékédan i de salaén rénigo no do énda énggétiga no de, brab de sala rénigoy de dumo no do Judio sani de sala énda énggétiga ro rénigo ro. ⁸ I kéluhanay rigonéy de fadi ni, ténero i Rémogor i Tuluse de betom bé amuk wén sénay sungu sibéy, énda séna fakayén géahur i de étew dob géruwowe sibéy féndawét “Toow fo Mékétéfu Sibéy”. ⁹ I de ni maak do anlung i de gai saén béleeewe ni. Fégétiga no betom bé i kéluhanay de iray dob Tuluse brab de ayam do tulakén, énda gékédana roy de sala. ¹⁰ Non i ni kéféngingtulus, fantag saén bé de sugu bé atiy géamaay de étew brab géinémo ruwe, brab fantag so bé de kéurah ro bé de lowoh ro. Endob i de ni do sugu kay de lowoh ro saén, énda gékédana noy de sala ro. Tafayén i de ni do sugu, mélaw usarén saén taman dob gaiwe fégalinéy Tulusey aguwone.

¹¹ Endob i Kristowe, énggumahén brab ménwaléyén gérotor fadi i mantuwe aguwon toow na fo fiyo bé tafaye de. Atin i lawie féngadafan galbéko no, toow na fo fiyo bé tafaye de. Békén rénigoy de étew brab énda dini no dob fantade ni. ¹² Atin ménahur i Kristowe dob Toowe fo Mékétéfu Sibéy ségule saén non éndaén kailanga noy mahure man. Atin békén do dara kambing taloo no do dara nati safi i uwité nuwe fégétulakén dob Tuluse. Yamula nuvitén i kaane dara fégétulakén dob Tuluse. Atin mélaw ménfukas tom tidéw dob de sala tom taman sa taman. ¹³ Bé do géyah, dara kambing brab dara safi brab awéw i natiwe safi i frikéne dob de étew do mékérésik dob kéféngintulus i de Judio. Atin tidéw bénó, éndaén mékérésik ro. ¹⁴ Atin amuk waléy malinis i ségtéwe étew bé dara i de ayam, toow na fo fiyoy gérigonoy dara Jesu

Kristowe. Non sabaf bé kétabang i Rémogor i Tuluse énda i tamana no, nirayén i lowoh ne fégétulak dob Tuluse. Non énda i tete dob Kristowe, fiyon kloh. Atin i dara ne, linisé noy de fédew tom dob de sala tom atin kédané noy késarig tome bé adate énda i lagaén. Atin mélaw gérigoно tom i galbék i méuyaг Tuluse.

¹⁵ Atin been i niy funa Kristowe ménwaléy kéfédouwa tom inok rigoné noy ni mantu agéwon inok tanggaféy Tulusey de étew. Mélaw i kéluhana tome do fénemili i Tuluse, gédoté tom i kéfionone taman sa taman loo bé fénasad i Tuluse. Fakay i ni mérigo non wén i kéléhu, sani kéléhu Jesu Kristowe, kémédan bé de sala tom rénigo tom bé lala tome séna ménodor bé tafaye agéwon.

¹⁶ Ufama, wén i ségétew étew rémigo sulat bé lala ne séna méuyag. Sénulatén ké ati gégédote bé de tamukén féledé no ké méléhu. Atin amuk ménléhuén i ni étew, kailangan wén foy émféféngintoow de ménléhuén. Tidew bénou, i étewe gégédot bé tamuk ne, gédoté no loo bé kékéréh i sulate. ¹⁷ Endob amuk méuyag sénay ni étew réménigo sulat, énda i laga i ni sulat. Non wén saén i atagén ké méléhuén. ¹⁸ Atin ségiléw so bé niy tafaye ni aguwon rénigoy Tuluse. Non kailangan wén i dara inok mékédan i de sala. ¹⁹ Dob sunguwe de, bénréh Moisese dob de étew i kéluhanay de sugu tidew dob kitabe. Tidew bénou, éndotén i dara i de nati safi brab kambing atin sénlawékén bé wayége. Tidew bénou, fénreén i bubul i bili-biliwe fénfuro no, brab fénreén soy klohe fongoy kayéwe féndawét isob. Atin tidew bénou, fénrikén dob de étew brab fénrikén so dob librowe sénulatan bé kitabe. ²⁰ Atin bé lala Moisese mémirik, ménbéréh mano, “Ay niy darae tanda i aguwone rénigoy Tuluse inok tayakufé no betom. Atin fatut odoro tom i ni agéwon non sénugu i Tuluse.” ²¹ Atin fénrik Moisese soy darae dob safute lawi féngadafan, loo so dob kéluhanay de gamit usarén bé kékéngintuluse. ²² Géfédew kéluhanay éntingayéne ténero i kitabe fatut firikon bé dara i ténu lake inok waléy ro malinis dob adafay Tuluse. Atin amuk énda i dara ténu lake, énda méfésagad i de étew bé de sala ro.

²³ I kéluhanay de éntingayéni dob lawie féngadafan kailangan firikon bé darae. Endob i de ni maak do anlung i toowe gamit i féngadafane dob lawayo saén. Mélaw fatut toow na fo fiyoy tulakéne dob tintuwe gamit i féngadafane dob lawayo. ²⁴ Mélaw ténu lake Kristowey kaane dara. Atin énda ménahurén dob mékétéfuwe sibéy dob fantade ni non maak anlung i tintuwe féngadafan dob lawayo saén. Atin diyo béniy Kristowe rigoné noy galbék i kéfédouwa tome dob adafay Tuluse. ²⁵ I gérotore fadi i de Judio mahur dob Toowe Fo Mékétéfu Sibéy sénga bélintuwa, muwit bé dara i ayame fégétulakén. Endob i Kristowe, énda kailanga noy mahure médoō gule ténu lake bé lowoh ne. ²⁶ Non amuk kailangan rigoné noy

ni sénga bélintuwa, kailangan so mérásay médoō gule tidéw bé gayi kélémbage bé duniyae ni. Endob kailanga no saén i mahure ségule amun gédétén i tamfaday de gai. Atin méntéfegito inok kédané noy sala i de étew sabaf bé kétulak ne bé lowoh ne.²⁷ I kéluhanay de étew kailanga roy mélöhue, tidéw béno kukuméy Tuluse bero.²⁸ Atin loo so bé ni, téménulak i Kristowe ségule inok mékédan i sala i de medoo étew. Atin séfule mangéy dob duniyae ni. Endob énda séfuleén inok kédané noy sala i de étew. Yamula séfule mangéy dini inok fégilidé noy kéfukas ne bé de étew mongot-mongot bé késéfule ne.

10 ¹I kitabe niray Moisese, maak anlung i de tintu fo fiyo iray Kristowe saén moso. Mélaw kulang i kitabe sémugu bé fatut témulak i étewe sénga bélintuwa taman sa taman. Non i kitabe énda géféwaléyo no métintuy étewe fégédét dob Tuluse.² Mélaw i de étew ménéngintulus loo bé sénugu i kitabe, amuk tintu ménwaléy ro damén malinis dob adafay Tuluse, éndaén tete i de fédew ro fantag bé de sala ro, atin éndaén kailanga roy témulake man ségule.³ Endob i toowe, gétedémo ro énda séna ménkédan i de sala ro, non kailanga roy témulake sénga bélintuwa.⁴ Non i dara i de safi taloo no do kambing, énda fakayén kémédan bé de sala.

⁵ Mélaw amun gédétén gégumah i Kristowe dob duniyae ni, bénréhén dob Tuluse mano, “Enda méuyot go bé de ayam do tulakén dob Beeme. Yamula rénigo moy kagéne lowoh inok been i niy fatute tulakén dob Beeme.⁶ Non énda mésuwat go bé de ayam tulakén do tuwégén dob ahayane féngadafan brab de tulak fégékédan bé sala i de étew.⁷ Mélaw, bérhéhé ku dob Beeme, Tulus, ay niwu inok rigoné kuy kétaya muwe loo bé mén sulfate fantag bé begéne dob libro muwe.”⁸ Ay niy sunguwe bénréh Jesuse, “Enda méuyot go taloo no mésuwat go bé de tulak taloo no do ayam tuwégén dob ahayane féngadafan taloo no do tulak fégékédan bé de sala.” Bénréhén i de ni fiyon fo ké been i de niy sénugu i kitabe.⁹ Tidéw béno, bénréh Kristowe mano, “Tulus, ay niwu inok rigoné kuy kétaya muwe.” Mélaw gétinga tom kénday Tulusey tafaye aguwon tulakay de étew. Atin bénaliwana no bé tulak Kristowe.¹⁰ Rénigo Kristowey kétayay Tuluse rigoné no. Mélaw i kéluhana tome ménwaléy tom malinis dob adafay Tuluse non ménkédanén i de sala tom sabaf bé tulak Jesu Kristowe, sani kaane lowoh. Mélaw éndaén kailangan i ségiyowe tulak.

¹¹ Dob tafaye aguwon, i de Judío do fadi témindég ro dob lawie féngadafan sénga fuweh inok rigoné roy galbék ruwe témulak médoō gule. Gido loo, i de fégétulak ro énda fakayén kémédan bé de sala ro.¹² Endob i Kristowe, téménulak saén ségule inok mékédan i de sala. Atin éndaén kailangan i ségiyowe tulak taman sa taman. Tidéw béno, ménasar i Jesuse fingé dob kuwonoy Tuluse inok méguléw.¹³ Diyo so béni

ongot-ongoté noy gaiwe fétabanéy Tuluse bé de sébanil de.¹⁴ Mélaw sabaf bé sébaane saén tulak, ménlinis tom tidéw dob de sala tom, atin ménwaleý tom métintu taman sa taman.

¹⁵ Atin wén soy kétoro i Rémogor i Tuluse fantag bé ni. Non bénréhén dob Ménsulate Kébéréh i Tuluse mano,¹⁶ “Begéney Kadnane, atin ay niy mantuwe aguwon rigoné ku inok gétayakufo kuy de étew moso. Sulaté kuy de kitab gu dob de fédew ro brab dob de itunga ro.”¹⁷ Atin bénréhén man mano, “Endaén fégétédémé kuy de sala ro taloo noy de tete rigoné ro.”¹⁸ Mélaw amuk ménfésagadan i de ni, éndaén kailangan i ségiyowe tulak fégékédan bé de sala.

¹⁹ Mélaw, do dumo gu, sabaf bé kéléhu Jesu Kristowe, éndaén kailanga tom i mégilake ké mahur tom dob Toowe fo Mékétéfu Sibéy gonoy Tuluse.²⁰ Rénigo noy mantuwe aguwon bé kétulak ne bé lowoh ne. Atin i de étew modor bé ni aguwon, méuyag ro taman sa taman. Amun ménbinasay lowoh ne maak rindung i bengaway Toowe fo Mékétéfu Sibéy ménkusi inok géahur i de étew.²¹ Atin wén i toowe fo gérotor fadi tom, sani Jesu Kristowe. Beeney uléw tome do étew i Tuluse.²² Mélaw fatut fégédét tom dob Tuluse énda ubo-ubo i kéféngadaf tome de, brab énda ruwo-ruwoy de fédew tom bé kéunur tome de. Fakay i ni non maak ménfirikon tomén bé dara Kristowe fégékédan bé de sala tom inok éndaén fégitungé tom i de sala tom. Atin malinisén i de lowoh tom non bé kébautise betom.²³ Enda ruwo-ruwoy fédew tome de. Yamula fatut féégté tom i késarig tome bé nan ongot-ongoté tom, sani fayagé tome dob de étew sani kétumay Tuluse bé fasad ne. Non gésarig tom bé tumané noy fasad ne.²⁴ Atin fatut fétausé tom i késégédaw tome, brab késétabang tome, brab kérigo tome bé fiyowe.²⁵ Atin katom térenon i késélimud tome méngintulus loo bé adat tome. Katom iringén i de étew témérén ron sélimud méngintulus. Yamula, fatut séfébagéré tom i de fédew tom. Fatut fo rigoné tom i ni non éndaén mérugayén tidéw béleewe niy késéfule i Kadnane.

²⁶ Endob amuk fétausé tom i kérigo tome sala fiyon fo ké gétiga tom i toowe kétoro, ménsginggula i kétulak Kristowe atin énda i tulak fégékédan bé de sala tom.²⁷ Amuk wén i ségétew réménigo bé ni, fatut mégilak bé kékukum i Tuluse. Non wén i gonone aféy fégébinasa bé de étew sébanil bé Tuluse.²⁸ Bé gétahe, i étewe géfélis bé kitabe niray Moisese, énda méuray i nay de kémukum de amuk wén i ruwo taloo no télew gétew témbo de. Mélaw féléhuén i ni étew ménalsa.²⁹ Amuk loo bé ni, ati keey i mérigowe dob étewe mika bé Nga i Tuluse? Toow fo gétimal i kékukume de non fénggito noy kékarang ne bé énda i laga i dara Kristowe kémédan bé de salaén, sani tandaé bé mantuwe aguwon kay de étew inok waléy ro malinis dob adafay Tuluse. I étewe mika bé Nga i Tuluse, maak fénéngirasén i Rémogor i Tuluse fiyon fo ké ménggédaw i Rémogor i Tuluse de. Mélaw i ni étew médait fo ké gétimal i kékukume de.

³⁰ Non gétiga tom ménbéréh i Tuluse mano, “Begéney sémulie, Begéney kémukume.” Atin wén soy ségiyowe Ménsulat Kébéréh i Tuluse mano, “Kukuméy Kadnaney de étewén.” ³¹ Toow fo mékaid ké kukuméy Tulusey ségétéwe étew. ³² Fégétédém gom i de énggétah do gai, amun mantu séna énggésobuto kom i toowe kétoro fantag bé Tuluse. Fiyon fo ké ménrasay gom, énda témenrén gom munur. ³³ Wén i do no do gai, i de énda munur fénéngiras ro begom dob adafay médoowe do étew atin fénrasay ro begom. Atin wén i no gai fénrasay roy de dumo gom, brab ménamung gom bero non ménuray i na gome bero. ³⁴ Atin ménuray i na gome bé de étew do ménférisu sabaf bé kéunur ruwe. Atin amun éndot roy de tamuk gom, énda ménkérít gom de. Yamula moror gom non gétiga kom wén i toow na fo fiyo tamuk gom gédoté kom moso, atin énda mékedano taman sa taman. ³⁵ Mélaw, kagom térenon i késarig gome bé Kadnane. Yamula féégét gom i késarig gome de inok gédoté kom i dakéle baras. ³⁶ Atin fatut fetingkél gom inok gérígono kom i kétayay Tuluse brab inok gédoté kom i fénasad ne. ³⁷ Non wén i Ménsulate Kébéréh i Tuluse mano, “Endaén mérugayén, gérumahén i nan ongot-ongoté kom. Enda mélisén.” ³⁸ Atin i de métintu do étew gu, gédoté roy umule magufusa non ménunur ro Begén. Endob amuk wén i ségétew bero ménbaleng i fédew ne sabaf mágilak atin éndaén munurén, énda mésuwatu de.” ³⁹ Endob i de betom, do dumo gu, békén betom i de ménbaleng do fédewen brab do témenrén do munur do mélukum ro mélaw. Békén loo bé nan i de rigoné tom, non ménunur tom atin mélaw méfukas tom tidew dob de sala tom.

11 ¹ Ati kéunure? Wén i kéunur tom amuk tintu gétiga tom gédoté tom i de ongot-ongoté tom, sani de étingayén énda séna gito tom de. ² I de énggétah do étew, fénswat roy Tuluse sabaf bé kéunur ruwe. ³ Sabaf bé kéunur tome bé Tuluse, énggésobuto tom i kélimbag ne bé duniyae ni dob kébéréh ne saén. Lénimbagén i kéluhanay de énggiton tidew dob de énda do giton.

⁴ I Abele bé do gétah, sabaf bé kéunur ne, nirayén i toowe na fo fiyo tulak dob Tuluse bé tulake niray i ofo ne Kain. Sabaf bé kéunur ne, kénarang i Tuluse métintu, non ténayakufén i tulak ne. Atin sabaf bé kéunur ne, wén soy kétoroén dob betome fiyon fo ké ménléhuén.

⁵ Atin i Enoke, sabaf bé kéunur ne, énda ménléhuén. Yamula fénidayat i Tuluse atin éndaén énggitoy de étew de non diyoén dob lawayo. Wén i Ménsulate Kébéréh i Tuluse fantag bé Enoke bé ménswat i Tuluse de bé énda séna déméniyatén de. ⁶ Atin amuk énda munur i ségétéwe étew bé Tuluse, énda géfésuwata noy Tuluse. Non i étewe fégédét dob Tuluse, kailangan munur bé wén i Tulus brab barasay Tulusey kéluhanay de séméléd de.

⁷ Atin i Noehe bé do gétah sabaf bé kéunur ne, réménigo barko. Non amun bénréh i Tuluse dob beene bé wén i gérumah dakél dunuk,

ménunur de. Mélaw nodoro noy sugu i Tuluse rémigo barko. Atin énda mélaw ménléne i Noehe brab de samungén fiyon fo ké kénukum i Tulusey de ségiyo étew dob duniiae ni. Atin mélaw sabaf bé kéunur ne, fénngito Noehe bé tete i de kéilawan. Atin fénwaléy i Tuluse métintuy Noehe sabaf bé kéunur ne.

⁸ Atin i Abrahame so, sabaf bé kéunur ne, nodoro noy kébérén i Tuluse bé kétawag i Tuluse de brab sénuguén mangéy dob ségiyowe ingéd inok gédoté noy fantade fénasad i Tuluse irayén de. Mélaw ténaakén i kaane ingéd sabaf bé kéunur ne, fiyon fo ké énda gétiga noy ayo nuwe de. ⁹ Atin sabaf bé kéunur ne, ménbat i Abrahame diyo dob fantado no, sani fénasad i Tuluse irayén de. Ménbat i diyo maak ségétew miloh saén fiyon fo ké been i niy fantade fénasad i Tuluse irayén de. Ménbat dob safute lawi rénigo no loo so bé nga ne Isak brab bebe né Jakob. Bero soy fénasaday Tuluse de irayén i fantade ni. ¹⁰ I Abrahame ni, nongot-nongotén i ingéde dob lawayo, sani ingéde bénantak i Tuluse brab rigoné no brab énda mékedano taman sa taman.

¹¹ Atin sabaf bé kéunur ne, i Abrahame ménwaléy boh, fiyon fo ké toowén fo lukés loo soy bawag ne Sarah. Endob fiyon fo ké lukés ron fo toow, séménarig ro dob Tuluse bé tumané noy fasad ne. ¹² Atin mélaw fiyon fo ké toow fo lukésén i Abrahame ni brab éndaén géfécoboro noy bawag ne, ménwaléy so katufuay médoowe étew. Ségiléw ro bé kédooy de gitoon dob lawayo brab de farék dob dénsaane.

¹³ I de ni do étew ménunur bé Tuluse, ménléhu ro bé gaiwe énda séna énggedot roy fantade fénasad i Tuluse irayén bero. Gido loo, énda téménréni ro ménunur, non gétiga roy wén i gaiwe moso gédoté roy nan ongot-ongoté ro, sani fénasad i Tuluse bero. Atin fénngito ro bé békén tintu ingéd roy duniiae ni, yamula i tintuwe ingéd ro dob lawayo diyo. ¹⁴ Atin i de étew béleewe ni loo bé niy kébérén ruwe, fégito ro békén dob fantade niy tintuwe ingéd ro, yamula dob lawayo diyo. ¹⁵ Non i ro Abrahame, énda ménggundoy ro bé ingéde fénled ro. Amuk ménggundoy ro de, wén soy gai géséfule ro mangéy diyo. ¹⁶ Yamula, ménuyot ro fo mangéy bati dob ségiyowe ingéd, sani toowe na fo fiyo ingéd dob lawayo diyo. Atin i Tuluse énda mélaw mémala no ké fédawétén Tulus ro. Non ténafayén i ingéde batioy de ni étew.

¹⁷⁻¹⁸ Atin sabaf bé kéunur Abrahame bé Tuluse, irayén damén i nga ne Isak fégétulakén dob Tuluse. Toow fo fédewén miray bé buntunge ngaén fégétulakén fiyon fo ké wén i fasad i Tuluse de mano, “Bé nga me Isak, waléy go katufuay médoowe étew.” Atin fiyon fo ké fénasaday Tulusey Abrahame loo bé ni, téneungkadén soy Abrahame féléhué noy nga ne. Atin ménodor i Abrahame bé sugu i Tuluse. ¹⁹ Non gétiga Abrahame gétébuleoy Tuluse soy Isake. Atin maak ténebule i Tuluse so non amuk énda génlé i Tulusey Abrahame, féléhué noy nga ne Isak.

²⁰ Atin i Isake amun lukésén, sabaf bé kéunur ne bé Tuluse, nongotén dob Tuluse bé féfiyoné no mosoy de ngaén, ro Jakob brab Isaw.

²¹ Atin i Jakobe, sabaf bé kéunur ne bé Tuluse, amun gédétén méléhu, nongotén dob Tuluse bé féfiyoné noy séngae bebeén, sani de nga i nga ne Jose. Rénigo noy ni bé lala ne séménanday dob tugé ne fénéngadafén i Tuluse.

²² Atin i Josehe so, sabaf bé kéunur ne bé Tuluse, amun gédétén méléhu, bénréhén i fantage bé kéésut i de séfuén, sani de Judio, tidéw Egipto. Atin bénréhén so bé fatut uwité roy bangkay ne ké mésut ro.

²³ Atin i de lukés Moises, sabaf bé kéunur ruwe, bénunéy roy nga ruwe Moises taman télew gétérésang kélungonon i idad ne. Non i datue dob Egipto, sénuguén bé féléhuén i kéluhanay de nga lagéy i de Judio. Endob i de lukés Moisese énda ménggilak ro mémélis bé ni sugu, non ménunur ro bé Tuluse. Atin énggito ro toow fo fiyoy nga ruwe.

²⁴ Atin i Moisese ni so, sabaf bé kéunur ne bé Tuluse, amun métawanén étew, ménika de ké fédawétén nga i libune nga i Datue dob Egipto. Rénigo noy ni fiyon fo ké toow fo fiyoy goho nuwe dob lawi i datue gono no ménruk. ²⁵ Endob sabaf bé kéunur ne, mas ménuyot mérásay séréngan bé de dumo no do étew i Tuluse bé singkowe saén kéféguyaya muwit sala.

²⁶ Fénggitungén, mas fiyo ké mérarék i de étew de sabaf bé kéunur ne bé Kristowe gérumah moso bé kéluhanay de ungangén dob Egipto gédoté no. Non gétiga no toow na fo fiyoy baras ne gédoté no tidéw dob Tuluse moso.

²⁷ Atin sabaf bé kéunur ne, méntékédan i Moisese dob Egipto fiyon fo ké mékerit i Datue de, non énda mégilakén. Atin ménfédayday dob de gai do mérégén non maak gito noy éndae giton Tulus manangguwit de. ²⁸ Atin sabaf bé kéunur ne, rénigo noy kandulie féndawét “Témara”. Mélaw sénuguén i de Judio mémirik bé dara i bili-biliwe dob de fintu i de lawi ro inok i télakiwe méméléhu taraa no saén i lawi i de Judio atin énda féléhué noy de ofo nga dob séngae lawi loo bé rénigo nuwe dob de étew dob Egipto.

²⁹ Atin sabaf bé kéunur ruwe bé Tuluse, amun ménusut i de Judio tidéw Egipto énggifar ro dob dogote féndawét “Furo Dogot” maak ménagéw ro dob tikare fantad. Endob amun ténundug i de sundalo tidéw Egipto bero atin témlama ro misar, ménléné ro kéluhanan non ménfule i wayége.

³⁰ Atin sabaf bé kéunur i de Judio, ménrundas i émbagére diding géliwéti ingéd i de sébanil bero féndawét Jeriko. Non ménodor ro bé sugu i Tuluse bé agéwé ro liwétén sénga fuweh taman fitew gétérésangan. Tidéw bénou, rénundas i Tuluse. ³¹ Endob bati diyo so dob Jerikoy sundale libun féndawét Rahab. Atin sabaf so bé kéunur ne, énda ménléhuén séréngan bé de étew dob ingéd ne do mémélis bé de sugu i Tuluse. Non ténayakufén i de sénarigoy odoroy de Judio, sani de sénugu ro témulik bé kékagér i no ingéd. Endob sénékém ro saén i kétulik ruwe de.

³²Témérénun muret fantag bé de énggéétah do étew ménunur bé Tuluse, loo bé ro Gideone, ro Barak, Samson, Jeffe, Dabid, Samuel brab sénarigoy Tuluse muret bé kébéréh ne. Non kulang i gai guwe muret fantag bé kéluhana ruwe. ³³I de dumo bero, sabaf bé kéunur ruwe, ménsétiboh ro bé de ségiyo do dakél ingéd atin téménaban ro. Méngguléw ro métintu, atin énggédot roy fénasad i Tuluse. Atin i de dumo bero énggétigémo roy ba i de mérayar brab do émbaraw dakél binatang féndawét leon inok énda gékeko ro bero. ³⁴Atin i de dumo bero sabaf bé kéunur ruwe, énda méntuwég ro dob de toow fo dakél do aféy. Atin i de dumo bero énda ménléhu ro bé de sundang i de sébanil bero. Fiyon fo ké mélubay ro, ménwaléy ro émbagér sabaf bé kéunur ruwe inok gétabana roy de sundalo sébanil bero tidéw dob de ségiyo ingéd. ³⁵Atin wén soy de libun bero méntébule i de nga ro sabaf bé kéunur ruwe.

Atin i de dumo bero, ménléhu ro bé kéférasaye bero, non ménika ro tangéyén. Mas ménuyot ro mérasaray brab méléhu inok tébule ro brab gédoté roy toowe na fo fiyo kéfaguyag. Rénigo roy ni sabaf bé kéunur ruwe bé Tuluse. ³⁶I de dumo bé de munur, déniyangka ro bero brab bénadas ro bero. Atin i de dumo bero, nikét ro brab fénrisu ro bero. ³⁷I de dumo bero, ménléhu ro bé kéibérone bero batéw. Atin i de dumo bero, sénufak ro bero bé ragarie. Atin i de dumo bero, téníboh ro bero bé sundange atin ménléhu ro. Atin i de dumo bero, énda i do kégal ro saliyu bé kulit i de bili-bili brab do kulit kambing. Toow ro fo méskinan brab toow ro fo ménrasay. ³⁸Atin i de dumo bé de munur ni, énggétagaka roy de lawi ro brab ménangéy ro bati dob de gonom énda i do étew de bati brab dob de tuduk, brab dob de takub brab dob de tosong fantad non férasayén ro. Enggiton énda fo médait i de tete étew sétifon dob duniiae ni bé de ni do fiyo étew munur bé Tuluse.

³⁹Toow fo ménswat i Tuluse bé de ni do étew sabaf bé kéunur ruwe. Gido loo, énda séna énggédot roy fénasad i Tuluse irayén bero. ⁴⁰Non bénantak i Tuluse betom i toowe na fo fiyo aguwon. Mélaw kailanga ro ongot-ongot betom do étew béleewe, inok tumané noy fasad ne bero séréngan betom.

12 ¹Mélaw gétédémo tom i de médo do énggéétah étew do méégét ro munur bé Tuluse. Atin maak téngténgé ro betom béleewe ni. Atin i betome, maak sékuya tom bé lala ruwe téméngténg. Mélaw fatut tagaké tom i de éntingayén funa tom métana léméntu. I atag i ni kébéréh gu, fatut tagaké tom i de sala funa tom énda gérigo bé kétayay Tuluse. Atin fatut mégéror tom rémigo bé galbék i Tuluse. ²Atin fatut féégetté tom i kéfégitung tome fantag bé Jesuse, sani émféunure betom brab émféégéte bé kéunur tome. I Jesuse, féndayaén i de étew kémélabo de dob kruse. Atin fiyon fo ké mémémalay kéléhu ne dob kruse, énda

fégitungé no de. Yamula fénggitungén i kéoror ne ké gilid i kérasay ne. Atin béleewe ni diyo ménsar fingé dob kuwonoy Tuluse méguléw.

³Fétuntay gom i ménrigowe dob Beene. Féndayaén i de tete étew émférasay de. Mélaw i begome, fatut fébagér gom i de fédew gom brab kagom témérén munur, fiyon fo ké wén i émférasay begom. ⁴Non fiyon fo ké atuho kom i salae, énda séna félhéuén gom sabaf bé kéunur gome. ⁵Aw énggélifoto komén i kékérhé i Tuluse dob begome do ngaén, sani kékérhé émféfiyo bé de fédew gom? Bang i Tuluse, “Nga gu, fétuntay go ké fifité ku beem sabaf bé de salaém. Atin kago tete i fédew me de ké fifité ku beem. ⁶Non i de étew fífíté ku ké mésala ro, beroy de étew kégédawa ku. Atin i de étew fífíté ku ké rémigo ro tete, beroy de étew ténayakuf gu maak do nga gu.” ⁷Mélaw amuk mérasay tom, tingkél gom atin fégitung gom maak fífítéy boh gome begom sabaf bé de sala gom. Non amuk kérasayan gom, gétiga kom i Tuluse ténayakufén begom maak do ngaén. Non i kéluhanay de boh, fífíté roy de nga ro amuk rigoné roy tete. ⁸Atin amuk énda fífítéy Tuluse begom ké mésala gom, békén gom do tintu ngaén, éndob do ngaén saén dob liyuwe. ⁹I de katom boh dob fantade ni, fífíté ro betom ké rémigo tom tete. Atin mélaw basana tom bero. Mélaw, toow fo fatut ké fédayaé tom i Tuluse méguléw betom. Non Beeney Abay tome dob lawayo atin irayén betom i umule magufusa ké rigoné tom i ni. ¹⁰I de katom do boh dob fantade ni, fífíté ro betom ké nga tom séna, loo bé gékaranga ruwe fiyo. Endob i Tuluse fífíté no betom inok tabanga no betom minut métintu loo bé kétintu nuwe. ¹¹Amuk fífítéy Tuluse betom, mika tom de bé no gai brab tete i de fédew tom de. Endob sabaf bé ni moror tom de moso ké gérumah i gaiwe waléy tom métintu brab métanék i de fédew tom.

¹²Mélaw, do dumo gu, amuk maak lugotén gom rémigo bé kétayay Tuluse féégét gom i kéunur gome. ¹³Taus gom agéw dob métintuwe aguwon inok i de étew énda séna méégét i kéunur ruwe, amuk gito ro begom énda minut ro mélubay, yamula minut méégét i kéunur ruwe.

¹⁴Rigo gom i kéluhanay de gérígono kom dob kéluhanay de étew inok énda gésékérít gom. Atin fétintu gom sénga tékélid, non amuk énda métintu gom, énda gito gom i Kadnane moso. ¹⁵Atin ingat gom inok énda i ségétew begom témérén témayakuf bé kégédaw i Tuluse. Non i étewe loo bé ni ségiléw bé nohoke féla brab bisay onok ne, non mégukét i de munur. Atin been i niy funay de dumo no munur waléy so gésala. ¹⁶Atin ingat gom inok énda i ségétew begom waléy mékérésik i adat ne taloo no diguré noy Tuluse, loo bé rénigo Esawe bé do gétah. Non énda génulaa noy kuwagib ne tidew dob Tuluse. I kuwagibe ni kaan, non been i ofo. Endob fénbélén i kuwagib ne dob tuwaréy ne inok géama saén ségule. ¹⁷Gétiga kom, tidew béno ménuyot de ké ongotéy boh ne dob Tulusey

féfioné no. Endob éndaén fakayén, non fiyon fo ké kémérew, éndaén méfégalin i rénigo nuwe bé kékéluluk ne bé kuwagib ne inok gédoté no saén i kaamae.

¹⁸I aguwo tome mangéy dob Tuluse, énda ségilewén bé aguwoy de katufua tom do Judio. Non fénfégédét ro dob sébaane tuduk gito ro, sani tuduke féndawét Sinai gonoy mérinoe aféy. Délémon diyo non bé mégéfole rawén brab émbagére réfuruh. ¹⁹Atin bé béo, ménbéréh métanug i témburiwe brab métanug i kékérél i Tuluse. Atin i de étew diyo, amun énggelingoo roy ni émbéréh, nongot roy éndaén damén émbéréhén ségule, ²⁰non toow ro de fo ménggilak. Non ménbéréh mano, “Amuk wén i kemuwa bé tuduke ni, fiyon ayam, kailangan féléhuén ibéron batéw.” ²¹Atin toow fo mékéglak i no gonon gito ro. Mélaw ménbéréh i Moisese mano, “Lémukubu bé kégilak guwe.”

²²Endob i betome, békén loo bé nan i kékégédét tome dob Tuluse. Non maak magéw tom dob tuduke Sion gonoy ingéd i méuyage Tulus. I ni ingéd féndawét Jerusalem diyo dob lawayo, gonoy firoye ngibu télaki. ²³Maak fégédét tom dob de sungu nga i Tuluse, sani de étew ménsumlat i de dawét ro dob lawayo. Diyo ro ménlimud toow fo moror. Atin fégédét tom dob Tuluse, sani kémukume bé kéluhanay de étew. Atin ménfégédét tom so dob de rémogor i de ménléhu do métintu étew, sani de fénwaléyén do toow fo métintu dob lawayo. ²⁴Atin ménfégédét tom so dob Jesuse, sani réménigowe bé mantuwe aguwon inok gétaggafay Tulusey de étew. Atin ménfégédét tom so dob dara Jesuse fénirik. Toow na fo fiyoy dara Jesuse bé dara Abele. Non i dara Jesuse been i tanda i kégédaw i Tuluse. Endob i dara Abele, been i tanda i kékukum i Tuluse.

²⁵Mélaw ingat gom inok énda mika gom mégélingo bé kékérél i Tuluse. Non ménkukum i de énggéétah do étew ménika mégélingo bé Moisese sani sénarigoy Tuluse muret bé kékérél ne dob duniiae ni. Mélaw i betome so, amuk énda munur tom bé kékérél i Tuluse tidew dob lawayo, toow na fo énda gésélyah tom bé kékukum i Tuluse. ²⁶Bé do gétah, ménkuyung i duniiae non ménbéréh i Tuluse. Endob béléewe ni, wén i fasadén mano, “Kuyungé ku man ségule i duniiae brab lawaye so.” ²⁷Ay niy atag i ni kékérél: Mékédan i de éntingayén do ménkuyung, sani de lénimbag i Tuluse. Mélaw i de éntingayén énda ménkuyung ro énda mékédan ro.

²⁸Mélaw fatut fésalamat tom dob Tuluse, non géahur tom dob kékéguléw i Tuluse énda ménkuyungén taloo no mékédan. Fatut féngadafé tom i Tuluse loo bé kétaya nuwe de. Atin fatut basana tom i Tuluse brab ménkilak tom mémélis bé de suguén. ²⁹Non aféy i fégékukum i Tuluse.

13 ¹I betome do sédumon munur bé Kristowe, fatut fétausé tom i késégédaw tome. ²Katom lifotén i témayakufe bé de étew énda séna gélolo tom de dob de lawi tom. Wén i de étew tényakuf roy de

étew énda séna gélolo ro bero, éndob i toowe, ténayakuf roy de télaki, éndob énda gétiga ro de. ³Atin kagom lifotén i de férisu. Fatut méuray i na gome bero maak begom soy de ménférisu diyo dob berowe. Ségiléw so bé de mérasay, fatut méuray i na gome bero maak begom soy kérasayan, brab fatut fagifat gom bero.

⁴Atin fatut basana kom kéléuhanan i késébawage. I de sébawag fatut énda sétayan ro bé de ségiyo. Non kukuméy Tulusey de étew sétayan ro saliyu bé bawag ruwe brab de bigaén.

⁵Atin kagom fésubranén i kétaya kome bé kurtae. Fatut kasukudan gomén bé wéne dob begome. Non bénréh i Tuluse mano, “Enda tagaké ku begom, taloo no fédayaé ku begom.” ⁶Mélaw sabaf bé késarig tome bé Tuluse, fatut béréhé tom matom, “Kadnan i témbangane begén. Mélaw énda mágilaku bé de étew brab kérigo ruwe begén.”

⁷Fégétédém gom i de énggéétah do odoron, sani de sénarigoy Tuluse muret bé kékérédé ne dob begome. Fégítung gom i de fiyo adat ro brab de rigoné ro taman kéléhu ro. Iring gom i kéunur ruwe. ⁸Non i Jesu Kristowe, énda émfégalino. Yamula ségiléw so tidéw féganay taman béléewe ni, brab taman sa taman. ⁹Atin kagom munur bé de ségiyo-giyo kétoro funa kom témerén munur bé toowe kétoro. I kégédaw i Tuluse féégété noy kéunur tome. Endob i kéodorone bé de sugu bé atiy de amaén énda géamaa tom de, énda fo féégété noy kéunur tome. I de étew odoro roy de ni do sugu, énda gétabanga no bero.

¹⁰I betome do munur bé Kristowe, wén i tulak tom, sani Jesu Kristowe. Endob i de fadi i de Judio, sani de témulak séna dob lawie féngadafan dob Jerusalem, énda i kuwagib ro mama bé katome tulak. ¹¹Gétiga tom amuk témulak i de Judio, i gérotore fadi i de Judio, muwit bé dara i ayame témulak mangéy dob Toowe fo Mékétéfu Sibéy inok irayén dob Tuluse inok kédané noy de sala. Endob i de lowoh i de ayam do fénléhu, métuwégi dob liyuy ingéde. ¹²Been i niy funa Jesuse ménléhu dob liyuy ingéde Jerusalem, inok kédané noy de sala i de étew bé dara ne inok mélinis ro dob adafay Tuluse. ¹³Mélaw fatut mangéy tom dob liyuy ingéde inok géfégédét tom dob Beene. I atag i ni, fatut tagaké tom i adat i de Judio inok sémarig tom saén bé Jesuse. Fatut rigoné tom i ni fiyon fo ké fémalané ro betom séréngan bé Kristowe. ¹⁴Non énda i ingéd dob fantade ni gono tom bati taman sa taman. Yamula ongot-ongoté tom i tintuwe ingéd tom batio tom moso. ¹⁵Mélaw fatut dayéwé tom démoyun i Tuluse, atin fayagé tom i kéunur tome bé Jesuse. Non been i nan i maake kétulak tom bé Jesu Kristowe, sani fadi tome. ¹⁶Atin kagom lifotén i rémigowe fiyo brab sétabang gom, non i ni adat maak tulak so émfésuwat bé Tuluse.

¹⁷Fatut odor gom bé de sugu i de odoro kom do munur bé Kristowe. Non beroy de démoyun témulama bé kéunur gome inok minut mégét.

Non wén moso i gai susinéy Tulusey de galbék ro ké fiyo taloo no énda. Atin amuk modor gom bé de sugu ro, moror ro gémalbék. Atin amuk énda modor gom bé de sugu ro, waléy tete i de fédew ro atin énda tabanga ro begom.

¹⁸ Fétaus gom i kédasala kome begey. Gétiga key énda i rénigo gey tete non témenlama gey rémigo fiyo sénga tékélid. ¹⁹ Atin ongoté ku dob begome dasala kom begén dob Tuluse inok géséfuleu magad mangéy dob begome.

²⁰ Ténébule i Tulusey Kadna tome Jesu Kristo. Atin amun ménléhu i Jesuse, i dara ne ménwaléy tanda i mantuve aguwon rénígoy Tuluse inok tanggafé noy de étew. I ni aguwon énda mékédano taman sa taman. Atin sabaf bé kéléhu Jesuse maak Beeney toowe fo fiyo témalima begom do maak bili-bili. ²¹ I Tuluse fétanéké noy de fédew, irayén damén begom i kéluhanay de kailanga kom inok gérigono kom i kétaya nuwe. Atin tabanga Jesuse damén betom inok gérigono tom i funay Tuluse mésuwat. Médayéw damén i Jesu Kristowe taman sa taman. Amen!

²² Do dumo gu, ongoté ku begom bé fetingkél gom mégélingo bé ni sénusat gu funay de fédew gom émbagér. Non énda métaah i sulat guwe ni begom. ²³ Méuyotu de ké gétiga kom i fantage bé dumo tome Timoteo. Mémentangéyén tidew dob férisonone. Amuk magad damén i kégumah ne dini, géodor begén ké angéyé ku begom tukawén.

²⁴ Ségifa gom begey i kéluhanay de odoro kom do étew i Tuluse. Atin i de dumo gom munur bati dob ingéde ni Italiya, ségifaé ro begom.

²⁵ Mégédaw damén i Tuluse begom kéluhanan.

I Sulat Santiagowe

Santiagoy dawét i lagéye séménulat bé ni sulat. Been i tuwaréy Jesu Kristowe. Sénulatén i ni sulat dob de kéluhanay de munur bé Jesuse.

Dob ni sulat, ténero Santiagowe bé fatut féténgténg i de étew i kéunur ruwe inok giton tintu ro fo munur. Ténoroén bé fatut ro rémigo fiyo brab métintu émféténgténg bé kéunur ruwe. Ténoroén bé amuk énda fiyoy de rigoné ro, énda i atag i kéunur ruwe.

1 ¹Begéney Santiagowe, sani sugu-suguuéy Tuluse brab Kadnane Jesu Kristo. Sulata kuy kéluhanay de étew i Tuluse do ménbéragar dob de séségiyo-giyo do ingéd dob duniiae ni. Ségifaé ku begom kéluhanan.

²Do dumo gu munur bé Jesuse, oror gom amuk kérasayan gom bé médoowe do kétengkad begom. ³Non gétiga kom amuk fédayday gom munur ké téngkadén i kéunur gome, waléy mélaw témingkél i fédew gome. ⁴Atin fatut fo fetingkél gom inok waléy gom toow fo métintu brab énda i kulang dob kétintu gome. ⁵Endob amuk wén i ségetew begom kulang sénay kégétiga nuwe bé fatute, ongot gom de dob Tuluse. Atin iraya no begom bé kégétigane non toow fo mégédaw i Tuluse brab méuyot fo témantu miray dob kéluhanane. ⁶Atin amuk démasal gom mongot, fatut toow gom de fo munur bé gédoté kom i ongoté kome, kagom férubo-ruwonén i de fédew gom. Non i étewe ruwo-ruwoy fédew ne, démoyun émfarin i itunga nuwe, ségiléw bé bagéle dob dogote magéw sabaf bé kéfanir i réfuruhe de. ⁷I étewe loo bé ni, békénén fatut kémarang bé iray i Kadnane dob beeney no ongoté no. ⁸Non ruwo-ruwoy fédew ne, énda sémarigén bé Tuluse. Brab énda fo gétiga no de ké atiy toowe fo kéuyoto no rigoné no.

⁹I de méskinan do munur bé Kristowe, fatut ro moror non fégérotoréy Tuluse bero. ¹⁰Atin i de kawasa do munur bé Kristowe, fatut ro so moror non fégérifantadéy Tuluse bero. Non amuk méléhu i kawasawe, ségiléw saén bé kéléhu i de flores, non mékedan i tamuk ne dob beene. ¹¹Non i de flores, amuk sémbang i térsange, toow fo méduf atin méléhu i de flores. Mégangu ro brab éndaén fiyoy falas ruwe. Loo bé niy kébinasay kawasawe étew bé lala ne fégérör gémalbék kémurta.

¹² Moror i étéwe fédayday témingkél brab sémarig bé Tuluse dob gaiwe téngkadén. Non amuk gilid i kétengkade de, gédoté noy umule magufusa sani barase fénasad i Tuluse irayén dob de étew méimu bé Tuluse. ¹³ Atin amuk wén i ségétew ménsala sabaf bé kétengkade de, békén fatut bérhéno mano, “Tulus i téméngkade begén inok rigoné kuy salae.” Non i Tuluse énda téngkadé noy de étew inok rémigo ro sala, atin énda i gétengkad bé Tuluse. ¹⁴ Endob i toowe, kéluhanay étéwe métengkad ro amuk féfanangguwit ro bé de tete kétaya ro. ¹⁵ Tidéw béno, amuk modor ro bé de tete kétaya ro, mésala ro. Brab amuk démayday ro rémigo sala, méléhu ro. ¹⁶ Mélaw do gulaané ku do dumo gu, kagom fégitungén de ké fésalaéy Tulusey étéwe, non békén toow i nan.

¹⁷ I kéluhanay iray i Tuluse, fiyo. Brab i kéluhanay toowe fiyo, tidéw dob Abaye Tulus, sani léménimbage bé kéluhanay rémendawe dob lawayo. I de ni do éntingayén, émfarin i kéréndaw ruwe. Endob i Tuluse, énda émfarino. ¹⁸ Non been i niy kétaya nuwe, fénwaléyén betom do ngaén bé toowe kékéréhén, inok waléy tom do toow fo gérotor bé kéluhanay de éntingayén do lénimbagén.

¹⁹ Do dumo gu, fégétédém gom i ni, kagom magad mékérít. Yamula fégélingo gom na métah, tidéw béno, been nay no béréh gom. ²⁰ Kétayay Tuluse ké rémigo gom fiyo, éndob énda gérigo gom fiyo ké mékérít gom. ²¹ Mélaw tagak gom i de mékérésik do adat gom brab kagomén rémigo tete. Unuro kom i Tuluse brab rigo gom i kétaya nuwe. Enggélingoo komén i kékéréh i Tuluse. Atin béeleewe ni, fatut munur gom bé kékéréh i Tuluse sani mémukase begom bé de sala gom.

²² Mélaw odoro kom i kékéréh i Tuluse. Buluk fégélingoé kom saén i kékéréh i Tuluse éndob énda rigoné kom de, fagakara kom saén i kagome lowoh. ²³ I étéwe mégélingo saén bé kékéréh i Tuluse éndob énda odoro no de, ségiléw bé étéwe téméngténg dob féngalungone, atin gito noy falas ne. ²⁴ Endob amuk énggilid gito noy falas ne atin magéw, atin tékédan, sonom so béno mélifot bé falas ne. ²⁵ Endob i étéwe toow fo féganadé no brab odoro noy kékéréh i Tuluse, békén saén fégélingoé no brab magad gélifoto no, gédoté noy de kéfionon tidéw dob Tuluse bé kéluhanay de rigoné no. Atin i kékéréh i Tuluse, been i niy tintuwe kukuman énda i kulang de, mémukas bé de étew dob de sala ro.

²⁶ Amuk émbéréh i ségétewé étew méngintulus kun, éndob énda fo démilaén tuko ké émbéréh, énda i atag i kéfengintulus ne, atin tugio noy kaane so lowoh. ²⁷ Dob karang i Tuluse, i toowe méngintulus do étew, tabangé roy de kérégénan libun do baléw, brab tabangé roy de kérégénan nga énda i do lukés ro. Atin i de étew do tintu fo méngintulus énda odoro roy de éntingayén do tete dob duniyae ni, inok énda waléy ro tete.

2 ¹Do dumo gu munur, séménarig gomén bé Jesu Kristowe barakatan Kadna tom. Mélaw énda fatutén ké wén i isu ramigo kom. ²Ufama,

amuk sélimud gom méngadaf bé Tuluse atin wén i ruwo gétew étew gérumah. I ségétéwe de fiyoy kégal ne brab téménising bélowan. Atin i ségétéwe de méskinan brab ménkusi i kégal ne.³ Atin amuk toow fo fégadata kom saén i kawasawe de brab féésaré kom dob toowe fo fiyo ésaran, brab énda féésaré kom i miskinane de taloo no féésaré kom saén dob suduwe, énda fo fiyoy adat gome.⁴ Amuk rénigo gom i ni, ménala gom bé kéramig gome, atin tidéw dob de tete kégégitung gom i de ni kékukum gom.

⁵ Fégélingo gom do gulaané ku do dumo gu. Fénemili i Tulusey étewé méskinan inok waléy ro maak kawasa sabaf bé kénur ruwe. Non i kénur ruwe, been i kékawasa ruwe. Atin waléy ro so do kaan étew féguléwo no. Féguléwo no bero non been i niy fasad i Tuluse dob kéléhanay méimue bé Tuluse.⁶ Endob i begome, siyawé kom i de méskinan. Ati de étew do énda mégédaw ro begom brab fégésé ro begom uwitén mangéy sékukum dob de kégédewan? Békén i de méskinan, yamula i de kawasa.⁷ Been soy de niy de étew bérhé roy tete fantag bé fiyowe dawét Jesuse sani gefee betom.

⁸ Wén i toowe fo gérotor sugu gébasana tom dob Ménsulate Kébéréh i Tuluse mano, “Féimu go bé dumo muwe loo so bé kégéimu me bé kaame lowoh.” Amuk unuro kom, gérígono kom i fatute.⁹ Endob amuk wén i isu ramigo kom atin basana kom saén i de étew bé de fiyo kégal ro, taloo no bé kedooy de kurta ro, ménala gom. Non fénlis gom i kukumane niray Moisese.¹⁰ Atin amuk énda odoro kom i sébaane sugu dob kukumane, maak énda so nodoro kom i kéléhanay de kukuman. ¹¹ Ufama, békén saén bénréh i Tuluse mano, “Kagom sétayan bé ségiyowe saliyu bé bawag gome.” Bénréhén so mano, “Kagom méméléhu.” Mélaw fiyon fo ké énda dufangé kom i bawag gome, éndob ménméléhu gom étew, énda so nunuro kom i kukumay Tuluse.¹² Ingata kom i de rigoné kom brab de bérhé kom, non i Tuluse kukumé no begom bé kukuma nuwe fégéfukas bé de étew dob de sala ro.¹³ Non énda méuray i nay Tuluse bé de étew énda méuray i na ruwe bé de dumo ro. Endob i de étew méuray i na ruwe bé de dumo ro, éndaén kailanga roy mágilake bé kékukum i Tuluse.

I kénuré brab fiyowe galbék

¹⁴ Do dumo gu munur bé Jesuse énda i lantékén ké émbéréh i ségétéwe étew mano, “Munuru,” éndob énda giton i kénur ne dob de rigoné no. Enda toow i kénur ne, mélaw énda séna mékédan i de salaén.¹⁵ Ufama, amuk wén i ségétéw munur, brab énggumah i de dumo no munur dob beene. Atin toow ro fo méskinan, kulang i de kégal ro brab énda i amaé ro.¹⁶ Amuk bérhé no saén dob berowe mano, “Fiyo damén i de fédew gom. Brab gégedot gom damén do kégal gom brab amaé kom,” éndob énda fo niraya no bero tabang, énda i lanték i de kékéréhén.¹⁷ Ségiléw bé nan i étewe bérhé

no munur kun bé Jesuse, éndob énda fiyoy rigoné nuwe. Mélaw giton i énda toow i kéunur ne.

¹⁸ Amuk wén i émbéréh mano, “Fakay méfukas i étewe sabaf bé kéunur ne. Atin fakay so méfukas i étewe sabaf bé de fiyo rigoné no.” Endob ay niy késumbulo kuwe de. Enda fakay méfukas i étewe ké munur saén bé Jesuse atin énda fo fiyoy rigoné nuwe. Non i begéne, fégito guy kéunur guwe dob fiyowe rigoné ku. ¹⁹ Amuk wén i étew munur bé sébaan saén i Tuluse, fiyo, éndob kulang i nan kéunur. Non fiyon i de saitan, munur ro so loo bé nan, atin lémukub ro bé kégilak ruwe de. ²⁰ Toow fo dufang i étewe loo bé nan, mécitung kailangan saén i munure. Toroé ku begom bé énda foy lanték i kéunur i étewe ké énda so giton i de fiyo rigoné no. ²¹ I katufua tome Abraham, ati funa nuwe ménwaléy métintu dob adafay Tuluse? Ménwaléy métintu dob adafay Tuluse sabaf bé rénigo nuwe, amun ménodor bé sugu i Tuluse tulaké no damén i nga ne Isak dob ahayane féngadafan. ²² Mélaw gésobuto tom énggéodor bé sugu i Tuluse sabaf bé kéunur ne. Mélaw fénggito no toow i kéunur ne bé rénigo nuwe. ²³ Mélaw gétiga tom toow i Ménsulate Kébéréh i Tuluse mano, “I Abrahame ménunur bé Tuluse. Atin i Tuluse kénarangén i Abrahame métintu sabaf bé kéunur ne.” Mélaw i Abrahame féndawétén “Dumoy Tuluse”. ²⁴ Mélaw gétiga tom, i étewe waléy métintu dob adafay Tuluse sabaf so bé de rigoné no, békén saén sabaf bé kéunur ne.

²⁵ Ségiléw so bé niy libune sundal féndawét Rahab. Non ménwaléy métintu dob adafay Tuluse sabaf bé fiyowe rénigo no. Non ténayakufén i de Judio do sénugu, tidéw béno tétabanga no bero inok géféralréy ro mangéy bé ségiyowe aguwon.

²⁶ I lowohe, amuk éndaén batí diyo i rémogor ne, ménléhu i nan lowoh. Ségiléw so bé ni, i kéunur i étewe énda gitono dob de fiyo rigoné no, maak ménléhu i kéunur ne non békén toow.

I dilae

3 ¹ Do dumo gu, fiyo ké énda médoog gom waléy témoro. Non i begeye do témoro, toow na fo méégét i kéfénginsaay Tuluse begey dob gaiwe kémukum moso. ² I kéluhana tome do kéilawan, énda démoyun katabuwan i de rigoné tom. Amuk wén i étew gébéréh katabuwan sénga téklid, énda i gétébo de. Fakay géféguléwo noy lowoh ne non falan fiyoy de kébéréhén. ³ Ufama, i gefee bé kudae, amuk rigono no kakang i ba i kuda ne, gébalengo no fiyon udenén féayo no de. ⁴ Loo so bé niy dakéle barko féagéwéy émbagére réfuruh. I suwil i barkowe toow fo kloh, éndob been i niy usaréy kafitane bé barkowe fégéfanangguítén de dob kétaya nuwe ayo no. ⁵ Atin ségiléw so bé niy dilae. Non fiyon fo ké toow fo kloh, géusaran fégéfabantug-bantug.

Ufama, i bukae talun métuwéy bé klohe saén aféy ké mélégéb. ⁶ Atin i dilae, mésut i médoowe gékélasi do tete, funay de itunga tom brab

de fédew tom waléy so tete. I dila i étewe gétuwégo noy fédew ne, non i aféy i dilae tidew dob uleone emferno. ⁷I kéilawane, gégéulgéwo noy kéluhanay de binatang, do kloh manok, do sédo, brab do ulé. Non gélawayamay kélawaney de ni. ⁸Endob énda i étew gélawayama noy dila ne. I de dila tom toow fo gérigono roy tete brab énda méféguléwo no. Ségiléw bé bisawe non mékébinasa. ⁹Usaré tom fégéfésalamat dob Kadna tome brab dob Abaye Tulus. Endob usaré tom so fégéfémula bé de dumo tom étew, sani de lénimbag miring bé Tuluse. ¹⁰I fiyowe kékéfésalamat brab i tete kefémula, ségiléw ro tidew dob ba i étewe. Do dumo gu, énda fatut mérigo ni. ¹¹Enda i fiyo wayég brab féla wayég ké sébaan saén i séfute ésuto ro. ¹²Atin do dumo gu, i sébaane kayéw énda gégégonokén saliyu saén bé kaane onok. Enda gégégonokén ruwo gékélasi onok, i sébaane de fiyo brab i sébaane de tete. Atin i séfute miray bé métimuse wayég énda géirayén bé fiyowe wayég énda métimusén.

¹³Amuk wén i ségetew begom toow fo gétigan brab dakél i kégésobut ne fatut fégito no dob de fiyo rigoné no ula-ula. Atin fatut téritantad bé lala ne rémigo fiyo inok fétengtengén i kégétiga nuwe. ¹⁴Endob amuk médaléw, taloo no méitung énda fatutén félangka-langka taloo no béréhé noy tugie fantag bé toowe kétoro. ¹⁵I kégétigane loo bé nan békén tidew dob lawayo. Yamula tidew saén dob duniyae ni. Békén tidew dob Rémogor i Tuluse, yamula tidew dob Satanase. ¹⁶Non i étewe médaléw brab méitung rigoné no soy médoowe gékélasi do tete brab fébukué noy de étew. ¹⁷Endob i étewe wén i kégétiga no tidew dob Tuluse, toow fo fiyoy adat ne. Atin mika sétiboh. Brab mégédaw bé de dumo no, énda kérizo no bero. Tintu fo méuray i na nuwe bé de dumo no brab rigoné noy fiyowe dob berowe. Atin énda i isu ramigo no bé de étew brab énda ubo-ubo saén i de rigoné no. ¹⁸I étewe kédané noy késétibohe, uwité noy de fiyo rigonén.

4 ¹Ati tidéwoy de késétiboh gom brab de késéédél gom? Tidew dob de tete kétaya kom démoyun sétiboh bé de fiyo kétaya kom dob de fédew gom. ²Wén i do kétaya kom, éndob énda gédoté kom de. Mélaw méuyot gom méméléhu. Wén i do kéingara kom, éndob énda gédoté kom de. Mélaw méuyot gom séédél brab sétiboh. Atin i funa kome énda gégedot bé de kétaya kom, non énda ongoté kom de dob Tuluse. ³Atin amuk mongot gom, énda gédoté kom de, non tete i funa kom de mongot. Non ménongot gom inok gédoté kom i de éntingayén fégérigo gom bé de tete kétaya kom. ⁴Ségiléw gom bé ségétéwe libun wén i ségiyo tayané no saliyu bé bawag ne. Aw énda fo gésobuto kom de ké amuk séloyuk gom bé de tete éntingayén dob duniyae ni, sébanil gom bé Tuluse? Non i étewe méuyot rémigo tete, waléy sébanil bé Tuluse. ⁵Kagom fégitungén de ké énda i lanték i Ménslate Kébéréh i Tuluse mano, “I Rémogor i Tuluse

bati dob betome toow fo médaléw.” Mélaw mikà de fo kék wén i ségiyo kétaya tom saliyu bé Tuluse. ⁶ Endob toow fo mégédaw i Tuluse betom. Non wén soy Ménsulate Kébérén mano, “I Tuluse sébanil bé de étew félangka-langka, éndob mégédaw bé de étew térifantad.”

⁷Mélaw odor gom bé kétayay Tuluse. Atin atuho kom i Satanase, atin mélaw méraréy tidéw dob begome. ⁸Fégédét gom dob Tuluse, atin i Tuluse fégédét so dob begome. I de begom do ménsala do étew, tagak gom i de tete adat gom. I de begom do ubo-ubo saén do munur, félinis gom i de fédéw gom inok waléy gom tintu fo munur. ⁹Fatut tete i de fédéw gom brab kéréw gom non bé de tete adat gom. Térén gom oror, fatut gom émbuku. ¹⁰Fatut térifantad gom dob adafay Tuluse, atin fégérotoré no begom.

¹¹ Do dumo gu munur bé Jesuse, kagom sédowoy. I étewe dowoyé noy dumo nuwe brab kukumé noy dumo nuwe, maak dowoyé no brab kukumé no soy kitabe. Atin amuk kukumé noy kitabe, maak téfégérotor bé Tuluse, atin mélaw éndaén modorén bé kitabe. ¹²Endob Tulus saén i miraye bé kitabe brab Been saén i kémukume. Been saén i gébinasawe bé étewe brab Been soy gétabange de inok énda mébinasa no. Endob i betome, énda i kuwagib tom kémukum bé de dumo tom, non kéilawan tom saén.

¹³Fégélingo gom begén, sani de begom do émbérén makom, “Béleewe ni taloo no démo mangéy gey dob sébaane ingéd. Atin diyo bati gey ségbélintuwa inok émfébélény gey brab gégédot gey médo kurta.”

¹⁴Kagom émbérén loo bé nan. Non énda gétiga kom i mérigowe dob begome bé démoe. Non i de kéilawan, ségiléw saén bé ménifise rawén giton brab magad méalfa. ¹⁵Ay niy fatute béréhé kom, “Amuk kétayay Kadnane, taus tom méuyag brab rigoné tom i ni taloo no rigoné tom i nan.” ¹⁶Endob béleewe ni, félangka-langka gom brab fébantug-bantug gom. Enda fiyoy nan.

¹⁷Amuk wén i étew gétiga noy fatute rigoné no, éndob énda rigoné no de, ménsala.

Fantag bé de kawasa

5 ¹I begome do kawasa étew, fégélingo gom begén. Fatut kéréw gom brab ruung gom sabaf bé de kérassay gom gérumah moso. ²Non i de balilaga do tamuk gom waléy do mérénah. Brab i de médo do kégal gom amaéy de ifés. ³Atin i de bélowan brab do filak do nitong gom, waléy do tangisén. Brab i kétangisé ruwe fégito roy énda nusar gom i de kurta gom fégétabang bé de méskinan. Mélaw toow fo géttimal i kékukume begom. Non nitong gom i de médo kurta gom taman dob tamfaday de gai.

⁴Enda bénayada kom i de géménalbék dob fantad gome. Atin i de kurta énda fénggébayad gom de, been i de niy usaréne fégétébo begom dob adafay Tuluse. Atin i de kétébo i de étew géménalbék dob fantad gome, énggelingooy toowe fo barakatan Kadnan Tulus. ⁵Toow gom fo kawasa brab fiyoy goho kome dob duniyae ni. Endob ségiléw gom bé de ayam do fénbobo inok sumbalién. Atin i begome fénbobo gom i lowoh gome. ⁶Non kénukum gom brab fénléhu gom i de métintu do étew énda natuho ro begom.

⁷Endob i begome do dumo gu, tingkél gom taman dob gaiwe séfule i Kadnane. Iring gom bé mohoke toow fo témingkél ongot-ongot bé gaiwe rémana inok témunoh i nohok ne atin gékétéwo no. ⁸Ségiléw so bé begome non fatut tingkél gom. Fatut féégré gom i késarig gome non gédétén i gaiwe séfule i Kadnane.

⁹Do dumo gu, kagom séséndit, inok énda kukuméy Tuluse begom. Enda mérayu i kémukume, éndaén mérugay i kégumah ne. ¹⁰Do dumo gu, iring gom i de sénarigoy Kadnane muret bé kébérén ne bé do gétah, non toow ro fo témingkél démayday munur fiyon fo ké fénrasay ro.

¹¹Kénarang tom bero do toow fo moror non énggétingkél ro dob de gai do mérégén. Atin gétiga kom i fantage bé ségétewé étew féndawét Job bé do gétah. Toow fo témeringkél démayday munur fiyon fo ké toow fo ménrasay. Atin gétiga kom soy toowe fo kéfériyoy Kadnane de amun énggilid ménrasay. Non i Kadnane toow de fo mégédaw brab méuray i na nuwe de.

¹²Atin do dumo gu, ay niy toowe fo balilaga sugu gu begom. Amuk rémigo gom fasad, kagom sémafa. Kagom bérén de makom, “Gitoy lawayo” taloo no “Gitoy fantade”, taloo no udenén bérén kom fégésafa gom. Sugatén i kébérén gome, “Hoo” taloo no “Enda”, inok énda kukuméy Tuluse begom sabaf bé ni kébérén gom.

¹³Amuk wén i ségétew émbuku begom, fatut démasal. Amuk wén i ségétew moror begom, fatut kémanta dayéwé noy Tuluse. ¹⁴Amuk wén i ségétew démeruun begom, fatut fétawagén i de odoroy de munur dob gono kome, inok dasala ro brab lulawa ro nor bé lala ruwe mongot dob Kadnane. ¹⁵Non amuk tintu ro fo munur, i Kadnane féadi-adiné noy démeruune ni sabaf bé kédasal ruwe. Atin fésagaday Kadnaney de salaén. ¹⁶Mélaw, fatut séfayag gom i de sala gom, brab sédasal gom dob Tuluse, inok adi-adi gom. Non toow fo barakatan i kédasal i métintuwe étew. ¹⁷I Eliase bé do gétah, kéilawan so ségiléw bé betome. Atin amun ménbagér i kédasal ne mongot ké énda férana i Tuluse de, énda i rana bé méntéléwe gébélinta brab ném gétérésang kélungonon. ¹⁸Tidéw béno, amun déménasal man mongot rana, fénrana i Tuluse brab i de nohok téménunoh ro dob fantade.

¹⁹Do dumo gu, amuk wén i ségétew begom té nagakén i toowe kétoro, atin wén i ménféséfule de, ²⁰ay niy fatute fégétédémé kom: I étewe énggébalengo noy fédew i étewe ménsala inok tagaké noy tetee aguwo no, toow fo té nabanga no inok énda mékukumén méléhu. Yamula fésagaday Tulusey de médoó do salaén.

Santiago

I Sunguwe Sulat Pedrowe

Ay niy sunguwe bé de sénulat Pedro, sani ségétéwe bé de kuyug Jesus brab dumo no amun dini séna dob duniyae niy Jesuse. Sénulat Pedrowey ni sulat dob kéluhanay de munur bé Jesuse.

Amun sénulat Pedrowey ni, ménrasay i de munur sabaf bé kéunur ruwe. Mélaw sénulat Pedrowey ni émfébagér bé de fédew ro. Ténoroén bero bé barasay Tuluse bero dob lawayo amuk énda témérén ro munur. Mélaw ulanden ké mérasay ro dob duniyae ni.

1 ¹Begéney Pedrowe, sani séménulate bé ni. Begéney ségétéwe apostol Jesu Kristowe. Sémulatu mangéy dob de begom do fénémili i Tuluse, sani de begom do ménbéragar dob de ingéd Ponto, Galasia, Kapadosia, Asia, brab Bitinia. Maak do iloh-iloh gom dob duniyae ni non i tintuwe ingéd gom diyo dob lawayo. ²Fénémili i Abaye Tulus begom sabaf bé kaane kétayan. Atin i Rémodor i Tuluse fénwaléyén begom do métintu inok modor gom bé de kétoro Jesu Kristo brab méfésagad gom sabaf bé kéléhu ne. Non maak ménfirikon gom bé dara ne funa kom mélinis.

Mégédaw i Tuluse damén begom brab irayén damén begom i métanéke fédew.

³Fatut fésalamat tom bé Tuluse sani Tuluse brab Abay i Kadna tome Jesu Kristo. Non sabaf bé kégédaw ne betom, nirayén betom i mantuwe umul bé kétébule ne bé Jesu Kristowe. Mélaw wén soy inam tom tébule inok méuyag tom taman sa taman. ⁴Atin ongot-ongoté tom mélaw i kégégédot tome bé de kéfiyonon nitong i Tuluse betom dob lawayo énda mékédano taman sa taman, taloo no mébinasa taloo no mérénah taloo no mérénég. ⁵Non bé kéunur tome, diyaganéy barakatane Tulus betom inok géfégilido noy kéfukas ne betom moso dob géfuraye gai.

⁶Mélaw fatut moror gom de, non fiyon fo ké tete i de fédew gom singkow saén sabaf bé de kérasay gom, ⁷kailanga kom soy mérasaye béleewe ni inok métukawan i kébagér i kéunur gome dob de ni do gai. Ufama, i kéunur gome ségiléw bé bélówone. Non i bélówone métukawan dob aféye inok giton ké tintu fo bélówon taloo no békén. Ségiléw so bé niy kéunur gome. Non i kéunur gome métukawan bé de mérégén géagéwon inok giton ké tintu gom fo munur taloo no énda. Atin toow na

fo balilaga i kéunur gome bé de bélowan non do mébinasa ro. Atin amuk tintu gom fo munur, médayéw gom de, brab mébantug gom de, brab mébasanan gom de moso bé gaiwe séfule i Jesu Kristowe.⁸ Fiyon fo ké énda énggito gom i Jesuse, féimu gom de. Atin fiyon fo ké énda gito gom de béeewe ni, unur gom de. Atin sabaf bé ni, moror gom fo toow atin énda i fiyo kébérén de émfégétigan bé kédakél i kéoror gome de.⁹ I funa kome toow de fo moror loo bé ni non kédanéy Tulusey de sala gom inok gédoté kom i umule magufusa sani ongot-ongoté kome sabaf bé kéunur gome.

¹⁰I de sénarigoy Tuluse muret bé kébérén ne bé do gétah, féngganad ro fo toow i kéfukas i Tuluse bé étewe. Atin nuret ro mélaw i fantage bé ni iray i Tuluse begom. ¹¹Toow fo féngganad ro ké ati kédiron i gaiwe mérigoj ni kéfukas i Tuluse brab ati kétuma nuwe de. Non fénémanduoy Rémogor Kristowe bero brab fénggétiga no bero bé férasayén i Kristowe, atin tidew béno médayéw i Kristowe fo toow. ¹²Atin i kéuret i de ni do sénarigoy Tuluse muret bé kébérén ne, fénggésobutén bero bé i funa ruwe muret inok métabangan gom, békén bero. Non i kéuret ruwe fantag bé Kristowe, been i ni énggelingoo komén béeewe ni tidew dob de téromo bé Fiyowe Uret. Atin i Rémogor i Tuluse, sani sénugue tidew dob lawayo, fénémanduo noy de ni téromo. Atin fiyon foy de télaki, méuyot ro de ké gésobuto roy ni kéuret ro.

¹³Mélaw fatut fébagéré tom i kéfégitung tome atin féfiyoné tom i kéfégitung tome. Atin fatut ongot-ongoté tom i de kéfiyonon gédoté tom dob gaiwe séfule i Jesu Kristowe. ¹⁴Atin non betom i de nga i Tuluse, fatut odoro tom i de suguén. Atin fatut so diguré tom i de tête adat tom loo bé de rénigo tom bé do gétah amun énda séna gétiga tom i toowe kétoro. ¹⁵Bé kéluhanay de rigoné tom fatut métintu tom, miring bé kétintuy Tuluse sani ménémilie betom. ¹⁶Non wén i Ménssulate Kébérén i Tuluse mano, “Fatut toow fo métintu gom non toowu fo métintu.”

¹⁷Atin amuk démasal tom dob Tuluse, tawagé tom “Abay tom”, mélaw fatut basana tom fo toow i Tuluse bé lala tome méuyag dob duniyae ni. Non Beeney kémukume bé kéluhanay étewe sabaf bé de rigoné ro, non énda i isu ramigoy Tuluse. ¹⁸Gétiga kom ké atiy fénggébayade niray i Tuluse inok kédané noy de tête adat gom énggédot gom tidew dob de katufua kom. Non i fénggékukas ne betom énda loo no bé de bélowan taloo no do filak do fakay mébinasa. ¹⁹Yamula Kristoy fénggékukas ne betom. Beeney maake toow fo fiyo natì bili-bili fénléhu ténuak inok mékédan i de sala tom. Toow fo balilaga i ni kétulak. ²⁰Amun énda séna lénimbag i Tulusey duniyae ni, fénémilién i Kristowe inok mérigoj ni. Atin dob de ni énggékuray do gai ménangéy i Kristowe dini inok fukasé no betom dob de sala tom. ²¹Atin sabaf bé Kristowe, ménwaléy tom do munur bé Tuluse, sani téménébulee bé Kristowe brab ménfédayéwe de

so. Atin mélaw Tulusey sarigo tome brab wén i inam tom bé kétébule i Tuluse betom moso.

²² Atin sabaf bé kéunur tome bé toowe kétoro, ménwaléy tom malinis dob adafay Tuluse atin ménwaléy tom tintu mégédaw bé de dumo tom munur bé Kristowe. Gido loo, fatut fo féégété tom i késégédaw tome.

²³ Non ménumah tom man ségule inok waléy tom do nga i Tuluse sabaf bé kékérén ne. I ni kékérén i Tuluse énda mékédan no taman sa taman brab miray umul magufusa. ²⁴ Non wén i Ménuslate Kékérén i Tuluse mano, “I kéluhanay de kéilawan ségiléw ro bé de kéroon, non méuyag ro singkow saén. I kéfiyoy de kéilawan magad mékédan ségiléw bé de ulak i de kéroon magad mélaay brab mélawu. ²⁵ Endob i kékérén i Kadnane, énda mékédan no taman sa taman.” Atin i kékérén i Kadnane, been i niy Fiyowe Uret nureté dob begome.

2 ¹ Mélaw non ménumah tom man ségule, fatut tagaké tom i kéluhanay de tete rigoné tom. Katom témuji taloo no ubo-ubo saén i kéfengintulus tome, taloo no médaléw, taloo no fénigirasé tom i de étew.
² Fatut iringé tom i de kloh nga do témutu séna, non betom i de étew do ménumah man ségule. Fatut méuyot tom mégélingo bé fiyowe kékérén i Tuluse ségiléw bé klohe nga térumén témutu. Amuk rigoné tom i ni, i kéunur tome waléy dakél ségiléw bé kékérük i klohe nga taman waléy tom do gétuwan bé kéunur tome. ³ Non énggédot tom i kégédaw i Tuluse betom.

⁴ Odor gom bé Kadnane Jesus sani méuyage taman sa taman. I Jesuse ségiléw bé batéwe nikaay de rémigo lawi. Endob fiyon fo ké ménika i de étew de, fénemili i Tuluse fénigérigo no bé lawi ne non kénarang i Tuluse toow fo balilaga. ⁵ Atin i betome, méuyag tom so taman sa taman. Fatut modor tom bé Kristowe inok waléy tom so maak do batéw usaréy Tuluse fénigérigo no bé maake lawiéen fénigadafay de étew de. Atin dob lawi ne ni, maak rigoné tom i galbék i fadi i Tuluse miray do tulak tayakuféy Tuluse. Atin i tulake iray tom, been i niy kéfengintulus tome. Atin i Jesu Kristowe, tabanga no betom ménigintulus loo bé ni. ⁶ Non wén i Ménuslate Kékérén i Tuluse mano, “Ménemiliu ségétew waléy méguléw ségiléw bé toowe fo balilaga batéw. Non maak rémigowu lawi dob ingéde Sion, atin Beeney maake toow fo fiyo balilaga batéw fénigérigo gu bé ni lawi. Atin i kéluhanay de munur dob Beene, énda gésénule ro bé késarig ruwe de.” ⁷ I ni méguléw, sani ni maak batéw, toow fo gulaané tom do munur de. Endob wén soy de étew énda munur ro de. Atin énggétumana roy ni Ménuslat Kékérén i Tuluse mano, “I batéwe nikaay de rémigo lawi, ménwaléy na fo toow balilaga.” ⁸ Atin wén soy ni Ménuslat Kékérén i Tuluse mano, “Been i niy batéwe émfébangkud bé de étew inok mélawu ro.” Atin i atag i ni, énggébangkud ro non énda ménunur ro bé kékérén i Tuluse, non been i niy bénantak i Tuluse mérigo.

⁹Endob i de betom, betom i de étew fénémili i Tuluse. Betomey de fadi i Datue Kristo. Betomey de étew i Tuluse. Been i méguléwe betom. Betomey de étew fénémili i Tuluse inok muret tom fantag bé de fiyo rigonéy Tuluse. Sénéngkat i Tuluse betom tidéw dob délémone mangéy dob kaane géfékaya toow fo fiyo. ¹⁰Non bé do gétah, békén tom do étew i Tuluse, éndob béleewe ni ménwaléy tom do étewén. Bé do gétah, énda gétiga tom i fantage bé kégédaw i Tuluse, éndob béleewe ni énggédot tom fo toow i gédaw ne.

¹¹Do gulaané ku do dumo gu, i duniyaе ni békén tintu ingéd tom. Maak do iloh-iloh tom saén dini. Mélaw ongoté ku dob begome, kagom modor bé de tete kétayay de lowoh gom. I de ni do tete kétayay de lowoh tom maak sétipoh bé de rémogor tom méuyot modor dob Tuluse. ¹²Fatut toow fo métintuy de adat gom inok fiyon i de békén méngintulus do étew gito ro. Atin amuk téboé ro begom, i toowe, gétiga ro toow fo métintuy de adat gom. Atin mélaw gédayéwo roy Tuluse dob gaiy kégumah ne dini.

¹³Fatut odoro tom i de sugu i de gémamak kukuman fiyon i toowe fo gérotor méguléw. Fatut rigoné tom i ni non been i niy kétayay Kadnane. ¹⁴Fatut so odoro tom i de sugu i de gobernador. Non i toowe fo gérotor méguléw i sémugue bero inok kukumé roy de rémigo tete atin inok dayéwé roy de rémigo fiyo. ¹⁵Non méuyot i Tuluse de ké féantésén i de dufang do étew témbó betom, sani de émbéréh énda i lantékén. Non amuk gito roy de métintu rigoné tom, témérén ro démowoy betom. ¹⁶Ménfukas tom dob kéodore bé kitabe tidéw dob Moisese. Mélaw fakay gérígono tom i kétaya tome. Gido loo, katom usurén i kéfukas tome fégéséliyah tom rémigo tete. Yamula fatut odoro tom i kétayay Tuluse non betom i de sugu-sugué no. ¹⁷Atin fatut fégadata tom i kéluhanay étewe. Atin fatut mégédaw tom bé kéluhanay de dumo tom munur bé Jesuse. Fatut féngadafé tom i Tuluse. Atin fatut fégadata tom soy toowe fo méguléw.

¹⁸I begome do sugu-suguén, fatut odoro kom i de sugu i de amu gom, atin fatut fo fégadata kom bero toow. Atin békén saén dob de fiyo amu gom mégédaw begom. Yamula fégadata kom i kéluhanay de amu gom, fiyon fo ké dusa ro. ¹⁹Non féfiyonéy Tulusey kéluhanay de étew témingkél bé kédusawe bero fiyon fo ké énda i rénigo ro tete, amuk témingkél ro sabaf bé késarig ruwe bé Tuluse. ²⁰Endob amuk rémigo gom tete, fiyon fo ké tingkélo kom i de amu gom ké dusané ro begom sabaf bé kérigo gome tete, énda so médait gom gégédot bé barase. Endob amuk fédayaé kom bero ké dusané ro begom fiyon fo ké énda i rénigo gom tete, féfiyonéy Tuluse begom. ²¹I Kristowe féndayaén soy kédusay de étew de inok kédané noy de sala tom. Atin fatut iringé tom. Non i funay Tuluse ménféunur betom inok iringé tom i Kristowe. ²²Non énda i sala rénigo Kristowe, atin énda soy sébaan tugi bénréhén. ²³Atin amun fénéngiras i

de étew i Kristowe, énda séménulién méngiras. Amun fénrasay ro, énda fénémulaén bero. Yamula sénarigén saén dob Tuluse, sani métintuwe kémukum.²⁴ Ménkukum i Kristowe dob kruse noboén i de sala tom, inok tagaké tom i de tete rigoné tom atin inok gérigo tom métintu. Mélaw ménwaléy tom métintu sabaf bé kékukume bé Kristowe.²⁵ Bé do gétah, ségiléw tom bé de méntadin do bili-bili. Atin i Kadnane Jesus, ségiléw bé témalimae bé de bili-bili. Maak sénlédén betom atin amun énggito no betom, nuwitén betom mule mangéy dob Beene, sani magifate betom.

3 ¹Atin i de begom so do libun do bawagan, fatut odoro kom i de sugu i de bawag gom inok amuk wén sénay do énda munur bero bé kékérén i Tuluse, waléy ro géunur sabaf bé fiyowe adat gom. Enda kailanga kom ureton bero,² non gito roy fiyowe adat gom brab kénéfingintulus gome funa ro waléy munur.³ Atin kagom saén féfiyonén i de falas gom loo bé de kénéfifiyo gom bé de buk gom, taloo no de ono gom, taloo no de kégal gom.⁴ Yamula fatut féfiyo gom i de kékérénh gom brab de rigoné kom inok métanék i de adat gom. Been i niy funay Tuluse mésuwat begom. Atin énda mérénég i métintuwe adat loo bé kérénég i fiyowe falas.⁵ I de énggétah do fiyo libun séménarig ro dob Tuluse, fénfiyo roy de lowoh ro bé kéodor ruwe bé de sugu i de bawag ro.⁶ Loo bé Sarahe, nodoro noy de sugu i bawag ne Abraham brab féndawétén “Amu”. Atin i de begom do libun béléewe ni, maak begom i de nga Sarah amuk iringé kom i de fiyo rénigo no brab énda mégilakén bé de udenén étingayén.

⁷Loo so bé begome do lagéy do bawagan, fatut talima gom i de bawag gom bé lala gome sétifon bero dob duniyae ni. Non gétiga kom i de karo lowoh toow na fo mélubay bé de katom de. Gido loo, ségiléw so bé betome, non nirayay Tuluse so bero bé umule magufusa. Mélaw fatut basana kom bero inok fégélingoéy Tulusey de kédasal gom.

⁸Mélaw ay niy géfuraye béréhé ku begom. Fatut féwaléy gom sébaan i de itunga kom brab fésétima kom i de fédéw gom. Fatut ségédañ gom non maak do sétuwaréy gom. Atin fatut séuray gom na brab térifantad gom.⁹ Atin amuk wén i réménigo tete dob begome, kagom sémuli rémigo tete dob berowe. Amuk wén i ménémula begom, kagom sémuli mémula. Yamula ongot gom dob Tuluse féfiyoné no bero. Non amun fénunurén begom, fénasad i Tuluse féfiyoné no begom.¹⁰ Non wén i Ménstable Kébérén i Tuluse mano, “I de étew méuyot ro ké fiyoy de goho ro brab méuyot ro moror, fatut béréhé ro saén i fiyowe atin témérén ro témugi.¹¹ Fatut tagaké roy de tete do adat ro atin mèganay ro rémigo bé fiyowe. Atin fatut rigoné roy kéluhanay gagané ruwe inok énda mékérit i de étew de.¹² Non bantayay Kadnaney de métintu do étew atin fégélingoé noy de kédasal ro. Endob diguré noy de rémigo tete.”

¹³ Amuk mégérör gom rémigo bé fiyowe, énda i gésug-sug begom.
¹⁴ Gido loo, amuk mérásay gom sabaf bé kétintuy de adat gom, fatut

moror gom de. Kagom mágilak bé de kéilawan saén. Atin kagom émbuku. ¹⁵ Yamula, féngeadaf gom i Kristowe dob de fédew gom, atin unur gom Beeney Kadnane. Atin fatut démoyun gom témafay sénga tékélid inok amuk wén i ménginsaan begom fantag bé késarig gome bé Tuluse, gétiga kom i késumbulo kome bero. ¹⁶ Endob amuk sémumbul gom, fatut félanat gom i kékérél gome atin basana kom i de étew mégélingo. Atin sabaf bé begom i de kuyug Kristo, fatut fétintu gom i de adat gom inok énda waléy tete i de fédew gom. Fatut rigo gom i ni inok amuk wén i émbérél tete fantag bé begome, mémala ro mélaw. ¹⁷ Amuk kétayay Tuluse ké mérasay gom sabaf bé de fiyo rigoné kom, fakay so. Békén saén mérasay gom sabaf bé de tete rigoné kom. ¹⁸ Non i Kristowe ménléhu inok fukasé no betom. Ménléhu ségule saén inok mékédan i de sala tom. Métintuy Kristowe, éndob ménléhu génantino no betom do tete étew inok féwaléyé no betom do étew i Tuluse. Fénléhu roy lowoh Jesuse, éndob énda énggéléléhu roy Rémogor ne. ¹⁹ Atin non méuyag sénay Rémogor ne, ménangéy dob de rémogor do ménféri su atin nureto no bero. ²⁰ Been i de niy de rémogor i de énggétah do étew énda ménodor ro bé Tuluse bé gaiwe téningkélo no bero bé de tete rigoné ro bé lala Noehe rémigo bé dakéle barko. Tidew béo, waléw gétew saén i éndae ménléné non énggéahur ro dob barkowe. Mélaw tétabangay Tuluse bero inok énda ménléné ro dob wayégo no. ²¹ Atin i wayége ni, maak anlung i wayége fégébautis betom funa tom méfukas dob de sala tom. I atag i kékautise ni, békén kéurah bé lowohe inok mékédan i luwéde. Yamula been i niy kéongot tome bé Tuluse bé kédané noy de sala tom inok malinis i de fédew tom. Fakay i ni sabaf bé kétébule Jesu Kristowe. ²² Atin ménule i Jesuse mangéy dob lawayo inok diyo dob kuwonoy Tuluse, sani gonone toow fo basanan, atin méguléw bé kéluhanay de télaki brab kéluhanay de étew do barakatan diyo brab de wén atura ro.

4 ¹Gétiga tom, amun dini sénay Kristowe dob duniyae ni, ménrasay bé kékédawéta nuwe. Mélaw fatut tom témafay bé kékérasay i de étew so betom. Non i de étew do mérasay éndaén méuyot ro mésala. ²Mélaw, tidew béní, taman méuyag gom séna dob duniyae ni, fatut odoro kom saén i kétayay Tuluse atin kagomén odoron i de tete kétayay de lowoh gom. ³Non bé gétahe, ménrugayén i kétete i de adat gom ségiléw bé de tete rigonéy de békén méngintulus. Non toow fo mékérésik i de rénigo gom, brab tete i de kétayay de lowoh gom, brab ménolon gom, brab mékémala-malay de rénigo gom dob de mékéolon do karagiyya kom, brab fénengadaf gom i de kéninontow funay Tuluse mérume. ⁴Endob béléewe ni, ménggaif i de énda méngintulus non éndaén mamung gom bé de toow fo tete do mékérésik rigoné ro. Atin mélaw féngeirasé ro begom. ⁵Endob fétindégéy Tulusey séngae étew dob adafa nuwe inok ureté roy kéluhanay de rénigo ro. Non i Tuluse, Been i kémukume bé de méuyag

étew brab de ménléhuén. Atin tafayén kémukum béni. ⁶I de étew do ménléhuén, mén-uret soy Fiyowe Uret dob berowe, inok fiyon fo ké ménukum ro bé kéléhu ruwe ségiléw bé kéluhanay de kéilawan, géunur ro so, atin méuyag mélaw i rémogor ruwe ségiléw bé kéuyag i Tuluse.

⁷Gédétén i tamfaday duniyae. Mélaw fatut féfiyo gom i kéfégitung gome fo toow inok fiyoy kédasal gome. ⁸Atin ay niy toowe fo mélaga féginau gu begom: Ségédaw gom fo toow. Non amuk ségédaw tom, magad saén i kéfésagada tome bé de énggésala dob betome. ⁹Atin fatut moror gom sétayakuf dob de lawi gom. ¹⁰Atin i kéluhana kome, fatut usar gom i de kéfurungon niray i Tuluse begom. Fatut usar gom fégétabang gom bé de dumo gom munur. Non i funay Tuluse de méniray dob begome inok gétabanga kom i de ségiyo. ¹¹Atin i de begom do muret, fatut uret gom i kékérén i Tuluse. Atin i de begom do tétabang, fatut usar gom i bagére niray i Tuluse begom inok démoyun médayéw i Tuluse de fénagéw dob Jesu Kristowe sabaf bé de tabang rigoné kom. Been damén i médayéwe brab máguléwe taman sa taman. Amen!

¹²Do gulaané ku do dumo gu, kagom mégaif sabaf bé ni toow fo démawét téméngkad begom béléewe ni. Non been i niy kailangane mérigo dob betome kéluhanan do munur bé Jesuse. ¹³Kagom mégaif de, yamula oror gom de non gétukidon gom bé kérasay Kristowe. Oror gom inok toow fo moror gom bé gaiwe séfule brab médayéw moso. ¹⁴Oror gom amuk wén i méngiras begom sabaf do begom i de kuyug Kristo. Non amuk mérigo ni, gétiga kom fénémanduoy barakatane Rémogor begom, sani Rémogor i Tuluse. ¹⁵Enda damén mérigo no ké wén i mérasay begom sabaf bé de tete rigoné no loo bé méméléhue étew, taloo no ménakaw, taloo no rémigo bé de ségiyo tete rigonén, taloo no furaya fédewén i rigonéy de dumo no. ¹⁶Endob amuk mérasay gom sabaf bé kéunur gome bé Kristowe, kagom mémala de. Yamula fatut fésalamat gom dob Tuluse sabaf féndawét gom do munur bé Kristowe.

¹⁷Enggumahén i gaiwe ménanayén kémukum i Tuluse. Atin kukumé noy de kaan do étew sani de betom. Atin amuk betom do étewén i sunguwe kukumé no, toow na fo gétimal i géfurateyé kékukumén bé de étew énda munur ro bé Fiyowe Uret tidew dob Beene. ¹⁸Non wén i Ménsulate Kékérén i Tuluse mano, “Amuk mérégén i kfukase bé de métintu do étew dob de sala ro, ati keey i mérigowe dob de tete étew énda méngintulus ro?” ¹⁹Mélaw amuk mérasay gom sabaf been i niy kétayay Tuluse, sarig gom fo toow bé Tuluse, sani mésarigone léménimbag begom, atin rigo gom saén i fiyowe.

5 ¹I de begom do odoroy de munur, wén i ongoté kuwe dob begome, non i begéne ségétew so odoron. Enggitoy guy kérasay Kristowe, atin médayéwu so séréngan de dob gaiwe séfule moso. ²Mélaw, ongoté ku dob begome, toow gom fo talima i de kuyug Jesus sénarig i Tuluse begom.

Begom i de maak do témalima bé de bili-biliy Tuluse. Fatut méuyot gom témalima bero non méuyot gom modor bé kétayay Tuluse. Kagom rigonén de ké maak maféfés gom de saén. Yamula rigo gom i galbék gome tidéw fo dob kéfiyoy fédéw gome. Enda fiyo no ké been i sahud gomey funa kome rémigo bé ni galbék. ³ Kagom féguléwon i de ni do munur sénarigén dob begome. Yamula fanangguwit gom bero inok iringé roy adat gome. ⁴ Atin mélaw, amuk séfule i Kristowe, sani maake gérotor témalima bé de bili-biliy Tuluse, gédoté kom i toowe fo fiyo baras gom énda mékédano taman sa taman.

⁵ Atin loo so bé ni, i begome do ménguwéd séna, fatut odoro kom i de sugu i de lukés. Atin fatut térifantad gom kéluhanan, inok gésétabang gom. Non wén i Ménsulate Kébérélé i Tuluse mano, "Sébanil i Tuluse bé de félangka-langka do étew, éndob mégédaw bé de térifantad."

⁶ Mélaw fatut térifantad gom dob adafay barakatane Tulus inok Beeney émfégérotore begom dob gaiwe kétaya no. ⁷ Atin kagom émbuku, yamula sarig gom i kéluhanay de bukué kom dob Tuluse, non fagifaté no begom.

⁸ Atin ingat gom brab féfiyo gom i de kéfégitung gom. Non i Satanase, sani sébanile betom, démoyun sémugud ségiléw bé mérayare binatang sélédé noy ati géafasa nuwe betom inok amaé no. ⁹ Fatut féégét gom i de kéunur gom inok géatuho kom i Satanase. Non gétiga kom i de dumot tom munur bé Kristowe do bati dob de séségiyo-giyo ingéd dob duniyae ni, fénrasayén so bero ségiléw bé begome. ¹⁰ Endob amuk mérasay gom singkow, féégétay Tulusey kéunur gome dob Beene. Atin fébagéré noy de fédéw gom brab tabanga no begom bé kéluhanay de kailanga kom. I kéluhanay tabange begom, tidéw dob Beene non mégédaw fo betom. Beeney émféunure betom bé Kristowe inok gédoté tom i umule magufusa. Bé no gai, séréngan tom moso médayéw bé Jesuse. ¹¹ Médayéw i Kadnane taman sa taman. Amen!

¹² Silbanoy téménabangane begén séménulat bé ni foko sulat mangéy dob begome. Beeney maake gésarigo ku tuwaréy gu sabaf bé Kristowe. I funa kuwe séménulat dob begome inok méégét i kéunur gome. Atin méuyotu de so émfégétigan begom bé toow i kétoro guwe fantag bé kégédaw i Tuluse. Mélaw kagom térenon i témayakufe de.

¹³ I de munur bati dob Babilonia ségifaé ro begom. Fénémili i Tuluse so bero ségiléw bé begome. Atin i Markose ségifaé no so begom. Been i maake nga gu. ¹⁴ Fatut fégito gom i késégédaw gome ké séségifa gom.

I Tuluse irayén damén dob begome kéluhanan do munur bé Kristowey métanéke fédéw.

Pedro

I Géruwowe Sulat Pedrowe

Ay niy géruwowe sénulat Pedrowe, sani ségétewé bé de kuyug Jesus brab dumo no amun dini séna dob duniyae niy Jesuse. Sénulat Pedrowey ni sulat dob kéluhanay de munur bé Jesuse.

Dob ni sulat, fénigat Pedrowey de munur fantag bé de tugién téromo. Atin téneroén so bé tintu fo séfule i Jesuse, fiyon fo ké mérugay séna.

1 ¹I séménulate bé ni, been i begéne sani Simon Pedrowe ségétew
sugu-sugué Jesu Kristowe brab apostolén. Sémulatu mangéy dob
begome do munur bé Jesu Kristowe. Beeney Tulus tome sani ménémukase
betom dob de sala tom. Sabaf bé énda i ramigo no bé étewe, fénwaléyén
begom do munur dob Beene ségiléw bé kéféwaléy ne begey do munur dob
Beene.

²Toow fo damén mégédaw i Tuluse begom brab irayén damén begom
i métanéke fédéw sabaf bé kégélolo gome bé Tuluse brab Kadna tome
Jesus.

³I barakatane Tulus nirayén dob betomey kéluhanay kailanga tome
inok fiyoy kéféngintulus tome bé lala tome séna méuyag dob duniyae
ni. Fakay gérigono tom i de ni non gétiga tom i Jesu Kristowe, sani
séménéngkate betom mangéy dob Beene inok géamung tom bé kéfiyono
nuwe brab kégérotor ne. ⁴Bé ni, nirayén betom i kéluhanay fiyowe do
gérotor éntingayén fénasadén irayén, inok sabaf bé de ni, géséliyaha
tom i de tete kétayay de lowoh tom fégébinasa bé de étew. Atin waléy i
adat tome ségiléw bé adat i Tuluse. ⁵Atin mélaw fatut rigoné tom taman
gagané tom inok méégét i kéunur tome sabaf bé de fiyo rigoné tom.

Atin i de ni do fiyo rigoné tom, fatut féégetté tom bé kégésobut tome bé
kétintuwe. ⁶Atin i kégésobut tome de, fatut féégetté tom bé de kéika tom
bé de tete kétaya tom. Atin fatut féégetté tom i ni bé káfedayday tome.
Atin i káfedayday tome, fatut féégetté tom bé kéodor tome bé Tuluse.

⁷Atin i kéodor tome bé Tuluse, fatut féégetté tom bé késégédaw tome. Atin
i késégédaw tome, fatut féégetté tom bé kéimu tome bé de dumo tom.

⁸Amuk tintu gérigono kom i de ni, minut fo médooy de rigoné kom sabaf
bé kéunur gome bé Kadna tome Jesu Kristo. ⁹Endob amuk wén i ségétew
munur békén loo bé niy adat ne, maak langafén i káfegitung ne non énda

gésobuto noy toowe, atin énggélifoto noy kékéday de salaén funa no malinis i fédew ne.

¹⁰ Mélaw do dumo gu, fatut toow tom fo télamanén fégítøy kéfémili i Tuluse betom brab kéfénur ne betom. Amuk rigoné tom i ni, énda fo fakayén ké tagaké tom i kéunur tome dob Beene. ¹¹ Atin moror mélaw i Tuluse témayakuf betom dob kéféguléw i Kadna tome Jesu Kristo, sani ménémukase betom dob de sala tom. Enda mékédan i kéféguléw ne taman sa taman.

¹² Mélaw démoyun fo fefégétédém gu begom i de ni fiyon fo ké énggésobuto komén brab méégétén i kéunur gome bé toowe kétoro. ¹³ Non dob karang guwe de, fiyo fo ké fefégétédém gu begom i fantage bé de ni bé lala guwe séna méuyag dob duniyae ni. ¹⁴ Gétiga ku éndaén mérugay i kéuyag guwe dob duniyae ni, loo bé fénggétigay Kadna tome Jesu Kristo begén. ¹⁵ Mélaw rigoné kuy kéluhanay gagané kuwe béleewe ni inok énda gélifoto kom i de ni kétoro gu, fiyon fo ké éndaén diniwu dob duniyae ni.

¹⁶ Toow foy kétoro geye begom fantag bé kégumah i Kadna tome Jesu Kristo. Békén do tutul saén nuret gey begom tidéw dob de kagey saén kéfégitung, non énggito gey i kéréndaw ne. ¹⁷ Diyo gey de bé gaiwe fénggitoy toowe fo barakatan Abay Tulus i kéréndaw Kristowe brab kégérotor ne brab ménbéréh mano, “Ay niy Nga guwe toow fo méimuu de, brab toow fo mésuwatu de.” ¹⁸ Enggelingoo key i ni kébéréh tidéw dob lawayo amun diyo gey dob Beene dob uruk i mékétéfuwe tuduk.

¹⁹ Mélaw tintu fo gétiga key toow i kéuret i de énggétah do sénarigoy Tuluse muret bé kébéréh ne. Atin fatut fo unur gom de so, non i kéuret ruwe maak solo réméndaw dob délémone taman géfuwén. Atin amuk gumah i géfuwéne, réméndaw i solo mubode dob betome. Non i Kristowe maak Beeney solo mubode atin séfule mangéy dini moso. ²⁰ Atin ay niy toowe na fo gérotor féginau gu begom: I toowe, énda i ségétew étew gétoroo noy atag i de kébéréh i de sénarigoy Tuluse dob Ménsulate Kébéréh i Tuluse, amuk énda tétabang i Tuluse de. ²¹ Non i kéuret i de sénarigoy Tuluse muret bé kébéréh ne békén tidéw dob kéfégitung i kéilawane saén. Yamula fénbéréh i Tuluse bero dob kéfemandu i Rémogor ne.

2 ¹ Bé do gétah, wén i do étew do tugién do ubo-ubo sénarigoy Tuluse muret bé kébéréh ne. Atin ségiléw so bé béleewe ni, wén soy tugién do téromo do gumah séko dob begome. Toroé roy de tugi fégébinasa bé kéunur gome. Toroé roy békén kun Kadnan i Jesuse fiyon fo ké ménléhu i Jesuse inok kédané noy de sala ro. Mélaw métékow ro mémukum. ² Gido loo, médooy modore bé de mékérésik do adat ro. Atin sabaf mélaw bé ni, médooy méraréke bé toowe kétoro. Non i de étew, marok do dumo tom i de ni tugién téromo. ³ I de ni do tugién do téromo, ureté ro dob begomey

de tugi do tutul tidéw dob de karo saén itungan. Rigoné roy ni inok gégédot ro saén kurta, non do arumén ro fo toow. Endob ménrugayén i kétafayay Tuluse bé kékukum ne bero.

⁴Non i Tuluse, énda féndayaén i de télaki do ménsala, yamula nibérén bero dob emfernowo. Diyo ronén béní dob délemone nikét ro dob de sangkali, ongot-ongot ro taman dob gaiwe tintunén fo kémukum i Tuluse.

⁵Atin énda so féndaya i Tulusey de énggéétah do étew do ménsala.

Yamula fénléhuén i kéluhanay de étew do énda méngintulus fénagéwén dob dakéle dunuk. Enda i ségettew ténabangén bero saliyu bé Noehe, sani téménoroe bé tintuwe, brab de fitew gétew do dumo no. I kéluhanay de ségiyo étew ménléné ro. ⁶Atin kénukum i Tuluse soy de étew ménbati dob de ingéd féndawét Sodom brab Gomora. Fénléhuén bero bé aféye taman métuwégo ro. Rénigo noy ni inok fégito noy kérigo nuwe bér de étew do énda méngintulus ro. ⁷Atin i ségettewé lagéy féndawét Lot saén i ténabang i Tuluse inok énda méléhuén bér bénó. Enda kénukum i Tuluse de non métintu étew brab ménika mamung bér de mékérésik rigonéy de étew do énda modor bér de sugu i Tuluse. I de tete rigoné ro ménwaléy tete i fédew Lote de. ⁸Non ménésítifon beroy Lote dob no ingéd atin énggito noy de tete rénigo ro sénga fuweh brab énggelingoo noy de tete kékéréh ro. Mélaw méntete i fédew ne bér de tete adat ro, non métintuy beene. ⁹Mélaw gétigay Kadnaney ati kétabang ne bér de étew do méngintulus inok énda mésala ro kér téngkadén ro. Atin gétiga no soy ati kédusawe bér de tete étew taman dob gaiwe tintu mékukum ro. ¹⁰Atin toow na fo gétimal i kékukum i Tuluse bér de étew odoro roy de mékérésik do kétayay de lowoh ro atin mika ro bér aturay Tuluse.

I de ni do tugién do témoro do énggélabito ku, do félangka-langka ro fo brab do émbaraw. Enda fégadata roy de barakatan do étew dob lawayo diyo. Yamula féngirasé ro bero. ¹¹Atin fiyon i de télakiy Tuluse, do toow na fo barakatan bér de ni do tugién do témoro, énda fo ménéngiras ro témébo bér de ni do barakatan do étew dob lawayo dob adafay Kadnane. ¹²Endob i de ni do tugién do témoro, énda mágilak ro rémigo tete non been i niy de adat ro, maak do mérayar ro binatang fatut fo kéfoén brab féléhuén. I de ni do étew féngirasé roy éndae gésobuto ro. Tintu fo féléhuén ro non ségiléw ro bér de mérayar do binatang. ¹³Atin médusa ro fo toow non déménusa ro bér de ségiyo étew. Méuyot ro fo rémigo bér de tete do mékérésik kétayay de lowoh ro fiyon kér fuweh. Fatut fo mémala gom séréngan bero mama non mékérésik foy de rigoné ro brab tugio ro begom bér lala ruwe séréngan begom mama. Been i funa kome méadowoy. ¹⁴I de ni do tugién do témoro, amuk gégitro do udenén do libun, méuyot ro de fo lémamfa. Atin énda fo témérén ro rémigo sala. Fagakara roy de étew énda séna mécégét i kénur ruwe inok gésala ro. Atin i de ni do tugién do témoro, toow ro fo do arumén. Mélaw toow fo kukuméy Tuluse bero.

15 Ténagak roy tintuwe aguwon atin maak do méntadin ro mélaw béeleewe ni. Niring roy Balaame sani nga Basore. I Balaame ni, toow fo génulaa noy kurtae énggédotén bé de tete rénigo no. 16 Mélaw fénbéréh i Tulusey kuda Balaame maak ségettew étew gémélé de sabaf bé de salaen. Atin téménrén mélaw i Balaame rémigo bé de kédufanga no.

17 I de ni do tugién do témoro, ségiléw ro bé de ménirot do séfut. Ségiléw ro bé de rawén faniréy réfuruhe inok énda rémania ro dob de nohok. Ténafayay Tuluse bero gono ro toow fo délémon dob emfernowo. 18 Toow fo do félangka-langka. Maak do ménalém i de kébéréh ro, éndob énda foy atag i de kéuret ro. Médo damén i de étew géfédew tagaké roy de tete adat ro brab sésuway ro damén bé de tete étew. Endob i de ni do tugién do témoro, fénasa ro bero bé de tete kétayay de lowoh ro. 19 I de ni do tugién do témoro, fasada roy de étew bé fakay ro kun mífukas dob kitabe ké modor ro bero non toroé roy fakay kun rigonén i kéluhanane. Endob i toowe, i de ni do tugién do témoro maak riféy de tete adat bero funa ro mébinasa. Non i étewe, maak riféy de udenén éntingayén méguléwon de. 20 Amuk wén i do étew géloy Kadna tome Jesu Kristo, sani mémukase betom, gétagaka roy de tete adat i de étew dob duniyae ni fégébinasa bé de étew. Endob amuk séfuleo ro man ségule i de ni do tete adat atin waléy ro man maak do riféy salae, toow na fo géimal i goho ruwe bé sunguwe de. 21 Toow na fo fiyo ké énda damén séna énggétiga roy métintuwe aguwon bé gétiya ronén atin tagaké roy sugu i Tuluse fénggétiga no bero. 22 Mélaw dob de ni do rigoné ro, giton toow i kébéréh i Tuluse mano, “I itue, séfuleo noy suwah ne atin amaé no man. Atin i babuye féndiyoh séfule so man mangéy témuna.”

3 ¹Do gulaané ku do dumo gu, been i niy géruwowe sulat gu begom. Dob ni géruwo sulat gu, toow fo ténlama gu fénfégétédém begom i toowe inok fiyoy késégitung gome. ²Non méuyotu de ké démoyun gétdémo kom i kébéréh i de énggétah do sénarigoy Tuluse muret bé kébéréh ne. Atin méuyotu de ké gétdémo kom i sugu i Kadna tome mémukas betom sani sugue niray gey do apostol dob begome. ³Dob sunguwe, fatut gétiya kom i ni: Dob de géfuray do gai, wén i do tete étew odoro ro saén i de tete kétaya ro, brab diyangkaé ro begom. ⁴Béréhé ro begom maro, “Hon i gono Kristowe de? Aw békén ba fénasadén i séfule kun mangéy dob duniyae ni? Enda fo munur gey bé nan, non i de sungu do munur bé Kristowe, ménléhu ro nén. Tidéw bé kélimbage bé duniyae ni taman so béeleewe ni, énda so ménfégalino.” ⁵Endob i de ni do étew, lénifot roy kélimbag i Tuluse bé fantade brab lawayo bé kébéréh ne saén. Atin lénimbag i Tulusey duniyae tidéw dob wayége brab tidéw dob kérara i wayége. ⁶Atin béninasay Tuluse soy de étew méuyag bé gétahe bé wayége non féndunukén. ⁷Atin féntaus i Tuluse soy duniyae ni bé kébéréh ne inok amuk gégumah i gaiy kékukum i Tuluse, binasané no bé aféyey ni duniya brab de békén do méngintulus do étew.

⁸Endob i de begom do gulaané ku do dumo gu, kagom lifotén i ni: Dob antaf fédew i Tuluse, i ségétérésangane maak séngibu gébélintuwa, atin i séngibuwé gébélintuwa maak ségétérésangan saén. ⁹Mélaw énda toow i kéfégitung i de étew bé métana kun i kétumay Kadnane bé fasad ne séfule mangéy dini. Yamula tingkéloy Kadnane saén begom, non énda damén méuyotén kémukum fiyon ségétew. Yamula méuyot de ké tagakéy kéluhanay de étew i de sala ro.

¹⁰Gido loo, i kégumah i gaiwe séfule i Kadnane ségiléw bé kégumah i ménakawe non métékow i kégumah ne énda gétigay de étew de. Atin bé béo gai, tékow méalfa i lawaye bé lalae wén i toow fo mékégilak dégu. Atin i kéluhanay de éntingayén dob lawayo diyo, métuwégi brab mébinasa. Atin méalfa soy duniyae ni brab kéluhanay de éntingayén de. ¹¹Atin non mébinasay kéluhanay de ni moso loo bé ni, fatut métintu tom atin modor tom bé kétayay Tuluse. ¹²Non ongot-ongoté tom i gaiwe kémukum i Tuluse. Mélaw fatut rigoné tom i tamay gagané tome inok magad gégumah. Bé béo gai, métuwégi brab mébinasay lawayo diyo, atin mélagang i kéluhanay éntingayéne sabaf bé kééduf ne. ¹³Endob i betome, ongot-ongoté tom i fénasad i Tuluse betom, sani mantuwe laway brab mantuwe duniya. Diyo bati i de métintu do étew.

¹⁴Mélaw do dumo gu, i lala tome ongot-ongot bé nan gai, fatut fo rémigo tom saén fiyo inok énda i téboéy Tuluse betom, atin énda mélaw mékeritén betom. ¹⁵Kagom lifotén i funay Tuluse témingkélon betom, non iraya no betom gai inok méfukas tom dob de sala tom. Been soy niy atag i sulat i gulaané tome dumo tom Pablo dob begome. Fénggétigay Tuluse de. ¹⁶Been i niy démoyune fégétiga no begom dob kéluhanay de sulatén fantag bé kékukum i Tuluse. Atin wén soy do dumo bé de kétoro dob de sulatén toow fo mérégén gésobuton. Atin i de dumo do étew énda i gétiga-tiga ro, toroé roy békéne katabawan atag i de sulat Pablo. Loo so bé niy rénigo ruwe bé de ségiyo do Ménsulat Kébéréh i Tuluse. Mélaw been i niy funa ruwe mébinasa.

¹⁷Endob i de begom do dumo gu, gétiga komén i de ni. Mélaw ingat gom inok énda géunur gom bé de békén katabawan do kétoro i de étew do énda modor ro bé de sugu i Tuluse. Non amuk énda mingat gom, gésésuway gom bé toowe kétoro nunuro kom. ¹⁸Fatut fo minut waléy méégét i kéunur gome sabaf bé kétayakuf gome bé kégédaw i Tuluse brab kégétiga kome bé Kadna tome Jesu Kristo, sani mémukase betom dob de sala tom. Médayéw fo damén béléewe ni taman sa taman. Amen!

Pedro

I Sunguwe Sulat Juane

Ay niy sébaane bé de sénulat Juan, sani ségétéwe bé de kuyug Jesus brab dumo no amun dini séna dob duniyae niy Jesuse. Sénulat Juaney ni sulat dob de kéluhanay de munur bé Kristowe.

Dob ni sulat, ténero Juane bé fatut ségédaw i de munur bé Kristowe.

1 ¹Sulata key begom fantag bé Kristowe, sani miraye bé umule magufusa. Wénén i Kristowe tidéw féganay. I Beene tintu énggito gey, brab énggelingoo key i kékérén ne, atin énggékuwaha key i lowoh ne. ²Amun méntefégitoy Jesu Kristowe dob duniyae ni, énggito gey. Mélaw ureté key dob begomey fantage bé Beene. Been i fédawéténé “Umul Magufusa”. Been i dumoy Abaye Tulus atin ménwaléy kéilawan méntefégitoy dob begeye. ³Ureté key dob begomey fantage bé énggito geye brab énggelingoo keye inok géunur gom de so inok waléy tom sédumon sabaf bé késédumo tome bé Abaye Tulus brab Nga ne Jesu Kristo. ⁴Sulaté key i ni inok toow fo méégét i kéoror tome de.

⁵Ay niy kéurete bénréh i Nga i Tuluse begey atin bérhé key dob begome: I Tuluse maak Solo réméndaw, atin énda i délémon dob Beene. Non toow fo fiyoy Tuluse, énda i tete dob Beene. ⁶Mélaw amuk bérhé tom dumo tom i Tuluse, éndob tete sénay de adat tom, témugi tom. Témugi tom dob de kékérén tom brab dob de rigoné tom so. ⁷Endob amuk fiyoy adat tome ségiléw bé kéfiyoy Tuluse, sédumon tom brab malinis tom dob adafay Tuluse non mécédan i séngae sala tom sabaf bé kéléhu Jesuse Nga i Tuluse dob kruse.

⁸Amuk bérhé tom énda i sala tom, tugio tom saén i de lowoh tom, énda munur tom bé toowe kétoro. ⁹Endob amuk fayagé tom i de sala tom dob Tuluse, fésagadé no betom bé de sala tom atin lirisé no betom dob kéluhanay de tete adat tom. Rigoné noy ni non i Beene métintu brab tumané noy fasad ne betom bé fésagadé no betom. ¹⁰Endob amuk bérhé tom énda i sala tom, maak fédawéténé tom i Tuluse ségétew témugi, atin énda munur tom bé kékérén ne.

2 ¹I begome maak do gulaané ku do nga gu, sulaté kuy ni dob begome inok énda rémigo gom sala. Endob amuk wén i gésala betom, wén

i métintiuwe kéfédéwa tom dob adafay Tuluse, sani Jesu Kristowe. ² Atin i Jesu Kristowe ni, Beeney tulake fégékédan bé de sala tom. Atin békén saén i de katom do sala, éndob loo soy de sala i kéluhanay de kéilawan.

³ Amuk modor tom bé de sugu i Tuluse, gétiga tom betom i de dumoy Tuluse. ⁴ Endob amuk wén i ségetéw émbéréh mano, “Begéney dumoy Tuluse”, éndob énda modorén bé de suguén, toow fo tugién i ni étew brab énda munurén bé toowe kétoro. ⁵⁻⁶ Endob i étewe modor bé kékéréh i Tuluse, tintu fo méégét i kékéimu ne bé Tuluse. Non i étewe bérhé no dumo noy Tuluse, fatut iringé noy adat Jesu Kristowe. Amuk rigoné tom i ni, gétiga tom dumoy Tuluse betom.

⁷ Do gulaané ku do dumo gu, békén mantu sugu i ni sulaté ku dob begome. Yamula tafayén i ni sugu énggelingoo kom tidéw féganay. Been i niy sugue ténoréo betom bé fatut tom ségedaw. ⁸ Gido loo, maak mantu séna niray Jesusey ni sugu dob betome. Atin i Kristowe brab begome modor gom bé ni sugu. Gétiga kuy ni non béleewe ni minutén mékédan i délémone atin réméndaw i tintuwe solo, sani Jesu Kristowe.

⁹ Amuk wén i ségetéw étew émbéréh munur kun bé Jesu Kristowe, éndob mérarék bé dumo nuwe, bati séna dob délémone, non énda tintu no munur. ¹⁰ Endob i étewe mégédaw bé dumo nuwe munur, beeney tintuwe munur bé Kristowe. Atin énda i rigoné no funay dumo nuwe gésala. ¹¹ Endob i étewe mérarék bé dumo nuwe, énda toow i kéunur ne bé Jesu Kristowe atin maak magéw dob délémone. Enda gétiga noy ayo nuwe non maak langafén non énda munurén bé Jesu Kristowe.

¹² Do nga gu, sulata ku begom non ménfésagadén i de sala gom sabaf bé Kristowe. ¹³ I de begom do lukés, sulata ku begom non énggélolo gomén i Kristowe ménwénén tidéw féganay. I de begom do ménguwéd séna, sulata ku begom non tétabana komén i Satanase.

¹⁴ I de begom do nga, sulata ku begom non ménwaléy gom sédumon bé Abaye Tulus. I de begom do lukés, sulata ku begom non ménwaléy gom sédumon bé Kristowe, sani ménwéne néni tidéw féganay. I begome do ménguwéd do étew, sulata ku begom non émbagér i kéunur gome, atin énda mékédan i kékéréh i Tuluse tidéw dob itunga kome, atin tétabana komén i Satanase.

¹⁵ Kagom féimuén i de tete do éntingayén taloo no do tete adat dob duniyae ni. Non amuk féimué kom i de tete do éntingayén dob fantade ni, énda féimué kom i Abaye Tuluse. ¹⁶ I kéluhanay de tete dob duniyae ni, békén tidéw dob Abaye Tulus. Yamula tidéw dob fantade niy tete loo bé de tete kétayay de lowoh i de étew, brab de kéingar, brab de kéfélangka-langka. ¹⁷ Endob i duniyae ni, méalfa moso, loo soy de tete do éntingayén kétayay de étew. Endob i de étew rigoné roy kétayay Tuluse, méuyag ro taman sa taman.

¹⁸ Do nga gu, gédétén i tamfadane. Enggélingoo komén i kégumah i ségétewe étew moso féndawét “Sébanil bé Kristowe”. Atin béeewe ni wénén i do énggumah do étew do sébanil bé Kristowe. Mélaw gétiga tomén gédétén i tamfadane. ¹⁹I de ni do étew sébanil bé Kristowe, békén ro do tintu dumo tom munur bé Kristowe. Atin been i niy funa ruwe téménagak betom. Amuk do tintu ro do dumo tom, énda damén ténaagak ro betom. Endob sabaf bé kétagak ruwe betom, énggétiga tom békén ro do tintu dumo tom munur bé Kristowe.

²⁰ Endob i de begom, fénemanduo Kristowe begom bé Rémogor i Tuluse. Atin mélaw gétiga kom kéluhanan i toowe kétoro. ²¹ Mélaw i funa kuwe sémulatan begom békén sabaf bé énda gétiga kom i toowe kétoro. Yamula sabaf bé kégétiga kome de, atin gétiga kom soy énda i tugi dob toowe kétoro.

²² Ati mélaw i témuigie? I témuigie, beeney émbéréhe bé békén kun Kristoy Jesuse. Been i niy étewe tintu fo sébanil bé Kristowe non miká bé Abaye Tulus loo so bé Nga ne Jesus. ²³ I étewe miká bé Nga i Tuluse, miká so bé Abaye Tulus. Endob i étewe munur bé Nga i Tuluse, munur so bé Abaye Tulus.

²⁴ Mélaw, kagom témerén munur bé Urete énggélingoo komén bé do gétah. Non amuk énda témerén gom munur bé ni kétoro énggélingoo komén bé do gétah, gétaus gom sédumon bé Abaye Tulus brab Nga ne Jesu Kristo taman sa taman. ²⁵ Non been i niy umule magufusa fénasad Kristowe irayén betom.

²⁶ Sulata ku begom inok géingata kom i de étew télamané ro begom féunurén bé békéne toow kétoro. ²⁷ Endob i de begom, iraya Jesu Kristowe begom témantu bé Rémogor ne. Atin amuk bati i Rémogor ne dob de fédew gom, énda mélaw kailanga kom i témoree begom. Non i Rémogor ney témoree begom bé kéluhanane. Atin toroe noy toowe, békén i tugie. Mélaw odoro kom i kétoro i Rémogor ne, atin kagom tagakén i Kristowe.

²⁸ Mélaw do nga gu, kagom tagakén i Kristowe inok énda mégilak gom taloo no mémala gom de dob gaiwe séfule moso. ²⁹ Gétiga tomén métintuy Kristowe. Mélaw fatut gétiga kom soy kéluhanay de rémigo bé métintuwe, beroy de nga i Tuluse.

3 ¹Fégitung gom, i Abaye Tulus toow fo gulaané no betom! Non féndawétén betom do ngaén. Atin i toowe, ménwaléy tom mon do ngaén. I funay de étew sébanil bé Tuluse énda gélolo ro betom do nga i Tuluse, non énda so gélolo roy Tuluse. ²Do gulaané ku do dumo gu, ménwaléy tomén do nga i Tuluse. Endob énda séna gétiga tom de ké ati moso i kewaléyo tome. Endob gétiga tom i ni: Amuk séfule i Kristowe, waléy tom loo bé Beene, non gito tom moso i tintuwe fo falasén. ³Mélaw, i kéluhanay de ongot-ongot bé késéfule Kristowe, fatut démoyun ro rémigo fiyo loo bé kéfiyo Kristowe.

⁴Amuk wén i ségétew réménigo sala, fénlisén i kukumay Tuluse, non i atag i salae, been i kékélise bé kukumay Tuluse. ⁵Gétiga komén ménwaléy kéilawan i Kristowe inok kédané noy de sala i de kéilawan. Atin énggétiga kom soy énda i sala Kristowe, fiyon sébaan. ⁶Mélaw i kéluhanay de dumo Kristo, énda fakayén ké taus ro rémigo sala. Endob i étewe démoyun rémigo sala énda séna gélolo noy Kristowe brab énda séna munurén de.

⁷Do nga gu, kagom fédayaén i de étew émféunur begom bé tugie kétoro. Ay niy toowe kétoro: I de étew rémigo ro fiyo, beroy de métintu do étew ségiléw bé kéintu Kristowe. ⁸Endob i de étew démoyun rémigo sala, beroy de kuyug Satanas. Non i Satanase tidéwén féganay i kérigo nuwe sala. Atin i Nga i Tuluse ménangéy dob duniyae ni inok kédané noy teteet galbék Satanase.

⁹I de étew ménwaléy do nga i Tuluse, énda démoyun ro rémigo sala non ménwaléy ro miring bé adat i Tuluse. Enda fakayén démoyun ro rémigo sala non Tulus i Abay ruwe. ¹⁰Endob i de étew énda mégédaw ro bé dumo ruwe, békén beroy de nga i Tuluse. Been i niy fégélonone bé de nga i Tuluse brab de nga Satanas.

¹¹Fatut tom ségédaw. Been i niy kétoroe énggélingoo komén tidéw féganay. ¹²Enda fatutén iringé tom i étewe féndawét Kain. Non beeney ségétewe kuyug Satanase, atin fénléhuén i tuwaréy ne Abel. Atin i funa nuwe ménméléhu bé tuwaréy ne non métintuy rigonéy tuwaréy ne, éndob i beene tete i kaane rigoné.

¹³Mélaw do dumo gu, kagom mégaif de amuk mérarék begom i do étew sébanil bé Tuluse. ¹⁴Gétiga tom i ni: I de kéilawan méuyag ro taman gérumah i gaiwe méléhu ro. Endob békénén loo bé niy betome, non énggédot tomén i umule magufusa. Mélaw fiyon fo ké méléhu tom dob duniyae ni, méuyag tom so dob lawayo. I funa tome gétigan bé ni non mégédaw tom bé dumo tome. Endob i de étew do énda mégédaw ro, méléhu ro fo toow. ¹⁵Amuk wén i étew mérarék bé dumo nuwe, i ni étew ségétew ménméléhu étew dob kékégitung i Tuluse de. Atin gétiga tom i de méméléhu do étew énda séna énggédot roy umule magufusa. ¹⁶I funa tome gétigan bé atag i “kégédawe” non féndaya Kristowey de étew ménméléhu de bé kégantino nuwe betom inok kédané noy de sala tom. Mélaw fatut iringé tom soy rénigo nuwe. Iray tom soy férénawa tome fégétabang tom bé de dumo tom. ¹⁷Ufama, wén i ségétewe kawasa, atin gito noy dumo nuwe méskinan médooy foy kailanga nuwe. Endob amuk énda méuray i na nuwe de atin énda tabanga no de, giton énda tintu no méimu bé Tuluse. ¹⁸Do nga gu, énda fatutén ké mégédaw tom saén dob de kékéréd tom saén. Non fatut fégito tom i kégédaw tome dob de fiyo rigoné tom. Been i niy tintuwe kégédaw.

¹⁹Mélaw amuk rigoné tom i ni, gétiga tom bé betom i de étew i tintuwe Tuluse. Atin éndaén mélaw mégilak tom bé Tuluse ké diyo tom dob adafa nuwe. ²⁰Fiyon fo ké fégitungé tom médait tom mékukum, gétiga tom mas na fo gétigan i Tuluse bé betome, non gétiga noy kéluhanane. ²¹Mélaw, do gulaané ku do dumo gu, gétiga tom énda i funa tom mégilak, atin mélaw géfèbaraw tom démasal dob beene. ²²Fiyon atiy ongoté tome dob Tuluse, irayén dob betome. Non odoro tom i de suguéen, atin rigoné tom i késuwata nuwe. ²³Atin ay niy sugu ne betom: Fatut munur tom bé Nga ne Jesu Kristo atin ségédaw tom loo bé sénugu Kristowe betom bé gétaho. ²⁴I de étew modor bé de sugu i Tuluse, bati ro dob Tuluse, atin i Tuluse bati so dob de fédew ro. Atin gétiga tom bati i Tuluse dob de fédew tom non nirayén betom i Rémogor ne.

4 ¹Do gulaané ku do dumo gu, kagom munur bé kéluhanay de étew émbéréh ro fénémanduoy Rémogor i Tuluse kun bero. Yamula téngkad gom bero inok gétiga kom ké tidew dob Tulusey rémogore taloo no békén. Non wén i médo do étew ubo-ubo sénarigoy Tuluse muret bé kékéréh ne, atin ménangéy ro dob de médo do ingéd dob duniyae ni. ²Atin wén i fégéolonon de inok gétiga kom i tidéwoy rémogore de. Amuk fayagéy ségétéwe étew i Jesu Kristowe ménwaléy kéilawan, Rémogor i Tuluse bé bénoy ménémanduone de. ³Endob i de étew bérhéh ro énda kun ménwaléy kéilawan i Jesuse, énda bati i Rémogor i Tuluse dob berowe. Yamula fénémanduoy rémogor i Ségétéwe étew Sébanil bé Kristowe. Enggelingoo komén i kégumah ne, atin bérhéh ku begom énggumahén dob duniyae ni béléewe ni.

⁴Endob i de begom, do nga gu, begom i de étew i Tuluse. Atin ténabana kom i de ubo-ubo sénarigoy Tuluse. Non i Rémogor i Tuluse bati dob de fédew gom mas na barakatan bé Satanase bati dob de fédew i de tete étew. ⁵I de ubo-ubo sénarigoy Tuluse, toroé roy tete. Atin i de tete étew dob duniyae ni fégélingoé ro bero non sébanil ro so bé Tuluse. ⁶Endob i de betom, do étew i Tuluse betom. Atin i de étew gélolo roy Tuluse, fégélingoé roy kétoro tome. Endob i de békén do étew i Tuluse, énda fégélingoé ro betom. Mélaw been i niy fégéolonone bé de étew fémanduoy Rémogor i Tuluse sani témoree bé toowe, brab i de étew fémanduo Satanase sani de témore bérugie.

⁷Do gulaané ku do dumo gu, fatut ségédaw tom non i kégédawe tidew dob Tuluse. I de étew mégédaw ro bé dumo ruwe, beroy de étew do ménwaléy do nga i Tuluse brab dumoy Tuluse bero. ⁸Atin i de étew énda mégédaw ro, beroy de énda séna géglolo bé Tuluse, non mégédaw foy Tuluse. ⁹Atin fénggitoy Tulusey kégédaw ne betom bé késugu ne bé buntunge Ngaén dob duniyae ni inok gédoté tom i umule magufusa sabaf bé Beene. ¹⁰Mélaw ay niy tintuwe kégédaw: Békén ké betom i

ménggédawe bé Tuluse. Yamula, Tulus i ménggédawe betom. Been i niy funa nuwe séménugu bé Nga ne dob duniyae ni inok féléhuén fégétulak inok émfésagad i de sala tom.

¹¹Do gulaané ku do dumo gu, amuk loo bé nan i kédakél i kégédaw i Tuluse betom, fatut fo ségedaw tom so. ¹²Enda i ségetéw énggégito bé Tuluse. Endob amuk ségedaw tom, bati i Tuluse dob de fédew tom, atin i kégédaw tome waléy toow fo dakél miring bé kaane kégédaw.

¹³Atin i Tuluse nirayén i Rémogor ne dob betome. Been i niy funa tome gétiga tom bati tom dob Tuluse atin i Tuluse bati dob de fédew tom.

¹⁴Atin i begeye do apostol, énggito gey i Nga i Tuluse brab de rénigo no. Mélaw ureté key i fantage bé késugu i Tuluse bé Nga ne dob duniyae ni inok fukasé noy de kéilawan dob de sala ro. ¹⁵I de étew fayagé roy Jesuse Nga i Tuluse, bati i Tuluse dob de fédew ro, atin bati ro dob Tuluse. ¹⁶Atin gétiga tom mélaw toow fo mégédaw i Tuluse betom. Mélaw gésarig tom de.

Non i Tuluse toow fo mégédaw. Atin i de étew do mégédaw, bati ro dob Tuluse atin i Tuluse bati dob de fédew ro. ¹⁷I Tuluse féwaléyé no tintu fo dakél i kégédaw tome inok énda mégilak tom bé gaiwe kémukum i Tuluse. Mélaw éndaén mégilak tom bé no gai, non ménwaléyén ségiléw i adat tome bé Kristowe. ¹⁸Enda i funa tom mégilak non mégédaw i Tuluse betom. Amuk toow fo mégédaw i Tuluse betom, mékédanén i funa tome mégilak. Non i funay de étew mégilak, been i kékukum i Tuluse. Mélaw i de étew mégilak, énda séna méégét i késarig ruwe bé kégédaw i Tuluse.

¹⁹I funa tome méimu bé Tuluse non férimu i Tuluse betom sungu. ²⁰Amuk wén i étew émbéréh mano, “Féimué kuy Tuluse”, éndob mérarék bé dumo nuwe, témugi. Non amuk énda féimué noy dumo nuwe gito no, ati kéfingé-fingé i kékéimu ne bé Tuluse énda gito no de? ²¹Mélaw ay niy sugue niray Kristowe betom: I de étew féimué roy Tuluse, fatut féimu ro so bé de dumo ro étew.

5 ¹I de étew munur bé Jesuse Beeney Kristowe, sani fénemili i Tuluse méguléw, beroy de ménwaléy do nga i Tuluse. Atin i de étew féimué roy Abaye Tulus, féimué ro soy de dumo ro nga i Tuluse. ²Atin amuk féimué tom i Tuluse brab odoro tom i de suguén, gétiga tom féimué tom soy de dumo tom do nga i Tuluse. ³Non amuk féimué tom i Tuluse, odoro tom i de suguén. Atin énda mérégén i kéodoro tome bé de suguén. ⁴Non kéluhana tomén do ménwaléyén do nga i Tuluse, gétabana tom i Satanase, sani méguléwe bé duniyae ni. Atin i funa tome gétabana tom i Satanase non bé kéunur tome bé Jesuse. ⁵Ati de étew gétabana roy Satanase? I de étew saén munur bé Jesuse Nga i Tuluse.

⁶I Jesu Kristowe sénugu i Tuluse mangéy dob duniyae ni. Gétiga tom i ni sabaf bé wayége brab dara ne. Non énda saén ménbautisén dob wayége, yamula réménanas soy dara ne amun ménkélabo dob

kruse. Atin i Rémogor i Tuluse fégétiga no betom toow i de ni, non i Rémogor i Tuluse démoyun bérhé noy toowe saén. ⁷Mélaw wén i télaw émféféngintoow fantag bé Jesu Kristowe: ⁸I sébaane de, been i Rémogor i Tuluse. Atin i sébaane de, been i kékautise bé Jesu Kristowe. Atin i sébaane de, been i kéranas i dara Jesuse bé kéléhu ne. Atin falan séfagayun i de ni do télaw. ⁹Munur tom bé kéuret i de étew saén, éndob mas na gérotori i kéuret i Tuluse funa tom tintu fo fatut munur. Atin nuret i Tulusey Jesuse Ngaén. ¹⁰Mélaw i de étew munur ro bé Nga i Tuluse, ménunur ro bé toow i kéuret i Tuluse. Endob i de étew énda munur ro bé Tuluse, maak fédawét roy Tuluse ségétew tugién. Non énda ménunur ro bé kékéréh i Tuluse fantag bé Nga ne. ¹¹Atin ay niy toowe kétoro fantag bé Nga ne. Niray i Tuluse betom i umule magufusa tidew dob Nga ne. ¹²I de étew ménwaléy do dumoy Nga i Tuluse, wén i umul ro magufusa. Endob i de étew énda ménwaléy ro do dumoy Nga i Tuluse, énda enggédot roy umule magufusa.

¹³Sulaté kuy ni dob begome do munur bé Jesuse Nga i Tuluse inok gétiga kom wénén i kagom bé umule magufusa. ¹⁴Enda mégilak tom démasal dob Tuluse non gétiga tom fégélingoé no betom amuk mongot tom bé ati kétaya nuwe irayén. ¹⁵Gétiga tom démoyun fégélingoé no betom ké démasal tom mongot dob Beene. Atin mélaw gétiga tom irayén betom fiyon fo ké ati ongoté tome dob Beene.

¹⁶Amuk wén i ségétew begom gito noy dumo nuwe énggésala, atin énda ménléhuén bé nan sala, fatut dasal gom dob Tuluse inok irayén i umule magufusa dob nan dumogom. Bérhéku begom i fantage bé de sala békén fégéléhu i étewe. Endob wén soy do sala funay de étew méléhu. Atin énda féginauné ku begom démasal fantag bé de ni. ¹⁷I kéluhanay de tete rigonén, sala. Gido loo, wén i do sala méléhu i de étew de.

¹⁸Gétiga tom i de étew do ménwaléy nga i Tuluse énda démoyun ro rémigo sala. Non i Jesuse Nga i Tuluse, diyagané no bero inok énda géférígono Satanase bero tete.

¹⁹Gétiga tom betom i de étew i Tuluse fiyon fo ké Satanas i méguléwe bé kéluhanay de étew sébanil bé Tuluse dob duniyae ni.

²⁰Gétiga tom ménangéy i Nga i Tuluse dob duniyae ni, atin fénggésobutén betom inok gétiga tom i toowe Tulus. Ménwaléy tom do dumoy toowe Tulus brab Nga ne Jesu Kristo. Been i niy tintuwe Tulus atin tidew dob Beeney umule magufusa.

²¹Do nga gu, kagom féngadafén i de kéninontow.

I Géruwowe Sulat Juane

Ay niy sébaane bé de sénulat Juan, sani ségétéwe kuyug Jesuse brab dumo no amun dini séna dob duniyae niy Jesuse.

Dob ni sulat, fénингat Juaney kéluhanay de munur fantag bé de tugién témodo.

¹Begéney lukése odoroy de munur bé Kristowe. Sémulatu mangéy dob beeme, sani libune fénemili i Tuluse brab dob de ngaém. Toow fo gulaané ku begom. Atin békén saén i begéney gémulaane begom, non i kéluhanay gétiгane bé toowe kétoro gulaané ro so begom. ²I funa keye gémulaan begom non munur gey bé toowe kétoro, atin énda mékedan i kéunur geye de taman sa taman.

³I Abaye Tulus brab Nga ne Jesu Kristo, mégédaw ro damén betom, atin méuray damén i na ruwe betom, atin iray ro damén i métanéke fédew dob betome. Mérigoi ni dob betome non munur tom bé toowe kétoro brab ségédaw tom fo toow.

⁴Toowu fo moror non énggétiga kuy de dumo bé de ngaém munur ro bé toowe kétoro loo bé sénugu i Abaye Tulus betom. ⁵Mélaw, Di, ongoté ku dob beeme bé fatut tom ségédaw. Békén mantuy ni sugu labité ku dob ni sulat. Yamula tafayén i ni sugu niray dob betome tidéw féganay. ⁶Non amuk ségédaw tom, modor tom bé de sugu i Tuluse. Atin ay niy sugue nirayén betom bé féganaye: Fatut tom ségédaw.

⁷Médooy de mégakar do témodo ménangéy dob de séségiyo-giyo do ingéd dob duniyae ni. Ténoro roy békén kun toow i Jesu Kristowe ménwaléy kéilawan. I de ni do étew témodoro bé ni, tintu ro fo tugién brab sébanil ro bé Kristowe. ⁸Mélaw ingat gom inok énda mésinggula i kélugoté kome gémalbék. Atin mélaw gédoté kom i kéluhanay baras gome tidéw dob Tuluse.

⁹I de étew témodagak bé toowe kétoro Jesu Kristowe atin ménunur bé ségiyowe kétoro, békén ro dumoy Tuluse. Endob i de taus munur bé toowe kétoro, beroy do dumoy Abaye Tulus brab Nga ne so. ¹⁰Mélaw amuk wén i géumah dob begome atin témodo bé ségiyowe kétoro bé kétoro Kristowe, kagom tayakufén de dob de lawi gom taloo no ségifaé kom. ¹¹Non amuk ségifaé kom i nan étew, géamung gom bé de tete galbékén.

¹²Médoou na damén i de kétaya ku béréhén dob begome, éndob énda méuyotu de sémulat. Yamula méuyotu damén mangéy témuakaw begom inok gésétengaang tom séuret-uret brab géséoror tom fo toow.

¹³I de nga i dumo muwe sétiman idéng libun fénemili i Tuluse, ségifaé ro so begom.

I Gétéléwe Sulat Juane

Ay niy sébaane bé de sénulat Juan, sani ségétéwe bé de kuyug Jesus brab dumo no amun dini séna dob duniyae niy Jesuse.

Sénulat Juaney ni sulat dob ségétéwe féndawét Gayo, sani ségétéwe so munur bé Jesuse.

¹Begéney lukése odoroy de munur bé Kristowe. Sémulatu mangéy dob beeme, Gayo. Beemey toowe fo gulaané ku dumo gu.

²Adih, démasalu dob Tuluse bé féfiyoné no beem brab iraya no beem fiyo kéglélowohon loo bé kéiray ne beem bé mégéte kéunur. ³Toowu fo moror amun énggumah i de dumo to munur bé Kristowe atin nuret roy fantage bé kéfedayday me munur bé toowe kétoro, loo soy adate nodoro mo bé ni toow kétoro. ⁴Toow fo dakél i kéoror guwe bé gélingoo kuy fantage bé kéodoroy de nga gu bé toowe kétoro. Been i funa kuwe moror béní, non énggélingoo kuy fantage bé beeme.

⁵Adih, i kétabanga muwe bé de dumo tom munur ménawet diyaan i fégéolonone bé toow i kéunur me. Non fiyon fo ké énda séna gélolo mo bero, tényakufém bero. ⁶I de begey do munur bati dini, amun ménlimud gey méngintulus, nuret i de ni do étew i kégedaw me bero. Atin amuk géawét ro man diyaan, fiyo ké tabanga mo man bero loo bé fatute mésuwat i Tuluse de inok gétaus ro magéw. ⁷Non i funa ruwe magéw inok légébé roy kétoro Kristowe. Atin énda tayakufé roy tabang i de étew do békén munur bé Kristowe. ⁸Mélaw i betome do munur, fatut tabanga tom i de ni do étew inok géamung tom bé galbék ruwe lémégéb bé toowe kétoro.

⁹Séménulatu sébaan foko sulat mangéy dob de munur diyaan, éndob énda féngélingo Deotrefesey kéféginau guwe. Méuyot de ké been saén i méguléwe bé de munur diyaan. ¹⁰Atin amuk géangéyu diyaan, ureté ku beem i kéluhanay de rémigo no, brab kéluhanay de tete tugi bénréhén fantag bé begeye. Atin békén saén i ni, non amuk géawét diyaan i de dumo tom munur, énda fo tayakufé no bero. Atin géléé noy de fiyo étew méuyot témayakuf bero, atin énda féahuré no dob lawie féngadafan i de étew témayakuf bero.

¹¹Adih, kago iringén i tetee adatén. Yamula iringém i fiyowe adat. I de étew rémigo fiyo, beroy de étew i Tuluse. Endob i de étew rémigo tete, beroy de énda séna gégélolo bé Tuluse.

¹²I kéluhanay de étew émbéréh ro fiyo fantag bé Demetriowe. I métintuwe adatén i émféféngintoowe bé i beene, fiyo fo étew. Been soy niy funa keye de démayéw. Atin gétiga mo toow i kéuret geye.

¹³Médoo fo damén i kéuyoto kuwe uretéen beem, éndob mikau de sémulat. ¹⁴Méuyotu damén ké géségito to bé magade ni inok géséténgaang to séuret-uret.

¹⁵Métanék damén i fédéw me. I kéluhanay de dumo to dini ségifaé ro beem. Ségifaém so begén i kéluhanay de dumo to diyaan.

I Sulat Judase

Judas i dawét i séménulate bé ni sulat, sani tuwaréy Jesu Kristowe. Sénulat Judasey ni sulat dob kéluhanay de munur bé Kristowe.

Dob ni sulat, fénингat Judasey kéluhanay de munur fantag bé de tugién témore.

¹Begéney Judase, sani dumo Santiagowe sétiman idéng, brab sugu-sugué Jesu Kristowe.

Sémulatu mangéy dob begome do étew fén-unur i Tuluse bé Jesuse. Begomey de étew kégédaway Abaye Tulus brab do diyagané Jesu Kristowe.

²Mégédaw damén i Tuluse begom, brab méuray damén i na nuwe begom, brab irayén damén begom i métanéke fédew.

³Do gulaané ku do dumo gu, bé gétahe, i toowe fo kéuyotu ku sulaté ku dob begome, been i niy fantage bé kéfukas Jesuse betom dob de salatom. Endob kailangan fo sulaté ku na métah i kéféginau guwe begom bé fatut fo fétaus gom i kéatuho kome bé de étew méuyot mégalin bé toowe kétoro niray i Tuluse. Non sénarig i Tulusey kétoro ne dob betome do étewén. Atin kailangan énda fo méfégalino. ⁴Kailangan fo féginauné ku begom lee non wén i do étew do békén méngintulus énggésélawék betom, éndob sékémé ro saén. Fégaliné roy toowe kétoro fantag bé kégédaw i Tulus tome. Non toroé roy fakay kun i de étew do rémigo bé de mékérésik do adat loo bé de rigoné ro, non énda kémukum i Tuluse kun non toow saén mégédaw. Atin béréhé ro békén kun Kadna tom i Jesu Kristowe brab békén kun Jesus i méguléwe betom. Endob ménrugayén ménbéréh dob Mén sulfate Kébéréh i Tulusey fantage bé kékukume bero.

⁵Gétiga komén i kéluhanay de ni béréhé ku begom. Gido loo, fefégétédém gu begom i ni: Bé do gétah, ténangéy i Kadnaney de Judio mésut tidéw Egípto, sani ingéde gono ro ménrifén. Endob amun énggésétron, fénléhu i Kadnaney de dumo bero sani do énda munur dob Beene. ⁶Fégétédém gom i de télaki bé do gétah. Amun méntfégérotor ro brab ténagak roy fatute gono ro, fén-angéy i Tuluse bero dob délémone brab nikétén bero bé sangkalie énda mékédano taman sa taman. Atin diyo béléewe ni fénongot-ongot i Tuluse beroy gaiwe mékukum ro fo toow.

⁷Fégétédém gom i de étew ménbati dob Sodoma brab dob Gomorah brab dob de ingéd gédét diyo. Ségiléw i rénigo ruwe bé de ni do télaki, non tete i de adat ro atin ménwaléy ro bakla. Mélaw kénukum i Tuluse bero bé kéfériyo ne bero dob gonoy aféye taman sa taman inok émféingat bé de ségiyo étew ké atiy mérigowe dob berowe ké ségiléw i de rigoné ro.

⁸Atin ségiléw so bé niy de tugién do témodo. Rigoné roy de toow fo mékérésik dob de karo do lowoh, atin béréhé roy odoro ro saén i kéfemandu i de téginéf ro. Endob mika ro modor bé de sugu i Tuluse atin féngirasé roy de barakatan do étew dob lawayo. ⁹Fiyon foy toowe fo gérotor télakiy Tuluse féndawét Miguel, énda rénigo noy loowe bé ni. Bé do gétah amun ménléhu i Moisese, méniséédél i ro Miguele bero Satanase fantag bé ati isuwe bero gégédot bé bangkay Moisese. Endob énda fo ménfébaraw i Miguele méngiras bé Satanase. Yamula ménbéréh saén mano, “Kadnan i gémlée beem.” ¹⁰Endob i de ni do tugién do témodo, féngirasé roy éndae gésobuto ro. Ségiléw ro bé de mérayar do binatang non énda i gétila-tiga ro saliyu bé de tete adat ro funa ro mébinasa.

¹¹Mékukum ro fo toow, non méniring ro bé adat Kaine, sani sunguwe ménméléhu bé gétaho. Atin méniring ro so bé adat Balaame, sani réménigowe bé békéne katabuwan. Non i de ni do tete témodo, rémigo ro tete inok gégédot ro kurta. Niring ro soy adat Korehe non rénigo noy sébanile bé Tuluse funa ro ménbinasa. ¹²Amuk sélimud gom inok mama gom brab méngintulus gom, mamung ro begom. Maak do mékérésik bérétik, non rigone roy tete do kétaya ro saén atin énda mon mémala ro de. Rigoné ro saén i de karo kétayan. Ségiléw ro bé de rawén énda muwit ro rana, atin faniréy réfuruhe saén. Atin ségiléw ro so bé de kayéw énda mégonok ro ké gai ro damén mégonok. Maak do ménrandutén do kayéw do mégangu. ¹³I de ni do tugién do témodo, ségiléw ro bé de dakél do bagél dob dogote ké wén i défuk, non i de tete do mékémala do rigoné ro, maak do mékérésik buro-buro dob rotor i wayége. Ségiléw ro bé de gitoon énda modor ro dob fatute aguwo ro, non tagaké roy toowe kétoro. Mélaw ténafoy i Tulusey toowe fo délémon gono ro méféri su taman sa taman.

¹⁴Atin i Enoke, sani géénéme katufuan tidéw dob Adame, nureténi i kébéréh i Tuluse sénarigén dob beene fantag bé de ni do étew mano, “Téngteng gom! Gégumah moso i Kadnane beroy firoye ngibu do télaki no, ¹⁵inok susiné noy de rénigoy kéluhanay de étew. Atin kukumé noy de békén méngintulus do étew do ménalsa non bé kéluhanay de tete rénigo ro brab kéluhanay de tete kébéréh ro bénréh ro sébanil bé Tuluse.”

¹⁶I de ni do tugién do témodo, démoyun ro butébutéd brab démowoy. Modor ro saén bé de tete kétaya ro. Atin do fébantug-bantug ro brab kémuwéy bé de étew inok mérigo saén i de karo kétayan.

¹⁷Endob do dumo gu, fégétédém gom i bénréh i de apostol i Kadna tome Jesu Kristo begom fantag bé ati mérigowe dob de gai moso.

¹⁸ Bénréh ro begom maro, “Amuk gégumahén i tamfaday de gai, wén i do étew démiyangka begom. Been i niy de étew odoro roy de tete kétaya ro sébanil bé Tuluse.” ¹⁹ Been i niy de étew émfésébanil begom. Odoro ro saén i de tete kétaya ro. Atin i Rémogor i Tuluse énda batién dob berowe. ²⁰ Endob i de begom do dumo gu, fétaus gom i késétabang gome inok méégét i kéunur gome bé kétoroe tidew dob Tuluse. Atin fédaya gom i barakatane Rémogor i Tuluse tétabangan begom démasal. ²¹ Atin fétaus gom i kétanggaf gome bé kégédaw i Tuluse bé lala gome ongot-ongot bé kéirayay Kadna tome Jesu Kristo betom bé umule magufusa sabaf bé kéuray i na nuwe betom.

²² Atin fatut mégédaw gom bé de étew ruwo-ruwoy fédew ruwe munur. ²³ Tabanga kom i de ségiyo étew inok énda mélukum ro, maak fégayasé kom bero fégawitén tidew dob aféye. Atin fatut mégédaw gom bé de ségiyo étew. Endob fatut mérarék gom bé de mélkérésik do adat ro atin ingat gom inok énda géiring gom bero.

²⁴ Toow tom fo fésalamat bé Tuluse. Beeney gétabange betom inok énda gésala tom, atin Been soy géuwite betom dob adafa nuwe. Atin bé béo, mélédan i de sala tom brab moror tom bé lala tome gérito bé réndaw ne. ²⁵ Dayewé tom fo toow i Tuluse fénagéw dob Kadna tome Jesu Kristo. Tulusey mémukase betom dob de sala tom. Beeney barakatane mélkuléw atin kaan i kéluhanay aturane tidew féganay taman sa taman. Amen.

Judas

I Kéfégétiga Jesu Kristowe bé Juane

Ay niy sébaane bé de sénulat Juan, sani ségétéwe bé de kuyug Jesus brab dumo no amun dini séna dob duniiae niy Jesuse.

Sénulat Juaney ni sulat dob de fitew timan simbaan dob dakéle ingéd Asia. Dob ni sulat, nuret Juaney fantage bé ati fenténgteng i Tuluse dob beene dob téginéfe. Binuwaya i kédoonoy ni sulat atin fantag so bé ati mérigowé moso. Fénggétigay Tuluse bé Juane bé tabanay Tulusey Satanase moso atin rigoné moy mantuwe duniya brab laway gonoy de munur bé Kristowe bati sétifon bé Tuluse.

1 ¹ Been i niy librowe fantag bé kéfégétiga Jesu Kristowe. I Tuluse sénarigén dob Beeney ni inok fégétiga no dob de sugu-suguéy Tuluse ké atiy mérigowé énda mérugayén tidew béní. Fénggétiga Kristowey ni bé késugu ne bé de télaki no mangéy dob begéne, sani sugu-sugué nuwe féndawét Juan. ² Atin i begéne, sulaté kuy kéluhanay de énggito gu. Mélaw i ni libro, been i niy kékéréh i Tuluse brab toowe kétoro Jesu Kristowe. ³ Toow fo moror i étewe masa bé ni libro, atin moror soy de mégélingo bé ni uret tidew dob Tuluse atin modor bé ni kékéréh. Non éndaén mérugayén métuman i ni uret.

⁴⁻⁵ Begéney Juane, atin sulaté ku dob begomey de fitew lumfuk do munur dob de fitew timan ingéd dob sakuf i dakéle féndawét Asia.

I Tuluse brab Rémogor ne brab Jesu Kristowe, mégédaw ro damén begom atin irayén damén begom i métanéke fédéw. I Tuluse, ménwénén tidew féganay, atin wén so béleewe ni, atin énda mékédano taman sa taman. Atin i Rémogor i Tuluse bati dob adafay Tuluse atin wén i fitew fiman barakatén. Atin i Jesu Kristowe, mésarigon i kékéréh ne. Beeney Nga i Tuluse loo soy sunguwe méntébule inok méuyag taman sa taman. Been soy méguléw bé kéluhanay de méguléw dob duniiae ni.

Mégédaw foy Jesuse betom. Atin fénukasén betom dob de sala tom bé kéléhu ne dob kruse. ⁶ Atin fénwaléyén betom do fadi, atin Been i méguléwe betom. Rigoné tom i galbék i fadie méngadaf bé Abay ne Tulus. Mégédaw damén i Jesu Kristowe atin méguléw damén taman sa taman. Amen!

⁷Séfule moso i Jesu Kristowe giton gégumah dob de rawén. Atin gitoy kéluhanay de kéilawan, fiyon i de étew ménméléhu de bé do gétah. Atin i kéluhanay de étew dob duniiae ni, kémérew ro sabaf bé Beene. Mérigo damén. Amen.

⁸I toowe fo barakatan Kadnan Tulus, wénén tidéw féganay, atin wén so béleewe ni, atin énda mékédano taman sa taman. Bénréh i Tuluse mano, “I Begéne Alfa brab Omega, sani féganayane brab tamanane.”

⁹Begéney Juane, sani ségétéwe dumo gom munur bé Jesu Kristowe. Téménингkélu bé kéférasaye begén ségiléw bé kéluhanay de étew féguléwo Jesu Kristowe. I Begéne, sabaf bé kéuret guwe bé kébéréh i Tuluse brab kétoro guwe bé kéuret Jesuse, fén-angéyén begén fénbati maak férisu dob ni bungéd fénawé Patmos. ¹⁰Wén i no sébaan gai kéféngadaf bé Kadnane, fénémanduo Rémogor i Tuluse begén. Atin énggelingoo kuy métanuge béréh maak témburi tidéw dob ségang guwe. ¹¹Ménbéréh mano, “Sulatém i énggito muwe, atin féuwitém mangéy dob de ni do fitéw lumfuk do munur Begén do bati dob Efeso, Esmirna, Pergamo, Tiatira, Sardis, Filadelfia, brab Laodisia.”

¹²Tidéw béno méntékélidu inok téngténgé kuy ni émbéréh dob begéne. Atin énggito guy fitéwe timan bélowan solo. ¹³Atin wén i ségétéwe téménindég dob kérara i de fitéw ni timan solo. I falas ne maak kéilawane. Métaah i kégal ne taman dob de sékéyén. Atin lénégétén i bélowan dob kuméng ne. ¹⁴Toow fo fute i buk ne maak fute safut, atin i de moto no maak rino aféy. ¹⁵Atin i de sékéyén sémélínang maak galang métunag dob aféye. Atin i béréh ne maak érok samfaw. ¹⁶Atin wén i fitéw timan gitoon génamak i kuwonone kémérén. Atin wén i sundang mésut dob ba ne maak dila. Atin i ni sundang, murém i de baén sébalabala. Atin toow fo géfékaya i rangih ne maak térésang ké géutuh. ¹⁷Amun énggito guy ni étew, méntéléngkébu dob adafa nuwe maak ménléhuun. Endob nahayén i kuwonone kémérén dob begéne atin ménbéréh mano, “Kago mégilak. Begéney féganayane brab tamanane. ¹⁸Begéney méuyage. Ménléhuu, éndob méntébuleu, atin méuyagu taman sa taman. Wén i atura ku méguléw bé kélhéue brab gonoy de ménléhu. ¹⁹Mélaw sulatém i de énggito mo, sani de mérigo béléeve ni brab de mérigo moso. ²⁰Béréhé ku beem i atag i de fitéw timan gitoon gito mo dob kuwonone kémér gu brab atag i de fitéw timan do bélowan solo. I de fitéw timan do gitoon, beroy de maak télaki bantaya roy de fitéw lumfuk do munur. Atin i de fitéw timan do solo, beroy de maak do fitéw lumfuk do munur.”

Efeso

2 ¹Atin féntaus Kristowey kékéréh ne mano, “Sulatém dob télakiy Tuluse démiyaga bé de munur bati dob ingéde Efeso mamo, ‘Ay

niy kébérén Jesuse. Begéney gémamake bé de fitéw timan gitoon dob kuwonone kémér gu brab magéwe dob kérara i de fitéw timan bélowan solo.² Gétiga kuy de rigoné kom, atin gétiga ku mégéror gom gémalbék brab gétiga kuy kétingkél gome. Atin gétiga ku so mika gom sélawék bé de tete étew. Atin ténengkad gom i de étew béréhé ro do apostol ro kun funa kom énggétigan bé békén ro do tintu apostol. Atin gétiga kom tugién i kétoro ruwe.³ Atin gétiga ku so témingkél gom bé kéférasay i de étew begom sabaf bé kéunur gome Begén. Atin fiyon fo ké mérasay gom, énda mékedan i kéunur gome.⁴ Gido loo, wén i téboé ku begom. Béleewe ni, éndaén féimué kom Begén loo bé do gétah.⁵ Fégétédém gom i sunguwe kéimu gom Begén. Fatut gésénule gom brab tagak gom i de sala gom atin rigo gom fiyo loo bé do gétah. Non amuk énda rigoné kom i ni, mangéyu dob begome brab kédané kuy soloe tidéw dob gono nuwe.⁶ Endob wén soy fiyo rénigo gom kétaya ku. Non ménkérit gom bé de tete rigonéy de Nikolaita ségiléw bé kékérító kuwe bero.

⁷“ ‘Kéluhana kom, fégélingo gom i kébérén i Rémogor i Tuluse dob begome do munur.

“ ‘I de étew gétabana roy Satanase, iraya ku bero kuwagib mama bé onok i kayéwe miray bé umule magufusa, sani kayéwe dob bélowane fantad i Tuluse.’ ”

Esmirna

⁸ Atin féntaus Kristowey kébérén ne mano, “Sulatém dob télakiwe démiyaga bé de munur batí dob ingéde Esmirna mamo, ‘Ay niy kébérén guwe. Begéney féganayane brab tamanane. Ménléhuu éndob méntébuleu.⁹ Gétiga ku kérégénan gom. Gétiga ku méskinan gom. Gido loo, kawasa gom dob lawayo. Gétiga kuy de tete kébérén fantag bé begome bénréh i de étew béréhé ro do Judio ro. Endob békén ro do tintu Judio, yamula do étew Satanás ro.¹⁰ Kagom mégilak bé kéférasaye begom énda mérugayén tidéw béri. I Satanase, téngkadé no begom bé kékéférisu nuwe bé de dumo gom. Atin kérégénan gom bé foloe gétérésangan. Endob fatut fédidayday gom bé kéunur gome Begén, fiyon fo ké féléhué ro begom. Atin iraya ku mélaw begom lakay, sani umule magufusa.

¹¹ “ ‘I kéluhana come, fatut fégélingo gom i kébérén i Rémogor i Tuluse begom do munur.

“ ‘I de étew gétabana roy Satanase, énda mékukum ro bé géruwowe kéléhu.’ ”

Pergamo

¹² Atin féntaus Kristowey kébérén ne mano, “Sulatém dob télakiwe démiyaga bé de munur batí dob Pergamo mamo, ‘Ay niy kébérén guwe, sani wéne sundangén murém i de baén sébala-bala.¹³ Gétiga kuy Satanás

i méguléwe bé ingéd gome, gido loo ménfédayday gom munur dob Begéne. Atin énda téngak gom i kéunur gome fiyon fo ké fénléhu roy Antipase sani mésarigone muret fantag bé Begéne. Fénléhu ro diyaan dob ingéde féngguléwo Satanase.¹⁴ Gido loo, wén i de téboé ku begom. Non wén i do dumō begom modor bé kétoro Balaame bé do getah. Non i Balaame, téneroén i Balake émfésala bé de Judio bé kéféama ne bero bé amaéne ténulak dob de kéninontow. Brab téneroén bero bigaén.¹⁵ Atin loo so bé ni, wén i do dumō begom modor bé kétoro i de Nikolaita.
¹⁶ Fatut gésénule gom brab tagak gom i de sala gom. Amuk énda, mangéyu dob begome énda mérugayén tidéw béní brab tibohé ku begom béní sundange mésut dob ba guwe maak dila.

¹⁷“I kéluhana kome, fatut fégélingo gom i kékéréh i Rémogor i Tuluse dob de munur.

“Dob de étew gétabana roy Satanase, iray gu beroy amaéne féndawét mana nitong dob lawayo diyo. Atin iraya ku soy séngae ségétew bero béní futee batéw. Atin dob séngae sébaan batéw wén i ménsulate de mantu dawét énda i gégélo de saliyu béní étewé gégédot béní ni batéw. Bero saén i de gégélo de.”

Tiatira

¹⁸ Atin fentaus Kristowey kékéréh ne mano, “Sulatém dob télakiy Tuluse démiyaga béní de munur bati dob Tiatira mamo, ‘Ay niy kékéréh guwe, sani Nga i Tuluse. Mérino i de moto gu maak aféy atin sémelinang i de sékéy gu maak galang métunag dob aféy. ¹⁹Gétiga kuy de rigoné kom, brab kégédaw gome, brab kéunur gome, brab de galbék gom, brab de kétungkél gom. Atin gétiga ku so toow na fo fiyoy de rigoné kom béléewe ni béní do gétah. ²⁰Gido loo, wén i téboé ku begom. Wén i libune féndawét Jesebel, sani ménbéréhe been kun i sarigoy Tuluse muret. Atin féndaya gom i ni libun témo ro béní bigae dob de kuyug gu brab fénamaén bero béní de amaén ténulak dob adafay de kéninontow. ²¹Téningkélo ku, brab niraya ku gai inok gésénule brab tagaké noy ni tete rigoné no. Endob mika fo témagak béní de ni do tete rigoné no. ²²Mélaw fédéruuné ku inok énda géétekén tidéw dob iroo nuwe, loo soy de dumō no ménsebiga. Rigoné kuy ni béléewe ni, amuk énda tagaké roy de tete rigoné ro. ²³Atin féléhué ku soy de kuyugén. Tidéw béní, i de munur dob kéluhanay de ingéd, gétiga ro mélaw i Begéne, gétiga kuy kéfégitung i kéluhanay de étew brab de kétaya ro. Atin iray gu moso i fatute dob séngae ségétew étew sabaf béní de rigoné no.

²⁴“Endob médoor gom dob Tiatira, énda ménodor gom béní tete kétoro. Atin énda gétiga kom i de féndawét do ménalém kétoro Satanase. Atin mélaw énda umana kuy kékérégéna kome. ²⁵Endob fatut féeégét gom i kéunur gome taman séfuleu. ²⁶Atin dob de étew gétabana roy Satanase

atin modor ro bé kétaya kuwe taman dob tamanane, iray gu beroy aturane méguléw bé de ingéd dob duniyae ni. ²⁷Iray guy ni aturan non i Abay guwe Tulus nirayén so dob Begéne. Atin émbagér i kéféguléw ruwe, atin énda i géatuh bero. ²⁸Atin iray gu so dob berowey solo mubode.

²⁹“ ‘I kéluhana kome fatut fégélingo gom i kékéréh i Rémogor i Tuluse dob de munur.’ ”

Sardis

3 ¹Atin féntaus Kristowey kékéréh ne mano, “Sulatém dob télakiwe démiyaga bé de munur bati dob Sardis mamo, ‘Ay niy kékéréh guwe, sani gémamake bé Rémogor i Tuluse wén i fitew timan barakatén brab do fitew timan gitoon. Gétiga kuy de rigoné kom. Atin gétiga ku so médooy étewe émbéréh bé wén kun i umul gom magufusa. Endob énda toowén, non énda gitono dob de rigoné kom. ²Mélaw, tékénal gom! Atin fébagér gom i kéunur gome, non amuk énda, mékedan. Non gétiga ku kulang sénay adat gome funay Tulus guwe énda mésuwatén. ³Fégétédém gom i ténoroe néen begom brab nunuro kome néen bé do gétah. Odor gom de brab fatut gésénule gom atin tagak gom i de sala gom. Non amuk énda gésénule gom, mangéyu dob begome bé gaiwe énda karangé kom de, loo bé kégumah i ménakawe. ⁴Endob wén soy do dumo begom dob Sardis, énda dénungiso roy de kégal ro, sani de énda ménamung dob de tete adat. Mélaw géodor gom Begén kémégal fute non médait gom de. ⁵I kéluhanay de gétaban bé Satanase, fékégalé ku bero fute loo bé ni, atin énda kédané kuy de dawét ro tidew dob librowe sénulata ku bé de dawét i de étew gégedot bé umule magufusa. Atin béréhé ku dob téngaangay Abay guwe Tulus brab de télaki no, bé beroy de kuyug gu.

⁶“ ‘Kéluhana kom, fatut fégélingo gom i kékéréh i Rémogor i Tuluse dob de munur.’ ”

Filadelfia

⁷Atin féntaus Kristowey kékéréh ne mano, “Sulatém dob télakiwe démiyaga bé de munur bati dob Filadelfia mamo, ‘Ay niy kékéréh guwe, sani mékétéfuwe brab toowe. Wén i atura ku méguléw loo bé kéféguléw Datu Dabide bé do gétah. Atin amuk féahuré kuy ségétéwe étew dob kéféguléw guwe, énda i gélang de. Atin amuk énda féahuré kuy ségétéwe étew, énda i géféahur de. ⁸Gétiga kuy de rigoné kom. Atin fiyon fo ké énda médooy gom, ménfedayday gom munur Begén brab ménodor gom bé kétoro guwe. Mélaw ungkaé kuy bengawane fingé dob begome inok géahur gom, atin énda i géfintu de. ⁹I de étew do émbéréh do Judio ro kun, tugién ro non beroy de kuyug Satanas. Félingkuwédé ku bero dob adafa kome, atin gétiga ro mélaw mégédawu begom. ¹⁰Sabaf téméninkél gom loo bé sénugu guwe, diyagané ku begom inok énda gésugsug gom

dob de mérégén do gai gégumah moso dob duniyae ni fégétengkad bé kéluhanay kéilawane.¹¹ Séfuleu énda mérugayén tidéw béni. Lékafit gom dob toowe kétoro unuro kom inok énda métadin i barase iray gu begom.¹² I de étew gétaban bé Satanase, féwaléyé ku bero do maak liléy i lawi i Tuluse atin éndaén tagaké ro de. Atin sulaté ku dob berowey dawét i Tulus guwe, brab dawét i ingéd i Tuluse, sani mantuwe ingéd féndawét Jerusalem mélus moso tidéw dob Tuluso dob lawayo. Atin sulaté ku so dob berowey mantuwe dawét gu.

¹³ “I kéluhanana kome, fatut fégélingo gom i kékéréh i Rémogor i Tuluse dob de munur.”

Laodisea

¹⁴ Atin féntaus Kristowey kékéréh ne mano, “Sulatém dob télakiwe démiyaga bé de munur bati dob Laodisea mamo, ‘Ay niy kékéréh guwe, sani féndawéte “Amen” non toow i kékéréh guwe funay de étew gésarig. I Tuluse fénlimbagén Begén i kéluhanane.¹⁵ Gétiga kuy de rigoné kom. Enda mon méduf gom brab énda mon mélégénéy gom, sani de békén kuyug gu taloo no sébanil Begén. Endob toow fo damén méuyotu de ké méduf gom taloo no mélégénéy gom.¹⁶ Atin sabaf bé énda mon méduf gom taloo no mélégénéy gom, duraé ku begom tidéw dob ba guwe.

¹⁷ Béréhé kom makom, “Kawasa gey, wén gey bé kéluhanay kailanga keye.” Endob i toowe, mékégédaw-gédaw gom, éndob énda gétiga kom de. Non sabaf bé kékulang i kénéunur gome, maak do méskinan gom brab do félawas brab do langafén.¹⁸ Mélaw féginauné ku begom, béléy gom bé fiyowe bélownon, sani tintuwe kénéunur dob Begéne, inok waléy gom kawasa. Atin béléy gom so bé futee kégal sani métintuwe rigonén inok éndaén maak félawas gom mémala. Atin béléy gom so bé uwa motowe inok gégito gom.¹⁹ I de étew kégédawa ku, géléé ku brab fifité ku bero ké mésala ro. Mélaw fatut gésénule gom atin tagak gom i de sala gom.²⁰ Fégélingo gom, diyou dob bénaway lawi gome témawag. Amuk wén i gégélingo bé béréh guwe atin ungkaé noy fintue inok géahuru, mahuru atin sérénganu de mama.²¹ Dob de étew gétabana roy Satanase, iray gu beroy kuwagibé mésar dob sékulo kuwe amuk mésaru nén méguléw, ségiléw bé kétaba kuwe brab késar guwe dob sékuloy Abay guwe Tulus bé lala ne méguléw.

²² “I kéluhanana kome, fatut fégélingo gom i kékéréh i Rémogor i Tuluse dob de munur.” Been i niy bénréh Kristowe.

4 ¹Tidéw béno, wén man i fénggitoy Kadnane begén. Atin énggito guy fintue ménungka dob lawayo. Atin ménbéréh man i étewe ménbéréh dob begéne bé gétahe de. Atin ménbéréh man maak béréh témburi mano, “Enggon, nik go angéy dini, atin fégito gu beem i kailangane mérigo moso.” ²Sonom béno, fénagéw i Rémogor i Tuluse begén mangéy diyo.

Atin diyo dob lawayo, wén i saray datue. Atin wén i étew de ménsar diyo. ³Sémelinang i rangih ne loo bé de balilaga do batéw féndawét haspe brab kornalina. Atin wén i mélunéwe béluntu loo bé falas i balilagae batéw féndawét esmeralda géliwet dob sarane ni. ⁴Atin wén soy ruwo folo bra fot sara datu géliwét bé ni saran. Atin diyo ménsar i ruwowe folo bra fot do lukés odoron. Kéménégala ro fute brab wén soy do bélowan do lakay diyo dob de uléw ro. ⁵Atin tidéw dob sarane dob kérarae, mésut i kilote brab déguwe brab létee. Atin diyo dob adafay sarane ni, wén i do fitéw timan mérino solo. Beroy de fitéw rémogor i Tuluse. ⁶Dob adafay sarane ni, wén i maake dogot maak féngalungon non toow fo métiyéw.

Atin wén i fot gétew barakatan étew géliwét bé sarane ni. Atin ménféno motoy de lowoh ro dob de saréwo ro brab dob de ségang ro. ⁷I sunguwe de loo bé falas i binatange féndawét leon. Atin i géruwowe de maak falas i tuduwe safi. Atin i gétéléw ruwe maak falas i lagéye kéilawan i uléw ne, atin i géefot ruwe maak falas banug lémayang. ⁸I séngae ségétew bé de ni fot gétew étew barakatan, wén i do ném timan dofafak ro, atin i de lowoh ro ménféno do moto fiyon i fantad i defafak ro. Atin fuweh na kélungonon, énda témérén ro kémanta maro, “Mékétéfu, mékétéfu, mékétéfuy barakatane Kadnan Tulus. Wénén i Tulus tidéw féganay, wén so béleewe, atin énda so mékédano taman sa taman.”

⁹Atin i de ni do fot gétew do barakatan étew, kémanta ro dayewé ro brab bantugé ro brab fésalamat ro bé ménsare dob sarané ni, sani Tuluse méuyag taman sa taman. I lala ruwe rémigo bé ni, ¹⁰i de ruwo folo bra fot gétew do lukés odoron méntéduñsum ro dob adafay Tuluse, féngadafé roy Tuluse méuyag taman sa taman. Atin fédiyoé roy de lakay ro dob adafay saray Tuluse ni, atin émbéréh ro maro, ¹¹“Kadna key Tulus, Beem i médaite dayewén brab bantugén. Atin Beem i médaite máguléw brab bantugén. Non Beem i léménimbage bé kéluhanane, atin ménwén i kéluhanane béleewe ni sabaf saén bé kétaya muwe.”

5 ¹Tidéw man béno, énggito guy déniline sulat dob kuwonone kémér i ménsare dob saray Tuluse ni. Atin méntélén bé sulate sébala-bala. Atin wén i fitéw timan tandaén inok énda i géungka de. ²Tidéw béno, énggito guy barakatane téaki. Atin méntanug fo toow i kékérén ne mano, “Ati médaite kémédan bé de ni do tanda atin ungkaé noy ni sulat inok basané no?” ³Endob énda i ségétew étew médait géungka de taloo no gétengténg dob bukag ne, fiyon dob lawayo diyo taloo no dob fantade ni taloo no dob fantad i fantade. ⁴Atin kéménrewu fo toow non énda i ségétew étew giton géungka bé ni sulat taloo no gétengténg dob bukag ne. ⁵Tidéw béno, i ségétewé bé de lukés odoron ménbéréh dob begéne mano, “Kago kémérew. Téngténgém. I Jesuse, sani fédawéténé ‘leon’ séfu Judah, séfu Datu Dabid so. Beeney téménabanane bé Satanase atin wén mélaw i kuwagibén kémédan bé de fitéw tanda atin ungkaé noy ni sulat.”

⁶Tidéw béno, énggito guy Natiwe Bili-bili téménindég dob kérara i saray Tuluse ni. Atin sénliwétoy fote gétew étew barakatan brab do lukés odoron. Atin i Natiwe ni Bili-bili, énggito guy de falién fénggéléhuén bé do gétah. Atin wén i fitéwe sidungén brab fitéw timan moto no, sani fitéwe rémogor i Tuluse fénuwitén dob kéluhanay de ingéd dob duniyae ni. ⁷Atin i Natiwe ni Bili-bili, ménangéy fégédét brab éndotén i sulate ni dob kuwonone kémér i ménsare dob sarane ni. ⁸Bé lala ne rémigo bé ni, i de fot ni gétew do barakatan étew brab de ruwo folo bra fot gétew do lukés odoron, méntédunsum ro dob adafay Natiwe ni Bili-bili. Atin i séngae ségétew bero, wén i génamakén baatén féndawét alpa, brab génamakén soy bélwone biléw ménféno dukah, sani kédasal i de étew i Tuluse. ⁹Atin kéménanta ro mantu kanta maro, “Beem i médaite médot bé sulate ni atin médait go kémédan bé de tanda. Non fénléhuén Beem, atin daraém i fégébéléye bé de étew inok méfukas ro atin géséfule ro mangéy dob Tuluse tidéw dob séngae tribo, dob séngae késébéréh, brab dob séngae kélasi étew, brab dob séngae ingéd. ¹⁰Féguléwo mo bero brab fénwaléyém bero do fadi inok féngadafé roy Tulus geye. Atin fáfuguléwo mo bero moso dob duniyae ni.”

¹¹Tidéw béno, ténéngténg gu man ségule atin énggelingoo kuy béréh i de laksaén do télaki. Téménindég ro géliwét bé sarane ni brab de fot gétew do barakatan étew brab de lukés odoron. ¹²Atin kéménanta ro toow fo métanug maro, “I Natiwe Bili-bili fénléhuén médait fo dayewén brab bantugén. Atin toow fo barakatan, brab toow fo gétigan, brab toow fo kawasa, brab toow fo émbagér.” ¹³Atin énggelingoo kuy kantay kéluhanay de étew dob lawayo brab dob fantade brab dob fantad i fantade brab dob dogote, brab kéluhanay de étew dob kéluhanay de gonon. Kémanta ro maro, “I Beene mésar dob saray Tuluse ni brab i Natiwe ni Bili-bili, médayéw ro damén brab émbantug ro fo toow taman sa taman. Atin méguléw ro so taman sa taman.” ¹⁴Atin bang i de fot ni gétew do barakatan étew, “Amen!” Atin i de lukés odoron méntédunsum ro ménintulus.

I de tanda

6 ¹Tidéw béno, énggito guy Natiwe Bili-bili kédané noy sunguwe bé de fitéw timan do tanda. Atin énggelingoo kuy ségétéwe bé de fot gétew do barakatan étew ménbéréh maak léte mano, “Enggon!” ²Atin amun ténéngténg gu, énggito guy futee kuda. Atin i étewe de kéménuda, géménamak bohor. Atin wén i ménirayan de lakay. Atin ménagéw ménangéy sétiboh inok tabané noy de kéilawan.

³Tidéw béno, kénday Natiwe Bili-bili géruiwowe bé de tanda dob sulate ni. Atin énggelingoo kuy béréh i géruiwowe bé de barakatan do étew mano, “Enggon!” ⁴Tidéw béno, ménusut i furowe kuda. Atin i étewe

de kéménuda, nirayan kuwagib méganay bé késégirawe dob duniyae ni inok sétiboh i de étew brab séféléhu ro. Atin niray de soy dakéle sundang.

⁵Tidéw béno, kénday Natiwe Bili-biliy gétéléwe bé de tanda dob sulate ni. Atin énggelingoo kuy gétéléwe bé de barakatan do étew mano, “Enggon!” Atin amun ténéngténg gu, énggito guy mitame kuda. Atin i étewe de kéménuda, géménamak timbangan. ⁶Atin wén i énggelingoo ku maak béréh étew tidéw dob kérara i de fot ni barakatan do étew mano, “Gétéléw saén baad bé ségantange arinah i mébéléye bé ségétérésangane sahud, atin ségantang faréy féndawét ‘barley’ saén i mébéléye bé ségétérésangane sahud. Atin kagom singgulaén i nore taloo no arak.”

⁷Tidéw béno, i Natiwe Bili-bili kénda noy géfote tanda tidéw dob sulate ni. Atin énggelingoo kuy géfote barakatan étew mano, “Enggon!” ⁸Atin amun ténéngténg gu, énggito guy mérégunire kuda. Atin i dawét i étewe de kéménuda “Kéléhu”. Atin wén soy ségétéwe étew énggétundug de féndawét “Emferno”. Niray beroy aturane méméléhu bé géfote baad bé de kéilawan dob duniyae ni. Féléhué ro bero dob késégirawe brab dob léngobe brab dob déruune brab dob de mérayar binatang.

⁹Tidéw béno, i Natiwe Bili-bili kénda noy gélimowé bé de tanda tidéw dob sulate ni. Atin énggito guy de rémogor i de étew fénléhuén sabaf bé kéunur ruwe bé kékéréh i Tuluse brab kéuret ruwe fantag bé ni. Diyo ro dob fantad i ahayane tulakan. ¹⁰Ménkes ro métanug maro, “Barakatan Kadnan, i Beeme mékétéfu go brab toow i kékéréh me. Kédiron nay kékukum me sémuli dob de tete étew dob duniyae ni sabaf bé kékéléléhu ruwe begey?” ¹¹Atin i séngae ségétew bero nirayan fute kégal. Atin wén i ménbéréhe dob berowe bé fatut témérén ro na singkow saén taman féléhuén nay kéluhanay de dumo ro do sugu-suguéy Tuluse kailangan féléhuén so loo bé berowe.

¹²Atin énggito guy Natiwe Bili-bili kédané noy généme bé de tanda. Tidéw béno, wén i toow fo ménbagér luba, atin i térsange ménwaléy mitam maak mitam safut. Atin i térsang kélungonone ménwaléy furo maak dara. ¹³Atin i de gitoon ménlawu tidéw dob lawayo mangéy dob fantade maak do mata onok kayéw ménlawu bé kégérumfak i émbagére de réfuruh. ¹⁴Atin i lawaye ménalfa maak sulat méndilin. Atin i kéluhanay de tuduk brab de bungéd méntéfégalin ro tidéw dob de gono ro. ¹⁵Tidéw béno, i de datu dob duniyae ni, brab de méguléw, brab de odoroy de sundalo, brab de kawasa, brab de mégatur, brab kéluhanay de étew fiyon fo ké do rifén taloo no do békén rifén, ménrékunéy ro dob de takub brab dob fantad i de batéw dob de tuduk. ¹⁶Atin ménkes ro dob de tuduk brab dob de batéw maro, “Tamfurén gey inok énda gitoy étewe ménasar dob saray datue dob lawayo begey atin inok énda gégumah dob begeyey kékérit i Natiwe Bili-bili. ¹⁷Non énggumahén i gaiwe kémukum ro, atin énda i géatuh bero.”

7 ¹Tidéw béno, énggito guy fote télaki téménindég dob fote sugud i duniyae ni. Atin naland roy fote réfuruh dob duniyae ni inok énda géiyuf ro dob fantade taloo no dob dogote taloo no dob de kayéw. ²Atin énggito guy ségiyowe télaki énggumah tidéw sébangan nuwitén i tanda i méuyage Tulus. Atin ténawagén métanug i de fot ni télaki sénarigoy Tuluse minasa bé fantade brab dogote. ³Ménbéréh i ni télaki dob de dumo no télaki mano, “Kagom binasanén i fantade brab dogote brab de kayéw taman énda gétandaa tom i de rangih i de sugu-suguéy Tuluse.” ⁴Atin énggelingoo kuy kédooy de méntandaan, mératuh bra fot folo bra fot ngibu gétew. Atin falan ro tidéw dob kéluhanay triboy de Judio. ⁵Atin folo bra ruwo ngibuy méntandaane tidéw dob de séfu Judah. Atin folo bra ruwo ngibuy tidéwe de dob de séfu Ruben. Atin folo bra ruwo ngibuy tidéwe de dob de séfu Gad. ⁶Atin folo bra ruwo ngibuy tidéwe de dob de séfu Aser. Atin folo bra ruwo ngibuy tidéwe de dob de séfu Naftali. Atin folo bra ruwo ngibuy tidéwe de dob de séfu Manase. ⁷Atin folo bra ruwo ngibuy tidéwe de dob de séfu Simeon. Atin folo bra ruwo ngibuy tidéwe de dob de séfu Lebi. Atin folo bra ruwo ngibuy tidéwe de dob de séfu Isakar. ⁸Atin folo bra ruwo ngibuy tidéwe de dob de séfu Sabulon. Atin folo bra ruwo ngibuy tidéwe de dob de séfu Jose. Atin folo bra ruwo ngibuy tidéwe de dob de séfu Benjamen.

⁹Tidéw béno, énggito guy toowe fo dakél ménlimud do étew. Enda gébilangan ro non toow ro fo médo. Tidéw ro dob kéluhanay de séségiyo-giyo gékélasi do étew, brab do tribo, brab do ingéd, brab do késébéréh. Atin téménindég ro dob adafay saray Tuluse ni brab dob adafay Natiwe ni Bili-bili. Atin kéménégal ro fute brab géménamak ro do dau bongo. ¹⁰Atin ménbéréh ro métanug maro, “Dayewé tom i Tulus tome ménasar dob sara nuwe, brab dayewé tom i Natiwe ni Bili-bili non fukasé ro betom dob de sala tom.” ¹¹Atin i kéluhanay de télaki téménindég ro lémiwét bé saray Tuluse brab de lukés odoron brab de fot gétew do barakatan étew. Tidéw béno, méntéunsum ro dob adafay sarane méngeadaf bé Tuluse. ¹²Ménbéréh ro maro, “Hoo, féngadafé tom i Tuluse non médait dayewén brab bantugén brab basanan brab fésalamatan. Beeney tintuwe gétigan brab barakatan, brab Beeney méguléwe. Médøyé damén taman sa taman. Amen!”

¹³Tidéw béno, i ségétewe bé de lukés odoron fénénginsaa no begén mano, “Ati de ni do étew kéménégal fute, ati tidéwo ruwe de?”

¹⁴Atin séménumbulu maku, “Idih. Endob i beeme, gétiga mo.”

Atin ménbéréh mano, “Beroy de étew tidéw dob dakélé kérégénon dob duniyae. Ténunak roy de kégal ro dob dara i Natiwe Bili-bili inok fute, sani kémédane bé de sala ro. ¹⁵Been i niy funa ruwe téménindég dob adafay saray Tuluse brab diyo ro dob lawi i Tuluse fuweh na kélungonon rémigo bé kétayay Tuluse. Atin i Tuluse, sani ménasare dob sara nuwe,

diyagané no bero, non diyo dob berowe. ¹⁶Atin éndaén mélayah ro taloo no térumén ro. Atin éndaén kéédufan ro bé térsange taloo no do ségiyo na méduf. ¹⁷Non i Natiwe Bili-bili dob kérara i saray Tuluse, Beeney maake mantayan bero brab magifat bero. Atin fanangguvité no bero dob de séfut i wayége miray bé umule magufusa. Atin kédanéy Tulusey de kétete i de fédew ro inok éndaén kéméréw ro.”

8 ¹Atin amun kénday Natiwe Bili-biliy géfitéwe bé de tanda tidéw dob sulate ni méntanék fo toow i lawayo bé rugay i ségéréfae uras. ²Tidéw béno, énggito guy de fitéw gétew télaki, sani de démoyun témindég dob adafay Tuluse. Atin wén i ménirayan bero fitéw timan témburi.

³Atin wén man i ségiyowe télaki énggumah ménuwit bélowan fédégon dukah. Atin ménangéy dob ahayane tulakan brab témindég dob sékulo nuwe. Atin niray dob beeney médoowe dukah inok sélawéké no bé de kédasal i de munur. Atin tulaké no diyo dob bélowan tulakan dob adafay saray Tuluse. ⁴Atin i bél i dukahe ni ménslawék bé kédasal i de munur, ménangéy rotor tidéw dob fégonone de génamak i télakiwe ni témindég dob adafay Tuluse. ⁵Tidéw béno, i télakiwe ni, éndotén i fégonone bé dukahe atin fénénoén bé barawe tidéw dob ahayane tulakan, atin nibérén dob duniyae. Atin léménéte brab déménégu brab kéménilot brab léménuba.

I de fitéw témburi

⁶Tidéw béno, i de fitéw ni gétew télaki do wén i do témburi ro, témenafay ron inok iyufé roy de témburi ro.

⁷Atin amun iyuféy sunguwe télakiy témburi nuwe, réménana yelo brab aféy ménslawék bé darae. Atin i gétéléwe baad bé duniyae méntuwé, loo soy gétéléwe baad bé de kayéw, loo soy kéluhanay de mélunéw do kéron.

⁸Tidéw béno, niyuf i géruwowe télakiy kaane témburi. Atin ménlawu dob dogotey maake dakél tuduk ménrino bé aféye. Atin waléy dara i gétéléwe baad bé dogote. ⁹Atin i gétéléwe baad bé de sédo brab do binatang dob dogote ménléhu ro. Atin ménbinasa soy gétéléwe baad bé de barko.

¹⁰Tidéw béno, niyuf i gétéléwe télakiy kaane témburi. Atin i dakéle gitoo ménrino maak félatut ménlawu tidéw dob lawayo mangéy dob gétéléwe baad i fulangiwe brab de séfut. ¹¹I dawét i ni gitoo, “Féla”. Atin i gétéléwe baad bé de wayégi ménwaléy féla. Atin médooy de étew ménléhu non éngéginém ro bé ni wayégi féla.

¹²Tidéw béno, niyuf i géfote télakiy kaane témburi. Atin télew baad bé térsange brab térsang kélungonone brab de gitoo i ménbinasawe de. Mélaw télew baad i ménkédane bé kégéfekaya ruwe. Atin déménlémon i gétéléwe baad bé fuwehe loo soy kélungone de.

¹³ Tidéw bénō, bé lala guwe de séna téméngténg, énggelingoo kuy métanuge béréh i banuge lémayang dob kérara fuwehe mano, “Toow fo mékégédaw-gédaw i de étew dob duniyae ni amuk émbéréh sékoy télewé timan témburi iyuféy de ménsama télécw télaki!”

9 ¹Tidéw bénō, niyuf i gélimowe télakiy kaane témburi. Atin énggito guy gitoone, sani télakiwe ménlawu mangéy dob duniyae ni tidéw dob lawayo. Atin niray dob beeney gunsie fégéungka bé toowe fo ménalém liyung. ²Atin nungkaén i liyunge ni. Sonom bénō, ménsut i béle loo bé bél i dakéle aféy. Atin déménlémon i duniyae non nalang i ébéley réndaw i téresange. ³Atin ménsut i de kasuk tidéw dob béle ni, atin méntéberagar ro dob fantade. Atin nirayén beroy toowe fo démawéti kekeke maak sifitan. ⁴Sénugu ro bé békén binasané roy de kéeroon taloo no do kayéw taloo no do udenén do nohok. Géfédawéto ro saén i de étew énda méntandaan i de rangih ro bé tanda i Tuluse. ⁵Endob i de kasuk ni énda ténungkasén bero ké féléhué roy de ni do étew. Yamula, fédawéto ro saén bero taman méifus i limowe gétérésang kélungonon. Atin i kédaawéti i kékérasaya ruwe loo bé kédawéti i kekeke i de sifitan. ⁶Atin bé no limo gétérésang kélungonon i de ni do étew toow fo mérasay, toow ron méuyot damén méléhu, éndob énda fo méléhu ro de.

⁷I falas i de kasuk ni, maak do kuda kudaay de sundalo inok sétiboh. Atin wén i do maak do bélwon do lakay dob de uléw ro. Atin i de falas i de uléw ro maak do lagéy kéilawan. ⁸I de buk ro maak do buk libun. Atin i de kifé ro loo bé kiféy de mérayar binatang féndawéti do leon.

⁹Atin i de kuméng ro méntéléb bé maake futow. Atin i béréh i defafak ro maak béréh i da médo kalea magayas mangéy sétiboh. ¹⁰Atin i de igor ro maak igor i da sifitan non kêmeke ro. Atin been i ni de igor roy émfédawétonne bé de étew bé rugay i limowe gétérésang kélungonon.

¹¹Atin i datue méguléw bero, beeney télakiwe mungka bé ménaléme liyung. I dawéti ne dob Hebreewe “Abadon”, atin dob Griegewe “Apolion”, I atag ne, “Beeney Minasawe”.

¹²I sunguwe kékérasayan ménggilidén. Atin wén sénay ruwo de énda séna ménrigo no.

¹³ Tidéw bénō, niyuf i géénéme télakiy kaane témburi. Atin énggelingoo kuy émbéréhé tidéw dob fote sugud i bélwone ahayan tulakan dob adafay Tuluse. ¹⁴Ménbéréh dob géénéme ni télaki wén i témburi no mano, “Tangéyém i de fot gétew télaki nikét dob dakéle wayéy féndawéti Eufrates.” ¹⁵Tidéw bénō, ténangéyén i de fot ni gétew télaki. I de ni do télaki térafay non bero bé gétahe inok féléhué roy gétéléwe baad bé kéilawane béléewe ni dob tintuwe ni gai. ¹⁶Atin wén i ménbéréhé dob begéne bé i kédooy de sundalo kéménuda ruwo ratuh laksa. ¹⁷Atin dob ni fénggiton dob begéne, énggito guy de kuda brab de kéménuda de. I de ni do sundalo, wén i de futow fénggétéléb bé de

kuméng ro. Furoy de falasén maak aféy brab gadung maak safiro, brab mérégunir maak asupre. Atin i de uléw i de ni do kuda maak do uléw leon. Atin mésut tidéw dob de ba roy aféye brab béle brab asuprewe. ¹⁸ Atin fénléhu roy gétéléwe baad bé kéluhanay de kéilawan bé aféye brab béle brab asuprewe mésut tidéw dob de ba ro. ¹⁹ I de ni do kuda, dob de ba ro brab dob de igor roy bagér ruwe méméléhu. Non i de igor ro maak do ulé wén i do uléw ro émfédawéton bé de étew.

²⁰ Atin i de étew énda méléhu ro, énda gésénule ro bé kékengadaf ruwe bé de bélwon, do filak, do galang, do batéw, brab do kayéw do rénigo ro do kéninontow. I de ni do éntingayén énda do gérito ro taloo no do gégélingo taloo no do géagéw. Atin i de ni étew énda so gésénule ro bé de kékengadaf ro bé de saitan. ²¹ Enda so gésénule ro bé de kékélehu ro, loo soy de kékélyia ro, loo soy de kékigaé ro, loo soy de kékénakaw ro.

10 ¹ Tidéw béo, énggito guy ségiyowe barakatan télaki ménlus tidéw dob lawayo. Kéménégal bé rawéne atin léniwét i béluntuwey uléw ne. Atin i rangih ne maak téresang, atin i de sékéyén maak liléy aféy. ² Atin wén i klohe sulat ménđilin dob kémér ne. Atin fendiyoén i kuwonone sékéyén dob dogote, atin i biwonge de dob fantade. ³ Atin téménawag toow fo métanug maak béréh i de leon. Amun téménrén témawag, sénumbuloy fitéwe do métanug léte. ⁴ Amun téménrén ro, géfédéw sulaté ku damén i de énggélingoo ku. Endob énggélingoo kuy émbéréhe tidéw dob lawayo mano, “Kago sulatén i kékéréh i de fitéw timan léte, non fatut sékémén saén.”

⁵ Tidéw béo, i télakiwe ni, sani énggito guwe téménindég dob dogote brab dob fantade, ténunggulén i kuwonone kémérén saréw dob lawayo. ⁶ Atin sémenafa dob dawét i Tuluse méuyag taman sa taman, sani léménimbage bé lawaye brab kéluhanay de éntingayén de brab fantade brab kéluhanay de éntingayén de so brab dogote brab kéluhanay de éntingayén de so. Atin ménbéréh i télakiwe ni mano, “Endaén i anggaén! ⁷ Endob amuk iyuféy géfitéwe télakiy témburi nuwe, féagéwéy Tulusey nékém ne bantakén, loo bé bénréh ne dob de sugu-suguén do sénarigo no muret bé gétahe.”

⁸ Tidéw béo, ménsébéréh man begén i émbéréhe tidéw dob lawayo bé gétahe de mano, “Fégédét go dob télakiwe téménindég dob dogote brab dob fantade atin dotém i ménđiline sulat dob kémér ne.”

⁹ Mélaw ménfégédétu dob télakiwe ni atin nongot gu dob beene ké irayén begén i klohe ni sulat. Atin ménbéréh dob begéne mano, “Dotém atin amaém. Amuk amaé mo toow fo meh dob ba me maak téne, éndob waléy mélétis dob sur me.”

¹⁰ Tidéw béo, éndot guy klohe ni sulat dob kémér ne, atin nama gu. Amun diyoén dob ba guwe, toow fo meh maak téne. Endob amun énggélinuo kun, ménwaléy mélétis dob sur guwe. ¹¹ Tidéw béo, wén i

ménbérhé do begéne mano, “Kailangan ureté mo man ségule i kékérhé i Tuluse fantag bé de médo do ingéd, brab de médo do kélasi étew, brab de klasi-klasi késébérhé, brab de datu.”

11 ¹Tidéw bénō, wén i niraye begén fégétém̄bu maak tugé. Atin wén i ménbérhé do begéne mano, “Tindég go atin témbu moy lawi i Tuluse brab ahayane tulakan. Atin bilangém̄ i de étew diyo dob lawi i Tuluse méngadaf. ²Endob kago témbunén i de fésawayan non nirayén dob de békén Judio. Gédaa roy mékétéfuwe ingéd Jerusalem taman méifus i fote folo bra ruwo gétérésang kélungonon. ³Atin sugué ku mangéy diyo muret i de ruwo gétew sénarigo ku. Kémégal ro do saku atin ureté roy kékérhé i Tuluse diyo taman méifus i séngibuwe bra ruwo ratuh bra ném̄ folo gétérésangan.”

⁴Atin i de ni ruwo gétew muret, beroy de maak do ruwo timan kayéw féndawét Olibo, atin maak do ruwo ro timan solo diyo dob adafay Kadnay fantade. ⁵Atin amuk wén i témulama émfédawéton bero, mésut i aféye tidéw dob de ba ro brab binasané roy de sébanil bero. Mélaw atiy témulamawe bero minasa, féléhuén. ⁶Wén i kuwagib ro malang bé ranae bé gaiwe muret ro bé kékérhé i Tuluse. Wén soy kuwagib ro émféwaléy dara bé wayége. Wén soy kuwagib ro kémukum bé de étew bé de udenén do gékélasi fégédusa dob de udenén do gai kétaya ro. ⁷Atin amuk gildén muret i de ruwo ni gétew, sétiboh i nagawe bero, sani mésute tidéw dob liyunge. Atin tabana no bero brab gégéluhu no bero. ⁸Atin i de bangkay ro fédioyén dob kalsaday dakéle ingéd, sani ingéd i Kadna ruwe ménléhu dob kruse. I ménaléme dawét i nan ingéd “Sodoma” taloo no “Egipto”. ⁹Atin bé rugay i télwe gétérésangan bra géraraan, i de étew tidéw dob kéluhanay de ingéd brab do tribo brab do kélasi-kélasi késébérhé i de étew, tuliké roy de ruwo ni timan bangkay, atin énda tungkasé ro de ké lébengén. ¹⁰Atin i de étew dob duniyae ni, toow ro fo moror sabaf bé kéléhu i de ruwo ni gétew. Atin rémigo ro do karagiya atin séiray ro do éntingayén sabaf bé kéror ruwe de. Non i de ni do ruwo gétew sénarigoy Tuluse muret bé kékérhé ne ménférasay ro fo toow bé de étew dob duniyae ni. ¹¹Endob amun ménifus i télwe gétérésangan bra géraraan, fénférénaway Tuluse bero inok tébule ro. Atin téménindég ro. Atin i kéluhanay de énggégito bero, toow ro fo ménggilak. ¹²Tidéw bénō, i de ni do ruwo gétew sénarigoy Tuluse, énggelingoo roy métanuge émbérhéh dob berowe tidéw dob lawayo mano, “Enggomén, nik gom mangéy dob lawaye ni.” Atin bé lala i kéténgténg i de sébanil ni bero, déméniyat ro mangéy dob lawayo dob rawéne.

¹³Sonom bénō, léménuba toow fo émbagér. Atin i géfoloe baad bé no ingéd ménbinasa. Atin ménléhu i fitéwe ngibu étew bé lubae ni. Atin i de ségiyo do étew toow ro fo ménggilak, atin dénayéw roy barakatane Tulus dob lawayo.

¹⁴I géruwowe mékégédaw-gédaw gérigonon ménggilidén. Endob gérumah sékoy gétéléwe de.

¹⁵Tidéw béno, i géfítewe télaki niyufén i témburi nuwe. Atin wén i de métanug do émbéréh tidéw dob lawayo maro, “I Kadna tome brab Kristo nuwe ménwaléy méguléw bé duniiae. Atin féguléwo no taman sa taman.” ¹⁶Tidéw béno, i de ruwo folo bra fot gétew lukés odoron sani de ménsar dob de saray de datu dob adafay Tuluse, méntédunsum ro méngeadaf bé Tuluse. ¹⁷Atin ménbéréh ro maro, “Toow fo barakatan Kadnan Tulus, Beem i Tuluse bé féganayo atin Tulus go so béni.

Fésalamat gey dob Beeme non nusarém i barakat me atin féngganaya moy méguléwe bé duniiae. ¹⁸I de étew do békén méngintulus, ménkérit ro toow non énggumahén i gaiwe kukumé moy de ménléhu do étew. Atin been soy niy gaiwe binasané moy de étew minasa bé duniiae ni.”

¹⁹Tidéw béno, i lawi i Tuluse dob lawayo, ménungka. Atin i baule fégonon bé de ménsulat fasad i Tuluse énggiton diyo. Tidéw béno, kéménilot brab léménéte brab déménégu brab léménuba brab réménana do dakél yelo.

12 ¹Tidéw béno, méntéfégitoi maake anlung i mérigowe moso mérigo dob lawayo. Wén i libune kéménégal térsang, atin ménutuh dob térsang kélunganone. Atin wén i lakay dob uléw ne fitew i de gitoon de. ²Obor i ni libun brab gédétén kéumahan. Atin mélaw ménkes sabaf bé kéadowéti i kéfégénga ne.

³Tidéw béno, wén man i ségiyowe ménrigo méntéfégito dob lawayo maak anlung. Wén i dakéle diwat-wat furoy falas ne. Fitew timan i uléw ne brab folo timan i sidung ne. Atin wén i lakay dob séngae uléwén. ⁴Atin i igor ne génuuyudén i gétéléwe baad bé de gitoon brab nibérén dob duniiae. Atin diyo téménindég dob adafay libune ni gédét kéumahan inok amaé noy nga ne ké mumahén. ⁵Tidéw béno, i libune ni énggáfégénga nga lagéy. Beeney méguléwe bé kéluhanay de ingéd atin énda i géatuh bé kéféguléw ne. Endob wén i ménafas bé ngae ni brab nuwitén mangéy dob Tulusob dob lawayo dob sara nuwe. ⁶Atin i libune ni ménraréy mangéy dob gonone énda i étew de batí, dob sébaane gonon ténafe i Tuluse de. Diyo fagifatéy Tulusey ni libun bé séngibuwé brab ruwo ratuh bra némo folo gétérésangan.

⁷Tidéw béno, wén i gira dob lawayo. Atin i ségétewe bé de télakiy Tuluse féndawéti Miguel brab de kuyugén do télaki, ménsetiboh ro sébanil bé diwat-wate. Atin i diwat-wate ni brab de kaan télaki, ménatuh ro.

⁸Endob ténaaban i diwat-wate ni brab de télaki no. Mélaw éndaén ténungkasén bero batí dob lawayo. ⁹Atin i dakéle ni diwat-wate brab de télaki no nibérén bero tidéw dob lawayo. Beeney Satanase, sani saitane fénggakara noy kéluhanay de kéilawan bé kétéféwaléy ne ulé bé gétaho. Atin nibérén mangéy dob duniiae beroy de tete télaki no.

¹⁰Tidéw béno, énggelingoo kuy métanuge béréh dob lawayo mano, “Béleewe ni métumanén i kéfukas i Tuluse bé kéilawane. Béleewe ni

fénggitoy Tulusey atura nuwe méguléw. Béleeewe ni, i Kristoy Tuluse
fénggitoy atura nuwe méguléw. Non i témbœ bé de dumo gey
fuweh na kélungonon, dénédélén tidéw dob lawayo. ¹¹I de dumo gey
ni, ténabana roy Satanase bé dara i Natiwe Bili-bili, atin sabaf bé toowe
kétoro nuret ro. Atin énda gulaané roy de karo do férénawa, yamula
féndaya roy de étew méméléhu bero sabaf bé kéunur ruwe. ¹²Mélaw,
i de begom do bati dob lawayo, oror gom. Endob i de begom do bati
dob fantade brab dob dogote, mékégédaw-gédaw gom. Non i Satanase
ménlus mangéy dob begome. Atin toow fo mékérít, non gétiga no éndaén
mérugay i gai nuwe rémigo tete.”

¹³ Atin i diwat-wate ni, amun énggétiga no nibérén mangéy dob
duniyae, ménségéta i libune ni ménggénga nga lagéy. ¹⁴Endob nirayén
dob libune niy ruwowefafak i dakéle banug inok lémayang mangéy
dob gonone énda i étew de bati. Diyo fégifatéy Tuluse bé rugay i télewé
bra géraraan gébélantuwa. Atin énda gésugsugén bé Satanase sani
diwat-wate. ¹⁵Tidéw béno, i diwat-wate ni fénésutén tidéw dob ba
ney médoowe wayég inok anuré noy libune ni dob dunuke. ¹⁶Endob
ténabangay fantadey ni libun atin kéménla brab néséfén i wayége. Mélaw
énda ménggésug-sug i libune ni. ¹⁷Tidéw béno, toow fo ménkérít i diwat-
wate ni bé libune ni. Atin ménagéw brab ménangéy sétiboh dob de
ségiyo nga i libune ni brab kéluhanay de modor bé de sugu i Tuluse brab
de énda témérén munur bé toowe kétoro Jesuse. ¹⁸Atin i diwat-wate ni
témenindég dob dénsaane.

13 ¹Tidéw béno, énggito guy nagawe géménaun tidéw dob dogote.
²Folo i sidung ne brab fitéw i uléw ne. Atin wén i lakay dob
séngae sidungén. Atin dob séngae uléwén wén i ménsulate de mémémurka
dawét. ³I nagawe ni énggito gu maak falas i mérayare binatang féndawét
leopardo. Atin i de sékéyén maak sékéy i mérayare binatang féndawét oso.
Atin i ba ne maak ba i mérayare binatang féndawét leon. Atin i
diwat-wate nirayén dob beeney barakat ne brab atura nuwe méguléw.
⁴Atin i sébaane bé de uléw i nagawe ni maak ménléhuén, éndob ménadi-
adiy fali ne funa no damén méléhu. Atin i kéluhanay de étew ménggaif ro
de atin ménfuray ro bé nagawe ni. ⁵Atin i kéluhanay de étew fénengadaf
roy diwat-wate ni non nirayén dob nagawe niy atura nuwe méguléw. Atin
fénengadaf ro soy nagawe maro, “Enda i ségiyo gérotor bé nagawe. Atin
énda i géatuh de.”

⁵Atin i nagawe ni, féndaya i Tuluse ménfédayday émbéréh do toow fo
tete brab do fégéfélangka-langka, méngiras bé Tuluse. Atin ténungkasén
méguléw taman méifus i fote folo bra ruwo gétérésang kélungonon.
⁶Atin fénémulaén i Tuluse brab dawét ne brab gonoy Tuluse bati brab
kéluhanay de étew bati diyo dob lawayo. ⁷Atin féndayaén so sétiboh
sébanil bé de étew i Tuluse, atin féndayaén so ténabana no bero. Atin

nirayén dob beeney aturane méguléw bé kéluhanay de étew tidew dob de séségiyo-giyo do tribo brab do ingéd brab do késébéréh brab do étew.

⁸ Atin féngadaféy kéluhanay de étew bati dob duniyae ni, sani de étew énda ménsulat i de dawét ro dob librowe lénistanan bé de étew gégedot bé umule magufusa. Sénulatén i de dawét ro bé énda séna ménlimbag i duniyae de. Atin i fénléhue Nati Bili-bili, Been i gefee bé ni libro.

⁹ Fatut fégélingo gom kéluhanan i ni: ¹⁰ I de étew kailangan férисunén, waléy ro man méréfisu. Atin i de étew kailangan féléhuén bé sundange, féléhuén ro bé sundange. Mélaw i de begom do étew i Tuluse, fatut fédayday gom sémarig bé Tuluse atin fetingkél gom dob gaiwe kérégénan gom.

¹¹ Tidew béno, énggito guy géruwowe naga ménsut tidew dob fantade. Ruwo timan i sidung ne maak do sidung bili-bili atin i kékéréh ne maak béréh diwat-wat. ¹² Atin i géruwowe ni naga, nusarén i aturay sunguwe naga méguléw dob adafa nuwe. Atin fénégésén i kéluhanay de étew dob duniyae méngadaf bé sunguwe naga, sani wéne falién géfédewén damén méléhu éndob ménadi-adi. ¹³ Atin i géruwowe ni naga, réménigo do médo do mékégaif. Léménawu aféy dob duniyae ni tidew dob lawayo dob téngaangay kéluhanay de étew. ¹⁴ Atin énggégéfakara noy kéluhanay de étew dob duniyae ni sabaf bé de mékégaif ténungkasén rigoné no dob adafay sunguwe naga. Tidew béno, sénuguén i kéluhanay de étew dob duniyae ni rémigo kéninontow fégébantug bé sunguwe naga, sani téni bohe bé sundange éndob énda ménléhuén de. ¹⁵ Atin i géruwowe naga, ténungkas dob beeney mirayane férénawa bé kéninontowe inok gébéréh i kéninontow i sunguwe ni naga brab inok géféléhuo roy kéluhanay de étew énda féngadafé ro de. ¹⁶ Atin i géruwowe ni naga, fénégésén i kéluhanay de étew, fiyon i de gérotor loo soy de gérifantad, brab de kawasa loo soy de méskinan, brab de rifén loo soy de békén do rifén, fénégésén bero férigo tanda dob de kuwonon do kémér ro taloo no dob de rangih ro. ¹⁷ Amuk énda méntandaan i ségétewe, énda gébélényen brab énda so géfélényen. Atin i ni tanda, been i dawét i sunguwe naga taloo no rumeroy dawét ne. ¹⁸ I de étew gésobut bé ni, bero saén i de féntilédtéd i Tuluse. Mélaw i de métileédtéd do étew, fakay gétiga roy atag i ni rumero non tanda i dawét i ségétewe étew. Ném ratuh bra ném folo bra ném i ni rumero.

14 ¹ Tidew béno, énggito guy Natiwe Bili-bili téménindég dob tuduke féndawét Sion. Atin diyo dob Beeney mératuhe bra fot folo bra fot ngibu étew. I de ni do étew, ménsulat dob rangih ruvey dawét i Natiwe ni Bili-bili brab Abay ne Tulus. ² Atin énggelingoo kuy émbéréhe tidew dob lawayo maak érok dakél samfaw atin maak métanug léte. Atin i kékéréh ne maak béréh i de baat féndawét do alpa. ³ Atin i de mératuh bra fot folo bra fot ngibu do étew, téménindég ro dob adafay saray Tuluse bra de fot

gétew do barakatan étew brab de lukés odoron. Atin kéménanta ro sébaan mantu kanta, sani kantawe énggétigay de ni do étew saén do mén-aun tidew dob duniyae.⁴ Beroy de lagéy do énda ménsala bé késétaya ruwe bé de ségiyo do libun saliyu bé de bawag ro, non malinis i de adat ro. Atin furay ro bé Natiwe Bili-bili dob séngae ayo no. Beroy de mén-aun tidew dob de ségiyo do kéilawan inok beroy de sungu do niray dob Tuluse brab dob Natiwe Bili-bili.⁵ Enda téménugi ro fiyon ségule. Enda i rénigo ro tete.

⁶Tidew béno, énggito guy ségiyowe télaki lémayang dob toowe fo gérotor. Atin bé béno so, nureténi Fiyowe Uret énda mékédano taman sa taman. Nureténi dob séségiyo-giyowe gékélasi do étew brab do tribo brab do késébéréh brab do ingéd.⁷Ménbéréh métanug mano, “Basana kom i Tuluse brab dayew gom. Non énggumahén i gaiwe kukumé noy de kéilawan. Féngadaf gom i Tuluse, sani réménigowe bé lawaye brab fantade brab dogote brab de séfut.”

⁸Atin ménfuray i géruwowe télaki brab ménbéréh mano, “Ménbinasa néni. Ménbinasa néni i dakéle ingéd Babilonia. Fénolo noy kéluhanay de étew bé arak ne. Atin i ni arak, been i niy mékérésike adatén émfésala bé de ségiyo étew.”

⁹Tidew béno, ménfuray i gételewe télaki. Ménbéréh mano, “I de étew méngadaf bé nagawe brab kéninontow ne, brab méntandaan i de rangih ro taloo no do kémér ro bé tanda i nagawe,¹⁰ mékukum ro fo toow. Non mékérít fo toow i Tuluse bero. I de rémigo bé ni, ferasayé no bero bé aféye brab asuprewe dob adafay de télakiy Tuluse brab Natiwe Bili-bili.¹¹ I aféye fégédusa bero, mégébél taman sa taman. Fuweh na kélungonon, énda téméré no démusa bé de étew méngadaf bé nagawe brab kéninontow ne, sani de étew méntandaan bé dawét ne.”

¹²Mélaw i de étew i Tuluse, sani de modor bé sugu i Tuluse brab de énda témérén munur bé Jesuse, fatut témingkél ro.

¹³Tidew béno, énggélingoo kuy émbéréhe tidew dob lawayo mano, “Sulatém i ni: Moror i de munur bé Kadnane ké méléhu ro tidew béléewe ni.” “Non témérén ron gémalbék atin gédoté roy barase sabaf bé de rénigo ro.”

¹⁴Tidew béno, énggito guy futee rawén. Atin wén i ménasar de maak falas kéilawan. Wén i bélowan lakay dob uléw ne atin wén i génamakén murém sanggut.¹⁵Tidew béno, wén i ségiyowe télaki ménasut tidew dob lawi i Tuluse dob lawayo. Atin téménawag toow fo métanug dob étewe ni ménasar dob rawéne mano, “Usarém i sanggute fégékétewém. Non énggumahén i gaiwe kémétew, togohén i duniyae.”¹⁶Tidew béno, i étewe ni ménasar dob rawéne, sénayugén i sanggute dob duniyae. Atin kéntewén i duniyae.

¹⁷Tidéw béno, énggito guy ségiyowe télaki ménsut tidéw dob lawi i Tuluse dob lawayo. Wén soy murém sanggut génamakén.

¹⁸Tidéw béno, i ségiyowe télaki, sani máguléwe bé aféye, ménagéw tidéw dob ahayane tulakan. Ménkes métanug dob télakiwe géménamak murém sanggut mano, “Usarém i sanggut ma nan fégékélengém bé onok i nohoke féndawét ubas dob safade dob duniyae. Non togoh ron.” ¹⁹Mélaw i télakiwe ni, sénayugén i sanggut ne dob duniyae, atin kénléngén i de ubas tidéw dob safade atin nibérén dob kalute gonoy Tuluse kémérés bero non mécérit bé de ni do tete étew. ²⁰Atin ménkérés i de ni do tete étew dob kalute dob liyuy ingéde. Atin ménsut i de dara ro maak dunuk gédét ruwo gémitroy kénéralém ne atin télém ratuh bra ruwo folo gékilomitroy kéravu ne.

15 ¹Tidéw béno, énggito guy ségiyowe mécégaif ménrigo dob lawayo maak anlung. Wén i do fitéw gétew do télaki ménuwit fitéw timan fégédusa bé de kélawan. Been i niy de géfuray fégédusa non fégéfegilid bé kékérit i Tuluse.

²Atin énggito guy maake dogot maak féngalungon ménslawék bé aféye. Atin énggito guy de étew téstabana roy nagawe brab kéninontow ne. Beroy de énda méntandaan bé rumeroy dawéti. Téménindégi ro dob doror i dogote maak féngalungon. Génamak roy de baat féndawét alpa niray i Tuluse bero. ³Kénanta roy kanta Moisese, sani ségétéwe sugu-suguéy Tuluse bé do gétah, sani kantay Natiwe Bili-bili maro, “Barakatan Kadnan Tulus, toow fo fiyo brab dakél i rénigo muwe! Beem i máguléwe bé kéluhanay de ingéd. Toow fo métintuy adat me brab toow. ⁴I kéluhanay de étew basana ro Beem, Kadnan. Atin i kéluhanay de étew fayagé roy kégérotor me. Beem saén i mécétefuwe. I kéluhanay de étew tidéw dob séngae ingéd, mangéy ro ménadaf dob Beeme. Non i kéluhanay de étew gétiga roy de métintu do rénigo mo.”

⁵Tidéw béno, énggito guy lawi i Tuluse dob lawayo ménungka. Atin diyo dob bukagey mécétefuwe sibéy gonoy tanda i Tuluse. ⁶Tidéw béno, i de fitéw gétew do télaki ménuwit bé de fitéw timan fégédusa, ménsut ro tidéw dob lawi i Tuluse ni. Kéménagal ro bé toowe fo malinis fute safut. Atin lénibéo ro bélwon i de kuméng ro. ⁷Tidéw béno, i ségétéwe bé de barakatan do étew nirayen dob de fitéw gétew do télaki fitéwe timan bélwon biléw ménfeno bé kékérit i Tuluse méuyag taman sa taman. ⁸Atin i lawi i Tuluse ni ménfeno bé béle tidéw dob kéréndaw i barakat i Tuluse, atin mélaw énda i géahur dob lawie taman gilid i de fitéw timan fégédusa nuwit i de fitéw gétew télaki.

I de fitéw timan biléw

16 ¹Tidéw béno, énggelingoo kuy métanuge émbéréh tidéw dob lawi i Tuluse dob de fitéw gétew do télaki mano, “Agéw gom atin luka gom dob duniyaey de fitéw timan do biléw ménfeno bé kékérit i Tuluse.”

² Atin i sunguwe télaki ménagéw brab lénukaén i biléw ne dob duniiae. Atin i toowe fo féde brab mékérésik do kéraing téménunoh dob kéluhanay de étew do méntandaan bé nagawe brab de méngadaf bé kéninontow ne.

³ Atin i géruwowe télaki lénukaén soy kaane biléw dob dogote, atin i wayége ménwaléy maak dara i ménléhue étew. Atin ménléhu i kéluhanay de sédo brab de binatang dob dogote.

⁴ Tidéw béno, i gétéléwe télaki lénukaén i kaane biléw dob de séfut brab dob de wayég, atin ménwaléy ro dara. ⁵ Atin énggelingoo kuy béréh i télakiwe méguléw bé de wayég mano, “O mékétéfuwe Tulus, i Beeme ménwén gon tidéw féganay atin wén so béleewe ni, métintuy kékukum me. ⁶ I de tete ni étew, fénléhu roy de étewém brab de sénarigo mo muret. Mélaw féninémo mo bero dara. Médait ro mékukum loo bé ni.” ⁷ Tidéw béno, énggelingoo kuy émbéréhe tidéw dob ahayane tulakan mano, “Barakatan Kadnan Tulus, métintuy kékukum me brab toow.”

⁸ Tidéw béno, i géfote télaki lénukaén i kaane biléw dob térsange. Atin fentuwégen bé térsangey de étew sabaf bé kééduf ne. ⁹ Atin méntuwégi de étew sabaf bé kééduf ne. Atin fénémula roy dawét i Tuluse, sani wéne aturan bé de ni fégédusa. Endob énda gésénule ro bé de sala ro brab énda dayéwé roy Tuluse.

¹⁰ Tidéw béno, i gélimowe télaki lénukaén i kaane biléw dob saray datue kay nagawe. Atin ménwaléy délémon i kégéulgéw i nagawe. Atin toow fo ménrasay i de étew atin gékekeo roy de dila ro bé kékédawéta ruwe. ¹¹ Atin fénémula roy Tuluse dob lawayo sabaf bé kékédawéta ruwe brab de kéraing ro. Endob énda gésénule ro bé de tete adat ro.

¹² Tidéw béno, i géénéme télaki lénukaén i kaane biléw dob dakéle wayég féndawét Eufrates. Atin méntikar i dakéle ni wayég inok wén i aguwoy de datu tidéw sébangan. ¹³ Tidéw béno, énggito guy téléwe gétéw tete rémogor maak do falas fak ménusut tidéw dob ba i diwat-wate brab dob ba i nagawe brab dob ba i ségétéwe ubo-ubo sénarigoy Tuluse muret. ¹⁴ Beroy de rémogor i de saitan do rémigo do mékégaif. Atin i de télew ni gétéw do saitan ménangéy ro dob kéluhanay de datu dob duniiae ni inok limudé ro bero atin inok rémigo ro gira dob gaiwe kémukum i barakatane Tulus.

¹⁵⁻¹⁶ Bé béno gai, i de saitan limudé roy de datu dob gonone féndawét Armagedon dob késébéréhe Hebreo. Atin bang i Kadnane Jesus, “Fégélingo gom! Séfuleu bé gaiwe énda gékaranga kom de loo bé kégumah i ménakawe. Moror i de étew mingat brab téménafay ro kémégal bé kéongot-ongot ruwe bé késéfule guwe. Non énda félawas ro bé késéfule guwe funa ro mémala.”

¹⁷ Tidéw béno, i géfítewe télaki lénukaén i kaane biléw dob kérara fuwehe. Atin wén i émbéréh métanug tidéw dob saray méguléwe dob lawi i Tuluse mano, “Enggilidén.” ¹⁸ Atin kéménilot brab déménégu

brab léménéte brab léménuba émbagér. Enda i ségiyo émbagér luba
loo bé ni tidew bé kélimbage bé kélawane, non toow na fo gétimal i
kébagér i ni luba.¹⁹ Atin i dakéle ingéd Babilonia ménsefarak télén baad.
Atin ménbinasay kéluhanay de ingéd dob duniyae ni. Non gétédémoy
Tulusey ingéde Babilonia atin kukumé no sabaf bé kékérit ne de.²⁰ Atin i
kéluhanay de bungéd brab de tuduk ménalfa.²¹ Atin ménlawu i de dakél
do yelo dob de étew. Atin limo folo gékiloy kékérit i de yelo. Atin i de
étew fénémula roy Tuluse sabaf bé de yelo non toow fo gétimal i kékérit
ne.

17 ¹Tidew bénou, i ségétewe bé de télaki ménuwit bé de fitew timan
do biléw, ménangéy dob begéne brab ménbéréh mano, “Enggon,
fégito gu beem i kékukume bé ménbantuge sundal, sani ingéde gédet dob
médoowe do wayég.²I de datu dob duniyae ni ménstayan de. Atin i de
étew dob duniyae ni, fénasaén bero bé mémérésike adatén.”

³Tidew bénou, i Rémogor i Tuluse toow fo fénemanduo no begén, atin
nuwit i télakiwe begén mangéy dob gonone énda i étew de bat. Diyo
énggito guy libune kéménuda dob furwe naga. Wén i de mémurka
dawét ménusat dob kéluhanay lowoh i nagawe ni. Atin fitew timan i
uléw ne brab folo timan i sidung ne.⁴ Atin i libune ni kéménagal furo
brab rambayung. Atin ménggono do bélodon brab do perlas brab do
ségiyo balilaga batéw. Atin génamakén i bélodon tabu ménfeno bé de
mémérésik brab do mémurka do étingayén, sani galbék i sundale.
⁵ Atin ménusat dob rangih ney kékéréhe wén i ménbuney atagén. I sulate
ni mano, “I ménbantuge Babilonia, idéng i kéluhanay de sundal brab de
mémérésik do étew dob duniyae ni.”⁶ Atin énggito guy ni libun ménolon
sabaf bé kéném ne bé dara i de ménléhuén do munur bé Jesuse do
ménléhu sabaf bé kékéret ruwe fantag bé kékunur ruwe.

Amun énggito guy ni, toow fo ménggaifu de.⁷ Atin i télakiwe ni
ménenginsa dob begéne mano, “Sedek mégaif go? Fégétiga ku beem
i ménbuney atag i libune ni brab nagawe kénudaa no fitew i uléw
ne brab folo i sidung ne.⁸ I nagawe énggito mo méuyag bé gétaho,
éndob ménléhuén béléewe ni. Gido loo, mésut moso tidew dob toow
fo ménalém liyung brab ménbinasa. Atin i de étew dob duniyae ni, sani
de étew énda ménusat i de dawét ro dob librowe listanan bé de étew
gégédot bé umule magufusa, mégaif ro kékérit i Tulusey duniyae de. Atin i nagawe ni
méuyag bé gétaho, ménléhuén bénou. Endob téfégito man moso.”

⁹ Atin féntaus i télakiwey kékéréh ne mano, “Do gétigan saén do étew i
gésobute bé ni: I atag i de fitew timan uléw, been i de niy de fitew timan
burur gonoy ni libun mésar, sani de burur ténindégoy ménbantuge ingéd.
Atin i atag ne do fitew gétew datu.¹⁰ Atin i limowe bé de datu ni ménléhu
ron. Atin i ségétewe de méuyag mémuléw bénou. Atin i ségétewe de énda

séna méguléwén. Amuk méguléw i géfitéwe ni datu, méguléw saén singkow. ¹¹ Atin i nagawe ni, sani méuyage bé gétaho éndob ménléhuén béni, beeney géwaléwe datu gétundug bé de sungu do fitew datu atin ménbinasa moso.

¹² “Atin i de folo do sidung énggito mo, beroy de folo gétew do datu énda séna méguléw ro. Endob irayén beroy aturane méguléw bé rugay i ségeurase saén beroy nagawe. ¹³ Atin i de folo ni gétew do datu, ségiléw i kétaya ruwe, atin iray roy bagér ruwe brab atura ruwe méguléw dob nagawe ni. ¹⁴ Atin sétiboh ro sébanil bé Natiwe Bili-bili. Endob i Natiwe Bili-bili brab de fénémilién do kuyugén sani de fénunurén dob Beene brab de rémigo bé kétaya nuwe, tabana roy de ni do folo gétew do tete datu. Témaban i Natiwe Bili-bili non Beeney Kadnay de méguléw brab Beeney Datu i de datu.”

¹⁵ Atin ménbéréh man i téakiwe ni dob begéne mano, “I de wayég énggito mo, sani gonoy sundale ménasar, beroy de étew dob de séségiyogiyo do ingéd brab do kélasi-klasi do étew brab do késébéréh. ¹⁶ Atin i de folo timan do sidung do énggito mo, brab nagawe, mérarék ro bé sundale ni. Atin nafas roy kéluhanay de éntingayé no. Atin tagaké roy sundale ni félawas. Atin amaé roy ungé ne brab tuwégé ro dob aféyey sama ruwe de. ¹⁷ Rigoné roy ni non fékéntayé Tuluse beroy rémigowe de inok métuman i bantak ne. Mélaw sébaan saén i kéfégitung ruwe, atin iray roy atura ruwe méguléw dob nagawe taman métuman i kóbéréh i Tuluse.

¹⁸ “Atin i énggito muwe libun, beeney ménbantuge ingéd méguléw bé de datu dob duniyae ni.”

18 ¹ Tidew bénou, énggito guy ségiyowe téaki ménlus tidew dob lawayo. Wén i dakél atura no. Atin ménngéfkaya i kéluhanay sugud i duniyae bé késélinang ne. ² Atin ménkes i téakiwe ni toow fo métanug mano, “Ménbinasa! Ménbinasay ménbantuge ingéd Babilonia. Ménwaléy béni batioy de saitan brab do tete do rémogor. Atin médoou do gékélasi do tete brab mékérésik do kloh manok bati diyo. ³ Non fénsalaén i kéluhanay de étew bé mékérésike adatén, sani tetee kétayay lowoh ne. Atin i de datu dob duniyae ni ménamung ro bé de tete rigoné ro. Atin i de démagang ménwaléy ro kawasa sabaf bé de tete kétayay libune ni.”

⁴ Tidew bénou, énggelingoo kuy émbéréhé tidew dob lawayo mano, “Enggomén do étew gu. Sut gom tidew dob tete anan ingéd inok énda géamung gom bé de salaén. Mélaw énda mékukum gom séréngan de.

⁵ Non toow fo médooy de salaén maak mén-untud mangéy dob lawayo. Atin i Tuluse énggétédimo noy tetee adatén. ⁶ I kékérasay ne begom, fatut sulio kom ruwo takéf kékérasay de so. Feno gom i tabu ne ruwo gule bé inéméne toow fo fela loo bé féniném ne begom. ⁷ I kédooy kóbantug ne bé lowoh ne brab kékéfiyo nuwe bé lowoh ne bé gétahé, iring gom bé kékérasay gome de brab kékébuku gome de. Non énda téméré no

félangka-langka mano, ‘Begéney baiwe, békénu baléw. Enda fakayén ké tete i fédew guwe.’⁸ Sabaf bé ni kékéréhén, wén i gai moso tékow mérasy. Non métukum bé déruune brab kébukue brab lénggobe. Atin métuwégi fo toow bé aféye non toow fo barakatan i Kadnane Tulus kémukum de.”

⁹ Atin i de datu dob duniyae ménamung bé de métukum rigoné no brab kékawasawe kétaya ro, kémérew ro, brab rémuung ro sabaf bé kékinasay ni ingéd amuk gito roy bél i aféye témuwégi. ¹⁰ Ténulik ro tidéw dob mérayue non mégilak ro méamung bé kérasay ne. Atin béréhé ro maro, “Mékégédaw-gédaw i ménbantuge ingéd Babilonia. Ségéuras saén i kékukume de.”

¹¹ Atin i de démagang kékérew ro so brab rémuung ro sabaf bé kékinasay ni ingéd non énda i méléy bé de daganga ro. ¹² Endaén i méléy bé de bélwon do féléléy ro brab do filak, brab do balilaga do batéw, brab do perlas, brab de fiyo fute brab do furo brab rambayung safut, brab do balilaga do mamut kayéw, brab do étingayén do rénigo garing, brab do balilaga do kayéw, brab do galang, brab do futow, brab do marmol, ¹³ brab do kanela brab do ségiyo fégéfaninu, brab do dukah, brab do fégéféamut, brab do uwa, brab do arak, brab do nor, brab do arinah, brab do safi, brab do bili-bili, brab do kuda, brab do kalesa, brab do rifén, brab fiyon i de rémogor i de étew. ¹⁴ Atin ménbéréh i de démagang dob ingéde ni maro, “Endaén i kéluhanay de fiyo do étingayén do kétaya mo. Atin ménkédanén i bantuga muwe brab kékawasa muwe. Atin éndaén géséfuleén mangéy dob beeme.” ¹⁵ Atin i de démagang do ménwaléy kawasa sabaf bé de kédagang ro, dob nan ingéd, tuliké roy de tidéw mérayu non mégilak ro méamung bé kérasay ne. Kémérew ro rémuung. ¹⁶ Atin béréhé ro maro, “Mékégédaw-gédaw i ménbantuge ni ingéd. Bé gétaho i de étew de kéménégal ro fiyo safut fute brab furo brab rambayung. Atin ménggon do bélwon brab balilaga do batéw brab do perlas. ¹⁷ Endob bé ségéurase saén métékow ménkédan i kékawasa nuwe.”

Atin i kéluhanay de kafitan bé de barko brab de étew de métanda brab kéluhanay de gémalbék dob de barko, ténulik roy de tidéw mérayu. ¹⁸ Atin ménkes ro bé lala ruwe téméngténg bé bél i aféye témuwégi bé ingéde ni maro, “Tidéw féganay, énda i ségiyo ménbantug ingéd loo bé ni!” ¹⁹ Atin rénigono ro réhuk i de uléw ro brab rémuung ro maro, “Mékégédaw-gédaw i ni ménbantug ingéd! Non sabaf bé kékawasa nuwe, waléy so kawasay de gefe barko. Endob bé ségéurase saén métékow ménbinasay kéluhanane.”

²⁰ I de begom do étew bati dob lawayo, oror gom sabaf bé kékinasay ni ingéd. I de begom do munur bé Jesuse, brab begom do apostol brab do sénarigoy Tuluse muret, oror gom. Non kénukum i Tulusey nan ingéd sabaf bé de tete rénigo no dob begome.

²¹Tidéw béno, i barakatane télaki fénurutén i dakéle batéw brab nibérén dob dogote. Atin ménbérén mano, “Loo bé niy kéibére bé ménbantuge ingéd Babilonia inok mébinasa. Endaén gito no non toowén fo ménbinasa. ²²Atin éndaén gélingoo no dob ni ingéd i bérén i de baat do alpa, do suling, brab do témburi. Atin éndaén giton i de fanday gémalbék dob ni ingéd fiyon udenén klasi fanday, atin éndaén gélingoon i bérén i gilingane. ²³Endaén réméndaw i soloe dob ni ingéd. Atin éndaén i uyot dob ni ingéd. Bé do gétah, toow fo ménbantug i de démagang do étew. Atin i de béliyan bati diyo, énggégéfágakara roy de étew dob séngae ingéd dob duniyae.”

²⁴I funay ingéde Babilonia ménkukum, non fénléhuén i de étew sénarigoy Tuluse muret bé kékérén ne brab fénléhuén i de munur bé Jesuse. Atin i kéluhanay de étew fénléhuén dob duniyae ni ménléhu ro sabaf bé ni ingéd.

19 ¹Tidéw béno, énggélungoo kuy métanuge bérén i maake médoo étew ménlimud dob lawayo maro, “Dayéwé tom i Tuluse! Been i mémukase bé de étew, Beeney barakatane, Beeney ménbantuge. ²Métintu brab toow i kékukum ne. Kénukumén i ménbantuge sundal non fén salaén i kéluhanay de étew dob duniyae bé mékérésike adatén. Kénukum i Tuluse non fénléhuén i de sugu-sugué no.” ³Atin ménkes ro man maro, “Dayéwé tom i Tuluse! Mégébél i aféye témuwégi bé ni ingéd taman sa taman.” ⁴Atin i de ruwo folo bra fot gétew lukés odoron brab de fot gétew do barakatan étew méntédunsum ro méngeadaf bé Tuluse ménasar dob sara nuwe. Atin ménbérén ro maro, “Amen! Dayéwé tom i Tuluse.”

⁵Tidéw béno, wén i ménbérén tidéw dob saray Tuluse mano, “I kéluhana kome do sugu-suguéy Tuluse brab begome do masanan de, fiyon gérotor taloo no do gérifantad, fatut dayéwé kom.”

⁶Tidéw béno, énggélungoo kuy bérén i maake dakél ménlimud do étew brab maake érok dakél samfaw brab maake métanug léte maro, “Dayéwé tom i Tuluse non Been saén i barakatane Kadnan Tulus méguléw betom. ⁷Fatut moror tom. Fatut dayéwé tom i Tuluse sabaf bé kégérotor ne. Non énggumahén i gayi uyot i Natiwe Bili-bili béléewe ni. Atin ménatafayén i mawage bé Natiwe ni Bili-bili. ⁸Kéménégala sémélínang malinis fute safut.” I atag i ni, been i niy de métintu rígonéy de munur bé Jesuse.

⁹Tidéw béno, i télakiwe ni ménbérén dob begéne mano, “Sulatém i ni: Toow fo moror i de étew ménsgékat dob uyot i Natiwe Bili-bili.” Atin ménbérén man mano, “Been i niy toowe kékérén i Tuluse.”

¹⁰Atin méntédunsumu dob adafa nuwe inok féngadafé kuy télakiwe ni. Endob ménbérén mano, “Kago féngadafén begén. Non dumo mo so begén sugu-suguéy Tuluse brab dumoy kéluhanay de munur bé kétoro Jesuse. Fatut Tulus saén i féngadafé muwe.” I funa nuwe ménbérén bé ni non ségiléw i kétoro Jesuse bé de sénarigoy Tuluse muret.

¹¹Tidéw béno, énggito guy lawaye ménungka. Atin énggito guy futee kuda. Atin i dawét i étewe de kéménuda, “Sarigon” brab “Toow”. Métintuy kékukum ne, atin métintu soy késétiboh ne. ¹²I de moto no maak mérino aféy, atin médooy de lakay dob uléw ne. Atin wén i dawéte ménusat dob Beene, éndob énda i gétigan de saliyu saén bé Beene. ¹³Atin i kégal ne maak nérém dob darae. Atin i dawét i ni étew, “Kébéréh i Tuluse.” ¹⁴Atin i de médooy do sundalo tidéw dob lawayo ménfuray ro bé ni étew. Kéménuda ro dob de fute kuda, atin kéménégal ro bé toowe fo malinis fute safut. ¹⁵Atin i sunguwe ni étew, wén i muréme sundang mésut tidéw dob ba ne fégétaba no bé kéluhanay de ingéd dob duniyae ni. Atin féguléwo no bero atin énda i géatuh de. Atin fégito no beroy kékérít i barakatane Tulus non binasané no bero loo bé kékérés i ségettéwe étew bé de ubas. ¹⁶Atin wén i ménuslate dob kégal i étewe ni brab dob foo ne mano, “Datu i de datu, Kadnay de máguléw.”

¹⁷Tidéw béno, énggito guy télakiwe téménindég dob kérara i téresange. Atin ménkes métanug dob kéluhanay de kloh manok lémayang dob fuwehe mano, “Enggomén. Sétimu gom inok géama gom bé kanduli i Tuluse. ¹⁸Enggomén, ama gom bé ungé i de datu, brab de odoroy de sundalo, brab de sundalo de so, brab de kuda, brab de kéménuda de so, brab kéluhanay de étew fiyon do rifén loo soy de békén de, brab de gérotor de so, loo soy de gérifantad de.”

¹⁹Tidéw béno, énggito guy nagawe brab de datu dob duniyae ni brab de sundalo so. Ménslimud ro inok sétiboh ro sébanil bé étewe ni kéménuda fute brab de sundalo no tidéw dob lawayo. ²⁰Atin kénéfo roy nagawe beroy ubo-uboe sénarigoy Tuluse, sani rémigowe do mékégaif dob adafay nagawe ni. I de rénigo no do mékégaif, been i niy funay de étew ménfégakaran ménandaan bé tanda i nagawe, sani de étew ménjadaf bé kéninontow i nagawe ni. Atin i nagawe brab ubo-uboe sénarigoy Tuluse, ménibér ro méuyag séna dob ranawé aféy mérino bé asuprewe. ²¹Atin i de sundalo ro, fénléhu ro bero bé sundange mésut tidéw dob ba i kéménude fute. Tidéw béno, i de kloh manok, nama roy de ungé ro taman ménbésor ro.

I séngibu gébélantuwa

20 ¹Tidéw béno, énggito guy ségettéwe télaki ménlus tidéw dob lawayo. Atin génamakén i dakéle sangkali brab susie bé ménaléme liyung. ²Atin kénéfoén i diwat-wate, sani ulée bé gétaho sani saitane féndawét Satanás. Atin nikétén inok férisuné no bé séngibuwe gébélantuwa. ³Atin i télakiwe ni nibérén i Satanase dob liyunge atin kénandado no, atin ténlébén bé tanda. Mélaw éndaén géfagakara Satanasey de étew dob duniyae ni taman méifus i séngibuwe gébélantuwa. Tidéw béno, kailangan tangéyén man singkow.

⁴Tidéw bénō, énggito guy saray de méguléw, brab de étew de so mén̄sar. Atin niray dob berowey kuwagibe kémukum. Atin énggito gu soy de rémogor i de étew fénléhuén sabaf bé kéuret ruwe bé toowe tidéw dob Jesuse brab kékberéh i Tuluse. Enda fénéngadaf roy nagawe taloo no kéninontow ne. Atin énda méntandaan i de rangih ro taloo no do kémér ro bé tanda i nagawe. Atin méntébule ro brab méguléw ro séréngan bé Kristowe taman méifus i séngibuwe gébélintuwa. ⁵ Been i niy sunguwe kétébule. I de dumō ro énda tébule ro taman énda gilid i séngibuwe gébélintuwa. ⁶ Toow fo moror i de étew tébule dob sunguwe kétébule, atin féfiyonéy Tuluse bero. Enda géamung ro bé gérrouwowe kéléhu. Atin beroy de waléy do fadi i Tuluse brab Kristowe. Atin méguléw ro bero ro Kristo bé ni séngibu gébélintuwa.

⁷ Amuk gilid i ni séngibu gébélintuwa, tangéyén i Satanase tidéw dob kaane férisunon. ⁸ Atin mangéy dob kéluhanay de ingéd dob duniiae inok géfagakara no bero, sani de ingéd féndawét Gog brab Magog. Atin i Satanase, limudé no bero inok sétiboh ro sébanil bé Tuluse. Atin toow ro fo médooy loo bé kédoooy de farék dob dénsaane. ⁹ Atin ménbéragar ro dob duniiae atin lénangkat roy ingéde gulaanéy Tuluse gonoy de étewén bat. Endob ménlawu i aféye tidéw dob lawayo funa ro ménbinasa kéluhanan. ¹⁰ Tidéw bénō, i Satanase, sani magakarane bero, nibérén dob ranawe aféy brab asuprewe sani gonone nibéron bé nagawe brab ubo-uboe sénarigoy Tuluse bé gétahe. Atin dusanén ro fuweh na kélunganon taman sa taman.

¹¹ Tidéw bénō, énggito guy dakéle brab futee saray méguléwe. Atin énggito gu soy mén̄sare de diyo. Atin i fantade brab lawaye ménalfa ro dob téngaanga nuwe atin éndaén giton ro. ¹² Atin énggito guy kéluhanay de ménléhu, do gérotor brab do gérifantad. Téménindég ro dob adafay sarane ni. Ménungka i de libro atin ménungka soy librowe lénistanan bé de étew gégedot bé umule magufusa. Atin i de ménléhu ménkukum ro loo bé de rénigo ro, sani mén̄sulate dob de libro. ¹³ Tidéw bénō, i de ménléhu do étew tidéw dob dogote mén̄sut ro, atin mén̄sut soy de ménléhu tidéw dob fantade brab tidéw dob gonoy de ménléhu. Atin kéluhana ro ménkukum sabaf bé de rénigo ro bé kéuyag ruwe séna. ¹⁴ Tidéw bénō, i kéléhue brab gonoy de ménléhu, nibérén bero dob ranawe aféy, sani gérrouwowe kéléhu. ¹⁵ Atin i kéluhanay de étew énda mén̄sulat i de dawét ro dob librowe listanan bé de étew gégedot bé umule magufusa nibérén so bero dob ranawe aféy.

I de mantu

21 ¹Tidéw bénō, énggito guy mantuwe laway brab mantuwe fantad. Ménalfa i tafaye de loo soy dogote. ² Atin énggito guy mémétféfuwe ingéd, sani mantuwe Jerusalem, ménlus tidéw dob lawayo

tidew dob Tuluse. Téménafay maak témérima libun kéménégal fiyo inok balaké noy témérimawe lagéy.³ Atin énggelingoo kuy métanuge béréh tidew dob saray méguléwe ni mano, “Béleewe ni bati i Tuluse sétifon bé de kéilawan. Bati dob berowe atin beroy de étewén. Beeney dumo ruwe atin méngintulus ro dob Beene.⁴ Atin kédané noy de tete dob de fédew ro inok éndaén kémérew ro. Atin éndaén i méléhu taloo no rémuung taloo no démawét non ménkédanén i de éntingayén do tafayén.”

⁵ Tidew béno, ménbéréh i ménssare dob saray Tuluse mano, “Béleewe ni, féantuné kuy kéluhanane.” Atin ménbéréh dob begéne mano, “Sulatém i ni non toow i ni kékéréh brab gésarigon.”⁶ Atin ménbéréh man mano, “Méntumanén. I Begéne Alfa brab Omega, sani féganayane brab tamanane. Iray gu dob de térumén do étew i wayége énda i bayadén tidew dob séfute wayég miray bé umule magufusa.⁷ I de étew ténabana roy Satanase, waléyu Tulus ro atin waléy ro do nga gu.⁸ Endob i de étew do talaw brab do ménwaléy sébanil Begén brab de réménigo do mékérésik brab do ménméléhu brab do béliyan brab do ménengadaf do kéninontow brab do téménugi, géangéy ro dob ranawe aféy brab asuprewe, sani géruwowe kéléhu.”

⁹ Atin i ségétéwe bé de fitew gétew do télaki ménuwit do fitew timan do biléw bé de géfuray do fégédusa, ménangéy dob begéne brab ménbéréh mano, “Enggon, fégito gu beem i témérimawe libun, sani mawage bé Natiwe Bili-bili.”¹⁰ Tidew béno, i Rémogor i Tuluse fénémanduo no begén atin nuwit i télakiwe ni begén mangéy dob uruk i gérotore tuduk. Atin fénténgténgén begén i ingéde Jerusalem, sani mékétéfuwe ingéd, bé lala ne mélus tidew dob lawayo tidew dob Tuluse.¹¹ Sémelinang i ni ingéd non diyo i barakatane Tulus. Sémelinang loo bé balilagae batéw féndawét haspe toow fo métiyéw maak féngalungan.¹² Atin wén i gérotore diding fénggélangkat bé ni ingéd. Atin folo bra ruwo timan i bengawa nuwe. Atin folo bra ruwo gétew i télakiwe mantay bé de bengawa no. Atin ménusat dob de fintuén i dawét i de folo bra ruwo triboy de Judio.¹³ Atin télew timan i fintue dob séngae sébaan bé de fot timan diding. Télew i fingée de sébangan, atin télew soy fingée de déligdigan. Atin télew soy fingée de tégonon, brab télew soy fingée de élédon.¹⁴ Atin i de diding i ni ingéd rénigo dob rotor i foloe bra ruwo batéw. Atin diyo ménusat i dawét i foloe bra ruwo do apostol i Natiwe Bili-bili.

¹⁵ Atin i télakiwe, sani ménbéréhe dob begéne, wén i bélówone fégétémbu no inok témbuné noy ni ingéd brab de bengawa no, brab de didingén fénggélangkat de.¹⁶ Atin i ni ingéd ségiléw foy kédakél i kékuka ne bé kédakél i kétaaha nuwe. Non i télakiwe ni ténémbu noy ingéde ni bé bélówone fégétémbu no. Atin ruwo ngibu bra fot ratuh

gékilometroy kétaah ne loo soy kébuka ne loo soy kégérotor ne.¹⁷ Atin ténémbuy télakiwe ni soy didinge, atin ném folo gémitroy kégérotor ne dob kétémbuy kéilawane de, been i niy nusar i télakiwe ni.¹⁸ Bélowon i ni ingéd toow fo métiyéw maak féngalungon, atin déniding haspe.¹⁹ Atin wén i de toow fo balilaga do batéw fénfiyo bé de batéw féntindégon bé de diding ni. I sunguwe de fénfiyo bé haspewe, atin i géruwowe de bé safirowe, atin i gétéléwe de bé kalsedoniawe, atin i géfoté de bé esmeraldawe.²⁰ I gélimowe de bé onise, i généme de bé kornalinawe, i géfitéwe de bé krisolitowe, i géwaléwe de bé berile, i gésiyowe de bé topasyowe, i géfoloe de bé krisaprasowe, i géfoloe de bra sébaan bé hasintowe, atin i géfoloe de bra ruwo bé amatistawe.²¹ Folo bra ruwo timan do perlas i fénggérígowe bé de ni do folo bra ruwo timan fintu. Sénga sébaan fintu, sébaan so perlas i fénggérígowe de. Atin bélowan i aguwone dob ni ingéd métiyéw maak féngalungon.

²² Enda gito guy lawi i Tuluse dob ni ingéd non dob séngae gonon, i kéluhanay de étew féngadafé roy barakatane Kadnan Tulus brab Natiwe Bili-bili.²³ Atin i ni ingéd, éndaén kailanga noy réndaw i térsange taloo no térsang kélungonon. Non réméndaw i barakatane Tuluse funa no géfékaya. Atin i Natiwe Bili-bili maak solo.²⁴ Atin i de étew dob duniyae ni, gérito ro sabaf bé ni réndaw. Atin i de datu dob duniyae ni, uwité roy kékawasa ruwe mahur dob ni ingéd.²⁵ Atin i de bengawan dob ni ingéd, méungka ro sénga tékélid. Enda méfintuén non énda i kélungonon diyo.²⁶ Atin i de fiyo do éntingayén brab kékawasay kéluhanay de ingéd, féahurén dob ni ingéd.²⁷ Endob énda i tete géahur de, taloo no do tugién do étew taloo no do étew do mékémalay de rigoné ro. I de géahur saén dob ni ingéd, beroy de étew ménlistay de dawét ro dob libroy Natiwe Bili-bili listanan bé de étew gégédot bé umule magufusa.

22 ¹ Atin i télakiwe ni, fénggitó no begén i dakéle wayég miray bé umule magufusa. Sémelinang maak kristal. Tidéw i ni wayég dob saray Tuluse brab Natiwe Bili-bili.² Atin mangéy dob kérara i aguwone dob ni ingéd. Atin wén i dakéle kayéw miray umul dob doror i wayége ni sébala-bala. Mégonok folo bra ruwo gule sénga ségbélantuwa. Ségule mégonok sénga ségétérésang kélungonon. Atin i de dau ro fégéuwa bé de étew dob duniyae.³ Atin énda i éntingayén mémula bé Tuluse dob ni ingéd.

Atin i de saray Tuluse brab Natiwe Bili-bili diyo dob ni ingéd.⁴ Atin gito roy falas ne atin dob de rangih ro ménusat i dawét ne.⁵ Atin éndaén i kélungonon, mélaw éndaén kailanga roy soloe taloo no térsang non i Kadnane Tulus, Beeney solo ruwe. Atin méguléw ro taman sa taman.

⁶ Tidéw bénou, ménbéréh i télakiwe dob begéne mano, “Toow i ni kékéréh énggelingoo mo brab gésarigon. Atin i Kadnane Tulus, sani miraye bé Rémogor ne dob de étew sénarigo no muret bé kékéréh

ne, sénuguén i télakiwe ni inok fégito no dob de sugu-sugué noy atiy mérigowe énda mérugayén tidéw béni.”

⁷Atin bang Jesuse, “Séfuleu énda mérugayén tidéw béni! Moror i de étew modor bé de kébéréh fénggétiga ku begom dob ni libro.”

⁸Atin i begéne Juan. Enggelingoo ku brab énggito guy de ni. Atin amun énggilid énggelingoo ku brab énggito gu, méntédunsumu dob adafay télakiwe ni ménféténgteng begén bé de ni, inok féngadafé ku. ⁹Endob ménbéréh dob begéne mano, “Kago féngadafén begén. Non i begéne dumo mo so sugu-suguéy Tuluse, beroy kéluhanay de dumo mo sénarigoy Tuluse muret, brab de modor bé de kébéréh dob ni libro. Féngadafém saén i Tuluse.” ¹⁰Atin ménbéréh man dob begéne mano, “Kago bunéyén i de ni kébéréh fénggétiga ku beem dob ni libro. Non gédétén métuman i kéluhanay de ni. ¹¹I de tete étew, kailangan fétausé roy de tete rigoné ro. I de mékérésik do étew, kailangan fétausé roy de mékérésik do rigoné ro. Atin i de fiyo do étew, kailangan fétausé roy de fiyo rigoné ro. Atin i de étew rémigo bé kétayay Tuluse, kailangan fétausé ro.”

¹²Atin bang Jesuse, “Séfuleu énda mérugayén tidéw béni! Atin uwité kuy de baras inok iray gu dob de étew médait gégedot de sabaf bé de rénigo ro. ¹³I Begéne, Alfa brab Omega, sani féganayane brab tamanane.”

¹⁴Moror i de étew ténumak i de kégal ro inok malinis, sani de étew ménkédanén i de sala ro, non wén i kuwagib ro mama bé onok i kayéwe miray bé umule magufusa, atin géahur ron dob mantuve ingéd. ¹⁵Endob dob liyuy ingéde ni, diyo i de rémigo do mékérésik brab de béliyan brab de rémigo bé de tete kétayay de lowoh ro, brab de méméléhu, brab de mégadaf bé de kéninontow, brab de tugién, brab de rémigo bé békéne toow.

¹⁶Atin ménbéréh i Jesuse mano, “Begéney Jesuse, atin fénuit guy télaki guwe mangéy dob begome inok fégétiga noy de ni dob de munur. Begéney séfu datu Dabide. Begéney géfkayae solo mubod.”

¹⁷I Rémogor i Tuluse brab i mawage bé Natiwe Bili-bili, ménbéréh ro maro, “Enggon!”

I kéluhanay de mégélingo bé ni, fatut émbéréh gom “Enggon!”

I kéluhanay de étew térumén, brab méuyot ro miném, fatut doté roy wayége énda i bayadén miray bé umule magufusa.

¹⁸I begéne, Juan, féégétē kuy kébéréh guwe dob begome do mégélingo bé ni libro fénggétiga ku begom. Amuk wén i mumanan bé de kébéréh dob ni libro, umanay Tulusey kékérit ne de bé de kékérit ménsumat dob ni libro. ¹⁹Atin amuk wén i kémédan bé dumoy de kébéréh dob ni libro fénggétiga ku begom, kédanéy Tulusey de kaan baad bé de onok tidéw dob kayéwe miray umul, brab kaane kuwagib bati dob mékétéfuwe ingéd sani de ménsumat dob ni libro.

²⁰ Atin i Jesuse, sani ménbéréhe toow i de ni, ménbéréh mano, “Hoo ba, séfuleu énda mérugayén tidéw béni.”

Amen. Enggon, Kadnan Jesus!

²¹ Mégédaw fo toow i Kadnane Jesus begom. Amen.

Read the New Testament daily

January

<i>date</i>	<i>Scripture</i>	<i>date</i>	<i>Scripture</i>
1	Mateo 1:1–2:12	17	Mateo 12:1–21
2	Mateo 2:13–3:6	18	Mateo 12:22–45
3	Mateo 3:7–4:11	19	Mateo 12:46–13:23
4	Mateo 4:12–25	20	Mateo 13:24–46
5	Mateo 5:1–26	21	Mateo 13:47–14:12
6	Mateo 5:27–48	22	Mateo 14:13–36
7	Mateo 6:1–24	23	Mateo 15:1–28
8	Mateo 6:25–7:14	24	Mateo 15:29–16:12
9	Mateo 7:15–29	25	Mateo 16:13–17:9
10	Mateo 8:1–17	26	Mateo 17:10–27
11	Mateo 8:18–34	27	Mateo 18:1–22
12	Mateo 9:1–17	28	Mateo 18:23–19:12
13	Mateo 9:18–38	29	Mateo 19:13–30
14	Mateo 10:1–23	30	Mateo 20:1–28
15	Mateo 10:24–11:6	31	Mateo 20:29–21:22
16	Mateo 11:7–30		

February

<i>date</i>	<i>Scripture</i>	<i>date</i>	<i>Scripture</i>
1	Mateo 21:23–46	15	Markos 1:1–28
2	Mateo 22:1–33	16	Markos 1:29–2:12
3	Mateo 22:34–23:12	17	Markos 2:13–3:6
4	Mateo 23:13–39	18	Markos 3:7–30
5	Mateo 24:1–28	19	Markos 3:31–4:25
6	Mateo 24:29–51	20	Markos 4:26–5:20
7	Mateo 25:1–30	21	Markos 5:21–43
8	Mateo 25:31–26:13	22	Markos 6:1–29
9	Mateo 26:14–46	23	Markos 6:30–56
10	Mateo 26:47–68	24	Markos 7:1–23
11	Mateo 26:69–27:14	25	Markos 7:24–8:10
12	Mateo 27:15–31	26	Markos 8:11–9:1
13	Mateo 27:32–66	27	Markos 9:2–29
14	Mateo 28:1–20		Markos 9:30–10:12

March

<i>date</i>	<i>Scripture</i>	<i>date</i>	<i>Scripture</i>
1	Markos 10:13-31	17	Lukas 2:36-52
2	Markos 10:32-52	18	Lukas 3:1-22
3	Markos 11:1-26	19	Lukas 3:23-38
4	Markos 11:27-12:17	20	Lukas 4:1-30
5	Markos 12:18-37	21	Lukas 4:31-5:11
6	Markos 12:38-13:13	22	Lukas 5:12-28
7	Markos 13:14-37	23	Lukas 5:29-6:11
8	Markos 14:1-21	24	Lukas 6:12-38
9	Markos 14:22-52	25	Lukas 6:39-7:10
10	Markos 14:53-72	26	Lukas 7:11-35
11	Markos 15:1-47	27	Lukas 7:36-8:3
12	Markos 16:1-20	28	Lukas 8:4-21
13	Lukas 1:1-25	29	Lukas 8:22-39
14	Lukas 1:26-56	30	Lukas 8:40-9:6
15	Lukas 1:57-80	31	Lukas 9:7-27
16	Lukas 2:1-35		

April

<i>date</i>	<i>Scripture</i>	<i>date</i>	<i>Scripture</i>
1	Lukas 9:28-50	16	Lukas 18:1-17
2	Lukas 9:51-10:12	17	Lukas 18:18-43
3	Lukas 10:13-37	18	Lukas 19:1-27
4	Lukas 10:38-11:13	19	Lukas 19:28-48
5	Lukas 11:14-36	20	Lukas 20:1-26
6	Lukas 11:37-12:7	21	Lukas 20:27-47
7	Lukas 12:8-34	22	Lukas 21:1-28
8	Lukas 12:35-59	23	Lukas 21:29-22:13
9	Lukas 13:1-21	24	Lukas 22:14-34
10	Lukas 13:22-14:6	25	Lukas 22:35-53
11	Lukas 14:7-35	26	Lukas 22:54-23:12
12	Lukas 15:1-32	27	Lukas 23:13-43
13	Lukas 16:1-18	28	Lukas 23:44-24:12
14	Lukas 16:19-17:10	29	Lukas 24:13-53
15	Lukas 17:11-37	30	Juan 1:1-28

May

date	Scripture	date	Scripture
1	Juan 1:29-51	17	Juan 9:1-41
2	Juan 2:1-25	18	Juan 10:1-21
3	Juan 3:1-21	19	Juan 10:22-42
4	Juan 3:22-4:3	20	Juan 11:1-53
5	Juan 4:4-42	21	Juan 11:54-12:19
6	Juan 4:43-54	22	Juan 12:20-50
7	Juan 5:1-23	23	Juan 13:1-30
8	Juan 5:24-47	24	Juan 13:31-14:14
9	Juan 6:1-21	25	Juan 14:15-31
10	Juan 6:22-40	26	Juan 15:1-27
11	Juan 6:41-71	27	Juan 16:1-33
12	Juan 7:1-29	28	Juan 17:1-26
13	Juan 7:30-52	29	Juan 18:1-24
14	Juan 7:53-8:20	30	Juan 18:25-19:22
15	Juan 8:21-30	31	Juan 19:23-42
16	Juan 8:31-59		

June

date	Scripture	date	Scripture
1	Juan 20:1-31	16	Rénigoy de Apostol 10:34-48
2	Juan 21:1-25	17	Rénigoy de Apostol 11:1-30
3	Rénigoy de Apostol 1:1-26	18	Rénigoy de Apostol 12:1-23
4	Rénigoy de Apostol 2:1-47	19	Rénigoy de Apostol 12:24-13:12
5	Rénigoy de Apostol 3:1-26	20	Rénigoy de Apostol 13:13-41
6	Rénigoy de Apostol 4:1-37	21	Rénigoy de Apostol 13:42-14:7
7	Rénigoy de Apostol 5:1-42	22	Rénigoy de Apostol 14:8-28
8	Rénigoy de Apostol 6:1-15	23	Rénigoy de Apostol 15:1-35
9	Rénigoy de Apostol 7:1-29	24	Rénigoy de Apostol 15:36-16:15
10	Rénigoy de Apostol 7:30-50	25	Rénigoy de Apostol 16:16-40
11	Rénigoy de Apostol 7:51-8:13	26	Rénigoy de Apostol 17:1-34
12	Rénigoy de Apostol 8:14-40	27	Rénigoy de Apostol 18:1-21
13	Rénigoy de Apostol 9:1-25	28	Rénigoy de Apostol 18:22-19:12
14	Rénigoy de Apostol 9:26-43	29	Rénigoy de Apostol 19:13-41
15	Rénigoy de Apostol 10:1-33	30	Rénigoy de Apostol 20:1-38

July

<i>date</i>	<i>Scripture</i>	<i>date</i>	<i>Scripture</i>
1	Rénigoy de Apostol 21:1-16	17	Roma 4:1-12
2	Rénigoy de Apostol 21:17-36	18	Roma 4:13-5:5
3	Rénigoy de Apostol 21:37-22:16	19	Roma 5:6-21
4	Rénigoy de Apostol 22:17-23:10	20	Roma 6:1-23
5	Rénigoy de Apostol 23:11-35	21	Roma 7:1-14
6	Rénigoy de Apostol 24:1-27	22	Roma 7:15-8:6
7	Rénigoy de Apostol 25:1-27	23	Roma 8:7-21
8	Rénigoy de Apostol 26:1-32	24	Roma 8:22-39
9	Rénigoy de Apostol 27:1-20	25	Roma 9:1-21
10	Rénigoy de Apostol 27:21-44	26	Roma 9:22-10:13
11	Rénigoy de Apostol 28:1-31	27	Roma 10:14-11:12
12	Roma 1:1-17	28	Roma 11:13-36
13	Roma 1:18-32	29	Roma 12:1-21
14	Roma 2:1-24	30	Roma 13:1-14
15	Roma 2:25-3:8	31	Roma 14:1-23
16	Roma 3:9-31		

August

<i>date</i>	<i>Scripture</i>	<i>date</i>	<i>Scripture</i>
1	Roma 15:1-21	17	1 Korinto 11:2-16
2	Roma 15:22-16:7	18	1 Korinto 11:17-34
3	Roma 16:8-27	19	1 Korinto 12:1-26
4	1 Korinto 1:1-17	20	1 Korinto 12:27-13:13
5	1 Korinto 1:18-2:5	21	1 Korinto 14:1-17
6	1 Korinto 2:6-3:4	22	1 Korinto 14:18-40
7	1 Korinto 3:5-23	23	1 Korinto 15:1-28
8	1 Korinto 4:1-21	24	1 Korinto 15:29-58
9	1 Korinto 5:1-13	25	1 Korinto 16:1-24
10	1 Korinto 6:1-20	26	2 Korinto 1:1-11
11	1 Korinto 7:1-24	27	2 Korinto 1:12-2:11
12	1 Korinto 7:25-40	28	2 Korinto 2:12-17
13	1 Korinto 8:1-13	29	2 Korinto 3:1-18
14	1 Korinto 9:1-18	30	2 Korinto 4:1-12
15	1 Korinto 9:19-10:13	31	2 Korinto 4:13-5:10
16	1 Korinto 10:14-11:1		

September

date	Scripture	date	Scripture
1	2 Korinto 5:11-21	16	Galasia 2:17-3:9
2	2 Korinto 6:1-13	17	Galasia 3:10-22
3	2 Korinto 6:14-7:7	18	Galasia 3:23-4:20
4	2 Korinto 7:8-16	19	Galasia 4:21-5:12
5	2 Korinto 8:1-15	20	Galasia 5:13-26
6	2 Korinto 8:16-24	21	Galasia 6:1-18
7	2 Korinto 9:1-15	22	Efeso 1:1-23
8	2 Korinto 10:1-18	23	Efeso 2:1-22
9	2 Korinto 11:1-15	24	Efeso 3:1-21
10	2 Korinto 11:16-33	25	Efeso 4:1-16
11	2 Korinto 12:1-10	26	Efeso 4:17-5:2
12	2 Korinto 12:11-21	27	Efeso 5:3-33
13	2 Korinto 13:1-14	28	Efeso 6:1-24
14	Filipos 1:1-24	29	Filipos 1:1-26
15	Filipos 2:1-16	30	Filipos 1:27-2:18

October

date	Scripture	date	Scripture
1	Filipos 2:19-3:6	17	1 Timoteo 2:1-15
2	Filipos 3:7-4:1	18	1 Timoteo 3:1-16
3	Filipos 4:2-23	19	1 Timoteo 4:1-16
4	Kolosas 1:1-20	20	1 Timoteo 5:1-25
5	Kolosas 1:21-2:7	21	1 Timoteo 6:1-21
6	Kolosas 2:8-23	22	2 Timoteo 1:1-18
7	Kolosas 3:1-17	23	2 Timoteo 2:1-21
8	Kolosas 3:18-4:18	24	2 Timoteo 2:22-3:17
9	1 Tesalonika 1:1-2:9	25	2 Timoteo 4:1-22
10	1 Tesalonika 2:10-3:13	26	Tito 1:1-16
11	1 Tesalonika 4:1-5:3	27	Tito 2:1-14
12	1 Tesalonika 5:4-28	28	Tito 2:15-3:15
13	2 Tesalonika 1:1-12	29	Filemon 1:1-25
14	2 Tesalonika 2:1-17	30	De Judio 1:1-14
15	2 Tesalonika 3:1-18	31	De Judio 2:1-18
16	1 Timoteo 1:1-20		

November

<i>date</i>	<i>Scripture</i>	<i>date</i>	<i>Scripture</i>
1	De Judio 3:1-19	16	De Judio 13:1-25
2	De Judio 4:1-13	17	Santiago 1:1-18
3	De Judio 4:14-5:14	18	Santiago 1:19-2:17
4	De Judio 6:1-20	19	Santiago 2:18-3:18
5	De Judio 7:1-19	20	Santiago 4:1-17
6	De Judio 7:20-28	21	Santiago 5:1-20
7	De Judio 8:1-13	22	1 Pedro 1:1-12
8	De Judio 9:1-10	23	1 Pedro 1:13-2:10
9	De Judio 9:11-28	24	1 Pedro 2:11-3:7
10	De Judio 10:1-18	25	1 Pedro 3:8-4:6
11	De Judio 10:19-39	26	1 Pedro 4:7-5:14
12	De Judio 11:1-16	27	2 Pedro 1:1-21
13	De Judio 11:17-31	28	2 Pedro 2:1-22
14	De Judio 11:32-12:13	29	2 Pedro 3:1-18
15	De Judio 12:14-29	30	1 Juan 1:1-10

December

<i>date</i>	<i>Scripture</i>	<i>date</i>	<i>Scripture</i>
1	1 Juan 2:1-17	17	Kéfégétigan 8:1-13
2	1 Juan 2:18-3:2	18	Kéfégétigan 9:1-21
3	1 Juan 3:3-24	19	Kéfégétigan 10:1-11
4	1 Juan 4:1-21	20	Kéfégétigan 11:1-19
5	1 Juan 5:1-21	21	Kéfégétigan 12:1-18
6	2 Juan 1:1-13	22	Kéfégétigan 13:1-18
7	3 Juan 1:1-14	23	Kéfégétigan 14:1-20
8	Judas 1:1-25	24	Kéfégétigan 15:1-8
9	Kéfégétigan 1:1-20	25	Kéfégétigan 16:1-21
10	Kéfégétigan 2:1-17	26	Kéfégétigan 17:1-18
11	Kéfégétigan 2:18-3:6	27	Kéfégétigan 18:1-24
12	Kéfégétigan 3:7-22	28	Kéfégétigan 19:1-21
13	Kéfégétigan 4:1-11	29	Kéfégétigan 20:1-15
14	Kéfégétigan 5:1-14	30	Kéfégétigan 21:1-27
15	Kéfégétigan 6:1-17	31	Kéfégétigan 22:1-21
16	Kéfégétigan 7:1-17		